

Kaipimi Taita Dius Rimaku

Inga New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

SAN MATEO.....	4
SAN MARCOS.....	41
SAN LUCAS.....	64
SAN JUAN	103
HECHOS	131
ROMANOS.....	167
1 KORINTOPI	183
2 KORINTOPI	198
GALASIAPI CRISTOWA TUKUSKAKUNATA	208
EFESOPI CRISTOWA TUKUSKAKUNATA.....	214
FILIPOSPI CRISTOWA TUKUSKAKUNATA.....	219
KOLOSASPI CRISTOWA TUKUSKAKUNATA	223
1 TESALONIKAPI CRISTOWA TUKUSKAKUNATA	227
2 TESALONIKAPI CRISTOWA TUKUSKAKUNATA	230
1 TIMOTEOTA.....	232
2 TIMOTEOTA.....	237
TITOTA.....	240
FILEMONTA.....	242
HEBREOKUNATA.....	243
SANTIAGO	256
1 SAN PEDRO.....	261
2 SAN PEDRO.....	266
1 SAN JUAN	269
2 SAN JUAN	273
3 SAN JUAN	274
SAN JUDAS	275
APOCALIPSIS	277

SAN MATEO

Jesucristopa ñugpamanda achala taitakuna

1 Jesucristopa ñugpamanda achala taitakuna, kasa-sik suti karkakuna. Pai Jesús, atun taita David i Abrahampa iawarsik karka.

² Abraham, Isaak suti wawata iukarka.
Isaakka, Jakob suti wawata iukarka.
Jakobka, Judá suti i sug waugkindikunatapas iukarka.
³ Judaka, Fares i Zara suti wawakunata iukarka.

Paikunapa mamaka, Tamar suti karka.

Fareska, Esrom suti wawata;
Esromka, Aram suti wawata;

⁴ Aramka, Aminadab suti wawata;
Aminadabka, Naasón suti wawata;
Naasonka, Salmón suti wawata;

⁵ Salmonka, Booz suti wawata iukarka.

Boozpa mamaka, Rahab suti karka.
Boozka, Obed suti wawata iukarka.

Obedpa mamaka, Rut suti karka.
Obedka, Isaí suti wawata iukarka.

⁶ Isaika, atun mandag Davidta iukarka.
Davidka, Salomón suti wawata iukarka.

Paipa mamaka, Uriaspa warmi kaska karka.

⁷ Salomonka, Roboam suti wawata;
Roboamka, Abías suti wawata;
Abiaska, Asa suti wawata;

⁸ Asaka, Josafat suti wawata;
Josafatka, Joram suti wawata;
Joramka, Uzías suti wawata;

⁹ Uziaska, Jotam suti wawata;
Jotamka, Akaz suti wawata;
Akazka, Ezekías suti wawata;

¹⁰ Ezekiaska, Manasés suti wawata;
Manaseska, Amón suti wawata;
Amonka, Josías suti wawata iukarka.

¹¹ Josiaska, Jekonías suti i sug waugkindikunatapas iukarka.

Paikuna kaugsanakunkama, Israel alpamanda runakuna Babilonia suti alpama prisu apai tukurkakuna.

¹² Chi alpama apai tukuskapi,
Jekoniaska Salatiel suti wawata iukarka.

Salatielka, Zorobabel suti wawata;
¹³ Zorobabelka, Abiud suti wawata;

Abiudka, Eliakim suti wawata;
Eliakimka, Azor suti wawata;

¹⁴ Azorka, Sadok suti wawata;
Sadokka, Akim suti wawata;
Akimka, Eliud suti wawata;

¹⁵ Eliudka, Eleazar suti wawata;
Eleazarka, Matán suti wawata;
Matanka, Jakob suti wawata;

¹⁶ Jakobka, José suti wawata iukarka.

Chi Joseka, Mariapa kusami tukugsamurka. Mariaka, Mesías u Cristo suti Jesuspa mamami tukurka.

¹⁷ Chasaka, ñugpa taita Abrahammandata atun mandag Davidkama, chungu chusku achala taitakunasik karka. Davidmandata Israelmanda runakuna Babilonia alpama prisu apai tukunkama, chungu chusku achala taitakunasik tukugsamurka. Chi alpama apai tukuskauramandata Cristo tiagsamunkama, ikuti chungu chusku achala taitakunasik tukugsamurka.

Iaia Jesús tiagsamungapa kaskamanda

¹⁸ Kasami tukugsamurka, Jesucristo tiagsamungapa kaura. Paipa mama María, Josewa kasarungapa karka. Paikuna manara sugllapi kaugsagpi, Mariaka Santu Ispiritumandami wigsitawa ungug ña karka. ¹⁹ Paipa kusa tukunga Joseka kawarka, paipa warmi ña wambrawa ungug kagta. Pai, alli runa kaska, mana munarka, sugkunapa ñawipi pingaiachingapa. Nispa iuiarirka, paimanda pakalla sitaspa anchuringapa.

²⁰ Chasa iuiakunkama, atun Taita Diospa sug anjilka, Joseta muskui ukupi kawarispá, nirka:

—Davidpa wawakunapa wawa José, mana mancharikui. Kamba warmi tukunga Mariata kamba wasima kai. Paika, Santu Ispiritumandami ungug ka. ²¹ Kari wamburami iukangapa ka. Paitaka sutichinkangimi Jesús. Paimi, paipa alpamanda kagkunata pandariskakunata pasinsiaspa, kispichingapa ka.

²² Chasami atun Taita Dios paipa Ispirituwa rimagwa ñugpata willaskasina tukugsamurka. Kasami ñugpamandata willaraiarka:

²³ Uiaichi. Mana kari rigsiska sipas, ungurispa, sug kari wamburami iukagsamungapa ka.

Paita Emanuelmi sutichingapa kankuna. (Emanuel niraianmi “Dios nukanchiwa”.)

²⁴ José, ña rigcharispaka, atun Taita Diospa anjil imasa niskasina rurarka. Mariata paipa wasima warmitasina kaiarka. ²⁵ Chasa kaiaspapas, mana sugllapi tukurkakuna, willaska kari wambura tiagsamunkama. Ña tiagsamuura, paita Jesús sutichirka.

Magukuna, Jesuspagma chaiungapa riskakunamanda

2 Judea alpamanda Belén puiblupimi Jesús tiagsamurka. Chi alpapi kaugsanakuskata mandag, Herodes suti karka. Chiurakuna magu suti istrilla-

kunata iachaikug taitakunaka, indi llugsidirunigmanda Jerusalén puibluma chaiagsamurkakuna. ² Chipika tapunakurka:

—Judiukunapa atun mandag ña tiagsamuska, ¿maipitak ka? Istrilla pai tiagsamuska kawachigtami indi llugsidirupi kawarkanchi. Chimandami samurkanchi, paita kunguringapa.

³ Chasa uiaspa, atun mandag Herodes i Jerusalenpi tukui kaugsanakug iapa mancharirkakuna. ⁴ Herodeska, tukui iaia sasirdutikunata i Moisés ima niskata iachachig taitakunata kaiaspa, tapurkakunata:

—Cristo, ¿maipitak tiagsamungapa willaraiá?

⁵ Chiura ainirkakuna:

—Judá alpamanda Belén puiblupimi willaraiá. Kasami Santu Ispirituwa ñugpamanda rimag nirka:

⁶ Kam Belén, Judá alpamanda sug puiblukunamanda mas uchulla mana kangichu.

Kambagmandami sug atun mandag llugsingapa ka. Paika, nukapa Israel alpamanda tukui runakunata kawaspa ñugpagmi kangapa ka.

⁷ Chasa uiangallawa Herodeska, pakalla magukunata kaiaspa, allilla tapuchirka:

—¿Imauramandatak chi istrilla llugsiskata kawarkangichi?— ⁸ Tukui tapuchispaka, nirka— Belenma riichi. Chipika, chi wawamanda allilla tapungichi. Paita tarispaka, willawagsamungichi, nukapas rispa, paita kunguriringapa.

⁹ Chasa uiaspa, chi magukunaka chimanda llugsirkakuna. Chiura chi istrilla ñugpa kawaskaka, ikuti kawarispaka, ñugparka. Belén puibluma chaiagrispa, chi wawa kaskapi saiarigrirka. ¹⁰ Istrillata kawaspaka, magukuna iapa suma iuiachiiwa tukurkakuna. ¹¹ Chi wasi ukuma iaikugrispaka, wawata mama Mariawanta tarigrirkakuna. Kungurispaka, wawata mucharkakuna. Ima apamuskata paskaspaka, paita kararkakuna: kuri, suma asna insinsu, mira kupal. ¹² Chiuramanda, magukunata muskui ukupi willai tukurkakuna, Herodes-pagma mana kutingapa. Chimanda, pai kikinkunapagma sug ñambita kutirkakuna.

Ejipto alpama mitikuspa riskamanda

¹³ Magukuna ña riskauramanda, atun Taita Diospa anjilka, muskui ukupi kawarispaka, Joseta kasami nirka: —Atarii. Wawata mamandiwanta, Ejipto suti alpama mitikuichi. Chi alpapi chisiagriichi, nuka ikuti kamta willankama. Herodesmi wawata wañuchingapa maskachingapa ka.

¹⁴ Chi tutalla Joseka, atarispaka, wawata mamandiwanta pusaspaka, Ejiptomama mitikurkakuna. ¹⁵ Chi alpapi kaugsagrirkakuna, Herodes wañunkama.

Chasami atun Taita Dios, paipa Ispirituwa rimagwa ñugpata willaskasina tukugsamurka. Kasami ñugpamandata willaraiarka: “Ejipto alpamandami nukapa wambrata kaiarkani”.

Mandag Herodes, wawakunata wañuchichiskamanda

¹⁶ Herodeska iuiarigsamurka: “Nuka imasa niskasina, magukuna mana willawagsamurkakuna”. Chiwanka, iapa rabiawa tukugsamurka. Nispaka, suldadukunata Belén puibluma chi suiu kaugsanakuskapagma kacharka, tukui manara iskaia wataiug kari wambra-kunata wañuchingapa. Istrilla imaura kawariskata magukunata allilla tapuchiskawa iuiarispasi chasa kacharka.

¹⁷ Sutipami Jeremías suti Santu Ispirituwa rimag ñugpata willaskasina tukugsamurka. Kasami ñugpamandata willaraiarka:

¹⁸ Ramá suti puiblupi, iapa llakii wakaikunami uiariku. Chika, Rakel suti mamami paipa wawakunamanda wakaku.

Mana mas paipa wawakuna kawarigsamungapa kagmandami ñi pi mana pudinkuna, paipa llakiita anchuchingapa.

¹⁹ Ña Herodes wañuskauramanda, atun Taita Diospa anjilka, Ejipto alpama rispa, ikuti Joseta muskui ukupi kawarigrirka, ²⁰ kasa nispa:

—Atarii. Wawata mamandiwanta pusaspaka, Israel alpama kutii. Wawata wañuchingapa munagkuna, ñami wañurkakuna.

²¹ Chasa uiaspa José, atarispaka, wawata mamandiwanta pusaspaka, Israel alpama samurkakuna. ²² Chaiagsamuspaka, iacharkakuna, Arkelao suti Herodespa wambra, Judea alpallapita mandag kagta. Chasa iachaspaka, mancharirka chi alpapi kaugsagriringapa. Nispa, muskui ukupi paita willai tukuspa, Galilea suti alpama rirkakuna. ²³ Chima chaiagrispaka, Nazaret suti puiblupi kaugsai kallarirkakuna.

Chasami Santu Ispirituwa ñugpata willaraiaskasina tukugsamurka. Kasami willaraiarka: “Paika, nazareno sutimi kangapa ka”.

Juan Bautista, chusa sitaska alpapi kaskamanda

3 Chi punchakuna Juan Bautista, Judeamanda chusa sitaska alpapi kawarigsamurka, ² kasa nispa:

—Suma luarmanda mandai, ñami chaimungapa ka. Pandariikunata sakispa, Taita Dioswa tukugsamuichi.

³ Paimandami Santu Ispirituwa rimag Isaías suti, kasa willaska karka:

Chusa sitaska alpapi, sug runa kaparispami puriku, kasa nispa:

“Imasami ñambi allichinchi: chasallata alli iuiaikunata apiichi, atun Taita Dios chaskingapa”.

⁴ Juanka, kamello suti animalpa agchata awaska katanga churariskami karka. Karata siñidursina ruraspa chumbilliskami karka. Langosta suti chapulinsina i sachukumanda abijunkunapa dusi miskillami mikuspa kaugsakurka.

⁵ Jerusalén puiblunigmanda, Judea suiu alpamanda i Jordán iaku suiu ladumanda, tukuinigmanda runakuna

paipagma chiai kallarikakuna. ⁶ Paika, Jordán iakupi maikan pandariskakunamanda willarinakuskata baugtiskurka.

⁷ Achka fariseo i saduseo suti taitakunapas, Juan-pagma chaiagrirkakuna baugtisingapa. Chikunata kawaspaka, paika nirka:

—Mana alli runakuna, kulibrasinami kangichi. ¿Pitak kamkunata willagrirkakuna: “Taita Dios iapa rabiari spa llakii puncha, ñami chaimuku. Mitikuichi, kispiriska kangapa?” ⁸ Tukui pandariikunata sakispa, allilla ruraichi.

⁹ Mana iuiari spa kaichi: “Ñugpamanda taita Abrahamapa iawarmi kanchi”. Niikichitami: Taita Dios munagpika, kai rumikunapas pudinkunami, Abrahamapa wambrakuna tukugsamungakuna. ¹⁰ Ñami tukuiimanda justisingapa ka; imasami sachakunata achawa urmachingapa kawaku: chasa. Tukui sacha chusa u mana mikungasina mui u iukaskakunata anguwanta urmachispa, ninapimi churangapa ka.

¹¹ —Kasapas. Kamkuna allilla iuiari spa pandariikunata sakigpika, nuka iakuwami baugtisaikichita. Iku-ti sug nukamanda mas iachaka, nukapa katimi samungapa ka. Paita, nuka mana pudinichu, kungurispapa, paipa chakikunapi churara iaskata surkungapagllapas. Paika, Santu Ispirituwa i nina sindiwasinami baugtisingapa ka. ¹² Imasami chagrapi trigu agllag runa, palawa mana alli ugsakunata chabsichispa anchuchi: chasallatami pai suiaku, mana alli iuiagkunata alli iuiagkunapa chaugpimanda anchuchingapa. Alli trigusina kagkunata sugllapi sumami wakachingapa ka. Ikuti mana alli ugsasina kagkunataka mana wañug ninapi rupakungapami sitangapa ka.

Jesús baugtisariskamanda

¹³ Chi punchakuna Jesuspas, Galilea alpamanda llugsispa, Jordán iakuma chaiagrirkakuna, Juan paita baugtisingapa. ¹⁴ Juanka, piñarispapa nirka:

—¿Imapatak chasa mañawaspa samukungi? Nukata-mi iukarkangi, kam baugtisa-wanga.

¹⁵ Jesuska ainirka:

—Baugtisa-wailla. Chasami chaiaku, Taita Dios tukui imasa niskasina nukanchi rurangapa.

Chasa ainiura, Juanka paita baugtisarika.

¹⁶ Jesús baugtisa i tukungallawa, iakumanda llugsirka. Chiuralla, awa suma luar paskarirka. Chimanda kawarka, Diospa Ispiritu palumasina rigcha kawarispami paipagma uraikumugta. ¹⁷ Suma luarmanda rimaipas uia-rigsamurka, kasa nispapa:

—Kai, nukapa kuiaska wambrami kapuá. Paita kawaspapa, iapa alli sumami iuiachi-wa kawani.

Iaia kuku, Jesusta pandariikunapi urmachingapa munakuskamanda

4 Chiuramandaka Santu Ispiritu, chusa sitaska alpama Jesusta pusarka. Chipika iaia kuku, pandariikunapi paita urmachingapa munakurka. ² Chusku chungapuncha tutakunawantami Jesús mana ñi imapas mikuspalla chisiakurka. Nispakapa, iapa iarkaimanda

iuiachigsamurka. ³ Chiura chi mana allilla iuiachig iaia kukuka, paipagma chaiagrispa, nirka:

—Kam Diospa wambra kagpika, kai rumikunata nii: “Tanda tukuichi”.

⁴ Jesuska ainirka:

—Ñugpamanda librupi, kasami willaraiá:

Runakuna, mana tandallawa kaugsangapa kan-kunachu.

Taita Dios tukui ima rimaskakunawami kaugsangapa chaiá.

⁵ Nispakapa chi iaia kuku, Jerusalén suti Taita Diospalla kaska puibluma pusaspapa, Diospa atun wasi awa pun-tapi saiachigrirka. ⁶ Nispakapa, nirka:

—Kam Diospa wambra kagpika, alpama sitarii. Ñugpamanda librupi, kasami willaraiá:

Taita Dios, paipa anjilkunatami ninga, kamta kawag-samungapa.

Paikunapa makipimi urmankangi.

Chasaka, mana rumipi u imapipas chaki takarinkangichu.

⁷ Jesuska ainirka:

—Kasapasmi willaraiá:

Kamba atun Taita Diusta mana ianga ningi: “Abir kawasaki: ¿pudingichu?”.

⁸ Ikuti chi iaia kukuka, iapa awa filuma pusaspapa, kai luarpi tukui alpakuna i tukui ima chipi suma tiaskakunata kawachirka. ⁹ Nispakapa, nirka:

—Kam kunguriwagpika, tukui kawarkangi: chikunatami karasaki.

¹⁰ Chiura Jesuska, chi iaia kukuta nirka:

—Nukapa ñawimanda anchurii. Ñugpamanda librupi, kasami willaraiá:

Kamba atun Taita Diosllata kungurispapa kangi.

Pai ima niskallatami iukangi ruraspa kanga.

¹¹ Chasa niura, chi iaia kuku, Jesusta sakispa, anchurirka. Chiuralla anjilkuna, samuspa, paita ima minis-tiskami karagsamurkakuna.

Galilea alpapi, Jesús willai kallarikamanda

¹² Juan Bautista karsilpi wichkaska kagta iachaspapa, Jesuska Galilea alpama rirka. ¹³ Manima Nazaret puiblupi kidarirka. Kafarnaum suti puiblupimi kaugsai kallarikarika.

Chi Kafarnaumka, Galilea atun kucha ladupimi ka, Zabolón i Neftalí suti ñugpamanda taitakuna kaugsaska alpapi.

¹⁴ Isaías suti Santu Ispirituwa rimag, ima ñugpamanda willaska tukugsamungapami Jesús chipi kaugsangapa chaiarka. Kasami Isaías niska karka:

¹⁵ Zabolón i Neftalipa alpakunapi, atun kuchama ridiru ñambi ladu suiu, Jordán iaku sug ladu chimba,

Galilea alpapimi Taita Diusta mana rigsikuna kaugsankuna.

¹⁶ Chi alpakunapi iana tutapisina kaugsanakug, sug atun punchaiachigsina runatami kawangapa kan-kuna.

Chi alpa suiu, wañungapa manchaiwa kaugsanakuskapimi

chi runa kawarigsamungapa kankunata.

¹⁷Jesuska, Kafarnaum puiblupi kaugsakuspaka, kasami willai kallairka:

—Suma luarmanda mandai, ñami chaiamungapa ka. Pandariikunata sakispa, Taita Dioswa tukugsamuichi.

Chusku chawadurkunata, Jesús kaiaskamanda

¹⁸Galilea atun kucha pata pata purikuspa, Jesús, iskai waugkindikunata kawarka: sug, Simón suti; paillatata Pedro. Sugka, Andresmi suti karka. Paikuna, chawadurkuna kaspera, ataraia iaku ukuma sitaspami purinaturka. ¹⁹Paikunata kawaspaka, Jesuska nirkakunata:

—Katiwaichi. Iachachisakichitami, chawakunata apigsina, runapura maskapuagkuna kangapa.

²⁰Chasa uiangallawa, ataraiakunata sakispa, Jesusta katirkakuna.

²¹Chimanda mailla riskapi, ikuti Jesús, sug iskai waugkindikunatami kawarka. Paikuna, Zebedeopa wambrakunami karka; sug Santiago suti; sugka Juan. Paikuna, taitandiwa kanuapi kaspera, ataraiakunata allichinakurka. Paikunata kawaspaka, Jesuska kaiarkakunata. ²²Paikunapas, uiangallawa, taitata i kanuata sakispa, Jesusta katirkakuna.

Jesús, iapa achka runakunata iachachiskamanda

²³Chimanda Jesuska, Galilea alpa suiu, judiukuna tandariduru wasikunapi iachachispa, Diospa suma mandaimanda Alli Willaita willaspa, tukuikunata maikunawaku kaskakunatapas ambispami puriturka. ²⁴Siria suti alpa suiupasmi paimanda iapa iacharigrirka. Chiwanka, tukui ungugkunata paipagma pusanakurka. Sug rigcha sug rigcha ungui i nanai-kunawa kaskakunata, kuku wairawa kagkunata, wañui ungui iukaskakunata, mana kuirpu kuiuringapa pudigkunatapas, tukui chasakunatami Jesús ambispa puriturka. ²⁵Chi punchakuna iapa achka runakuna, paiwa sugllapi tandaripa purinaturka, Galilea i Judea alpa-kunanigmamanda, Dekápolis suti puiblukunanigmamanda, Jerusalennigmamanda i Jordán iaku sug ladu chimbanigmamanda.

Awa lumapi, Jesús iachachiskamanda

5 Chi achka runakunata kawaspaka, Jesús awa lumama rirka. Chipi tiarigriura, paita katiraiagkuna kaillaiagrirkakuna. ²Chiura, Jesuska iachachii kallairirkakunata, kasa nispa:

³—Kamkuna, Taita Dioswa iuiarispa, mana iukagsina tukugkuna, paipa iapa kuiaskami kangichi. Chasa kagkuna, Dios suma mandakuskapimi iaikugringapa kangichi.

⁴—Piwapas mana atuniachiriska iuiaspa kagkunaspa, Taita Diospa iapa kuiaskami kangichi. Chasa kagkuna, kai alpa duiñu karaska kagkunami niraiangapa kangichi.

⁵—Kunaura iapa llakiiwa wakanakuskapas, Taita Diospa iapa kuiaskami kangichi. Chasa kagkunata, paipi sumaglla llakiiikunata anchuchingapa ka.

⁶—Iarkai i iakunaiwasina Taita Dios imasa munaskasina rurangapa munagkunapas, paipa iapa kuiaskami kangichi. Paillatata ima alli munaskata karamungapa ka.

⁷—Sugkunamanda iapa llakiiwa kagkunapas, Taita Diospa iapa kuiaskami kangichi. Chasa kagkunamanda, paipasmi iapa llakiiwa kawangapa ka.

⁸—Tukuipi allilla suma iuiaspa kagkunapas, Taita Diospa iapa kuiaskami kangichi. Chasa kagkuna, paipa ñawitami kawagringapa kangichi.

⁹—Rabiawa kagkunata pasinsiachigkunapas, Taita Diospa iapa kuiaskami kangichi. Chasa ruragkunata, pai ningapami ka: “Nukapa wambrakunami kangichi”.

¹⁰—Kamkuna alli ruraspa kaugsanakugmamanda, sugkuna mana suma kamkunata ruranakugpipas, Taita Diospa iapa kuiaskami kangichi. Chasa pasaspa kagkuna, Dios suma mandakuskapimi iaikugringapa kangichi.

¹¹—Nukamanda iuiarispa, maikanpas kamkunata kamispa, mana suma ruraspa, kamkunamanda llullaspa juchachispa rimagpikunaka, Taita Diospa iapa kuiaskami kangichi. ¹²Chasa mana allilla kamkunata ruragpipas, kuntintarisalla kangichi. Kamkunata Taita Dios, sug luarpi askurinti sumami tukui karangapa ka. Chasallatami kamkunamanda mas ñugpa kaugsaskakuna, Santu Ispirituwa rimagkunatapas mana allilla rurarkakuna.

“Kachisina i iuiaikunata punchaiachigsinami kangichi”

¹³—Kamkuna, kai alpapi kaugsanakuskamanda kachisinami kangichi, tukuikuna mas sumaglla kaugsanakungapa. Kachi waggllirigpika, mana pudiringachu kachiachingapa. Ñi imapas mana balingapa kanchu. Chasataka, sitaimi chaiá, pipas saruspa ialingapa.

¹⁴—Kamkuna, kai alpapi kaugsanakuskapa iuiaikunata punchaiachigkunami kangichi. Maikan puiblu luma awapi tiag, mana pakallapimi ka. ¹⁵Chasallata, ñi pipas mana bila sindichinkangichichu, kawitu ukuma churangapa. Awapimi churangapa kangichi, tukui chi ukupi kagkunata punchaiachingapa. ¹⁶Chasallata kamkunapas, runakunapa ñugpa ladu alli ruraikunawa punchaiachigkunasina kaugsangichi. Chasapika, kamkunapa alli ruraikunata kawaspaka, paikunapas kamkunapa Taita Dios suma luarpi kagtami iapa suma atuniachingapa kankuna.

Moisés ima rurangapa niskamanda

¹⁷—Mana samurkanichu, Moisés i Santu Ispirituwa rimagkuna ima rurangapa niskata puchukangapa. Mana chasa iuianakuichi. Chikunapi ima willaraiaskata rurangapami samurkani. ¹⁸Kasami nuka niikichita: sug luar i kai alpa luar tukurigsina kagpipas, chi ñugpamanda ima willaraiaskaka, ñi mailla mana anchuchii tukungapa kanchu. Tukui imasa ñugpamanda librupi

willaraiaskasinami tukungapa ka. ¹⁹ Chasamanda, maikanpas tukui ima niskata mana ruraspa sugkunatapas chasallata iachachigpika, suma luarma iaikugripura mas uchullami niraiangapa kankuna. Ikuti maikanpas tukui ima niskata ruraspa sugkunatapas chasallata iachachigpika, suma luarma iaikugripura atunmi niraiangapa kankuna. ²⁰ Kasami niikichita: Moisés ima niskata iachachig taitakuna i fariseokunamandapas mas allilla kamkuna mana ruragpikunaka, suma luarma mana iaikugringapa kangichichu.

Rabiariskamanda

²¹ —Ñami ñugpamanda runakunata kasa niraiaskata uiarkangichi: “Mana wañuchingichi. Maikan wañuchigtaka justisiaimi tukungapa ka”. ²² Chasa kagpipas, nukaka kasami niikichita: piwapas rabiarigkunatami justisiai tukungapa kankuna. Maikan kamigkunata mas atun justisiaimi tukungapa kankuna. “Kam, iapa upaiaskami kang’i” maikan nigkunata diltudupa ninamami sitai tukungapa kankuna.

²³ —Chasamanda kamta, kamariku altarma apakuura sug runawa mana allilla kagta iuiarigpi, ²⁴ kamarikuta sakispa, ñugpa ringapami chaiá, chi runawa allilla tukungapa. Chiuramanda kutingi, kamarikuta Taita Diusta kawachingapa.

²⁵ —Maikan kamta dimandaspa, justisiapagma pusanakugpika, chara ñambi rinakuskallapi paita sumaglla rimangi, manara justisiapagma chaiachigrigpi. Mana kagpika, chaiachigriura, justisiaka kamta alwasilkunapa makipimi sakinga. Chiura alwasilkunaka, kamta karsilpimi wichkanga. ²⁶ Kasami nuka niiki: chi-manda mana llugsingapa kangichu, tukui kulki manara kutichinkama.

Kari warmiwa atun pandariskamanda

²⁷ —Ñami kasa niraiaskata uiarkangichi: “Mana sugpa warmiwa pandarikungi”. ²⁸ Chasa kagpipas, nukaka kasami niikichita: maikanpas, sugpa warmita kwaspa, paiwa siriringapa munaspaka, ñami chasa iuiaipi atun pandarii rurarkangichi.

²⁹ —Kasapas. Kamkunapa alli ñawiwawa kwaspa, pandaringapa kagpika, chi ñawita chaianmi surkuspa sitangapa, mana pandaringapa. Chasapaka, mas allichar kantra, kuirpumanda suglla imapas sitaspa, pisi kangapa. Mana kagpika, ¿tukui kuirpuwantachu munaipa, diltudupa ninama sitai tukungapa?

³⁰ —Chasallata, kamkunapa alli makiwa pandaringapa kagpika, chi makita chaianmi kuchuspa sitangapa, mana pandaringapa. Chasapaka, mas allichar kantra, kuirpumanda suglla imapas sitaspa, pisi kangapa. Mana kagpika, ¿tukui kuirpuwantachu munaipa, diltudupa ninama ringapa?

Warmita sitagkunamanda

³¹ —Kasapasmi Moisés ima willaraiaskapi niraiarka: “Maikanpas kikinpa warmita sitangapa munagpika, chasa munaskata iskribispa, chi warmita kuangichi”.

³² Chasa kagpipas, nukaka kasami niikichita: maikanpas, kikinpa warmita imamandallapas sitagpika, atun pandariima kachagsinami rurá. Chi warmi sug kariwa apirigpika, chimandakar pudinmi sitanga. Chasallata, maikanpas kusa sitaska warmiwa kasaragpika, atun pandariimi rurá.

Taita Diospa ñawipi allilla nikuskamanda

³³ —Kasapasmi ñugpamanda runakunata niraiarka: “Atun Taita Diospa ñawipi mana llullangichi. Imasami Taita Diospa ñawipi allilla rurangapa nirkangichi: chasa rurangichi”. ³⁴ Chasa kagpipas, nukaka kasami niikichita: mana imatapas kawag churangichi, kam nikuska allilla kagta. Suma luarta mana kawag churangichi; suma luar, Taita Diospa mandadirumi ka. ³⁵ Kai alpatapas mana kawag churangichi; kai alpa, paipa sarudirumi ka. Jerusalentapas mana kawag churangichi; chita, tukui manduiug Taita Diospa puiblumi ka. ³⁶ Kamkunapa umatapas mana kawag churangichi; kamkuna manima pudingapa kangichichu, ñi sug agcha iuraiachingapa u ianaiaichingapa. ³⁷ Chasapaka, “Ari” ningapa chaiagpika, “Ari” ningichilla. “Mana” ningapa kaura, ningichilla: “Mana”. Imatapas chiwa kawag churagpika, iaia kukumi iuiachiku.

“Kamkunata jiru ruraskakunata mana randichingichi”

³⁸ —Ñami kasa ñugpamanda niraiaskata uiarkangichi: “Maikanpas rabiarispa ñawi surkuskataka chasallata randichingapa. Maikanpas kiru llugsigta piaskataka chasallata randichingapa”. ³⁹ Chasa kagpipas, nukaka kasami niikichita: maikanpas kamta mana suma rurasakunata mana randichingi. Pipas alli ladu kachitipi kamta piagpika, sug ladu kachitipi piangapapas sakingi. ⁴⁰ Maikan kamta dimandaspa, kusma kichungapa munagpika, kapisaiutapas kuangi apachu. ⁴¹ Maikanpas kamta chungu kuadra aparispa katingapa chaiagpika, iska chungu kuadrapas katingi. ⁴² Maikanpas ima mañaskata karangilla. Maikan “Mañachiwai” niskata, ¿ujalallapas ningi: “Mana”!

“Kamkunata mana munagkunata kuiangichi”

⁴³ —Ñami kasa ñugpamanda niraiaskata uiarkangichi: “Kamkunapa iacharidukunata kuiaimi iukangichi. Ikuti kamkunata mana munagkunatakar rabiawa kawangichi”. ⁴⁴ Chasa kagpipas, nukaka kasami niikichita: kamkunata mana munaspa piñanakuskata kuiangichi. Kamkunata mana suma ruraspa puchungapa munanakuskamanda, Taita Diusta paikunamanda allilla mañapungichi. ⁴⁵ Chasawaka, kamkunapa Taita Dios suma luarpi kagpa wambrakunami tukungapa kangichi. Paimi alli ruragkunamanda i mana alli ruragkunamandapas indi llugsichimú. Chasallata, alli runakunamanda i mana alli runakunamandapasmi tamiachimú.

⁴⁶ —Kasapas. Kam kikinpuralla kuianakuspa kagpika, kamkunata, ¿imatak Taita Dios karangapa suianakungichi? Maikan mana suma ruragpurapas † kuiana-

kuspami kaugsankuna. ⁴⁷ Kamkunapa waugkindipuralla “Puangi” ninakugpika, ¿imapitak allilla ruranakungichi? Chasami Taita Diusta manara rigsigkunapas, kikin-pura kaugsanakú. ⁴⁸ Imasami kamkunapa Taita Dios suma luarpi kag, tukuipi alli ka: chasallatami kamkunapas iukangichi, tukuipi alli kangakuna.

Imasa allilla rurangapa chaigta

6 —Sugkunata: “Allimi kani” kawachiringapaglla, Taita Dios imasa niskasina ruranakugta mana rurangichi. Chasa ruragkunata, Taita Dios suma luarpi kag, kawaspa, mana ñi imapas karangapa kanchu.

² —Chimanda, kamkuna imapas sugkunata karangapa chaiaura, kawachiringapaglla mana karangichi. Chasa karagkuna, tandariduru wasikunapi i ñambikunanigta tukuikunata willaspa purinkuna, sugkuna paikunamanda “Iapa allimi ka” niwachukuna iuiaspalla. Kasami nuka niikichita: chasa ruraspa purigkuna, ñami kaipi munaskasina chaskirkakuna. Ikuti sug luarpika ñi ima manima chaskingapa kankunachu.

³ —Kamkuna imapas karaskataka, ñi kamba wasi ukupurallapas mana iachachukuna. ⁴ Pakalla karag-sina rurangichi. Chasawaka, kamkunapa Taita Dios pakallata kawagmi kamkunata imasa chaiaskasina karangapa ka.

Imasa Taita Diusta mañangapa chaigta

⁵ —Chasallata, kamkuna Taita Diusta mañangapa chaiaura, kawachiringapaglla mana mañangichi. Chasa rimagkuna, tandariduru wasikunapi i ñambikunanigta saiarispami Taita Diusta mañankuna, “Sugkuna kawawachukuna” iuiaspalla. Kasami nuka niikichita: chasa ruragkuna, ñami kaipi munaskasina chaskirkakuna.

⁶ —Kamkunaka, Taita Diusta mañangapa kaura, ukuma iaikuspa, pungukuna wichkarispa, Taita Dios kamkunapa ñawiwa mana kawarigta mañangichi. Pai Taita Dios pakallata kawagmi kamkunata imasa chaiaskasina karangapa ka.

⁷ —Kamkuna Taita Diusta mañanakuura, ikuti ikuti ianga rimarisa mana mañangichi. Taita Diusta mana rigsigkunami iuiankuna, chasa ikuti ikuti rimarisa mañaura, Taita Dios uiangapa kagta. ⁸ Kamkunaka, mana paikunasina mañangichi. Kamkuna manara mañagpi, kamkunapa Taita Dioska ima ministiskakunata ñami iachá. ⁹ Chimanda kamkuna, Taita Diusta mañanakuura, kasa ningichi:

Nukanchipa Atun Taita, suma luarpimi kangi. Kam tukuipi mas alli kagta tukuikuna nisunchi.

¹⁰ Nukanchiwa samui, iaia kangapa.

Imasami suma luarpi kam munaskata rurankuna: chasallata kai alpapiipas rurasunchi.

¹¹ Kuna puncha, tanda ministiska nukanchita karamui.

¹² Nukanchi ima pandariskakunata pasinsiai.

Chasallata nukanchipas, sugkuna ima llakichiskakunata pasinsianchimi.

¹³ Mana sakii, nukanchi mana alli iuiakunata iuianakungapa.

Tuku mana allikunatapas nukanchita kispichii.

¹⁴ —Kasapas. Sugkuna ima llakichiskakunata kamkuna pasinsiagpika, kamkunapa Taita Dios suma luarpi kagpasmu kamkunata pasinsianga. ¹⁵ Ikuti kamkuna sugkunata mana pasinsiagpika, Taita Diospas kamkuna pandariskakunata manami pasinsianga.

Imasa Taita Diosmanda iuiarisa, mana mikuspalla kangapa chaigta

¹⁶ —Ikuti chasallata, kamkuna Taita Diosmanda iuiarisa mana mikuspalla kangapa chaiaura, kawachiringapaglla mana rurangichi. Chasa ruragkuna, llulla ñawiwa iapa irkiaspami tukunkuna, “Sugkuna kawawachukuna” iuiaspalla. Kasami nuka niikichita: chasa ruragkuna, ñami kaipi munaskasina chaskirkakuna.

¹⁷ —Kamkunaka, Taita Diosmanda iuiarisa mana mikuspalla kaura, ñawi suma maillarisa, uma llambu kangichi. ¹⁸ Chasa, sugkunaka mana iachangakunachu, mana mikuspalla kagta. Taita Dios kamkunapa ñawiwa mana kawarig, paillami iachangapa ka. Pai Taita Dios pakallata kawagmi imasa chaiaskasina kamkunata karangapa ka.

“Rurangichi, suma luarpi wakachikuskasina, chipi iukag kangapa”

¹⁹ —Mana kai alpapi mirachingichi, iapa iukag kangapa. Burbujumi kaipi wagglichispa puchukankuna. Chasallata, iru wakariskasinami tukunkuna. Sisaikunapasmi kichunkuna. ²⁰ Chasapaka rurangichi, suma luarpi wakachikuskasina, chipi iukag kangapa. Chipika, burbuju mana tiangapa kanchu, wagglichispa puchukangapa. Ñi mana imapas wakariska tukungapa kanchu. Ñi sisaikuna mana tiangapa kanchu. ²¹ Kamkuna maipi wakachiskapimi kamkunapa iuiaita churasaka kangichi: kai luarpi u sug luarpi.

Ñawi, kuirpupi punchaiachigsinamanda

²² —Kamkunapa ñawikuna, kuirpupi punchaiachigsinami kankuna. Imatapas alli iuiaiwa kawagpika, kamkunapa kuirpupas suma punchaiagsinami kangapa ka. ²³ Ikuti mana alli iuiaiwa kawagpika, kamkunapa kuirpupas iana tutapi kagsinami kangapa ka. Kamkunapa iuiai mana punchapisina kagpika, tukuimi mas iana tutapisina kangapa ka.

Taita Diosmanda i kulkimanda

²⁴ —Ñi maikanpas, iskai patrunkunapa sugllapi mana trabajapungapa pudingapa kankunachu. Sug patrunta mana munangachu; ikuti sugtaka kuiangami. Sug patrunta wabutingami; ikuti sugtaka sumagllami riman-ga. Chasallata, Taita Diusta i kai alpamanda iukai-kunata mana pudinkangichichu, iskandima suuralla iuiakungapa.

† griego rimaiwa: mana judíu kaskakunamanda kulki chaskig.

²⁵ —Chimandami kasa niikichita: mana iapa iuiarinakungichi: “¿Imatak mikusunchi i upiasunchi, nukanchi kaugsankama? ¿Ima katangatak churarisunchi?”. Kamba kaugsaika, mikuikunamanda masmi ka. Chasallata kamba kuirpupas, katangamanda masmi ka. ²⁶ Piskukunamanda iuiariichi. Paikunaka mana tarpunkunachu. Mikui pallaspa, mana wakachinkunachu. Chasa kagpipas, kamkunapa Taita Dios suma luarpi kagka ñi ima mana pisichinkunatachu. Kamkunaka, piskukunamanda mas balimi kangichi.

²⁷ —¿Pikunatak, maituku iuiarisppapas, sug palmullapas awa wiñai pudingapa kangichi? Ñi pipas manima. ²⁸ ¿Imapatak iapa iuiarinakungichi: “¿Ima katangatak churarisunchi?”? Kawaichi imasa liriutugtukuna chagrapi suma wiñariskakunata. Iuiariichi: paikuna mana puchkaspa awankunachu. Ñi ima mana rurankunachu. ²⁹ Kasami niikichita: ñi atun mandag Salomón, pai tukui iapa suma katanga churarisppapas, chi tugtukunamanda mas suma mana kawarirkachu.

³⁰ Ugsa kuna puncha chagrapi suma kaskata, kaiandi rupachingapa kagta, Taita Dios chasa suma kawá. Kamkunataka, ¿imawantak mana mas sumaglla kawanga? Kamkuna mana allilla Taita Diosmanda iuiarispa kagkuna, paita mas sumaglla iuiariichi.

³¹ —Chimanda, mana iapa iuiarinakungichi: “¿Imatak mikusunchi? ¿Imatak upiasunchi? ¿Ima katangatak churarisunchi?”. ³² Kai alpamandalla iuiaiwa kagkunami chasa maskaspa kaugsanakú. Kamkuna tukui ima ministiskakunamandaka, kamkunapa Taita Dios suma luarpi kag ñami iachá.

³³ —Kamkuna ñugpa suma iuiarispa kangichi, Taita Dios imasa mandaskasina kaugsangapa. Chasallata, pai imasa niskasina rurangapa iuiarispa kangichi. Chasa kagpikunaka, kamkunata tukui ima ministiskakunatami karamunga.

³⁴ —Chimanda, mana iapa iuiarinakungichi: “Kaia, ¿imasik pasasa?”. Kada punchami ima llakiikunapas tiagsamú. Kaiamanda llakiikunata mana iuiaringichi.

“Mana pitapas pandariskakunata kawangichi”

7 —Mana pitapas pandariskakunata kawangichi. Chasaka, Taita Dios mana kamkuna pandariskata kawangachu. ² Imasami kamkuna, sugkuna pandariskakunata kawangichi: chasallatami Taita Dios, kamkunatapas pandariskata kawangapa ka.

³ —Nigpika, ¿imapatak sugpa ñawipi juituriska ugsata kawakungi; ikuti kam kikinpa ñawipi sug atun ugsa juituriska iukaskataka mana kawaringi? ⁴ Chasallata, kam kikinpa ñawipi chi atun juituriska iukaspaka, ¿imasatak sugta ninkangi: “Ñawipi juituriska ugsata anchuchisaki”? ⁵ Sungu awalla rimag, kam kikinpa ñawita chi atun juituriska iukaskata ñugpa anchuchirii. Chasa ruraspami allilla kawangkangi, sugpa ñawita juituriska ugsata anchuchingapa.

⁶ —Kasapas. Taita Diospalla tiapuskata, ¿alkukunatachu sitapuntrangichi; chiwanka, kam kikinkunata rabiarispa kaningapa? ¿Kamkunapa kuri pirlakunatachu kuchikunata sitapuntrangichi, sarungapa?

Manima. Chasallata, Diospa Rimaita mana sitagsina rurangichi, maikan mana suma iuiaiwa chaskingapa.

Taita Diusta mañagpika, karamungapami ka

⁷ —Taita Diusta mañagpika, karamungapami ka. Paita maskagpika, taringapami kangichi. Pungu takachigrigpika, kamkunata paskapungapami ka. ⁸ Maikanpas chasa mañagpika, chaskingapami ka. Maikanpas maskagpika, taringapami ka. Maikan pungu takachigrigpika, iaikuchingapami ka.

⁹ —Sug wambra, paipa taitata tanda mañakugpika, ¿rumichu karantra? ¹⁰ Chasallata, chalwa mañakugpika, ¿kulibrachu karantra? Manima. ¹¹ Kamkuna, mana alli kaspapas, kamkunapa wambrakunata suma imapas karangichi. Nigpika kamkunapa Taita suma luarpi kagka, ¿imawantak mana sumaglla karamunga, maikan suma mañagpika?

¹² —Imasami munanakungichi, sugkuna kamkunamanda allilla rurachukuna: chasallata kamkunapas, paikunamanda allilla rurangichi. Chasami Moisés i Santu Ispirituwa rimagkuna iachachiska niraiá.

Kichki pungusinamanda

¹³ —Suma luarma iaikugringapa, kichki pungupisina ialingichi. Diltudupa chingangapa luarma ridiru, atun suma ñambisinami ka. Chima iaikudiru, atun pungu paskaskasinami ka. Achkakunami chi pungusina kaskapi iaikunkuna. ¹⁴ Ikuti diltudupa kaugsai iukangapa luarma ridiruka, iapa amchi ñambisinami ka. Chima iaikungapa, iapa kichki pungusinami ka. Maillakunallami chi ñambisinata katichinkuna.

“Runakuna ima ruraskata kawaspami paikunata rigsinkangichi”

¹⁵ —Iuiaipilla uiangichi. Llullakunami tia, kasa nispa: “Santu Ispirituwa rimagmi kani”. Chikuna, ubijasina alli kawarispami kamkunapagma samungakuna. Nigpika paikunapa iuiaipika, sug sacha alku imatapas mikungapa iuiaiwa kagsinami kankuna. ¹⁶ Imasami kawangichi sachakuna, miski muiuu winja muiuu tiarigta: chasallatami paikunata ima ruraskata kawaspaka, rigsinkangichi. Ispinauiug sachakunapi, mana ubas muiuu tandachirinchi. Chini sachakunapi, mana igus pallarinchi. ¹⁷ Maikan alli sachakunapimi miski muiukuna tukú. Mana alli sachakunapika, winja muiukunami tukú. ¹⁸ Alli sachakunapi, winja muiukuna mana tukugsamunchu. Mana alli sachakunapika, miski muiukuna mana tiarinchi. ¹⁹ Tukui sacha mana allilla muiuu tukuskakunata kuchuspa, ninapimi churangapa chaiá. ²⁰ Chasallata, runakuna ima ruraskata kawaspami paikunata rigsinkangichi.

Tukuikuna, suma luarma mana iaikugringapa kankunachu

²¹ —Achkakunami nukata: “Iaia Jesús, Iaia Jesús” niwankuna. Chasa niwagkuna, tukuikunaka suma luarma mana iaikugringapa kankunachu. Nukapa Taita

suma luarpi kag imasa pai munaskasina alli ruragkunallami iaikugringapa kankuna. ²² Chi puncha, achkakunami niwangapa kankuna: “Iaia Jesús, ¿manachu kammanda willaspa purirkanchi? ¿Manachu, kammanda iuiarispa, kuku wairakunata llugsichirkanchi? ¿Manachu achka mana imaurapas kawaskasina kammanda iuiarispa rurarkanchi?”.

²³ —Nukaka, chiura ainingapami kani: “Kamkunata mana imaurapas rigsiikichitachu. Kamkuna mana allilla ruragkuna, nukapa ñawimanda anchuriichi”.

²⁴ —Chimandami niikichita: maikan nuka ima rimaskata uiaspa ruragkuna, suma iuiaiug runasinami kankuna. Chi runa, rumisina muruchu alpapi wasichirka.

²⁵ Tamia samurka; iaku jundarka; sinchi wairapas pukugsamurka. Maituku chi wasita piagrikugpipas, manima urmarkachu, rumisina muruchu alpapi saichiska kagmanda.

²⁶ —Maikan uiawaspapas, nuka imasa rimaskasina mana ruragkunaka, mana iuiaiug runasinami kankuna. Chi runa, kaskaju awallapi wasichirka. ²⁷ Tamia samurka; iaku jundarka; sinchi wairapas pukugsamurka. Chi wasita iaku jundaspa piagrigllapi, urma-chispa, wagllichispami aparka.

²⁸ Jesús chasa rimaskata puchukauraka, chipi kagkuna, pai iachachiskata uiaspa, iapa ujnirirkakuna.

²⁹ Paikunapa iachachig taitakunasinalla pai mana iachachirkachu. Tukuikunamanda mas suma allilla mandagsinami iachachirka.

Aicha ismui unguiwa kaskata, Jesús ambiskamanda

8 Jesús chi lumamanda uraikuuraka, iapa achka runakuna paita katichirkakuna. ² Diulpilla sug runa, aicha ismui ungui iukaspa, paipagma kaillaigrirka. Chi runaka, kungurispa, nirka:

—Taita waugki, kam munaspaka, pudingimi nukata ambiwanga.

³ Chiura Jesuska, unguhta maki churaspa, nirka:

—Ari, munanimi. Ambiriska tukui.

Chasa nigllapi, chi ungui allilla ambirigsamurka.

⁴ Chiura, Jesuska nirka:

—Uiamui. Mana pitapas willakungi. Sasirdutita kawa-chirigrii. Moisés kamariku karangapa niraiaskasina karagrii. Chasaka, tukuikunami kawangakuna, kam allilla ambiriska kagta.

Suldadukunata mandagpa lutrinta, Jesús aliachiskamanda

⁵ Jesús Kafarnaum puibluma chaiagrikuskapi, Romamanda achka suldadukunata mandagka, paita kaillaiaspa mañarka, ⁶ kasa nispa:

—Taita waugki, nukapa uchulla lutrinmi mana kuiuringapa unguiwa sinchi nanaiwa wasipi siripuaku.

⁷ Chiura, Jesús nirka:

—Nuka, kambagma rispa, aliachigrisami.

⁸ Chi runaka ainirka:

—Taita waugki, nuka mana mirisinichu, kam nukapa wasi ukuma iaikugringapa. Chasapaka, sug rimaila ni-

puai; nukapa unguug ambiripuangallami. ⁹ Nukapas, sugkuna mandawaskapimi kani. Chasallata nukapas, sug suldadukunata mandagmi kani. Maikan suldaduta nuka “Rii” nisa; chiura rinllami. Ikuti maikanta: “Samui” nisa; chiura samunllami. Nukapa lutrinta: “Kasa rurali” nisa; chiura ruranllami.

¹⁰ Chiura Jesús, chi runata ujnarispa uiarka. Nispaka, katiraiagkunata nirka:

—Kasami nuka niikichita: ñi maikan Israelmanda runa, kai mandagsina suma allilla iuiawag mana tarirkanichu. ¹¹ Kasami niikichita: mana judúu kagkunaspa, [†] achkakunami suma luarma iaikugringapa kankuna, Dios suma mandakuskapi, Abraham, Isaak i Jakobwa sugllapi kangapa. ¹² Ikuti Taita Dios kikin agllaska judiukunaka, mana uiawagmanda, iana tuta kanchapisina diltudupa ninamami sitai tukungapa kankuna. Chipi, iapa llakispa, wakaspa, kiru mukuspa-mi kangapa kankuna.

¹³ Chasa nispaka, chi mandagta nirka:

—Riilla kamba wasima. Imasami kam nukamanda suma iuiawangi: chasallata kam iuiakuska, suma tukuchu.

Chiurallami chi unguug ambirigsamurka.

Pedropa suigrata, Jesús ambiskamanda

¹⁴ Chimandaka Jesús, Pedropa wasipi iaikugrirka. Chipika Pedropa suigra, rupaiwami unguug sirikurka. Chasa kawaspa, ¹⁵ Jesuska paipa makita tantiarka. Tantiauralla, rupai anchurirka. Chiura chi warmi, atarispa, mikui ianuspa, karai kallarkakunata.

Achka unguugkunata, Jesús ambiskamanda

¹⁶ Chi tuta, kuku wairawa kaskakunata, achkakunata-mi Jesuspagma chaiachigrirkakuna. Chiura, suglla rimailawami chi kuku wairakunata llugsichirka. Tukui unguiwa kaskakunatapasmu ambirka.

¹⁷ Chasami tukugsamurka, Isaías suti Santu Ispiritu-wa rimag ñugpata willaskasina. Kasami willaraiarka: “Nukanchipa llakii i unguikunatapasmu pai aparka”.

Iskai runakuna, Jesusta katingapa munanakusamanda

¹⁸ Iapa achka runakuna, Jesusta muiuchirkakuna. Chasa kawaspa, Jesuska paita katiraiagkunata nirka: —Kai kuchata chimbasunchi.

¹⁹ Chiura Moisés ima niskata sug iachachig taita, kaillaiaspa, nirka:

—Iachachig taita, kamta katisakimi maima kam rikuskama.

²⁰ Jesuska ainirka:

—Chuchakuna, kuibakunami iukankuna, paikuna kaugsangapa. Piskukunapas, tasinwa suma allichiska wasimi iukankuna. Ikuti kai Runa Tukuskaka mana iukanchu, ñi maipipas samaringapa.

²¹ Sug katiraiagka, paita nirka:

[†] griego rimaiwa: indi llugsidirunigmanda i chingadirunigmanda runakuna.

—Taita waugki, ñugpa sakiwai, nukapa taitata pambagringapa.

²² Jesuska ainirka:

—Katiwailla. Nukata mana iuiariwagkuna † pambachukuna.

Sinchi wairata i iaku iapa kuiurikuskata, Jesús kasillaia-chiskamanda

²³ Chiuramanda, Jesús kanuapi iaikuura, katiraiagkunapas iaikurkakuna. ²⁴ Ña iaku chimbanakuskapi, iapa sinchi waira atarii kallarikka. Chiwanka, kanua ukuma iaku ña iaikukurka. Jesuska puñukurka. ²⁵ Chiura katiraiagkuna, kailliaspa, paita rigchachirkakuna, kasa nispá:

—Taita waugki, nukanchita kispichii. Mana kagpika, kaipichar wañusunchi.

²⁶ Jesuska, rigcharispa, ainirkakunata:

—¿Imapatak chituku mancharingichi? Kamkuna, maillami nukamanda iuiawaspa kangichi.

Chasa nispaka, atarispá, wairata i iakuta piñarka. Chasa piñauraka, tukui allillami kasillaiaagsamurka.

²⁷ Katiraiagkuna, ujnarisipami paipura tapurinakurka:

—¿Ima runasik ka? Waira i iakupás, paita uiankuna.

Iskai runa achka kuku wairakuna iaikuskakunata, Jesús ambiskamanda

²⁸ Kucha ialispaka, sug ladu chimba chaiagrirkakuna Gadara suti alpama. Chipika, wañuskakuna pambaraianigmamanda iskai runakuna, kuku wairakuna iaikuska, Jesusta tupagrirkakuna. Chi runakuna, wañuchingapa manchachig karkakuna. Chiwanka, mana pipas chi suiu ialingapa pudirkakuna. ²⁹ Chi runakunaka, Jesusta kawaspá, kaparispa nirkakuna:

—Ai, kam Diospa wambra, ¿imapatak nukanchi kaskama samukungi? ¿Samukungichu, sinchi nanachii puncha manara chaiagpipas, nukanchita llakichingapa?

³⁰ Manancha karullapi, achka kuchikuna mikuspa purinakurka. ³¹ Nigpika chi runakunapi kag kuku wairakunaka, Jesusta mañarkakuna, kasa nispá:

—Kaimanda nukanchita llugsichispaka, kachai, chi kuchikunapa ukuma iaikugringapa.

³² Chiura, Jesús nirkakunata:

—Riichilla.

Chasaka chi kuku wairakunaka, ña runakunamanda llugsispa, kuchikunapa ukuma iaikugrirkakuna. Chiwanka tukui kuchikuna, iapa saia patata kalpaspa, kucha iaku ukuma sitarigrirkakuna. Chipi chukarispá, tukui puchukarirkakuna.

³³ Chasa kawaspá, kuchikunata kawagkunaka, mitikuspa, puibluma chaiagrispaka, tukui imasa pasariskata willagrirkakuna. Chi kuku wairakuna iukaska runakunata imasa pasarigtapas willarkakuna. ³⁴ Chi uiagkunaka, chi puiblumanda tukuikuna llugsirirkakuna, Jesuswa tupanakungapa. Paita kawagrispaka, mañarkakuna:

† “Wañuska niraiaskakuna”, Jesusta mana iuiarigkunami niraiá.

—Nukanchipa alpamanda llugsipuai.

Mana kuiuringapa unguiwa kaskata, Jesús ambiskamanda

⁹ Chiura Jesús, kanuapi iaikuspa, ikuti kucha ialispa, pai kaugsakuska puibluma chaiagrirka.

² Chasa uiaspa sug runakunaka, mana kuiuringapa unguiwa kaskata chakanapi sirichispa, Jesuspagma aparkakuna. Chiura Jesuska, “Ambipuangami” iuianakuskata kawaspaka, mana kuiuringapa unguiwa kaskata nirka:

—Wambra, mana llakiiwa kai. Kam pandariikunata ñami pasinsiaska kangi.

³ Chasa uiaspa, Moisés ima niskata iachachig taita chipi kagkunaka, kikipura tapurinakurka:

—Kai runa, ¿imapatak Diussina tukuspa rimaku?

⁴ Jesuska, chasa iuianakuskata iachaspa, nirkakunata:

—¿Imapatak sungullapi mana suma iuianakungichi?

⁵ ¿Maikantak mas alli ka: ningapa: “Kam pandariikunata ñami pasinsiaska kangi”? Mana kagpika, ¿ningapa: “Atarii, kamba wasima riilla; ña ambiriskami kangi”? ⁶ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispá, mana kuiuringapa unguiwa kaskataka nirka:

—Atarii. Chakanata markarispá, kamba wasima rii.

⁷ Chasa niura, chi runa, atarispá, wasima rirka.

⁸ Chasa kawaspaka, chipi kagkuna iapa mancharirkakuna. Taita Diusta iapa suma atuniachirkakuna, kasa nispá:

—Paimi runakunata chituku iachaita karamuska ka.

Mateo suti runata, Jesús kaiaskamanda

⁹ Jesús, chimanda rikuspa, mana judíu kaskakunamanda kulki chaskikuskapi ialikurka. Chipika, Mateo suti runami tiakurka. Chi runata kawaspaka, Jesuska nirka:

—Katiwai.

Chiura chi runa, atarispá, Jesusta katii kallarikka.

¹⁰ Chiuramanda, Jesuswa sugllapi katiraiagkuna Mateopa wasima iaikugrirkakuna. Chipi mikungapa tianakuura, paipura kulki chaskigkuna i mana allilla ruragkuna, achkakunami, chaiagrispa, sugllapi tiarigrirkakuna. ¹¹ Chasa kawaspaka, fariseokuna chi katiraiagkunata tapurkakuna:

—Kamkunata iachachig, ¿imapatak mana judíu kagkunamanda kulki chaskig i mana allilla ruragkunawa sugllapi mikuku?

¹² Chasa uiaspaka, Jesuska nirka:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. ¹³ Kamkuna, rispa, ñugpamanda librupi imasa niraiaskata iachaikugriichi kasa willaraiaskata:

Mana munanichu kamkuna, nukamanda animalkunata wañuchispa rupachipuangapa.

Kamkuna sug runakunamanda llakispa kaugsanakungapami munani. Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani; chasaka, Taita Dioswa allilla tukungapakuna.

Imaura mana mikungapa, Jesús iachachiskamanda

¹⁴ Chiura Juan Bautistawa purigkuna, kaillaiaspa, Jestusta tapurkakuna:

—Kamta katiraiagkuna, ¿imawantak imaurapas mikuspalla kankuna? Ikuti nukanchika fariseokunapas, achka punchakuna mana mikuspallami chisianchi.

¹⁵ Chiura, Jesuska ainirkakunata:

—Kasaraipi, kusa tukunga kunbidaskakunawa kankama, ¿irkiaspa llakiiwa mana mikuspallachu kangakuna? Manima. Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

¹⁶ —Ni pipas, ruku katangapi musu linsuwa mana sirangichichu. Chasa siragpika, tagsaura, chi linsu uchullaiaspa, ruku katangatami llakichinga. ¹⁷ Chasallata musu binu, ruku kara taligapi mana tallingichichu. Chasa talligpika, musu binu timbuura, taligata tugia-chispami icharinga. Kara taligapas mana balinchu. Chi-mandami musu binu, musu taligapi tallingapa cháiá. Chasa talligpika, binu taligapasmi allilla tukunga.

Jairopa wambra kaugsariskamanda i sug warmi Jesus-pa katangata llamkaspá ambiriskamanda

¹⁸ Jesús chara rimakugllapi, sug mandag runa, kaillaiaspa, kungurispá, paita nirka:

—Nukapa warmi wambra, kunaaurallami wañupuá. Kamba maki churapuagrii. Chasaka, kaugsaripuungapami ka.

¹⁹ Chiura Jesús, atarispá, chi runawa rii kallarirka. Paita katiraiagkunapas, kati kati rirkakuna.

²⁰ Rinakunkama sug warmi, paipa katinigmanda kaillaiarka. Chi warmi, chungá iskaí wata iawar sitaiwa ungug karka. ²¹ Paipa iuiapi nikurka: “Jesuspa katangata llamkaillawami ambirigsamusa”. Chasa iuiakuspaka, paipa katanga puntapi llamkarka. ²² Jesuska, tigrarispá, chi warmita kawaspa, nirka:

—Kam warmisita, mana llakikui. Nukamanda suma iuiariskamandami ambirigsamurkangi.

Chasa nigllapi, chi ungui anchurirka.

²³ Chi mandagpa wasima Jesús chaiagriuraka, flaugtakuna uiachispá, iapa killachispá wakanakurka, wañuskata apangapa. Chasa kawaspa, ²⁴ Jesuska nirkakunata:

—Anchuriichi. Chi wambra mana wañuska kanchu. Puñuillami puñuku.

Uiagkuna, paita asirkakuna. ²⁵ Tukuikuna llugsichii tukuuraka, Jesuska wambra kaskama iaikugrirka. Chi wambrata makimanda apiura, kaugsarispá atarirka.

²⁶ Chiwanka chi alpa suiu, tukuipi chasa pasariskamanda iacharigsamurka.

Iskaí runakuna mana ñawi kawagkunata, Jesús ambiskamanda

²⁷ Jesús chimanda llugsispa rikuskata, iskaí runakuna mana ñawi kawagkuna katinakurka, kasa kaparispá:

—Davidpa wambra, nukanchimanda llakirii.

²⁸ Jesús wasima chaiagriura, chi runakuna kaillaiagrirkakuna. Chiura, Jesuska tapurkakunata:

—Kamkuna nukamanda, ¿sumachu iuianakungichi, nuka kamkunata ambii pudingapa kagta?

—Ari, taita waugki— ainirkakuna.

²⁹ Chiura Jesuska, ñawita llamkarkakunata, kasa nispa:

—Imasami nukamanda suma iuiawanakungichi: chasa tukuchu.

³⁰ Chasa niura, allilla kawai pudirkakuna. Nispaka, Jesús nirkakunata:

—¡Ujalallapas sugkunata willanakungichi!

³¹ Chi runakunaka, chi niskata mana uiaspalla, maipi riskapi, tukuipi Jesusmanda willaspá purigrirkakuna.

Mana rimangapa pudigta, Jesús ambiskamanda

³² Chi runakuna ña riska kauraka, sug runata kuku waira iukaskata Jesuspagma chaiachigrirkakuna. Chi runa, mana rimangapa pudi karka. ³³ Jesús chi kuku wairata llugsichiraka, chi runa allilla rimagsamurka. Chasa kawaspa, achka chipi kagkuna iapa ujnarispa nirkakuna:

—Kai Israel alpapi, ñi imaurapas mana iachariska kanchu pipas chasa ambigta.

³⁴ Ikuti fariseokunaka ninakurka:

—Iaia kukupa iachaiwami kuku wairakunata llugsichiku.

Tukuí runakunamanda, Jesús llakiskamanda

³⁵ Chi alpapi, tukuí atun i uchulla puiblukunapimi Jesús purikurka. Judiukuna tandariduru wasikunapi iachachispa, Diospa suma mandaimanda Alli Willaita willaspá i tukuikunata, maituku ungui i nanaikunawa kaskakunatapas ambispami purikurka. ³⁶ Tukuí chipi kaugsagkuna, sitaska ubijakunasina, ñi pipas mana kawangapa tiagsinami karkakuna. Paikunata chasa kawaspa, Jesús iapa llakirirka. ³⁷ Nispaka, paita katiraiagkunata chi runakunamanda kasa nirka:

—Pallangapaka, achkami tia. Nigpika pallagkunaka, maillami tiankuna. ³⁸ Chi pallaika, atun Taita Diospa chagrasinami ka. Chimanda, paita mañaichi, achka pallagkuna kachamuchu.

Chungá iskaí runakunata, Jesús agllaskamanda

10 Chiuramanda Jesuska, paipa chungá iskaí katiraiagkunata kaiarka. Nispaka kuarka, paikuna kuku wairakunata llugsichii, ima unguiwa i nanaiwa kaskakunatapas ambii pudingapa.

² Chi chungá iskaí agllaskakuna, kasami suti karkakuna: tukuikunamanda mas ñugpa karkami Simón; paita, Jesús sutichirka Pedro; chimanda, paipa waugki

Andrés; Santiago i paipa waugki Juan (paikuna, Zebedeopa wambrakunami karkakuna); ³ Felipe, Bartolomé i Tomás; Mateo (pai karkami mana judíu kaskakunamanda kulki chaskig); Alfeopa wambra Santiagollatata suti i Tadeo; ⁴ sug Simón (kananeo suti runakunawa ñugpata purig); i Judas Iskariote, Jesusta katuspa apichig.

⁵ Chi chungá iskaí runakunata kachakuspa, Jesuska kasami nirka:

—Mana rinakungichi mana judíu kagkunapagma. Chasallata, Samaria alpa puiblukunama mana iaikunakugringichi. ⁶ Chasapaka, Israelmanda runakunapagma riichi. Paikuna, ubijakuna chingaskasina-mi kankuna.

⁷ —Tukuipi willaspa ringichi: “Suma luarmanda mandai, ñami chaiamuku”. ⁸ Unguiwa kaskakunata ambingichi. Wañuskakunata kaugsachingichi. Aicha is-mui unguiwa kaskakunatapas aliachingichi. Kuku wairakunata llugsichingichi. Mana pagaspallami kamkuna chaskirkangichi. Chasallata kamkunapas, ñi ima mana kubraspalla kangichi. ⁹ Mana purichiichi kuri, kulki ñi imapas chumbilliskapi wataskasina. ¹⁰ Mana apanakuichi jigra, ñi chakikunapi churaridiru, ñi tawina ñi imapas ñambipa. Katangapas, imasa churariska kaskallawa riichi. Maikan trabajagkunata chaianmi, mikui u ima ministiska paikuna chaskingapa.

¹¹ —Maikan atun i uchulla puiblupi chaigrispaka, maikan alli iuiaiwa runa kaskamanda tapugringichi. Tarigrispaka, chi alli runapagllapi kidaringichi, chi puiblumanda sugsinama llugsinkama. ¹² Paipa wasipi iaikuspa, ningichi: “Puangi. Sumaglla allilla kapuaichi”. ¹³ Chi wasipi sutipa alli iuiaiwa kaugsanakugpika, paikunata tukuipi allillami tukugsamungakunata. Ikuti mana alli iuiaiwa kagpikunaka, paikunata mana allilla tukugsamungakunatachu.

¹⁴ —Maipi kamkunata mana chaskingapa i kamkuna ima rimaskata mana uiangapa munachukuna, chi wasi i puiblumanda llugsikuspaka, chakipi alpa llutaraiaskata chabsingichi. ¹⁵ Kasami nuka niikichita: Taita Dios justisiai rurangapa puncha chaiauraka, Sodoma i Gomorra suti alpakunamanda runakunata llakichiska-mandapas masmi chi puiblukunamanda runakuna llakii iukangapa kankuna.

Jesusta katiraiagkunata mana munaspa, puchukan-gapa munanakugmanda

¹⁶ —Uiamuichi. Kamkunata ubijakunatasina sachá alku kaugsanakuskasinamami kachanakuikichita. Chi-manda kamkuna, iachakunasina allilla kawaspa, uiaspa, ruraspa puringichi. ¹⁷ Kamkunata jiru iuiaspa kawa-nakuskata mana kawaringichi. Paikuna, kamkunata apispa, justisiakunapagmami apangakuna. Paikuna tandaridiru wasikunapimi kamkunata asutingakuna. ¹⁸ Kamkuna nukawa kagmanda, atun mandagkunapagmami purichingakuna, justisiai rurai tukungapa. Chiura, paikunata i mana judíu kagkunatapasmi nukamanda willankangichi.

¹⁹ —Justisiakunapagma kamkunata apaura, mana ia-pa iuianakungichi: “¿Imasami paikunata ainini?”. Ainin-gapa chaiaura, kikin Santu Ispiritumi iuiachingapa ka.

²⁰ Kam kikinkunapa iuiaiwa mana rimanakungapa kangichichu. Kamkunapa Taita Diospa Ispiritumi kam-kunata allilla rimachingapa ka.

²¹ —Chi punchakuna sugkuna, waugkindikunatami kuangakuna, wañuchii tukungapa. Chasallata taita-kunapas, paikunapa wambrakunatami wañuchingapa kuangakuna. Wambrakunapas, taita i mamandita kun-tra tukuspa, wañuchingapami kuangakuna. ²² Tukui-kunami kamkunawa rabiaringakuna, kamkuna nuka-wa kagmanda. Chasa pasanakuspapas, wañunkama nukallawa iuiarisa kagkunami kispiringapa kankuna.

²³ —Kamkuna kaska puiblupi mana allilla rurangapa maskai kallariqipikunaka, sug puibluma mitikungichi. Kasami nuka niikichita: kai Israel alpapi tukui puiblu-kunama kamkuna manara chaigrigpimi kai Runa Tukuska ikuti samungapa ka.

²⁴ —Ñi maikan iachaikugkuna, iachachikuskamanda mas iacha mana kankunachu. Chasallata ñi maikan lutrinkunapas, paipa taitakunamanda mas mana kan-kunachu. ²⁵ Iachaikugkunata iachachigtasina suma kawagpikuna, allillami kantra. Chasallata, lutrinkunata kikinpatasina suma kawagpikuna, allillami kantra. Nukataka wasi duiñusinatami kamiwankuna, kasa nis-pa: “Beelzebú suti iaia kukuwami kangí”. Chasa nukata kamiwagpika, maschar nuka ima niskata ruragkunata kamipuangakuna.

“Taita Diusta manchangichi”

²⁶ —Chi runakunata mana manchangichi. Maikan pakalla iuiaspa rimaskaka, imaurapasmi iacharí. Chasallata, ima pakalla wakachiskapasmi imaurapas kawarigsamú. ²⁷ Nuka tutapi kamkunata ima niskata punchapi willangichi. Chasallata, ima pakalla uiaskata-pas wasi awamanda sinchi kaparisa willangichi.

²⁸ —Kamkunapa kuirputa wañuchispa, kamkunapa almata mana puchukangapa kankunachu. Chimanda, ñi ima mana paikunata manchaichi. Chasapaka, Taita Dios diltudupa ninama kuirputa almawanta sitangapa kagmanda, paita manchangichi.

²⁹ —¿Manachu iskaí pisku, asllita kulkimandalla katu-rí? Chasa kagpipas, kamkunapa Taita Dios mana lisi-nsiagpika, ñi sug paipura manachar wañuntra. ³⁰ Kam-kunapa umamanda agchapas, Taita Dios kuintaskami iuká. ³¹ Chimanda kamkuna, mana manhaspalla kaugsaiichi. Maituku achka piskukunamandapas mas balimi kangichi.

³² —Maikanpas, sugkunapa ñawipi nukamanda willa-chu: “Paita rigsiniimi”: nukapas, chi runamandaka nukapa Taita suma luarpi kagpa ñawipi willasami: “Pai-ta rigsiniimi”. ³³ Ikuti maikanpas, sugkunapa ñawipi nukamanda nichu: “Paita mana rigsiniichu”: nukapas, paimandaka nukapa Taita suma luarpi kagpa ñawipi nisami: “Paita mana rigsiniichu”.

Jesús samugmanda, makanakugsinami tiangapa ka

³⁴ —Mana iuianakuichi nuka kai alpama samugta, tukui sumaglla kaugsanakungapa. Mana chasamanda samurkanichu. Nuka samugmanda, makanakugsinami tiangapa ka. ³⁵ Nuka samugmandami taitandiwa wambrandiwa mana allilla kaugsanakungapa ka. Chasallata, mamandiwa warmi wambrandiwa, suigrandiwa nuirandiwa mana allillami kaugsanakungapa kankuna. ³⁶ Kikinpa wasipi kaugsanakugpura llakichinakuspami kangapa kankuna.

³⁷ —Maikanpas taitata i mamata nukamanda mas kuiagpika, mana nukapa niraiankunachu. Chasallata maikanpas wambrata nukamanda mas kuiagkunaka, mana nukapa niraiankunachu. ³⁸ Maikanpas mana paipa krusta markarigsina ruraspa katiraiawagkunaka, mana nukapa niraiankunachu.

³⁹ —Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda wañuchii tukugpika, mana mas wañui kaugsaitami taringapa ka.

Jesús manda iuiaripa sugkunata chaskigpikuna, sumami sug luarpi chaskigringakuna

⁴⁰ —Maikanpas kamkunata chaskigkuna, nuka kikin-ta chaskiwagmi niraiankuna. Chasa chaskiwaspa, nukata kachamuwagtapasmi chaskig niraiankuna.

⁴¹ —Maikanpas Santu Ispirituwa rimag runata chaskigpika, imasami Santu Ispirituwa rimagta karanga: chasallatami paitapas karangapa ka. Chasallata, maikanpas alli runata chaskigpika, imasami Taita Dios, alli runata karanga: chasallatami paitapas karangapa ka. ⁴² Kasami nuka niikichita: kai uchullakuna nukata katiraiawagkuna kagmanda, paikunatapas maikanpas sug kuashag chiri iakullapas karagpika, Taita Dios chi runamanda mana kungaringapa kanchu.

Juan Bautista, Jesusta tapungapa kachaskakunamanda

11 Jesúska, chungá iskai paita katiraiagkunata tukui iachachispaka, rirka, chi suiu puiblukunapi iachachispa i willaspa puringapa. ² Juan Bautista, karsilpi wichkaraiaspa, Jesucristo ima rurakuskamanda iachaspa, paita katiraiagkunata Jesuspagma kacharka. ³ Chi runakunaka, Jesusta tapugrirkakuna:

—¿Kamchu kangi chi samungapa kaska? Mana kagpika, ¿sugtachu suiasunchi?

⁴ Chiura, Jesúska ainirkakunata:

—Juanta willagriichi kamkuna kunaúra imasa uiaska i kawaskata. ⁵ Mana ñawi kawagkuna kawanakumi. Mana purig pudigkunapas allillami purinakú. Aicha ismúi ungui iukaskakunapasmi ambirigsamuska kankuna. Mana uiagkunapasmi allilla uianakú. Wañuskakunapasmi kaugsarinakú. Mana ñi ima iukagkunapasmi Alli Willaita chaskinakú. ⁶ Maikan nukamanda suma iuiaita mana sakigpika, Taita Diospa iapa kuiaskami kankuna.

⁷ Juan kachaskakuna ikuti paipagmallatata kutinaku-ura, Jesúska chipi kagkunata Juanmanda nirka:

—Kamkuna, chusa sitaska alpapi Juan kaskama chaigrispaka, ¿imatá kawagrirkangichi? ¿Sug wiru wairawa pakichingasina kuiuchikuskatasinachu kawagrirkangichi? ⁸ Mana kagpika, ¿imatá kawagrirkangichi? ¿Sug runa iapa suma musu katanga churariskatachu tarigrirkangichi? Manima. Chasa suma churarigkuna, mandagkunapa wasikunallapimi kaugsankuna. ⁹ Chasa kagpika, ¿imatá kawagrirkangichi? ¿Santu Ispirituwa rimagtachu tarigrirkangichi? Ari, niikichitami: Santu Ispirituwa ñugpamanda rimagkunamandapas, Juan mas atunmi ka. ¹⁰ Paimandami kasa niraiá:

Kawai. Nuka ima niskata willagta kamba ñugpami kachakuni,

kamanda ñambikunata allichipungapa.

¹¹ Kasami nuka niikichita: kai alpapi tukui tiagsamuska-kunamanda, Juanllami mas atun ka. Chasa kagpipas, Dios suma mandakuskapi maikan mas uchullapas, Juanmanda mas atunmi niraiá.

¹² —Juan Bautista kawariskauramandata kunkama, Diospa suma mandaimanda willagkuna tukui llakiimi iukankuna. Chi llakichigkuna munanakumi, chi suma mandaimanda willaita puchukangapa. ¹³ Juan kawarinkama, tukui Santu Ispirituwa rimagkuna i Moisés ima rurangapa iachachiskapipasmi willanakurka, chi suma mandai samungapa kagta. ¹⁴ Kamkuna suma iuiapai chaskingapa munagpikuna, pai Juanka niraiami Elías suti Santu Ispirituwa rimag samungapa niska pai kagta. ¹⁵ Rinri iukagkuna, nuka niskata uiawaspa, suma iuiaringichi.

¹⁶ —Kai punchakuna kaugsanakuska runakunata, ¿imasa kagtata nisa? Sug wambrakuna kallipi tiaripa pugllanakugsinami kankuna. ¹⁷ Chipika, paipura kaparinakú: “Nukanchi flaugta uiachigpipas, mana bailangichichu. Llakispa kantagpipas, mana wakangichichu”.

¹⁸ Chasallata, Juan Bautistamanda i nukamandami rimankuna. Juan mana tanda mikugmanda, mana binu upiagmandami ninkuna: “Kai runa, kuku waira iaikuskami ka”. ¹⁹ Kai Runa Tukuska, tukui mikuspa i upiaspa kagmanda, ninkunami: “Iapa mikudur i iapa upiadurmi ka. Mana judíu kaskakunamanda kulki chaskigkunawa i mana alli ruragkunawa sugllapimi puriku”. Chasa kawaspa nigpikunapas, Taita Diosmi kawachí, pai kikin ruraskawa iapa iachag kagta.

Jesús ima willakuskata mana uiagkunamanda

²⁰ Chasa nispaka Jesús, pai achka suma mana imaurapas kawaskasina ruraska puiblukunamanda runakunatami piñai kallarirka. Tukui chasakunata kawaspapas, allilla ruraikunama mana tigraskamandami piñar-ka. ²¹ Kasami nirkakunata:

—¡Ai, kamkuna Korazín suti puiblupi kaugsagkuna! ¡Ai, kamkuna Betsaida puiblupi kaugsagkuna! Tiro i Sidón suti puiblukunamanda runakuna, imasa kamkunapa puiblukunapi chituku mana imaurapas kawaskasina ruraskata kawaspaka, chiurallami paikunaka,

llakiiwa iana katangakuna churarispa, uchpawa umapi armarispa, alli ruraikunama tigraska kantrakuna.

²² Kasami niikichita: Taita Dios justisiai rurangapa puncha chaiauraka, Tiro i Sidón puiblukunamanda runakunata llakichiskamanda masmi kamkuna llakii iukan-gapa kangichi.

²³ —Kamkuna, Kafarnaum puiblumandakunaka, ¿imapatak iuanakungichi: “Sug luarpimi atuniachii tukungapa kani”? Manima. Diltudupa ninamami sitai tukungapa kangichi. Sodoma suti puiblupi kaugsana-kuskaka, imasa kamkunapa puiblupi chituku mana imaurapas kawaskasina ruraskata kawaspaka, paikuna alli ruraikunama tigraspami kunankama kangapa karkakuna. ²⁴ Kasami niikichita: Taita Dios justisiai rurangapa puncha chaiauraka, Sodoma alpamanda runakunata llakichiskamanda masmi kamkuna llakii iukan-gapa kangichi.

Nukawa samuichi samaringapa, Jesús niskamanda

²⁵ Chiura Jesús, kasami Taita Diusta nirka: —Taitiku, suma luar i kai alpa luarta iaia mandagmi kangi. Kamta iapa suma atun kagtami niiki. Kam-bagma iaikugringapa, iacha i iapa iuiiug runakunamanda pakaskasinami kapungi. Ikuti mana iacha i mana iapa iuiiugkunatami kawachirkangi. ²⁶ Ari, Taitiku, chasami kam munarkangi.

²⁷ Kasapasmi Jesús nirka: —Nukapa Taita, tukuimi nukata karawaska ka. Paipa wambra nuka kagta, ñi maikan runapas mana iachankunachu. Nukapa Taitallami rigsiwá. Chasallata, nukapa Taitata mana pipas rigsinkunachu. Nukallami rigsi-ni, paipa wambra kaspá. Maikan nuka munaskakunallami nukapa Taitata rigsingapa kankuna.

²⁸ —Tukuikuna saikuiwa i llakiiwa kagkuna, nukawa samuichi. Nukami tukuipi samachisakichita. ²⁹ Wagra-kunapa iugu churaskasina nuka ima iachachiskata chaskiichi. Nukata iachaikuwaichi, nuka imasa uchullakunasina sumaglla iuiag, mana subirbi imapipas kaskata. ³⁰ Nuka ima iachachiska, mana lllasa iugu churaskasinami ka. Chiwanka, nukata iachaikuwaspaka, kam kikinkunapa almapi alli iuiachiriimi tarispa iukankangichi.

Warda punchamanda, Jesús iachachiskamanda

12 Sug warda puncha, Jesús katiraiagkunawanta chagra tarpuraiskakunapi ialinakurka. Katiraiagkunaka, iapa iarkaimanda kaspá, trigu ispigakunata pitispa, mikui kallarikakuna. ² Chasa kawaspaka, sug fariseokuna Jesusta nirkakuna:

—Kawamui. Kamta katiraiagkuna, warda punchami pandarinakú.

³ Jesuska ainirkakunata:

—¿Manachu ñugpamanda librupi willaraiaskata kawarkangichi, taita David i paiwa kagkunapas, iarkaimanda kaspá, imasa ruragtakuna? ⁴ Pai kikin, Diospa wasi ukuma iaikuspa, altarpí churaska tandakuna tias-kata mikurka, mana imapas mancharispalla. Chi

tandakuna, sasirdutikunalla mikudirumi karka. Ñi paiwa kagkunata ñi pitapas mana karadiru karkachu.

⁵ —Moisés ima rurangapa niskapi, ¿manachu kawarkangichi imasa willaraiaskata? Kasami niraiá: ianga punchasina sasirdutikuna warda puncha Diospa atun wasipi imasa niraiaskasina ruraika, mana pandarii niraianchu. ⁶ Kasami niikichita: kunaura Diospa atun wasimandapas mas atunmi kaipi ka.

⁷ —Kasami ñugpamanda librupi niraiá: Mana munanichu kamkuna, nukamanda animal-kunata wañuchispa rupachipuangapa. Kamkuna sug runakunamanda llakispa kaugsanangkupami munani. Chi willaraiaskapi allilla kawaspa iachaspaka, nukata katiraiawagkunamanda manami niwangichi: “Warda punchami pandarinakú”. ⁸ Kai Runa Tukuskaka pudinmi ninga, warda punchakunatapas imasa chaiaskasina rurangapa.

⁹ Chimanda rispaka, paikuna tandaridiru wasipi iaikugrirka. ¹⁰ Chipika sug maki chakiriska unguiwa kag runa, paikunawa sugllapi karka. Chiura, Jesusta tapurkakuna:

—Warda punchapas ungugkunata aliachingapa, ¿pudirinchu u mana?—. Chasa tapuchinakurka, paimanda justisiakunapagma willagringapa.

Jesuska ainirkakunata:

¹¹ —Kamkunapa ubija sanjapi urmagpika, ¿manachu warda puncha kagpipas surkunrangichi? ¹² Sug runaka, ubijamandapas mas balimi ka. Chimandami mana michá, warda punchakuna tukui alli rurangapa.

¹³ Chasa nispa, chi ungug runataka nirka:

—Maki chutachii.

Chasa chutachigllapi, chi makika aliarka, sug ladu makisina. ¹⁴ Chasa kawaspa fariseokunaka, llugsispa, Jesusmanda rimanakui kallarikakuna, imasapipas paita wañuchingapa.

¹⁵ Jesuska, chasa iachaspa, chimanda anchurirka. Achka runakunami paita katichinakurka. Paika, tukui ungugkunatami ambispa sakirka. ¹⁶ Chasa ambispaka, nirkakunata:

—Nukamanda mana willanakungichi, nuka pi kagta.

¹⁷ Chasami Isafás suti Santu Ispirituwa rimag ima ñugpata willaskasina tukugsamurka. Kasami Isafás niska karka:

¹⁸ Kaimi ka nukapa lutrinsina, nuka imasa niskata rurag.

Paimi nuka agllaska i kuiaska kapuá.

Paita kawaspa, iapami alli iuiachiiwa kawani.

Nukapa Santu Ispiritutami paita karangapa kani.

Chiwanka, tukui alpamanda runakunatami pai willangapa ka, nuka imasa allilla justisiangapa kagta.

¹⁹ Mana piwapas piñarispá kaparispá kangapa kanchu.

Ñi maipipas, pitapas mana kaparispá rimangapa kanchu.

²⁰ Wiru pakirikuskata mana pakichingapa kanchu.

Wañukugsina kusnikuska michuntapas mana wañuchingapa kanchu,

imaura tukuikunata sumaglla mandai chaiankama.
²¹ Paillatami tukui alpamanda runakuna suianakungapa ka.

Jesusta iaia kukupa iachaiwa kagta juchachinakuska- manda

²² Chi punchakunallatata, sug runata kuku waira iaikuska kagmandami Jesuspagma pusarkakuna. Chi runata kuku waira mana kawangapa i rimangapa ruragsamuska karka. Jesús ña ambiura, chi runa ikuti rimangapa i kawangapa allilla tukugsamurka. ²³ Chasa kawaspaka, achka chipi kagkuna, iapa ujnarisipami kikinpura tapurinakurka:

—Chi ambig runa, ¿manacha ñugpamanda taita Davidpa wambrakunapa wambra kantra?

²⁴ Fariseokunaka, chasa uiaspa, nirkakuna:

—Chi, Beelzebú suti iaia kukupa iachaiwami kuku wairakunata llugsichiku.

²⁵ Paikuna ima iuianakuskata iachaspa, Jesuska nirkakunata:

—Sug alpapi mandagpura piñachinakuspa makanakuspalla kaugsanakugpika, tukuimi wagllirí. Sug pui-blupi u wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ²⁶ Chasallata iaia kukuwa kagkuna iaia kukuwa kagkunata llugsichigpikunaka, kikinpura piñachirinakugsinami niraiantira. Chasa piñachirinakugpika, ¿manachu paipura mandai, chiuralla puchukarintra?

²⁷ —Beelzebupa iachaiwa nuka kuku wairakunata llugsichikugpika, kumpurakunaka, ¿pipa iachaiwatak llugsichinkuna? Pai kikinkunami kawachingapa kankuna, imasa kamkuna mana allilla nukamanda iuiarispa ninakugta. ²⁸ Taita Diospa Ispirituwa nuka kuku wairakunata llugsichikugpika, sutipami Diospa suma mandai ña kamkunapagma chaiamurka.

²⁹ —Maikanpas sug wapu runapa wasima iaikuspa, ima iukaskata kichungapa munaspa, iukanmi ñugpa paita watanga. Mana kagpika, manima kichungapa pudingapa kanchu.

³⁰ —Maikanpas mana nukawa suma iuiaiwa kagkuna, nukata piñawagmi kankuna. Chasallata, maikanpas nukawa mana suma tandachigkuna, tukuimi susuri-puangapa kankunata.

³¹ —Chasamanda niikichitami: runakuna pandariskakunata i Taita Diosmanda iapa jiru mana uiangasina rimaska pandariskakunata, tukuitami pasinsiai tia. Ikuti maikan Santu Ispiritumanda iapa jirukuna rimaskataka mana pasinsiai tiangapa kanchu. ³² Kasapasmi niikichita: maikan kai Runa Tukuskamanda kuntra rimagkunamanda pasinsiaimi tia. Chasa kagpipas, maikan Santu Ispiritumanda kuntra rimagkunamanda ñi imaurapas mana pasinsiai tiangapa kanchu, ñi kai alpa luarpi ñi sug luarpi.

³³ —Sacha alli kagpi, miski mikudiru muiumi tukú. Sacha mana alli kagpika, winja muiu mana mikudirumi tukú. Tukui sacha, muiukuna tiariurami rigsirí, alli u mana alli kagta. ³⁴ Kamkunaka, kulibrakunasinami mana alli runakuna kangichi. Kam kikinkuna mana alli

iuiaikuna iukaspa, ¿imasatak alli rimaita iukankangichi? Iuiaipei imasa iuianakuskasinami simipi rimachig-samú.

³⁵ —Alli runakuna, alli iuiaikuna iukaspami allilla rimagsamunkuna. Ikuti mana alli runakunaka, mana alli iuiaikuna iukaspami mana allilla rimagsamunkuna.

³⁶ Kasami niikichita: Taita Dios justisiai rurangapa puncha chaiaura, tukui ianga rimaskatapas tapuchingapami ka. ³⁷ Chasa tapuchiura, kamkuna allilla rimaska kagpika, allimi niraiangapa kangichi. Mana allilla rimaska kagpika, justisiaimi tukungapa kangichi.

Mana kawaskasina kawachimui, Jesusta mañana- kuskamanda

³⁸ Chiuraka Moisés ima niskata sug iachachig taitakuna i fariseokuna, Jesusta nirkakuna:

—Iachachig taita, munanakunchimi: kam nukanchita mana imaurapas kawaskasinata kawachimui.

³⁹ Paika ainirka:

—Kamkuna Taita Diusta mana iuiarispa, mana allilla ruraspa kaugsanakuspami mañawanakungichi: “Mana imaurapas kawaskasinata kawachimui”. Ñi imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti, imasami pasarka: chasallata kawarillami kawangapa kangichi. ⁴⁰ Imasami Jonás, kimsa puncha i kimsa tuta atun chalwapa wigsa ukupi karka: chasallatami kai Runa Tukuska, kimsa puncha i kimsa tuta alpa ukuma kangapa ka.

⁴¹ —Taita Dios justisiai rurangapa puncha chaiaura, Níneve puiblumanda kagkuna saiarispami kunauremanda runakunata ningapa kankuna: “Mana allilla ruragkunami kangichi”. Chi Ninevemanda runakuna, Jonás ima willaskata uiaspaka, alli ruraikunamami tigrarkakuna. Kai rimakugka, Jonasmandapas mas iachami ka.

⁴² —Chasallata, Taita Dios justisiai rurangapa puncha chaiauraka, Chaugpuncha suti alpata mandag warmipas saiarispami kunauremanda runakunata ningapa kankunata: “Mana allilla ruragkunami kangichi”. Ñugpata chi warmi, iapa karu alpamandami samurka, atun mandag Salomonpa iapa iachaiwa rimakuskata uiangapa. Kai rimakugka, Salomonmandapas mas iachami ka.

⁴³ —Maikan runamanda kuku waira llugsichii tukuskaka, tusta alpa kaskapi samaringapami maskaspa purirka. Ñi maipi mana samaringapa tarispaka, ⁴⁴ iuiarirkami: “Maimandami nuka llugsimurkani: chimallatami kutingapa kani”. Chi runapagma kutispa ikuti iaikugriura, chusa uku suma pichaska i allichiskasinami tarigrirka. ⁴⁵ Chasa kawaspaka, kanchis kuku wairakuna paimanda mas jiru ruradurkunata pusangapami rirka. Chi runapi iaikugrispa, chi kukukuna kaugsaimi kallarirkakuna. Chasaka chi runa, ñugpamandapas mas jiru mana allillami tukuipe tukurka. Kai punchakuna mana allilla ruraspa kaugsanakugta chasallatami tukungapa kankuna.

Sutipa Jesuspa familiakunamanda

⁴⁶ Jesús chara chipi kagkunata rimakunkamaka, paipa mama i waugkindikuna kancha ladu saiarigrirka-kuna, paita rimangapa munaspa. ⁴⁷ Chiura sug runa, paita nigrirka:

—Uiamui. Kamba mama i waugkindikunami kanchapi suianakú, kamta rimangapa.

⁴⁸ Paika, chi runata ainirka:

—¿Pitak nukapa mama niraiá? ¿Pikunatak niraian-kuna nukapa waugkikuna?

⁴⁹ Chasa nispa, paita katiraiagkunata makiwa kawachispa, nirkakunata:

—Kaikunami nukapa mama, nukapa waugkikuna kankuna. ⁵⁰ Nukapa Taita suma luarpi kag, pai imasa munaskasina maikanpas ruragmi nukapa waugki, nukapa pani, nukapa mama niraiá.

Tarpudur runamanda parlu

13 Chi punchallatata Jesús, wasimanda llugsispa, kucha pata ladu tiarigrirka. ² Chiura iapa achka runakuna, paipagma chaiagrirkakuna. Chasa kawaspaka Jesuska, kanua ukuma iaikuspa, tiarirka. Tukui chipi kagkuna, iaku pata ladu saiarirkakuna. ³ Chiura Jesuska, iui ai apingasina achka suma parlukunawa iachachispa, kasami nirka:

—Sug runasi llugsirka, simillakunata sitaspa tarpungapa. ⁴ Tarpukuura, sug simillakunaka ñambipisi urmarkakuna. Chi simillakunataka, piskukunasi mikug-samurkakuna.

⁵ —Sug simillakunaka, rumilla tiaskapisi urmarkakuna, mailla alpa tiaskapi. Mana achka alpa tiag-manda, mana unaiilla wiñarirkakuna. ⁶ Nigpika, indi pi-aspas, rupachirka. Mana achka anguiug kaspaka, utkalla chakirirkakuna.

⁷ —Sug simillakunaka, ispina sachakuna tiaskapisi urmarkakuna. Nigpika, ispina sacha wiñarka, simillakunata kilpagta.

⁸ —Ikuti sug simillakunakar, suma alpapisi urmarkakuna. Chasaka, allilla pallarirkakuna. Sug simillamandalla, patsa patsasi pallarirka. Sugmandalla, sugta chungasugta chungas; ikuti sugmandalla, kimsa chungas kimsa chungasi pallarirka.

⁹ —Rinri iukagkuna, nuka niskata uiawaspa, suma iuiaringichi.

Imapa Jesús, iui ai apingasina parlukunawa rimaskamanda

¹⁰ Chasa uiaspaka katiraiagkuna, Jesuspagma kailla-iaspa, tapurkakuna:

—¿Imapatak chasa parlukunallawa runakunata rimangi?

¹¹ Chiura Jesuska, kasa ainirka:

—Kamkunata niskami ka, Taita Dios imasa suma mandakuskasina kaskata ñi imaurapas mana iachaskata iachangapa. Ikuti paikunataka mana chasa lisinsiaska kanchu. ¹² Maikan achka iukagta masmi karan-

gapa ka, puchugta. Maikan mailla iukaskataka tukuimi kichungapa ka. ¹³ Chimandami iui ai apingasina parlukunallawa paikunata rimani. Paikuna, kawanakuspapas, mana kawagsinami kankuna. Uianakuspapas, mana uiagsina kaspas, mana iui ai apinkunata. ¹⁴ Paikuna chasa kagmandami Isafas imasa ñugpata willas-kasina tukugsamú. Kasami niraiá:

Rinriwa uiaspapas, mana uiagsinami tukunkangichi. Ñawiwa kawaspapas, mana kawagsinami tukunkangichi.

¹⁵ Kai runakunapa iui ai, iana tutapi kagsinami tukug-samurkakuna.

Rinri tapariskasinami tukugsamurkakuna.

Ñawi wichkaskasinami tukugsamurkakuna.

Chasaka paikuna, mana ñawiwa kawagsina, mana rinriwa uiagsina, mana iui ai iukagsinami tukungapa kankuna.

Mana munankuna, nukawa tigramungapa.

Tigramugpika, nukami ambintranikunata.

¹⁶ —Ikuti kamkunaka, ñawiwa sumaglla kawanakuspa, rinriwa allilla uiaspa kagmandami Taita Diospa iapa kuiaska kangichi. ¹⁷ Kasami nuka niikichita: ñugpamanda Santu Ispirituwa rimagkuna i alli runakuna, achkakunami, kunaura kamkuna kawanakuskata kawangapa munanakuspapas, mana kawarkakuna. Chasallata, kunaura kamkuna uianakuskata uiangapa munanakuspapas, manima uiarkakuna.

Tarpudur runamanda parlu ima niraiagta, Jesús willaskamanda

¹⁸ —Kasa uiaichi, tarpug runamanda parlu imasa niraiagta. ¹⁹ Dios imasa suma mandakuskasina rimaita maikan uiaspapas, mana iui ai allilla apiskataka, chi uiaskata iaia kukuka tukuimi kichugsamú. Chasami ñambipi similla urmagkuna niraiá.

²⁰ —Similla rumilla tiaskapi urmagka, sug runa Diospa Rimaita uiagsinami niraiá. Chi uiangallowaka, alli iuiachiwami chaskinkuna. ²¹ Nispaka, imasami chi mana achka anguiug simillakuna tukú: chasallata sug ratullami Taita Dioswa iuiarispa kankuna. Ima Diospa Rimaimanda unzagpikunaka, llakiimi apigsamú. Chi-uramanda, mana mas Taita Dioswa iuiaringapa munankunachu.

²² —Similla ispina sachakuna tiaskapi urmagka, sug runa Diospa Rimaita uiagsinami niraiá. Uiaspapas, kai alpapi tiaskakunallawa sumaglla kaugsangapami iuiarinkuna, mas achka iukag tukungapa. Chasaka, Diospa Rimaita tukuimi kungarinkuna. Ñi ima mana pallan-gapa tiaringasinami tukunkuna.

²³ —Similla suma alpapi urmagkar, sug runa, Diospa Rimaita sumaglla uiaspa, iui ai apigsinami niraiá. Chi runakunapimi niraiá, suma alpapi similla urmaskamanda, achka suma pallai tukungapa. Imasami sug simillamandalla patsa patsa u sugta chungasugta chungas u kimsa chungas kimsa chungas pallarí: chasallatami paikuna, Taita Diosmanda allilla ruraskakunawa achka pallarigsina tukunkuna.

gapa kankuna. Chipi, iapa llakispá, wakaspá, kiru mukuspami kangapa kankuna.

Iapa bali musu i maugkakunamanda parlu

⁵¹ Chasa nispaka, Jesús tapurkakunata:

—Nuka kamkunata tukui ima rimaska, ¿ñachu iuiaringichi ima niraiagta?

—Ari— ainirkakuna.

⁵² Chiura, Jesuska nirkakunata:

—Maikan ñugpata Moisés ima niskata iachachig taita, chasallata suma luarmanda mandaiwa niraiagta iachaikugkunaka, kasami niraiá. Imasami sug runa, wakachiska tiaskata iapa bali musu i maugkakunata pas surkú, sugkunata aidangapa: chasallatami kuna uramanda i ñugpamanda Alli Willaita iachachingapaka.

Nazaret puiblupi, Jesús kaskamanda

⁵³ Jesús chi parlukunata iachachii puchukaskamandaka, llugsispa, kikinpa puibluma rirka. ⁵⁴ Pai-pagma chaiagrispaka, tandaridiru wasima iaikuspa, iachachii kallarirka. Paita uiaspa, iapa ujnarispa, kasa kikinpura tapurinakurka:

—Kai runa, ¿imawasik chituku suma iachaiwa tukurka? ¿Imawasik chituku mana imaurapas kawaskasina rurai pudí? ⁵⁵ ¿Manachu ka karpintirupa wambra? ¿Manachu paipa mama, María suti ka? ¿Manachu Santiago, José, Simón i Judaspa waugkindi ka? ⁵⁶ ¿Manachu tukui paipa panindikunapas, nukanchiwa kankuna? ¿Maipisik chituku iachaikugrirka?— ⁵⁷ Chasa nispaka, Jesusta mana munarkakuna, pai ima iachachikuskata uiangapa.

Mana uiagmandakuna, Jesuska kasami nirkakunata:

—Santu Ispirituwa rimagtaka sugnigta puriskapi sumaglla kuiaspami uiankuna. Ikuti kikinpa alpapi, kikinpa wasipi, ñi pi mana munankunachu uiangapa.

⁵⁸ Chi runakuna mana paita suma uiagmanda, Jesús chi puiblupi mana achka milagrukuna rurarka.

Juan Bautista imasa wañuchii tukuskamanda

14 Chi punchakuna mandag Herodes, Jesusmanda iachagsamurka. ² Chasa iachaspaka, paiwa kagkunata nirka:

—Chimi kangapa ka Juan Bautista. Wañuspaka, ikuti kaugsariskami kangapa ka. Chimandami mana imaurapas kawaskasina ruraspa puriku.

³ Manara Jesusmanda iacharigpi, Herodes, Juanta apichispa, wataspa, karsilpisi churarka. Erodías suti warmipa kaugsasi chasa rurarka. Chi warmi karkasi Felipepa warmi. Chi Felipe, Herodespa waugkisi karka. Chi warmika, Herodeswasi kaugsakurka. ⁴ Chimandasi Juanka, Herodesta piñaspa nikurka: “Kamta michanmi, chi warmiwa kaugsakungapa”. ⁵ Chasa piñakugmanda Herodes, Juanta wañuchingapasi munakurka. Nigpika, chi alpapi kaugsanakuska runakunata manchai iukarka. Chi runakuna, Juanmanda ninakurka: “Santu Ispirituwa rimagmi ka”.

⁶ Herodes tiagsamuska puncha chaiauraka, pai kumbidaspa upiaisi rurakurka. Chipika, Erodiaspa sipas warmi wambra, iapa sumasi bailarka. Chasa bailagmanda, Herodesta iapasi sumarka. ⁷ Chiura paika, sipasta nirka:

—Diuspa ñawipimi niiki: kam ima mañawaskami karasaki.

⁸ Chasa uiaspaka, mamandita willagrirka. Mamandi nirka:

—Juan Bautistapa umata platupi mañai—. Chiwanka, Herodesta chasa mañagrirka.

⁹ Mana pai iuiakuskasina mañagmanda, iapasi llakirigsamurka. Kikin, Taita Diuspa ñawipi niskata paiwa kagkuna uianakugmanda, iukarka ninga:

—Ari—. ¹⁰ Chasa nispaka, sug suldaduta karsilmasi kacharka. Juanta uma anchuchigrispaka, ¹¹ platupi apaspa, sipastasi kuagrirka. Sipas, chaskispa, mamanditasi kuagrirka.

¹² Juanwa purigkuna, chasa pasarigta iachaspaka, kuirputa apagrispa, pambagrirkakuna. Nispaka, Jesus-ta willagrirkakuna.

Pichka waranga runakunata, Jesús mikungapa karaskamanda

¹³ Juanmanda chasa uiaspaka, Jesús, maikan runapas mana kaugsanakuska alpama kanuapi rirka, sapalla kangapa. Chasa iachaspaka achka runakuna, chi puiblupi suiumanda chakiwa pai kaskama rirkakuna.

¹⁴ Jesús kanuamanda llugsiura, iapa achka runakuna kawarirka. Paikunata kawaspa, suma llakirigsamurka. Paikunawa ungug kaskakunatami ambirka.

¹⁵ Ña chisiakuuraka, Jesusta katiraiagkuna, kailliaspa, nirkakuna:

—Kai suiu, ñi pipas mana kaugsanakunchu. Ñami chisi ka. Kai runakunata puiblukunama kachai, mikui randispa mikuchukuna.

¹⁶ Jesuska nirkakunata:

—Mana chaianchu, paikuna ringapa. Kamkuna, paikunata mikui karaichi.

¹⁷ Paikunaka ainirkakuna:

—Pichka tanda i iskaí chalwallami kaipi tia.

¹⁸ Chiura, Jesuska nirka:

—Apamuwaichi.

¹⁹ Nispaka, chipi kagkunata nirka:

—Ugsapi tiariichi.

Tiariura, chi pichka tandata i iskaí chalwata charispa, awasinama kawaspa, “Pai Siñur” Taita Diusta nirka. Tandakunata pitichispaka, katiraiagkunata kuaspa richirka. Chiura, tukuikunata karaspa aparkakuna.

²⁰ Tukuikunami sagsagta mikurkakuna. Nispaka, chunga iskaí saparu junda piti pitikuna tandachirkakuna. ²¹ Mai pichka waranga karikunami mikurkakuna, warmi i wambrakunata mana kuintaspalla.

Iaku kuchapi, Jesús chakiwa saruspa awalla puriskamanda

²² Chiuralla Jesuska, paita katiraiagkunata nirka:

—Kanuama iaikuichi. Sug ladu chimba ialiiichi. Nuka-ka, kai tukui runakunata: “Kaiakama” nispa, kachasakunata—. ²³ Chi runakunata kachaspaka, sug lumama rirka, sapalla, paipa Taita Dioswa rimanakungapa. Chi tutaka Jesús, sapalla chi lumapi karka. ²⁴ Katiraiagkunaka, ña karupi alpamanda rinakurka. Iapa sinchi waira, ñugpagnigmanda pukukurka. Chiwanka, kanuata awapi urapi iaku apakurka.

²⁵ Ña pakaringama Jesús, chi iakupi awalla chakiwa saruspa saruspa, paikunapagma ña chaiakugrirka.

²⁶ Paikunaka, chasa iakupi saruspa awalla rikugta kawaspa, iapa mancharispa, nirkakuna:

—Sug wairachar ka—. Iapa mancharispami kaparirikuna.

²⁷ Kaparigllapi, Jesuska nirkakunata:

—Sinchi iuiaichi. Nukami kani. Mana manchanakui-chi.

²⁸ Chiura, Pedroka nirka:

—Kam kikin Taita Jesús kagpika, niwai, nukapas iakupi chakiwa kambagma ringapa.

²⁹ —Samui— Jesús nirka.

Chasa niura Pedroka, kanuamanda llugsispa, chakiwa iakupi rii kallariirka Jesuspagma. ³⁰ Chasa rikuura, sinchi waira piakugmanda, iapa mancharirka. Nispaka, rikuska iaku ukuma jundarii kallariirka, kaparirka:

—Taita waugki, kispichiwai.

³¹ Kaparigllapi Jesuska, maki suniaspa, Pedrota apispa, kasami nirka:

—Kam, ¿imapatak nukamanda mana mas suma allilla iuiaringi?

³² Paikuna ña kanuama iaikugriuraka, waira kasillaiagsamurka. ³³ Kanuapi kagkunaka, Jestusta kungurispa, nirkakuna:

—Kam sutipami Taita Diospa wambra kangi.

Jenesaret alpapi, Jesús ungugkunata ambiskamanda

³⁴ Kucha ialispaka, sug ladu chimba Jenesaret suti alpama chaiagrirkakuna. ³⁵ Chimanda runakunaka, Jestusta rigsispa, tukui parlu willarkakuna. Chasa iachaspakunaka, tukui ungugkunata paipagma apar-kakuna. ³⁶ Chaiagrispaka, ungugkuna paita mañarkakuna:

—Kamba katanga puntallapas sakiwai llamkangapa—. Chiwanka, tukui llamkagkuna ambirigsamurkakuna.

Runakunapa sungumanda jiru iuiaikuna llugsiskami Diospa ñawipi mapa niraiá

15 Chiuramanda sug fariseokuna i Moisés ima niskata iachachig taitakuna, Jerusalemamanda chaiagrirkakuna. Nispaka, Jesuspagma kaillaiaspa, kasa tapurkakuna:

² —Kamta katiraiagkuna, ¿imapatak ñugpamandakuna imasa iachachiskasina mana ruraspa kaugsanakú? Mana maki maillarispallami mikunakú.

³ Jesuska nirkakunata:

—Kamkunaka, ¿imapatak Taita Dios ima niskata mana rurangichi? Ñugpamandakuna iachachiskallata ruraspami kaugsanakungichi. ⁴ Taita Dioska, kasami nirka: “Kamba taitata mamandita sumaglla kuiangi”. Kasapasmi nirka: “Maikanpas taitata i mamata kamigpika, chitaka chaianmi wañuchingapa”. ⁵ Ikuti kamkunaka, kasami iachachingichi, maikanpa taitata u mamata ningapa: “Nuka mana pudiikichitachu aidangapa. Tukui nuka ima iukaska, Taita Diusta karaskami niraiá”. ⁶ Kamkuna chasa nispami iachachinakungichi, taitata i mamata mana kuiaspa uiangapa. Chasa iachachispa, Diospa Rimaitaka wabutingichimi. Kamkuna-pura ñugpamanda iachachiskallatami ruraspa kaugsangapa munangichi.

⁷ —¿Miski simi, sungu awalla rimagkuna! Kamkuna-mandami ñugpata rimag Isafas suti, Santu Ispirituwa kasa sutipa nirka:

⁸ Kai alpapi kaugsagkuna, sungu awalla rimaspami kuiawankuna.

Ikuti paikuna sungupi iuiawaka nukamanda sugpimi iuianakú.

⁹ Iangami nukata kunguriwagsina rurankuna.

Nuka niskata iachachingataka, runapura imasa ruringapa niskallatami iachachinkuna.

¹⁰ Chasa nispa, tukui chipi kagkunataka pai kaskama kaiaspa, Jesús nirkakunata:

—Suma iuiarispa uiawaichi. ¹¹ Runakuna ima mikuskaka, Diospa ñawipi ñi ima mana mapasina niraianchu. Runakunapa sungumanda jiru iuiaikuna llugsiskami mapa niraiá.

¹² Chiuramanda Jestusta katiraiagkuna, kaillaiaspa, paita tapurkakuna:

—¿Ñachu iachangi, fariseokuna, kam chasa rimaskamanda sungu nanagta uiagtakuna?

¹³ Chiura, Jesuska ainirka:

—Maikan sachapas, nukapa Taita suma luarpi kag mana tarpuska kagpika, angundi pilaimi tukungapa ka. ¹⁴ Chi fariseokunata ianga kawaichi. Mana ñawi kawag, sug mana ñawi kawagta pusagmi niraiankuna. Chasaka, iskandikunami pusuma urmagingapa kan-kuna.

¹⁵ Chiuraka, Pedro nirka:

—Kam ima iachachikuskata nukanchita allilla willai.

¹⁶ Chiura, Jesuska ainirkakunata:

—Kamkunapas, nukawa kaspas, ¿manarachu iachai-kungichi ima niraiagta? ¹⁷ ¿Manachu iachangichi, ima mikuskapas, wigsama iaikuspa, wigsamandaka kanchama llugsigta? ¹⁸ Sungumanda jiru iuiaikuna llugsiskami Diospa ñawipi mapa niraiá. ¹⁹ Sungumandami jiru iuiaikuna llugsí, kasa pandaringapa: wañuchingapa, sugpa warmiwa u sapalla warmiwa siriringapa, sisangapa, sugkunamanda llullaspa rimangapa, Taita Diustapas kamingapa. ²⁰ Chasa pandariikunami Diospa ñawipi mapa niraiá. Mana maki maillarispalla mikugkunataka, Diospa ñawipi ñi ima mana mapasina niraianchu.

Mana judú kag warmipa wambrata, Jesús ambiskamanda

²¹ Chimanda llugsispa, Jesuska Tiro i Sidón suti pui-blukuna suiu rirka. ²² Chiuraka sug warmi, chi Kanaán suti alpamanda paipagma kaillaiaspa, kasa nispa kaparirka:

—Davidpa wambra Iaia Jesús, nukamanda llakiripuai. Nukapa warmi wambrata kuku waira iaikuspami iapa nanachipuaku.

²³ Jesuska, mana imapas ainirka. Nigpika katiraiagkuna, paipagma kaillaiaspa, nirkakuna:

—Chi warmita, ¿imapatak mana paipagma kachangi? Iapami kaparispa kaparispa katichimuku.

²⁴ Jesús ainirkakunata:

—Israelmanda runakuna chingaska ubijakunasina kaskamandallami nuka kachamuska kani.

²⁵ Chiura chi warmika, Jestusta kungurispa, nirka:

—Taita turi, nuka mañakuskata aidawai.

²⁶ Chiura, Jesuska ainirka:

—Mana chaianchu, wambrakunapa tandata kichuspa, alkukunata sitapungapa.

²⁷ Chiura, chi warmika nirka:

—Ari, taita turi. Alkukunapa duiñukuna mikunakuskapi, misa ukuma piti urmaskakunata, paikunapas mikunkunami.

²⁸ Chasa uiaspa, Jesuska paita nirka:

—Iapa sumami nukamanda iuiarkangi. Kam imasa iuiakuskasina, allilla tukuchu.

Chiurallami chi warmipa wambra ambirigsamurka.

Achka ungugkunata, Jesús ambiskamanda

²⁹ Chimanda llugsispaka Jesús, Galilea kucha patama rirka. Chimandaka, awa lumama sikaspa, tiarigrirka.

³⁰ Iapa achka runakuna, ungugkunata apaspa, pai kaskama chaiagrirkakuna. Mana purii pudigkunata, maki u chaki illa kaskakunata, mana ñawi kawangapa pudiskakunata i mana rimai iukaskakunata Jesuspa chaki ladu churagrirkakuna. Chiura Jesuska, tukukunatami ambirka. ³¹ Chasaka, mana rimai iukaskakuna rimagsamurkakuna. Maki i chaki illa kaskakunapas, allillami tukugsamurkakuna. Mana purii pudigkunapas purigsamurkakuna. Mana ñawi kawangapa pudigkunapas kawagsamurkakuna. Chasa kawaspaka, chipi kagkuna ujnarispa nirkakuna:

—Israelmanda runakunapa Taita Dios, iapa suma atunmi ka.

Iskai biajima, Jesús tandakunata achkaiachiskamanda

³² Chiuramanda Jesuska, katiraiagkunata kiaspa, nirkakunata:

—Kai tukui runakuna, ña kimsa punchami nukawa kaipi kankuna. Paikuna ñi ima mana mikungapa iukagmanda, nukata iapami llakiriwagsamú. Mana munanichu, paikunata mana mikui karaspalla kikinkunapagma kachangapa. ¿Amalai ñambi rikuskallapi di-iarkai sambaiaspa urmagrintrakuna!

³³ Katiraiagkuna ainirkakuna:

—Kai maikan runapas mana kaugsanakuskapi, ¿maipitak chituku achka tanda randisunchi, kai tukui runakunata karangapa?

³⁴ Jesuska tapurkakunata:

—¿Maituku tandatak tiapungichita?

Chiura ainirkakuna:

—Kanchis tandallami tia, sug uchulla chalwakunapas.

³⁵ Chasa uiaspa Jesuska, chipi kagkunata nirka:

—Alpapi tiariichi—. ³⁶ Nispaka, chi kanchis tandata i chalwakunata charirispa, “Pai Siñur” Taita Diusta nirka. Chiuralla pitichispa, katiraiagkunata kuaspa richirka. Paikunaka, tukukunata karaspa aparkakuna.

³⁷ Tukuikunami sagsagta mikurkakuna. Nispaka, kanchis saparu junda piti pitikuna tandachirkakuna. ³⁸ Mai chusku waranga karikunami mikurkakuna, warmi i wambrakunata mana kuintaspalla.

³⁹ Chiuramanda Jesús, chi runakunata: “Kaiakama” nispaka, kanuama iaikurka. Chimandaka, Magadán suti alpama rirka.

Mana kawaskasina kawachimui, Jestusta mañanakuskamanda

16 Fariseokuna i saduseokuna, kaillaiagrispa, Jestusta mañanakurka, mana imaurapas kawaskasina awa luarmanda kawachingapa; chasaka, pai-manda iachangapa, sutipa Taita Dios kachamuska kagta.

² Jesuska ainirkakunata:

—Kamkuna, ¿manachu ningichi: “Chisima puka puii kawarigpika, kaia alli punchami kangapa ka”? ³ Chasallata, tutata amsa puka puii pakarigpika, ¿manachu ningichi: “Tamia punchami kangapa ka”? Imasa awapi kawariskakunata kawaspaka, iachangichimi ninga, punchakuna imasa kangapa kagta. Ikuti, kai punchakuna nuka ima rurakuskata kawaspapas, mana iuiaringichichu ima pasarikugta. ⁴ Taita Diusta mana iuiarispaspa, mana allilla ruraspa kaugsanakuspami mañawanakungichi: “Mana kawaskasina kawachimui”. Ñi imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti, imasami pasarka: chasallata kawarillami kawangapa kangichi.

Chasa nispaka, paikunata sakispa, kucha sug ladu chimba katiraiagkunawa rirka. ⁵ Katiraiagkuna kungariska karkakuna, tanda apangapa. ⁶ Chiura, Jesuska nirkakunata:

—Suma iuiarispa uiawaichi. Fariseokunapa i saduseokunapa libadurasina iuiaita, ¿ujalallapas iuianakungichi!

⁷ Chasa uiaspaka, kikinpura rimarinakurka, iuiaspa:

—Tanda mana apamuskamandami chasa nukanchita niku.

⁸ Chi rimanakuskata uiaspa, Jesuska nirka:

—¿Imapatak ninakungichi: “Tanda mana apamuskamandami chasa nukanchita niku”? Nukamandaka, ¿imapatak mana mas suma allilla iuiaringichi? ⁹ ¿Ima-

wantak, uiawaspapas, kamkunapa umapika manara iaikú? Nuka pichka tandata pitichiuraka, pichka waranga runakuna mikurkakuna; chi puchuskakunataka, ¿manachu iuiaringichi, maituku saparu junda tandachigtakuna? ¹⁰ Chasallata, nuka kanchis tandata pitichiuraka, chusku waranga runakuna mikurkakuna; chi puchuskakunataka, ¿manachu iuiaringichi, maituku saparu junda tandachigtakuna? ¹¹ ¿Imapatak mana iuiaringichi, nukaka tandamandalla mana kamkunata rimakugta? Fariseokunapa i saduseokunapa libadurasina iuiaita, ujalallapas iuiaringichi!

¹² Chasa niuraka, iuiái apirkakunata, mana tanda libaduramanda rimakuska kagta; fariseokunapa i saduseokunapa iachachiikunata kuida iukangapa niraiagta.

Kam, Dios agllaska Cristomi kangí, Pedro Jesusta niskamanda

¹³ Jesús, Filipopa Sesarea suti alpama chaiagripaka, paita katiraiagkunata tapurka:

—Runakunaka kai Runa Tukuskamanda, ¿pitak kagta ninkuna?

¹⁴ Paikunaka ainirkakuna:

—Maikankuna ninkunami: kam kangisi Juan Bautista. Sugkunaka: kam ñugpamanda rimag Elías; ikuti sugkunaka: Jeremías u Santu Ispirituwa sug ñugpata rimagsi kangí.

¹⁵ Chiura, Jesús tapurkakunata:

—Kamkunaka nukamanda, ¿pi kagtatak niwangichi?

¹⁶ Chasa tapuura, Simón Pedroka ainirka:

—Kam kangimi kaugsag Diospa wambra. Pai agllaska Cristomi kangí.

¹⁷ Chiura, Jesuska nirka:

—Kam Jonaspa wambra Simón, Taita Diospa iapa kuiaskami kangí. Ñi maikan runapas, kamta mana iuiachirkachu, chasa ainingapa. Nukapa Taita suma luarpi kagmi kamta chasa iuiachirka. ¹⁸ Nuka kamtami niiki: kam, Pedro u rumimi niraiangi. Kai atun rumipi wasichigsinami iglesia tukuskakunata mirachingapa kani. Chitaka, maituku infirnumanda puchukangapa munakugpipas, mana puchukai pudingapa kankunachu.

¹⁹ —Suma luarma iaikugridiru llabikunatami kungapa kaiki. Maikan pandariskakunata, kam kai alpapi mana pasinsiaska nigpika, sug luarpipas chasallatami tukungapa kankuna. Chasallata, maikan pandariskakunata kam kai alpapi pasinsiaskaka, sug luarpipas chasallatami pasinsiai tukungapa kankuna.

²⁰ Chasa nispaka, katiraiagkunata nirka:

—Mana pitapas willanakungichi, nuka, Taita Dios agllaska Cristo kagta.

Jesús imasa wañungapa kagta, pai musuglla willaskamanda

²¹ Chiuramanda Jesuska, paita katiraiagkunata iachachii kallarirka, kasa nispa:

—Nukata, Jerusalem ringapami chaiawaku. Chipika, iaia sasirdutikuna, Moisés ima niskata iachachig

taidakuna i sug taitakunapas iapa llakii i nanaimi pasachiwangapa kankuna. Nukata wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

²² Chasa uiaspaka Pedroka, Jesús sapallata mana uianakuskama pusaspa, kasa piñagsina nii kallarirka:

—¡Ujalallapas Taita Dios chasa munachu, taita waugki! Chasa llakiikuna, mana imaurapas kamta pasariningapa kanchu.

²³ Chiura Jesuska, tigrarirka, Pedrota nirka:

—Nukapa ladumanda, iaia kuku, anchurii. Kam chasa niwaspaka, pandachiwangapami munakungi. Kam mana iuiakungichu Taita Dios imasa iuiakuskasina. Runakunapa iuiailawami chasa iuiakungi.

²⁴ Chasa nispaka, katiraiagkunata nirka:

—Maikan nukata katiraiawangapa munagka, kikinmanda kungarichu. Paipa krusta markarigsina ruraspami iuká katiraiawanga. ²⁵ Maikan kikinpa kaugsaita kispichingapaglla iuiakugpika, kikinmi puchuringapa ka. Ikuti maikanpas nukamanda wañuchii tukugpika, mana mas wañui kaugsaitami taringapa ka.

²⁶ —Sug runa, tukui kai alpapi ima munaska iukagpipas, paipa almata mana kispichigpika, chi iukaskakuna, ñi imapa mana balipungapa kanchu. Chi runaka, paipa almata chingachispaka, ¿imawatak pudingapa ka, ikuti taringapa? Ñi imawapas manima.

²⁷ —Kai Runa Tukuska samuura, nukapa Taita suma atunichiskawami nukapa anjilkunawa samungapa ka. Samuspaka, tukuikunatami imasa allilla u mana allilla ruraskakunata kawachigsamungapa kani.

²⁸ —Kasami nuka niikichita: maikan kaipi kagkuna manara wañugkuna, kai Runa Tukuska suma mandaiwa samugtami kawawangapa kankuna.

Jesús, sug rigcha kawari tukugsamuskamanda

17 Chiuramanda sugta punchapika, Jesuska, Pedrota, Santiagota i waugkindi Juanta pusaspa, sug awa lumama paikunallawa sikagrirka. ² Chipi chaiagripaka, paikuna kawanakugllapi, sug rigcha kawari tukugsamurka. Paipa ñawi, indisina punchami tukugsamurka. Paipa katangapas, iapa iura punchallami tukugsamurka.

³ Kawanakugllapi, Moisés i Elías kawarigsamurkaku. Chi runakunaka, Jesuswa rimanakui kallarirka-kuna. ⁴ Chasa kawaspaka Pedroka, Jesusta kasa nirka:

—Taita waugki, kaipi iapa alli iuiachimi kanchi. Kam munagpika, kimsa tambu kaipi ruras: kammanda sug, Moisesmanda sug, sugka Eliasmanda.

⁵ Chasa Pedro rimakunkama, puncha puiulla, paikunata kilpagsamurka. Chi puiuu ukumanda, sug rimagta uiarigsamurka, kasa nispa:

—Kai, nukapa kuiaska wambami kapuá. Paita kawaspa, iapa alli sumami iuiachiiwa kawani. Paita uia-puangichi.

⁶ Chasa uiaspaka chi katiraiagkuna, askurinti mancharispa, umata alpama kumurirkakuna. ⁷ Chiura-

manda Jesús kikin, kailliaspa, paikunata llamkaspá, nirka:

—Atariichi. Mana manchanakuichi.

⁸ Paikuna uma atarichispa kawaura, Jesuska ikuti sapalla kawarigsamurkakunata; sugkunaka manima.

⁹ Chi lumamanda uraikunakuuraka, Jesuska nirka-kunata:

—Kamkuna ima kawaskata mana pitapas willanangkungichi. Kai Runa Tukuska wañuspa kaugsariskauramandami chasa kawaskata willankangichi.

¹⁰ Chiura katiraiagkuna, paita tapurkakuna:

—Nigpi, ¿imapatak Moisés ima niskata iachachig taitakuna ninkuna: “Eliastami chaiaku, Taita Dios agllaska Cristopa ñugpa samungapa?”

¹¹ Chiura, Jesuska ainirkakunata:

—Sutipami Elías ñugpa samungapa ka. Tukuimi allichigsamungapa ka. ¹² Chasa samungapa kagpipas, nukaka kasami niikichita: Elías ñami samurka. Paitaka mana rigsirkakunachu pi kagta. Imasa munaskasinami paita mana allilla rurarkakuna. Kai Runa Tukuskatapas chasallatami rurawangapa kankuna.

¹³ Chasa uiaspaka, katiraiagkunata iuiarirka: “Juan Bautistamandami chasa rimakuska”.

Sug wambra wañui ungui iukaskata, Jesús aliachiskamanda

¹⁴ Paikuna iapa achka runakunapagma chaiagriuraka, sug runaka, kailliaspa, Jesusta kungurispa nirka:

¹⁵ —Taita waugki, nukapa wambamanda llakiripuai. Wañui unguiwa iapa llakingasinami kapuá. Ninapi i iakupi achka biajimi urmapuá. ¹⁶ Chimandami kamta katiraiagkunapagma apamuspa kawachirkani. Nigpika, paikuna manima ambipuangapa pudirkakunachu.

¹⁷ Jesuska ainirka:

—¿Ai, kam mana alli runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka— Chi ungugta kaima pusamuichi— nirka.

¹⁸ Chaiachigriura, Jesuska chi kuku wairata sinchi piñarka. Chasa piñaura, chi kuku waira chi wambamanda llugsirka. Chiuralla, suma ambirigsamurka.

¹⁹ Paita katiraiagkuna, chasa kawaspaka, Jesús sapalla kaskapi kailliaspa, tapurkakuna:

—¿Imawantak nukanchika mana pudirkanchi, chi kuku wairata llugsichingapa?

²⁰ Chiura, Jesuska ainirkakunata:

—Kamkuna nukamanda mailla iuianakugmandami mana llugsichingapa pudirkangichi. Kasami nuka niikichita: sug uchulla muritu mustasasinallapas kamkuna nukamanda iuiái iukantrangichi; kai lumata nintrangichi: “Kaimanda chasama ialirii”. Chiurallami chi luma, sugsinama ialirinha. Tukuimi chasa pudirinha. ²¹ [Chi kuku wairakunataka, mana mikuspalla Taita Diusta sinchi mañaskawami llugsichingapa pudirí.] †

† Kasa [...] siñalwami willaraiá, sug ñugpamanda pangakunapi chasa iskribiska kagta; ikuti sugkunapika, manima.

Jesús imasa wañungapa kagta, pai parisma willaskamanda

²² Chara Galileapi kankama, Jesús nirkakunata:

—Kai Runa Tukuskaka, mana alli runakunapagmami chaiachii tukungapa ka. ²³ Paikunaka wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

Paikuna, chasa uiaspaka, iapa llakirirkakuna.

Diuspa atun wasimanda kulki kuanakuskamanda

²⁴ Paikuna Kafarnaum puibluma chaiagriuraka, Diuspa atun wasimanda impuistu chaskigkuna, kailliaspa, Pedrota tapurkakuna:

—Kamkunata iachachig, ¿impuistu paganchu?

Chiura ainirka:

—Ari.

²⁵ Pedro wasi ukuma iaikugrispa, manara imapas rimagpi, Jesuska paita tapurka:

—Kai alpapi mandagkuna, ¿pikunatak impuistu chaskinkuna: kikinpa wambrakunata u sugkunata? Kam, ¿imatak ainiwangi?

²⁶ —Sugkunata— Pedro ainirka.

Chiura, Jesuska nirka:

—Nigpi, wambrakunataka mana pagangapa chaiachu. ²⁷ Chasa kagpipas, mana chi mañanakuskata piñachingapa, kucha patama rii. Chipi, ansuilu sitangi. Maikan ñugpa chalwa urmaskata simita kawangi. Chipimi sug kulki tarinkangi. Chita apaspa, nukamanda i kammanda mañanakuskata kuagringi.

Maikan mas atun taita kangapa, Jesús iachachiskamanda

18 Chasa kagllapi, Jesusta katiraiagkunaka, kailliaspa, tapurkakuna:

—Suma luarpi, Taita Dios mandakuskapi, ¿pitak mas atun taita tukuska kangapa ka?

² Chiura Jesuska, sug uchulla wambrata kaiaspa, chaugpipi saiachirka, ³ kasa nispá:

—Kasami nuka niikichita: kamkuna, mana Diuspa ñawipi kai wawasina allilla tukugsamuspa, mana suma luarma iaikugringapa kangichichu. ⁴ Maikanpas kai uchullasina mana imakunapipas subirbiaspalla tukugsamug, paimi, suma luarpi, Taita Dios suma mandakuskapi, mas atun taita tukuska kangapa ka. ⁵ Maikanpas kai uchullatasina nukamanda iuiarispá chaskigpika, nukata chaskiwagsinami rurá.

⁶ —Ikuti maikanpas kasa uchulla nukamanda suma iuiawagta pandachipuagpika, paita chiantrami, sug atun kutanga rumi kungapi wataspa, atun kucha iakuma sitagringapa.

⁷ —Kai alpapi pandariikunapi urmachingapa, achkami tia. Chasami imaurapas tiangapa ka. Chasa tiagpipas, ¡ai, maikan runa, sugkunata pandariikunapi urmachig!

⁸ —Kamba makiwa u chakiwa pandaringapa chaiagpika, chita chianmi kuchuspa sitangapa, mana

pandaringapa. Chasapaka, mas allichar kantra, maki u chaki kuru suma luarma iaikugringapa. Mana kagpika, ¿iskandi maki i chakikunawantachu munaipa, atun ni-na ñi imaurapas mana wañungapa kaskama sitai tukungapa?

⁹—Chasallata, kamba ñawiwa kawaspa pandaringapa chaiagpika, chita chaianmi surkuspa sitangapa, mana pandaringapa. Chasapaka, mas allichar kantra, suglla ñawillawapas suma luarma iaikugringapa. Mana kagpika, ¿iskandi ñawikunawantachu munaipa, diltudupa ninama sitai tukungapa?

Ubija chingaskamanda parlu

¹⁰—Ñi maikan kai uchullakunata mana wabutingichi. Kasami nuka niikichita: paikunata kawag anjilkunaka, suma luarpi imaurapas nukapa Taitapa ñawipimi kankuna. [¹¹ Kai Runa Tukuskaka samurkami, maikan chingaskasinata maskaspa taringapa.]

¹²—¿Imatak iuiangichi? Maikan runapas, patsa ubija iukaspa, sug ubija chingapugpika, ¿manachu iskun chungu iskunta sakispa, maskai kallarintra, chi ubijata tarinkama? Ari. ¹³ Kasami nuka niikichita: chi chingaskata tariura, iskun chungu iskun mana imaurapas chingagkunamanda masmi chi tarigta alli iuiachirintra. ¹⁴ Chasallata, kamkunapa Taita suma luarpi kag mana munanchu, ñi sug kai uchullakuna chingarispas, paipagma mana chaiagringapa.

Imasa sugkunata pasinsiangapa chaiagta

¹⁵—Maikanpas kamta mana allilla ruragpika, pai sapallata rimaspa iuiachigringi. Kamta allilla uiagpika, ikutimi sumaglla waugkindi tukunkangichi. ¹⁶ Mana kamta uiagpika, sug u iska runakunata pusaspa, ikuti rimagringi; chipika, iska u kimsa uiagkuna tiachu, tukui imasa rimanakuska uiangapa. ¹⁷ Paikunatapas mana uiagpika, iglisia tukuskakunata willangichi. Iglisia tukuskakunatapas mana uiagpika, chi runa, kam kikinpura i Taita Diusta mana rigsigmi tukú. †

¹⁸—Kasami nuka niikichita: maikan pandariskakunata, kamkuna kai alpapi mana pasinsiaska nigpika, sug luarpipas chasallatami tukungapa kankuna. Ikuti maikan pandariskakunata kamkuna kai alpapi pasinsiaska, sug luarpipas chasallatami pasinsiai tukungapa kankuna.

¹⁹—Kasapasmi niikichita: iskaikunallapas, kai alpapi sugllasina iuiarispas, nukapa Taita suma luarpi kagta mañagpika, chasallatami ima mañaska karamungapa ka. ²⁰ Iska u kimsakunallapas kaskapi nukata iuiariwachukuna: nuka kikinmi paikunawa sugllapi kangapa kani.

²¹ Chiura Pedro, kaillaispa, Jesusta tapurka:

—Taita waugki, maikanpas nukata mana allilla rurawagpika, ¿maituku biajidak chiaiawaku, paita pasinsiangapa? ¿Kanchis biajikamachu pasinsiangapa chaiawangapa ka?

† griego rimaiwa: mana judíu kaskakunamanda kulki chaskig-sina.

²² Jesuska ainirka:

—Mana niikichu, kanchis biajikamalla pasinsiangapa. Niikimi, kanchis chungata kanchis biaji ialigtapas pasinsiangapa.

²³—Chasamanda Taita Dius suma luarpi kag, sug atun mandagsinami niraiá. Kasa niipa: chi mandagka munarka, paipa piunkunata: “Ima mañachiskata kutichiwai” ningapa. ²⁴ Chasa kallariukuraka, sug piuntasi paipagma pusagrirkakuna. Chi piunta chungu waranga kuri kulkisi mañachiska karka. ²⁵ Nigpika, mana kutichingapa pudikugmanda, chi mandag, justisiakunata nirkasi: “Paita, warmindita, wambrakunata i tukui ima tiapuskakunatapas katugriichi, imasa mañachiskasina kutichiwangapa”.

²⁶—Chiura chi piun, kungurispas, mañai kallarirka, kasa nispa: “Taita waugki, nukamanda llakirii. Suiawai. Tukui kutichisaki”.

²⁷—Chasa mañaura mandagka, suma llakirispas, piunta uiaspa, tukui mañachiskata pasinsiarika. Nispaka, sakirkasi ringapa.

²⁸—Rikuura, pai piunpura kawanakurka. Chi sug piuntaka patsa billitisi pai mañachiska karka. Chita kawaspa, kungapi apispa, sipikugsina charirispas, nirka: “Nukapa kulkita kutichiwai”.

²⁹—Chiura chi sug piun, kungurispas, mañai kallarirka, kasa nispa: “Nukamanda llakirii. Suiawai. Tukui kutichisaki”.

³⁰—Paikar mana munarka, ñi imasapipas pasinsiangapa. Chi piunta karsilpi churachirka, tukui mañachiskata kutichinkama iuiaspa.

³¹—Pai piunpura, chasa kawaspa, iapasi llakirirkakuna. Nispaka, chi mandagta tukui imasa kawaska willagrirkakuna. ³² Chasa iachaspaka chi mandagka, paita kaiaspa, nirkasi: “¿Mana alli iuiaiugmi kang! Kam mañawagmandami nuka tukui mañachiskata pasinsiarikaiki. ³³ Nuka kamta sumami llakirirkaiki. Nigpika kamtapas, ¿manachu chaiakurka, chasallata kam piunpura llakiringapa?”.

³⁴—Chasa nispaka, iapa rabiarispas, justisiakunata nirka: “Karsilpi wichkapuaichi, tukui kulki kutichiwankama”.

³⁵ Chasa parlaspa, Jesús nirka:

—Kamkuna suma iuiaiwa sugkunata mana pasinsiangapikunaka, nukapa Taita suma luarpi kagpas kamkunatapas chasallatami mana pasinsiangapa ka.

Kusa, kikinpa warmita mana sitangapa, Jesús iachachiskamanda

19 Jesús, chasa rimai puchukaspaka, Galilea alpamanda llugsispa rirka. Jordán iaku sug ladu chimba ialispa, Judea alpama chaiagrirka. ² Chi laduka, iapa achka runakuna paita katicii kallarirkakuna. Jesuska, chipi chaiagrispa, unguwa kaskakunata ambigrirka.

³ Sug fariseokuna, paipagma kaillaiagrirkakuna. Chi runakunaka, Jesusta pandachingapa iuiaiwa tapurkuna:

—¿Pudinchichu, nukanchipa warmita imamandallapas sitangapa?

⁴Jesuska ainirka:

—¿Manachu kasa Moisés niraiaskata kawarkangichi, Taita Dios runakunata wiñachig, kallarisauramandata kari i warmi wiñachispa ruragta? ⁵Wiñachispaka, nirka: “Chimandami, kari kagpi, paipa taitata mamandita sakispa, paipa warmiwa iskandikuna sugllasina tukug-samungapa kankuna”. ⁶Chasa kaspaka, mana iskai niraiianchu. Suglla tukuskami niraiá. Taita Dios chasa suglla tukuska niraiaskata, ñi maikan runapas mana iukanchu “Sitanakui” ninga.

⁷Paikunaka tapurkakuna:

—Nigpika, ¿imapatak Moisés sakirka, kusa, sug iskribiska warmita kuaspaka, ña paitaka sitaska niraiangapa?

⁸Chiura, Jesuska ainirka:

—Kamkuna upa iuiái tukuska kagmandami Moisés kamkunata chasa rurangapa sakirka. Ñugpa, runakuna tiaí kallariura, mana chasa karkachu. ⁹Kasami nuka niikichita: maikanpas, kikinpa warmita sitaspa, sug warmiwa kasaragpika, atun pandariimi rurá. Paipa warmi sug kariwa apirigpika, chimandakar pudingichimi sitangapa. [Maikanpas kusa sitaska warmiwa kasaragpika, atun pandariimi chasallata rurá.]

¹⁰Chiuramanda katiraiagkuna, Jesusta nirkakuna:

—Maikan kusapas mana kikinpa warmita sitangapa pudigpika, mas allichar kantra mana kasarangapa.

¹¹Jesusk nirkakunata:

—Mana tukuikuna pudinkunachu, chi iachachiskata suma uiangapa. Taita Dios suma iuiái karaska iukagkunallami suma uiankuna. ¹²Maikankuna, tiagsamusauramandatami mana pudinkuna kasarangapa. Sugkunaka, kapai tukuskami kankuna, mana warmi iukangapa. Ikuti sugkunaka, Taita Dios suma luarpi kag ima niskata rurangapa iuiaspami mana warmi iukangapa munankuna. Maikan chasa allilla uiaspa rurangapa pudigkuna, uiachukuna.

Wawakunata, Jesús maki churaskamanda

¹³Chiuramanda uchullakunata, paikunapa atunkuna Jesuspagma pusarkakuna, Taita Diusta paikunamanda mañaspa, maki churangapa. Jesusta katiraiagkunaka, pusanakugta piñaspa, nirkakuna:

—Mana kaillaianakuichi.

¹⁴Chiura, Jesuska nirka:

—Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna.

¹⁵Chasa nispaka, wawakunata maki churarka. Nispaka, chimanda llugsispa rirka.

Sug iapa iukag musu, Jesuswa rimanakuskamanda

¹⁶Sug musu, Jesuspagma kaillaiagrispa, tapurka:

—Iachachig taita, ¿ima alli ruraiwatak iukani ruranga, mana puchukariduru suma kaugsaita taringapa?

¹⁷Jesusk ainirka:

—¿Imapatak alli ruraimanda tapuwakungi? Taita Diosllami alli ka. Chi kaugsaita iukangapa munaspaka, Moisés ima niskata allilla ruraspa kaugsangi.

¹⁸Chi musuka ikuti tapurka:

—¿Maikankuna?

Chiura, Jesuska ainirka:

—Mana wañuchingi. Mana sugpa warmiwa siriringi. Mana sisangi. Mana pimandapas llullangi. ¹⁹Kamba taitata mamandita sumaglla kuiangi. Kam kikintasina mi iukangi, tukui runakunata kuianga.

²⁰Chasa uiaspa, chi musu nirka:

—Tukui chi niskata chasa ruraspami kaugsani. Niwai: ¿imatatak pisiwaku?

²¹Chiura, Jesuska ainirka:

—Kam tukui iapa iukangapa munaspaka, kunaauralla rii. Tukui ima iukaskata katugrii. Katuska kulkitaka mana iukaskakunata tukuita karagrii. Chasa ruraspa, suma luarpi iapa iukagmi tukungapa kangi. Nispaka samungi, nukata katiwangapa.

²²Chasa rimaskata uiaspaka, chi musu llakirispami rirka, iapa iukag kaspaka.

²³Jesusk, katiraiagkunata nirka:

—Kasami nuka niikichita: iapa iukagkuna suma luarma iaikugringapaka, iapa trabajusumi kangapa ka.

²⁴Ikuti niikichitami: maschar alli kantra, sug wagra † sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁵Chasa uiaspaka katiraiagkuna, iapa ujnarispa, kasa tapurkakuna:

—Nigpika, ¿pisik kispiringapa pudinga?

²⁶Chiura Jesuska, paikunata kawaspa, nirka:

—Ñi maikan runa mana pudinchu. Taita Diosllami kispichingapa pudí.

²⁷Chiura, Pedroka nirka:

—Uiamui. Nukanchi, tukui ima iukaskata sakispami kamta katiraiianchi. Nigpika, ¿imatatak nukanchimanda tiangapa ka?

²⁸Jesusk, paikunata ainirka:

—Kasami nuka niikichita: tukui musuiachii tukug-samuuraka, kai Runa Tukuska iapa suma atun mandadirupimi tiarigringapa ka. Chiuraka, kamkuna nukata katiraiawagkunapas, chillapita chungu iskai mandadirupimi tiarigringapa kangichi; chasaka, ñugpamanda achala taita Israelpa chungu iskai wambrakunapa wambrakunata kawaspa justisiangapa. ²⁹Maikanpas, nukata kuiawaspa, wasita, waugki i panikunata, taita i mamandita, wambrakunata, alpakunata u ima iukaskata sakispa katiwagka, patsamanda mas patsami chaskingapa kankuna. Mana puchukariduru suma kaugsaitapasmi tarigringapa kankuna. ³⁰Chasa kagpipas, kunaura ñugpa niraiaskakuna, achkakunami kati laduma tukungapa kankuna. Ikuti kunaura kati niraiaskakunaka, achkakunami ñugpa laduma tukungapa kankuna.

† griego rimaiwa: kamello suti atun animal.

Ubasta pallagkunamanda parlu

20 —Taita Dios sug luarpi suma mandag, ubas chagraiug runasinami niraiá. Kasa niipa: chi runaka, iapa tutatasi rirka, pallagkuna maskangapa. ² Pallagringapa munagkunata nirka: “Sug sug chisiagta pallagsina bali kulkimi kuasakichita”.

—“Ari” ainiskakunatasi kacharka, ubas chagrapi pallangapa.

³ —Chaugpi tutapas, ikutisi kallima rirka. Chipi ianga saianakuskata tarispaka, ⁴ tapurkakunata: “¿Kamkunapas munantrangichichu, nukapa chagrapi pallagringapa? Imasa baliskasinami kuasakichita”. Chasa tapuura, chikunapas rirkakuna pallangapa.

⁵ —Ikuti chaugpuncha i chaugpi chisimapas, chasallatasi maskagrirka. ⁶ Ña indi chingakuurapas, ikuti kallima rispa, sugkuna saianakuskatata tarigrirka. Chikunatasi tapurka: “¿Imapatak chisiagta ianga saianakungichi?”.

⁷ —Chiura ainirkakuna: “Ñi pipas nukanchita mana ñi imapapas maskankunachu”.

—“Nigpika kamkunapas, nukapa ubas chagrama rii-chi pallangapa” nirkakunata.

⁸ —Ña amsaiakuuraka, chi chagraiugka paipa kapuralta nirkasi: “Pallagkunata kaiaspa, kallaringi, kati chaiamugkunata ñugpa pagangapa. Nispaka, suiu suiu, tutata kallarigta pagangi”.

⁹ —Ña pagai kallariuraka, chisima chaiagrigrakuna, chisiagta pallagsina bali kulkisi chaskigrirkakuna.

¹⁰ Chasa chaskinakuska iachaspaka, tutatamandata pallagkunaka iuianakurka: “Nukanchita masmi chaskingapa chaianga”. Chasa iuianakugpipas, sugkuna chaskiskasinallatata chaskingapa chaiarka.

¹¹ —Chaskispaka, chagraiugta kallarirkakuna, rabiariispa, kasa ningapa: ¹² “Kati chaiamugkuna, sug urallami pallarkakuna. Nukanchikar, indi iapa ruparikuskapi-chisiarkanchi. ¿Imapatak paikuna chaskiskasinallatata nukanchita pagachirkangi?”.

¹³ —Chasa uiaspa chagraiugka, sug paipurata nirka: “Waugki, nuka kamta mana jiru imapipas rurakuikichu. ‘Chisiagta pallagsina bali kulkimi kuasaki’ nuka niura, ¿manachu ainiwarkangi: ‘Ari’? ¹⁴ Kamta chaiakuska kulkita apaspa rii. Nukami munarkani, kamba kati samuskakunatapas, kamkunata imasami kuangapa chaiá: chasallata kuangapa. ¹⁵ Nukapa kulkita, ¿manachu pudini, nuka imasa munaskasina rurangapa? Nukapa alli iuiwaiwa chasa kuaskamanda, ¿imapatak kamka mana allilla iuiaspa kawakungi?”.

¹⁶ —Chasallatami tukungapa ka: kunaura kati niraiaskakuna, ñugpa ladumami tukungapa kankuna. Ikuti kunaura ñugpa niraiaskakunaka, kati ladumami tukungapa kankuna.

Jesús imasa wañungapa kagta, pai kimsama willaskamanda

¹⁷ Jerusalén puibluma ñambi rinakuskapi, Jesuska, chungu iskai katiraiagkunallata kaiaspa, nirka:

¹⁸ —Uiawaichi. Jerusalemami rinakunchi. Chipika, kai Runa Tukuskaka iaia sasirdutikunapa i Moisés ima niskata iachachig taitakunapa makipimi apichii tukungapa ka. Chi runakunaka, nukamanda ningapami kankuna: “Wañuchiimi chaiá”. ¹⁹ Nispaka, mana judíu kaskakunapagmami chaiachiwangapa kankuna. Paikuna, nukata unżawaspa, asutiwaspa, kruspi klabaspami wañuchiwangapa kankuna. Chasa wañuska kaspapas, kimsa punchapika ikutimi kaugsaringapa kani.

Santiago i Juanpa mama, ima Jesusta mañapuskamanda

²⁰ Chiura Zebedeopa warmi, iskandi wambrakunawa Jesuspagma kaillaiaspaka, kungurirka, kasa nispa:

—Nuka ima mañakuskata, ¿manachu uiawantrangi?

²¹ Chiura, Jesús tapurka:

—¿Imatak munakungi?

Chasa uiaspa, chi warmika ainirka:

—Kam mandangapa tiarispai chaiaura, kai nukapa iskandi wambrakunata tiarichipuangi: sugtaka, kamba alli ladu; sugtaka, kamba lluki ladu.

²² Jesuska nirka:

—Mana iachangichichu ima mañanakugta. Nukata chaiawangapami ka, iapa achka llakiikuna [†] iukangapa. ¿Kamkunapaschu chasallata pudinrangichi, llakiikunata pasangapa?

—Ari— ainirkakuna—, chasa pudingapami kanchi.

²³ Jesuska nirkakunata:

—Ari, nuka llakiikunasinallatata, kamkunapasmi pasankangichi. Chi nukapa alli ladu lluki ladu tiarichingapaka, nukata mana chaiawakunchu kawangapa. Maikan nukapa Taita agllaskakunatami chasa tiarichingapa ka.

²⁴ Chi iskai waugkindikuna ima mañanakuskata uiaspaka, chi sug chungu katiraiagkuna rabiarii kallarirkakuna. ²⁵ Jesuska, paikunata kaiaspa, nirkakunata:

—Kamkuna allillami iachangichi: kai alpapi atun mandagkuna, mandanakuskapi kaugsagkunata ñi ima mana llakispallami mandankuna. Chasallata, maikanpas atun mandagsina tukuspa, mana llakispallami runakunata charinkuna. ²⁶ Kam kikinpuraka, chasa rurag runakunaka mana kangichi. Kam kikinpura maikan, Diospa ñawipi atun kangapa munaspaka, sugkunapa lutrinsina tukuchu. ²⁷ Maikan mas atun taita kangapa munagpas, ñugpa iukanmi sugkunapa lutrinsina kanga. ²⁸ Chasallata kai Runa Tukuskaka mana samurkachu, sugkunata lutrinsina churangapa. Tukui-kunapa lutrinsina kangapami nuka samurkani. Nukapa wañuiwami achkakunata kispichingapa kani.

Iskai runa mana ñawi kawagkunata, Jesús aliachiskamanda

²⁹ Paikuna Jerikó suti puiblumanda llugsispa rinakuskata, iapa achka runakuna Jesusta katichii kallarirkakuna. ³⁰ Chi ñambi kuchupi, iskai runa mana ñawi

[†] “Sug winja kupata upiangapa”, iapa achka llakiikuna iukangapami niraiá.

kawagkunami tianakurka. Chi runakunaka, Jesús ña ialikugta uiaspa, kaparii kallarirkakuna, kasa nispá: —Davidpa wambra [Iaia Jesús], nukanchimanda llakirrii.

³¹ Chi achka katiraiagkuna, paikunata piñaspa, ninakurka:

—Upalla kaichi.

Paikunaka, upallangataka, mas sinchimi kaparii kallarirkakuna, nispá:

—Davidpa wambra Iaia Jesús, nukanchimanda llakirrii.

³² Chasa uiaspa Jesuska, saiarispa, chi runakunata kaiaspa, tapurka:

—¿Imatak munanakungichi, nuka kamkunata rurangapa?

³³ Chiura ainirkakuna:

—Taita waugki, nukanchi kawangapami munanakunachi.

³⁴ Chiura Jesuska, suma llakirrispa, ñawikunata llamkarka. Chasa llamkaglapi, allilla kawai kallarirkakuna. Nispaka, Jesusta katii kallarirkakuna.

Jerusalén puibluma, Jesús iaikugriskamanda

21 Jerusalenma ña kaillaianakuspa, Betfajé suti puiblu ña kawarikuskamanda, Olivos suti lumakama chaiagrirkakuna. Chimanda Jesuska, iska katiiraiagkunata kacharka, ² kasa nispá:

—Riichi chi ñugpa ladu uchulla puibluma. Chaiagrispaka, sug bura wataraiaskatami tarigrinkangichi. Wawa burupas, sugllapimi kanga. Chi burata paskaspa, iskandikunata apamungichi. ³ Maikan tapuchu: “¿Imapatak apapungichi?”: chiura ainingichi: “Iaia Jesustami ministiku. Mañachii. Ñami kutichimunga”.

⁴ Chasa tukugsamurka, Santu Ispirituwa ñugpata willaraiaskasina. Chipika, kasami niraiá:

⁵ Sión lumamanda warmikunata kasa willapuaichi: “Kawaichi. Kamkunapa atun mandagmi samuku.

Mana imapas iukagsinami samuku, sug burupi tiariska.

Aparichidiru animalpa maltu wawa burupimi tiariska samuku”.

⁶ Chi kachai tukuskakunaka, rispa, imasa Jesús niskasina ruragrirkakuna. ⁷ Burata wawandiwanta Jesus-pagma aparkakuna. Chaiachigrispaka, burapa wasapi paikunapa katangakunata churarkakuna. Chasapika Jesús, tiarispá, rii kallarirka. ⁸ Chasa Jesús rikugta kawaspa, achka runakuna, paikuna kataraiaska katangakunata ñambi suiu mandachirkakuna. Sugkunaka, pangaiug sacha uchulla malkikunata kuchuspa, ñambi ñambi churarkakuna, pai ialingapa. ⁹ Nispaka Jesusta ñugpagkuna i paipa kati rinakug, kasa kaparispa nii kallarirkakuna:

—Ñugpamanda taita Davidpa wambra kangi.

Kam iapa suma kagtami ninchi.

Atun Taita Dios kachamuskami samukungi.

Paipa iapa kuiaskami kangi.

Taita Dios awa suma luarpi kagtapasmi ninchi:

“Kam, iapa sumami kangi”.

¹⁰ Jesús chasa Jerusalenma chaiagriuraka, chipi kausagkuna, iapa achka runakuna katiraiagkunata kawaspa, mancharispa tapunakurka:

—Chi runa, ¿pistik ka?

¹¹ Katiraiagkunaka ainirkakuna:

—Jesús suti Santu Ispirituwa rimagmi ka. Galilea alpa i Nazaret puiblumandami ka.

Diuspa atun wasi ukumanda, Jesús katugkunata llugsichiskamanda

¹² Chiuramanda Jesuska, Diuspa atun wasi ukuma iaikugrispaka, katugkunata i randinakugta chi ukupi kawarka. Chimanda, iapa rabiarispa, tukuikunata llugsichii kallarirka. Kulki trukagkunapa misakunata i paluma katugkunapa bankukunatapas bulachirka, ¹³ kasa nispá:

—Ñugpamanda librupi, kasami willaraiá: “Nukapa wasi, Taita Diusta iuiarispa mañadirumi kangapa ka”. “Kamkunaka, sisai kaugsadirusinami ruranakungichi”.

¹⁴ Jesús chi ukupi kaglapi, mana ñawi kawagkuna i mana purii pudigkuna paipagma kaillaiarkakuna. Chiura, paika ambirkakunata.

¹⁵ Iaia sasirdutikuna i Moisés ima niskata iachachig taitakuna, Jesús chasa mana imaurapas kawaskasina rurakuskata kawanakurka. Wambrakunapas, Diuspa atun wasi ukupi kaparispa ninakurka:

Ñugpamanda taita Davidpa wambra kangi.

Kam iapa suma kagtami ninchi.

Chasa uiaspaka, chi taitakuna, rabiarispa, ¹⁶ Jesusta tapurkakuna:

—Kaikuna ima kammanda kaparinakugta, ¿manachu uiakungi?

Chiura, Jesuska ainirka:

—Ari. ¿Manachu ñugpamanda librupi kawarkangichi kasa willaraiagta?

Uchulla wawakunata chuchug wawakunawantami iachachirkangi,

“Tukuipi iapa suma atunmi kangi” ningapa.

¹⁷ Chasa nispaka, paikunapagmánda anchurirka. Chi atun puiblumanda llugsispaka, Betania puibluma rispa, chipi pakarigrirka.

Igus sacha wañuringapa, Jesús niskamanda

¹⁸ Chi tutata, Jerusalenma ikuti rinakuskapika, Jesusta iarkai apigsamurka. ¹⁹ Sug igus sachata ñambi kuchupi kawarka. Chi sachama chaiagriuraka, ñi ima mikui mana iukarka; pangalla iukarka. Chiura, Jesuska nirka:

—Kunauramanda, ñi imaurapas mana kai sacha mikui mui tiarichu.

Chasa nigllapi, chi sacha limpiumi chakirirka.

²⁰ Chasa kawaspaka, katiraiagkuna iapa ujnarirkakuna, kasa tapuspa:

—¿Imawasik chi sacha, chasa nigllapi chakirirka?

²¹ Jesuska, paikunata ainirka:

—Kasami nuka niikichita: kamkuna mana sug rigcha iuiaspalla nukamandalla iuiagpikunaka, imasami chi sacha tukurka: chimandapas masmi pudintrangichi.

Kai lumata nintrangichi: “Kaimanda anchurispá, atun kucha iaku ukuma sitarigii”; kamkuna ima niskasina-mi tukugsamuntra. ²² Chasallata, nukamanda suma iuiarispá, tukui Taita Diusta mañagpikunaka, kamkuna ima mañaskasinami tukugsamuntra.

Kamtaka, ¿pitak kachamurka, atun tukuspa purin-gapa?, Jesusta tapuskamanda

²³ Chimandaka Jesús, Diuspa atun wasi ukuma ikuti iaikugrirka. Chipi iachachikuuraka, iaia sasirdutikuna i sug taitakunapas paipagma kaillaiarkakuna, kasa tapungapa:

—¿Imapatak chasa ruraspa purikungi? ¿Pitak kamta kachamurka, atun tukuspa purikungapa?

²⁴ Jesuska ainirkakunata:

—Nukapas, kamkunata tapusakichita. Kamkuna aini-wagpika, nukapas willasakichitami, pi nukata kacha-muwaspa atuniachiwaska kagta. ²⁵ ¿Pitak Juanta kacharka, baugtisangapa? ¿Taita Dioschu kacha-murka? Mana kagpika, ¿runakunallachu kacharka?

Chiuraka, kikipura rimarinakurka, kasa iuiarispá:

—“Taita Dios kachamuskami karka” nigpika, paika ainingami: “Nigpika, ¿imapatak mana paita uiarkangichi?”. ²⁶ “Runakunalla kachamuskami karka” mana nisunchi. Tukuikunami Juanmanda iuianakú: “Santu Ispirituwa rimagmi karka”. Paikunata chimandami man-chai iukanchi.

²⁷ Chasa rimanakuspa, Jesusta ainirkakuna:

—Mana iachanchichu, Juanta pi kachamuska kagta. Chasa ainiura, Jesuska nirkakunata:
—Chimandami nukapas mana willaikichita, pi kacha-muwaska kagta, atun tukuspa kangapa.

Iskai wambrakunamanda parlu

²⁸ Kasapasmi Jesús nirkakunata:

—¿Imasatak kai parlu, kamkunata uiarintra? Sug runa, iskai wambrakunasi iukarka. Chi runaka, atun wambrata kaiaspa, nirkasi: “Rii chagrama. Ubas pallagarii”.

²⁹ —Paika ainirka: “Mana munanichu ringapa”. Chasa ainispapas, kipama allilla iuiarispá, maima kachakuskama rirkalla.

³⁰ —Uchulla wambratapas, taita kaillaiaspa, chasallata nirka. Chiura ainirka: “Ñami risa, taita”. Chasa ainispapas, manimasi rirka.

³¹ Chasa parlaspaka, Jesús tapurkakunata:

—Chi iskandikuna, ¿maikantak taita imasa munakuskasina allilla rurarka?

—Atun wambra— ainirkakuna.

Chasa ainiura, Jesuska nirkakunata:

—Kasami nuka niikichita: mana judíu kaskakunamanda kulki chaskigkuna i karisapa warmikuna, kamkunapa ñugpami suma luarma iaikugringapa kankuna. ³² Juan Bautista samurkami, kamkunata imasa sumaglla kaugsaita iachachingapa. Kamkunakar, mana paita uiarkangichi. Kulki chaskigkuna i karisapa warmikunapas, pai rimakuskata suma iuiarispá, suma

kaugsaiwami kallarikakuna. Chasa kawasppapas, kamkunakar ñi ima manima.

Ubas sachakunata almagkuna, mana allilla ruraskamanda parlu

³³ —Sug iuiarispá apingasina parlutapas uiawaichi. Sug runa, achka ubas sacha malkikunasi paipa alpapi tarpurka. Chi alpa muiundi kincha saichispá, ubas iaku surkudirupassi rurarka. Chasallata, awa kawitu saichirka, tarpuskata kawanakungapa. Chasa ruraspaka, sug runakunata chi ubas sachakunata sakirka, almaspa, chaugpi chaugpi pallangapa. Chasa sakispaka, karu alpama rirka.

³⁴ —Ña pallangapa chaiauraka, sug piunkunata chi almagkunapagma kacharka, paipa rasiunta chaskin-gapa. ³⁵ Chi runakunaka, kachai tukuskakunata apispa, sugta makarkakuna; sugta wañuchirkakuna; ikuti sugtaka rumikunawa piarkakuna.

³⁶ —Chiuramanda, ikuti ñugpamanda mas achka piunkunatasi kacharka. Chikunatapas chasallatasi mana alli rurarkakuna.

³⁷ —Katimakar duiñuka, kikipa wambratasi kacharka, kasa iuiarispá: “Nukapa wambra kagmanda, mana imapas rurapuangakunachu”.

³⁸ —Nigpika chi almagkunaka, chi wambrata kawaspá, kikipura rimarirkakuna, kasa nispa: “Kawaichi. Kai alpa duiñupa wambrami samuku. Paitapas wañuchisunchi. Chasaka, nukanchipallami kai alpa tukungá”.

³⁹ —Chasa nispaka, paita apispa, chi alpamanda llugsichispá, wañuchirkakuna.

⁴⁰ Chasa parlaspaka, Jesús tapurka:

—Nigpi chi duiñuka, ¿imaták chi runakunata ruragsamunga?

⁴¹ Chiura ainirkakuna:

—Chasa mana alli ruragkunata mana llakispallami wañuchingakunata. Nispaka, chi sachakunata ikuti sugkunatami almangapa sakinga. Mikui pallaura, paipa rasiunta allilla kuagkunatami sakinga.

⁴² Paikuna chasa ainiura, Jesuska nirka:

—¿Manachu ñugpamanda librupi kasa willaraiaskata kawarkangichi?

Wasichigkuna wabutiska rumi, wasita charigmi tukugsamurka.

Atun Taita Diosmi chasa rurarka.

Nukanchi, iapa ujnarisipami chasa ruraskata kawanakunchi.

⁴³ Chimandami kasa niikichita: Taita Dios, kamkunata suma mandag kaskamanda anchuringapami ka. Sugkuna, pai imasa munaskasina alli ruragkunapagpimi suma mandag tukungapa ka. [⁴⁴ Kasapas. Maikan chi rumipi urmagkuna, piti pitimi tukungakuna. Chasallata, chi rumi awalla urmagpika, ñutumi tukungakuna.]

⁴⁵ Chasa parlukunata uiaspaka, iaia sasirdutikuna i fariseokuna iuiarirkakuna: “Nukanchimandami chasa parluwa niku”. ⁴⁶ Chimanda, rabiarispá, Jesusta apichingapa munanakurka. Chasa munanakuspapas, achka runakuna chipi kagmanda, manchai apirka-

kunata. Tukuikunami iuianakurka: “Jesús, Santu Ispirituwa rimagmi ka”.

Kasarai atun punchamanda parlu

22 Jesuska, sug luarmanda mandaimanda ikuti iuiái apingasina suma parlarkakunata, kasa nispapa:

²—Sug atun mandag, paipa wambra kasarakuura, suma mikui mikungapa kaiarka. ³Chi kasarai punchaña chaiamuuraka, lutrinkunata kacharkasi, tukui kunbidaskakunata: “Samui” nigringapa. Chasa willagriura, kunbidaskakunaka nirkakunasi: “Manima pudinichu”.

⁴—Chasa uiaspaka, chi mandagka ikuti sug lutrinkunata kacharkasi, kasa nispapa: “Kunbidaskakunata willagriichi: ‘Tukui allichiskami ka. Maltu i wira wagra wañuchiskakuna i tukui mikui ianuskami tia’. Tukui samuchukuna, kasaragkunawa sugllapi mikungapa”.

⁵—Chasa ikuti willagrigrpipas, chi kunbidaskakuna manimasi uiarkakuna. Sugka, paipa chagrama rirka. Sugka rirkasi, paipa katudirukunata katungapa. ⁶Ikuti sugkunaka, piunkunata tandarisa, wañugtasi makarakuna.

⁷—Chasa uiaspaka, chi mandagka, rabiariisa, paipa suldadukunata kacharka, chi wañuchigkunata puchukangapa i paikunapa puibluta rupachingapa.

⁸Nispaka, piunkunata nirkasi: “Tukui mikui, ñami allichiska ka, kasaragkunawa sugllapi mikungapa. Nuka ñugpa kunbidaskakuna, mana alli iuiagkuna kaspá, mana samurkakuna. ⁹Chimanda kamkuna, tukui ñambikunama riichi. Tukui ialinakuskata nigriichi samuchukuna, kasaragkunawa sugllapi mikungapa”.

¹⁰—Chiura piunkuna, tukui ñambikunama rispa, maituku ialinakuskata kasaragkunapa wasima pusarakunata. Alli u mana alli runakuna, maituku taririskakunata tandachirkakuna. Chasaka, wasi ukupi jundachigrirkakunata.

¹¹—Ña chi mandagka, kunbidaskakunata kawan-gapa iaikuura, sug runaka suma katanga mañachiskata mana churariska kagta kawarka. ¹²Paita kawaspaka, nirka: “Kam waugki, ¿imapatak nuka katanga mañachiskata mana churarispalla iaikurkangi?”.

—Chi runa, ñi ima mana ainirka. ¹³Chiura chi mandagka, piunkunata nirkasi: “Kai runata apiichi. Chakita i makita wataichi. Nispaka, kanchama iana tutapi sitagriichi. Chipi, iapa llakiswa, wakaspa, kiru mukuspami kangapa ka”.

¹⁴Chasa parlaspa, Jesuska nirka:

—Achkakunami kaiaska kankuna. Agllaskakunaka, maillami kankuna.

Impuistumanda Jesusta tapuskakunamanda

¹⁵Chasa uiaspa, fariseokunaka paipura rimanakug-rirka, Jesús ima rimakuskata uiaspa, imapipas pandarigpika, justisiakunata willagringapa. ¹⁶Nispaka, sug

† Chiurakuna, kasa kustumbri iukarkakuna: tukui kunbidaskakunata suma katanga mañachingapa; chika, tukui suma churariska kawaringapa.

paipurakunata i mandag Herodeswa purigkunata Jesuspagma kacharkakuna, kasa sumaglla ningapa:

—Iachachig taita, nukanchi iachanchimi, kam mana llullaspalla rimagta. Mana pitapas kawaspallami tukui-kunata iwalla sutipa kaskata iachachingi, imasa Taita Dios munaskasina ruraspa kaugsangapakuna. ¹⁷Chimandami tapugsamunchi: kam, ¿imatak ningi? ¿Allilla-chu ka, Romamanda iaia mandagta nukanchi impuistu kuangapa? ¿Pagasunchichu u mana?

¹⁸Jesuska iacharka, mana allilla iuiaiwa chasa tapunakugta. Nispaka, nirkakunata:

—Kamkuna sungu awalla iuiagkuna, ¿imapatak munanakungichi pandachiwangapa? ¹⁹Impuistu kulki kuadiruta kawachiwaichi.

Chiura, sug kulki apagrispa kuagrirkakuna. ²⁰Chita kawaspa, Jesuska tapurkakunata:

—Kai kulkipi, ¿pipa ñawitak kawariku? ¿Pimandatak willaska niraia?

²¹—Romamanda iaia mandagmanda— ainirkakuna.

Chasa ainiura, Jesuska nirkakunata:

—Chasa kagpika, Romamanda iaia mandagpa kaskata paita kuaichi. Taita Diospa kaskataka Taita Diusta kuaichi.

²²Chasa uiaspaka, iapa ujnarirkakuna. Nispaka, paita sakispa, anchurirkakunalla.

Wañuskakuna kaugsaringapa kaskamanda, Jesusta tapuskakunamanda

²³Chi punchallatata, sug saduseo suti runakuna Jesuspagma chaiagrirkakuna. Chi runakuna iachachidurmi kankuna, wañuskakuna mana mas kaugsaringapa kagta. Chaiagriska, Jesusta nirkakuna:

²⁴—Iachachig taita, Moiseska kasasi nirka. Sug kari kasaraspá, warmi manara wambrakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa kuinta wawakuna iukangapa.

²⁵—Nigpika, kanchis waugkindikunasi nukanchipa alpapi tiarka. Atun waugkindika, kasaraspá, warmi manara wawakuna iukagllapisi wañurka. Chiwanka, kipa-manda waugkindisi chi sapalla kidaska warmiwa kasarai iukarka. ²⁶Chi waugkindipas, chasallata wañurka. Katimanda waugkinditapas chasallata pasarirka. Chasallatasi tukui kanchis waugkindikuna wañurkaku. ²⁷Katimakar, chi warmipas wañurka. ²⁸Nigpika, wañuskakuna kaugsariuraka, ¿pipatak chi warmika kanga, tukui chi kanchis waugkindikunawa kasadu kaspá?

²⁹Jesuska ainirkakunata:

—Kamkuna, ñugpamanda librupi willaraiaskata ñi Taita Diospa iapa iachaita mana iuiái iukangichichu. Chimandami pandarisa iuianakungichi. ³⁰Wañuskakuna kaugsariskauramandaka, kari ñi warmi mana kasarangapa kankunachu. Imasa suma luarmanda anjilkunasinami kaugsangapa kankuna.

³¹—Kasapas. ¿Imapatak kamkuna ningichi: “Wañuskakuna mana mas kaugsaringapa kankunachu?” ¿Manachu kasa willaraiaskata kawarkangichi? “Taita

Dius nirka: ³² ‘Nukami kani Abrahampa, Isaakpa i Jakobpa Taita Dius.’ Taita Dius mana kanchu wañuska-kunapa. Kaugsangkunapami Taita Dius ka.

³³ Jesús chasa iachachiskata uiaspaka, tukui chipi kagkuna iapa ujnarispa mancharirkakuna.

Tukui mandaikunamanda, ¿maikantak mas atun ka?, Jesusta tapuskamanda

³⁴ Jesús saduseokunata chasa ainiura, upalla uiarkakuna. Chasa iachaspa, sug fariseokunaka Jesuspagma tandarirkakuna. ³⁵ Nispa sug paipura, Moisés ima niskata iachachig taita kaspera, Jesusta pandachingapa iuiaspa, tapurka:

³⁶ —Iachachig taita, tukui mandaikunamanda, ¿maikantak mas atun ka?

³⁷ Chiura, Jesuska ainirka:

—“Kamba atun Taita Diusta kuiangi kam kikinpa almawa, tukui animuwa i tukui iuiaikunawa”. ³⁸ Chi mandaimi tukuikunamanda mas atun ka.

³⁹ —Kai katimandapasmi chi mandaisinallatata atun ka: “Kam kikintasinami iukangi, tukui runakunatapas kuianga”. ⁴⁰ Moisés i Santu Ispirituwa rimagkuna tukui iachachiskakuna, chi iskandi mandaikunapimi willaraiá.

Taita Dius agllaska Cristo, Davidpa iaiami ka

⁴¹ Chi fariseokuna chara tandariska kankama, Jesuska tapurkakunata:

⁴² —Taita Dius agllaska Cristomanda, ¿imasatak kamkuna iuianakungichi? ¿Pipa wambrapa kati wambratak ka?

Chiura ainirkakuna:

—Davidpa wambrapa kati wambra.

⁴³ Chiura, Jesuska nirkakunata:

—Chasa kagpika, ¿imapatak kikin Davidka, Santu Ispirituwa kaspera, Cristomanda nirka: “Nukapa iaiá”? Kasa willaraiaskapimi David nirka:

⁴⁴ Atun Taita Diusmi nukapa iaiata nirka:

“Nukapa alli ladu tiarii,

nuka tukui kamta mana munagkunata apagrispa, kamba chaki sarudiru ukuma churankama”.

⁴⁵ Chasami David kikin, Cristomanda nirka: “Nukapa iaiá”. Nigpika, ¿imawantak Cristo, paipa wambrapa kati wambra kanga?

⁴⁶ Chiura, ñi pipas mana pudirkakuna, ñi ima rimaiwa Jesusta ainingapa. Chi punchamanda, ñi pipas mana animu iukarkakuna, paita imapas tapungapa.

Iachachig taitakunata, Jesús piñaskamanda

23 Chiura Jesuska, paita katiraiagkunata i tukui chipi kagkunata rimarka, ² kasa nispa:

—Moisés ima niskata iachachig taitakuna i fariseokuna ninkuna: “Nukanchitami chaiaku, Moisés mandaraiaska imasa niraiaskata iachachingapa”. ³ Chi-mandami kamkunata niikichita: paikuna tukui ima iachachiskata suma uiaspa rurangichi. Ikuti paikuna ima ruraskakunasinaka mana rurangichi. Paikuna

suma iachachispapas, kikinkunaka sug rigchami rurankuna. ⁴ Iapa mana pudiringasina llasta aparichig-sinami iachachinkuna, paikuna imasa niskasina ruraspa kaugsangapa. Chasa iachachispapas, pai kikin-kunaka mana munankunachu, imasa iachachinakuskasina ruraspa kaugsangapa.

⁵ —Paikuna, allilla imapas rurankuna, “Kawawachukuna” iuiaspalla. Chasa paikuna, printipi i makipi ñug-pamanda librupi willaraiaskata watarispami purinkuna, ianga kawachiringapaglla. Chasallata, sugkunamanda mas atun suma siñidurkuna katangama wataspami kawachiringapaglla purinkuna. ⁶ Maima kunbidagpi suma mikungapa kaiaura, ñugpa ladu tiaringapami munankuna. Tandariduru wasikunapipas munankunami, atun taitakuna tiariduru ñugpa ladu tiaringapami. ⁷ Kallipi paikunawa tupanakuskapi munankunami, iapa suma kuiaiuwa kumurispa, “Puangi, iachachig taita” ningapakunata.

⁸ —Kamkunaka mana sakiringichi, sugkuna, “Iachachig taita” nispa, kamkunata kuiangapa. Nukallami kamkunapa iachachig taita kani. Tukui kamkuna, waugkindimi kangichi. ⁹ Chasallata, kai alpapi ñi pitapas mana ningichi: “Taita”. Suglla Taitami iukangichi: suma luarpi kaugsag Taita Dius. ¹⁰ Mana munangichi, sugkuna kamkunata atuniachiska mandagkuna niraiangapa. Nukallami kani kamkunata kawaspa mandag Cristo. ¹¹ Chimanda, kamkunata mas mandag tukungapa munagpika, kamkunapa lutrinsina tukuchu. ¹² Maikanpas atuniachirispa iuiagta, Taita Diuska uchullaiachingapami ka. Ikuti maikanpas uchullaiaspa iuiaskataka, Taita Dius atuniachingapami ka.

¹³ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Suma luarpi iaiunakuskata arkanakugsinami kangichi. Kam kikin-kuna mana munanakungichichu iaikungapa. Iaikungapa munanakugtapasmi arkanakugsina ruranakungichi.

[¹⁴ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Warmi sapalla kidaskakunata wasikunatami kichudur kangichi. Nispaka, kawachiringapagllami unai Taita Diusta rimanakudur kangichi. Chasa ruraskakunamandami sug luarpi sugkunamandapas mas llakiipi justisiai tukungapa kangichi.]

¹⁵ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Kamkunami iapa munangichi, lamar iaku chimbaspas, karu alpapakunapi purigrispa, suglla runallapas kamkunamanda tarigringapa. Chi runa, ña kamkunawa purikuspa, kamkunamandapas mas iapa jiru infirnumanda kuku-sinami tukungapa ka.

¹⁶ —¿Ai, kamkuna, mana ñawiiug sugkunata pusanakugsinami niraiangichi! Kasami iachachidur kangichi: “Maikanpas nichu: ‘Diuspa atun wasi kawawakumi; kasami ruraspa;’ chika mana balinchi. Ikuti, ‘Diuspa atun wasi ukupi kuri tiaska kawawakumi’ nigpika, chikar balinmi” ningichi. ¹⁷ ¿Mana ñawiiug upakunasinami

kangichi! ¿Maikantak mas bali niraiá: kuri u Diospa atun wasi? Chi wasi ukupi tiaskamandami chi kuri Diospalla tukugsamuska niraiá.

¹⁸ —Kasapasmi iachachidur kangichi: “Maikanpas nichu: ‘Altarmi kawawaku; kasami rurasá;’ chika mana balinchi. Ikuti, ‘Altarpi churaska kamarikumi kawawaku’ nigpika, chikar balinmi” ningichi. ¹⁹ ¿Mana ñawiiug-kunasinami kangichi! ¿Maikantak mas bali niraiá: kamariku u altar? Altarpi churaskamandami Taita Dios-ta kawachiska kamariku niraiá. ²⁰ Nigpika, maikanpas: “Altarmi kawawaku” nigpika, tukui ima altarpi churaskakunapasmi kawaku. ²¹ Maikanpas: “Diospa atun wasimi kawawaku” nigpika, Taita Dios chipi kaugsakuskapasmi kawaku. ²² Maikanpas: “Suma luarmi kawawaku” nigpika, Taita Diospa mandadiru, kikin chipi tiakugpasmi kawaku.

²³ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Minta, anis i kuminu suti iuiukuna pallaskakunamanda chungapika, sugllami Taita Diusta karangichi. Chasa karaspapas, kam kikinkuna kungariskami kangichi, sugkunamanda mas atun mandaikunata rurangapa, kasa: sugkunata imasa chaiaskasina allilla ruraspa, sugkunamanda llakirispá, Taita Diusta suma iuiaspa kaugsangapa. Chunga pallaskamanda sug karangapa mana sakispalla, iukangichimi chi sug atun mandaikunatapas allilla ruraspa kaugsangakuna. ²⁴ Kamkuna mana ñawiiug, sugkunata pusanakugsinami niraiangichi. Upianakuskapi sug kukitu tiaskata anchuchigsinami rurangichi. Ikuti sug wagrataka † tragagsinami rurangichi.

²⁵ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Kuashag i platuta awallallami maillangichi. Ikuti kamkunapa iuiai ukumaka, sugkunapata iapa munarispá i sisarispá kaugsagkunami kangichi. ²⁶ Kam fariseokuna mana ñawiiug, sugkunata pusanakugsinami niraiangichi. Ñugpa, kamkunapa jiru iuiaikunata maillagsina rurai-chi. Chasa ruraspaka, tukui maillaskasinami tukunkangichi.

²⁷ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Wañuska pambaraiaska bubidata iuraiachiskasinallami kangichi. Awalla, chi iuraiachiska bubidakuna sumami kawarin-kuna. Ikuti chi ukumaka, wañuska ismuska tullukuna tukui millai jiru asnakunami jundaraiá. ²⁸ Kamkunapas, chasasinami kangichi. Runakunapa ñawipi, suma alli iuiai iukag runakunasinami kawaringichi. Ikuti kamkunapa iuiai ukumaka, tukui mana alli jiru iuiaikuna jundami kangichi.

²⁹ —¿Ai, kam Moisés ima niskata iachachig taitakuna i fariseokuna, sungu awalla rimagkuna! Ñugpamanda Santu Ispirituwa rimagkunamanda iuiarispá, suma atun bubidakuna ruraspami kangichi. Chasallata, ñugpamanda alli ruraspa kaugsag runakuna pambaraias-kata sumaiachispami kangichi, ³⁰ kasa nispa: “Nukan-chipa ñugpamanda taitakunawa nukanchi kaugsangapa chaiagpika, manami chi Santu Ispirituwa rimag-

kunata wañuchingapa sakinchi”. ³¹ Chasa nispaka, kam kikinkunami willarinakungichi, chi Santu Ispirituwa rimagkunata wañuchigkunapa wambrakuna kagta.

³² Nigpika, kamkunapa ñugpamanda taitakuna imasa kallarisakata, chi iuiailawanta puchukaichi.

³³ —¿Kulibrakunasina, mana alli runakunami kangichi! ¿Imasatak kispiringapa kangichi, diltudupa ninama sitai tukungapa? ³⁴ Chimandami Santu Ispirituwa rimagkunata, suma iachakunata i iachachigkunata nuka kachamungapa kaikichita. Chi kachamui tukuskakunata, maikankunataka wañuchingapami kangichi. Sugkunataka kruspi warkuchispami wañuchingapa kangichi. Ikuti sugkunataka kamkuna tandariduru wasikunapi asutispá kangapa kangichi. Sugkunataka sug puibluma sug puibluma mitikuchispami kangapa kangichi. ³⁵ Chimanda, kai alpapi tukui allilla ruraspa kaugsanakuska wañuchii tukuskakunamanda, kam kikinkunami iapa achka llakii iukangapa kangichi. Ari, Abel suti alli runa musuglla wañuchii tukuskauramandata, sugka, Berekiaspá wambra Zakarías suti, Taita Dioswa iuiariduru uku i altarwa chaugpipi wañuchii tukuskaurakama, maituku wañuchii tukuskakunamandapasmi iapa achka llakii iukangapa kangichi. ³⁶ Kasami nuka niikichita: kuna punchakunamanda runakuna, tukuikunamandami chasa llakii iukangapa kangichi.

Jerusalén puiblumanda, Jesús wakaskamanda

³⁷ —¿Ai, Jerusalén, Jerusalemamanda runakuna! Kamkuna, Santu Ispirituwa rimagkunata wañuchigmi kangichi. Kamkunapagma kachamuska runakunatami rumiwa piaspá wañuchingichi. Imasami atawalpa, paipa pullitukunata kunuchingapa kaiaspá ugllari: chasallatami nukapas, achka biaji kaiaspá, tandachingapa munanakurkaikichita. Chasa munakugpipas, kamkunaka mana nukata munawarkangichichu. ³⁸ Chimandami kamkunapa wasikuna, sitaska tukugsamungapa kankuna. ³⁹ Kasami niikichita: kunaauramanda mana kawawangapa kangichichu, imaura kamkuna kasa niwankama:

Atun Taita Dios kachamuskami samukungi.

Paipa iapa kuiaskami kam kangichi.

Diospa atun wasita puchukai tukungapa, Jesús willaskamanda

24 Diospa atun wasi ukumanda Jesús llugsispa rikuuraka, paita katiraiagkuna kaillaiarkakuna, chi wasi imasa suma kaskata kawachingapa. ² Jesuska ainirkakunata:

—Kai kantiaska rumikunawa saiachiska suma wasimanda, kasami nuka willaikichita: chi tukui piachiska rumikuna, ñi sug mana sakingapa kankunachu. Tukuitami urmachispá puchukangapa kankuna.

† griego rimaiwa: kamello suti atun animal.

Kai alpa puchukarii puncha manara chaiagllapi, imasa kawaringapa kaskamanda

³ Olivos lumapi chaiagrispa tiarigriuraka, Jesusta katiraiagkunalla, kaillaiaspa, tapurkakuna:

—Nukanchita willai: ¿imauratak chasa pasaringa? Kam ikuti samungapa puncha i kai alpa puchukaringapa puncha chaiangapa kaura, ¿imawatak chi pasaringapa kaskata kawachinkangi?

⁴ Chiura, Jesuska ainirkakunata:

—¡Ujalallapas maikan, kamkunata llullachispa pandachichukuna! ⁵ Achkakunami, nukasina tukuspa, samungapa kankuna, kasa nispa: “Nukami Taita Dius agllaska Cristo kani”. Chasa rimanakuskawaka achka runakunatami llullachingapa kankuna.

⁶ —Tukuimami mana llakispalla wañuchinakugta iacharingapa ka; kamkuna mana mancharinakungichi. Chasami pasaringapa ka. Nigpipas, kai alpa puchukarii puncha manara chaiamuska niraiianchu. ⁷ Ñugpami sug mandag alpanigmandakunawa sugnigmandakunawa wañuchinaku tiangapa ka. Iapa iarkaimi tiangapa ka. Sugnigmanda sugnigmandami alpa kuiurispachapurispa ringapa ka. ⁸ Chi llakiikuna pasariska, chara kallariillami kangapa ka.

⁹ —Chi punchakuna, kamkunata apispa, mandagkunatami apangakuna. Kamkunata iapa llakichispa nanachispami wañuchingakuna. Tukui alpamanda runakunami kamkunawa rabiaringakuna, kamkuna nukawa kagmanda.

¹⁰ —Chi punchakuna, achkakunami sakingapa kankuna, Taita Diusta iuiaringapa. Chikunaka, parijumami piñachirinakuspalla, apichinakuspa, mandagkunapagapama apanakungapa kankuna. ¹¹ Achka llullachigkunami kawarigsamungapa kankuna, kasa nispa: “Nukami Santu Ispirituwa rimag kani”. Chasa rimaskakunawaka achka runakunatami llullachingapa kankuna. ¹² Iapa achka mana alli ruragkunami mirangapa kankuna. Chiwanka, achkakunami sakingapa kankuna, pai kikinpura kuianakuspa kaugsangapa. ¹³ Chasa kagpipas, wañunkama nukallawa iuiarispa kagkunami kispiringapa kankuna.

¹⁴ —Diuspa suma mandaimanda Alli Willaita, kai alpapi tukui kaugsanakuskata willaurami kai alpa puchukarii puncha kangapa ka.

¹⁵ —Ñugpamanda Santu Ispirituwa rimag, Daniel suti, kasami willarka: iapa jiru mana kawangasinami rurangapa kankuna. Sug ianga diussina rigchata Taita Diuspa tukuikunamanda mas alli ukupimi saiachingapa kankuna. Chitaka, kamkuna kawangapami kangichi. (Chasa willaraiaskata allilla iuiaiwa iuiarispa kawangichi.) ¹⁶ Chasa kawaspaka, Judea alpapi kaugsanakug, sachukuma mitikuchukuna. ¹⁷ Maikanpas wasi truja awapi kagkuna, mana uraikunakuchu, ukuma iaikuspa, imakuna apangapa. Imasa kaskasinalla mitikuchukuna. ¹⁸ Chasallata maikanpas chagrapi kagkuna, mana wasima kutichukuna, katanga u imapas tandachingapa. ¹⁹ ¡Ai, maikan warmijimkuna, chi punchakuna wigsawa ungu u uchulla markaska kag-

kuna! ²⁰ Taita Diusta mañangichi, mana chaiachu, tamia puncha u warda puncha mitikui tiangapa.

²¹ —Chi punchakuna, askurinti iapa llakiimi tiangapa ka. Taita Dius kai alpa wiñachiskauramandata kunkama, chasa llakiika mana tiaska kanchu. Chasallataka, kunauramanda mana ikuti chasa tiangapa kanchu.

²² Taita Dius chi llakii punchakunata mana pisachigpika, ñi pipas manachar kispirinha. Pai agllaska runakunata iapa kuiaspami chi punchakunata pisachingapa ka.

²³ —Chiurakuna, kamkunata ninakungami: “Uiamuichi. Taita Dius agllaska Cristo, kaipimi ka” u “Chipimi ka”. Chasa ninakugpipas, kamkuna mana uiangichi.

²⁴ Chi punchakuna, iapa llullachigkunami kawarigsamungapa kankuna, kasa nispa: “Nukami Cristo kani” u “Nukami Santu Ispirituwa rimag kani”. Chi runakuna, mana imaurapas kawaskasina i iapa ujnaringasinami kawachingapa kankuna. Chasa kawachiskawaka Taita Dius agllaskakunatapasmí ñalla llullachingapa kankuna. ²⁵ Manara chasa tukungapa chaiagpitami allilla willaikichita.

²⁶ —“Uiamuichi. Cristo, chusa sitaska alpapimi ka” nigpipas, kamkuna mana chima ringichi. “Uiamuichi. Kai wasi ukupimi ka” nigpipas, mana uiangichi.

²⁷ Imasami rilampa, indi llugsidirunigmanda punchaiachigsamuspa, indi chingaridirupi punchaiachi: chasallatami kai Runa Tukuska, kutimuspa, kawarigsamungapa ka. ²⁸ Imasami, pipas mana willagpi, gallinasukuna wañuska kaskama tandarinkuna: chasami, nuka samuura, tukugsamungapa ka.

Jesús imasa ikuti samungapa kaskamanda

²⁹ —Chi iapa llakii punchakuna ialigllapika, indimi amsaiangapa ka; killapas, manami punchaiachingapa ka; istrillakuna, awamandami urmangapa kankuna; kai alpamanda awa ladu tiaskakunapasmí kuiuchii tukungapa kankuna. ³⁰ Chiura kai Runa Tukuskapa siñalka, awa puiukunapimi kawarigsamungapa ka. Chasa kawaspaka, kai alpapi tukui runakuna ajaimi wakangapa kankuna. Kai Runa Tukuska samugtami kawawangapa kankuna. Nukapa tukui iapa suma iachaiwa awa puii ukupimi samungapa kani. ³¹ Samuspaka, nukapa anjilkunatami kachasa. Paikunaka, bututusinawa sinchi uiachispa, tukui chusku kuchunigmandami nuka agllaska runakunata tandachipuungapa kankuna.

³² —Kai iuiai apingasina suma rimaiwa iachaikuichi. Imasami igus sacha malkikuna wiñaspa, pangakuna ña susuriura, kamkuna kawaspaka, ningichi: “Ñami alli punchakuna chaiamuku”: ³³ chasallata kamkuna, tukui chasa pasarinakuskata kawaspaka, ñami iachankangichi, nuka ña chaiamukugta.

³⁴ —Kasami nuka niikichita: manara tukui kunaura kaugsagkuna wañugpimi tukui chasa tukugsamungapa ka. ³⁵ Sug luar i kai alpa luar puchukarigpipas, nuka ima niskaka mana ialingapa kanchu.

³⁶ —Ima puncha ima ura chasa tukugsamungapa kagta, mana pipas iachanchichu. Ñi suma luarmanda

anjilkuna ñi Diospa wambrapas mana iachanchu. Nukapa Taitallami iachá.

³⁷ —Imasami, Noé kaugsakuura, mana iuianakuska-sina tukugsamurka: chasallatami kai Runa Tukuska kawarigsamungapa pucha tukungapa ka. ³⁸ Noé kaugsakuska punchakunaka, manara atun iakuwa puchukai tukunkama, sumaglla mikuspa, upiaspa, kasaraspami kaugsanakurka, Noé ruraska atun barkupi iaikunkama. ³⁹ Paikuna kungaska kaugsanaku-urami, chi atun tamia tukugsamuspa, tukuikunata puchukagsamurkakunata. Chasallatami kai Runa Tukuska kawarigsamungapa pucha tukugsamungapa ka.

⁴⁰ —Chiura, iskai runakuna chagrukupi purinakuskata, sugtaka apangami; sugtaka sakingami. ⁴¹ Chasallata, iskai warmikuna sugllapi kutanakuskata, sugtaka apangami; sugtaka sakingami.

⁴² —Chimanda, iuiaipilla kangichi. Kamkuna mana iachangichichu, ima ura kamkunapa iaia samungapa kagta.

⁴³ —Kasa iachaichi: wasi duiñu iachantra, ima ura sisai samungapa kagta. Iachaspaka, mana puñurispallachar rigcharaiantra, paipa wasipi mana sisai iaikungapa. ⁴⁴ Chasallata kamkunapas, allichiriskasina suianakungichi. Kamkuna mana iuianakuurami kai Runa Tukuska chaiaungapa ka.

⁴⁵ —Maikan tukuipi alli rurag piun kagtami paipa patrunka, ima wasipi kawapungapa, sug piunkunata mikui karaspa, pai kikin chaiaumunkama. ⁴⁶ Patrunka ikuti chaiaungamuspa, imasa niskasina allilla rurakugta kawaspaka, chi piunta sumagllami “Pai Siñur” nispa, kuiangapa ka. ⁴⁷ Chimandami paita maituku ima iukaskatapas mingaspa sakingapa ka.

⁴⁸ —Ikuti chi piun, mana allilla iuiarispalla nintra: “Nukapa patrunka mana utka chaiaungapa ka”.

⁴⁹ Chasa nispaka, sug piunkunata makai kallarindra. Kikinka, sug machangichukunawa sugllapi mikuspa upiaspa kantra. ⁵⁰ Chi piun kungaska mana iuiakuurami patrunka, chaiaungamuspa, shachigsamungapa ka.

⁵¹ Chasa shachigsamuspaka, paita sinchimi asutingapa ka. Nispaka kachangami, sungu awalla rimanakugwa justisiai tukungapa. Chipika, iapa llakispa, wakaspa, kiru mukuspami kangapa kankuna.

Chunga sipaskunamanda parlu

25 Jesús, suma luarmanda mandaimanda kasa nirkakuna:

—Sug tuta chungu sipaskuna, michun sindi charirispasi nirkakuna, kusa tukungapa kaskata tupangapa.

² Chi sipaskunaka, pichkaka, allilla iuiarispaga kagkuna; ikuti sug pichkaka, mana allilla iuiarispaga kagkuna.

³ Mana allilla iuiarispaga kagkunaka, mana kirusin aparakuna, tallispa sindilla iukangapa. ⁴ Ikuti allilla iuiarispaga kagkunakar, kirusinsi aparkakuna, tallingapa.

⁵ Kusa tukungapa kag, mana utka chaiaumurka. Chiwanka, tukuikuna puñurirkakuna.

⁶ —Chaugpi tutaka, kapariisi uiarirkakunata: “Uia-muichi. Kusa tukungapa kag, ñami samuku. Tukuikuna tupagrisunchi”.

⁷ —Chiura tukui sipaskuna, atarispaga, allichirirkakuna, atun sindi michun rurangapa. ⁸ Chiurallatata mana allilla iuiarispaga kagkuna, sugkunata nirkakuna: “Nukan-chipaga michun sindi, ñami wañuku. Kamkunapa kiru-sinta karawaichi”.

⁹ —Allilla iuiarispaga kagkunaka ainirkakuna: “Manima. Tukuikunamanda mana pagtangachu. Katugkunapaga randigriichi”.

¹⁰ —Chi mana allilla iuiarispaga kagkuna kirusin randingapa rinkamaka, kusa tukungapa kag ña chaiaumurka. Chiura chi allichiriska suianakug sipaskunaka, kasaragkunawa iaikurkakuna, sumaglla mikungapa. Iaikuspa, punguta wichkarkakuna.

¹¹ —Kipamaka, chi sug sipaskunapas chaiaungamuspa kagkuna. Nispaka, kaparii kallarirkakuna: “Taita turi, taita turi, pungu paskapuai”.

¹² —Paika, ukunigmandalla ainirkakunata: “Kasami nuka niikichita: kamkunata mana rigsiikichitachu”.

¹³ Chasa parlaspa, Jesuska nirkakunata:

—Kamkunapas, allichiriskasina suiangichi. Mana iachangichichu, nuka ima pucha, masa ura chaiaungapa kagta.

Kuri kulkikunamanda parlu

¹⁴ Sug iuiarispaga, Jesús suma parlarka, kasa nispa:

—Sug patrunka, sugsinama ringapaga kaspaka, lutrinkunata kaiaungamuspa, paipa kulkikunata mingarka. ¹⁵ Paikuna imasa pudingasina kawaspami mingarka. Sug runata pichka kuri kulkisi mingarka; sugtaka iskai; ikuti sugtaka suglla. Chasa paikunata mingaspaka, sugsinama rirka.

¹⁶ —Chi pichka chaskig runaka, chiuralla rispa, randispa katuspa, sug pichka massi mirachirka. ¹⁷ Iskai chaskig runapas, sug iskai massi mirachirka. ¹⁸ Ikuti suglla chaskig runaka, alpapisi pusu utkuspa, patrunka kulkita pambarka.

¹⁹ —Ña unaipika, chi lutrinkunapa patrunka kutimurka. Nispaka, paikunata kaiarka tapungapa, masa kulkimi mirachiska tiapunkunata. ²⁰ Chiura pichka chaskig runaka, chaiaungamuspa, sug pichka iapawa apamuspa, nirka: “Taita waugki, kamta pichka kuri kulkimi chaskirkaiki. Sug pichka masmi mirachirkaiki”.

²¹ —Chiura, chi patrunka ainirka: “Kam, iapa allimi kangi. Allillami rurarkangi. Chasa maillallawa mirachigmanda, kunauramanda achkami mingasaki. Iaikui ukuma, nukawa sumaglla kangapa”.

²² —Iskai chaskig runapas, chaiaungamuspa, sug iskai iapawa apamuspa, nirka: “Taita waugki, kamta iskai kuri kulkimi chaskirkaiki. Sug iskai masmi mirachirkaiki”.

²³ —Chiura, chi patrunka ainirka: “Kam, iapa allimi kangi. Allillami rurarkangi. Chasa maillallawa mirachigmanda, kunauramanda achkami mingasaki. Iaikui ukuma, nukawa sumaglla kangapa”.

²⁴ —Chi suglla chaskig runaka, chaiamuspa, nirka: “Taita waugki, nuka iachanimi, kam sinchi sungu iukagta; kam maipi mana tarpuskapi pallangapa munagta, maipi mana similla sitaskapi tandachingapa munagta. ²⁵ Chasa iachaspaka, iapami manchai apiwarka. Chimandami kamba kulkita alpa ukuma pambarkani. Chiká. Kaipimi tiapungi”.

²⁶ —Chasa uiaspaka, chi patrunka nirka: “Kam, mana alli iuiiuiug, iapa killa wangu lutrinmi kangki. Kam allillami iacharkangi, nuka maipi mana tarpuskapi palladur kagta, maipi mana similla sitaskapi tandachidur kagta. ²⁷ Chasa iachaspaka, ¿imapatak nukapa kulki mirangapa, mana bankupi mingapuarkangi; chasaka, nuka kutimuura, iapawa kuawangapa?”.

²⁸ —Chasa rimaspaka, chipi kagkunata nirka: “Kai runata kulki kichuspa, chi chungu iukagta kuaichi”. ²⁹ Maikan iapa achka iukagta masmi karangapa ka, puchugta. Ikuti maikan mailla iukaskataka tukuimi kichungapa ka. ³⁰ Kai ñi imapapas mana balig lutrintaka iana tuta kanchapisina ninama sitagriichi. Chipika, iapa llakiswa, wakaspa, kiru mukuspami kangapa ka.

Tukui runakuna imasa justisiai tukungapa kaskamanda

³¹ Kasapasmi Jesús nirka:

—Kai Runa Tukuska suma atuniachiska samuura, tukui anjilkunami paiwa samungapa kankuna. Paipa suma atun mandadirupimi tiarigsamungapa ka. ³² Chiura, tukuinigmada runakunami paipa ñugpa ladu chaiachii tukungapa kankuna.

—Chasa chaiachiska kauraka, allilla ruraspa kagkunata i mana allilla ruraspa kagkunata iskaimami saiachingapa ka; imasami ubija i kabrakunata kawag, iskaima churá: chasa. ³³ Allilla ruraspa kagkunata alli ladumi saiachingapa ka. Mana allilla ruraspa kagkunataka lluki ladumi saiachingapa ka.

³⁴ —Nispaka chi atun mandagka, paipa alli ladu kaskakunata ningapami ka: “Nukapa Taitapa iapa kuiaskakuna, samuichi, nukawa mandangapa. Kamkuna chasa mandangapaka, alpa tukuskauramandatami allichiska kapurkangichita. ³⁵ Kamkunaka, nuka iarkaiwa kaura, mikuimi karawarkangichi. Nuka iakunaiwa kaura, upiangapami karawarkangichi. Nuka ñambipi ialispa purikuura, kamkunapa wasimami kaiawarkangichi. ³⁶ Nuka mana katangawa kaura, kamkunami churachiwarkangichi. Nuka ungug kaura, kawawangapami rirkangichi. Chasallata, karsilpi kaura, chaiawag-rirkangichimi”.

³⁷ —Chiura, chi allilla ruraspa kagkuna tapungapami kankuna: “Taitiku, ¿imaauratak, kam iarkaiwa kaskata kawaspa, mikui kararkanchi? ¿Imauratak, kam iakunaiwa kaskata kawaspa, upiangapa kararkanchi? ³⁸ ¿Imauratak, kam ñambipi ialispa purikuskata kawaspa, kaiarkanchi? ¿Imauratak, kam mana katangawa kaskata kawaspa, churachirkanchi? ³⁹ ¿Imauratak kam ungug u karsilpi kaskata chaiangapa rirkanchi?”.

⁴⁰ —Paikuna chasa tapuura, chi atun mandag ainin-gapami ka: “Kasami nuka niikichita: kai nukapa uchulla waugkikunata kamkuna chasa ruraskaka, nukata rura-wagsinami rurarkangichi”.

⁴¹ —Chasa nispaka, paipa lluki ladu kaskakunataka kasami ningapa ka: “Kamkuna maldisiskakuna, nukapa ñawimanda anchuriichi. Mana wañudiru ninama rupangapa riichi, iaia kukuta i paipa anjilkunata rupachingapa kaskama. ⁴² Kamkunaka, nuka iarkaiwa kaura, mana mikui karawarkangichichu. Iakunaiwa kaura, mana upiangapa karawarkangichichu. ⁴³ Ñambipi ialispa purikuura, mana wasima kaiawarkangichichu. Mana katangawa kaura, ñi ima mana churachiwarkangichichu. Ungug u karsilpi kaura, mana chaiawangapa rirkangichichu”.

⁴⁴ —Chiura tapungapami kankuna: “Taitiku, ¿imaauratak kam iarkaiwa u iakunaiwa kaskata, ñambipi purikuskata u mana katangawa u ungug u karsilpi kaskata kawaspa, mana ñi imapas rurarkanchi?”.

⁴⁵ —Paikuna chasa tapuura, ainin-gapami ka: “Kasami nuka niikichita: kai uchulla waugkikunata imaura mana ñi imapas ruraskaka, nukata rurawagsinami mana ñi imapas rurarkangichi”.

⁴⁶ —Chi mana allilla ruraspa kagkuna, diltudupa llakii kaskamami ringapa kankuna. Allilla ruraspa kagkunakar, suma luar mana puchukariduru kausai tiaskamami ringapa kankuna.

Jesusta wañuchingapa iuianakuskamanda

26 Chi tukui ima rimaskata puchukaspaka, Jesús, paita katiraiagkunata nirka:

² —Kasami kamkuna iachangichi: paskua atun punchapa iskai punchallami pisiku. Chi punchami kai Runa Tukuska apii tukungapa ka, kruspi wañuchii tukungapa.

³ Chi punchallatata, iaia sasirdutikuna i sug judíu taitakuna tandarirkakuna Kaifás suti iaia sasirdutipa atun wasipi. ⁴ Chipika, paipura rimarinakurka, Jesusta pakalla apispa wañuchingapa. ⁵ Iuiarisa ninakurka:

—Kai atun punchakunaka, mana paita apichisunchi. Apichigpika, tukui runakuna, iachaspaka, nukanchiwa-mi rabiaringakuna.

Jesuspa umapi, sug warmi suma asna asiti talliskamanda

⁶ Jesús, Betania puiblupimi karka, Simón suti runapa wasipi. Chi Simón, aicha ismui unguiwa ñugpata karka. ⁷ Jesús mikuspa tiakuuraka, sug warmi kaillaiarka. Chi warmi, suma asna asiti iapa bali kulkiwa randispa, marmul rumi butillapi apaspami kaillaiarka. Nispaka, Jesuspa umapimi asitita tallirka. ⁸ Paita katiraiagkuna, chasa kawaspa, rabiariispa, kasami kikinpura ninakurka:

—¿Imapatak ianga tallí? ⁹ Chi asitita achka kulki-manda katuspa, mana ñi imapas iukaskakunata chi kulkikunata karangapami chaiakurka.

¹⁰ Jesuska, chasa uiaspa, nirkakunata:

—¿Imapatak kai warmita ninakungichi, mana allilla ruragta? Paika allillami rurawarka. ¹¹ Ñi ima mana iukagkunata imaurapasmu iukangapa kangichi. Ikuti nukataka sug ratullami kawawanakungichi. ¹² Kai warmi suma asitiwa talliwaskaka niraianmi, nukapa kuirpu wañuskata pambangapa ña allichiska sakigsina. ¹³ Kasami nuka niikichita: tukui alpapi, maipipas nukamanda Alli Willaita willaskapi, kai warmi ima rurawas-katapas parlangapami kankuna, paimanda mana kungarisipalla.

Jesusta apichingapa, Judas Iskariote maskaskamanda

¹⁴ Nigpika chungu iskai Jesús agllaskakunamanda Judas Iskariote sutika, iaia sasirdutikunapagma rispa, ¹⁵ tapurkakunata:

—Nuka kamkunata Jesusta apichigpika, ¿maituku kulkitak karawanrangichi?

Chiura, paikuna ainirkakuna:

—Kimsa chungu kulkimi kamta karasunchi.

¹⁶ Chasa kulki chaskispaka, Judas maskai kallariirka, imasa Jesusta apichingapa.

Iaia Jesús, ña wañungapa chaiakuura, katiraiagkunawa mikuskamanda

¹⁷ Tanda mana libadurawa mikudiru atun punchakuna kallariura, chi punchaka Jesusta katiraiagkuna, kaillaiaspa, tapurkakuna:

—Paskua punchapa mikui kam mikungapa, ¿maipitak munangi, nukanchi allichingringapa?

¹⁸ Chiura, Jesuska ainirka:

—Riichi Jerusalén puibluma, kasa suti runapa wasima. Paita nigriichi: “Nukanchita iachachig taitami kachamú, kamta ningapa: ‘Nukapa puncha, ñami chaimuku. Nuka munakunimi, kamba wasipi katiraiawagkunawa paskua mikungapa.’”

¹⁹ Chasa uiaspa chi katiraiagkuna, imasa Jesús niskasina ruragrispaka, allichirkakuna, paskua mikungapa.

²⁰ Ña tutaiauraka, Jesús paipa chungu iskai agllaska runakunawanta tiarigrirka. ²¹ Tukuikuna mikuspa tianakuura, Jesuska nirkakunata:

—Kasami nuka niikichita: kamkunapuramanda, sugmi apichiwangapa ka.

²² Chasa uiaspa, iapa llakirirkakuna. Nispaka tukui-kuna, sug suglla tapui kallariirkakuna:

—Taita waugki, ¿nukachu apichingapa kaiki?

²³ Jesuska ainirkakunata:

—Kai platupi nukawa maki churagpurami apichiwangapa ka. ²⁴ Imasami ñugpamandata willaraiá: chasallatami kai Runa Tukuskata pasariwangapa ka. Chasa kagpipas, ¡ai, chi runa apichiwag! Chasapaka, chi runa mana tiagsamunmi.

²⁵ Chasa uiaspaka, Judas Jesusta apichingapa kagka tapurka:

—Iachachig taita, ¿nukachu apichingapa kaiki?

Chiura, Jesuska ainirka:

—Ari, kammi kangji.

²⁶ Chara mikunakunkama Jesús, tandata makipi charirispa, “Pai Siñur” Taita Diusta nirka. Tandata piti-chispa, katiraiagkunata kuaspa, kasami nirka:

—Chaskiwaichi, mikungichi. Kai, nukapa kuirpumi ka.

²⁷ Nispaka, sug binu kupata makipi charirispa, “Pai Siñur” Taita Diusta nispa, paikunata kuaspa, kasami nirka:

—Tukuikuna upiaichi. ²⁸ Kai, nukapa iawarmi ka, Taita Dioswa i runakunawa ikuti pasinsiachirispa sumaglla tukungapa. Achkakunamandami chi iawar llugsispa, icharingapa ka, pandariikunata pasinsiangapa. ²⁹ Kasami niikichita: kai ubas iaku mana mas upiangapa kani-chu, imaura nuka Taitapa suma mandai puncha chaiankama. Chi punchami musu binuta ikuti kamkunawa upiangapa kani.

Jesusta mana rigsinichu, Pedro ningapa kaskamanda

³⁰ Mikuskauramanda, kantaspaka, Olivos lumama rirkakuna. ³¹ Chipi, Jesuska nirkakunata:

—Kasami ñugpamanda librupi willaraiá: “Ubija kawagtami wañuchisa. Chiura paipa ubiakuna, kasma chasamami mitikungapa kankuna”. Chasallatami kamkuna, kai tuta nukata mana rigsiwagsina saki-waspa, mitikungapa kangichi. ³² Nuka, wañuspa kausarisipaka, Galilea alpapimi ñugpa kagrisa. Chipimi kawarisakichita.

³³ Chiura, Pedroka nirka:

—Kamta tukuikuna sakigpipas, nukakar ñi imaurapas mana sakingapa kaikichu.

³⁴ Jesuska nirka:

—Kasami nuka niiki: kai tuta, gallu manara kantagpimi kamka kimsa biaji nukamanda ningapa kangji: “Paita mana rigsinichu”.

³⁵ Pedroka ainirka:

—Kamwa wañungapa chaiawagpipas, ñi imaurapas mana chasa ningapa kanichu.

Tukui Jesusta katiraiagkuna, chasallata nirkakuna.

Jetsemaní wirtapi, Jesús Taita Diusta mañaskamanda

³⁶ Jetsemaní suti wirtapi chaiagrispaka, Jesuska katiraiagkunata nirka:

—Kaillapi tianakuichi, nuka chi ladu Taita Diusta mañaspa rimagrinkama.

³⁷ Chasa nispa, Pedrota i Zebedeopa iskai wambra-kunata pusaspa, mas karuajma rirka. Chipika, llakii irkiaimi tukurka. ³⁸ Nispaka, chi kimsandikunata nirka:

—Nukata iapa llakii wañungasinami iuiachiwaku. Kamkuna, kaillapi suiawaichi, nukasina mana puñurispalla.

³⁹ Chasa nispaka, mas ñugpasinama rispa, alpama tupagta kumurispa, Taita Diusta mañai kallariirka, kasa nispa:

—Nukapa Taitiku, pudirigpika, kai iapa llakiita † anchuchiwai. Nuka chasa munakugpipas, nuka imasa

† “Kai winja kupata”, iapa llakiitami niraiá.

munaskasina mana tukuchu. Kam imasa munaskasina rurai.

⁴⁰ Chasa nispa, chi kimsandikunapagma kutispaka, puñunakuskata tarigrispa, Pedrota nirka:

—¿Manachu ñi sug ratullapas nukawa rigcharaian-gapa pudirkangichi? ⁴¹ Mana puñurispalla, Taita Diusta mañanakuichi, tukui mana allilla ruraikuna kamkunata mana chaiachu. Sungupi allilla rurangapa munana-kuspapas, kuirpupika iapa sambami kangichi. Chiwami mana pudingichi, allilla rurangapa.

⁴² Chasa nispaka, ikuti rispa, Taita Diusta mañarka, kasa nispa:

—Taitiku, kai iapa llakiita † mana anchuchiwai pudiringapa kagpika, kam imasa munaskasina rurai.

⁴³ Sug ratuma ikuti paikunapagma kutiura, puñunakuskata tarigrirka. Paikunapa ñawi, dipuñui wañunakurka.

⁴⁴ Chasa kawaspaka, paikunata sakispa, Taita Diusta imasami ñugpata mañakurka: chasallatami kimsama mañarka. ⁴⁵ Nispaka, ikuti paikunapagma kutispa, nirka:

—Kunaura samariichi, puñuichi. Nukapa ura chaiarkami. Kai Runa Tukuska, mana allilla rurag runakunapa makipimi ña urmaka. ⁴⁶ Atariichi. Akushi. Apichiwig wag runa, ñami kaillaiamuku.

Jesusta apiskakunamanda

⁴⁷ Jesús chasa rimakugllapi, Judaska chipi chaiagrirkana. Chi runa, Jesuspa chungu iskai agllaskakunamandami karka. Chi runawaka iapa achkakunami chaiagrirkakuna, ispada i garutikuna charispa. Paikunaka, iaia sasirdutikuna i sug judíu taitakuna kachaskakunami karkakuna.

⁴⁸ Chi Judas, manara rispalla, willaska karka, kasa nispa: “Maikanta nuka muchasa; chimi ka. Chita apingichi”. ⁴⁹ Imasa niskasina chaiagringallawa, Jesuspagma kaillaiaspa, nirka:

—Puangi, iachachig taita—. Chasa nispaka, paita mucharka.

⁵⁰ Jesuska nirka:

—Waugki, ¿imapatak samukungi?

Chiuralla, kaillaiaspa, Jesusta apirkakuna.

⁵¹ Chasa kawaspaka, sug Jesuswa kagpura, maki su-niaspa, ispada surkurka. Nispaka, iaia sasirdutipa lutrinta piaspa, sug rinri ialigta kuchurka. ⁵² Jesuska, paita nirka:

—Kamba ispadata churachidirullapita wakachii. Ispadawa wañuchinakugka, ispadallawantami wañuchii tukunga. ⁵³ ¿Manachu iachangi: nukapa Taitata nuka mañagpika, kunauralla mana kuintai pudingasina anjilkunatami kachamuwantra? ⁵⁴ Chasa tukugpika, ¿imasatak ima nukamanda willaraiaskasina allilla tukunga?

⁵⁵ Chasa nispaka, Judaswa riskakunata nirka:

—¿Imapatak nukata, sisaitasina ispada i garuti kaspikunawa apiwangapa samunakungichi? Tukui punchakunami Diospa atun wasi ukupi nuka iachachispa tia-

kurkani. Chipika, ¿imapatak mana apiwarkangichi?

⁵⁶ Nigpika iukarkami, tukui kasa pasaringa, ñugpamanda Santu Ispirituwa rimagkuna willaskasina tukugsamungapa.

Chiura Jesusta tukui katiraiagkuna, paillata sakispa, mitikurkakuna.

Judíu taitapura sugllapi tandariska kaskapi, Jesús kaskamanda

⁵⁷ Jesusta apispaka, Kaifás suti iaia sasirdutipa wasi-ma chaiachigrirkakuna. Moisés ima niskata iachachig taitakuna i sug judíu taitakunapas, chipi tandariska karkakuna. ⁵⁸ Pedroka, karu karullapi katichispa, chi wasi kanchakama chaiagrirka. Nispaka, iaikuspa, chi wasi kawag runakunawa tiarigrirka, kawangapa: Jesusta, ¿imami pasarigsamú?

⁵⁹ Iaia sasirdutikuna i tukui judíu taitakunapas maskanakurka, pipas maski llullaspapas willantra, ima pandariipas Jesús iukagta; chasaka, paita wañuchingapa pudingapa. ⁶⁰ Achkakuna paimanda llullaspa willanakugpipas, manima pandariikuna iukagta tarirkakuna. Katimakar, iskaikunaka chaiagrirkakuna, ⁶¹ kasa nispa:

—Kasa niskatami uiarkanchi: “Nukami pudini, Diospa atun wasita puchukangapa; nispaka, kimsa punchallapi ikuti saiachingapa”.

⁶² Chasa uiaspaka, iaia sasirduti, saiarispa, Jesusta tapuchirka:

—Kammanda mana allilla rimanakuskataka, ¿imapatak mana ainingi?

⁶³ Jesuska, ñi ima mana ainirka. Chiura chi iaia sasirdutika, paita nirka:

—Kamta diltudupa kausag Taita Diospa ñawipimi niiki, kasa willangapa: ¿kamchu kangi Cristo suti Taita Diospa wambra?

⁶⁴ Chiura, Jesuska ainirka:

—Sutipami kam chasa nukamanda ningi. Kasapasmi niikichita: kai Runa Tukuskata kawawangapami kangi-chi, tukui manduiug Taita Diospa alli ladu tiakugta. Suma luarmanda puiukunapi samukugtapasmi kawawangapa kangichi.

⁶⁵ Chasa uiaspaka, chi iaia sasirdutika, iapa rabi-ri-spa, kikinpa katangata llikichirirka, kasa nispa:

—Kikin Taita Diussina tukuspami willariku. ¿Imapatak sugkunata suianakusunchi, paimanda imapas willangapa? Ñami nukanchi kikin uiarkanchi, imasa Taita Diussina tukuspa willarigta. ⁶⁶ Kamkuna, ¿imatak ningichi?

Chiura chi taitakuna, Jesusmanda ainirkakuna:

—Paita wañuchiimi chaiá.

⁶⁷ Chasa ainispaka, Jesusta ñawipi tukaspa, puñitiaspa rurarkakuna. Sugkunaka, paita ñawi kilpaspa, piaspa, ⁶⁸ ninakurka:

—Kam Taita Dios agllaska Cristo kaspaka, willamui: ¿pitak kamta piarka?

† “Kai winja kupata”, iapa llakiitami niraiá.

Jesusta mana rigsinichu, Pedro niskamanda

⁶⁹ Chikama Pedroka, chi wasi kanchallapimi tiakurka. Chiura sug kawag warmi, kaillaiaspa, paita tapurka:
—¿Manachu kampas, chi Galileamanda Jesuswa puri-
kurkangi?

⁷⁰ Pedroka, chasa uiaspa, tukuikunapa ñawipi ainirka:

—Manima iachanichu, kam imamanda chasa rima-
kugta.

⁷¹ Chasa ainispaka, atarispas, iaikudiru atun punguma rirka. Ikuti chipipas sug warmi, paita kawaspaka, chipi kagkunata nirka:

—Kai runapasmi chi Nazaretmanda Jesuswa puri-
kurka.

⁷² Pedroka, ikuti chasa uiaspa, ainirka:

—Diuspa ñawipimi niiki: nuka mana chi runata rigsi-
nichu.

⁷³ Ikuti sug ratullapi, chipi kagkunapas, kaillaiaspa, Pedrota nirkakuna:

—Kampas, sutipami chi runapura kangki. Kamba rimaillapimi allilla rigsirí, paiwa kampurakuna kagta.

⁷⁴ Chiura Pedroka, kikinmanda mana suma rima-
rispa, nii kallarrirka:

—Nukaka, Diospa ñawipi sutipami niikichita, mana llullaspalla. Nukaka, chi runata mana rigsinichu.

Pedro chasa nigllapika, gallu kantarka. ⁷⁵ Chiura iuia-
rigsamurka, imasa Jesús kikin Pedrota nigta: “Gallu
manara kantagpimi kamka kimsa biaji nukamanda
ningapa kangki: ‘Paita mana rigsinichu.’” Chasa iuiarig-
samuspaka, kanchama llugsispa, dillakii wakai kalla-
rirka.

27 Pakarigllapi, iaia sasirdutikuna i judíu taitakuna,
tukuikuna tandarispaka, Jesusmanda rimana-
kuspa iuiarirkakuna, paita wañuchingapa. ² Chasa iuia-
rispaka, paita wataspa, Pilatos suti mandagpagma
chaiachigrirkakuna.

Judas Iskariote sipiriskamanda

³ Tukui chasa uiaspa, Judas Jesusta apichigka kawar-
ka, Jesús sutipa wañuchii tukungapa kagta. Nispaka,
kikin mana allilla ruraskamanda llakii piarka. Chi kimsa
chungu kulkita iaia sasirdutikunata i sug taitakunata-
pas kutichigrirka, ⁴ kasa nispa:

—Nukaka, kunaurami iuiariwarka, mana allilla rurag-
ta. Ñi ima pandariipas mana ruraska runatami wañu-
chingapa apichirkani.

Paikunaka nirkakuna:

—Nukanchitaka, ¿imatak ninkangi? Chika, kam kikin-
llami iachankangi.

⁵ Chasa uiaspa Judaska, Diospa atun wasi ukuma
kulkikunata sitaspa, rirka sipiringapa. ⁶ Iaia sasirduti-
kunaka, chi kulkikunata tandachispa, nirkakuna:

—Kai kulkika kanmi sug runata katuska; chasaka,
paita wañuchingapa. Chimandami michá, Taita Diusta
karaska kulkikunawa chapungapa.

⁷ Chasa nispaka, tukui iuiarirkakuna, chi kulkikunawa
manga ruradiru suti alpata randingapa. Karunig-
manda runakuna samuspa wañuskakunata pamban-
gapami randirkakuna. ⁸ Chasamandami kunankama
chi alpata sutichiska kapunkunata: “Iawar alpa”.

⁹ Chasami tukugsamurka, imasa Jeremías suti Santu
Ispirituwa rimag ñugpata willaskasina. Kasami willa-
raiarka:

Israelmanda runakuna,
kimsa chungu kulki kuaskata ikuti sitaska kaskatami
tandachirkakuna.

¹⁰ Chikunawaka, manga ruradiru alpata randirkakuna.
Chasami atun Taita Dios nukata: “Rurangi” niwaska
karka.

Mandag Pilatos kaskapi, Jesús kagriskamanda

¹¹ Jesús, mandag Pilatos kaskapi saiarigrirka. Paitaka,
Pilatos tapuchii kallarrirka:

—Kam, ¿judiukunapa atun mandagchu kangki?

Chiura, Jesús ainirka:

—Sutipami kam chasa nirkangi.

¹² Iaia sasirdutikuna i sug taitakunapas Jesusmanda
mana allilla ruragta nispa juchachinakugpipas, paika
tukuipimi upalla karka. ¹³ Chimanda Pilatoska, paita
tapurka:

—¿Manachu uiakungi, kam achka mana allilla ruras-
kakunata willanakugpipas?

¹⁴ Jesuska, ñi imapas mana ainirka. Chimanda Pi-
latos, iapa ujnarispa kawarka.

Jesusta wañuchigriichi, Pilatos niskamanda

¹⁵ Wata watapi atun puncha chaiaura, Pilatos iachar-
ka, sug maikan karsilpi kaskata runakuna mañaskata
kacharinga. ¹⁶ Chi punchakuna, tukuikuna rigsiska
[Jesús] Barrabás suti runami karsilpi wichkaraiarka.
¹⁷ Tukui runakuna tandariska kaura, Pilatos tapurka-
kunata:

—¿Maikantatak kamkuna munanakungichi, nuka
kacharingapa: [Jesús] Barrabasta u Cristo suti Jesu-
sta?— ¹⁸ (Pilatos allillami iacharka, ianga Jesusta mana
munaspa, wañuchingapa munanakugta. Chimandami
chasa chipi kagkunata tapurka.)

¹⁹ Chiuraka, Pilatos justisiai ruradirupi tiakuskama,
paipa warmika kasa nispa kacharka: “Chi alli runata
iangka kawai. Nuka, kunantuta iapa mana sumami pai-
manda muskurkani”.

²⁰ Chikamaka iaia sasirdutikuna i sug taitakunapas,
chipi kagkunawa chapurispas chapurispas rirkakuna,
kasa nispa:

—Mañaichi, Barrabasta kacharichu. Jesustaka wañu-
chichu.

²¹ Ikuti Pilatoska tapurkakunata:

—Chi iskai runakunataka, ¿maikantatak kamkuna
munanakungichi, nuka kacharingapa?

Chiura, tukui chipi kagkuna kaparirkakuna:

—Barrabasta.

²² Chasa uiaspaka, Pilatos tapurkakunata:

—Nigpika, ¿imatak munanakungichi, kai Cristo suti Jesusta nuka rurangapa?

Chiura, tukuikuna kaparirkakuna:

—Kruspi churaspa wañuchii.

²³ Pilatos tapurkakunata:

—Kamkunataka, ¿imapitak kawarí, mana allilla ruras-ka kagta?

Paikunaka, mas sinchi kaparispa, ikuti nirkakuna:

—Kruspi churaspa wañuchii.

²⁴ Chasa iapa kaparispa uiarinakugmanda, Pilatos iuiarirka, pai ñi imapas mana pudingapa kagta, kispichingapa. Nispaka, chipi kagkunapa ñawipi iakuwa maki maillarirka, kasa nispaka:

—Kai alli runa kamkunapa makipi wañuchii tukungapa kaskamanda, nukataka mana iuiachiwanchu, ñi ima kulpa iukagsina. Chika, kamkunatami chaiangapa ka.

²⁵ Chiura tukui chipi kagkunaka, kasa ainirkakuna:

—Ari, chi runa wañuchii tukuskamanda, nukanchita i nukanchipa wambrakunata imasa chaiaskasina chachachu.

²⁶ Chasa uiaspaka Pilatoska, Barrabasta kacharirka. Jesustakar mana llakispalla iapa asutichirka. Nispaka, suldadukunapa makipi sakirka, paikuna kruspi klabaspa wañuchingapa.

²⁷ Chiura chi mandagpa suldadukunaka, Jesusta wasi kanchamalla pusarkakuna. Chipika, tukui suldadukuna tandachirirkakuna. Jesús kaskapi muiugta saiarirkakuna. ²⁸ Nispaka, paipa katangata surkuspa, sutipa mandagsina kawaringapa, pichi katanga katachirirkakuna. ²⁹ Ispinakunalla llaugtu simbaspa, paipa umapi churachirkakuna. Pukunga bara alli makipi charichispaka, ñugpa ladu kungurispaka, muchanakugsina burlarinakurka, kasa nispaka:

—Puangi, kam judiukunapa atun mandag. ¿Allillachu kapuangi?—. ³⁰ Chasa ninakuspaka, paita tukaspa, pukungata kichuspa, chillawanta umapi pianakurka.

³¹ Paita chasa asiskauramandaka, pichi katangata surkuspa, ikuti kikinpata churachirkakuna.

Jesusta kruspi klabagriskakunamanda

Chi wasimandaka Jesusta llugsichirkakuna, paita kruspi klabagringapa. ³² Rinakuskapika, Sirene puiblumanda Simón suti runa, ñambipi tuparka. Chi runataka Jesús markaspa apakuska krusta markachirkakuna.

³³ Gólgota suti pambamami Jesusta chaiachigrirkakuna. (Chi Gólgota niraianmi: “Uma Tullu pamba”.)

³⁴ Chipika, mira kupal chapuska binu paita karanakurka upiangapa. Paika, chi binuta tantiaspa, mana munarka upiangapa.

³⁵ Jesusta kruspi klabaspaka, paipa katangakunataka suirtipi pugllarkakuna, iachangapa: imasami chaiá, paipura sug sug apangapa. ³⁶ Nispaka, chipi tiarirkakuna, paita kawanakungapa.

³⁷ Kruspi, Jesuspa uma awa ladu, sug willaraiaskami churarkakuna, kawaspa, imamanda wañuchii tukugta iachangapa. Chipi, kasami niraikurka: “Kaimi ka Jesús suti judiukunapa atun mandag”.

³⁸ Chillapita, iskai sisaikunata kruspi klabaspa saia-chirkakuna: sugtaka Jesuspa alli ladu, sugtaka paipa lluki ladu. ³⁹ Chipi ialinakug, Jesusta kawaspa, uma kaima chima chabsichirispaka, kaminakurka, ⁴⁰ kasa nispaka:

—Kamsina ningi, Diospa atun wasita lim waglichispa, ikuti kimsa punchallapi saiachingapa; kunaura kam kikin kispichirii. Kam sutipa Taita Diospa wambra kaspaka, krusmanda uraikui.

⁴¹ Chasallata iaia sasirdutikunapas, Moisés ima nis-kata iachachig taitakuna, sug taitakunawapas, Jesusta iapa unzaspa ninakurka:

⁴² —Chiins, sugkunata kispichigsamurkasi. Nigpika pai kikinka, mana pudí kispichiringapa. Israelmanda runakunapa atun mandagsi ka. Kunaurakar, krusmanda kikinlla uraikuchu. Chasa kawaspa paimanda suma iuiarisunchi. ⁴³ Taita Diosllatasi iuiaspa karka. “Taita Diospa wambra kani” nikurka. Sutipa Taita Dios paita kuiagpika, kunaura kispichigsamuchu.

⁴⁴ Sisaikuna Jesuswa sugllapi kruspi kagkunapas, chasallata kaminakurka.

Jesús wañuskamanda

⁴⁵ Ña chaugpuncha tukuuramanda chaugpi chisikama, tukui alpa tutaiagsamurka. ⁴⁶ Chaugpi chisi kaura, Jesuska sinchi kapariwa kaparirka, kasa nispaka:

—Elí, Elí, ¿lema sabaktani?—. Chi niraianmi: “Nukapa Dios, nukapa Dios, ¿imapatak nukata sapalla sakiwangi?”.

⁴⁷ Chasa uiaspaka, chipi saianakugpura nirkakuna:

—Kai runa, Elías suti ñugpamanda willagtami kaiaku.

⁴⁸ Chasa iuiaringallawaka, sug paipura saianakuskamanda kalpaka. Sug ispunja apispa, chiwa winja binuta jukuchispa, chaglla puntapi churarka, Jesuspa simi-ma atarichispa, chupachingapa. ⁴⁹ Sugkunaka nirkakuna:

—Ianga kawai. ¿Sutipachu Elías samú, paita kispichingapa?

⁵⁰ Jesuska, ikuti sinchi kaparispa, paipa ispirituta Taita Diusta mingaspa, wañurka. ⁵¹ Wañugllapi, Diospa atun wasi ukupi atun linsu arkaraiaska, awanigmanda ura ladukama chaugpi chaugpimi llirikirgismurka. Alpapas kuiurirka. Rumi piñakunapas, chaugpi chaugpi pakirirkakuna. ⁵² Chiwanka, wañuskakunapa bubidakunapas paskarirkakuna. Taita Diosmandalla kaugsaspa wañuskakuna, Jesús kaugsariskauramanda, achkakunapasmi kaugsarirkakuna. ⁵³ Nispaka, pambaraiaskamanda llugsispa, Taita Diospalla kaska Jerusalén puibluma iaikugrirkakuna. Chipika, achka runakunatami kawachirirkakuna.

⁵⁴ Alpa iapa kuiurikugmandaka, kapitan i paiwa Jesusta kawanakugka, ima pasarikuskata kawaspa, iapa mancharispa, nirkakuna:

—Kai runa, sutipami Taita Diospa wambra karka.

⁵⁵ Achka warmikunapasmi chipi karkakuna, karumandalla kawaspa. Paikuna karkakunami Galilea alpamandalla Jesusta sugllapi katiraiagkuna, paita imapiipas aidaspa. ⁵⁶ Paipura karkakunami María Magdale-

na, Zebedeopa wambrakunapa mama i sug María suti-pas; chi María, Santiago i Josepa mama.

Jesús pambai tukuskamanda

⁵⁷ Ña chisiakuuraka, Arimatea puiblumanda José suti achka iukag runaka Pilatospagma rirka. Chi runapas, Jesús iachachikuskata iui ai apakurka. ⁵⁸ Chi runaka, Pilatospagpi iaikugrispa, Jesuspa kuirputa mañarka. Chiura, Pilatoska nirka:

—Allillami ka. Apaichi.

⁵⁹ Chiura Joseka, Jesusta krusmanda uraikuchigrirka. Nispaka, musu linsuwa maituspa, murtajarka. ⁶⁰ Sug rumi piñapi, José iukarka atun utkuchiska; chipika, kikin pambai tukungapa. Chipimi Jesuspa kuirputa churagrirkakuna. Nispaka, utku punguta sug atun rumiwa wichkaspas, sakirkakuna. ⁶¹ José riura, María Magdalena i sug Mariapas chi pungu ñugpa ladu tia-rispa kidarkakuna.

Jesuspa kuirpu pambaraiaska punguta, suldadukuna chapanakuskamanda

⁶² Warda punchapa allichidiru puncha ña ialiura, kandi iaia sasirdutikuna i fariseokunaka Pilatospagma chaiagrirkakuna, ⁶³ kasa nispa:

—Taita waugki, nukanchi iuiarirkanchimi: chi llulla runaka, kaugsakunkama kasami nirka: “Kimsa punchapika ikutimi kaugsaringapa kani”. ⁶⁴ Chimanda, suldadukunata kachapuai, pambaraiaska punguta chapanakuchu, kimsa puncha ialinkama. Mana kagpika, pai-wa purigkuna, kuirputa apagrispa, ningakunami: “Wañuskaka, sutipami kaugsarirka”. Chasa llullachigpikuna, chi runa ñugpa llullachiskakunamandapas mas mana allillami tukugsamungapa ka.

⁶⁵ Chiura, Pilatos nirka:

—Suldadukunami iukangichi. Pusaichi. Kamkuna imasa munaskasina ruragriichi.

⁶⁶ Chiura paikuna, rispa, pambaraiaska punguta siñalaspas, mas suma wichkagrirkakuna. Nispaka, suldadukunata sakirkakuna, chipi chapanakungapa.

Jesús kaugsariskamanda

28 Judiukunapa warda puncha ña ialiska kaura, si-mana kallarii puncha u dumingu pakarikuuraka, María Magdalena sug Mariawa rirkakuna Jesús pambaraiaskama, kawangapa. ² Chiura alpa, iapa kuiurigsamurka. Atun Taita Diospa anjilsi, suma luarmanda uraikumuspa, chima kaillaiaspas, kawarigsamurka. Nispaka, kilparaiaska rumita anchuchispa, chi awalla tiarirka. ³ Chi anjil, rilampa punchaiachisinasi kawarirka. Katangapas, iapa iura puiusinasi kawarirka. ⁴ Chasa kawaspaka, chi pambaraiaska punguta chapanakug suldadukuna, iapa mancharispa, chugchurispas, wañuskasinasi alpama urmarkakuna.

⁵ Warmikunataka, anjil nirka:

—Mana manchanakuichi. Iachanimi: kamkuna, Jesús kruspi wañuskatami maskanakungichi. ⁶ Kaipika mana kanchu. Imasami pai kikin nirka: chasami kaugsarirka. Pai churaska kaskata kawagsamuichi. ⁷ Kawaspaka, utka riichi. Paita katiraiagkunata willagriichi: “Pai Jesús wañuska, ñami kaugsarirka. Ñugpami Galilea alpama ringapa ka. Chipimi kawanakungapa kangichi”. Nami willarkaichita.

⁸ Chi warmikunaka, chasa uiaspa, chimanda utkalla anchurirkakuna. Mancharispa, alli iuiarispa, kalparkakuna, Jesusta katiraiagkunata willangapa. ⁹ Rinakugllapi, Jesús kinkina paikunata kawarirka, “Puangi” nispa. Chiura paikuna, kungurispas, chakita ugllaspas, paita mucharkakuna. ¹⁰ Chiura, Jesuska nirkakunata:

—Mana manchanakuichi. Riichi; nukata katiraiawag waugkikunata willagriichi, Galilea alpama richukuna. Chipimi kawawangapa kankuna.

Chapanakug suldadukuna imasa willagriskamanda

¹¹ Warmikuna rinakunkama, suldadukuna pambaraiaska punguta chapanakug, Jerusalén puibluma sugkuna rirkakuna, iaia sasirdutikunata tukui imasa pasaringta willagringapa. ¹² Chasa uiaspaka, tukui taitakunawa tandachirinakuspa, sugllasina iuiarigsamurkakuna, chi suldadukunata achka kulki karangapa. ¹³ Kasasi suldadukunata nirkakuna:

—Ningichi: “Tuta nukanchi puñunakunkama, Jesusta katiraiagkuna kuirputa llugsichispa aparkakuna”.

¹⁴ Mandag Pilatos iachagsamugpika, nukanchimi paita imasapas nisunchi. Chasaka, kamkunata ñi imapas mana pasaringachu.

¹⁵ Chi suldadukuna, kulki chaskispaka, imasa paikunata niskasina tukuikunata willanakurka. Chasa iachariskataka kunankamami judiukuna iuiankuna chasa kagta.

Jesús, pai agllaska runakunata ima mingaskamanda

¹⁶ Jesusta chungasug katiraiagkunaka, Jerusalem-manda Galilea alpama rispa, Jesús ñugpata niska lumama chaiagrirkakuna. ¹⁷ Chipika, paita tarigrirkakuna. Paita kawaspaka, kungurigrirkakuna. Sugkuna, Jesusta allilla kawanakuspapas, iuianakurka: “¿Sutipacha kantra?”.

¹⁸ Kaillaiaspas, Jesuska nirkakunata:

—Taita Diosmi nukata kuawarka, sug luarpi i kai alpa luarpipas nuka tukuikunata mandangapa. ¹⁹ Chi-mandami tukui alpa suiu kachaikichita, tukui runakunata iachachispa puringapa. Chasaka paikunapas, nukawami tukungakuna. Paikunataka, Taita Diospa, Wambrapa i Santu Ispiritupa sutiwa bautgisaspas puringichi. ²⁰ Iachachispa puringichi, nuka tukui kamkunata niskata rurangapa. Nuka, tukui punchakunami kamkunawa sugllapi kangapa kani, kai alpa imaura puchukarinkama.

SAN MARCOS

Juan Bautista, chusa sitaska alpapi kaskamanda

1 Diospa Wambra Jesucristomanda Alli Willai, kasa-mi kallarirka.

² Santu Ispirituwa ñugpamanda rimag Isaías suti, kasa willaska niraiarka:

Kawai. Nuka ima niskata willagta kamba ñugpami kachakuni,
kammanda ñambikunata allichipungapa.

³ Chusa sitaska alpapi, sug runa kaparisipami puriku, kasa nispá:

“Imasami ñambi allichinchi:
chasallata alli iuiaikunata apiichi,
atun Taita Diusta chaskingapa”.

⁴ Chasami Juan Bautista, chusa sitaska alpapi kawarigsamurka, kasa nispá:

—Pandariikunata sakispa, Taita Dioswa tukugsamuichi. Baugtisiariichi, pandariikunata pasinsiai tukungapa.

⁵ Judea suiu alpamanda i Jerusalén suti puiblunig-manda, tukuinigmanda runakuna paipagma chaiai kallarirkakuna. Paika, Jordán suti iakupi maikan pandariskakunamanda willarinakuskata baugtisakurka.

⁶ Juanka, kamello suti animalpa agchata awaska katanga churariskami karka. Karata siñidursina ruraspa chumbilliskami karka. Langosta suti chapulinsina i sachukumanda abijunkunapa dusi miskillami mikuspa kaugsakurka. ⁷ Paika, kasa nispami willakurka:

—Sug nukamanda mas iachaka, nukapa katimi samungapa ka. Paita, nuka mana pudinichu, kumurispa, paipa chakikunapi churaraiaska wataraiaskata paskapungapagllapas. ⁸ Nuka, iakullawami baugtisiakichita. Paika, Santu Ispirituwami baugtisingapa ka.

Jesús baugtisariskamanda

⁹ Chi punchakuna Jesuska, Galilea suti alpa i Nazaret puiblumanda llugsispa, Juanpagma rirka. Chipi chaiagriura, Juan, Jordán iakupi paita baugtisarka. ¹⁰ Jesús iakumanda llugsikuura, paita awa suma luar paskarigta kawarirka. Chimanda Santu Ispíritu, palumasina rigcha kawarisipami paipagma uraikumurka. ¹¹ Suma luarmanda rimaipas uiarigsamurka, kasa nispá:

—Kam, nukapa kuiaska wambrami kangi. Kamta kawaspa, iapa alli sumami iuiachiiwa kawaiki.

¹² Chiuramandaka Santu Ispíritu, Jesusta chusa sitaska alpama pusarka. ¹³ Chipika, sachukumanda animalkuna tiaskapi, chusku chunga puncha tutakunawantami chisiarka. Chi punchakunaka iaia kuku, pandarii-

kunapi paita urmachingapa munakurka. Chi punchakuna ialiuura, anjilkuna paita ima ministiskami karagsamurkakuna.

¹⁴ Chiuramanda, Juan Bautista ña karsilpi wichkai tukuska kaura, Jesuska Galilea alpama rirka. Dios-manda Alli Willaita kasa nispá purii kallarirka:

¹⁵ —Taita Dios niska puncha, ñami chaiamurka. Diospa suma mandai, ñami chaiamungapa ka. Pandariikunata sakispa, Taita Dioswa tukugsamuichi. Dios-manda Alli Willaita nuka willakuskata suma uiawaichi.

Chusku chawadurkunata, Jesús kaiaskamanda

¹⁶ Galilea atun kucha pata pata purikuspa, Jesús, Simonta i waugkindi Andresta kawarka. Paikuna, chawadurkuna kaspá, ataraia iaku ukuma sitaspa purinakurka. ¹⁷ Paikunata kawaspaka, Jesuska nirakunata:

—Katiwaichi. Iachachisakichitami, chawakunata apigsina, runapura maskapuagkuna kangapa.

¹⁸ Chasa uiangallawa, ataraiakunata sakispa, Jesusta katirkakuna.

¹⁹ Chimanda mailla riskapi, Santiago i waugkindi Juan sutitami kawarka. Paikuna, Zebedeopa wambrakunami karka. Kanuapi ataraiakunata allichinakurka. ²⁰ Paikunata kawaspa, Jesuska kaiarkakunata. Paikunapas uiangallawa, taitata piunkunallawa kanuapi sakispa, Jesusta katirkakuna.

Sug runa kuku waira iaikuskata, Jesús ambiskamanda

²¹ Chimandaka, Kafarnaum suti puibluma chaiagrirkakuna. Warda puncha tandariduru wasima iaikuspa, Jesús iachachii kallarirka. ²² Pai iachachikuskata uiaspaka, iapa ujnarirkakuna. Moisés ima niskata iachachig taitakunasinalla, pai mana iachachikurka. Tukui-kunamanda mas suma allilla mandagsinami iachachikurka.

²³ Chi tandariduru wasipika, sug kuku waira iaikuska runami chaiagrirka. Chi runaka, kaparispa nirka:

²⁴ —Nazaret puiblumanda Jesús, ¿imapatak nukanchipagma samurkangi? Nukanchita puchukangapachar samurkangi. Nuka allillami rigsiiki, kam Taita Diospa tukuipi mas alli wambra kagta.

²⁵ Jesuska, kuku wairata piñaspa, nirka:
—Upalla rikui, kai runamanda llugsispa.

²⁶ Chiura kuku waira, chi runata chugchuchispa, sinchi kaparichispa, llugsirka. ²⁷ Tukui chasa kawagkuna, iapa mancharirkakuna. Kikinpura tapurinakurka:

—Chi pasariska, ¿imasik niraiá? Kai runaka, musu rimaiwami atun mandagsina suma iachachiku. Kuku wairakunata pai rimaúra, ima niskata uiaspa, runamanda anchurinkuna.

²⁸ Chiwanka, mana unailla Galilea alpa suiu Jesus-manda iacharigsamurka.

Achka ungugkunata, Jesús ambiskamanda

²⁹ Chi tandariduru wasimanda llugsispa, Jesús, Santiago i Juanwanta Simón i Andrespa wasipi iaikugrirkakuna. ³⁰ Chipika Simonpa suigra, rupaiwami ungug sirikurka. Paimandaka Jesusta willarkakuna:

—Ungugmi siriku.

³¹ Chasa uiaspa Jesuska, paipagma kaillaiaspa, makita apispa, atarichirka. Atarigllapi, rupai anchurirka. Chiura chi warmi, atarispá, mikui ianuspa, karai kallarrirkakunata.

³² Chi tuta, indi ña chingaska kaura, ungugkuna i kuku wairawa kaskakunata, tukuikunatami Jesus-pagma chaiachigrirkakuna. ³³ Chi puiblumanda tukui runakuna, wasi punguma tandarigrirkakuna. ³⁴ Chiura Jesuska, maituku ungugkuna kaskakunatapasmí ambirka. Chasallata, achka kuku wairakunatami llugsichirka. Chi kuku wairakuna iacharkakuna pi Jesús kagta. Chimandami chi kukukunata mana sakikurka, chasa willangapa.

³⁵ Kaiandi iapa tutata, Jesuska atarirka. Chi puiblumandaka rirka mana maikan runakunapas kaugsanakuska alpama. Chipika, Taita Dioswa rimanakui kallarrirka. ³⁶ Simón i paiwa kagkunaka, Jesusta maskagrirkakuna. ³⁷ Paita tarigrispaka, nirkakuna:

—Kamta, tukuikunami maskanakú.

³⁸ Jesuska ainirkakunata:

—Kai suiu puiblukunama risunchi, Alli Willaita willangapa. Chasamandami nuka llugsimuspa purikuni.

³⁹ Pai imasa niskasina, Galilea alpapi tukui tandariduru wasikunapi iaikuspa, Alli Willaita willaspa, kuku wairakunata llugsichispami purikurka.

Aicha ismúi unguiwa kaskata, Jesús ambiskamanda

⁴⁰ Sug runa, aicha ismúi ungui iukaspa, Jesuspagma chaiagrirkakuna. Chi runaka, kungurispá, nirka:

—Kam munaspaka, pudingimi nukata ambiwanga.

⁴¹ Chiura Jesuska, iapa llakirispá, ungugta maki churaspa, nirka:

—Ari, munanimi. Ambiriska tukui.

⁴² Chasa nigllapi, chi ungui allilla ambirigsamurka.

⁴³ Chiura Jesuska, chi runata kachakuspa, sinchi rimaspa, nirka:

⁴⁴ —Uiamui. Mana pitapas willakungi. Sasirdutita kawachirigrii. Moisés kamariku karangapa niraiasinasina karagrii. Chasaka, tukuikunami kawangakuna, kam allilla ambiriska kagta.

⁴⁵ Chi runaka, mana uiaspalla, maipi riskapi tukui-kunata imasa pasariska willaspa aparka. Chasa kag-manda, Jesuska ñi maikan puiblumapas mana pudirka iaikuspa kawarigringapa. Chiwanka, maikan

runapas mana kaugsanakuskapimi purikurka. Chasa kagpipas, tukuinigmamandami paipagma chaianakug-rirka.

Mana kuiuringapa unguiwa kaskata, Jesús ambiskamanda

² Sug punchakuna ialiuera, Jesuska Kafarnaum puiblumá ikuti iaikugrirkakuna. Pai wasipi kagta iacharirura, ² achka runakuna chi ukupi kanchawanta jundagrirkakuna. Chiura Jesús, Diospa Rimaita willai kallarrirkakunata.

³ Chasa iachachikuura, chusku runakunaka, mana kuiuringapa unguiwa kaskata wanduspa, chi wasima aparkakuna. ⁴ Iapa achka runakuna ukupi junda kag-manda, mana pudirkakuna Jesús kaskama iaikuchingapa. Chimandaka, wasi awama sikachirkakuna. Jesus-pa awa ladu wasita utkuchispa, chi runa chakanapi sirikuskata Jesuspa ñawi ladu uraikuchirkakuna. ⁵ Chiura Jesuska, “Ambipuangami” iuianakuskata kawaspaka, mana kuiuringapa unguiwa kaskata nirka:

—Wambra, kam pandariikunata ñami pasinsiaska kangí.

⁶ Moisés ima niskata iachachig taitakunapasmi chi ukupi tianakurka. Jesús chasa niskata uiaspa, chi runakunaka sungullapi iuianakurka: ⁷ “Kai runa, ¿imapatak Diussina tukuspa, chasa rimaku? Ñi pipas mana pudinkunachu, pandariikunata pasinsiangapa. Taita Diosllami pasinsiangapa pudí”.

⁸ Jesuska, chasa iuianakuskata iachaspa, nirkakunata:

—¿Imapatak chasa sungullapi iuianakungichi?

⁹ ¿Maikantak mas alli ka: kai runata ningapa: “Kam pandariikunata ñami pasinsiaska kangí”? Mana kag-pika, ¿ningapa: “Atarii; chakanata markarispá, kamba wasima riilla; ña ambiriskami kangí”? ¹⁰ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispa, mana kuiuringapa unguiwa kaskataka nirka:

¹¹ —Nukami niiki: atarii. Chakanata markarispá, kamba wasima rii.

¹² Chasa nigllapi, chi runa atarirka. Chakana sirikuskata markarispá, tukui chipi kagkuna kawanakugllapi, llugsispa rirka. Chasa kawaspaka, iapa ujnarispa tukugsamurkakuna. Taita Diusta iapa suma atuniachirkakuna, kasa nispa:

—Kunaurasina suma ruraskata ñi imaurapas mana kawaska kanchichu.

Leví suti runata, Jesús kaiaskamanda

¹³ Chiuramanda Jesuska, ikuti kucha pata laduma rirka. Chiura iapa achka runakuna, paipagma chaiagrirkakuna. Chipika, paikunata iachachii kallarrirka. ¹⁴ Ña puchukaskauramanda, mana judíu kaskakunamanda kulki chaskikuskaipi ialikurka. Chipika, Alfeopa wambra Leví sutimi tiakurka. Chi runata kawaspaka, Jesuska nirka:

—Katiwai.

Chiura chi runa, atarispá, Jesusta katii kallarirka.

¹⁵ Nispaka, Jesuswa sugllapi katiraiagkunawanta Levipa wasima iaikugrispa, mikungapa tiarigrirkakuna. Paipura kulki chaskigkuna i mana allilla ruragkunapas, achkakunami paikunawa tianakurka. Iapa achkakunami Jesusta katiraiarkakuna, pai iachachikuskata uian-gapa.

¹⁶ Jesús chi runakunawa mikunakuskata kawaspa, Moisés ima niskata iachachig taitakuna i fariseokuna paipa katiraiagkunata tapurkakuna:

—Kamkunata iachachig, ¿imapatak mana judíu kaskunamanda kulki chaskig i mana allilla ruragkunawa sugllapi mikuku?

¹⁷ Chasa uiaspaka, Jesuska nirkakunata:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani; chasaka, Taita Dioswa allilla tukungapakuna.

Imaura mana mikungapa, Jesús iachachiskamanda

¹⁸ Juan Bautistawa i fariseokunawa purigkuna iukarakuna, sug punchakuna mana mikuspalla chisianga. Chimanda sug runakuna, Jesusta tapugrirkakuna:

—Kamta katiraiagkuna, ¿imawantak imaurapas mikuspalla kankuna? Ikuti Juanwa i fariseokunawa purigkunaka, achka punchakuna mana mikuspallami chisiankuna.

¹⁹ Chiura, Jesuska ainirkakunata:

—Kasaraipi, kusa tukunga kunbidaskakunawa kankama, ¿mana mikuspallachu kangakuna? Manima. Imaura kusa tukunga paikunawa kankama, iunkunami sumaglla mikuspa kangakuna. ²⁰ Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

²¹ —Ni pipas, ruku katangapi musu linsuwa mana sirangichichu. Chasa siragpika, tagsaura, chi linsu, uchullaiaspá, ruku katangatami llikichinga. ²² Chasallata ñi pipas, musu binu, ruku kara taligapi mana tallingichichu. Chasa talligpika, musu binu timbuura, taligata tugiachispami icharinga. Kara taligapas mana balinchu. Chimandami musu binu, musu taligapi tallingapa cháiá.

Warda punchamanda, Jesús iachachiskamanda

²³ Sug warda puncha, Jesús katiraiagkunawanta chagra tarpuraiskakunapi ialinakurka. Katiraiagkunaka, trigu ispigakunata pitii kallarirkakuna. ²⁴ Chasa kawaspa, sug fariseokuna Jesusta tapurkakuna:

—Kawamui. Kamta katiraiagkuna, ¿imapatak warda puncha pandarinakú?

²⁵ Jesuska ainirkakunata:

—¿Manachu imaurapas ñugpamanda librupi willaraiaskata kawarkangichi, taita David i paiwa kagkunapas, iarkaimanda i ministiska kaspá, imasa ruragta-

kuna? ²⁶ Pai kikin, Diospa wasi ukuma iaikuspa, Abiatar suti iaia sasirduti kaura, altarpi churaska tandakuna tiaskata mikurka, mana imapas mancharispalla. Chi tandakuna, sasirdutikunalla mikudirumi karka. Chi tandakunallatata paiwa kagkunatapas kararka, mikungapa.

²⁷ Kasapasmi Jesús nirkakunata:

—Runakunamandami Taita Dios nirka, warda punchakuna samangapa tiachu. Mana runakunata rurarkachu, warda punchakuna samangapaglla. ²⁸ Chi-manda kai Runa Tukuska pudinmi ninga, warda punchakunatapas imasa chaiaskasina rurangapa.

3 Chi punchallatata, tandariduru wasipi ikuti Jesús iaikugrirká. Chipika, sug maki chakiriska unguiwa kag runa, paikunawa sugllapi karka. ² Jesusta chapana-kurka, warda puncha chi unugta ambichu; ambigpika, paimanda justisiakunapagma willagringapa.

³ Jesuska, chi runa maki chakiriska kaskata nirka: —Atarii. Runakunapa chaugpipi saiarigsamui—.

⁴ Chasa nispa, chipi kagkunataka tapurka— Warda puncha, ¿imatak mas alli ka: allilla u mana allilla rurangapa; runata kispichingapa, ubi wañuchingapa?

Chiura, upallami tianakurka. ⁵ Jesuska, rabiawa kawarkakunata. Paikunapa iuiái iana tutapisina kagmandami llakirirka. Nispaka, chi unug runata nirka: —Maki chutachii.

Chasa chutachigllapi, chi makika aliarka.

⁶ Chasa kawaspa fariseokunaka, llugsispa, mandag Herodeswa purigkunawa tandarigrispa, Jesusmanda rimanakui kallarirkakuna, imasapipas paita wañuchingapa.

Kucha pata ladu, iapa achka runakunata, Jesús ambiskamanda

⁷ Jesús katiraiagkunawanta kucha patama rirkakuna. Galilea alpanigmanda achka runakunami paita katichinakurka. ⁸ Pai tukuipi iapa suma ruraskakunata iachaspa, Judea alpanigmanda, Jerusalén puiblunigmanda, Idumea suti alpanigmanda, Jordán iaku sug ladu chimbánigmanda, Tiro i Sidón puiblu kuchukunamanda, tukuinigmandapasmi iapa achka runakuna pai kaskama chaiagrirkakuna. ⁹ Iapa achkakunata ambikugmanda iachaspa, tukui unguiwa kagkuna munanakurka, paita llamkaspá ambiringapa. Kichunakuiwantami jundanakurka. Chimanda Jesuska, katiraiagkunata nirka:

—Sug kanuata allichiskalla suiawangichi—. Chi achka runakuna paita tanganakuiwanta iapa jundanakugmandami chasa nirka.

¹¹ Kuku waira iaikui tukuska runakunapas, paita kawaspa, paipa ñugpa ladu kungurispá, kaparinakurka, kasa nispa:

—Diospa wambrami kangí.

¹² Chiura Jesuska, chasa kaparinakuskata sinchi rimaspá nirkakunata:

—Nukamanda mana willanakuichi nuka pi kagta.

Chunga iskai runakunata, Jesús agllaskamanda

¹³ Chiuramanda Jesuska, awa lumama sikagrispa, pai munaskakunata kaiarka. Chiura, paipagma kaillaiarkakuna. ¹⁴ Chiura, chungu iskaikunatami agllarka. Chi agllaskakunataka nirka:

—Kamkunata agllaikichitami, kamkuna nukawa kangapa i kamkunata kachangapa, Diuspa Rimaita willaspa puringapa. ¹⁵ Chasallatami pudingapa kangichi, kuku wairakunatapas llugsichingapa.

¹⁶ Chi chungu iskai agllaskakuna, kasami suti karkakuna: Simón (paita, Jesús sutichirka Pedro); ¹⁷ Santiago i paipa waugki Juan (paikuna, Zebedeopa wambra-kunami karka; paikuna iapa kurinti kagmanda, Jesús sutichirkakunata Boanerjes; chi niraiami “Triwinu wambra-kuna”); ¹⁸ Andrés; Felipe; Bartolomé; Mateo; Tomás; Alfeopa wambra Santiagollatata suti; Tadeo; sug Simón (kananeo suti runakunawa ñugpata purig); ¹⁹ i Judas Iskariote, Jesusta katuspa apichig.

Jesusta, iaia kukupa iachaiwa kagta juchachinakuska-manda

²⁰ Jesús ikuti wasima chaiagriskauramanda, iapa achka runakuna ikuti jundagrirkakuna. Jesuswa kagkunata ñi mikungapagllapas mana sakinakurka.

²¹ Jesuspa paipurakunaka, chasa iachaspa, ninakurka: —Upami tukurka—. Chimanda chaiagrirkakuna, paita pusangapa.

²² Moisés ima niskata iachachig taitakuna, Jerusalemanda chaiagriska karkakuna. Chi runakunaka nii kallarrirkakuna:

—Beelzebú suti iaia kukumi iuká. Chi iaia kukupa iachaiwami kuku wairakunata llugsichiku.

²³ Chasa ninakugmanda, Jesuska, paikunata kaiaspa, iui ai apingasina suma parlarka, kasa nispa:

—¿Imasatak iaia kuku, paipura kaspera, llugsichingapa munanga? ²⁴ Nintranchi: sug alpapi mandagpura piñachinakuspa makanakuspalla kaugsanakugpika, chipi mandai iukanmi puchukaringa. ²⁵ Chasallata, sug wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ²⁶ Chasallatami kantra: iaia kukuwa kagpura piñachirinakuspa kagpika, iukankunami parijuma puchukarinkunga.

²⁷ —Maikanpas sug wapu runapa wasima iaikuspa, ima iukaskata kichungapa munaspa, iukanmi ñugpa paita watanga. Mana kagpika, manima kichungapa pudingapa kanchu.

²⁸ —Kasami nuka niikichita: runakuna pandariskata tukuitami pasinsiai tia. Taita Diusmanda iapa jiru mana uiangasina rimaska pandariskakunatapasmi pasinsiai tia. ²⁹ Ikuti maikan Santu Ispiritumanda iapa jirukuna rimaskataka ñi imaurapas mana pasinsiai tiangapa kanchu. Chasa jiru rimaskakunamandami chi runakunaka diltudupa kulpa iukangapa kankuna—. ³⁰ “Jesuska, kuku waira iaikuskami ka” ninakugmandami pai chasa ainirkakunata.

Sutipa Jesuspa familiakunamanda

³¹ Jesús kaskama, paipa mama i waugkindikuna chaiagrirkakuna. Kanchamandalla kacharkakuna, paita kaiangapa. ³² Iapa achka runakuna, Jesús kaskapi muiugta tianakurka. Chiuraka, paita nigrirkakuna:

—Uiamui. Kamba mama, waugkikuna i panikunami kanchapi suianakú, kamta rimangapa.

³³ Paika ainirkakunata:

—¿Pikunatak nukapa mama, nukapa waugkikuna niraiakuna?

³⁴ Chasa nispaka, muiugta paiwa tianakuskata kawaspa, nirkakunata:

—Kaikunami nukapa mama, nukapa waugkikuna kankuna. ³⁵ Taita Dius imasa munaskasina maikanpas ruragmi nukapa waugki, nukapa pani, nukapa mama niraiá.

Tarpudur runamanda parlu

4 Kucha pata ladu, Jesús ikuti iachachii kallarrirka. Chiura iapa achka runakuna, paipagma chaiagrirkakuna. Chasa kawaspaka Jesuska, iakupi kaska kanua ukuma iaikuspa, tiarirka. Tukui chipi kagkuna, iaku pata ladu alpapi karkakuna, paita uiangapa. ² Chiura Jesuska, iui ai apingasina achka suma parlukunawa iachachii kallarrirka.

Iachachikuspaka, kasami nirkakunata:

³ —Sumaglla uiawaichi. Sug runasi llugsirka, simillakunata sitaspa tarpungapa. ⁴ Tarpukuura, sug simillakunaka ñambipisi urmarkakuna. Chi simillakunataka, piskukunasi mikugsamurkakuna.

⁵ —Sug simillakunaka, rumilla tiaskapisi urmarkakuna, mailla alpa tiaskapi. Mana achka alpa tiagmanda, mana unaiilla wiñarirkakuna. ⁶ Nigpika, indi pi-aspa, rupachirka. Mana achka anguiug kaspaka, utkalla chakirirkakuna.

⁷ —Sug simillakunaka, ispina sachakuna tiaskapisi urmarkakuna. Nigpika, ispina sacha wiñarka, simillakunata kilpagta. Chiwanka, ñi imapas mana tiarirka.

⁸ —Ikuti sug simillakunakar, suma alpapisi urmarkakuna. Chasaka, suma wiñaspa, allilla pallarirkakuna. Sug simillamandalla, kimsa chungu kimsa chungu pallarirka. Sugmandalla, sugta chungu sugta chungu; ikuti sugmandalla, patsa patsasi pallarirka.

⁹ Chasa parlaspaka, nirkakunata:

—Rinri iukagkuna, nuka niskata uiawaspa, suma uiaringichi.

Imapa Jesús, iui ai apingasina parlukunawa rimaskamanda

¹⁰ Jesús iachachikuskata uiagkuna riskauramandaka, chungu iskai pai agllaskakuna sugllapi katiraiagkunawa paita tapurkakuna:

—Chi parlu kam iachachiska, ¿imatak niraiá?

¹¹ Chiura Jesuska, kasami ainirka:

—Kamkunata niskami ka, Taita Dius imasa suma mandakuskasina kaskata ñi imaurapas mana iachas-

kata iachangapa. Ikuti mana kaimanda kagkunataka iui ai apingasina parlukunallowami rimani. ¹² Chasaka paikuna, kawanakuspapas, mana kawagsinami kankuna. Uianakuspapas, mana uiagsinami kankuna. Mana kagpika paikuna, Taita Dioswa tigramuspa, pasinsiaimi tukuntrakuna.

Tarpudur runamanda parlu ima niraiagta, Jesús willaskamanda

¹³ Kasapasmi Jesús nirkakunata:

—Chi iui ai apingasina parlaskaka, ¿kamkunapaschu ima niraiaskata mana iachangichi? Chasaka, ¿imasatak kunauramanda sug parlukunata ima niraiaskata iachankangichi?

¹⁴ —Tarpug runaka, Diospa Rimaita willagsinami niraiá.

¹⁵ —Similla ñambipi urmagka, sug runa Diospa Rimaita uiagsinami niraiá. Chasa uiagllapi, iaia kukuka chi rimaskata tukuimi kichugsamú.

¹⁶ —Chasallata, similla rumilla tiaskapi urmagka sug runa Diospa Rimaita uiagsinami niraiá. Chi uiangallawaka alli iuiachiwami chaskinkuna. ¹⁷ Nispaka, imasami chi mana achka anguiug simillakuna tukú: chasallata sug ratullami Taita Dioswa iuiarispas kankuna. Ima Diospa Rimaimanda unzagpikunaka, llakiimi apigsamú. Chiuramanda, mana mas Taita Dioswa iuiarigapa munankunachu.

¹⁸ —Similla ispina sachakuna tiaskapi urmagka, sug runa Diospa Rimaita uiagsinami niraiá. Uiaspapas, ¹⁹ kai alpapi tiaskakunallowa sumaglla kaugsangapami iuiarinkuna, mas achka iukag tukungapa. Chasaka, Diospa Rimaita tukuimi kungarinkuna. Ñi ima mana pallangapa tiaringasinami tukunkuna.

²⁰ —Similla suma alpapi urmagkar, sug runa Diospa Rimaita sumaglla uiaspa, mana kungarispalla kagsinami niraiá. Chi runakunapimi niraiá, suma alpapi similla urmaskamanda, achka suma pallai tukungapa. Imasami sug simillamandalla kimsa chungu kimsa chungu, u sugta chungu sugta chungu, u patsa patsa pallari: chasallatami paikuna, Taita Diosmanda allilla ruraskakunawa achka pallarigsina tukunkuna.

Sindimanda parlu

²¹ Kasapasmi Jesús nirka:

—Ñi pipas, ima sindi apamuskata manga ukupi u kawitu ukuma mana churangapa chaianchu. Awa kawitupimi churangapa chaiá. ²² Chasallata, ima pakalla kaskapas, imaurapasmi iachari. Ima pakalla wachiskapasmi imaurapas kawarigsamú. ²³ Rinri iukagkuna, nuka niskata uiawaspa, suma iuiaringichi.

²⁴ Kasapasmi Jesús nirka:

—Nuka ima rimaskata suma iui aiwa uiawangichi. Kamkuna imasami sugkunata tupungichi: chasallatami Taita Dios, kamkunata allilla u mana allilla ruraskata iapawa tupungapa ka. ²⁵ Maikan achka iukagta masmi karangapa ka. Ikuti maikan mailla iukaskataka tukuimi kichungapa ka.

Similla imasa wiñagmanda parlu

²⁶ Kasapasmi Jesús nirka:

—Diospa suma mandaika, similla alpapi tarpuska wiñakuskasinami niraiá. Tarpug runa, ²⁷ tutakunaka puñuspa, punchakunaka atarispas, imapas rurakunkama, simillaka, llugsispa, wiñaspa wiñaspa, atunmi tukuspa ri. Chasa kagpipas, chi runa mana iachanchu, simillaka imasa wiñakugta. ²⁸ Alpapi similla tarpuskaka wiñanllami, ñugpaka panga, nispaka kiki, nispaka chugllu. ²⁹ Ña pallangapa tukuura, chi runaka tandachingapagllami ri.

Mustasa simillamanda parlu

³⁰ Kasapasmi Jesús nirka:

—Diospa suma mandai, ¿imasatak rigchá? ¿Ima parluwatak iachachintraikichita? ³¹ Mustasa simillasina kagtami niraiá. Chi simillaka, chagrapi tarpuura, tukui kunamandapas mas uchullami ka. ³² Ña wiñai puchukauraka, tukui mikui chagrapi tiaskakunamandapas mas atunmi tukú. Malkikunapasmi atun tukú. Chasakunapika, piskukunapas pudinkuna, sumbra ukupi sumaglla wasichigsamungapa.

³³ Chasallata iui ai apingasina achka suma parlukunawami Diospa Rimaita iachachidur karka, imasa paikuna iachaikungasina. ³⁴ Sugkunataka parlukunallowami iachachidur karka. Ikuti paita katiraiagkunallowa kaura, paikunataka iacharkami willanga, chi parlukuna ima niraiagta.

Sinchi wairata i iaku iapa kuiurikuskata, Jesús kasillaiachiskamanda

³⁵ Chi punchallatata amsaiakuura, Jesuska katiraiagkunata nirka:

—Akushi. Kai kuchata chimbasunchi.

³⁶ Chiura, runakuna chipi uianakuskata sakispa, Jesús ña kanuapi tiakuskata chimbachii kallariakuna. Sug kanuakunapi sug runakunapas, sugllapi katirkakuna.

³⁷ Ña iaku chimbanakuskapi, iapa sinchi waira atarii kallarika. Ulaskunapas, iapa awa atarirka. Chiwanka, kanua ukuma iaku ña iaikukurka. ³⁸ Jesuska, kati ladu puñukurka, sawinapi uma churaspa. Chiura katiraiagkuna, paita rigchachirkakuna, kasa nispa:

—Iachachig taita, ¿manachu nukanchimanda llakingi, wañungapa kagpipas?

³⁹ Jesuska, rigcharispa, atarirka. Nispaka, wairata piñarka. Iakutapas piñarka, kasa nispa:

—Upalla. Ianga kawai.

Chasa pai niuraka, wairami ialirigsamurka. Tukui allillami kasillaiagsamurka. ⁴⁰ Chiura, Jesuska nirka-kunata:

—¿Imapatak chituku mancharingichi? ¿Manarachu nukamanda suma iuiawaspa rigsiwangichi?

⁴¹ Paikunaka, iapa mancharispami kikinpura tapuri-nakurka:

—Kai runa, ¿imasik ka? Waira i iakupas, paita uianakuna.

Sug runa achka kuku wairakuna iaikuskata, Jesús ambiskamanda

5 Kucha ialispaka, sug ladu chimba chaiagrirkakuna Jerasa suti alpama. ² Jesús ña kanuamanda alpama uraikuuraka, wañuskakuna pambaraiaskanig-manda sug runa kuku wairakuna iaikuska, paita tupagrirka. ³ Chi runa, wañuskakuna pambaraiaskapi-mi kaugsakurka. Paita ñi kadinakunawapas mana pudirkakuna, wataspa charingapa. ⁴ Ñugpaka, achka biajisi sinchi kadinakunawa wataspa, allilla charidur karkakuna. Chasa kagpipas, lim piti pitisi wataskakunatapas ruradur karka. Chimanda, ñi maikan wapu runapas mana pudirkakuna, wataspa charingapa. ⁵ Tukui tuta i punchakuna, lumakuna suiu i pantiunnig-manda kaparispa, rumiwa piarispa purikurka.

⁶ Chi runaka, karumandata Jesusta kawaspa, kalpa kaillaiagrispa, paipa ñugpa ladu kungurigrirka. ⁷ Sinchi rimaiwa kaparispa, nirka:

—Ai, kam tukuiamanda mas atun Taita Diospa wambra Jesús, ¿imapatak nuka kaskama samukungi? Dios-manda purdiusllami mañaiki: mana nukata sungu nanagta llakichiwakugsamui—. ⁸ Jesús, chi kuku wairata ñami niska karka: “Chi runamanda llugsii”. Chi-mandami chasa nirka.

⁹ Jesuska, chi runata tapurka:

—Kam, ¿imatak suti kangí?

Chiura ainirka:

—Nuka, achka warangakunami suti kani. Iapa achkakunami kanchi.

¹⁰ Nispaka, Jesusta sinchi mañai kallairirka:

—Mana kaimanda nukanchita sug luarma kachakui.

¹¹ Chi ladira ladullapi, iapa achka kuchikuna mikuspa purinakurka. ¹² Nigpika chi runapi kag kuku wairakunaka, Jesusta mañarkakuna, kasa nispa:

—Nukanchita kachai, chi kuchikunapa ukuma iaikugringapa.

¹³ Chiura, Jesuska sakirka, chasa tukungapa. Chasaka chi kuku wairakunaka, ña runamanda llugsispa, kuchikunapa ukuma iaikugrirkakuna. Chiwanka tukui kuchikuna, mai iskai warangasina, iapa saia patata kalpaspa, kucha iaku ukuma sitarigrirkakuna. Chipi chukarisa, tukui puchukarirkakuna.

¹⁴ Chasa kawaspa, kuchikunata kawagkunaka, mitikuspa, puiblunigta i ñambinigta suiu parlaspa purigrirkakuna. Chasa uiagkunaka rirkakuna, imasa pasariskata kawangapa. ¹⁵ Jesuspagma chaiagrispaka, chi achka kuku wairakunata llugsichii tukuska runata kawagrirkakuna. Paika, allilla katanga churariska tiakurka; paipa iuiaipas, ña allilla. Chasa kawaspaka, iapa mancharirkakuna. ¹⁶ Chi imasa pasariskata kawagkunaka willarkakunata, kuku wairakunata imasa Jesús llugsichispa, kuchikuna ukuma kachagta. ¹⁷ Chasa uiaspaka, Jesuspagma kaillaiaspa, nirkakuna:

—Nukanchipa alpamanda llugsipuai.

¹⁸ Jesús ña kanuama iaikuska kauraka, chi kuku wairallugsichii tukuska runa, paita mañai kallairirka:

—Nukatapas pusawai.

¹⁹ Jesuska, paita ainirka:

—Manima. Kamba wasima rii. Kambakunata willagriri, kamta imasa atun Taita Dios suma llakiiwa kawagta i allilla ruraspaka sakigta.

²⁰ Chi runaka, Dekápolis suti puiblukuna suiu rispa, tukui imasa Jesús paita allilla ruraskata willaspa purigrirka. Chiura tukui uiagkuna, iapa mancharispa ujnairirkakuna.

Jairopa wambra kaugsariskamanda i sug warmi Jesupa katangata llamkaspalla ambiriskamanda

²¹ Jesús ña ikuti kucha ialispa, sug ladu chimba chaiagriuraka, iapa achka runakuna paipagma tandarigrirkakuna. Jesús, chi iaku patallapi karka. ²² Chiura sug tandariduru wasimanda taita, Jairo sutimi paipagma chaiagrirka. Chi taitaka, Jesusta kawaspa, paipa chaki ladu kungurisa, ²³ sumaglla mañai kallairirka, kasa nispa:

—Nukapa warmi wambra, ñami wañupuaku. Kamba maki churapuagrii. Chasaka, ambiripuangapami ka.

²⁴ Chiura Jesús, chi taitawa rii kallairirka.

Nigpika iapa achka runakuna, Jesusta tanganakuiwanta kati kati rinakurka. ²⁵ Katichinakugpura sug warmimi sugllapi rikurka. Chi warmi, chungu iskai wata iawar sitaiwa ungug karka. ²⁶ Tukui ima iukaskata tukuchigpipas, ñi maikan ambigkunapas manima alia-chirkakuna. Chasapaka, chi ambigkunawa mas ungu-rispa rikurka. ²⁷ Chi warmika, Jesusmanda uiaspa, chi achka runakunapa chaugpipi Jesusta kati kati kaillaiaspa katichikurka. ²⁸ “Jesuspa katangata llamkaillawami ambirigsamusa”; chasa iuiaspa katiraiarka. Ña alli kaura, paipa katangata llamkarka. ²⁹ Llamkagllapi, chi ungui ambirirka. Chi warmi, kikinpa kuirpupi ungui ambiriska iuiachirigsamurka.

³⁰ Chasa ambirigllapi Jesuska, paipa iachaillawa maikan ambiriskata iuiachirispaka, katiraiagkunata tigraspa, tapurka:

—¿Pitak nukapa katangata llamkawarka?

³¹ Paiwa iachaikugkunaka nirkakuna:

—¿Manachu tukuikuna, tanganakuiwanta kamta katiraianakú? Nigpika, ¿imapatak tapukungi: “¿Pitak llamkawarka?”?

³² Jesuska, muiugta kawai aparka, pi llamkagta iachangapa.

³³ Chiura chi ambirig warmika, manchaiwa chugchuspa, ña ambiriska kagta iuiarispa, kaillaiaspa, Jesusta kungurisa, sutipa tukui ima pasariskata willarka.

³⁴ Chiura, Jesuska nirka:

—Kam warmisita, nukamanda suma iuiariskamanda-mi ambirigsamurkangi. Rii, mana manchaspalla. Kamba ungui, tukui ambiriskami kangí.

³⁵ Jesús chara rimakugllapi, chi taitapa wasimanda chaiagrirkakuna, kasa nispa:

—Kamba wambra ñami wañurka. ¿Imapatak chara kai iachachig taitata imapas mañakunkangi?

³⁶ Jesuska, paikunata chasa uiaspa, chi taitata nirka: —Mana llakikui. Nukamanda suma iuiawai.

³⁷ Chasa nispaka, tukuikunatami sakirka. Pedro, Santiago i waugkindi Juanllatami pusaspa rirka. ³⁸ Chi wasima chaiagriuraka, iapa killachinakugta uiarinaturka. Sinchi llakiwa kaparisa wakanakurka. ³⁹ Jesuska, ukuma iaikuspa, nirkakunata:

—¿Imapatak wakaspa killachinakungichi? Chi wambra mana wañuska kanchu. Puñuillami puñuku.

⁴⁰ Uiagkuna, paita asirkakuna. Jesuska, tukuikunata nirka:

—Kanchama llugsiichi—. Nispaka, wambrapa taita i mama i paiwa sugkuna kaskakunallata pusaspa, wambra kaskama iaikugrirka. ⁴¹ Chi wambra makimanda apispa, nirka— Talita kum—. Chi niraiami: “Wambrita, niikimi: atarii”.

⁴² Chasa nigllapika, chi wambra atarirka. Atarispaka, purii kallarirka. Na chungu iska watami iukarka. Chasa kawaspaka, chipi kagkuna iapa mancharispa ujnarirkakuna. ⁴³ Jesuska nirkakunata:

—Chi wambra mikui karaichi—. Kasapasmi nirkakunata— Chasa kawaskata, ujalallapas sugkunata willanakungichi!

Jesús, kikinpa puiblupi wabutii tukuskamanda

6 Chimanda llugsispaka Jesús, kikinpa puibluma chaiagriurka. Paita katiraiagkunapas katirkakuna.

² Warda punchaka Jesús, tandariduru wasima iaikuspa, iapa achkakunata iachachii kallarirka. Paita uiaspa tukuikuna, iapa ujnarispa, kasami kikinpura tapurinaturka:

—Kai runa, ¿maipisik chituku iachaikugrirka? ¿Imawasik chituku suma iachaiwa tukurka? ¿Imawasik chituku mana imaurapas kawaskasina rurai pudí?

³ ¿Manachu karpintiru ka? ¿Manachu Mariapa wambra ka? ¿Manachu Santiago, José, Judas i Simonpa waugkindi ka? ¿Manachu paipa panindikunapas, kaillapita nukanchiwa kankuna?—. Chasa nispaka, Jesusta mana munarkakuna, pai ima iachachikuskata uiangapa.

⁴ Mana uiagmandakuna, Jesuska kasami nirkakunata:

—Santu Ispirituwa rimagtaka sugnigta puriskapi sumaglla kuiaspami uiankuna. Ikuti kikinpa alpapi, kikinpa wasipi, kikinpurakuna mana munankunachu uiangapa.

⁵ Chimanda Jesús, chi puiblupi mana milagrukuna rurarka. Mailla ungugkunata maki churaspa, ambirka.

⁶ Chi runakuna paimanda mana suma uiagmanda, ujnarirka.

Jesús agllaskakunata, pai kachaskamanda

Chimanda llugsispaka, chi suiulla kaugsanakuskata iachachispa purikurka. ⁷ Chungu iska pai agllaskakunata kaiaspa, iska iska kachai kallarirka. Kachakuspaka, paipa iachaita kararkakunata, kuku wairakunata llugsichingapa. ⁸ Kasami nirkakunata:

—Mana apanakuichi tanda, jigra, kulki ñi imapas ñambipa. Tawinalla makipi charirispa riichi. ⁹ Chaki-

kunapi churaridirukar churingichi. Katangapas, imasa churariska kaskallawa ringichi.

¹⁰ Kasapasmi nirkakunata:

—Maikan wasipi iaikuspa, chi wasillapi kangichi, chi puiblumanda sugsinama llugsinkama. ¹¹ Ikuti maipi kamkunata mana chaskingapa u uiangapa munaskakunapagpika, chi puiblumanda llugsikuspa, chakipi alpa llutaraiaskata chabsispa, paikunata willagsina kawachingichi, mana alli rurag kagtakuna.

¹² Chi kachai tukuskakunaka, purii kallarirkakuna, kasa iuiachispa:

—Pandariikunata sakispa, Taita Dioswa tigramuchi—. ¹³ Chasallata, achka kuku wairakunata llugsichispa, achka ungugkunata asitiwa kakuksa ambispa purirkakuna.

Juan Bautista imasa wañuchii tukuskamanda

¹⁴ Jesús iapa suma ruraspa purikuskamanda, tukuipi mi iacharigsamurka. Chasa parlanakuskata uiaspa, mandag Herodeska paimanda nirka:

—Chimi kangapa ka Juan Bautista. Wañuspaka, ikuti kaugsariskami kangapa ka. Chimandami mana imaurapas kawaskasina ruraspa puriku.

¹⁵ Sugkuna, Jesusmanda ninakurka:

—Ñugpamanda Santu Ispirituwa rimag Eliasmi kangapa ka.

Ikuti sugkunaka ninakurka:

—Ñugpata tiarka Santu Ispirituwa rimagkuna; chasallata rimagchar ka.

¹⁶ Herodeska, chasa uiaspa, nikurka:

—Juanmi sutipa kangapa ka. Paipa umata, nukami anchuchingapa kacharkani. Pai Juanmi ikuti kaugsariska kangapa ka.

¹⁷ Manara Jesusmanda iacharigpi, Herodeska kacharka, Juanta apispa, karsilpi churangapa. Erodías suti warmipa kaugsasi chasa rurarka. Chi warmi karkasi Felipepa warmi. Chi Felipe, Herodespa waugkisi karka. Chi warmika, Herodeswasi kasararka. ¹⁸ Chimandasi Juanka, Herodesta piñaspa nikurka:

—Kamta michanmi, kamba waugkipa warmiwa kaugsakungapa.

¹⁹ Chasa piñakugmanda, chi warmi iapa rabiawa munakurka, Juanta wañuchichingapa. Chasa munakuspapas, manasi pudikurka. ²⁰ Kikin Herodeska, Juanda tukuipi allilla rurag i iuiag kagta iachaspaka, paita manhaspa, imasapipas kispichikurka. Juanta uiaspaka, mana iacharikurka ima ruranga. Chasa kagpipas, Juan rimaskata iacharka, kuntintulla uianga.

²¹ Chi warmi imasa iuiakuskasina paimanda puncha, kasasi chaiarka. Herodes tiagsamuska puncha chaiaura, paika, kati mandagkunata, suldadukunata mandagkunata i Galilea alpamanda taitakunata kunbidaspa, achka suma mikui kararkakunata. ²² Tukui kunbidaskakuna kwaspa tianakunkama, chi warmipa sipas warmi wambra, chi ukupi iaikugrispa, iapa sumasi bailarka. Chasa bailagmanda, mandag Herodesta i paiwa mikunakuskata iapasi sumarka. Chiura paika, sipasta nirka:

—Kam ima munaska mañawai; karasakimi—.

²³ Sipasta ikuti kasapassi nirka— Taita Diospa ñawipimi niiki: kam ima mañawaskami karasaki. Nuka mandakuska alpata chaugpipasmi karasaki.

²⁴ Chasa uiaspaka chi sipaska, llugsispa, mamandita tapugrirka:

—¿Imatak mañasa?

Chi warmika ainirka:

—Juan Bautistapa umata mañai.

²⁵ Chasa uiaspaka, kalpalla iaikugrispa, mandagta mañarka:

—Kasami munani: kunauralla Juan Bautistapa umata platupi karawai.

²⁶ Mana pai iuiakuskasina mañagmanda, iapasi llakirigsamurka. Kikin, Taita Diospa ñawipi niskata paiwa kagkuna uianakugmanda, mana alli karka, sipasta: “Mana” ningapa. ²⁷ Chasaka, chiuralla sug suldaduta kacharka, kasa nispa:

—Juanta kunga anchuchispa, umata apagrii—. Chasa uiangallawa, karsilma rispa, umata anchuchigrirka.

²⁸ Chita platupi apaspa, sipastasi kuagrirka. Sipas chaskispa, mamanditasi kuagrirka. ²⁹ Juanwa purigkuna, chasa pasarigta iachaspaka, kuirputa apagrispa, pambagrirkakuna.

Pichka waranga runakunata, Jesús mikungapa karaskamanda

³⁰ Jesús kachaska runakuna, paipagma ikuti chaiagrispaka, tukui imasa ruraspa i iachachispa puriska willagrirkakuna. ³¹ Chipi iapa achka runakuna chaiaspa i llugsispa purinakugmanda, mana iukarkakuna, ñi imasa mikunga. Chimanda Jesuska, pai agllaskakunata nirka:

—Akushi nukanchilla, maipi mana runakuna tiaskama. Chipika samarisunchimi.

³² Chasa paikuna kanuapi iaikuspa, maikan runapas mana kaugsanakuska alpama rirkakuna, paikunalla kangapa. ³³ Rinakugta kawaspaka, achka runakuna, maima ringapa kaskata iachaspa, tukui ladullapi pui-blui suiunigmanda chakillawa kalpaspa rirkakuna. Chasaka, paikunapa ñugpa chaiagrirkakuna. ³⁴ Jesús kanuamanda llugsiura, iapa achka runakuna kawarirka. Sitaska ubijakunasina ñi pipas mana kawangapa tiagsinami karkakuna. Paikunata chasa kawaspaka, Jesús iapa llakirigsamurka. Nispaka, achka imakuna allilla iachachii kallarirkakunata.

³⁵ Ña chisiakuuraka, Jesusta katiraiagkuna, kaillaiaspa, nirkakuna:

—Kai suiu, ñi pipas mana kaugsanakunchu. Ñami chisi ka. ³⁶ Kai runakunata kachai kai suiulla kaugsanakuska wasikunama, mikui randispa mikuchukuna.

³⁷ Jesuska nirkakunata:

—Kamkuna, paikunata mikui karaichi.

Paikunaka ainirkakuna:

—¿Iskai patsa pucha ganaska kulkiwa tanda randig-rispachu paikunata karasunchi?

³⁸ Jesuska nirkakunata:

—Kawagriichi: ¿maituku tandatak tiapungichita?

Kawagrispaka, nigrirkakuna:

—Pichka tanda i iskai chalwallami tia.

³⁹ Chiura, Jesuska nirkakunata:

—Tukuikunata, achka achka, sugllapi sugllapi, suma ugsapi tiarichiichi.

⁴⁰ Chasa uiaspaka, patsa patsa i pichka chungu pichka chungu tiarichirkakunata. ⁴¹ Nigpi Jesuska, chi pichka tandata i iskai chawata charirrispa, awasinama kawaspaka, “Pai Siñur” Taita Diusta nirka. Tandakunata pitichispaka, katiraiagkunata kuaspa richirka, tukui-kunata karaspa apangapa. Iskai chawatapas chasallata tukuikunata karaspa richirka.

⁴² Tukuikunami sagsagta mikurkakuna. ⁴³ Nispaka, chungu iskai saparu junda piti pitikuna tandachirkakuna. ⁴⁴ Chi tandakunata, mai pichka waranga kari-kunami mikurkakuna.

Iaku kuchapi, Jesús chakiwa saruspa awalla puriskamanda

⁴⁵ Tanda puchuskata tandachigllapi, Jesuska paita katiraiagkunata nirka:

—Kanuama iaikuichi. Sug ladu chimba Betsaida pui-bluma ialiiichi. Nukaka, kai tukui runakunata: “Kaia-kama” nispa, kachasakunata—. ⁴⁶ Chi runakunata kachaspaka, sug lumama rirka, paipa Taita Dioswa rimanakungapa.

⁴⁷ Chi tutaka Jesús, sapalla chi lumapi karka. Katiraiagkunaka, kanuapi kucha chaugpipi bugaspa rinakurka. ⁴⁸ Iapa sinchi waira ñugpagnigmanda arkakugmandami iapa saikuska rinakurka. Chasa kawaspaka Jesuska, ña pakaringama, chi iakupi awalla chakiwa saruspa saruspa, paikunapagma ña chaiakugrirka. Paikuna kaska karullapi ialingapa kagsina rigchakurka. ⁴⁹ Paikunaka, chasa iakupi saruspa awalla rikugta kawaspaka, iuianakurka: “Sug wairachar ka”. Iapa mancharispami kaparirkakuna. ⁵⁰ Tukuikunami paita chasa kawarkakuna.

Kaparigllapi, Jesuska nirkakunata:

—Sinchi iuiaichi. Nukami kani. Mana manchanakui-ichi.

⁵¹ Chasa nispaka, paikuna rinakuska kanuapi iaikugrirka. Chiura, wairapas kasillaiagsamurka. Chasa kawaspaka, iapa ujnarigsamurkakuna. ⁵² Jesús tandakunata achkaiachigsamuska ima niraiaskata manara iuiiai apiska kaspami chasa ujnarirkakuna. Paikunapa iuiaika, charami iana tutapisina karkakuna.

Jenesaret alpapi, Jesús ungugkunata ambiskamanda

⁵³ Kucha ialispaka, sug ladu chimba Jenesaret suti alpama chaiagrirkakuna. Chipika, kuchupi kanuata watagrirkakuna. ⁵⁴ Kanuamanda llugsiska kagllapi, chipi kagkunaka Jesusta rigsirkakuna. ⁵⁵ Chi suiulla paipura willanakuspa, kalpalla rirkakuna. Nispaka, ungugkunata chakanakunapi apai kallarirkakuna maipi Jesús kagta iachaskama. ⁵⁶ Maikan atun u uchulla puiblupi, maipi runakuna kaugsanakuskapi, Jesús ialingapa

kaskanigta ungugkunata churarkakuna. Jesús ialikura, ungugkunapas paita mañanakurka:

—Kamba katanga puntallapas sakiwai llamkangapa—. Chiwanka, tukui llamkagkuna ambirigsamurkakuna.

Runakunapa sungumanda jiru iuiiakuna llugsiskami Diuspa ñawipi mapa niraiá

7 Sug fariseokuna i Moisés ima niskata iachachig taitakuna, Jerusalenmanda chaiagripaka, Jesus-pagma kaillaigrirkakuna. ²Jesusta sug katiraiagkuna, mana maki maillarispalla mikunakurka. Chasa, ñugpamandakuna imasa iachachiskasina mana ruranakurka. Chasa kawaspa chi runakunaka, iapa mana allilla paikunamanda rimanakurka.

³(Fariseokuna i tukui judiukunapas, ñugpamandakuna imasa iachachiskasina maki maillarispami mikunakuna. ⁴Chasallata, wasimanda llugsispa, ikuti mainigmandapas chaiagripaka, mana maki maillarispalla mana mikunkunachu. Achka ñugpamandakuna imasa iachachiskasinami chasallata rurankuna; imasami wisinga, manga, iura pailakuna i puñudiru kawitukunata maillai iukankuna: chasa.)

⁵Chasa ruradiru kagmandami chi runakuna, Jesusta tapurkakuna:

—Kamta katiraiagkuna, ¿imapatak ñugpamandakuna imasa iachachiskasina mana ruraspa kaugsanakú? Mana maki maillarispallami mikunakú.

⁶Jesuska ainirkakunata:

—¡Miski simi, sungu awalla rimagkuna! Kamkumandami ñugpata rimag Isaías suti, Santu Ispirituwa kasa sutipa nirka:

Kai alpapi kaugsagkuna, sungu awalla rimaspami kuiawankuna.

Ikuti paikuna sungupi iuiaiwaka nukamanda sugpimi iuianakú.

⁷Iangami nukata kunguriwagsina rurankuna.

Nuka niskata iachachingataka, runapura imasa rurangapa niskallatami iachachinkuna.

⁸Chasa nispaka, nirkakunata:

—Kamkunapas, Taita Dios ima rurangapa willaraiaskata sakispa, ñugpamandakuna iachachiskallata ruraspami kaugsanakungichi.

⁹Kasapasmi nirkakunata:

—Kamkunapa ñugpa iachachiskallata ruraspa kaugsangapaka, Taita Dios ima rurangapa willaraiaskata wabutingichimi. ¹⁰Moiseska, kasami nirka: “Kamba taitata mamandita sumaglla kuiangi”. Kasapasmi nirka: “Maikanpas taitata i mamata kamigpika, chitaka chianmi wañuchingapa”. ¹¹Ikuti kamkunaka, kasami iachachingichi, maikanpa taitata u mamata ningapa: “Nuka mana puidiikichitachu aidangapa. Tukui nuka ima iukaska, ‘Korbán’ u Taita Diusta karaskami niraiá”.

¹²Kamkuna chasa nispami iachachinakungichi, kuna-uramanda taitata i mamata mana kuiaspa aidangapa.

¹³Chasa iachachispa, Taita Dios ima rurangapa willaraiaskataka wabutingichimi. Kamkunapura ñugpamanda

iachachiskallatami ruraspa kaugsangapa munangichi. Achka chasallata rigchakunatami ruraspa kaugsanakungichi.

¹⁴Chasa nispa, tukui chipi kagkunataka ikuti pai kaskama kaiaspa, nirkakunata:

—Tukui runakuna, suma iuiarispa uiawaichi. ¹⁵Runakuna ima mikuskaka, Diuspa ñawipi ñi ima mana mapasina niraiianchu. Runakunapa sungumanda jiru iuiiakuna llugsiskami mapa niraiá. [¹⁶Rinri iukagkuna, nuka niskata uiawaspa, suma iuiaringichi.]

¹⁷Chi runakunata sakispa, wasima chaiagriuraka, Jesusta katiraiagkuna pai chasa iachachiskamanda tapurkakuna. ¹⁸Chiura, Jesuska ainirkakunata:

—Kamkunapas, nukawa kaspera, ¿manarachu iachakungichi ima niraiagta? ¿Manachu iachangichi, ima mikuskapas Diuspa ñawipi mana mapasina niraiagta?

¹⁹Chi mikui, mana sunguma iaikunchu. Wigsamami iaikú. Wigsamandaka, kanchamami llugsí—. (Chasa nispaka, iachachirkami, tukui mikuikunaka alli kagta.)

²⁰Kasapasmi nirka:

—Sungumanda jiru iuiiakuna llugsiskami Diuspa ñawipi mapa niraiá. ²¹Sungumandami jiru iuiiakuna llugsí, kasa pandaringapa: sugpa warmiwa u sapalla warmiwa siriringapa, sisangapa, wañuchingapa, ²²sugkunapata kichungapa munaringapa, jiru mana allilla ruraikuna rurangapa, llullachingapa, tukui mana allilla ruraspa kaugsangapa, sugkunata jiru iuiaiwa kawangapa, Taita Diusta kamingapa, iapa atun iuiakunawa tukungapa, Taita Dios iuiachiskakunata mana uiaspalla upasina puringapa. ²³Tukui chasa pandaringapaka, sungumandami jiru iuiiakuna llugsí. Chasa pandariikunami Diuspa ñawipi mapa niraiá.

Mana judíu kag warmipa wambrata, Jesús ambiskamanda

²⁴Chimanda llugsispa, Jesuska Tiro suti puiblu suiu nirka. Chipi chaiagripaka, sug wasipi iaikugrirka.

Kikinka munakurka, pipas mana iachachu chaiagrigta. Chasa munakugpipas, mana pudirka pakalla kangapa.

²⁵Paimanda iacharigllapi, sug warmi, paipagma rispa, kungurigrirka. Chi warmipa warmi wambra, kuku waira iaikuska karka. ²⁶Chi warmi mana karka Israel-manda. Sirofenisia suti alpamanda karka. Kungurispa, Jesusta mañarka:

—Nukapa wambramanda kuku wairata llugsichipuai.

²⁷Jesuska nirka:

—Ñugpa, wasimanda wambrakuna mikuchukuna sagsagta. Mana chianchu, wambrakunapa tandata kichuspa, alkukunata sitapungapa.

²⁸Chiura, chi warmika ainirka:

—Ari, taita turi. Wambrakuna mikunakuskapi, misa ukuma piti urmaskakunata, alkukunapasmi mikunakuna.

²⁹Chasa uiaspa, Jesuska paita nirka:

—Allillami ainiwarkangi. Kuku waira, ñami kamba wambramanda llugsirka. Kunaura riilla kambagpa.

³⁰ Chi warmi paipagma chaiagriuraka, paipa wambraka allilla sirikuskatami tarigrirka, kuku waira ña llugsiska.

Sug runa mana uiai i mana allilla rimai pudigta, Jesús ambiskamanda

³¹ Tiro puiblunigmanda llugsispaka, Sidón suti puibluta Dekápolis puiblukunanigtapas ialispa, Galilea kuchama ikuti chaiagrirka. ³² Chipi kagkunaka, sug runa mana uiai i mana allilla rimai pudigta Jesus-pagma pusarkakuna, kasa nispa:

—Kai runata maki churapuai, ambiriska kangapa.

³³ Chiura Jesuska, runakunapa sugllapi kaskata sapa-llata karuajma pusarka. Nispaka, paipa iskandi rinri utkupi paipa didu churarka. Chasallata, makipi tuka churaspa, paipa kallupi ialichirka. ³⁴ Nispaka, awasinama kawaspa, sinchi samai kachaspa, nirka:

—Efata—. (Chi niraiami: “Paskarichu”).

³⁵ Chasa nigllapi, chi runapa rinrikuna allilla uiarka. Kallupas, allilla rimai kacharirirka. ³⁶ Chipi kagkunata, Jesuska nirka:

—Kamkuna kawaskata mana ñi pitapas willanakungichi.

Maituku “Mana willanakungichi” nigpipas, kawagkuna, mana uiaspalla, iapa ujnarispa, tukuipimi parlai apanakurka, ³⁷ kasa nispa:

—Tukuipimi iapa suma allilla, Jesús rurá. Mana rinri uianakugtapasmi uiangapa ambí. Mana rimai pudiskakunatapasmí rimangapa ambí.

Iskai biajima, Jesús tandakunata achkaiachiskamanda

8 Chi punchakuna, iapa achka runa tandariskakuna kaspaka, ikuti mana iukarkakuna ima mikungapa. Nigpi Jesuska, katiraiagkunata kaiaspa, nirkakunata:

² —Kai tukui runakuna, ña kimsa punchami nukawa kaipi kankuna. Paikuna ñi ima mana mikungapa iukag-manda, nukata iapami llakiriwagsamú. ³ Sugkuna, karumandami kankuna. Paikunata mana mikui karaspalla kikinkunapagma nuka kachagpika, ñambi rinakuskallapimi diarkai sambaiaspa urmagringakuna.

⁴ Katiraiagkuna ainirkakuna:

—Kai maikan runapas mana kaugsanakuskapi, paikunata, ¿imawatak iarkai anchuchisunchi?

⁵ Jesuska tapurkakunata:

—¿Maituku tandatak tiapungichita?

Chiura ainirkakuna:

—Kanchis tandallami tia.

⁶ Chasa uiaspa, Jesuska chipi kagkunata nirka:

—Alpapi tiariichi—. Nispaka, chi kanchis tandata charirrispa, “Pai Siñur” Taita Diusta nirka. Chiuralla piti-chispa, katiraiagkunata kuaspa richirka. Paikunaka, tukuikunata karaspa aparkakuna.

⁷ Sug uchulla chawakunapasmi tiapurkakunata. Chikunatapasmí chasallata makipi charirrispa, “Pai Siñur” Taita Diusta nirka. Nispaka, katiraiagkunata nirka:

—Tukuikunata karaichi.

⁸ Tukuikunami sagsagta mikurkakuna. Nispaka, kanchis saparu junda piti pitikuna tandachirkakuna. ⁹ Mai chusku waranga runakunami mikurkakuna.

Chiuramanda Jesús, chi runakunata: “Kaiakama” nispa, kacharkakunata. ¹⁰ Kachangallawa, katiraiagkunawa kanuapi iaikurkakuna. Chimandaka, Dalmanuta suti alpama rirkakuna.

Mana kawaskasina kawachimui, Jesusta mañanakuskamanda

¹¹ Chi alpama chaiagriuraka, fariseokuna, kaillaiagrispa, Jesuswa kallarirkakuna sinchi rimanakungapa. Paita mañanakurka, mana imaurapas kawaskasina awa luarmanda kawachingapa; chasaka, paimanda iachangapa, sutipa Taita Dios kachamuska kagta.

¹² Jesuska, llakirrispa, sinchi samai kachaspa, nirkakunata:

—¿Imapatak kai punchakunamanda runakuna mañawanakungichi: “Mana kawaskasina kawachiwai”? Kasami nuka niikichita: ñi imapas mana kamkuna munaskasina kawangapa kangichichu.

¹³ Chasa nispaka, paikunata sakispa, ikuti kanuapi katiraiagkunawanta iaikuspa, llugsirkakuna, kucha sug ladu chimba ialingapa.

¹⁴ Katiraiagkuna kungariska karkakuna, tanda apan-gapa. Kanua ukupi, sug tandallami tiapurkakunata.

¹⁵ Ña kuchapi rinakuura, Jesuska nirkakunata:

—Suma iuiarispa uiawaichi. Fariseokunapa i Herodespa libadurasina iuiaita, ¿ujalallapas iuianakungichi!

¹⁶ Chasa uiaspaka, kikipura rimarinakurka, iuiaspa: “Tanda mana apamuskamandami chasa nukanchita niku”.

¹⁷ Chi rimarinakuskata uiaspa, Jesuska nirkakunata:

—¿Imapatak ninakungichi: “Tanda mana apamuskamandami chasa nukanchita niku”? ¿Imawantak, uia-waspapas, kamkunapa umapika manara iaikú? Kamkunapa iuiatika, ¿charachu amsapisina kangichi?

¹⁸ Ñawi iukaspapas, ¿charachu mana kawagsina kangichi? Chasallata, rinri iukaspapas, ¿charachu mana uiagsina kangichi? ¹⁹ ¿Manachu iuiaringichi, nuka pichka tandata pitichiuraka, pichka waranga runakuna mikugtakuna? Chi puchuskakunataka, ¿maituku saparu jundatak tandachirkangichi?

Paikunaka ainirkakuna:

—Chunga iskai saparu.

²⁰ Jesuska tapurka:

—Chasallata, nuka kanchis tandata pitichiuraka, chusku waranga runakuna mikurkakuna; chi puchuskakunataka, ¿maituku saparu jundatak tandachirkangichi?

Ainirkakuna:

—Kanchis saparu.

²¹ Chasa ainiura, Jesuska nirkakunata:

—Chasa kagpipas, ¿manarachu kamkunapa iuiapi iaikú?

Sug runa mana ñawi kawagta, Jesús ambiskamanda

²² Chiuramandaka, Betsaida puibluma ikuti chaiagrirkakuna. Chipika, sug runa mana ñawi kawagta Jesus-pagma pusaspa, mañarkakuna, kasa nispa:

—Kamba makiwa kai runata llamkapuai, ambiringapa.

²³ Chiura Jesuska, chi mana ñawi kawagta maki-manda apispa, chi puiblumanda sugsinama pusarka. Chaiachigrispaka, paipa tuka makipi churaspa, ñawipi llamkarka. Nispaka, paita maki churaspa, tapurka:

—¿Ñachu imapas kawangi?

²⁴ Chiura ainirka:

—Runakunaka, sachakunasina purinakugtami kawakuni.

²⁵ Ikuti Jesús, ñawipi maki churarka. Chasa churaura, mas allilla tukugsamurka. Chasaka, tukui allilla ñawiwa kawai kallarirka. ²⁶ Chiura Jesuska, wasima paita kacharka, kasa nispa:

—¡Ujalallapas puiblupi kutikungi!

Kam, Dios agllaska Cristomi kangi, Pedro Jesusta niskamanda

²⁷ Chimandaka, Filipopa Sesarea suti suiu paita kati-raiagkunawanta purinakurka. Ñambi rinakuskapika, Jesús tapurkakunata:

—Maikankuna nukamanda, ¿pitak kagta ninkuna?

²⁸ Paikunaka ainirkakuna:

—Sugkuna ninkunami: kam kangisi Juan Bautista. Sugkunaka: kam ñugpamanda rimag Elías; ikuti sugkunaka, maikan ñugpamanda Santu Ispirituwa rimagsi kangi.

²⁹ Chiura, Jesús tapurkakunata:

—Kamkunaka nukamanda, ¿pi kagtatak niwangichi?

Chasa tapuura, Pedroka ainirka:

—Taita Dios agllaska Cristomi kangi.

³⁰ Pedro chasa niura, Jesuska paikunata nirka:

—Mana pitapas nukamanda chasa willanakungichi.

Jesús imasa wañungapa kagta, pai musuglla willaskamanda

³¹ Nispaka iachachii kallarirkakunata, kasa nispa:

—Kai Runa Tukuskataka iapa llakii i nanai iukangapami chaiawaku. Iaia sasirdutikuna, Moisés ima niskata iachachig taitakuna i sug taitakunapas wabutiwangapami kankuna. Nukata wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani—. ³² Chasa nikurka, katiraiagkuna allilla iachangapa.

Chasa uiaspa Pedroka, Jesús sapallata mana uianakuskama pusaspa, piñaimi kallarirka. ³³ Chiura Jesuska, tigrarispá, katiraiagkunata kawaspa, Pedrotaka piñar-ka, kasa nispa:

—Nukapa ladumanda, iaia kuku, anchurii. Kam mana iuiakungichu Taita Dios imasa iuiakuskasina. Runakunapa iuiailawami chasa iuiakungi.

³⁴ Chasa nispaka, achka runakunata paita katiraiagkunawanta kaiaspa, nirkakunata:

—Maikan nukata katiraiawangapa munagka, kikin-manda kungarichu. Paipa krusta markarigsina ruras-pami iuká katiraiawanga. ³⁵ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda i Alli Willaimanda wañuchii tukugpika, mana mas wañui kaugsaitami taringapa ka.

³⁶ —Sug runa tukui kai alpapi ima munaska iukagpipas, paipa almata mana kispichigpika, chi iukaskakuna ñi imapa mana balipungapa kanchu. ³⁷ Chi runaka, paipa almata chingachispaka, ¿imawatak pudingapa ka, ikuti taringapa? Ñi imawapas manima.

³⁸ —Taita Diusta ñi imapa mana iuiarispá, mana allilla ruraspa purinakug runakunawami kamkuna kaugsanakungichi. Chi runakunapa ñawipi maikanpas nukamanda i nukapa rimaikunamanda unzaspa, “Mana rigsinichu” nigkunata, nukapasmi chasallata ruras. Kai Runa Tukuska samuura, nukapa Taita suma atunia-chiskawami tukuiipi alli anjilkunawa samungapa ka. Chiura samuspami, maikan nukamanda wabutispa, “Mana rigsinichu” nigkunata, chasallata nukapas ningapa kani.

9 Kasapasmi nirkakunata:

—Kasami nuka niikichita: maikan kaipi kagkuna manara wañugkuna, tukui imasa Diospa suma mandai chaiamugtami kawangapa kankuna.

Jesús, sug rigcha kawari tukugsamuskamanda

² Chiuramanda sugta punchapika, Pedrota, Santiagota i Juanta pusaspa, sug awa lumama paikunallawa sikagrirká. Chipi chaiagrispaka, paikuna kawanakugllapi, sug rigcha kawarimi tukugsamurka. ³ Paipa katanga, iapa iura punchallami tukurka, kai alpapi ñi maikan katanga tagsag mana chasa iuraiachii pudingasina.

⁴ Kawanakugllapi, Elías i Moisés kawarigsamurkákuna. Chi runakunaka, Jesuswa rimanakui kallarirkákuna. ⁵ Chasa kawaspaka, Pedroka Jesusta kasami nirka:

—Iachachig taita, kaipi iapa alli iuiachimi kanchi.

Kimsa tambu kaipi rurasunchi: kammanda sug, Moisesmanda sug, sugka Eliasmanda—. ⁶ Tukui kimsandikuna iapa manchaiwa kaspami mana imapas iuiarispalla Pedro chasa nirka.

⁷ Chiura puiulla, paikunata kilpagsamurka. Chi puii ukumanda sug rimagta uiarigsamurka, kasa nispa: —Kai, nukapa kuiaska wambami kapuá. Paita uia-puangichi.

⁸ Paikuna ikuti muiugta kawaura, Jesuska ikuti sapalla kawarigsamurkakunata; sugkunaka manima.

⁹ Chi lumamanda uraikunakuuraka, Jesuska nirkakunata:

—Kamkuna ima kawaskata mana pitapas willanakungichi. Kai Runa Tukuska wañuspa kaugsariskauramandami chasa kawaskata willankungichi.

¹⁰ Chasa paikuna uiaspaka, ñi pita mana willarkákuna. Chi kimsandikunaka tapurinakurka:

—Chi “wañuspa, ikuti kaugsariska”, ¿imatak ni-raiá?—. ¹¹ Nispaka, Jesustaka tapurkakuna— ¿Imapatak Moisés ima niskata iachachig taitakuna ninkuna: “Eliastami chaiaku, Taita Dios agllaska Cristopa ñugpa samungapa?”

¹² Chiura, Jesuska ainirkakunata:

—Sutipami Elías ñugpa samungapa ka. Tukuimi allchigsamungapa ka. Chasa samungapa willaraiaskaka, allillami ka. Kasapasmi ñugpamanda librupi willaraiá: Runa Tukuska, achka llakii i nanai iukaspá, wabutiimi tukungapa ka. ¹³ Nukaka, kasami niikichita: Elías ñami samurka. Paitaka imasa munaskasinami mana allilla rurarkakuna, imasa paimanda willaraiaskasina.

Sug wambra wañui ungui iukaskata, Jesús aliachiskamanda

¹⁴ Jesús chi kimsandikunawa paita katiraiagkunapagma chaiagriura, iapa achka runakuna paikunapa muiugta saianakugtami kawagrirkakuna. Paita katiraiagkunawa Moisés ima niskata iachachig taitakunawa sinchi rimanakurka. ¹⁵ Tukui chipi kagkunaka, Jesusta kawaspá, iapa ujnarirkakuna. Nispaka, paipagma kalpalla rirkakuna, “Puangi” ningapa. ¹⁶ Chiura, Jesuska tapurkakunata:

—¿Imatak chikunawa sinchi rimanakungichi?

¹⁷ Chi runakunapuramanda sug runaka, Jesusta ainirka:

—Iachachig taita, nukapa wambratami kambagma pusamurkani. Paita, sug kuku wairami iaikupuarka. Chimandami mana rimangapa pudipúa. ¹⁸ Chi kuku waira, paipa kagsina, imaurapas apispa, alpapimi urmachipúa. Chiura, tuka sitaspa, kiru mukuspa, kanirispami kallari. Nispaka, wañuskasinami tukugsamú. Chimandami kamta katiraiagkunata mañagsamurkani: “Chi kuku wairata llugsichipuaichi”. Nigpika, paikuna manima llugsichipuangapa pudirkakunachu.

¹⁹ Jesuska, paikunata nirka:

—¡Ai, kam runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka— Chi ungupta, kaima pusamuichi— nirka.

²⁰ Chiura, wambrata Jesuspagma pusarkakuna. Kuku wairaka, Jesusta kawangallowami wambrata iapa chabsichigsamurka. Chiwanka, alpapi urmaspa, tukui-ma builtiarikurka, tuka sitaspa. ²¹ Chiura Jesuska, taitandita tapurka:

—¿Maituku unaitak chasa ungui iuká?

Chiura ainirka:

—Uchullauramandata. ²² Achka biajimi chi kuku waira, nina ukupi i iakupi urmachipúa, paita puchukangapa. Kamka, imallapas pudispaka, nukanchimanda llakirispá, aidawai.

²³ Jesuska nirka:

—¿Imapatak niwakungi: “Kamka, imallapas pudispaka, aidawai”? Maikanpas nukamanda suma iuiawagtaka tukui imapas allillami tukugsamú.

²⁴ Chasa nigllapi, chi wambrapa taitaka, kaparispá, nirka:

—Ari, kammanda sumami iuiani. Aidawai, mas iuiaringapa.

²⁵ Achka runakuna, chima kalpa chaianakugrirka. Chasa kawaspá, Jesuska chi mana alli kuku wairata sinchi piñarka, kasa nispa:

—Kam kuku waira mana rimangapa i mana uian-gapa sakigtami niiki: wambramanda llugsii. Mana mas ikuti iaikugsamungi.

²⁶ Chasa niuraka, kaparichispa, ikuti iapa chabsichispa, llugsirka. Chiura chi wambra, wañuskasina tukugsamurka. Chasa kawaspaka, achkakuna ninakurka:

—Wañuskami ka—. ²⁷ Jesuska, chi wambrata maki-manda apispa, atarichirka. Chiuralla, allilla saiarig-samurka.

²⁸ Chiuramanda Jesuska, sug wasipi iaikugrirka. Chipika pai sapalla kaura, paita katiraiagkunata tapurkakuna:

—¿Imawantak nukanchika mana pudirkanchi, chi kuku wairata llugsichingapa?

²⁹ Chiura, Jesuska ainirkakunata:

—Taita Diusta sinchi mañaskakunawami chi kuku wairakunata llugsichingapa pudiri.

Jesús imasa wañungapa kagta, pai parisma willaskamanda

³⁰ Chimanda llugsispaka, Galilea alpata ialinakurka. Chita ialinakuspa, Jesús munarka, mana pipas iachachukuna. ³¹ Katiraiagkunatami iachachispa rikurka, kasa nispa:

—Kai Runa Tukuskaka, mana alli runakunapagmami chaiachii tukungapa ka. Paikunaka wañuchi-wangapami kankuna. Chasa wañuska kaspapas, kimsa punchapika ikutimi kaugsaringapa kani.

³² Chasa niskata uiaspaka, katiraiagkuna mana iacharkakuna ima niraiagta. Chi uiaskata mana iachaspapas, manhaspa karkakuna, ima niraiagta Jesusta tapungapa.

Maikan mas atun taita kangapa, Jesús iachachiskamanda

³³ Kafarnaum puibluma chaiagrispaka, wasima iaikurkakuna. Chipika, Jesuska tapurkakunata:

—Ñambi samunakuskapi, ¿imatak sinchi rimanakurkangichi?

³⁴ Paikunaka, upalla tianakurka. Ñambi rinakuskapika, kikipura sinchi rimarinakurka, kasa iuiarispá: “Nukanchimandaka, ¿pisik mas atun taita tukuska niraianchi?”

³⁵ Chimanda Jesuska, tiarispá, chungá iskaí pai agllaskakunata kaiaspa, nirkakunata:

—Maikan mas atun taita kangapa munagka iukanmi ñugpa mas uchullasina, tukuikunapa lutrinsina kanga.

³⁶ Chasa nispaka, sug uchulla wambrata kaiaspa, chaugpipi saiachirka. Chi wambrata ugllaspa, paikunata nirka:

³⁷ —Maikanpas kai uchullatasina nukamanda iuiarisa chaskigpika, nukata chaskiwagsinami rurá. Chasa chaskiwaspaka, mana nukallata chaskiwag niraiachu. Nukata kachamuwagtapasmi chaskig niraiá.

Jesumanda iuiarisa, sugkuna allilla ruranakuska-manda

³⁸ Juanka, Jesusta kasami nigirika:

—Iachachig taita, sug runa kamba sutiwami kuku wairakunata llugsichikugta kawarkanhi. Pai mana nukanchiwa sugllapi purig kagmanda, nukanchika nir-kanchimi: “Mana chasa rurakui”.

³⁹ Jesuska, katiraiagkunata ainirka:

—Ianga kawangichi. Maikan nukapa sutiwa suma mana imaurapas kawaskasina ruragkuna, nukamanda tukuipi allillami rimankuna. ⁴⁰ Maikanpas mana nukanchita piñagkuna, nukanchiwa suma iuiaiwami kankuna. ⁴¹ Kasami nuka niikichita: maikanpas kamkunata, Cristota katiraiagmanda iuiarisa, sug kuashag chiri iakullapas karagpika, Taita Dios, pai-manda mana kungaringapa kanchu.

⁴² —Ikuti maikanpas kasa uchulla nukamanda suma iuiawagta pandachipuagpika, paita chaiantrami, sug atun kutanga rumi kungapi walkachispa, atun kucha iakuma sitagringapa. ⁴³ Kamba makiwa pandaringapa chaiagpika, chita chaianmi kuchungapa, mana pandaringapa. Chasapaka, mas allichar kantra, maki kuru suma luarma iaikugringapa. Mana kagpika, ¿iskandi makikunawantachu munaipa, atun nina ñi imaurapas mana wañungapa kaskapi kaugsagringapa? [⁴⁴ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.]

⁴⁵ —Chasallata, kamba chakiwa pandaringapa chaiagpika, chita chaianmi kuchungapa, mana pandaringapa. Chasapaka, mas allichar kantra, chaki kuru suma luarma iaikugringapa. Mana kagpika, ¿iskandi chakikunawantachu munaipa, diltudupa ninama sitai tukungapa? [⁴⁶ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.]

⁴⁷ —Ikuti chasallata, kamba ñawiwa kawaspa pandaringapa chaiagpika, chita chaianmi surkungapa, mana pandaringapa. Chasapaka, mas allichar kantra, suglla ñawillawapas Taita Dios suma mandakuskama iaikugringapa. Mana kagpika, ¿iskandi ñawikunawantachu munaipa, diltudupa ninama sitai tukungapa? ⁴⁸ Chipika, kuru kuirputa mikugkuna mana wañungapa kanchu. Ninapas chasallata ñi imaurapas mana wañungapa kanchu.

⁴⁹ Kasapasmi Jesús nirka:

—Tukuikuna alli kangapaka, ninapi rupakugsina llakiiwami kangapa kankuna, kaugsankama.

⁵⁰ —Kasapas. Kachi, allillami ka. Kachi wagllirigpika, mana pudiringachu kachiachingapa. Imasa allilla kachiwa mikuita kachiachigsina, kam kikinpura tukuipi sumaglla kaugsangichi, mana piñachirinakuspalla.

Kusa kikinpa warmita mana sitangapa, Jesús iachachiskamanda

10 Chi puiblumanda llugsispaka, Jordán iaku sug ladu chimba ialispa, Judea alpama chaigrirrakuna. Chipika, ikuti achka runakuna tandarirkakuna. Chiura chi runakunata, Jesús iachachii kallarirka; imasami iachachidur karka: chasallata. ² Chi iachachikunkama, sug fariseokunapas kaillaigrirrakuna. Chi runakunaka, Jesusta pandachingapa iuiaiwa tapurkakuna, kasa nispá:

—¿Sug runa pudinchu, kikinpa warmita sitangapa?

³ Chiura, Jesuska tapurkakunata:

—Moiseska, ¿imatak kamkunapa ñugpamandakunata nirka?

⁴ Chiura, paita ainirkakuna:

—Moiseska sakirka, kusa, sug iskribiska warmita kuaspaka, ña paitaka sitaska niraiangapa.

⁵ Jesuska nirkakunata:

—Kamkuna upa iuiai tukuska kagmandami Moisés kamkunata chasa rurangapa sakirka. ⁶ Taita Dioska, ñugpata kai alpata wiñachispa, “Kari i warmimi rurarka. ⁷ Chimandami, kari kagpi, paipa taitata mamandita sakispa, paipa warmiwa iskandikuna sugllasina tukugsamungapa kankuna”. ⁸ Chasa kaspaka, mana iskai niraiachu. Suglla tukuskami niraiá. ⁹ Taita Dios chasa suglla tukuska niraiaskata, ñi maikan runapas mana iukanchu, “Sitanakui” ninga.

¹⁰ Chiuramandaka wasipi kagriura, Jesusta katiraiagkuna chasa pai iachachikuskamanda ikuti tapugrirrakuna. ¹¹ Chiura, Jesuska ainirkakunata:

—Maikanpas, kikinpa warmita sitaspa, sug warmiwa kasaragpika, ñugpa warmimanda kuntra atun pandariimi rurá. ¹² Chasallata maikan warmi, paipa kusata sitaspa, sug kariwa kasaragpika, atun pandariimi rurá.

Wawakunata, Jesús maki churaskamanda

¹³ Suura uchullakunata, paikunapa atunkuna Jesus-pagma pusarkakuna, paikunata maki churaspa, Taita Diusta paikunamanda mañangapa. Jesusta katiraiagkunaka, pusanakugta piñaspa, nirkakuna:

—Mana kaillaianakuichi.

¹⁴ Chasa kawaspa Jesuska, paita katiraiagkunata rabiawa piñaspa, nirka:

—Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna.

¹⁵ Kasami nuka niikichita: maikanpas mana Diospa ñawipi kai uchullakunasina allilla tukugsamugpika, mana suma luarma iaikugringapa kankunachu.

¹⁶ Chasa nispaka, wawakunata ugllaspa, paikunata maki churaspa, nirka:

—Taita Dios, kamkunata iapa kuiaspa kawapuachu.

Sug iapa iukag runa, Jesuswa rimanakuskamanda

¹⁷ Chimanda ñambi llugsikuskapika, sug runa, kalpaspa, Jesuspa ñugpa ladu kungurigrirka, kasa tapuspa:

—Alli iachachig taita, ¿imasatak iukani ruranga, mana puchukariduru suma kaugsaita taringapa?

¹⁸ Jesuska ainirka:

—¿Imapatak nukata: “Alli iachachig taita” niwakungi? Maikanpas mana alli tianchu. Taita Diosllami alli ka.

¹⁹ Moisés ima niskata ñami iachangi: “Mana wañuchingi. Mana sugpa warmiwa siriringi. Mana sisangi. Mana pimandapas llullangi. Imapas mana llullachispa sisangi. Kamba taitata mamandita sumaglla kuiangi”.

²⁰ Chiura, chi runa ainirka:

—Iachachig taita, nuka uchulla kauramandatami tukui chi niskata chasa ruraspa kaugsani.

²¹ Jesuska, paita kuiaiwa kawaspa, nirka:

—Nigpika, kasami pisipukungi. Kunauralla rii. Tukui ima iukaskata katugrii. Katuska kulkitaka mana iukaskakunata tukuita karagrii. Chasa ruraspaka, suma luarpika iapa iukagmi tukungapa kanggi. Nispaka samungi, nukata katiwangapa.

²² Chasa rimaskata uiaspaka, chi runa llakirirka. Irkiaspami rirka, iapa iukag kaspaka. ²³ Jesuska, muiugta kawaspa, katiraiagkunata nirka:

—Iapa iukagkuna suma luarma iaikugringapaka, iapa trabajusumi kangapa ka.

²⁴ Chasa uiaspa, katiraiagkunaka iapa ujnariirkakuna. Jesuska, ikuti nirkakunata:

—Wambrakuna, iapa trabajusumi ka, suma luarma iaikugringapa. ²⁵ Maschar alli kantra, sug wagra, † sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁶ Chasa uiaspaka katiraiagkuna, iapa mancharispa, kikinpura tapurinakurka:

—Nigpika, ¿pisik kispiringapa pudinga?

²⁷ Chiura Jesuska, paikunata kawaspa, nirka:

—Ñi maikan runa mana pudinchu. Taita Diosllami kispichingapa pudí. Taita Diosmi imapas pudí.

²⁸ Chiura Pedroka, nii kallariirka:

—Uiamui. Nukanchi, tukui ima iukaskata sakispami kamta katiraiianchi.

²⁹ Jesuska ainirka:

—Kasami nuka niikichita: maikanpas, nukata i Alli Willaita kuiaspa, wasita, waugki i panikunata, mama i taitandita, wambrakunata, alpakunata u ima iukaskata sakispa katiwagka, ³⁰ patsamanda mas patsami kai alpapita chaskingapa kankuna. Chasallata wasikuna, waugki i panikunata, mamandikunata, wambrakunata i alpakunatapasmii chaskingapa kankuna, nukata katiraiawagmanda llakii pasaspa. Suma luarpipas, mana puchukariduru kaugsaitapasmi tarigringapa kankuna.

³¹ Chasa kagpipas, kunaure ñugpa niraiaskakuna, achkakunami kati laduma tukungapa kankuna. Ikuti kunaure kati niraiaskakunaka, achkakunami ñugpa laduma tukungapa kankuna.

† griego rimaiwa: kamello suti atun animal.

Jesús imasa wañungapa kagta, pai kimsama willaskamanda

³² Chiuramanda, Jerusalén puibluma ñambi rinakurka. Jesuska ñugpa rikurka. Paita katiraiagkunaka, ujnarispa kati kati rinakurka. Sug runakunaka, manchaspami katichinakurka. Jesuska, ikuti chungu iskai pai agllaskakunallata kaiaspa, ima paita pasaringapa kagta willai kallariirka, kasa nispa:

³³ —Uiawaichi. Jerusalemami rinakunchi. Chipika, kai Runa Tukuskaka iaia sasirdutikunapa i Moisés ima niskata iachachig taitakunapa makipimi apichii tukungapa ka. Chi runakunaka, nukamanda ningapami kankuna: “Wañuchiimi chaiá”. Nispaka, mana judíu kaskakunapagmami chaiachiwangapa kankuna. ³⁴ Paikuna, nukata unżawaspa, tukawaspa, asutiwaspa, wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

Zebedeopa wambrakuna, ima Jesusta mañanakuskamanda

³⁵ Zebedeopa wambrakuna, Santiago i Juan suti, Jesuspagma kaillaiaspaka, kasami nirkakuna:

—Iachachig taita, nukanchi ima mañanakuskata, ¿manachu uiawantrangi?

³⁶ Chiura, Jesús tapurka:

—¿Imatak munanakungichi, nuka rurangapa?

³⁷ Chiura ainirkakuna:

—Kam sumaglla mandangapa tiarispa chaiaura, nukanchita tiarichingi: sugtaka kamba alli ladu, sugtaka kamba lluki ladu.

³⁸ Jesuska nirkakunata:

—Mana iachangichichu ima mañanakugta. Nukata chaiawangapami ka, iapa achka llakiiikuna †† iukangapa. ¿Kamkunapaschu chasallata pudinrangichi, llakiiikunata pasangapa? Chasallata, nukata chaiaawangapami ka, wañuchii ‡ tukungapa. ¿Kamkunapaschu chasallata pudinrangichi, wañuchii tukungapa?

³⁹ Chiura ainirkakuna:

—Ari, chasa pudingapami kanchi.

Jesuska nirkakunata:

—Ari, nuka llakiiikunasinallatata, kamkunapasmi pasankangichi. Imasami nuka wañuchii tukungapa kani: kamkunapasmi chasallata wañunkangichi. ⁴⁰ Chi nukapa alli ladu lluki ladu tiarichingapaka, nukata mana chaiawakunchu kawangapa. Maikan nukapa Taita agllaskakunatami chasa tiarichingapa ka.

⁴¹ Santiago i Juan ima mañanakuskata uiaspaka, chi sug chungu katiraiagkuna rabiarii kallariirkakuna. ⁴² Jesuska, paikunata kaiaspa, nirkakunata:

—Kamkuna allillami iachangichi: kai alpapi atun mandagkuna, mandanakuskapi kaugsagkunata ñi ima mana llakispallami mandankuna. Chasallata, maikanpas atun mandagsina tukuspa, mana llakispallami

†† “Sug winja kupata upiangapa”, iapa achka llakiiikuna iukangapami niraiá. ‡ “Sug bautismuta chaskingapa”, wañuchii tukungapami niraiá.

runakunata charinkuna. ⁴³ Kam kikipuraka, chasa rurag runakunaka mana kangichi. Kam kikipura maikan, Diuspa ñawipi atun kangapa munaspaka, sugkunapa lutrinsina tukuchu. ⁴⁴ Maikan mas atun taita kangapa munagpas, ñugpa iukanmi, tukuikunapa lutrinsina kanga. ⁴⁵ Chasallata kai Runa Tukuskaka mana samurkachu, sugkunata lutrinsina churangapa. Tukuikunapa lutrinsina kangapami nuka samurkani. Nukapa wañuiwami achkakunata kispichingapa kani.

Sug runa mana ñawi kawagta, Jesús aliachiskamanda

⁴⁶ Jesús katiraiagkunawanta, Jerikó suti puibluma chaiagrirkakuna. Iapa achka runakuna, paita katichirkakuna. Chimanda lluginakuura, sug runa mana ñawi kawag, limusna mañaspa, ñambi kuchupi tiakurka. Chi runa, Timeopa wambra Bartimeo suti karka. ⁴⁷ Chi runaka, Nazaretmanda Jesús ña ialikugta uiaspa, kaparii kallarrirka, kasa nispa:

—Davidpa wambra Iaia Jesús, nukamanda llakirii.

⁴⁸ Achka runakuna, paita piñaspa, ninakurka:

—Upalla kai.

Paika, ikuti mas sinchimi kaparii kallarrirka, nispa:

—Davidpa wambra, nukamanda llakirii.

⁴⁹ Chasa uiaspa Jesuska, saiarispa, nirka:

—Paita kaiamuichi.

Chi runata kaiaspaka, nirkakuna:

—Alli iuiachirispas, atarii. Kamtami kaiaku.

⁵⁰ Chasa uiaspaka, kataraiaska katangata sitaspa, utkalla Jesuspagma chaiagrirka. ⁵¹ Chaiagriura, Jesuska paita tapurka:

—¿Imatak munakungi, nuka kamta rurangapa?

Chiura ainirka:

—Nukapa iachachig taita, nuka kawangapami munakuni.

⁵² Chiura, Jesuska nirka:

—Kam nukamanda suma iuiariskamandami ambirig-samungi. Kunaura kambagma riilla.

Chasa nigllapi, allilla kawai kallarrirka. Nispaka, Jesús maima rikuskama katii kallarrirka.

Jerusalén puibluma, Jesús iaikugriskamanda

11 Jerusalenma ña kaillanakupuspa, Betfajé i Betania suti puiblukuna ña kawariskamanda, Olivos suti lumakama chaiagrirkakuna. Chimanda Jesuska, iskai katiraiagkunata kacharka, ² kasa nispa:

—Riichi chi ñugpa ladu uchulla puibluma. Chaiagriskapaka, tarigrinkangichimi sug buru wataraiaskata, manara pipas tiariska. Chi buruta paskaspa, apamungichi.

³ Maikan tapuchu: “¿Imapatak chasa ruranakungichi?": chiura ainingichi: “Iaia Jesustami ministiku. Mañachii. Ñami kutichimunga”.

⁴ Chi kachai tukuskakunaka, rispa, sug wasi ladullapi buru wataskata tarigrirkakuna. Chitaka paskarkakuna.

⁵ Chipi kagkunaka tapurkakuna:

—¿Imapatak buruta paskanakungichi?

⁶ Chiura, Jesús imasa niskasina ainirkakuna. Chasa uiaspaka, sakirkakuna apangapa.

⁷ Chiura, buruta Jesuspagma aparkakuna. Chaiachigriskapaka, burupa wasapi paikunapa katangakunata churarkakuna. Chasapika Jesús, tiarispas, rii kallarrirka.

⁸ Chasa Jesús rikugta kawaspa, achka runakuna, paikuna kataraiaska katangakunata ñambi suiu mandachirkakuna. Sugkunaka, pangaiug sacha uchulla malkikunata kuchuspa, ñambi ñambi churarkakuna, pai ialingapa. ⁹ Nispaka Jesusta ñugpagkuna i paipa kati rinakug, kasa kaparispa nii kallarrirkakuna:

—Taita Diusta iapa suma kagtami ninchi.

Atun Taita Dios kachamuskami samukungi.

Paipa iapa kuiaskami kangi.

¹⁰ Kam samukungimi,

nukanchipa ñugpamanda taita David mandaskasina-llatata

suma mandag kangapa.

Taita Dios awa suma luarpi kagtami ninchi:

“Kam, iapa sumami kangi”.

¹¹ Jesús chasa Jerusalemma chaiagriskapaka, Diuspa atun wasi ukuma iaikugrirkakuna. Chi ukupi tukuita kawas-paka, ña chisiaska kaura, chungaspa iskai pai agllaskakunawanta Betania puibluma rirka.

Igus sacha wañuringapa, Jesús niskamanda

¹² Chi kaiandi, Betania puiblumanda rikuskapika, Jesuska iarkai apigsamurka. ¹³ Sug igus pangaiug sacha karumandata kawarka. “Chi sachapi mikui muiumi tianga” iuiaspas, chima kaillaiarka. Chi sachama chaiagriuraka, ñi ima mikui mana iukarka, manara tiariska kagmanda. ¹⁴ Chiura, Jesuska nirka:

—Kunauramanda, ñi imaurapas mana pipas, kai sachamanda muii mikungapa kankunachu.

Chasa rimagtaka, paita katiraiagkuna uiarkakuna.

Diuspa atun wasi ukumanda, Jesús katugkunata llugschiskamanda

¹⁵ Chimandaka, Jerusalén puibluma ikuti chaiagrirkakuna. Diuspa atun wasi ukuma iaikugrispa, Jesuska katugkunata i randinakugta chi ukupi kawarka. Chimanda, iapa rabiarpas, paikunata llugsichii kallarrirka. Kulki trukagkunapa misakunata i paluma katugkunapa bankukunatapas bulachirka. ¹⁶ Chasallata, mana sakirka, pipas chi wasi ukuta imapas aparispa ialingapa.

¹⁷ Chipi kagkunatapas iachachirka, kasa nispa:

—Ñugpamanda librupi, kasami willaraiá: “Nukapa wasi, Taita Diusta iuiarpas tukui alpakunamanda runakuna mañadirumi kangapa ka”. “Kamkunaka, sisai kausadirusinami rurarkangichi”.

¹⁸ Jesús chasa rimaskataka, iaia sasirdutikuna i Moisés ima niskata iachachig taitakuna uiarkakuna. Chasa uiaspaka, paita iuiarinakurka, imasapipas wañuchingapa. Nigpika, pai ima iachachiskakunata tukui runakuna suma ujnarpas kagmandami paita mancharkakuna.

¹⁹ Ña tutaiakuura, Jesús katiraiagkunawanta chi atun puiblumanda llugsirkakuna.

Chi igus sacha chakiriska kaskamanda

²⁰ Chi kaiandi tutata ñambi rinakuskapika, chi igus sachata angumandata limpiu chakiriska kagta kawarakuna. ²¹ Chiura Pedro, iuiarispa, Jesusta nirka:

—Kawai, iachachig taita. Sachata kam nirkangi wañungapa; chika ñami chakiriska ka.

²² Jesuska, paikunata ainirka:

—Taita Diosmanda suma iuiwai iukangichi. ²³ Kasami nuka niikichita: kamkuna chi suma iuiwai mana sug rigcha iuiaspalla, kai lumata ninrangichi: “Kaimanda anchurispá, atun kucha iaku ukuma sitarigríi”; kamkuna ima niskasinami tukugsamuntra. Imasa niskasina pasaringapa kagta suma iuiagpika, chasallatami tukugsamunga. ²⁴ Chimanda, kasami niikichita: Taita Diusta kamkuna ima mañaspaka, suma iuiarispa, kasa iuiangichi: “Ñami chaskiska kani”. Chasa suma iuiagpikunaka, kamkuna ima mañaskasinami tukugsamungapa ka.

²⁵ —Kasapas. Taita Diusta mañangapa kaura, mai-kanwa piñachirinakuska kagta iuiarichu: ringapami cháiá, ñugpa parijuma pasinsiachirinakungapa. Sugkunata pasinsiagpika, kamkunapa Taita Dios suma luarpi kagpasmi kamkuna pandariskakunatapás pasinsiangá. [²⁶ Ikuti kamkuna sugkunata mana pasinsiagpika, kamkunapa Taita Dios suma luarpi kagpas kamkuna pandariskakunata manami pasinsiangá.]

Kamtaka, ¿pitak kachamurka, atun tukuspa puringapa?, Jesusta tapuskamanda

²⁷ Chimandaka, ikuti Jerusalem chaigrirkakuna. Diospa atun wasi ukupi Jesús purikuura, iaia sasirdutikuna, Moisés ima niskata iachachig taitakuna i sug taitakunapas paipagma kaillaiarkakuna, ²⁸ tapungapa:

—¿Imapatak chasa ruraspá purikungi? ¿Pitak kamta kachamurka, atun tukuspa purikungapa?

²⁹ Jesuska ainirkakunata:

—Nukapas, kamkunata tapusakichita. Kamkuna ainiwagpika, nukapas willasakichitami, pi nukata kachamuwaspa atuniachiwaska kagta. ³⁰ ¿Pitak Juanta kacharka, baugtisangapa? ¿Taita Dioschu kachamurka? Mana kagpika, ¿runakunachu kacharka? Ainiwaichi.

³¹ Chiuraka, kikinpura rimarinakurka, kasa iuiarispa:

—“Taita Dios kachamuskami karka” nigpika, paika ainingami: “Nigpika, ¿imapatak mana paita uiarkangichi?”. ³² “Runakunalla kachamuskami karka” mana nisunchi. Tukuikunami Juanmanda iuianakú: “Sutipami Santu Ispirituwa rimag karka”. Paikunata chimandami manchai iukanchi.

³³ Chasa rimanakuspa, Jesusta ainirkakuna:

—Mana iachanchichu, Juanta pi kachamuska kagta.

Chasa ainiura, Jesuska nirkakunata:

—Chimandami nukapas mana willaikichita, pi kachamuwaspa kagta, atun tukuspa kangapa.

Ubas sachakunata almagkuna, mana allilla ruraskamanda parlu

12 Chiuramandaka, iuiwai apingasina suma parlukunawami rimai kallarirkakunata, kasa nispa:

—Sug runa, achka ubas sacha malkikunasi paipa alpapi tarpurka. Chi alpa muiundi kincha saiachispa, ubas iaku surkudirupassi rurarka. Chasallata, awa kawitu saiachirka, tarpuskata kawanakungapa. Chasa ruraspaka, sug runakunata chi ubas sachakunata sakirka, almaspa, chaugpi chaugpi pallangapa. Chasa sakispaka, karu alpama rirka.

² —Ña pallangapa chaiauraka, sug piunta chi almagkunapagma kacharka, paipa rasiunta chaskingapa.

³ Chi runakunaka, kachai tukuskata apispa, makaspa, chusa maki kacharkakuna.

⁴ —Chiuramanda, ikuti sug piuntasi kacharka. Chitaka kamispa, makaspa, umapi kuchurkakuna. Chasallata, chusa maki rirka.

⁵ —Ikuti sug piuntapassi kacharka. Chitaka wañuchirkakunasi. Chiuramandaka, ikuti achkakunata kacharka. Paikunataka makarkakuna. Sugkunataka wañuchirkakuna.

⁶ —Chi duiñuka iukarkasi suglla wambra, iapa kuiaska. Katimakar, paita kacharka, kasa nispa: “Nukapa wambra kagmanda, mana imapas rurapungakunachu”.

⁷ —Nigpika chi almagkunaka, chi wambrata kawaspa, kikinpura rimarirkakuna, kasa nispa: “Kawaichi. Kai alpa duiñupa wambrami samuku. Paitapas wañuchisunchi. Chasaka, nukanchipallami kai alpa tukunga”.

⁸ —Chasa nispa, paita apispa, wañuchirkakuna. Chi alpamanda llugsichispa, sitagrirkakuna.

⁹ Chasa parlaspaka, Jesús nirka:

—Nigpi chi duiñuka, ¿manachu samuspa, chi runakunata tukuita wañuchigsamuntra; nispa, chi sachakunata ikuti sugkunata almagkuna sakintra?

¹⁰ —¿Manachu ñugpamanda librupi kasa willaraiaskata kawarkangichi?

Wasichigkuna wabutiska rumi, wasita charigmi tukugsamurka.

¹¹ Atun Taita Diosmi chasa rurarka.

Nukanchi, iapa ujnarispa chasa ruraskata kawanakunchi.

¹² Chi parluta uiaspaka, judíu taitakuna nirkakuna:

—Nukanchitami uiachiku—. Chimanda, Jesusta apichingapa munanakurka. Chasa munanakuspapas, achka runakuna chipi kagmanda, manchai apirkakunata. Chimanda, paita sakispa, anchurirkakuna.

Impuistumanda Jesusta tapuskakunamanda

¹³ Nispa, sug fariseokunata i mandag Herodeswa purigkunata Jesuspagma kacharkakuna, pai rimakuskata uiaspa, imapipas pandarigpika, justisiakunata willagringapa. ¹⁴ Chaigrispaka, chi runakuna Jesusta sumaglla nirkakuna:

—Iachachig taita, nukanchi iachanchimi, kam mana llullaspalla rimagta. Mana pitapas kawaspallami tukui-kunata iwalla sutipa kaskata iachachingi, imasa Taita Dios munaskasina ruraspa kaugsangapakuna. Chi-mandami kasa tapugsamunchi: ¿allillachu ka, Romamanda iaia mandagta nukanchi impuistu kuangapa? ¿Pagasunchichu u mana?

¹⁵ Jesuska iacharka, sungu awalla chasa tapuna-kugta. Nispaka nirkakunata:

—¿Imapatak munanakungichi pandachiwangapa? Impuistu kulki kuadiruta apamuichi, nuka kawangapa.

¹⁶ Chiura, sug kulki apagrispa kuagrirkakuna. Chita kawaspa, Jesuska tapurkakunata:

—Kai kulkipi, ¿pipa ñawitak kawariku? ¿Pimandatak willaska niraiá?

—Romamanda iaia mandagmanda— ainirkakuna.

¹⁷ Chasa ainiura, Jesuska nirkakunata:

—Chasa kagpika, Romamanda iaia mandagpa kaskata paita kuaichi. Taita Diospa kaskataka Taita Diusta kuaichi.

Chasa uiaspaka, iapa ujnarirkakuna.

Wañoskakuna kaugsaringapa kaskamanda, Jesusta tapuskakunamanda

¹⁸ Chiuramanda sug saduseo suti runakuna, Jesus-pagma chaiagrirkakuna. Chi runakuna iachachidurmi kankuna, wañoskakuna mana mas kaugsaringapa kagta. Chaiagripaka, Jesusta nirkakuna:

¹⁹ —Iachachig taita, Moiseska nukanchimanda kasasi willaspa sakirka. Sug kari kasaraspas, warmi manara wambrakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa kuinta wawakuna iukangapa.

²⁰ —Nigpika, kanchis waugkindikunasi tiarka. Atun waugkindika, kasaraspas, warmi manara wawakuna iukagllapisi wañurka. ²¹ Chiwanka, kipamanda waug-kindisi chi sapalla kidaska warmiwa kasarai iukarka. Chi waugkindipas, warmi manara wawakuna iukagllapisi wañurka. Katimanda waugkinditapas chasallata pasarirka. ²² Chasallatasi tukui kanchis waugkindikuna, warmi manara wawakuna iukagllapi wañurkakuna. Katimakar, chi warmipas wañurka. ²³ Nigpika, wañoskakuna kaugsariuraka, ¿pipatak chi warmika kanga, chi kanchis waugkindikunawa kasadu kaspas?

²⁴ Jesuska ainirkakunata:

—Kasamandami kamkuna pandarispa iuianakungichi: ñugpamanda librupi willaraiaskata ñi Taita Diospa iapa iachaita mana iuiai iukangichichu. ²⁵ Wañoskakuna kaugsariskauramandaka, kari ñi warmi mana kasarangapa kankunachu. Imasa suma luarmanda anjilkunasinami kaugsangapa kankuna.

²⁶ —Kasapas. ¿Imapatak kamkuna ningichi: “Wañoskakuna mana mas kaugsaringapa kankunachu”? ¿Manachu kasa Moisés willaraiaskata kawarkangichi? Taita Dios, sacha rupakuskamanda rimaspa, kasami paita nirka: “Nukami kani Abrahampa, Isaakpa i Jakobpa Taita Dios”. ²⁷ Taita Dios mana kanchu wañoska-

kunapa. Kaugsagkunapami Taita Dios ka. Chasa mana iachaspami iapa pandarispa iuianakungichi.

Tukui mandaikunamanda, ¿maikantak mas atun ka?, Jesusta tapuskamanda

²⁸ Moisés ima niskata sug iachachig taita, Jesús saduseokunawa rimanakuskata uiakurka. Jesús chasa suma ainiskata iachaspa, chi runaka, paipagma kailliaspa, tapurka:

—Tukui mandaikunamanda, ¿maikantak mas atun ka?

²⁹ Chiura, Jesuska ainirka:

—Kai mandaimi tukui-kunamanda mas atun ka: “Uiaichi, Israelmanda runakuna. Nukanchipa atun Taita Dioska, suglla iaiami ka. ³⁰ Kamba atun Taita Diusta kuiangi kam kikinpa almawa, sunguwa, tukui animuwa i tukui iuiaikunawa”. ³¹ Kai katimandapasmi chi mandaisinallatata atun ka: “Kam kikintasinami iukangi, tukui runakunatapas kuianga”. Chi iskandi mandaimi tukui-kunamanda mas atun ka.

³² Chiura, chi runaka nirka:

—Allillami ainiwangi, iachachig taita. Sutipami ningi: “Taita Dios, sugllami tia”. Sug rigcha diuska, mana tianchu. ³³ “Kam kikinpa sunguwa, tukui iuiaiwa i tukui animuwa Taita Diusta kuiangichi” i “Kam kikintasinami iukangi, tukui runakunata kuianga”: chasa ruraikunawaka, Diospa ñawipi tukui allilla kagtami kawá. Ikuti maitukupas Taita Diusta kamariku karaspa, ima wagra u animal altarpis rupachiskaka, Diospa ñawipi maillami ka.

³⁴ Chi runa suma ainiskata uiaspa, Jesuska paita nirka:

—Kamta maillami pisiku, Taita Dioswa tukuskapura kangapa.

Chiuramanda ñi pipas, mana mas animu iukarkakuna, Jesusta tapungapa.

Taita Dios agllaska Cristo, Davidpa iaiami ka

³⁵ Diospa atun wasi ukupi iachachikuspa, Jesuska nirka:

—Taita Diospa agllaska Cristomanda, ¿imapatak Moisés ima niskata iachachig taitakuna ninkuna, Davidpa wambrapa kati wambra kagta? ³⁶ Manachu David kikin, Santu Ispirituwa kaspas, Cristomanda kasa willarka?

Atun Taita Diosmi nukapa iaia nirka:

“Nukapa alli ladu tiarii,

nuka tukui kamta mana munagkunata apagrispa, kamba chaki sarudiru ukuma churankama”.

³⁷ Chasami David kikin, Cristomanda nirka: “Nukapa iaia”. Nigpika, ¿imawantak Cristo, paipa wambrapa kati wambra kanga?

Iapa achka runakuna, Jesusta sumagllami uianakurka.

Iachachig taitakunata, Jesús piñaskamanda

³⁸ Kasapasmi Jesuska iachachispa nikurka:

—Moisés ima niskata iachachig taitakunawa mana iapa sugllapi iuiaiwa kangichi. Paikuna munankunami, iapa suma kawari katangakuna churarispa puringapa. Kallipi paikunawa tupanakuskapi munankunami, iapa suma kuiaiwa kumurispa, “Puangi, taita waugki” ningapakunata. ³⁹ Tandaridiru wasikunapipas munankunami, atun taitakuna tiaridiru ñugpa ladu tiaringapa. Chasallata, maima kunbidagpi suma mikungapa kaiaura, ñugpa ladu tiaringapami munankuna. ⁴⁰ Warmi sapalla kidaskakunata wasikunatami kichudur kankuna. Nispaka, kawachiringapagllami unai Taita Diusta rimanakudur kankuna. Chasa ruraskakunamandami sug luarpi sugkunamandapas mas llakiipi justisiai tukungapa kankuna.

Sug mana iukag warmi, Taita Diusta kulki karaskamanda

⁴¹ Diuspa atun wasi ukuma sugnigmanda iaikugripaka, Jesús, kulki churadirukuna ladullapi tiarigrirka. Chipika, runakuna imasa kulki churanakuskata kawakurka. Achkakuna, iapa iukagkuna kaspas, achka kulki churanakurka. ⁴² Chiura sug warmi mana iukag sapalla kidaskaka, chaiagrispa, iska uchulla kulkillami churarka. ⁴³ Chasa kawaspa Jesuska, paita katiraiagkunata kaiaspa, nirka:

—Kasami nuka niikichita: chi warmi mana iukag sapalla kidaska, tukuikunamanda mas achka churagmi niraiá. ⁴⁴ Sugkunaka, paikunapa puchuskatami churarakuna. Ikuti chi warmika, mana iukaspapas, pai mikungapa charikuskatami tukuita kararka.

Diuspa atun wasita puchukai tukungapa, Jesús willaskamanda

13 Diuspa atun wasi ukumanda Jesús llugsikuraka, sug paita katiraiag, ujnarispa, nirka:

—Kawamui, iachachig taita. Askurinti iapa atun kantaska rumikunawa saiachiska suma wasikunami ka.

² Jesuska, paita nirka:

—Kai atun wasikunamanda kasami willaiki: chi tukui piachiska rumikuna, ñi sug mana sakingapa kankunachu. Tukuitami urmachispa puchukangapa kankuna.

Kai alpa puchukarii puncha manara chaiagllapi, imasa kawaringapa kaskamanda

³ Jesús ña Olivos lumapi, Diuspa atun wasi sug ladu chimba kawariipi tiarigrirka. Chiura Pedro, Santiago, Juan i Andrés, paillawa kaspas, tapurkakuna:

⁴ —Nukanchita willai: ¿imaauratak chasa pasaringa? Ña tukui chasa pasaringapa kagta, ¿imawatak kawachinga?

⁵ Chiura Jesuska, nii kallarirkakunata:

—¡Ujalallapas maikan, kamkunata llullachispa pandachichukuna! ⁶ Achkakunami, nukasina tukuspa, samungapa kankuna, kasa nispa: “Nukami Taita Dius agllaska Cristo kani”. Chasa rimanakuskawaka achka runakunatami llullachingapa kankuna.

⁷ —Tukuimami mana llakispalla wañuchinakugta iacharingapa ka; kamkuna mana mancharinakungichi. Chasami pasaringapa ka. Nigpipas, kai alpa puchukarii puncha manara chaiamuska niraiianchu. ⁸ Ñugpami sug mandag alpanigmandakunawa sugnigmandakunawa wañuchinaku tiangapa ka. Sugnigmanda sugnigmandami alpa kuiurispa chapurispa ringapa ka. Iapa iarkaimi tiangapa ka. Chi llakiikuna pasariska, chara kallariillami kangapa ka.

⁹ —Allilla iuiarispa kaugsanakungichi. Kamkunata apispa, justisiakunapagmami apangakuna. Tandaridiru wasikunapimi kamkunata asutingakuna. Kamkuna nukawa kagmanda, atun mandagkunapagmami purichingakuna, justisiai tukungapa. Chiura, paikunata nukamandami willankangichi. ¹⁰ Nukamanda Alli Willaita tukui runakunata kai alpapi willaurami kai alpa puchukarii puncha kangapa ka.

¹¹ —Justisiakunapagma kamkunata apaura, mana iapa iuianakungichi: “¿Imasami paikunata ainini?”. Ainin-gapa chaiaura, kikin Santu Ispiritumi iuiachingapa ka. Kam kikinkunapa iuiaiwa mana rimanakungapa kangichichu. Santu Ispiritumi kamkunata allilla rimachin-gapa ka.

¹² —Chi punchakuna sugkuna, waugkindikunatami kuangakuna, wañuchii tukungapa. Chasallata taitakunapas, paikunapa wambrakunatami wañuchingapa kuangakuna. Wambrakunapas, taita i mamandita kuntra tukuspa, wañuchingapami kuangakuna. ¹³ Tukui-kunami kamkunawa rabiaringapa kankuna, kamkuna nukawa kagmanda. Chasa pasanakuspapas, wañunkama nukallawa iuiarispa kagkunami kispiringapa kankuna.

¹⁴ —Iapa jiru mana kawangasinami rurangapa kankuna; sug ianga diussina rigchata Diuspa atun wasi ukupimi † saiachingapa kankuna. Chitaka, kamkuna kawangapami kangichi. (Santu Ispirituwa rimag willaraiaskata allilla iuiaiwa iuiarispa kawangichi.) Chasa kawaspaka, Judea alpapi kaugsanakug sachukuma mitikuchukuna. ¹⁵ Maikanpas wasi truja awapi kagkuna, mana uraikunakuchu, ukuma iaikuspa, imakuna apangapa. Imasa kaskasinalla mitikuchukuna.

¹⁶ Chasallata maikanpas chagrapi kagkuna, mana wasima kutichukuna, katanga u imapas tandachin-gapa. ¹⁷ ¡Ai, maikan warmijimkuna, chi punchakuna wigsawa ungug u uchulla markaska kagkuna! ¹⁸ Taita Diusta mañangichi, mana chaiachu, tamia puncha mitikui tiangapa.

¹⁹ —Chi punchakuna, askurinti iapa llakiimi tiangapa ka. Taita Dius kai alpa wiñachiskauramandata kunankama, chasa llakiika mana tiaska kanchu. Chasallataka, kunaauramanda mana ikuti chasa tiangapa kanchu.

²⁰ Atun Taita Dius chi llakii punchakunata mana pisiachigpika, ñi pipas manachar kispirinha. Pai agllaskakunata iapa kuiaspami chi punchakunata pisiachin-gapa ka.

²¹ —Chiurakuna, kamkunata ninakungami: “Uiamuchi. Taita Dius agllaska Cristo, kaipimi ka” u “Chipimi

† “Maipi mana allilla kaskapi”, Diuspa atun wasi ukupimi niraiá.

ka". Chasa ninakugpipas, kamkuna mana uiangichi.
²² Chi punchakuna, iapa llullachigkunami kawarig-samungapa kankuna, kasa nispa: "Nukami Cristo kani" u "Nukami Santu Ispirituwa rimag kani". Chi runakunaka, mana imaurapas kawaskasina i ujnaringasina mi kawachingapa kankuna. Chasa kawachiskawaka Taita Dios agllaskakunatapasma ñalla llullachingapa kankuna. ²³ Chasa uiaspa, kamkunaka allilla iuiarispa kaugsanakungichi. Manara chasa tukungapa chaiagpitami tukui allilla willaikichita.

Jesús imasa ikuti samungapa kaskamanda

²⁴ —Chi iapa llakii punchakuna ialiskauramandaka, indimi amsaiangapa ka; killapas, manami punchaiachingapa ka; ²⁵ istrillakuna, awamandami urmangapa kankuna; kai alpamanda awa ladu tiaskakunapasmi kuiuchii tukungapa kankuna. ²⁶ Chiura, kai Runa Tukuskatami kawawangapa kankuna. Nukapa tukui iapa suma iachaiwa puiukunapimi samungapa kani. ²⁷ Samuspaka, nukapa anjilkunatami kachasa. Paikunaka, nuka agllaska runakuna sug kuchu sug ladu kuchu kai alpapi kaskakunata, tukuikunatami † tandachipuangapa kankuna.

²⁸ —Kai iui ai apingasina suma rimaiwa iachaikuichi. Imasami igus sacha malkikuna wiñaspa, pangakuna ña susuriura, kamkuna kawaspas, ningichi: "Ñami alli punchakuna chaiamuku": ²⁹ chasallata kamkuna, tukui chasa pasarinakuskata kawaspaka, ñami iachankangichi, nuka ña chaiamukugta.

³⁰ —Kasami nuka niikichita: manara tukui kunaura kaugsagkuna wañugpimi tukui chasa pasaringapa ka. ³¹ Sug luar i kai alpa luar puchukarigpipas, nuka ima niskaka mana ialingapa kanchu.

³² —Ima puncha ima ura chasa tukugsamungapa kagta, mana pipas iachanchichu. Ñi suma luarmanda anjilkuna ñi Diospa wambrapas mana iachanchu. Nukapa Taitallami iachá. ³³ Chimanda, sumaglla iui aiwa rigcharaiagsina kangichi. Kamkunapas mana iachangichichu, ima ura nuka samungapa kagta.

³⁴ —Chi puncha chaiangapa kagta kasa iuiarintran-chi. Sug patrun, sugsinama ringapa kaspas, wasimanda llugsikuspa, paipa piunkunata sug sug imasa chaiaskasina rurangapa sakirka. Shanžatapas iuiachirka, rigcharaiaspalla suiakungapa. ³⁵ Chi runakuna mana iacharkakuna, patrun imaura kutimungapa kagta. Chasallatami kamkunapas mana iachangichi: ¿amsaia-kuurachu chaiamusa, u chaugpi tuta, u gallu kantaura u tutata pakarikuura? Chimanda, iuiaipilla kangichi.

³⁶ ¡Amalai puñuriska kagsinata shachigsamuntrani!
³⁷ Nuka ima kamkunata niska, tukuikunatami nini: "Iuiaipilla kangichi".

Jesusta wañuchingapa iuianakuskamanda

14 Tanda mana libadurawa mikudiru punchakuna ña chaiakuura, paskua suti atun punchapa iskai punchalla pisikuura, chi punchakuna, iaia sasirduti-

† "Chusku wairanigmanda", tukuinigmandami niraiá.

kuna i Moisés ima niskata iachachig taitakunaka paipura rimarinakurka, Jesusta pakalla apispa wañuchingapa. ² Iuiarispa ninakurka:

—Kai atun punchakunaka, mana paita apichisunchi. Apichigpika, tukui runakuna, iachaspaka, nukanchiwami rabiaringakuna.

Jesusta umapi, sug warmi suma asna asiti talliskamanda

³ Jesús, Betania puiblupi karka, Simón suti runapa wasipi. Chi Simón, aicha ismui unguwa ñugpata karka. Jesús mikuspa tiakuuraka, sug warmi chaiagrirka. Chi warmi, nardo suti suma asna asiti iapa bali kulkiwa randispa, marmul rumi butillapi apaspami chaiagrirka. Nispaka, chi butilla kungata pakispa, Jesusta umapi asitita tallirka. ⁴ Chasa kawaspaka sugkuna, rabiarispa, kasami kikinpura ninakurka:

—¿Imapatak chi suma asna asiti, ianga tallí? ⁵ Chita, kimsa patsa puncha ganaska ialigta bali kulkimanda katuspa, mana ñi imapas iukaskakunata chi kulki-kunata karangapami chaiakurka—. Chasa rimankuspa, chi warmita piñagsinami ninakurka.

⁶ Jesusta nirkakunata:

—Ianga kawaichi. ¿Imapatak kai warmita ninakungichi, mana allilla ruragta? Paika, allillami rurawarka. ⁷ Ñi ima mana iukagkunata imaurapasmi iukangapa kangichi. Kamkuna paikunata suma rurangapa munagpikuna, paikunaka tiangapagllami kankuna. Ikuti nukataka sug ratullami kawawanakungichi. ⁸ Kai warmi, mailla pudiskaka allillami rurawá. Kai suma asitiwa talliwaskaka niraianmi nukapa kuirpu wañuskata pambangapa ña allichiska sakigsina. ⁹ Kasami nuka niikichita: tukui alpapi, maipipas nukamanda Alli Willaita willaskapi, kai warmi ima rurawaskatapas parlangapami kankuna, paimanda mana kungarisipalla.

Jesusta apichingapa, Judas Iskariote maskaskamanda

¹⁰ Nigpika chungas iska Jesús agllaskakunamanda Judas Iskariote sutika, iaia sasirdutikunapagma rispa, nirkakunata:

—Jesusta apichisakichita.

¹¹ Chasa uiaspaka, sumaglla kuntintarispa nirkakuna:

—Kulkimi kamta karasunchi—. Chiuramandaka, Judas maskai kallirka, imasa Jesusta apichingapa.

Iaia Jesús, ña wañungapa chaiakuura, katiraiagkunawa mikuskamanda

¹² Tanda mana libadurawa mikudiru kallarii puncha chaiarka; chiurallatata paskua ubija wañuchispa mikungapa. Chi punchaka, Jesusta katiraiagkuna paita tapurkakuna:

—Paskua punchapa mikui kam mikungapa, ¿maipitak munangi, nukanchi allichingringapa?

¹³ Chiura Jesusta, iska paita katiraiagkunata kacharka, kasa nispa:

—Riichi Jerusalén puibluma. Chipi chaiagriuraka, sug runa iaku wabkanawami tupanga. Paita katichingichi.

¹⁴ Chi runa sug wasima chaiagriskapika, chi wasiugta nigringichi: “Nukanchita iachachig taitami kachamú, kamta tapungapa: ‘¿Maikan uku ladutak nukapa purigkunawa paskua mikungapa kani?’.” ¹⁵ Chiura chi runaka, awapi sug atun uku tukui ima ministiskakunawa tim allichiskatami kawachingapa ka. Nukanchi mikungapa, chipi allichingichi.

¹⁶ Chi kachai tukuskakuna Jerusalén puibluma chaiagriuraka, tukui imasa Jesús niskasina allilla tukugsamurka. Chipimi allichirkakuna, paskua mikungapa.

¹⁷ Ña tutaiauraka, Jesús paipa chungu iskai agllaska runakunawanta chaiagrirka. ¹⁸ Tukuikuna mikuspa tianakuura, Jesuska nirkakunata:

—Kasami nuka niikichita: kamkuna nukawa mikunakuskamanda, sugmi apichiwangapa ka.

¹⁹ Chasa uiaspa, iapa llakirirkakuna. Nispaka tukui-kuna, sug suglla tapui kallarikakuna:

—¿Nukachu apichingapa kaiki?

²⁰ Jesuska ainirkakunata:

—Kam chungu iskaikunamanda, kai platupi nukawa tanda makiwa jukuchispa mikunakugmanda sugmi apichiwangapa ka. ²¹ Imasami ñugpamandata willaraiá: chasallatami kai Runa Tukuskata pasariwangapa ka. Chasa kagpipas, jai, chi runa apichiwag! Chasapaka, chi runa mana tiagsamunmi.

²² Chara mikunakunkama Jesús, tandata makipi charirrispa, “Pai Siñur” Taita Diusta nirka. Tandata piti-chispa, paikunata kuaspa, kasami nirka:

—Chaskiwaichi. Kai, nukapa kuirpumi ka.

²³ Nispaka, sug binu kupata makipi charirrispa, “Pai Siñur” Taita Diusta nispa, paikunata kuarka. Chiura, tukuikunami upiarkakuna.

²⁴ Upianakunkama, Jesuska nirkakunata:

—Kai, nukapa iawarmi ka, Taita Dioswa i runakunawa ikuti pasinsiachirrispa sumaglla tukungapa. Achkakanamandami chi iawar llugsispa icharingapa ka.

²⁵ Kasami nuka niikichita: ubas iaku mana mas upiangapa kanichu, imaura Diospa suma mandai pucha chaiankama.

Jesusta mana rigsinichu, Pedro ningapa kaskamanda

²⁶ Mikuskauramanda, kantspaka, Olivos lumama rirkakuna. ²⁷ Chipi, Jesuska nirkakunata:

—Kasami ñugpamanda librupi willaraiá: “Ubija kawagtami wañuchisa. Chiura paipa ubijakuna, kasma chasamami mitikungapa kankuna”. Chasallatami kamkuna, sakiwaspa, mitikungapa kangichi. ²⁸ Nuka, wañuspa kaugsarispaka, Galilea alpapimi ñugpa kagrisa. Chipimi kawarisakichita.

²⁹ Chiura, Pedroka nirka:

—Kamta tukuikuna sakigpipas, nukakar manima.

³⁰ Jesuska nirka:

—Kasami nuka niiki: kai tuta, gallu manara iskai biaji kantagpimi kamka kimsa biaji nukamanda ningapa kangi: “Paita mana rigsinichu”.

³¹ Pedroka, mas sinchi nirka:

—Kamwa wañungapa chaiawagpipas, ñi imaurapas mana chasa ningapa kanichu.

Tukuikuna, chasallata nirkakuna.

Jetsemaní wirtapi, Jesús Taita Diusta mañaskamanda

³² Jetsemaní suti wirtapi chaiagriskapika, Jesuska kati-raiagkunata nirka:

—Kaillapi tianakuichi, nuka Taita Diusta mañaspa rimagrinkama.

³³ Chasa nispa, Pedro, Santiago i Juanta pusaspa, mas karuajma rirka. Chipika, iapa llakii irkaiami tukurka. ³⁴ Nispaka, chi kimsandikunata nirka:

—Nukata iapa llakii wañungasinami iuiachiwaku. Kamkuna kaillapi suiawaichi, mana puñurispalla.

³⁵ Chasa nispaka, mas ñugpasinama rispa, kungurirka. Alpama tupagta kumurispa, Taita Diusta mañai kallarikka, kasa nispa:

—Alli kagpika, ¿manachu pudirintra, kai llakiita anchuchiwangapa?—. ³⁶ Kasapasmi nikurka— Kam Taitiku, tukuimi pudingi. Kai iapa llakiita † anchuchiwai. Nuka chasa munakugpipas, nuka imasa munaskasina mana tukuchu. Kam imasa munaskasina rurai.

³⁷ Chasa nispa, chi kimsandikunapagma kutispaka, puñunakuskata tarigrispa, Simón Pedrotá nirka:

—¿Imapatak puñurirkangi? ¿Manachu ñi sug ratullapas rigcharaiangapa pudirkangi? ³⁸ Mana puñurispalla, Taita Diusta mañanakuichi, tukui mana allilla rurai-kuna kamkunata mana chaiachu. Sungupi allilla rurangapa munanakuspapas, kuirpupika iapa sambami kangichi. Chiwami mana pudingichi, allilla rurangapa.

³⁹ Chasa nispaka, ikuti rispa, Taita Diusta imasami ñugpata mañakurka: chasallatami parisma mañarka. ⁴⁰ Sug ratuma ikuti paikunapagma kutiura, puñunakuskata tarigrirka. Paikunapa ñawi, dipuñui wañunakurka. Chimanda, paikunata niura, mana iacharkakuna ima aininga.

⁴¹ Chasallata ña kimsama Taita Diusta mañakugrispa, paikunapagma kutispa, Jesuska nirkakunata:

—Kunaura samariichi, puñuichi—. Nispaka, chiuralla nirka— Chilla. Nukapa ura chaiarkami. Kai Runa Tukuska, mana allilla rurag runakunapa makipimi ña urmarka. ⁴² Atariichi. Akushi. Apichiwag runa, ñami kaillaiamuku.

Jesusta apiskakunamanda

⁴³ Jesús chasa rimakugllapi, Judaska chipi chaiagrirka. Chi runa, Jesuspa chungu iskai agllaskakunamandami karka. Chi runawaka achkakunami chaiagrirkakuna, ispada i garutikuna charispa. Paikunaka, iaia sasirdutikuna, Moisés ima niskata iachachig taitakuna i sug judíu taitakuna kachaskakunami karkakuna.

⁴⁴ Chi Judas, manara rispalla, willaska karka, kasa nispa: “Maikanta nuka muchasa; chimi ka. Chita apispa, suma wataspa apangichi”. ⁴⁵ Imasa niskasina chaiagringallawa, Jesuspagma kaillaiaspa, nirka:

† “Kai winja kupata”, iapa llakiitami niraiá.

—Puangi, iachachig taita—. Chasa nispaka, paita mucharka.

⁴⁶ Chasa muchaura, Jesusta apirkakuna.

⁴⁷ Chasa kawaspaka, sug Jesuswa kagpura, ispada surkuspa, iaia sasirdutipa lutrinta piaspa, sug rinri ialigta kuchurka.

⁴⁸ Chikama Jesuska, Judaswa riskakunata tapurka:

—¿Imapatak nukata, sisaitasina ispada i garuti kaspi-kunawa apiwangapa samunakungichi? ⁴⁹ Tukui punchakunami nuka, kamkunapa chaugpipi, Diospa atun wasi ukupi iachachispa karkani. Chipika, ¿imapatak mana apiwarkangichi? Nigpika iukarkami, tukui kasa pasaringa, ñugpamanda librupi willaraiaskasina tukugsamungapa.

⁵⁰ Chiura Jesuswa tukui kagkuna, paillata sakispa, mitikurkakuna.

⁵¹ Jesusta apanakuura, sug musuka, suglla katanga katarispa, katicchikurka. Paitapas apinakurka. ⁵² Paika, katangata sitaspa, llatanmi mitikurka.

Judíu taitapura sugllapi tandariska kaskapi, Jesús kaskamanda

⁵³ Jesusta apispaka, chi runakuna iaia sasirdutipa wasima chaiachigrirkakuna. Iaia sasirdutikuna, Moisés ima niskata iachachig taitakuna i sug taitakunapas, tukui kunami chipi tandariska karkakuna. ⁵⁴ Pedroka, karu karullapi katicchispa, chi wasi kanchakama chaiagrirk. Nispaka, iaikuspa, chi wasi kawag runakunawa tiarigrirka, nina kunuspa.

⁵⁵ Iaia sasirdutikuna i tukui judíu taitakunapas maskanakurka, pipas willantra, ima pandariipas Jesús iukagta; chasaka, paita wañuchingapa pudingapa. Chasa maskanakuspapas, manima tarirkakuna.

⁵⁶ Achkakuna, paimanda llullaspa willanakurka. Nigpika, kikinpura sug rigcha sug rigcha ninakuspa, mana iacharirka, maikan mana allilla kagta.

⁵⁷ Ikuti sugkunaka, saiarispa, Jesusmanda llullaspa, kasa nirkakuna:

⁵⁸ —Kasa niskatami uiarkanchi: “Kai Diospa wasi runakuna ruraskata, nukami puchukangapa kani. Nispaka, kimsa punchallapimi sug wasi runakuna mana saiachiskasina saiachingapa kani”.

⁵⁹ Chi runakuna chasa rimanakuspapas, ikuti paipura sug rigcha sug rigcha ninakuspaka, ñi imapi mana allilla tururka.

⁶⁰ Chiuramanda iaia sasirduti, chaugpipi saiarispa, Jesusta tapuchirka:

—Kammanda mana allilla rimanakuskataka, ¿imapatak mana ainingi?

⁶¹ Jesuska, upallami karka, mana imapas ainispalla.

Ikuti chi iaia sasirdutika, paita tapuchirka:

—Nigpi, ¿kamchu kangí Cristo suti iapa suma atun Taita Diospa wambra?

⁶² Chiura, Jesuska ainirka:

—Ari, nukami kani. Kai Runa Tukuskata kawawangapami kangichi, tukui manduiug Taita Diospa alli ladu tiakugta. Suma luarmanda puiukunapi samukugtapasmi kawawangapa kangichi.

⁶³ Chasa uiaspa chi iaia sasirdutika, iapa rabiarispa, kikinpa katangata llikichirirka, kasa nispa:

—¿Imapatak sugkunata suianakusunchi, paimanda imapas willangapa? ⁶⁴ Ñami nukanchi kikin uiarkanchi, imasa Taita Diussina tukuspa willarigta. Kamkuna, ¿imatak ningichi?

Chiura tukui chi taitakuna, Jesusmanda ainirkakuna:

—Paita wañuchiimi chaiá.

⁶⁵ Chiuralla sugkuna, Jesusta tukaspa, paipa ñawita kilpaspa, puñitiaspa rurarkakuna, kasa nispa:

—Willamui: ¿pitak kamta piarka?—. Nispaka, Jesús mana mitikungapa kawagkunapas chasallata piaspa charirkakuna.

Jesusta mana rigsinihu, Pedro niskamanda

⁶⁶ Chikama Pedroka, chi wasi ura ladu kanchallapimi karka. Chiura iaia sasirdutipagpi sug kawag warmi, Pedropagma kaillaiarka. ⁶⁷ Chi warmika, paita nina kunukuskata kawaspa, ikuti allilla kawaspa, tapurka:

—¿Manachu kampas, chi Nazaretmanda Jesuswa purikurkangi?

⁶⁸ Pedroka, chasa uiaspa, ainirka:

—Manima iachanichu, kam imamanda chasa rimakugta.

Chasa ainispaka, kancha ladu, iaikudiru atun punguma llugsirka. [Chasa kagllapi, gallu kantarka.] ⁶⁹ Chi warmika, Pedrota ikuti chipi kawaspa, chipi kagkunata nii kallarirka:

—Kai runapasmi paipura ka.

⁷⁰ Pedroka, ikuti chasa uiaspa, ainirka:

—Manima.

Ikuti sug ratullapi, chipi kagkunapas Pedrota nirrakuna:

—Kampas, sutipami chi runapura kangí. Galilea alpa-mandami kangí.

⁷¹ Chiura Pedroka, kikinmanda mana suma rimarispa, nii kallarirka:

—Nukaka, Diospa ñawipi sutipami niikichita, mana llullaspalla. Nukaka, chi kamkuna rimanakuskamanda runata mana rigsinihu.

⁷² Pedro chasa nigllapika, gallu ikuti kantarka. Chiura iuiarigsamurka, imasa Jesús kikin Pedrota nigta: “Gallu manara iscai biaji kantagpimi kamka kimsa biaji nukamanda ningapa kangí: ‘Paita mana rigsinihu.’” Chasa iuiarigsamuspa, iapa llakirispa, wakai kallarirka.

Mandag Pilatos kaskapi, Jesús kagriskamanda

15 Pakariska kagllapi, iaia sasirdutikuna i Moisés ima niskata iachachig taitakuna, tukui judíu taitakunawa ikuti tandarirkakuna. Nispaka, Jesusta wataspa, Pilatos suti mandagpagma chaiachigrirkakuna. ² Chiura Pilatoska, Jesusta tapuchii kallarirka:

—Kam, ¿judiukunapa atun mandagchu kangí?

Chiura, Jesús ainirka:

—Sutipami kam chasa nirkangi.

³ Chiuraka iaia sasirdutikuna, Jesusmanda achka mana allilla ruragta nispa juchachinakurka. ⁴ Pilatoska, ikuti Jesusta tapuchirka:

—¿Imapatak mana imapas ainingi? ¿Manachu uia-kungi, kam achka mana allilla ruraskakunata willawanakugpipas?

⁵ Jesuska, ñi imapas mana ainirka. Chimanda Pilatos, iapa ujnarispa kawarka.

Jesusta wañuchigriichi, Pilatos niskamanda

⁶ Wata watapi atun pucha chaiaura, Pilatos iacharka, sug karsilpi kaskata runakuna mañaskata kacharinga. ⁷ Chi punchakuna, Barrabás suti runami karsilpi wichkaraiarka. Chi runa karkami mandagkunata wañuchispa puchukangapa kagkunapa iaia. ⁸ Nigpika sug runakuna, Pilatospagma chaiagrispa, paita mañai kallarirkakuna:

—Kam imasami iachangi kacharinga: chasallata kunaurapas sug runata kacharii.

⁹ Pilatoska tapurkakunata:

—¿Munanakungichichu, judiukunapa atun mandagta nuka kacharingapa?— ¹⁰ Pilatos allillami iacharka, iaia sasirdutikuna, ianga Jesusta mana munaspa, wañuchingapa munanakugta. Chimandami chasa chipi kagkunata tapurka.

¹¹ Iaia sasirdutikunaka, chipi kagkunawa chapurispa chapurispa rirkakuna, kasa nispa:

—Mañaichi, Barrabasta kacharichu.

¹² Paikuna chasa mañaura, Pilatoska ikuti tapurkakunata:

—Nigpika, ¿imatak munanakungichi, kai runata kamkuna judiukunapa atun mandag sutichiskata nuka rurangapa?

¹³ Paikunaka, kaparispa ainirkakuna:

—Kruspi churaspa wañuchii.

¹⁴ Pilatos tapurkakunata:

—Kamkunataka, ¿imapitak kawarí, mana allilla ruras-ka kagta?

Paikunaka, mas sinchi kaparispa, ikuti nirkakuna:

—Kruspi churaspa wañuchii.

¹⁵ Chiura Pilatos, paikunata alli iuiachiiwa sakingapa, Barrabasta kacharirka. Jesustakar mana llakispalla iapa asutichirka. Nispaka, suldadukunapa makipi sakirka, paikuna kruspi klabaspa wañuchingapa.

¹⁶ Chiura chi suldadukunaka, Jesusta chi mandagpa wasi kanchamalla pusarkakuna. (Chi wasi, “pretorio” suti ka.) Chipika, tukui suldadukuna tandachirirkakuna. ¹⁷ Nispaka, Jesusta sutipa mandagsina kawaringapa, puka katanga katachirkakuna. Ispinakunalla llaughtu simbaspa, paita umapi churachirkakuna.

¹⁸ Churachispaka, paita kamispa, nii kallarirkakuna:

—Puangi, kam judiukunapa atun mandag. ¿Allillachu kapuangi?— ¹⁹ Chasa ninakuspaka, paita umapi pukungawa piaspa, tukaspa richirkakuna. Chasallata, muchanakugsina, ñugpa ladu kungurispa karkakuna. ²⁰ Paita chasa asiskauramandaka, puka katangata surkuspa, ikuti kikinpata churachirkakuna.

Jesusta kruspi klabagriskakunamanda

Chi wasimandaka Jesusta llugsichirkakuna, paita kruspi klabagringapa. ²¹ Rinakuskapika, Sirene puiblu-manda Simón suti runa ñambipi tuparka. Chi Simón, Alejandro i Rufopa taita karka. Paika, chagramandami chaiamukurka. Paitaka, Jesús markaspa apakuska krusta markachirkakuna.

²² Gólgota suti pambamami Jesusta chaiachigrirkakuna. (Chi Gólgota niraiami: “Uma Tullu pamba”.)

²³ Chipika, mira kupal chapuska binu paita karana-kurka. Paika, chita mana upiangapa munarka. ²⁴ Nispaka, paita kruspi klabarkakuna. Jesuspa katangkakunataka, suldadukuna suirtipi pugllarkakuna, iachangapa: imasami chaiá, paipura sug sug apangapa.

²⁵ Chaugpi tutatami Jesusta kruspi klabarkakuna.

²⁶ Krus uma awa ladu, sug willaraiaskami churarkakuna, kawaspa, imamanda wañuchii tukukugta iachangapa. Chipi, kasami niraiarka: “Judiukunapa atun mandagmi ka”.

²⁷ Chillapita, iskaí isaikunata kruspi klabaspa saia-chirkakuna: sugtaka Jesuspa alli ladu, sugtaka paipa lluki ladu. [²⁸ Chasawami ñugpamanda librupi imasa willaraiaskasina tukugsamurka. Chipika, kasami niraiarka: “Paipas, jiru ruragkunawa sugllapimi kawarirka”.]

²⁹ Chipi ialinakug, Jesusta kawaspaka, uma kaima chima chabsichirispaka kaminakurka, kasa nispa:

—Ajaa, wanai. Kamsina ningi, Diospa atun wasita lim wagllichispa, ikuti kimsa punchallapi saiachingapa;

³⁰ kunaúra kam kikin kispichirii. Krusmanda uraikui.

³¹ Chasallata iaia sasirdutikunapas, Moisés ima nis-kata iachachig taitakunawa Jesusta iapa unzaspa ninakurka:

—Chiins, sugkunata kispichigsamurkasi. Nigpika, pai kikinaka mana pudí kispichiringapa. ³² Cristo suti Israel-manda runakunapa atun mandag, kunaúra krus-manda kam kikinlla uraikui. Chasa kawaspami kam-manda suma iuiarisunchi.

Jesuswa sugllapi kruspi kagkunapas, paita kaminakurka.

Jesús wañuskamanda

³³ Ña chaugpuncha tukuskauramanda chaugpi chisikama, tukui alpa lim tutaiagsamurka. ³⁴ Chaugpi chisi kaura, Jesuska sinchi kapariwa kaparirka, kasa nispa:

—Elí, Elí, ¿lema sabaktani?— Chi niraiami: “Nukapa Dios, nukapa Dios, ¿imapatak nukata sapalla saki-wangi?”.

³⁵ Chasa uiaspaka, chipi saianakugpura ninakurka:

—Uiamui. Elías suti ñugpamanda willagtami kaiaku.

³⁶ Chasa iuiarispaka, sug paipura saianakuskamanda kalparka. Winja binuta ispunjava jukuchispa, chaglla puntapi churarka, Jesuspa simima atarichispa, chupachingapa. —Kawasunchi— nirka—, ¿sutipachu Elías samú, paita uraikuchingapa?

³⁷ Jesuska, sinchi kaparispa, wañurka. ³⁸ Wañugllapi, Diospa atun wasi ukupi atun linsu arkaraiaska, awanigmanda ura ladukama chaugpi chaugpimi llikirig-samurka. ³⁹ Jesuspa ñawi ladu kapitan saiakugka, Jestusta imasa wañugta kawaspaka, nirka:

—Kai runa, sutipami Taita Diospa wambra karka.

⁴⁰ Sug warmikunapasmi chipi karkakuna, karu-
mandalla kawaspaka. Paipura karkakunami María Magdalena, Salomé i sug María sutipas; chi María, kati Santiago i Josepa mama. ⁴¹ Paikuna karkakunami Galilea alpa suiu Jestusta sugllapi katiraiagkuna, paita imapi-pas aidaspa. Achka sug warmikunapas, Jesuswa Jerusalem Galileamanda rispa, paikunawa sugllapi karkakuna.

Jesús pambai tukuskamanda

⁴² Warda punchapa tukui suma allichidiru puncha ña chisiarka. Kaiandika, warda puncha pakarikurka. ⁴³ Chi-manda Arimatea puiblumanda José suti runaka, Pilatospagma rirka. Chi runa, judíu mandagkunapura atun taitami karka. Paika, Diospa suma mandai chaia-mungapa punchata suiakurka. Pilatospagma rispaka, mana manchaspalla iaikugrispa, Jesuspa kuirputa mañarka. ⁴⁴ Pilatoska, Jesusmanda ujnarisipami uiarka, ña wañuska kagta nigmanda. Nispaka, chi kapitanta kaiaspa, tapuchirka:

—¿Sutipachu Jesús ña wañuska ka?

⁴⁵ Sutipa kagta iachaspaka, Joseta: —Imasa mañakuskasina, chasa rurai— nirka. ⁴⁶ Chiura Joseka, suma linsu randispa, Jestusta krusmanda uraikuchigrirka. Nispaka, suma linsuwa maituspa, murtajarka. Sug rumi piñapi atun utkuchiskapimi Jesuspa kuirputa churagrirkakuna. Nispaka, utku punguta sug atun rumiwa wichkarkakuna. ⁴⁷ María Magdalena i Josepa mama Mariapas kawarkakuna, maipi Jesuspa kuirputa churagrigtakuna.

Jesús pambaraiaskapi manima tarigriskamanda

16 Judiukunapa warda puncha ña ialiska kaura, María Magdalena, Santiagopa mamandi María i Salomé, suma asna iaku randirkakuna, Jesuspa kuirpupi talligringapa. ² Nispaka, simana kallarii puncha u dumingu iapa tutata, indi ña llugsigllapi, Jesús pambaraiaaskama rirkakuna. ³ Ñambipi, kikinpura tapurinakurka:

—Chi atun utkuchiska pungupi kilparaiaska rumita, ¿pistik anchuchinga, nukanchi iaikungapa?

⁴ Chaiagrispa kawauraka, chi kilparaiaska iapa atun rumi tim anchuchiskami karka. ⁵ Ukuma iaikugriuraka, alli ladu kawarirkakunata sug musu iura katanga churariska tiakugta. Chasa kawaspaka, chi warmikuna iapa mancharirkakuna. ⁶ Chi musuka nirka:

—Mana manchanakuichi. Nazaretmanda Jesús kruspi wañuskatami maskanakungichi. Paika kaugsarir-kami. Kaipi mana kanchu. Pai churaska kaskata kawai-chi. ⁷ Kunauraka, paita katiraiagkunata Pedrowanta willagriichi: “Pai Jesús, ñugpami Galilea alpama rin-

gapa ka. Chipimi kawanakungapa kangichi; imasami kamkunata ñugpa willaska karka: chasa”.

⁸ Chi warmikunaka, chasa kawaspaka i uiaspa, iapa mancharispa chugchuspa, chimanda llugsispa mitikur-kakuna. Dimanchai ñi pitapas mana willagrirkakuna.

Jesús kaugsarispa, paita katiraiagkunata kawariskamanda

[⁹ Chi simana kallarii puncha u dumingu pakariura, Jesuska kaugsarirka. Kaugsarisipaka, ñugpa María Magdalenatami kawarirka. Chi warmitami kanchis kuku wairakunata Jesús llugsichiska karka. ¹⁰ Chi warmika, Jestusta kawaspaka, paiwa sugllapi purigkunata willangapa rirka. Paikuna, Jesusmanda llakispa wakaspa tianakurka. ¹¹ Paikunata willagrirkaka, kasa nispaka:

—Jesús kaugsatami kawarkani—. Paikunaka mana munarkakuna, chasa kagta uangapa.

¹² Chiuramanda Jesuska, iskai runakunata kawarirka, mana rigsiska runasina tukuspa. Chi iskaikunaka, kikinkunapa wasima ñambimi rinakurka. ¹³ Chipi Jestusta kawaspaka, Jerusalem kutirkakuna, sugkunata willangapa. Chasa uiaspapas, ikuti mana munarkakuna, chasa kagta uangapa.

¹⁴ Chiuramanda, chungu sug pai agllaska runakuna mikuspa tianakuura, Jesuska kawarigsamurkakunata. Paikuna mana paimanda suma iuiaskamanda, piñaspa nirkakunata:

—Nuka kaugsariskata kawawagkuna kamkunata willagpipas, ¿imapatak mana uiarkangichi? ¿Imapatak, chituku ninakuskata uiaspapas, kamkunapa uma upa tukuskasina kangichi?

Jesús, pai agllaska runakunata ima mingaskamanda

¹⁵ Jesús, kasa nispami kacharkakunata:

—Kai alpapi tukui kaugsanakuskata nukamanda Alli Willaita rimaspa purigriichi. ¹⁶ Chi nukamanda Alli Willaiwa suma iuiarigkunaka, baugtisarispa, kispiringapami kankuna. Ikuti mana uiagkunaka, diltudupa ninamami kachai tukungapa kankuna.

¹⁷ —Chi nukamanda Alli Willaiwa suma iuiagkunaka, kasami kawachingapa kankuna: nukapa sutiwami kuku wairakunata llugsichingapa kankuna. Mana iachaska rimaikunawami rimangapa kankuna. ¹⁸ Makiwa kulibrata apigpipas u ima wañudiruta upiagpipas, mana imapas tukungapa kanchu. Ungugkunata maki churagpika, ambirigsamungapami kankuna.

Suma luarma, Jesús sikaskamanda

¹⁹ Iaia Jesús chasa rimaspaka, suma luarma sikai kallairirka. Suma luarpi chaiagrispaka, Taita Diospa alli ladu tiarigrirka. ²⁰ Pai agllaska runakunaka, Jerusalem llugsispa, tukui alpapi Alli Willaita rimaspa purii kallairirkakuna. Iaia Jesús kikinmi suma luarmanda paikunata aidamukurka. Paikunata iachai karamurka, mana imaurapas kawaskasina rurangapa; chasaka, paikuna ima rimaskakunaka sutipa kagta kawachingapa.]

SAN LUCAS

San Lucas, Teófilo suti runata willaskamanda

1 Nukapa kuiaska Teófilo:

Achka runakunami iuiarirkakuna, tukui ima nukanchipa alpapi pasariskata iskribispa willangapa.

² Chasa ñugpamandata kawaspa willagkunami nukanchita iachachirkakuna. Paikunaka, Diospa Suma Rimaita willagkunami karkakuna.

³ Nukapas, tukui chikunamanda ñugpamandata suma tapudurmi karkani. Chimandami suma iuiariwá, kamta suiumandata iskribispa willangapa. ⁴ Chasaka, allillami iachankangi, kamta ima iachachiska sutipa kagta.

Juan Bautista tiagsamungapa kagta, sug anjil willaskamanda

⁵ Herodes suti Judea alpapi atun mandag kaura, Zakarías suti judíu sasirduti chipi kaugsakurka. Sug sasirdutikunamanda paika, Abía suti sasirdutikunapurami karka. Paipa warmi, Isabel suti, Aarón suti sasirdutipurapa wambra wambra karka. ⁶ Paikuna, Diospa ñawipi allilla iuiwai kawarimi karkakuna. Atun Taita Dios ima rurangapa niskata tukuimi allilla ruradur karkakuna. Chasapika, ñi pipas mana pudirkakunachu, ñi imapas ninga. ⁷ Isabel chusa kaspá, mana wawita iukarkakuna. Iskandikunami ña ruku karkakuna.

⁸ Chi punchakuna, Zakariasta chaiarka, paipura sasirdutikunawa Diospa atun wasipi imasa niraiaskasina ruragringapa. ⁹ Paikuna kustumbri iukarkakuna, suirtipi maskangapa: pitami chaiá, Taita Diospa atun wasi ukuma iaikuspa, insinsu rupachispa kusnichingapa. Chiura, Zakariastami chaiarka, chi ukuma iaikungapa. ¹⁰ Pai insinsu rupachikunkama, tukui kanchapi kagkuna Taita Diusta suma iuiarispami mañanakurka.

¹¹ Chiuraka atun Taita Diospa sug anjil, Zakariasta kawarigsamurka. Insinsu rupachiduru altar alli ladumi saiakurka. ¹² Anjilta kawaspaka, Zakarías iapa ujnarispa mancharirka. ¹³ Chiura anjilka, paita nirka:

—Mana mancharikui. Kam ima mañakuskata, Taita Dios uiarkami. Chimandami kamba warmi Isabel, sug kari wambra iukapungapa kangki. Paitaka suti-chinkangimi Juan. ¹⁴ Paika, atun Taita Diospa ñawipi atunmi kangapa ka. Chimanda, pai tiagsamuura, iapa suma alli iuiachiiwami tukungapa kangki. Chasallata, achka runakunapasmi kuntintaringapa kankuna. Binuta i ima machadirutapas, pai mana upiangapa kanchu. Manara tiagsamuskauramandata, Santu Ispíritu jundaskami kangapa ka. ¹⁶ Paimi Israelmanda achka

runakunata atun Taita Dioswa tigrachingapa ka.

¹⁷ Nukanchipa Iaiatami ñugpangapa ka. Elías suti Santu Ispirituwa ñugpa rimagsinami kangapa ka; chasallata tukui allilla pudig. Paimi taitakunawa wambrakunawa piñachirinakuskata pasinsiachingapa ka. Chasallata, subirbiaspa mana uiai munagkunata iuiachingapami ka, uia kangapa; chasaka, nukanchipa Iaiá samuura, runakuna suma iuiwai allichiriska suianakungapa.

¹⁸ Chiura Zakarías, anjilta tapurka:

—¿Imasatak nuka iachasa, kam willawaska sutipa kagta? Nukapa warmi i nukapas, iapa rukumi kanchi.

¹⁹ Anjilka ainirka:

—Nukami kani Taita Diospa ñawi ladulla saiakug. Gabrielmi suti kani. Paimi kachamuwarka, chi imasa suma tukungapa kagta kamta willangapa. ²⁰ Nuka ima willakuskata kam mana uiawaskamanda, kunauremandaka mana rimai pudingapa kangichu, imaura wawita tiagsamunkama. Nuka niskaka, chasami tukunga, imaura chaiankama.

²¹ Paikuna chasa rimanakunkama, kanchapi kagkuna Zakariasta unai suianakurka. Mana utka llugsigmamanda mancharispa, tapurinakurka: “¿Imawasik ukupi iapa unaiaku?”. ²² Chiuraka Zakarías, llugsispa, mana rimai pudirka. Makillawa siñas ruraspá kawachikurka. Chiura iuiarirkakuna: paita sutipami Diospa atun wasi ukupi muskui ukupisina ima kawarirka.

²³ Taita Diospa wasipi ima ruraikuna chaiaskata ruraspaka, Zakarías paipa wasima kutirka. ²⁴ Chiuremandaka paipa warmi Isabelka, wigsawa ungug tukugsamurka. Paika, pichka killa mana wasimanda llugsirka. Chillapi karka, kasa iuiarispa: ²⁵ “Kunaure, atun Taita Dios nukata chasa karawagmanda, mana maikanpas wabutiwangapa kankunachu”.

Jesús tiagsamungapa kagta, sug anjil willaskamanda

²⁶ Isabel ña sugta killa wigsawa ungug kaura, Taita Dioska ikuti anjil Gabrielta kachamurka María suti sipaspagma. Pai warmi, Galilea alpamanda Nazaret suti puiblupi kaugsakurka. Mana kari rigsiska karka, ña José suti kariwa kasarangapa. José karkami David suti atun mandagpa wambra wambra.

²⁸ Anjilka, María kaskapi iaikuspaka, nirka:

—Puangi. Atun Taita Dios, kamwami ka. Paipa suma kuaiaita chaskiskami kangki. Kamka, tukui warmikunamandas masmi iapa kuiaska kangki.

²⁹ Chasa uiaspaka María, iapa mancharirka. Iuiarirka: “¿Imapatak chasa saludawaku?”.

³⁰ Anjilka nirka:

—María, mana mancharikui. Kamta, Taita Dios iapa suma kuiaiwami kawá. ³¹ Kunauraka, unguringapami kangi. Nispaka, sug kari wambdami iukangapa kangi. Paitaka sutichinkangimi Jesús. ³² Diospa ñawipi, paika iapa atun niskami kanga. Tukuimanda mas atun Taita Diospa wambdami suti kanga. Atun Taita Dioska, paita kuangapami ka, ñugpamanda taita Davidsina mandangapa; ³³ chasallata, Jakobpa wambdapa wambdarakunata tukui punchakuna mandakungapaglla. Paipa mandaika, mana imaurapas puchukaringapa kanchu.

³⁴ —Nukaka, manara kusaiug kanichu— María anjilta ainirka—. Chimanda, ¿imasatak chasa tukuwanga?

³⁵ Chiura, anjilka ainirka:

—Santu Ispiritumi kam kikinma uraikumunga. Tukui-manda mas atun Taita Diospa iapa iachaiwa puiusina-mi kamta kilpagsamunga. Chimanda wawita tiag-samugka, tukui mas allimi kangapa ka. Taita Diospa wambdami suti kangapa ka.

³⁶ —Willasaki. Kam kikinpura Isabelpas, ña achalaia-kuura, wawitami iukangapa ka. Paimanda “Chusa” ni-nakugpipas, ña sugta killami wigsitawa ungug ka.

³⁷ Taita Diosmanda mana tianchu ñi imapas pai mana pudingasina.

³⁸ Chasa niura, María ainirka:

—Atun Taita Diospa lutrinsinami nuka kani. Kam imasa niwaskasina tukuwachu.

Chiura anjil, Mariapagmanda llugsispa rirka.

María, Isabelpagma chaiangapa riskamanda

³⁹ Chi punchakunamandaka, Mariaka mana unaiilla rirka Judea sachuku sug puiblu tiaskama. ⁴⁰ Chima chaiagrispaka, Zakariaspa wasima iaikuspa, Isabelta nirka:

—Puangi.

⁴¹ Chasa niskata Isabel uiaura, paipa wawitaka wigsu ukupi sinchi kuiurigsamurka. Chiura Isabelta, Santu Ispíritu iaikuspa iuiachigsamurka. ⁴² Chiwanka, sinchi rimaiwa kasami nirka:

—Kamka, tukui warmikunamandapas mas iapa kuiaskami kangi. Kamba wigsapi tiaska wawitapasm chasallata iapa kuiaska ka. ⁴³ Nukaka, ¿imatak kani, chituku suma nuka Iaiapa mama chaiawagsamungapa? ⁴⁴ Kam “Puangi” niwagllapi, nukapa wigsapi tiaska wawita, alli iuiachirispami kuiuriwagsamurka. ⁴⁵ Kam, Taita Diusta suma iuiakuskamandami paipa iapa kuiaska kangi. Tukui imasa atun Taita Dios niskasinami suti-pa chasa tukugsamungapa ka.

⁴⁶ Chiura, Mariaka nirka:

—Nukapa almawa atun Taita Diustami nini:

“Kam, iapa atunmi kangí”.

⁴⁷ Nukapa ispirituwapasmi nini:

“Taita Dios kispichiwigmanda, alli iuiachimi kani”.

⁴⁸ Paipa upalla lutrinsina kagmandami

nukata iapa kuiaspa kawawarka.

Chimandami kunaoramandata tukui kaugsagkuna, nukata sutichiwangapa kankuna,

Taita Diospa iapa kuiaska kagta.

⁴⁹ Tukui allilla pudig Taita Dios, mana imaurapas ruraskasinami nukapi rurarka. Pai, tukui mas allimi ka.

⁵⁰ Maikan paita suma kuiaspa manhaspa suma ruragkunamanda imaurapas llakingapami ka.

⁵¹ Pai tukui allilla pudig kagtami kawachirka.

Tukui runakuna kikin atuniachirisp mana alli iuiag kaskakunata tuntiachirkami.

⁵² Atun mandagkunatapas

kikinpa mandadirumandami uraikuchirkakunata.

Ikuti uchulla mana atun kaskakunataka

atun mandadirupimi tiarichirka.

⁵³ Iarkaiwa kaskakunata

sagsagta suma mikuimi kararka.

Ikuti iapa iukagkunataka

chusa makimi kacharka.

⁵⁴ Nukanchi Israelmanda runakuna paipa lutrin kag-kunatami aidarka.

Paipa suma llakiiwami

nukanchimanda iuiarirka.

⁵⁵ Imasami nukanchipa ñugpamanda taitakunata,

Abrahamta i paipa wambdapa wambdarakunata ruranga nirka:

chasami kunaura ruragsamurka.

⁵⁶ Kimsa killasina Isabelpa wasipi kasp, María, kikin-pa wasima kutirka.

Juan Bautista tiagsamuskamanda

⁵⁷ Isabelta ña puncha chaiaura, sug kari wambdami iukagsamurka. ⁵⁸ Ladullapi kaugsanakug i paipura-kunapas uiaspa karkakuna, imasa atun Taita Dios paikunata alli suma ruragta. Nispaka, chaiangapa rirkakuna, wawita tiaskamanda kuntintulla kaskakunawa sug ratullapas kagringapa. ⁵⁹ Pusag punchapika, ikuti chaiagrirkakuna, wawata judiukunapa marka churachingapa kaura. Munanakurkami, Zakariasllatata taitapa sutisina sutichingapa.

⁶⁰ Mamandika nirka:

—Manima. Juanmi suti kangapa ka.

⁶¹ Chiura nirkakuna:

—¿Imapa? Kamkunapura, mana tianchu pipas chasa suti.

⁶² Chasa nispaka, paipa taitata siñas rurasp, tapur-kakuna:

—¿Imatak suti kanga?

⁶³ Chiura Zakariaska, sug kaspi tablilla mañaspa, iskribispa churarka:

—Juanmi suti ka.

Chasa kawaspaka, tukuikuna iapa ujnarirkakuna.

⁶⁴ Chiurallatata Zakariaspas, ikuti rimai pudirka. Nispaka, Taita Diusta sumaglla nii kallarirka:

—Kam, iapa suma atunmi kangí.

⁶⁵ Chiwa, tukui ladullapi kaugsanakug mancharirkakuna. Judea sachuku suiupas, tukui ima pasariskata uiaspa, paipura rimarinakurka. ⁶⁶ Atun Taita Dios suti-pa paiwa kagmanda, tukui uiagkuna, iuiarisp, tapurinakurka:

—Chi wambra, wiñaspaka, ¿imasik tukunga?

Zakarías imasa kantaskamanda

⁶⁷ Juanpa taita Zakariasta, Santu Ispíritu iaikug-samurka. Chiwanka, imasa kangapa kaskata kasami nirka:

⁶⁸ —Nukanchi Israelmanda runakunapa atun Taita Diusta nisunchi:

“Kam, iapa suma atunmi kangí”.

Paipa runakunata kispichingapami samurka.

⁶⁹ Pai ima niskata rurag Davidpa wambrapa wambra-tami kachamurka,

tukui allilla pudig kaspá,

nukanchita kispichingapa.

⁷⁰ Chasami ñugpamandata

paipa Ispirituwa alli runakunata rimachirka,

kasa nispa:

⁷¹ “Tukui kamkunata mana munagkunamanda i piñagkunamanda kispichisakichitami.

⁷² Kamkunapa ñugpamandakunata niskami karkani, kamkunamanda llakingapa.

Chasallata, nuka ñugpamanda runakunawa iuiaris-kata

mana kungarinichu”.

⁷³ Imasami nukanchipa ñugpamanda taita Abrahamta jurarka, kasa nispa:

⁷⁴ “Kamkunata mana munagkunamanda kispichisakichitami;

chasaka, mana manchaspalla,

⁷⁵ tukuipi suma allilla iuiái iukaspa, Diuspa ñawipi pai ima niskata rurangapa, kaugsankama”.

⁷⁶ Kam nukapa wawa,

tukuimanda mas atun Taita Diuspa Ispirituwa rimag-mi suti kankangi.

Nukanchipa iaiaitami ñugpankangi,

kam ñambi allichiskapi pai chaiamungapa.

⁷⁷ Israelmanda runakunatami iachachinkangi, imasa Taita Dios, pandariskakunata pasinsiaspa, nukanchita kispichingapa kagta.

⁷⁸ Nukanchipa Taita Dios,

paipa suma llakiiwa awa suma luarmanda

punchaiachingapa pakariska suma puncha kagsinami kachamuku;

⁷⁹ chasaka, iapa iana tutapisina iuiaikunawa kaugsanakuskata punchaiachigsamungapa;

chasallata, nukanchita alli ñambi rikuskapi pusagsina iuiachingapa;

chasaka, sumaglla sugllapi kaugsanakungapa.

⁸⁰ Chi wawa, wiñaspaka, Taita Diuspa alli iachaiwami tukurka. Paika, chusa sitaska alpapimi kaugsakurka, imaura Israelmanda runakunata kawaringapa chaiankama.

Iaia Jesús tiagsamuskamanda

2 Chi punchakuna Augusto suti Romapi iaia mandag, paipa alpakuna suiu tukui kaugsanakuskapagma kacharka, paikuna maituku kaugsana-

kuskata tapuchigringapa. ² Musuglla sinsumi rura-kurka, Siria suti alpapi Sirenio mandakuura. ³ Tukui-kunami iukarkakuna, ñugpata taitakuna kaugsaskama ringa, chipi paikuna maituku kaugsanakuska willagrिंगapa. ⁴ Chiwanka, Joseta chaiarka, Galilea alpa i Nazaret puiblumanda llugsispa, Judea alpama ringapa. Belén suti puibluma rirka, paipa ñugpamanda taita David chipi tiagsamuska kagmanda. ⁵ María, Josewa kasarangapa kaspá, paiwa rirka. María, wigsitawami unug karka.

⁶ Belenma chaiagriuraka, tiagsamungapa puncha chaiarka. ⁷ Mana tarirkakuna, maikan wasipipas samaringapa, iapa junda runakuna kagmanda. Chimanda, animalkunapa kaugsadiru ukupi iaikurkakuna. Chi ukupika, Mariaka kari wambra iukagsamurka. Paita-ka linsu pitiwa maituspa, animalkuna mikudiru batiasinapi sirichirka.

Ubijakuna kawagkunata, anjilkuna kawariskamanda

⁸ Belén puiblu kuchu kuchu, sug runakuna tuta ubijakunata kawag pakaridur tiarkakuna. ⁹ Diulpillakar atun Taita Diuspa sug anjil, Diuspa suma punchaiachiiwa paikunata kawarigsamurka. Chasa kawariura, paikuna iapa mancharirkakuna. ¹⁰ Anjilka nirkakunata:

—Mana mancharinakuichi. Suma Willaimi apamukuni. Chi Willaita uiaspaka, tukui runakunami iapa kuntintaringapa kankuna. ¹¹ Kunaurami David tiagsamuska puiblupi kamkunata kispichig tiagsamurka. Taita Dios agllaska iaia Cristomi ka. ¹² Kasa kawaspami paita rigsinkangichi: animalkuna mikudiru batiasinapi linsuwa maituska wawita sirikuskatami tarigrinkangichi.

¹³ Kawarigsamug anjil rimakugllapi, askurinti achka anjilkuna kawarigsamurkakuna. Taita Diusta iapa suma atuniachispa, nirkakuna:

¹⁴ —Taita Dios awa suma luarpi kagtami ninchi: “Kam, iapa suma atunmi kangí”.

Alpapipas, Taita Diusta kuiag runakuna sumaglla kachukuna.

¹⁵ Samug anjilkuna paikunapa suma luarma kutiura, chi ubijakunata kawagkunaka paipura rimarirkakuna, kasa nispa:

—Akushi Belenma. Atun Taita Dios imasa nukanchita anjilkunawa willangapa kachamuskata kawagrisunchi.

¹⁶ Chiuralla, Belén puibluma kalpalla rirkakuna.

Chaiagrispaka, Mariata, Joseta i wawita animal mikudiru batiasinapi sirikuskatami tarigrirkakuna. ¹⁷ Chasa kawaspaka, tukui ima anjilkuna chi wawitamanda nis-kata tukuikunatami willai aparkakuna. ¹⁸ Tukui uiagkunami ujnarirkakuna. ¹⁹ Mariaka, tukui ima uiaskata suma wakachirirka, allilla iuiarispá kangapa.

²⁰ Chiuramanda, chi ubijakunata kawagkuna kutirka-kuna. Tukui imasa willaskasina pasarigta uiaspa i kawaspa, Taita Diusta nirkakuna:

—Kam, iapa suma atunmi kangí.

Diuspa atun wasipi, wawita Jesusta kawachigriskamanda

²¹ Pusag puncha chi wawita iukaura, judiukunapa marka churachirkakuna. Jesusmi sutichirkakuna, imasa anjil, María manara wigsitawa ungug kagpita, niskasina.

²² Nispaka, imasa Moisés niskasina chaiagmandaka, wawa tiagsamuskauramanda limpiulla tukungapa punchakuna ña ialiura, Jesuspa atunkuna paita Jerusalem ma aparkakuna, atun Taita Diusta kawachispa, ningapa: “Kamballami ka”. ²³ Ñugpamanda librupi willaraiá, tukui ñugpa tiagsamuska kari wambrakunata chasa rurangapa. ²⁴ Kasapasmi willaraiá: iskai turtulita u wawa palumitakuna apangapa, atun Taita Diusmanda rupachigringapa. Paikuna, imasa niraiaskasinami ruragrirkakuna.

²⁵ Chi punchakuna, Jerusalem pi kaugsakurka sug runa, Simeón suti. Chi runa, tukui alli rurag, Taita Diusta iuiarisa kaugsagmi karka. Israelmanda runakunata kispichingapa punchakunami pai suiakurka. Santu Ispíritu, paiwa kaspera, ²⁶ iuiachiska karka: “Kam manara wañuspalla, atun Taita Dius agllaska Cristotami kawankangi”. ²⁷ Paika, Santu Ispirituwa iuiachiska kaspera, Diuspa atun wasima rirka. Ña chipi kauraka, wawita Jesuspa atunkuna paita chaiachigrirkakuna, imasa chi librupi willaraiaskasina rurangapa. ²⁸ Chiura Simeonka, wawata chaskispa markaspa, Taita Diusta iapa suma atun kagta nispa, kasa nirka:

²⁹ —Kunaura, nuka kam Taitikupa lutrinsina kaskata sakiwai, sumaglla wañungapa.

Ñami kam imasa niwaskasina tukugsamurka.

³⁰ Kam kachamuska kispichigtami nukapa ñawiwa ña kawakuni.

³¹ Paita allilapimi kachamurkangi, tukui runakunata kawaringapa;

³² mana Israelmanda kagkunata iuiaikunata punchaiachingapa; chasallata, kamba Israelmanda runakunata paimanda iapa suma atun kagta kawachingapa.

³³ Simeón chasa wawitamanda niskata uiaspaka, taita i mamandi ujnarirkakuna. ³⁴ Chiura Simeonka, paikunata nirka:

—Taita Dius, kamkunata iapa kuiaspa kawapua chu—. Nispaka, mamandi Mariata nirka— Uiamui. Kai wawitamandami achka Israelmanda runakuna urmangapa kankuna. Ikuti sugkunaka, paimandami kispiringapa kankuna. Paita kawaspa, achkakunami wabutingapa kankuna. ³⁵ Kamtaka sug ispada almapi ialichigsinami iapa llakii iukangapa kangi. Chiwanka, tukui imasa iuianakuska iacharigsamungapami ka.

³⁶ Chillapita karka Santu Ispirituwa rimag sug warmi, Ana suti, ña iapa awila. Chi warmi, ñugpamanda Aser suti runapa iawar karka. Fanuel suti runapa wambrami karka. Paika, sipas kasararka. Kanchis wata kasaraskauramanda, kusa wañurka. ³⁷ Chiuramanda, mana ikuti kasaraspalla, ña pusag chungu chusku wata kaugsa-

kurka. Diuspa atun wasimanda mana llugsispalla, puncha i tuta Taita Dius ima niskata ruragllami karka. Mana mikuspalla chiasispa i paita iuiarispallami karka. ³⁸ Simeón chasa rimakugllapi, chi warmika, kaillaiaspa, Taita Diusta: “Pai Siñur” nii kallarrirka. Nispaka, Taita Diusta tukui iuiarinakugta wawita Jesusmanda willakurka, kasa nispa:

—Kaimi ka Jerusalem ta kispichingapa samug. Paitami suianakurkanchi.

³⁹ Atun Taita Dius imasa niskata tukui ruraskauramandaka, Jesuspa atunkunaka Galilea alpama Nazaret puiblupi ñugpata kaugsanakuskama kutirkakuna.

⁴⁰ Chipika wambra Jesús, sumaglla wiñaspa rirka. Chasallata, iachai pagta turkurka. Taita Diuspas, iapa sumami paita kuiarka.

Wambra Jesús, Diuspa atun wasipi kaskamanda

⁴¹ Jesuspa mama taitandi, Jerusalem piubluma wata watapi ridur karkakuna, paskua atun punchakuna ialichingapa. ⁴² Jesús ña chungu iskai wata iukauraka, tukui karkakuna, imasa kaskasina ruraspa ialichingapa.

⁴³ Chi punchakuna sumaglla ialichispaka, mama taitandi paikunapagma kutirkakuna. Wambra Jesuska, Jerusalemmanda mana rirka. Chitaka, mama taitandi mana iacharkakuna. ⁴⁴ Iuianakurka: “Sugkunawachar riku”. Chimanda, chisiagta rirkakuna. Nispaka, paipurakunapagpi i rigsidukunapagpi paimanda tapui kallarrirkakuna. ⁴⁵ Mana tarispaka, Jerusalem ma kutirkakuna, maskangapa.

⁴⁶ Kimsa puncha maskanakuskapika, Diuspa atun wasi ukupi paita tarirkakuna. Moisés ima niskata iachachig taitakunapa chaugpipimi tiakurka, uiaspa i paikunata tapuspa. ⁴⁷ Tukuikuna, ujnarispa paita uianakurka, paipa iachaiwa imasa ainikugta.

⁴⁸ Jesuspa mama taitandika, iapa ujnarispa paita kawarkakuna. Mamandi nirka:

—Nukapa wambra, ¿imapatak nukanchita chasa rurarkangi? Kamba taita i nuka, iapa llakiiwami maskaspa purinakurkanchi.

⁴⁹ Chiura, Jesuska ainirka:

—¿Imapatak maskawanakurkangichi? ¿Manachu kamkuna iachangichi, nukapa Taita imasa munaskata rurangapa nukata chaiawakugta?

⁵⁰ Jesuspa mama taitandi mana iacharkakuna, chika ima niraiagta.

⁵¹ Chiuramandaka Jesús, Nazaret puibluma paikunawa kutirka. Chipika, paikuna tukui ima niskata uiaspa, allilla ruraspami sugllapi kaugsakurka. Paipa mamaka, tukui ima pasariskata sumaglla iuiapi wakachirirka.

⁵² Jesuska, sumaglla wiñaspa rirka, Taita Dius i runakunapa ñawipi iapa alli kagta kawari.

Juan Bautista, chusa sitaska alpapi kaskamanda

3 Tiberio suti Romapi iaia mandag ña chungu pichka wata mandakuura, Judea alpapi mandag karka Ponsio Pilatos. Herodes, Galileapi mandakurka.

Waugkindi Felipeka, Iturea i Trakonite suti alpaku napi mandag karka. Abilene suti alpapika, Lisanas manda kurka. ²Iaia sasirdutikuna suti karkakuna Anás i Kaifás.

Chi punchakuna Zakariaspa wambra, Juan suti, chusa sitaska alpapi kaugsakuura, paita Diospa Rimaita willangapa iuiachirigsamurka. ³Nispaka, Jordán suti iaku pata pata kasa willaspa purii kallarirka:

—Pandariikunata sakispa, Taita Dioswa tukugsamui-chi. Baugtisariichi, pandariikunata pasinsiai tukungapa.

⁴Chasami pasarirka, imasa Santu Ispirituwa ñugpamanda rimag Isaías suti willaskasina. Kasami willaraía:

Chusa sitaska alpapi,
sug runa kaparisipami puriku,
kasa nispa:

“Imasami ñambi allichinchi:
chasallata alli iuiiakunata apiichi,
atun Taita Diusta chaskingapa”.

⁵Tukui waikukunata jundachispa pambaiachiichi.

Tukui filu i lumakunatapas pambaiachiichi.
Wistu ñambikunata dirichaichi.

Chasallata, ñambi pusukunata jundachiichi.

⁶Tukui runakuna kawangapami kankuna,
Taita Dios imasa kispichingapa kagta.

⁷Achka runakuna Juanpagma chaianakurka, baugtisarigapa. Chiura paika, maikankunataka nikurka:

—Mana alli runakuna, kulibrasinami kangichi. ¿Pitak kamkunata willagrirka: “Taita Dios iapa rabiariispa llakii puncha ñami chaimuku. Mitikuichi, kispiriska kangapa.”? ⁸Allilla ruraichi, tukui pandariikunata sakispa.

Mana iuiariispa kaichi: “Ñugpamanda taita Abrahampa iawarmi kanchi”. Niikichitami: Taita Dios munagpika, kai rumikunapas pudinkunami, Abrahampa wambra-kuna tukugsamungakuna. ⁹Ñami tukuimanda justisiangapa ka; imasami sachakunata achawa urmachingapa kawaku: chasa. Tukui sacha chusa i mana mikungasina muiiu iukaskakunata anguwanta urmachispa, ninapimi churangapa ka.

¹⁰Chipi kagkuna tapurkakuna:

—Nigpika nukanchitaka, ¿imatak rurangapa chaiá?

¹¹Chiura, Juanka ainirka:

—Maikanpas, iskai kapisaiu iukaspaka, mana iukaskata sug iukachingichi. Chasallata, maikan achka mikui iukaskaka mana iukaskata karangichi.

¹²Mana judíu kaskakunamanda kulki chaskigkunaspa, baugtisarigapa chaigrispaka, Juanta tapurkakuna:

—Iachachig taita, nukanchitaka, ¿imatak rurangapa chaiá?

¹³Chiura, Juanka ainirka:

—Mana iapa kubrangichi. Mailla kaskalla mañangichi.

¹⁴Sug suldadukunapas tapugrirkakuna:

—Nukanchitaka, ¿imatak rurangapa chaiá?

Chiura, Juanka ainirka:

—Manchachispa, ñi llullaspa i ianga juchachispa mana pitapas kichungichi. Mailla gananakuskallawa kuntintaringichi.

¹⁵Juan chasa nikugmanda, tukui chipi kagkuna, Taita Dios agllaska Cristota suianakuspa, paimanda iuiarispa, tapurinakurka:

—¿Paichu Cristo kantra?

¹⁶Juanka, tukuikunata nirka:

—Nuka, iakullawami baugtisaikichita. Ikuti sugmi nukamanda mas iacha samungapa ka. Paita, nuka mana pudinichu, kungurispaspa, paipa chakikunapi churaraiaaska wataskata paskapungapa. Paika, Santu Ispirituwa i nina sindiwasinami baugtisingapa ka.

¹⁷Imasami chagrapi trigu agllag runa, palawa mana alli ugsakunata chabsichispa anchuchí: chasallatami pai suiaku, mana alli iuiagkunata alli iuiagkunapa chaugpimanda anchuchingapa. Alli trigusina kagkunata sugllapi sumami wakachingapa ka. Ikuti mana alli ugsasina kagkunataka mana wañug ninapi rupakungapami sitangapa ka.

¹⁸Achka sug rigcha sug rigcha rimaikunawapas Cristomanda Alli Willaitami Juan willakurka.

¹⁹Kasapas. Mandag Herodesta piñaspami iuiachikurka, chi Herodes, waugkindipa warmi Erodías sutiwa kaugsakugmanda. Tukui sug mana allilla ruraskakunamandapasmi piñaspa iuiachikurka. ²⁰Chasa piñakugmanda, Herodeska karsilpi churachirka. Chasa ruras-paka, mas mana allilla rurag kagtami kawachirirka.

Jesús baugtisariskamanda

²¹Juanta manara karsilpi churagpi, tukui chipi kagkunami baugtisarirkakuna. Chiura, Jesuspasmi baugtisarigrirka. Taita Diusta rimakunkama, awa suma luar paskarirka. ²²Chiura Santu Ispiritu, palumasina rigcha kawarisipami Jesuspagma uraikumurka. Suma luar-manda rimaipas uiarigsamurka, kasa nispa:

—Kam, nukapa kuiaska wambraimi kangi. Kamta kawaspa, iapa alli sumami iuiachiwa kawaiki.

Jesucristopa ñugpamanda achala taitakuna

²³Jesús, Alli Willaita willai kallariura, kimsa chungu watasina iukarka. Tukuikuna iuianakurka, pai Josepa wambra kagta.

José karka Elipa wambra.

²⁴Elí karka Matatpa wambra.

Matat karka Levipa wambra.

Leví karka Melkipa wambra.

Melki karka Janapa wambra.

Jana karka Josepa wambra.

²⁵José karka Matatiaspa wambra.

Matatías karka Amospa wambra.

Amós karka Naumpa wambra.

Naum karka Eslipa wambra.

Eslí karka Nagaipa wambra.

²⁶Nagai karka Maatpa wambra.

Maat karka Matatiaspa wambra.

Matatías karka Semeipa wambra.

Semei karka Josekpa wambra.
 Josek karka Judapa wambra.
²⁷ Judá karka Joananpa wambra.
 Joanán karka Resapa wambra.
 Resa karka Zorobabelpa wambra.
 Zorobabel karka Salatielpa wambra.
 Salatiel karka Neripa wambra.
²⁸ Neri karka Melkipa wambra.
 Melki karka Adipa wambra.
 Adi karka Kosampa wambra.
 Kosam karka Elmadampa wambra.
 Elmadam karka Erpa wambra.
²⁹ Er karka Jesuspa wambra.
 Jesús karka Eliezerpa wambra.
 Eliezer karka Jorimpa wambra.
 Jorim karka Matatpa wambra.
 Matat karka Levipa wambra.
³⁰ Leví karka Simeonpa wambra.
 Simeón karka Judapa wambra.
 Judá karka Josepa wambra.
 José karka Jonampa wambra.
 Jonam karka Eliakimpa wambra.
³¹ Eliakim karka Meleapa wambra.
 Melea karka Menapa wambra.
 Mena karka Matatapa wambra.
 Matata karka Natanpa wambra.
 Natán karka Davidpa wambra.
³² David karka Isaipa wambra.
 Isaí karka Obedpa wambra.
 Obed karka Boozpa wambra.
 Booz karka Salapa wambra.
 Sala karka Naasonpa wambra.
³³ Naasón karka Aminadabpa wambra.
 Aminadab karka Adminpa wambra.
 Admin karka Arnipa wambra.
 Arni karka Esrompa wambra.
 Esrom karka Farespa wambra.
 Fares karka Judapa wambra.
³⁴ Judá karka Jakobpa wambra.
 Jakob karka Isaakpa wambra.
 Isaak karka Abrahampa wambra.
 Abraham karka Tarepa wambra.
 Taré karka Nakorpa wambra.
³⁵ Nakor karka Serugpa wambra.
 Serug karka Ragaupa wambra.
 Ragau karka Pelegpa wambra.
 Peleg karka Eberpa wambra.
 Eber karka Salapa wambra.
³⁶ Sala karka Kainanpa wambra.
 Kainán karka Arfaxadpa wambra.
 Arfaxad karka Sempa wambra.
 Sem karka Noepa wambra.
 Noé karka Lamekpa wambra.
³⁷ Lamek karka Matusalenpa wambra.
 Matusalén karka Enokpa wambra.
 Enok karka Jaredpa wambra.
 Jared karka Maalaleelpa wambra.
 Maalaleel karka Kainanpa wambra.

³⁸ Kainán karka Enospa wambra.
 Enós karka Setpa wambra.
 Set karka Adanpa wambra.
 Adán karka Taita Diospa wambra.

Iaia kuku, Jesusta pandariikunapi urmachingapa munakuskamanda

4 Jesús baugtisariskauramanda, Santu Ispíritu paima iaikurka. Nispaka, Jordán iakumanda kutirka. Chiura Santu Ispíritu, chusa sitaska alpama paita pusarka. ² Chipika, chusku chungu punchami chisiarka. Chi punchakuna iaia kuku, pandariikunapi paita urmachingapa munakurka.

Tukui chi punchakuna Jesús, mana ñi imapas mikuspalla chisiakurka. Chi chusku chungu puncha ialiskauramandaka, iapa iarkaimanda iuiachig-samurka. ³ Chiura, chi iaia kukuka nirka:

—Kam Diospa wambra kagpika, kai rumita nii: “Tanda tukui”.

⁴ Jesuska ainirka:

—Ñugpamanda librupi, kasami willaraiá: Runakuna, mana tandallawa kaugsangapa kankunachu.

Taita Dios tukui ima rimaskakunawami kaugsangapa chaiá.

⁵ Nispaka chi iaia kukuka, iapa awa filuma pusaspa, sug kawaridirumanda kai luarpi tukui alpakunata kawachirka. ⁶ Nispaka nirka:

—Tukui chi alpakunatami karasaki, kam mandag kangapa; chasallata, tukui ima chipi suma tiaskakunatapas, kamballa kangapa. Tukuimi nukata kuawaska ka. Chimanda, nuka maikan munaskatami karasa.

⁷ Kam kunguriwagpika, tukui kamballami kanga.

⁸ Chiura Jesuska, chi iaia kukuta ainirka:

—Ñugpamanda librupi, kasami willaraiá: Kamba atun Taita Diosllata kungurispaga kangi. Pai ima niskallatami iukangi ruraspa kanga.

⁹ Ikuti chi iaia kukuka, Jerusalén puibluma pusaspa, Diospa atun wasi awa puntapi saiachigrirka. Nispaka nirka:

¹⁰ —Kam Diospa wambra kagpika, kaimanda alpama sitarii. Ñugpamanda librupi, kasami willaraiá:

Taita Dios, paipa anjilkunatami ninga, kamta kawag-samungapa.

¹¹ Paikunapa makipimi urmankangi.

Chasaka, mana rumipi u imapipas chaki takarinkangichu.

¹² Jesuska ainirka:

—Kasapasmi willaraiá:

Kamba atun Taita Diusta mana ianga ningi: “Abir kawasaki: ¿pudingichu?”.

¹³ Chasa chi iaia kuku, tukui imawapas pandachingapa mana pudispaka, Jesusta sakispa, sug punchakunakama rirka.

Galilea alpapi, Jesús willai kallariskamanda

¹⁴ Jesuska, Santu Ispiritupa iapa iachaiwa Galilea alpama ikuti rirka. Chipika, judiukuna tandariduru wasi-kunapi iachachii kallarigrirka. Paimanda, tukuikuna sumaglla uiaspa rimanakurka.

Jesús, kikinpa puiblupi wabutii tukuskamanda

¹⁶ Chiuramanda Jesús, pai wiñaska Nazaret puibluma chaiagrirka. Sug warda punchaka, tandariduru wasima iaikurka, imasa kustumbri kaskasina. Chipika saiarirka, ñugpamanda librupi willaraiaskata chaskingapa.

¹⁷ Chiura, Isaiás suti Santu Ispirituwa rimag ima willaraiaskata kuarkakuna. Maskaspa, tarirka maipi kasa niraiaskata:

¹⁸ Atun Taita Diospa Ispiritu, nukawami ka.
Agllaskami kani, mana iukagkunata Allí Willaita willagringapakunata.
Kachamuskami kani,
karsilpi kaskakunata willangapa kacharii tukungapa kagtakuna;
chasallata, mana ñawi kawagkuna ikuti kawagsamungapakuna;

mana allilla rurai tukuskakunata kispichingapa;

¹⁹ atun Taita Dios kispichii wata chaimuskata willangapa.

²⁰ Jesús chasa rimaspaka, chi niraiaska libruta wichaspa, kutichispaka, tiarirka. Tukui chipi kagkuna, paita upalla kawanakurka. ²¹ Chiura Jesuska, kasami nii kallarirkakunata:

—Kuna punchami, kamkunapa ñawipi, imasa chi willaraiaskasina tukugsamurka.

²² Chipi tukui kagkuna, paimanda allilla rimanakurka. Pai iapa suma rimakugmanda, ujnarispa tapurinakurka:

—Kai runaka, ¿manachu ka Josepa wambra?

²³ Jesuska nirkakunata:

—Imasami ninkuna: chasami niwankangichi: “Ambig runa, kam kikinlla ambirii”. Kasapasmi niwankangichi: “Kam, tukui imasa Kafarnaum puiblupi ruraskata uia-riskasina kai kam kikinpa alpapiipas chasallata rurai”.

²⁴ Kasapasmi Jesús nirka:

—Kasami nuka niikichita: ñi maikan Santu Ispirituwa rimagkunata kikinpa alpapi kaugsagkuna mana munankunachu uiangapa. ²⁵ Sutipami kasa niikichita: ñugpamanda rimag Elías kaugsakuura, kimsa wata sugta killami mana tamiarka. Tukui alpapi iapa iarkaimi tukurka. Chiurakuna, kai Israel alpapi achka sapalla kidaska warmikunami tiarka. ²⁶ Chi warmikunapagma, Taita Dios Eliasta mana kacharka. Sidón puiblu ladullapi Sarepta suti puiblupi kaugsag biudapagmami kacharka.

²⁷ —Chasallata, ñugpamanda Eliseo Santu Ispirituwa rimag kaugsakuura, kai Israel alpapi achkakuna aicha ismúi unguiwa tiarkakuna. Chi ungugkunata, Eliseo mana ambirka. Siria alpamanda samuska Naamán suti runallatami ambirka.

²⁸ Chasa uiaspa, chi wasi uku tukui kagkuna iapami rabiarrirkakuna. ²⁹ Tukuikuna, atarispas, Jesusta puiblumanda llugsichii kallarirkakuna. Chi puiblu, luma awapi wasikuna saiachiskami iukarkakuna. Chi luma awamanda tangangapa iuiawami Jesusta apanakurka.

³⁰ Paika, paikunapa chaugpimanda kichuchirispas, llugsispa rirkalla.

Sug runa kuku waira iaikuskata, Jesús ambiskamanda

³¹ Nispaka, Galilea alpapi Kafarnaum suti puibluma chaiagrirka. Chipika, warda punchakuna ³² iachachii kallarirka. Pai iachachikuskata uiaspas, tukuikuna iapa ujnarrirkakuna. Allilla mandagsinami iachachikurka.

³³ Chi tandariduru wasipika, sug kuku waira iaikuska runami chaiagrirka. Chi runaka, sinchi kaparispa nirka:

³⁴ —Ai, Nazaret puiblumanda Jesús, ¿imapatka nukanchipagma samurkangi? Nukanchita puchungapachar samurkangi. Nuka allillami rigsiki, kam Taita Diospa tukuipi mas allí wambra kagta.

³⁵ Jesuska, kuku wairata piñaspa, nirka:

—Upalla rikui, kai runamanda llugsispa.

Chiura chi kuku wairaka, tukuikunapa ñawipi chi runata alpama urmachispa, llugsirka, mana imapas lisiachispalla. ³⁶ Tukui chasa kawagkuna, iapa mancharirkakuna. Kikinpura tapurinakurka:

—¿Ima rimaisik ka? Kai runaka, paipa iapa iachaiwa atun mandagsina kuku wairakunata rimaspa, runamanda llugsichí.

³⁷ Chasa ruraskakunata kawagkunawaka, tukuima Jesusmanda iacharigsamurka.

Achka ungugkunata, Jesús ambiskamanda

³⁸ Chi tandariduru wasimanda llugsispa, Jesús, Simonpa wasipi iaikugrirka. Chipika Simonpa suigra, iapa rupaiwami ungug sirikurka. Jesusta mañarkakuna:

—Ambipuai.

³⁹ Chiura Jesuska, chi ungugpagma kaillaiaspa, kumurispa nirka:

—Kai rupai anchurii.

Chiuralla, rupai anchurirka. Anchurigllapi chi warmi, atarispas, mikui ianuspa, karai kallarirkakunata.

⁴⁰ Indi ña chingakuuraka, achkakuna ima unguiwa kaskakunatami Jesuspagma chaiachigrirkakuna. Chiura Jesuska, tukuikunata maki churaspa, ambirkakunata. ⁴¹ Chasallata kuku wairakunatapas, achkakunatami llugsichirka. Chi kuku wairakuna, kaparispa, ninakurka:

—Taita Diospa wambreami kangí.

Jesuska, chasa kaparinakuskata piñarka. Chi kuku wairakuna iacharkakuna, pai Taita Dios agllaska Cristo kagta. Chimandami chi kukukunata mana sakikurka, chasa rimangapa.

⁴² Pakariillapi Jesuska, chi puiblumanda rirka, mana maikan runakunapas kaugsanakuska pambama. Chi puiblumanda achka runakunaka, paita maskaspa, pai kaskama chaiagrirkakuna. Munanakurka paikunapag-

llapi kangapa, mana maimapas rispalla. ⁴³ Chasa mañanakuskata uiaspa, Jesuska kasami nirka:

—Nukata chaiawakumi, sug puiblukunapipas Diospa suma mandaimanda Alli Willaita willaspa puringapa. Chasamandami nuka kachamuska kani.

⁴⁴ Pai imasa niskasina, Judea alpapi tukui tandariduru wasikunapi iaikuspa, Alli Willaita willaspami purikurka.

Askurinti achka chalthwakuna apiskamanda

5 Jesús Jenesaret suti kucha patapi kauraka, achka runakuna paita tanganakuiwantami kaillaiagrikakuna, Diospa Rimaita uangapa. ² Chi iaku patapi, iskai chusa kanuami tiarka. Kanuamanda chalthwadurkuna, llugsispa, ataraiakuna tagsanakurka. ³ Chasa kawaspaka, Jesuska sug kanuapi iaikurka. Nispaka, chi kanua Simonpa kagmanda, paita mañarka:

—Kai kanuata alpamanda asllita karuiachipuui.

Chasa rurauraka, kanuapi tiarispas, chipi kagkunata iachachii kallarirka. ⁴ Iachachii puchukaspaka, Simonta nirka:

—Kanuata jundu kuchama apaspaka, ataraiagriichi, chalthwa apingapa.

⁵ Simonka ainirka:

—Iachachig taita, pakarigtami chalthwanakurkanchi. Ñi imapas mana apirkanchichu. Kam chasa niwagmanda, nigpika ataraiagrisa.

⁶ Chasa ataraiagriuraka, iapa achka chalthwa apirkakuna, ataraiakunapas ñalla llikirigta. ⁷ Chiura, sug kanuapi kaskakunata makiwa kaiarkakuna, aidagringapa. Chaiagrispaka, iskandi kanuapi chalthwakuna jundachigirirkakuna, ñalla kanuakunapas asintarigta.

⁸ Chasa kawaspaka Simón Pedroka, kungurispa, Jesuska nirka:

—Taita waugki, nukamanda anchuripuui. Nuka, iapa pandaridurmi kani—. ⁹ Iapa achka chalthwakuna apirigmandas, Simón i tukui paiwa kagkuna askurinti mancharirkakuna. ¹⁰ Santiago i Juan suti Zebedeopa wambrakuna Simonwa purig kagkunapas, chasallata mancharirkakuna.

Jesuska, Simonta nirka:

—Mana mancharikui. Kunauramanda iachachisakimi, chalthwakunata apigsina, runapura maskapuag kangapa.

¹¹ Chasa uiaspaka, kanuakunata alpama llugsichispa, tukui ima tiaskakunata sakispa, Jesuska katirkakuna.

Aicha ismui unguiwa kaskata, Jesús ambiskamanda

¹² Jesús ña sug puiblupi kagriuraka, sug runa, aicha ismui ungui iukaspas, paipagma kaillaiagrikakuna. Chi runaka, Jesuska kawaspas, ñallapas alpakama kumurispa, nirka:

—Taita waugki, kam munaspaka, pudingimi nukata ambiwanga.

¹³ Chiura Jesuska, unugta maki churaspa, nirka:

—Ari, munanimi. Ambiriska tukui.

Chasa nigllapi, chi ungui allilla ambirigsamurka.

¹⁴ Chiura, Jesuska nirka:

—Mana pitapas willakungi. Sasirdutita kawachirigrii. Moisés kamariku karangapa niraiaskata karagrii. Chasaka, tukuikunami kawangakuna, kam allilla ambiriska kagta.

¹⁵ “Mana willakungi” nigpipas, Jesús ima ruraskamanda masmi iacharikurka. Chiwanka, iapa achka runakuna tandaridur karkakuna, paita uangapa. Chasallata, ungugkunatapas ambichingapa apadur karkakuna. ¹⁶ Chimanda Jesuska, maikan runapas mana kaugsanakuskama ridur karka, Taita Dioswa rimanakungapa.

Mana kuiuringapa unguiwa kaskata, Jesús ambiskamanda

¹⁷ Sug punchakuna ialiura, Jesuska iachachikurka. Chipika, sug fariseokuna i Moisés ima niskata iachachig taitakuna tianakurka. Chi taitakuna karkakuna Galilea i Judea alpakuna suui i Jerusalemmandas chaiagriskakuna. Chiura Jesuska, atun Taita Diospa iapa iachaiwa karka, ungugkunata ambingapa.

¹⁸ Jesús iachachikuuraka, sug runakunaka, mana kuiuringapa unguiwa kaskata chakanapi sirichispa, chi wasima aparkakuna. Iuianakurka: “Wasi ukuma iaikuchispa, Jesuspa ñugpa ladumi churasunchi”. ¹⁹ Chasa iuianakuspapas, iapa achka runakuna ukupi junda kagmandas, mana iaikuchii pudirkakuna. Chimandaka, wasi awama sikachirkakuna. Wasita utkuchispa, chi runa chakanapi sirikuskata tukuikunapas chaugpipi Jesuspa ñawi ladu uraikuchirkakuna. ²⁰ Chiura Jesuska, “Ambipuangami” iuianakuskata kawaspaka, mana kuiuringapa unguiwa kaskata nirka:

—Waugki, kam pandariikunata ñami pasinsiasa kangki.

²¹ Chasa uiaspaka, Moisés ima niskata iachachig taitakuna i fariseokunaka kikipura ninakurka: “Kai chasa rimag, Diussina tukuspa, ¿pisik ka? Ñi pipas mana pudinkunachu, pandariikunata pasinsiangapa. Taita Diosllami pasinsiangapa pudí”.

²² Jesuska, chasa iuianakuskata iachaspaka, nirkanunata:

—¿Imapatak chasa sungullapi iuianakungichi?

²³ ¿Maikantak mas alli ka ningapa: “Kam pandariikunata ñami pasinsiasa kangki”? Mana kagpika, ¿ningapa: “Atarii; kamba wasima riilla; ña ambiriskami kangki”?

²⁴ Kunaura kawachisakichita: kai Runa Tukuska, kai alpapi pudinmi, pandariikunata pasinsiangapa.

Chasa nispa, mana kuiuringapa unguiwa kaskataka nirka:

—Nukami niiki: atarii. Chakanata markarispas, kamba wasima rii.

²⁵ Chasa nigllapi, tukui chipi kagkuna kawanakugllapi, chi runa atarirka. Chakana sirikuskata markarispas, wasima rirka, Taita Dios iapa suma atun kagta nispa.

²⁶ Chiwa tukuikuna, iapa ujnarispa tukugsamurkakuna. Taita Diusta iapa suma atuniachirkakuna. Iapa mancharispa, nirkakuna:

—Kuna puncha, ñi imaurapas mana kawaskatami kawarkanchi.

Leví suti runata, Jesús kaiaskamanda

²⁷ Chiuramanda Jesuska, Ilugsispa, Leví suti runa mana judíu kaskakunamanda kulki chaskikuskapi tiakugta kawaspa, nirka:

—Katiwai.

²⁸ Chiura chi runa, atarispá, Jesusta katichirkalla, tukui sakispa. ²⁹ Nispaka, atun punchasina suma mikui Jesusta paipa wasipi karagrirka. Paipura kulki chaskigkuna i sug achkakunapas, sugllapi paikunawa tiarigrirkakuna. ³⁰ Chasa kawaspaka, fariseokuna i Moisés ima niskata iachachig taitakuna Jesusta katiraiagkunata piñaspa tapurkakuna:

—¿Imapatak mana judíu kaskakunamanda kulki chaskig i mana allilla ruragkunawa sugllapi mikunakungichi i upianakungichi?

³¹ Jesuska nirkakunata:

—Mana unguiwa kagkuna mana ministinkunachu, ambigta maskangapa. Ungugkunami ambigta maskankuna. ³² Chasallata, nukaka mana samurkanichu, allilla ruragkunata kaiangapa. Mana allilla ruragkunata maskangapami samurkani, paikunata allilla ruraikunama tigrachingapa.

Imaura mana mikungapa, Jesús iachachiskamanda

³³ Chipi kagkuna, Jesusta nirkakuna:

—Juanwa i fariseokunawa purigkuna, achka punchakuna mana mikuspallami chisiadur kankuna, Taita Diusta mañaspalla. Ikuti kamta katiraiagkunaka, imaurapasmi mikunkuna i upiankuna.

³⁴ Chiura, Jesuska ainirkakunata:

—Kasaraipi, kusa tukunga kunbidaskakunawa kankama, ¿pudinkangichichu ninga: “Mana mikuspalla kai-chi”? Manima. ³⁵ Imaura chaiachu, kusa anchuchii tukungapa: chiurami paikunata chaianga, mana mikuspalla kangapa.

³⁶ Nispaka, chipi kagkunata iui ai apingasina suma parlarka, kasa nispá:

—Ñi pipas, musu katangamanda piti mana llikichinkangichichu, ruku katangapi sirangapa. Chasa siragpika, musu katangami wagllirí. Musumanda piti-pas rukupi siraska mana sumanchu.

³⁷ —Chasallata ñi pipas, musu binu, ruku kara taligapi mana tallingichichu. Chasa talligpika, musu binu timbuura, taligata tugiachispami icharinga. Kara taligapas mana balingachu. ³⁸ Chimandami musu binu, musu taligapi tallingapa chaía.

³⁹ —Ñi pipas, suma timbuska binu upiaspaka, llullu binutaka mana upiai munangapa kangichichu. “Timbuskatami mas alli ka” ningapami kangichi.

Warda punchamanda, Jesús iachachiskamanda

6 Sug warda puncha, Jesús katiraiagkunawanta chagra tarpuraiaskakunapi ialinakurka. Katiraiagkunaka, trigu ispigakunata pitispa, makiwa kauspa, murukunata mikunakurka. ² Chasa kawaspaka, sug fariseokuna tapurkakuna:

—¿Imapatak warda puncha pandarinakungichi?

³ Jesuska ainirkakunata:

—¿Manachu ñugpamanda librupi willaraiaskata kawarkangichi, taita David i paiwa kagkunapas, iarkaimanda kaspera, imasa ruragtakuna? ⁴ Pai kikin, Diuspa wasi ukuma iaikuspa, altarpí churaska tandakuna tias-kata aisaspa, mikurka, mana imapas mancharispalla. Chi tandakuna, sasirdutikunalla mikudirumi karka. Chi tandakunallatata paiwa kagkunatapas kararka, mikungapa.

⁵ Kasapasmi Jesús nirkakunata:

—Kai Runa Tuskuska pudinmi ninga, warda punchakunatapas imasa chaiaskasina rurangapa.

⁶ Sug warda punchaka Jesús, tandariduru wasipi iaikuspa, iachachikurka. Chipika, sug alli ladu maki chakiriska unguiwa kag runa, paikunawa sugllapi karka.

⁷ Chiura Moisés ima niskata iachachig taitakuna i fariseokunaka, Jesusta chapanakurka, warda puncha ambichu; ambigpika, paimanda justisiakunapagma willagringapa. ⁸ Jesuska, paikuna ima iuianakuskata iachaspa, chi runa maki chakiriska kaskata nirka:

—Atarii. Runakunapa chaugpipi saiarigrirka.

Chiura chi runa, atarispá, chipi saiarigrirka. ⁹ Chiura Jesuska, chi taitakunata nirka:

—Tapusakichita: warda puncha, ¿imaták mas alli ka: allilla u mana allilla rurangapa; runata kispichingapa ubi puchukangapa?

¹⁰ Chasa tapuspaka, tukui paipa muiugta kagkunata kawaspa, chi runata nirka:

—Maki chutachii.

Chasa chutachigllapi, chi makika aliarka. ¹¹ Chipi kag taitakuna, Jesuswa iapa rabiarispa, kikinpura tapurinakurka:

—¿Imatak kai runata rurasunchi?

Chunga iskai runakunata, Jesús agllaskamanda

¹² Chi punchakuna Jesuska, awa lumama rirka, Taita Diusta rimangapa. Chipi, pakarigtami Taita Diuswa rimanakurka. ¹³ Pakariuraka, tukui paita katiraiagkunata kiaspa, chungá iskaikunatami agllarka. Chi agllaskakunataka nirka:

—Nukami kamkunata kachanakuikichita, nukamanda Alli Willaita willagkuna kangapa.

¹⁴ Chi agllaskakuna, kasami suti karkakuna: Simón (paita, Jesús sutichirka Pedro); paipa waugki Andrés; Santiago i Juan; Felipe i Bartolomé; ¹⁵ Mateo i Tomás; Alfeopa wambra Santiagollatata suti; sug Simón (kaneoneo suti runakunawa ñugpata purig); ¹⁶ Santiagopa waugki Judas; i Judas Iskariote, Jesusta katuspa apichig.

¹⁷ Chiuramanda Jesús, chi lumamanda pai agllaska runakunawanta uraikuspa, sug pamba alpama chaiagrirkakuna. Chipika, achka paita katiraiagkuna tandariska karkakuna. Chasallata iapa achka runakuna, Judea alpa suiunigmanda, Jerusalén puiblunigmanda, i Tiro i Sidón puiblu lamar iaku patamandakuna, Jesusta uiangapa i ungugkunata ambichingapa tandarigriska karkakuna. ¹⁸ Chiurallatata, kuku wairawa kagkunapas-

mi ambirirkakuna. ¹⁹ Jesús, paipa iapa iachaillawa tukui unguiwa kaskakunatami aliachikurka. Chimanda tukui chipi kagkuna, paita llamkangapami munanakurka.

Taita Diospa iapa kuiaskakuna

²⁰ Chiura Jesuska, paita katiraiagkunata kawaspa, kasami nirka:

—Kamkuna Taita Dioswa iuiarispá mana iukagsina tukugkuna, paipa iapa kuiaskami kangichi. Kamkuna, Dios suma mandakuskapimi iaikugringapa kangichi.

²¹ —Iapa iarkaimanda kunaúra kagkunapas, Taita Diospa iapa kuiaskami kangichi. Paillatata ma allí munaskata karamungapa ka.

—Kunaúra iapa llakiiwa wakanakuskapas, Taita Diospa iapa kuiaskami kangichi. Nispaka asinkangichimi.

²² —Kai Runa Tukuskamanda iuiarispá, maikanpas kamkunata piñaspá, llugsichispá, kamsispá, imasa mana allillawa sutichinakugpipas, Taita Diospa iapa kuiaskami kangichi. ²³ Chasa mana allilla kamkunata ruragpipas, kuntintarispalla kangichi. Kamkunata, Taita Dios sug luarpi askurinti sumami tukui karangapa ka. Chasallatami ñugpata kaugsag runakuna Santu Ispirituwa rimagkunatapas mana allilla rurarkakuna.

Taita Diospa ñawipi mana allí kagkuna

²⁴ —¡Ai, kamkuna iapa iukag kagkuna! Ñami tukui chaskirkangichi.

²⁵ —¡Ai, kamkuna kunaúra sagsaskalla kagkuna! Kamkunata chaiangapami ka, iapa iarkaiwa kangapakuna.

—¡Ai, kamkuna kunaúra asigkuna! Kamkunata chaiangapami ka, iapa llakiiwa wakaspá kangapakuna.

²⁶ —¡Ai, kamkunamanda iapa allilla tukui runakuna rimagmanda! Chasallatami ñugpata kaugsag runakunapas, Diospa Rimaita llullaspá willanakugmanda, “Iapa allillami ka” nirkakuna.

“Kamkunata piñanakuskata kuiangichi”

²⁷ —Chasa kagpipas, kamkuna uiawagkunata kasami niikichita: kamkunata piñanakuskata kuiangichi. Kamkunata mana munanakuskatapas allilla rurangichi.

²⁸ Kamkunata kamigkunatapas ningichi: “Taita Dios, kamkunata iapa kuiaspá kawapuachu”. Kamkunata mana suma ruragkunamandapas Taita Diusta paikunamanda allilla mañapungichi.

²⁹ —Maikanpas kachitipi kamta piagpika, sug ladu kachitipi piangapapas sakiringi. Maikan kamta kapi-saiu kichungapa munagpika, kusmatapas kuangi apachu. ³⁰ Maikanpas ima mañaskata karangilla. Ima kambatapas maikan kichugpipas, mana ningi: “Kutichiwai”. ³¹ Imasami munanakungichi, sugkuna kamkunamanda allilla rurachukuna: chasallata kamkunapas, paikunamanda allilla rurangichi.

³² —Kam kikinpuralla kuanakuspa kagpika, kamkunaka, ¿imatak Taita Dios karangapa suianakungichi? Maikan mana allilla ruraspa kaugsanakugpurapas kuanakuspami kaugsankuna. ³³ Chasallata, kam-

kunata suma ruragkunallata suma ruragpika, kamkunaka, ¿imatak Taita Dios karangapa suianakungichi? Mana allilla ruragkunapas, paipura suma rurana-kuspami kaugsankuna. ³⁴ Maikanpas kutichiwachu iuiaspalla mañachigpika, kamkunaka, ¿imatak Taita Dios karangapa suianakungichi? Mana allilla ruragkunapas, paipura mañachirinakú, parijuma kutichirinakungapa.

³⁵ —Chasapaka, kamkunata mana munaspá piñanakuskata kuiaspá, tukui allillata rurangichi. Mañachingichi, mana kutichingapa iuiaspalla. Chasaka, tukui sumagllami sug luarpi chaskigrinkangichi. Chasapi, tukuikunamanda mas atun Taita Diospa wambrakunamí tukungapa kangichi. Taita Dioska, tukui mana “Pai Siñur” niskakunata i mana allilla ruragkunatapas paipa llakiiwa sumagllami kawá. ³⁶ Imasami kamkunapa Taita Dios, kamkunata llakiiwa sumaglla kawá: kamkunapas chasallatami iukangichi, sugkunata llakiiwa kuiaspá kawanga.

“Mana pitapas pandariskakunata kawangichi”

³⁷ —Mana pitapas pandariskakunata kawangichi. Chasaka Taita Dios, mana kamkuna pandariskata kawangachu. Mana sugkunata ningichi: “Diltudupa ninama ringapami kangichi”. Chasaka Taita Dios, mana kamkunata chi ninama kachangachu. Sugkuna pandariskakunata pasinsiangichi; chasaka Taita Dios, kamkuna pandariskakunatapas pasinsiangami.

³⁸ —Sugkunata karangichi; chasaka Taita Dios, kamkunatapas karangami. Achka, junda, icharigtami karanga. Imasami sugkunata kamkuna tupungichi: chasallatami Taita Dios, kamkunata allilla u mana allilla ruraskata tupungapa ka.

³⁹ Chasa nispaka, chipi kagkunata iuiái apingasina suma parlarka, kasa nispa:

—Mana ñawí kawag, sug mana ñawí kawagta pusagpika, ¿manachu iskandikuna pusuma urmagrintrakuna? ⁴⁰ Ñi maikan iachaikugkuna, iachachiskamanda mas iacha mana kankunachu. Tukuipi allilla iachaikugpika, iachachiskasinallatatami tukunga.

⁴¹ —¿Imapatak sugpa ñawipi juituriska ugsata kawakungi; ikuti kam kikinpa ñawipi sug atun ugsa juituriska iukaskataka mana kawaringi? ⁴² Chasallata, kam kikinpa ñawipi chi atun juituriska iukaskata mana kawarispalla, ¿imasatak sugta ninkangi: “Waugki, ñawipi juituriska ugsata anchuchisaki”? Sungu awalla rimag, kam kikinpa ñawita chi atun juituriska iukaskata ñugpa anchuchirii. Chasa ruraspami allilla kawankangi, sugpa ñawita juituriska ugsata anchuchingapa.

⁴³ —Kasapas. Allí sachakunapi winja muiú mana tukugsamunchu. Mana allí sachakunapika miski muiú-kuna mana tiarinchu. ⁴⁴ Tukui sacha, muiúkuna tiariurami rigsirí, allí u mana allí kagta. Ispinaiug sachakunapi mana igus muiú tandachirinchu. Chini sachakunapi mana ubas pallarinchu. ⁴⁵ Chasallata allí runakuna, allí iuiáikuna iukaspami allilla rimagsamunkuna. Ikuti mana allí runakunaka, mana allí iuiáikuna

iukaspami mana allilla rimagsamunkuna. Iuiaipi imasa iuianakuskatami simipi rimachigsamú.

Atun pamba rumipi i chusa alpallapi wasichiimanda paru

⁴⁶ —¿Imapatak, nuka imasa niskata mana ruraspa-pas, nukata: “Iaia Jesús, Iaia Jesús” niwangichi? ⁴⁷ Maikan nukapagma samuspa, nuka ima rimaskata uiaspa ruragkuna, nisakichita kasa kagta. ⁴⁸ Sug runa, suma jundu utkuspa, atun rumipi sug wasi saiachigsinami ka. Maituku iaku jundaura, chi wasita piagrikugpipas, mana kuiuchingapa kanchu, allilla saiachiska kag-manda. ⁴⁹ Maikan uiawaspapas, nuka imasa rimaska-sina mana ruragkunaka kanmi mana rumipi utkuspa, chusa alpallapi wasichigsina. Chitaka, iaku jundaspa, piagrigllapi urmachispa, wagllichispami apá.

Suldadukunata mandagpa lutrinta, Jesús aliachiskamanda

7 Chipi kagkunata Jesús chasa rimaspa, Kafarnaum puibluma rirka. ² Chipika, Romamanda achka suldadukunata mandagpa iapa kuiaska lutrin, sinchi ungug sirikurka, ña wañungasina. ³ Jesús chaiagris-kata uiaspaka, chi mandagka sug judíu taitakunata kacharka, mañangapa: “Ungugta ambipuagsamuchu”. ⁴ Jesuspagma chaiagrispaka, chi taitakunaka, suma mañaspa, nirkakuna:

—Chi mandag, alli runami ka. Aidapuai. ⁵ Nukan-chipa alpamandakunata iapami muná. Paimi nukanchi tandariduru wasitapas saiachirka.

⁶ Chiura Jesús, chi runakunawa rirka. Ña wasima chaianakugriuraka, chi mandagka paiwa rimanaku-diruta kacharka, Jesusta ningapa:

—Taita waugki, mana iapa llakiripuangi. Nuka mana mirisinichu, kam nukapa wasi ukuma iaikugsamungapa. ⁷ Chimandami nuka kikin kambagma mana rirkani, kamta maskangapa. Chasapaka, sug rimaila nipuai; nukapa ungug ambiripuangallami. ⁸ Nukapas, sugkuna mandawaskapimi kani. Chasallata nukapas, sug suldadukunata mandagmi kani. Maikan suldaduta nuka “Rii” nisa; chiura rinllami. Ikuti maikanta: “Samui” nisa; chiura samunllami. Nukapa lutrinta: “Kasa rurali” nisa; chiura ruranllami.

⁹ Chi rimaskata uiaspaka, Jesús iapami ujnirirka. Nispaka, tigrarispa, chi achka katiraiagkunata nirka:

—Nukami kasa niikichita: ñi maikan Israelmanda runa, chi mandagsina suma allilla iuiawag mana tarirranichu.

¹⁰ Chi mandag kachaskakuna, wasima kutispa chaiagriuraka, ungug ña ambiriska kaskata tarigrirkakuna.

Sug biudapa wambrata, Jesús kaugsachiskamanda

¹¹ Chiuramanda, Jesús rirka Naín suti puibluma. Paita katiraiagkuna i iapa achka runakuna, paiwa rinakurka.

¹² Chi puiblu punguma ña chaiagriura, kawarkakuna: sug biuda warmipa suglla wambra iukaskata, ña

wañuska kagmanda, apanakurka pambangapa. Achka chi puiblupi kaugsanakug, sugllapi rinakurka. ¹³ Chasa kawaspaka Iaia Jesuska, chi warmimanda llakirispa, paita nirka:

—Mana wakakui.

¹⁴ Chasa nispaka, kaillaiaspa, chakanata tuparirka. Chiura, wandugkuna saiarirkakuna. Chiura Jesuska, wañuskata nirka:

—Kam musutami niiki: atarii.

¹⁵ Chasa nigllapi, wañuska, kaugsarispa, tiarirka. Nispaka, rimai kallariirka. Jesuska, chasa kaugsachispaka, paipa mamawa sakirka.

¹⁶ Tukui chasa kawagkuna, iapa mancharispa, Taita Diusta iapa suma atun kagta nirkakuna. Kasapasmi nirkakuna:

—Santu Ispirituwa sug atun rimagmi nukanchipa chaugpipi kawarigsamurka. Diusmi nukanchita kawan-gapa chaiagsamurka.

¹⁷ Chasa Jesús ruraskaka, Judea alpa i chi muiugta tukuinigmanda iacharigsamurka.

Juan Bautista, Jesusta tapungapa kachaskakunamanda

¹⁸ Juan Bautistawa purigkuna, tukui imasa Jesús ruraskata kawaspaka, paita willagrirkakuna. Chasa uiaspaka Juanka, iska katiraiagpurata kaiaspa, ¹⁹ Iaia Jesuspagma kacharka, tapungapa: “¿Kamchu kangi chi samungapa kaska? Mana kagpika, ¿sugtachu suiasunchi?”.

²⁰ Chi runakunaka, Jesuspagma chaiagrispa, nirkakuna:

—Nukanchita, Juan Bautistami kachamurka, kamta tapungapa: “¿Kamchu kangi chi samungapa kaska? Mana kagpika, ¿sugtachu suiasunchi?”.

²¹ Chiura, paikuna kawanakugllapi, Jesuska ima unguiwa kaskakunata ambirka. Kuku waira iaikuska-kunata i mana ñawi kawanakuskatapas, achkakunata-mi ambirka. ²² Nispaka ainirkakunata:

—Juanta willagriichi kamkuna kunaura imasa kawaska i uiaskata. Mana ñawi kawagkuna kawanakumi. Mana purig pudigkunapas, allillami purinakú. Aicha ismui ungui iukaskakunapasmi ambirigsamuska kankuna. Mana uiagkunapasmi allilla uianakú. Wañuskakunapasmi kaugsarinakú. Mana ñi ima iukagkunapasmi Alli Willaita chaskinakú. ²³ Maikan nukamanda suma iuiaita mana sakigpika, Taita Diuspa iapa kuiaskami kankuna.

²⁴ Juan kachaskakuna chimanda riura, Jesuska chipi kagkunata Juanmanda nirka:

—Kamkuna, chusa sitaska alpapi Juan kaskama chaiagrispaka, ¿imatak kawagrirkangichi? ¿Sug wiru wairawa pakichingasina kuiuchikuskatasinachu kawagrirkangichi? ²⁵ Mana kagpika, ¿imatak kawagrirkangichi? ¿Sug runa iapa suma musu katanga churariskatachu tarigrirkangichi? Manima. Chasa suma churarigkuna, mandagkunapa wasikunallapimi iapa suma iuiachilla kaugsankuna. ²⁶ Chasa kagpika, ¿imatak kawagrirkangichi? ¿Santu Ispirituwa rimagtachu tarigrirkangichi? Ari, niikichitami: Santu Ispiritu-

wa ñugpamanda rimagkunamandapas, Juan mas atunmi ka. ²⁷ Paimandami kasa niraiá:

Kawai. Nuka ima niskata willagta kamba ñugpami kachakuni,

kammanda ñambikunata allichipungapa.

²⁸ Kasami niikichita: kai alpapi tukui tiagsamusakunamanda, Juanllami mas atun ka. Chasa kagpipas, Dios suma mandakuskapi maikan mas uchullapas, Juan-manda mas atunmi niraiá.

²⁹ Chasa uiaspa, tukui chipi kagkuna i mana judú kaskakunamanda kulki chaskigkuna Juan baugtisaska kagkuna, iuiaripa nirkakuna:

—Taita Dios, tukui iapa allimi ka—. ³⁰ Ikuti fariseo-kuna i Moisés ima niskata iachachig taitakuna Juan mana baugtisaska kagkunaka, Taita Dios imasa allilla rurakuskatami wabutirkakuna.

³¹ Kasapasmi Jesús nirka:

—Kai punchakuna kaugsanakuska runakunata, ¿imasatak kagta nisa? Kasa nintrani. ³² Sug wambra-kuna kallipi tiaripa pugllanakugsinami kankuna. Chipika, paipura kaparinakú: “Nukanchi flaugta uia-chigpipas, mana bailangichichu. Llakispa kantagpipas, mana wakangichichu”. ³³ Chasallata, Juan Bautista-manda i nukamandami rimangichi. Juan mana tanda mikugmanda, mana binu upiagmandami kamkuna nirkangichi: “Kai runa, kuku waira iaikuskami ka”. ³⁴ Kai Runa Tukuska tukui mikuspa i upiaspa kagmanda, ningichimi: “Iapa mikudur i iapa upiadurmi ka. Mana judú kaskakunamanda kulki chaskigkunawa i mana alli ruragkunawa sugllapimi puriku”. ³⁵ Chasa kawaspa nigpikunapas, Taita Dioska tukui paipa wambra-kunawami kawachí, pai iapa iacha kagta.

Mana allilla rurag warmi, Taita Dioswa tigragmanda

³⁶ Sug fariseo, Jesusta kunbidarka, paipa wasipi mikugringapa. Wasima iaikugrispaka, Jesús mikungapa tiarigrirka.

³⁷ Chi puiblupi kaugsakurka sug mana allilla rurag warmi. Chi warmika, Jesús fariseopagpi mikungapa riskata iachaspaka, suma asna asitiwa marmul rumi butillapi apaspami chaiagrirka. ³⁸ Jesuspa wasanig-manda kaillaiaspaka, kungurirka. Wakaspa, paipa wiki-wa chakita maillarka. Nispaka, kikinpa agchawa tustachispa, chakikunata mucharka. Chi asititapas chakipi-mi tallirka.

³⁹ Chasa kawaspaka, chi Jesusta kunbidag fariseo, iuiaspa, kawakurka: “Chi runa, sutipa Santu Ispirituwa rimag kaspaka, iachantrami, chi tuparikug warmi mana allilla rurag kagta”.

⁴⁰ Jesuska, chi runata nirka:

—Simón, munakuikimi kamta rimangapa.

Chiura ainirka:

—Iachachig taita, niwai.

⁴¹ Chiura, Jesuska nirka:

—Iskai runakunasi kulki mañachigta dibinakurka. Sug runa, pichka patsa bali kulkisi dibikurka. Sugka, pichka chungallasi dibikurka. ⁴² Nigpi, kutichingapa

mana pudinakugmandaka, kulki mañachig, iskandi-kunatasi pasinsiarka.

—Kunaura niwai: chi iskandi kulki dibinakugka, ¿maikantak mañachigta mas kuianga?

⁴³ Chiura, Simón ainirka:

—Nukata rigchawanmi: maikan mas achka pasinsiai tukug.

—Allillami ainiwarkangi— Jesuska nirka.

⁴⁴ Nispaka, warmita kawaspa, Simonta nirka:

—Kai warmi ima ruraskata kawarkangi. Nuka kamba wasima iaikuuraka, kam mana iaku karawarkangichu, chaki maillaringapa. Ikuti kai warmika, wikiwami chakita maillawarka. Nispaka, agchawa chakichiwarka.

⁴⁵ Kam, “Puangi” niwaspaka, mana muchawarkangichu. Ikuti kai warmika, nuka iaikuuramandata, chakikunatami muchawaila ka. ⁴⁶ Kam ñi ima asiti mana umapi talliwarkangichu. Ikuti kai warmika, iapa suma asna asitiwa chakikunapimi talliwarka. ⁴⁷ Chimandami niiki: chasa suma kuiawagmandami niraiá, pai achka pandariskata pasinsiai tukugta. Chasallata, maikan mailla pandariskata pasinsiai tukugka, maillami kuiá.

⁴⁸ Chasa nispaka, chi warmita nirka:

—Kam pandariskakunata ñami pasinsiaska kangi.

⁴⁹ Jesuswa mikungapa kunbidanakuskapura tapurinakurka:

—Kai runa, pandariskakunata pasinsiag niku; ¿pisik ka?

⁵⁰ Jesuska, chi warmita nirka:

—Kam nukata iapa alli iuiawagmandami ña kispiriska tukurkangi. Rii, mana manchaspalla.

Jesusta aidag warmikunamanda

8 Chiuramanda Jesuska, Diospa suma mandaimanda Alli Willaita willaspa, atun i uchulla puiblukunapi purikurka. Chunga iskai pai agllaska runakunapas, paiwa sugllapi purinakurka. ² Sug warmikuna, kuku waira i ungui iukaspa aliachiskakuna, paita katiraiarkakuna. Chi warmipura karkakuna: sugka, María, Magdalena suti (chi warmita, kanchis kuku wairakunata Jesús llugsichiska karka); ³ sugka, atun mandag Herodespa wasita kawag Kuza suti runapa warmi, Juana suti; chimanda, Susana suti i achka sug warmikunapas. Tukui chi warmikuna, ima iukaskakunawa Jesusta aidanakurka.

Tarpudur runamanda parlu

⁴ Iapa achka runakuna, tukui puiblukunamanda Jesuspaga tandarigrirkakuna. Chiura Jesuska, paikunata iuiai apingasina suma parlarka, kasa nispa:

⁵ —Sug runasi llugsirka, simillakunata sitaspa tarpungapa. Tarpukuura, sug simillakunaka, ñambipi urmaspa, sarui tukurkakuna. Chi simillakunataka, piskukunasi mikurkakuna.

⁶ —Sug simillakunaka, rumilla tiaskapisi urmarkakuna. Tusta alpapi urmaspa, mailla wiñarispalla, lim chakirirkakuna.

⁷—Sug simillakunaka, ispina sachakuna tiaskapisi urmarkakuna. Nigpika, ispina sacha wiñarka, simillakunata kilpagta.

⁸—Ikuti sug simillakunakar, suma alpapisi urmarkakuna. Chasaka, suma wiñaspa, allilla pallarirkakuna. Sug simillamandalla, patsa patsasi pallarirka.

Chasa nispaka, sinchi kaparirka:

—Rinri iukagkuna, nuka niskata uiawaspa, suma iuiaringichi.

Imapa Jesús, iui ai apingasina parlukunawa rimaskamanda

⁹ Chiuramandaka katiraiagkuna, paita tapurkakuna: —Chi parlu kam iachachiska, ¿imatak niraiá?

¹⁰ Chiura Jesuska, kasa ainirka:

—Kamkunata niskami ka, Taita Dios imasa suma mandakuskasina kaskata ñi imaurapas mana iachaskata iachangapa. Ikuti sugkunataka iui ai apingasina parlukunallowami rimani. Chasaka paikuna, kawanakuspapas, mana kawagsinami kankuna. Uianakuspapas, mana uiagsinami kankuna.

Tarpudur runamanda parlu ima niraiagta, Jesús willaskamanda

¹¹ —Chi parlu nuka rimaskaka, kasami niraiá. Simillakuna, Diospa Rimaimi niraiá. ¹² Similla ñambipi urmagka, sug runa Diospa Rimaita uiagsinami niraiá. Chi uiaskata, iaia kukuka tukuimi kichugsamú; chasaka, mana suma iuiaspa, kispiringapa.

¹³ —Similla rumilla tiaskapi urmagka, sug runa Diospa Rimaita uiagsinami niraiá. Chi uiangallowaka, alli iuiachiiwami chaskinkuna. Nispaka, imasami chi mana achka anguiug simillakuna tukú: chasallata sug ratullami Taita Dioswa iuiariska kankuna. Imaura unzagpikunaka, chiuramanda mana mas Taita Dioswa iuiaringapa munankunachu.

¹⁴ —Similla ispina sachakuna tiaskapi urmagka, sug runa Diospa Rimaita uiagsinami niraiá. Uiaspapas, kai alpamandakunallowa sumaglla kaugsangapa iuiariska, mas achka iukag tukungapa iapa munaspa i sumaglla kai alpapi kaspas, Diospa Rimaita tukuimi kungarinkuna. Chasaka, ñi ima mana pallangapa tiaringasinami tukunkuna.

¹⁵ —Similla suma alpapi urmagkar, sug runa Diospa Rimaita uiagsinami niraiá. Sumaglla uiaskata suma umapi wakachiriska, mana kungarispallami kankuna. Chiwanka paikuna, Taita Diosmanda allilla ruraskakunawa mana sakispalla, achka pallaringsinami tukunkuna.

Sindimanda parlu

¹⁶ —Ñi pipas, ima sindi sindichispaka, manga ukupi u kawitu ukuma mana churangapa chianchu. Awa kawitupimi churangapa chaiá, maikan iaikugkunata punchaiachingapa. ¹⁷ Chasallata, ima pakalla kaskapas imaurapasmi iacharí. Ima pakalla wakachiskapasmi imaurapas kawarigsamú. ¹⁸ Chimanda, nuka ima

rimaskata suma iui aiwa uiawangichi. Maikan achka iukagta masmi karangapa ka. Ikuti maikan “Maillami iukani” iuiakuskataka kichungapami ka.

Sutipa Jesuspa familiakunamanda

¹⁹ Jesús kaskama, paipa mama i waugkindikuna chaiagrirkakuna. Iapa achka runakuna chi ukupi kagmanda, manima kaillaingapa pudirkakuna. ²⁰ Chiura sug runa, paita nigrirka:

—Kamba mama i waugkindikunami kanchapi kankuna. Kamta rimangapami munanakú.

²¹ Paika ainirka:

—Diuspa Rimaita uiaspa ruragkunami nukapa mama i nukapa waugkikuna niraiankuna.

Sinchi wairata i iaku iapa kuiurikuskata, Jesús kasillaiachiskamanda

²² Sug punchakuna Jesús, kanuapi iaikurka, paita katiraiagkunawanta. Nispaka, paikunata nirka:

—Akushi. Kai kuchata chimbasunchi.

Nispa, ña rii kallarirkakuna. ²³ Ña iaku chimbanakuskapi, Jesús puñurigsamurka. Chiura iapa sinchi waira, chi kuchapi atarii kallarirka. Chiwanka, kanua ukuma iaku ña iaikukurka. ²⁴ Jesusta katiraiagkuna, paita rigchachirkakuna, kasa nispa:

—Iachachig taita, iachachig taita, wañungapami kanchi.

Jesuska, rigcharispa, wairata i iakuta piñarka. Chasa piñauraka, tukui allillami kasillaiagsamurka. ²⁵ Chiura Jesuska, katiraiagkunata nirka:

—¿Manarachu nukamanda suma iuiawaspa rigsiwangichi?

Chiura, iapa mancharispa ujnarisipami paipura tapurinakurka:

—Kai runa, ¿imasik ka? Waira i iakupas, paita uiankuna.

Sug runa achka kuku wairakuna iaikuskata, Jesús ambiskamanda

²⁶ Kucha ialispaka, Galilea sug ladu chimba chaiagrirkakuna Jerasa suti alpama. ²⁷ Jesús ña kanuamanda alpama uraikukuuraka, chi puiblumanda sug runa kuku wairakuna iaikuska, paita tupagrirka. Chi runa, ña unai ñi ima katanga mana churariska karka. Ñi ima wasipi mana kaugsakurka. Wañuskakuna pambaraiaskapimi karka. ²⁸ Chi runaka, Jesusta kawaspaka, kapariska, paipa ñugpa ladu kungurigrirka. Sinchi rimaiwa nirka:

—Ai, kam tukuimanda mas atun Taita Diospa wambra Jesús, ¿imapatak nuka kaskama samukungi? Mañaikimi: mana nukata sungu nanagta llakichiwa-kugsamui.

²⁹ Jesús, chi kuku wairata ñami niska karka: “Chi runamanda llugsii”. Chimandami chasa nirka. (Chi runata, kuku wairakuna achka biajisi apiska karkakuna. Chimanda, paita makipi i chakipi sinchi kadinakunawa wataspa, allilla charidur karkakuna. Chasa charinakugpipas, kuku wairakuna, kadinakunata piti-

chispa, chusa sitaska alpama paita apadur karkakuna.)

³⁰ Chiura Jesuska, chi runata tapurka:

—Kam, ¿imatak suti kangii?

Chiura ainirka:

—Nuka, achka warangakunami suti kani—. Iapa achka kuku wairakuna paita iaikuska kaspami chasa ainirka.

³¹ Chiura chi runapa kag kuku wairakunaka, Jesusta mañai kallarirkakuna:

—Mana nukanchita kachakui, chi iapa jiru alpa ukuma ikuti ringapa.

³² Chi ladira ladullapi, iapa achka kuchikuna mikuspa purinakurka. Nigpika, chi runapi kag kuku wairakunaka Jesusta mañarkakuna, kasa nispa:

—Nukanchita sakii, chi kuchikunapa ukuma iaikug-ringapa.

Chiura, Jesuska sakirka, chasa tukungapa. ³³ Chasaka chi kuku wairakunaka, ña runamanda llugsispa, kuchikunapa ukuma iaikugrirkakuna. Chiwanka tukui kuchikuna, iapa saia patata kalpaska, kucha iaku ukuma sitarigrirkakuna. Chipi chukariska, tukui puchukarirkakuna.

³⁴ Kuchikunata kawagkuna, imasa pasariskata kawaspaka, mitikuspa, puiblunigta i ñambinigta suiu parlaspa purigrirkakuna. ³⁵ Chasa uiagkunaka rirkakuna, imasa pasariskata kawangapa. Jesuspagma chaiagrispaka, chi kuku wairakunata llugsichii tukuska runata tarigrirkakuna. Paipa iui ai ña allilla, suma katanga churariska, Jesuspa chaki ladu tiakuskata tarigrirkakuna. Chasa kawaspaka, iapa mancharirkakuna. ³⁶ Chi kuku wairakuna iukaska runata imasa alia-chiska kaskata kawagkunapas willarkakunata imasa pasarigta. ³⁷ Chiura chi alpanigmanda tukui uiagkunaka, askurinti manchaiwa kaska, Jesuspagma kaillaiaspa, nirkakuna:

—Nukanchipa alpamanda llugsipu ai.

Chasa uiaspaka Jesús, kanuama iaikuspa, kutirka.

³⁸ Manara rigllapi, chi kuku wairakuna llugsichii tukuska runa, paita mañai kallarirka:

—Nukatapas pusawai.

Jesuska, paita ainirka:

³⁹ —Kamba wasima rii. Willagrii, kamta imasa Taita Dios allilla ruraspa sagigta.

Chiura chi runa, rispa, imasa Jesús paita allilla ruras-kata chi puiblu suiu willaspa purigrirka.

Jairopa wambra kaugsariskamanda i sug warmi Jesuspa katangata llamkaspalla ambiriskamanda

⁴⁰ Jesús kutispa chaiagriuraka, tukui paita suianakug sumaglla chaskirkakuna. ⁴¹ Sug tandariduru wasimanda taita Jairo sutipasmi chaiagrirka. Chi taitaka, suglla warmi wambra iukarka, chungu iska wataiug. Chi wambra ña wañupukurka. Chaiagrispaka, Jesus-ta kungurispa, mañarka:

—Nukapa wasima ripuai.

Jesús chi taitawa paipa wasima rikuskapika, achka runakuna paita tanganakuiwanta kati kati rinakurka.

⁴³ Katichinakugpura sug warmimi sugllapi rikurka. Chi

warmi, chungu iska wata iawar sitaiwa ungug karka. Tukui ima iukaskata tukuchigpipas, ñi maikan ambigkunapas manima ambirkakunachu. ⁴⁴ Chi warmika, Jesus-ta kati kati kaillaiaspa, paipa katanga puntapi llamkarka. Llamkagllapi, chi ungui ambirirka. ⁴⁵ Chiura, Jesuska tapurka:

—¿Pitak llamkawarka?

Tukuikuna: “Ñi pipas manima” ainiura, Pedro nirka:

—Iachachig taita, ¿manachu tukuikuna, tanganakui-wanta kamta katiraianakú?

⁴⁶ Jesuska nirka:

—Nukapa iachaitami aisagta iuiachiriwarka. Chiwami iachani, maikan ima iuiaspa llamkawagta.

⁴⁷ Chiura chi ambirig warmika, Jesús imasa iachaskata uiaspaka, chugchuspa kaillaiaspa, Jesusta kungurrispa, tukuikunapa ñawipi willarirka, imapa Jesusta llamkagta i imasa llamkagllapi ungui ña ambirig-samugta. ⁴⁸ Chiura, Jesuska nirka:

—Kam warmisita, nukamanda suma iuiariskamanda-mi ambirigsamurkangi. Rii, mana manchaspalla.

⁴⁹ Jesús chara rimakugllapi, sug runa, chi taitapa wasimanda chaiagrispa, nirka:

—Kamba wambra, ñami wañurka. Mana mas kai iachachig taitata imapas mañakui.

⁵⁰ Jesuska, chasa uiaspa, chi taitata nirka:

—Mana llakikui. Nukamanda suma iuiawai. Ungugka ambiripunkangimi.

⁵¹ Wasima chaiagrispaka, Jesús mana tukuikunata sakirka iaikungapa. Pedro, Juan, Santiago i wambra taita i mamandilla, paikuna paillawa iaikurkakuna.

⁵² Tukui chipi kagkuna, wañuska kagmanda iuiariska, wakanakurka. Jesuska nirka:

—Mana wakanakuichi. Chi wambra mana wañuska kanchu. Puñuillami puñuku.

⁵³ Uiagkuna, tim wañuska kagta allilla iachaspaka, paita asirkakuna. ⁵⁴ Jesuska, chi wañuskata maki-manda apispa, sinchi kapariska, nirka:

—Wambrita, atarii.

⁵⁵ Chasa nigllapi, alma ikuti samuspa, kaugsarig-samurka. Nispaka atarirka. Chiura, Jesuska nirka:

—Wambritata mikui karaichi.

⁵⁶ Chasa kawaspaka, wambra atunkuna iapa ujnarirkakuna. Jesuska nirkakunata:

—Chasa kawaskata, ñujallapas sugkunata willan-kungichi!

Chungu iska Jesús agllaskakunata, pai kachaskamanda

9 Chiuramanda Jesuska, chi chungu iska pai agllaskakunata kaiaspa, paipa iapa iachaita kararka, paikunapas kuku wairakunata llugsichii i unguiwa kaskakunata ambii pudingapa. ² Nispaka kacharkakunata, Diospa suma mandaimanda willangapa i ungugkunata ambingapa. ³ Kachakuspaka, nirka:

—Mana apanakuichi tawina, ñi jigra, ñi tanda kukawi ñi ima kulkipas ñambipa. Katangapas, imasa churaris-kaskallawa riichi. ⁴ Maikan wasipi iaikuspa, chi wasillapi kangichi, chi puiblumanda sugsinama

llugsinkama. ⁵ Ikuti maipi kamkunata mana chaskingapa munanakuskapagpika, chi puiblumanda llugsi-kuspa, chakipi alpa llutaraiaskata chabsispa, paikunata willagsina kawachingichi, mana alli rurag kagtakuna.

⁶ Chi kachai tukuskakunaka, Alli Willaita willaspa i ungugkunata ambispa, chi puiblu suiu purigrirkakuna.

Herodes imasa Jesusta iuiakuskamanda

⁷ Mandag Herodes, Jesús tukui imasa rurakugta uiaspa, paimanda mana iacharka imasa iuiaringa. Sugkuna, Jesusmanda ninakurka:

—Chimi kangapa ka Juan Bautista. Wañuspaka, ikuti kaugsariskami kangapa ka.

⁸ Sugkunaka ninakurka:

—Ñugpamanda Santu Ispirituwa rimag Eliaschar ikuti kawarigsamurka.

Ikuti sugkunaka ninakurka:

—Maikan ñugpamanda Santu Ispirituwa rimagchar kaugsarigsamurka.

⁹ Herodeska nikurka:

—Nuka kikinmi Juanta uma anchuchingapa kacharkani. Chiwanka, chi tukui ima ruraskata uiaspa, paimanda nuka ninimi: “¿Pisik ka?”—. Chimanda munakurka, Jesusta rigsingapa.

Pichka waranga runakunata, Jesús mikungapa karaskamanda

¹⁰ Jesús kachaska runakuna, paipagma ikuti chaiagrispaka, imasa ruraspa puriska willagrirkakuna. Chiuramanda Jesuska, paikunallata pusaspa, Betsaida suti puiblu kuchumalla rirka, ñi maikan runapas mana kaugsanakuskama, paikunallawa kangapa. ¹¹ Chasa iachaspaka, achka runakuna katichirkakuna. Chiura Jesuska, chi katichinakuskata sumaglla kaiaspa, Diuspa suma mandaimanda iachachirkakunata. Tukui chipi unguiwa kaskakunatapasmi ambirka.

¹² Ña chisiakuuraka, chung a iskaí Jesús agllaskakuna, paipagma kaillaiaspa, nirkakuna:

—Kai runakunata kachai kai suiulla kaugsanakuska wasikunama, mikui maskagrispa puñugrichukuna. Nukanchi kaipi kaskapi, ñi pipas mana kaugsankunachu.

¹³ Jesuska nirkakunata:

—Kamkuna, paikunata mikui karaichi.

Paikunaka ainirkakuna:

—Pichka tanda i iskaí chalwallami kaipi iukanchi. Mana kagpika, chaiakunchar kai tukuikunamanda mikui randigringapa—. ¹⁴ Mai pichka waranga kari-kunami chipi karkakuna.

Chiura Jesuska, katiraiagkunata nirka:

—Paikunata mai pichka chung a pichka chung a tiari-chiichi.

¹⁵ Paikuna uiaspaka, chasa rurarkakuna. ¹⁶ Nigpi Jesuska, chi pichka tandata i iskaí chalwata charirispa, awasinama kawaspa, “Pai Siñur” Taita Diusta nirka. Chi mikuikunata pitichispaka, katiraiagkunata kuaspa aparka, paikuna tukuikunata karaspa richingapa.

¹⁷ Tukuikunami sagsagta mikurkakuna. Nispaka, chung a iskaí saparu junda piti pitikuna tandachirkakuna.

Kam, Dius agllaska Cristomi kangí, Pedro Jesusta niskamanda

¹⁸ Sug puncha Jesús, Taita Diusta rimakurka, kati-raiagkunallawa sugllapi kaspa. Nispaka, paikunata tapurka:

—Maikankuna nukamanda, ¿pi kagtatak ninkuna?

¹⁹ Paikunaka ainirkakuna:

—Sugkuna ninkunami: kam kangisi Juan Bautista.

Sugkunaka: kam ñugpamanda rimag Elías; ikuti sugkunaka: maikan ñugpamanda Santu Ispirituwa rimag kaugsariskasi kangí.

²⁰ Chiura, Jesuska tapurkakunata:

—Kamkunaka nukamanda, ¿pi kagtatak niwangichi?

Chasa tapuura, Pedroka ainirka:

—Taita Dius kikin agllaska Cristomi kangí.

²¹ Pedro chasa niura, Jesuska paikunata nirka:

—Mana pitapas nukamanda chasa willanakungichi.

Jesús imasa wañungapa kagta, pai musuglla willaskamanda

²² Kasapasmi Jesús nirkakunata:

—Kai Runa Tukuskataka iapa llakii i nanai iukangapami chaiawaku. Iaia sasirdutikuna, Moisés ima niskata iachachig taitakuna i sug taitakunapas wabutiwanga-pami kankuna. Nukata wañuchiwangapami kankuna. Chasa wañuska kaspapas, kimsa punchapika ikutimi kaugsaringapa kani.

²³ Chasa nispaka, tukuikunata nirka:

—Maikan nukata katiraiawangapa munagka, kikin-manda kungarichu. Tukui punchakuna, paipa krusta markarigsina ruraspami iuká katiraiawangapa. ²⁴ Maikan kikinpa kaugsaita kispichingapaglla iuiakugpika, kikin-mi puchukaringapa ka. Ikuti maikan nukamanda wañuchii tukugpika, mana mas wañui kaugsaitami taringapa ka.

²⁵ —Sug runa tukui kai alpapi ima munaska iukagpipas, paipa almata mana kispichigpika, chi iukaskakuna ñi imapa mana balipungapa kanchu. ²⁶ Kai Runa Tukuska samuura, nukapa i nuka Taitapa i tukuipi alli anjilkunapa suma atuniachiskawami samungapa ka. Chi punchaka, maikanpas nukamanda i nukapa rimai-kunata wabutispa, “Mana rigsinihu” nigkunata, nukapasmi chasallata ningapa kani. ²⁷ Nukami kasa niikichita: maikan kaipi kagkuna manara wañugkuna, Taita Diuspa suma mandaitami kawangapa kankuna.

Jesús, sug rigcha kawari tukugsamuskamanda

²⁸ Chasa niskauramanda mai pusag punchapika, Jesuska, Pedrota, Juanta i Santiagota pusaspa, sug awa lumama sikagrirka, Taita Diuswa rimanakungapa.

²⁹ Jesús chasa rimakunkamaka, paipa ñawi, sug rigcha kawarimi tukugsamurka. Paipa katangapas, iapa iura punchallami tukurka.

³⁰ Chiuraka iskai ñugpamanda runakuna, Moisés i Elías suti, kawarigsamurkakuna. ³¹ Chi runakunaka, Taita Diospa suma punchaiachiiwa kawarispá, Jesuswa rimanakui kallarikakuna. Jesusta imasa Jerusalenpi wañuchingapa kaskatami rimanakurka.

³² Pedro i paiwa kagkuna, iapa puñuiwa kaspapas, mana puñurirkakuna. Jesús chasa punchaiiwa kaskata i chi iskandi runakunata kawarkakuna. ³³ Chi runakuna Jesuswa kaskamanda ña anchurinakuuraka, Pedroka Jesusta nirka:

—Iachachig taita, kaipi iapa alli iuiachimi kanchi. Kimsa tambu kaipi rurasunchi: kammanda sug, Moisesmanda sug, sugka Eliasmanda—. Mana imapas iuiarisपालami Pedro chasa nirka.

³⁴ Chasa rimakugllapika, puiulla paikunata kilpagsamurka. Chi puii kilpaura, mancharirkakuna. ³⁵ Puii ukumandaka sug rimagta uiarigsamurka, kasa nispá: —Kai, nukapa agllaska wambami kapuá. Paita uia-puangichi.

³⁶ Chi rimai uiarigsamuura, Jesuska ikuti sapalla kawarigsamurkakunata. Paikuna chasa kawaskata chiurakuna ñi pita mana willarkakuna.

Sug wambra wañui ungui iukaskata, Jesús aliachiskamanda

³⁷ Kaiandika chi lumamanda uraikuura, iapa achka runakuna Jesusta tupagrirkakuna. ³⁸ Chipi kagkuna-puramanda sug runaka, kaparispá nirka:

—Iachachig taita, nukapa wambata kawapuá. Pai, suglla wambami kapuá. ³⁹ Paita, sug kuku waira iai-kuspa, diulpillami kaparichipuá. Kaima chimami chabsichipuá. Simimandapas tukallami jundaspa sitapuá. Iapa tukuipi nanachispaka, mailla maillami anchurí. ⁴⁰ Chimandami kamta katiraiagkunata mañagsamurkani: “Chi kuku wairata llugsichipuaichi”. Nig-pika, paikuna manima llugsichipuangapa pudirkakunachu.

⁴¹ Jesuska, paikunata nirka:

—¡Ai, kam mana alli runakuna, Taita Dioswa ñi ima mana iuiagkunami kangichi! ¿Imaurakamatak kamkunata chasa charinakusakichita?—. Chasa nispaka, wambra taitataka nirka— Kamba wambata kaima pusamui.

⁴² Chi wambra ña kaillaiakuura, kuku wairaka, paita ikuti chabsichispa, alpama urmachispa, kaima chima aparka. Chiura Jesuska, kuku wairata sinchi piñaspa, llugsichirka. Wambata ambispaka, paipa taitata kutichirka. ⁴³ Chiwanka tukui chipi kagkuna, Taita Diospa iapa suma iachaiwa imasa rurakuskata kwaspa, iapa ujnarikakuna.

Jesús imasa wañungapa kagta, pai parisma willaskamanda

Tukuikuna imasa Jesús rurakuskata ujnarispa kawanakuura, paika katiraiagkunata nirka:

⁴⁴ —Kai nuka ima willakuskata suma uiaspa, mana kungaringichi. Kai Runa Tukuskaka, mana alli runakunapagmami chaiachii tukungapa ka.

⁴⁵ Chasa niskata uiaspaka, katiraiagkuna mana iacharkakuna ima niraiagta, Taita Dios paikunapa iuiaita pakaskasina charikugmanda. Chi uiaskata mana iachaspapas, manhaspa karkakuna, ima niraiagta Jesusta tapungapa.

Maikan mas atun taita kagta, Jesús iachachiskamanda

⁴⁶ Chiuramanda Jesusta katiraiagkunaka, paipura rimirinakurka, kasa nispá:

—¿Pisik mas atun taita tukuska niraianchi?.

⁴⁷ Chimanda Jesuska, imasa iuianakuskata iachaspaka, sug uchulla wambata kaiaspa, paipa ladullapi saiachirka. ⁴⁸ Nispaka, paita katiraiagkunata nirka:

—Maikanpas kai uchullatasina nukamanda iuiarispa chaskigpika, nukata chaskiwagsinami rurá. Chasa chaskiwaspaka, nukata kachamuwagtapasmi chaskig niraiá. Kamkunapas maikan tukuikunamanda mas uchulla tukugka, mas atunmi niraiá.

Jesumanda iuiarispa, sugkuna allilla ruranakuska-manda

⁴⁹ Chiura, Juanka nirka:

—Iachachig taita, sug runa kamba sutiwami kuku wairakunata llugsichikugta kawarkanchi. Pai mana nukanchiwa sugllapi purig kagmanda, nukanchika nirkanchimi: “Mana chasa rurakuí”.

⁵⁰ Jesuska, paita ainirka:

—Ianga kawangichi. Maikanpas mana kamkunata piñagkuna, kamkunawa suma iuiaiwami kankuna.

Santiago i Juanta, Jesús piñaskamanda

⁵¹ Jesús ña suma luarma sikangapa puncha chaiakuuraka, pai ñi ima mana manhaspalla Jerusalenma rirka. ⁵² Rikuskamandaka, sugkunata ñugpa kacharka, “Ñami samuku” willangapa. Chi kachai tukuskakuna, Samaria alpapi sug puibluma chaiagrirkakuna, Jesumanda pusada mañapungapa. ⁵³ Chimanda runakunaka, Jesús Jerusalenma rikugta iachaspaka, mana munarkakuna paita chaskingapa.

⁵⁴ Chasa kawaspaka, Santiago i Juan suti Jesusta katiraiagkuna tapurkakuna:

—Taita waugki, ¿munangichu, nukanchi mañangapa: “Awanigmanda nina kachamuwai, paikunata puchukangapa”?

⁵⁵ Jesuska, tigrarispa, pai iskandikunata piñarka.

⁵⁶ Chiuramanda, sug puibluma rirkakuna.

Kimsa runakuna, Jesusta katingapa munanakuska-manda

⁵⁷ Ñambi rinakuskapi, sug runa, kailliaspa, Jesusta nirka:

—[Taita waugki,] kamta katisakimi maima kam rikuskama.

⁵⁸ Jesuska ainirka:

—Chuchakuna, kuibakunami iukankuna, paikuna kaugsangapa. Piskukunapas, tasinwa suma allichiska wasimi iukankuna. Ikuti kai Runa Tukuskaka mana iukanchu, ñi maipipas samaringapa.

⁵⁹ Nispaka, sug runata nirka:

—Katiwai.

Chika ainirka:

—Taita waugki, ñugpa sakiwai, nukapa taitata pambagringapa.

⁶⁰ Jesuska nirka:

—Nukata mana iuiariwagkuna † pambachukuna. Kamka riilla, Diospa suma mandaimanda runakunata willangapa.

⁶¹ Ikuti sugka, Jesusta nirka:

—Taita waugki, kamta katingapami munakuiki. Ñugpa sakiwai; nukapa wasipi kagkunata: “Kaiakama” nig-risa.

⁶² Jesuska ainirka:

—Maikan, ñugpasinama trabajaspa rikuspa, katinama kawagka, mana balinchu, Diospa suma mandaimanda willag kangapa.

Kanchis chungá iskaí runakunata, Jesús kachaska-manda

10 Chiuramanda Iaia Jesuska, sug kanchis chungá iskaí runakunata agllaspaka, tukui puiblu i wasikunama pai ringapa kaskama iskaí iskaí ñugpa kacharka. ² Kachakuspaka, kasami nirka:

—Pallangapaka, achkami tia. Nigpika pallagkunaka, maillami tiankuna. Chi pallaika, atun Taita Diospa chagrasinami ka. Chimanda, paita mañaichi, achka pallagkuna kachamuchu.

³ —Kamkuna riichilla. Kamkunata ubijakunatasina sacha alku kaugsanakuskasinamami kachanakuiki-chita. ⁴ Mana purichiichi kulki wakachidiru, ñi jigra ñi chakikunapi churaridirupas. Mana ñambipi saiarispa, piwapas ianga parlanakungichi.

⁵ —Maikan wasipipas iaikuspaka, ñugpa ningichi: “Puangi. Sumaglla allilla kapuaichi”. ⁶ Chi wasipi sutipa sumaglla iuiaiwa kaugsanakugpika, chasa niskamanda, paikunata tukui allillami tukugsamungakunata. Ikuti mana sumaglla chi wasipi kaugsanakugpika, chasa nigpipas, paikunata mana allilla tukugsamungakunatachu.

⁷ —Maikan wasipi kamkunata chaskigpika, chi wasillapi kangichi, ima karaskata mikuspa i upiaspa. Maikan trabajagkunata chaianmi, mikui u ima ministiska paikuna chaskingapa. Mana wasi wasi purinakungichi.

⁸ Maikan puibluma kamkuna chaiagriskapi kaiachukuna: paikuna ima karaskata mikungichi. ⁹ Chipi unguiwa kaskakunata ambingichi. Paikunata willangichi: “Diospa suma mandai, kamkunapagma ñami chaimuku”.

¹⁰ —Ikuti maikan puiblupi kamkunata mana chaskingapa munachukuna: kallikunama llugsispa, ningichi:

¹¹ “Kamkunapa puiblumanda alpa chakipi llutaraiaskata chabsichinchimi. Chasaka, kamkuna mana alli rurag

† “*Wañuska niraiaskakuna*”, *Jesusta mana iuiarigkunami niraiá*.

kagtakunami kawachinchi. Chasa kagpikunapas, kasami willaikichita: Diospa suma mandai, ñami chaimuku”. ¹² Kasami niikichita: Taita Dios justisiai rurangapa puncha chaiauraka, Sodoma puiblumanda runakunata llakichiskamandapas masmi chi puiblukumamanda runakuna llakii iukangapa kankuna.

Jesús ima willakuskata mana uiagkunamanda

¹³ —¡Ai, kamkuna Korazín suti puiblupi kaugsagkuna! ¡Ai, kamkuna Betsaida puiblupi kaugsagkuna! Tiro i Sidón suti puiblukumamanda runakuna, imasa kamkunapa puiblukumapi chituku mana imaurapas kawaskasina ruraskata kawaspaka, chiurallami paikunaka, llakiiwa iana katangakuna churarispa, uchpa-wa umapi armarispa, alli ruraikunama tigraska kantrakuna. ¹⁴ Taita Dios justisiai rurangapa puncha chaiauraka, Tiro i Sidón puiblukumamanda runakunata llakichiskamanda masmi kamkuna llakii iukangapa kangichi.

¹⁵ —Kamkuna, Kafarnaum puiblumandakunaka, ¿imapatak iuianakungichi: “Sug luarpimi atuniachii tukungapa kani”? Manima. Diltudupa ninamami sitai tukungapa kangichi.

¹⁶ Kasapasmi katiraiagkunata nirka:

—Maikan kamkunata uiagkunaka, nuka kikintami uiawankuna. Maikan kamkunata wabutigkunaka, nukatami wabutiwankuna. Chasa wabutiwaspaka, nukata kachamuwagtapasmi wabutig niraiankuna.

Kanchis chungá iskaí Jesús kachaskakuna ña kutiskauramanda

¹⁷ Chi kanchis chungá iskaí Jesús kachaska runakunaka, iapa suma alli iuiachiiwa kutispa, chaiagrirkakuna, kasa nispa:

—Taita waugki, kuku wairakunapasmi kamba sutiwa nukanchita uiarkakuna.

¹⁸ Jesuska nirka:

—Ari, chiura iaia kuku rilampasina awamanda urmagtami kawarkani. ¹⁹ Nukapa iapa iachaitami kararkaikichita, kulibrakunata i alakrankunatapas sarugpi, kamkunata ñi imapas mana tukungapa; chasallata, iaia kuku tukui ima mana allilla rurai munaskatapas binsii pudingapa. ²⁰ Chasa kagpipas, kamkunata kuku wairakuna uiagmandalla, mana iuianakungichi, suma allilla iuiachiiwa kangapa. Kamkuna ima suti kaska, suma luarmanda librupi willaraiaskamandami iukangichi iapa kuntintarispa kangakuna.

Jesús, Taita Diusta: “Pai Siñur” niskamanda

²¹ Jesús, Santu Ispirituwa suma alli iuiachiiwa kaspá, chiuralla nirka:

—Taitiku, suma luar i kai alpa cuarta iaia mandagmi kangi. Kamta iapa suma atun kagtami niiki. Kam-bagma iaikugringapa, iacha i iapa iuiaiiug runakunamanda pakaskasinami kapungi. Ikuti mana iacha i mana iapa iuiaiiugkunatami kawachirkangi. Ari, Taita, chasami kam munarkangi.

²² Kasapasmi Jesús nirka:

—Nukapa Taita, tukuimi nukata karawaska ka. Paipa wambra nuka kagta, ñi maikan runapas mana iachankunachu. Nukapa Taitallami rigsiwá. Chasallata, nukapa Taitata mana pipas rigsinkunachu. Nukallami rigsi ni, paipa wambra kaspá. Maikan nuka munaskakunallami nukapa Taitata rigsingapa kankuna.

²³ Chasa nispaka, tigraríspa, paita katiraiagkunallata nirka:

—Maikan kamkuna kunaura kawanakuska kawagkuna, Taita Diospa iapa kuiaskami kankuna. ²⁴ Kasapasmi niikichita: ñugpamanda Santu Ispirituwa rimagkuna i atun mandagkuna, achkakunami, kunaura kamkuna kawanakuskata kawangapa munanakuspapas, mana kawarkakuna. Chasallata, kunaura kamkuna uianakuskata uangapa munanakuspapas, manima uiarakuna.

Samariamanda alli runamanda parlu

²⁵ Tianakuskamanda, Moisés ima niskata sug iachachig taita saiarirka. Chi runaka, Jesusta pandachingapa iuiwai tapurka:

—Iachachig taita, ¿imasatak iukani ruranga, mana puchukariduru suma kaugsaita taringapa?

²⁶ Chiura, Jesús tapurka:

—Moisés ima willaraiaskapi, ¿imatak rurangapa niraiá? Willawai.

²⁷ Chiura, chi runaka ainirka:

—“Kamba atun Taita Diusta kuiangi kam kikinpa sunguwa, almawa, tukui animuwa i tukui iuiaikunawa. Kam kikintasinami iukangi, tukui runakunatapas kuianga”.

²⁸ Chiura, Jesús nirka:

—Allillami ainiwangi. Chasa ruraspami alli suma kaugsaita iukankangi.

²⁹ Chi runaka, allilla iuiaiiug kagta kawachiringapa, Jesusta tapurka:

—¿Pitak nukapa waugkisina niraiá?

³⁰ Chiura, Jesuska ainirka:

—Sug runa Jerusalemamanda Jerikó puibluma ñambi rikuskata, sisaikuna apispa, tukui ima apakuskata katangawanta kichuspa, ñalla wañunaiagta lischispasi sakirkakuna. ³¹ Chasa kauraka, sug sasirdutisi chi ñambillapita rikurka. Chi runaka, ñalla wañukuska runata kawaspaka, muiuspa ialirka. ³² Nispaka, Diospa atun wasipi aidagpassi chillatata rikurka. Chi runapas, ñalla wañukugta kawaspaka, muiuspa ialirka. ³³ Kipama, Samaria alpamanda sug runasi, chi ñambillapita rikuspa, wañukuskapagma chaiagrirka. Chi runakar, kawaspá, paimanda llakirirka. ³⁴ Paipagma kaillaiaspa, wira i binuwa piaskakunapi ambispa, watarka. Atarichispa, kikinpa burupi tiarichispa, pusarka. Pusada mañachiduru wasima chaiachigrispaka, sumaglla siri-chigrirka. ³⁵ Kaiandika, sugma rikuspa, wasi mañachigta iskaí punchapa kulki surkuspa kuarka, kasa nispá: “Kai runata suma kawapuangi. Kai kulki sakiska pisigpika, nuka kutimuura kuasakimi”.

³⁶ Chasa parlaspaka, Jesuska tapurka:

—¿Imasatak kamta rigchá? Sisaikuna apiska wañukuskapika, chi kimsandikunamanda, ¿maikantak waugkindisina kawarí?

³⁷ Chiura, chi runa ainirka:

—Maikan paimanda llakiríspa ambig.

Chasa ainiura, Jesuska nirka:

—Riilla. Kampas, chasallata ruragrii.

Marta i María ñañandipa wasipi, Jesús kaskamanda

³⁸ Jesús ñambi rikuspa, sug uchulla puibluma chaiagrirka. Chipika Marta suti warmi, Jesusta paipa wasipi sumaglla kaiarka. ³⁹ Chi warmi iukarka María suti ñaña. Mariaka, Iaia Jesuspa chaki ladu tiaríspa, ima rimakuskata uiakurka. ⁴⁰ Martaka, achka ruraikunawa kaspá, puririkurka, tukui ruraikunata sapalla ruraspa. Nispaka, Jesuspagma kaillaiaspa, nirka:

—Taita turi, ¿manachu llakingi, nukapa ñaña kai tukui ima rurangapa nukallata sakiwagta? Nipuai aidawachu.

⁴¹ Iaia Jesuska ainirka:

—Kam Marta, achka ruraikuna iukaspá, iapa llakispa iuiaikunawami puririkungi. ⁴² Nuka niikimi: sugllami tukui kunamanda mas ministidu ka. Chi mas ministikatami María agllarka. Pai chasa agllaskataka, ñi pipas mana kichungapa kankunachu.

Imasa Taita Diusta mañangapa chaiagta

11 Suura Jesús, Taita Dioswa rimanakurka. Rimanakui puchukauraka, sug paita katiraiag nirka: —Taita waugki, nukanchita Taita Diusta mañangapa iachachii; imasami Juan Bautista, paita katiraiagkunata mañangapa iachachirka: chasa.

² Chiura, Jesuska nirka:

—Kamkuna Taita Diusta mañanakuura, kasa ningichi:

Nukanchipa atun Taita:

kam tukui mas alli kagta tukui kuna nisunchi.

Nukanchiwa samui, iaia kangapa.

³ Tukui punchakuna, tanda ministiska nukanchita karamungi.

⁴ Nukanchi ima pandariskakunata pasinsiai.

Chasallata nukanchipas, sugkuna ima llakichiskakunata pasinsianchimi.

Mana sakii, nukanchi mana alli iuiaikunata iuianakunaga.

⁵ Kasapasmi Jesús nirka:

—Kasa iuiarisunchi. Maikan iacharidupura, chaugpi tuta paipagma rispa, mañakugrintra: “Waugki, kimsa tanda mañachiwai. ⁶ Kunauritallami sug waugki, karunigmamanda chaiamuwarka. Nuka, ñi imapas mana iukanichu, paita karangapa”.

⁷ —Sugka, ukumandalla ainintra: “Mana killachiwai. Pungukunapas, suma wichkaskami kapuá. Nukapa wambrakunawantami ña sirinakunchi. Chimandami mana pudini, ataríspa, kamta mañachingapa”.

⁸ —Iuiarisunchi: maituku iacharidu kagmandalla, mana ataríspa kanchu. Niikichitami: “Mana mas killa-

chiwachu" iuiaspami tukui ima mañakuskata kuangapa ka.

⁹—Chimanda niikichitami: Taita Diusta mañagpika, karamungapami ka. Paita maskagpika, taringapami kangichi. Pungu takachigrigpika, kamkunata paskapungapami ka. ¹⁰Maikanpas chasa mañagpika, chaskingapami ka. Maikanpas maskagpika, taringapami ka. Maikan pungu takachigrigpika, iaikuchingapami ka.

¹¹—Sug wambra paipa taitata chalwa mañakugpika, ¿kulibrachu karantra? ¹²Chasallata, sug wibus mañakugpika, ¿chini kukuchu karantra? Manima. ¹³Kamkuna, mana alli kaspapas, kamkunapa wambrakunata suma imapas karangichi. Nigpika kamkunapa Taita suma luarpi kagka, ¿imawantak mana Santu Ispirituta karamunga, maikan suma mañagpika?

Jesusta, iaia kukupa iachaiwa kagta juchachinakuskamanda

¹⁴Jesús, kuku wairata sug runamanda llugsichikurka. Chi runata, kuku waira mana rimangapa ruragsamuska karka. Chi kuku waira llugsichii tukuuraka, chi runa allilla rimagsamurka. Chasa kawaspaka, achka chipi kagkuna iapa ujnirirkakuna. ¹⁵Maikan-kunaka nirkakuna:

—Chi, Beelzebú suti iaia kukupa iachaiwami kuku wairakunata llugsichiku—. ¹⁶Ikuti sugkunaka, Jesusta mañanakurka, mana imaurapas kawaskasina awa luarmanda kawachichu; chasaka, paimanda iachangapa, sutipa Taita Dios kachamuska kagta.

¹⁷Paikuna ima iuianakuskata iachaspaka, Jesuska nirkakunata:

—Sug alpapi mandagpura piñachinakuppa makanakuspalla kaugsanakugpika, tukuimi wagllirí. Sug wasipi piñanakuspalla kaugsanakugpika, mana allilla kangapa kanchu, sumaglla sugllapi kaugsanakungapa. ¹⁸Chasallata iaia kukuwa kagkuna sugma sugma tukugpikunaka, ¿manachu paipura mandai chiuralla puchukarintra? Kamkuna nukamanda ninakungichi: “Beelzebupa iachaiwami kuku wairakunata llugsichiku”; chimandami chasa ninakuikichita.

¹⁹—Beelzebupa iachaiwa nuka kuku wairakunata llugsichikugpika, kampurakunaka, ¿pipa iachaiwatak llugsichinkuna? Pai kikinkunami kawachingapa kankuna, imasa kamkuna mana allilla nukamanda iuarispa ninakugta. ²⁰Taita Diospa iapa iachaiwa nuka kuku wairakunata llugsichikugpika, sutipami Diospa suma mandai ña kamkunapagma chaiamurka.

²¹—Sug wapu runa, chunta makana charispa, paipa wasita kawakugpika, tukui ima wakachiraiaskami mana chinganga. ²²Ikuti paimanda sug mas wapu runa chaiagrigpika, binsiimi tukunga. Binsispaka, makanata i ima charikuskatami kichunga. Ukupi tukui ima tiaskata sisaspami ringa.

²³—Maikanpas mana nukawa suma iuiaiwa kagkuna, nukata piñawagmi kankuna. Chasallata maikanpas nukawa mana suma tandachigkuna, tukuimi susuri-puangapa kankunata.

²⁴—Maikan runamanda kuku waira llugsichii tukuskaka, tusta alpa kaskapi samaringapami maskaspa purirka. Ñi maipi mana samaringapa tarispaka, iuiarirkami: “Maimandami nuka llugsimurkani: chimallatami kutingapa kani”. ²⁵Chi runapagma kutispa ikuti iaikugriura, uku suma pichaska i allichiskasinami tarigrirka. ²⁶Chasa kawaspaka, kanchis kuku wairakuna paimanda mas jiru ruradurkunata pusangapa rirka. Chi runapi iaikugrispa, chi kukukuna kaugsaimi kallarirkakuna. Chasaka chi runa, ñugpamandapas mas jiru mana allillami tukuipi tukurka.

²⁷Jesús chasa nikunkamaka, chipi kagpura sug warmi, kaparispa, nirka:

—Maikan warmi kamta iukagsamuska chuchuchispa wiñachig, Taita Diospa iapa kuiaskami ka.

²⁸Jesusk nirka:

—Chasapaka, Taita Dios ima rimakuskata suma uiaspa ruragkunami paipa mas iapa kuiaska kankuna.

Mana kawaskasina kawachimui, Jesusta mañanakuskamanda

²⁹Jesuspagma tandarispa mirai apanakuura, Jesús nirka:

—Kunauramanda runakuna, mana allilla ruraspa kaugsanakugmi kangichi. Mañawanakungichi: “Mana kawaskasina kawachimui”. Ñi imapas mana kamkuna munaskasina kawangapa kangichichu. Ñugpamanda Santu Ispirituwa rimag Jonás suti imasami pasarka: chasallata kawarillami kawangapa kangichi. ³⁰Imasami Jonás, Nínive puiblupi kaugsanakuskata iuiachispa kawarirka: chasallatami kai Runa Tukuskapas, kunauramanda runakunata iuiachispa kawaringapa ka.

³¹—Taita Dios justisiai rurangapa puncha chaiauraka, Chaugpuncha suti alpata mandag warmika saiarispami kunauramanda runakunata ningapa kankunata: “Mana allilla ruragkunami kangichi”. Ñugpata chi warmi, iapa karu alpamandami samurka, atun mandag Salomonpa iapa iachaiwa rimakuskata uian-gapa. Kai rimakugka, Salomonmandapas mas iachami ka.

³²—Chasallata, Taita Dios justisiai rurangapa puncha chaiaura, Níneve puiblumanda kagkunapas saiarispami kunauramanda runakunata ningapa kankunata: “Mana allilla ruragkunami kangichi”. Chi Ninevemanda runakuna, Jonás ima willaskata uiaspaka, alli rurai-kunamami tigrarkakuna. Kai rimakugka, Jonasmandapas mas iachami ka.

Ñawi, kuirpupi punchaiachigsinamanda

³³—Ñi pipas mana bila sindichinkangichichu, pakallapi u kawitu ukuma churangapa. Awapimi churangapa kangichi, maikan iaikugkunata punchaiachingapa.

³⁴Kamkunapa ñawikuna, kuirpupi punchaiachigsinami kankuna. Imatapas alli iuiaiwa kawagpika, kamkunapa kuirpupas suma punchaiagsinami kangapa ka. Ikuti mana alli iuiaiwa kawagpika, kamkunapa kuirpupas iana tutapi kagsinami kangapa ka. ³⁵Chimandami nii-

kichita: ¡ujalallapas kamkunapa iuiái mana punchapi-sina kachu! ³⁶ Kamkunapa kuirpupi imapipas mana iana tutapisina kagpika, suma punchaiagsinami kangapa kangichi; imasami bila sindi punchaiachí: chasa.

Judíu taitakunata, Jesús piñaskamanda

³⁷ Jesús rimai puchukauramanda, sug fariseo runa paita kunbidarka, paipa wasipi mikugringapa. Chaiag-rispalla, Jesús tiarigrirka mikungapa. ³⁸ Mana maki maillarispalla mikui kallarirka; ñugpamandakuna imasa iachachiskasina, manima. Chasa kawaspaka, chi fariseo ujnarirka. ³⁹ Chiura Iaia Jesuska, paita nirka:

—Uiawai. Kam fariseokuna, kuashag i platuta awalla-llami maillangichi. Ikuti kamkunapa iuiái ukumaka sugkunapata iapa munaripa i sisaripa kaugsagkunami kangichi. ⁴⁰ Kamkuna, mana alli iuiagkunami kangichi. Taita Dios awalla kawari kuirputa rurag, ¿manachu ukumapas rurarka? ⁴¹ Chimanda, suma iuiáiwa limus-na karangichi. Chasa ruragpika, tukui maillaskasinami niraiangkangichi.

⁴² —¡Ai, kam fariseokuna! Minta, ruda i tukui iuii mikuikunapas pallaskakunamanda chungapika, sugllami Taita Diusta karangichi. Chasa karaspapas, kam kikinkuna kungariskami kangichi, sugkunata imasa chaiaskasina allilla rurangapa i Taita Diusta suma kuiaspa kaugsangapa. Chunga pallaskamanda sug karangapa mana sakispalla, iukangichimi chi sug atun mandaikunatapas allilla ruraspas kaugsangakuna.

⁴³ —¡Ai, kam fariseokuna! Tandariduru wasikunapi munangichimi, atun taitakuna tiariduru ñugpa ladu tiarigringapa. Kallipi sugkunawa tupanakuskapi munangichimi, iapa suma kuiáiwa kumurispa, “Puangi, taita waugki” nukata niwachukuna.

⁴⁴ —¡Ai, kamkuna! Wañuska pambaraiaska mana kawarigsinami kangichi. Chi awalla saruspa ialigpikunapas, chi ukupi ima tiaskata mana iachankunachu.

⁴⁵ Jesús chasa niuraka, Moisés ima niskata sug iachachig taitaka nirka:

—Kam iachachig taita, chasa nispaka, nukanchitapaschar piñakungi.

⁴⁶ Chiura, Jesuska nirka:

—¡Ai, kamkuna Moisés ima niskata iachachig taitakunapas! Kamkuna, mana pudiringasina llasta aparichigsinami runakunata iachachingichi, paikuna imasa niskasina ruraspas kaugsangapa. Chasa iachachispapas, kam kikinkunaka mana munangichichu, imasa iachachinakuskasina ruraspas kaugsangapa.

⁴⁷ —¡Ai, kamkuna! Ñugpamanda Santu Ispirituwa rimagkunata kamkunapa ñugpamandakuna wañuchiskata iuiaringapa, kamkunaka suma atun bubidakuna ruraspami kangichi. ⁴⁸ Chasa ruraspaka, kawachingichimi, imasa kamkunapa ñugpamandakuna ruraskata, kamkunapas chasallata ruragkuna kagta. Paikuna wañuchirkakuna; kamkunaka, suma atun bubidakunami rurangichi, iuiaringapaglla.

⁴⁹ —Chimandami Taita Dios, paipa iachaiwa nirka: Santu Ispirituwa rimagkunata

i nuka kikin agllaska runakunatami kachamungapa kani.

Maikankunataka wañuchingapami kankuna.

Sugkunataka mitikuchingapami kankuna.

⁵⁰ Chimandami, kai alpata wiñachiskauramandata tukui ñugpamanda Santu Ispirituwa rimagkunata wañuchiskakunamanda, kunaauramanda runakuna iapa achka llakii iukangapa kangichi. ⁵¹ Kasami niikichita: Abel suti alli runa musuglla wañuchii tukuskauramandata, sugka, Zakarías suti, Taita Dioswa iuiariduru uku i altarwa chaugpipi wañuchii tukuskaurakama; maituku wañuchii tukuskakunamandapasmi kunaauramanda runakuna iapa achka llakii iukangapa kangichi.

⁵² —¡Ai, kam Moisés ima niskata iachachig taitakuna! Iachaita kamkunapa iuiaipimi pakadur kangichi. Kam kikinkuna, nukamanda Alli Willaita mana munangichichu iachangapa. Sugkuna iachaikungapa munanakuskatapas arkagsinami runanakungichi.

⁵³ Jesús chaimanda llugsiuraka, Moisés ima niskata iachachig taitakuna i fariseokunaka, iapa rabiariapa, paita achkapimi tapuchii kallarirkakuna; ⁵⁴ chasaka, pai ainiskata uiaspa, imapipas pandarigpika, justisiakunata willagringapa.

Jesús, paita katiraiagkunata suma iachachiskamanda

12 Chikamaka, achka waranga runakuna tandarir-kakuna, sarunakuiwanta. Chiura Jesuska, paita katiraiagkunata kasami nirka:

—Fariseokunapa libadurasina iuiaita, ¡ujalallapas iuianakungichi! Paikuna, sungu awallami rimankuna.

² Maikan pakalla iuiaspa rimaskaka, imaurapasmi iacharí. Chasallata, ima pakalla wakachiskapasmi imaurapas kawarigsamú. ³ Tukui ima kamkuna pakalla iana tutapi rimaskapas, punchapimi iacharigsamungapa ka. Chasallata, maituku wasi ukuma pungu wichkarispa rimanakugpipas, wasi awamandami sinchi kaparii uiaringapa ka.

⁴ —Kamkuna nukapa iacharidu kuiaska kagmanda, kasami niikichita: kamkunapa kuirputa wañuchigpika, mana manchangichi. Nispaka, mana imapas rurangapa pudingapa kankunachu. ⁵ Willasakichita, pitami manchangapa chaiá: wañuura, Taita Dios diltudupa ninama sitangapa kagtami manchangapa chaiá. Ari, niikichitami: paita manchangichi.

⁶ —¿Manachu pichka pisku, iskai uchulla kulkimandalla katurí? Chasa kagpipas, Taita Dios paikunamanda mana kungarinchu. ⁷ Kamkunapa umamanda agchapas, Taita Dios kuintaskami iuká. Chimanda, kamkuna mana manhaspalla kaugsaiichi. Maituku achka piskukunamandapas mas balimi kangichi.

⁸ —Kasapasmi niikichita: nukamanda maikanpas, sugkunapa ñawipi willachu: “Paita rigsiniimi”: kai Runa Tukuskapas, chi runamandaka Diospa anjilkunapa ñawipi willasami: “Paita rigsiniimi”. ⁹ Ikuti maikanpas, sugkunapa ñawipi nukamanda nichu: “Paita mana rigsiniichu”: nukapas, paimandaka Diospa anjilkunapa ñawipi nisami: “Paita mana rigsiniichu”.

¹⁰ —Maikan kai Runa Tukuskamanda kuntra rimag-kunamanda pasinsiaimi tia. Chasa kagpipas, maikan Santu Ispiritumanda kamiskamandaka mana pasinsia tiangapa kanchu.

¹¹ —Tandariduru wasikunama, justisia i mandagkuna-pagma kamkunata apaura, mana iapa iuianakungichi: “¿Imasami paikunata ainini u willani?” ¹² Ainingapa chaiaura, Santu Ispiritu kikinmi iuiachingapa ka.

Iapa iukag kikinmandalla micharigmanda

¹³ Chipi kagpura sug runa, Jesusta nirka:
—Iachachig taita, nukapa waugkita nipuai, nukapa atunkuna sakiskata chaugpi karawachu.

¹⁴ Jesuska ainirka:
—Waugki, ñi pipas mana churawarkachu, kamkunapa justisia kangapa, ima kamkunata sakiskata chaugpingapa.

¹⁵ Chasa nispaka, chipi kagkunata nirka:
—¿Ujalallapas iapa iukag kikinmandalla micharisp kangichi! Kai alpapi maituku iukagpas, paipa kaugsaita mana pudinchu diltudupa chariringapa.

¹⁶ Nispaka, chipi kagkunata iui ai apingasina suma parlarka, kasa nipa:

—Sug runa iapa iukagsi tiarka. Chi runapa alpakunapi, iapa achka mikuikuna pallarka. ¹⁷ Nispaka iuiarirka: “¿Imasatak rurasá? Kunaura pallaripuaskata, ¿maipitak wakachisa?”

¹⁸ —Nispaka iuiarirka: “Ñami iachani ima rurangapa chaiwakugta. Pallaskakuna wakachiduru wasikunata wagglichispa, sug mas atunkunami saiachingapa kani. Chikunapimi tukui ima pallariska i tukui ima tiapuskata wakachisa. ¹⁹ Nispaka, nuka kikin nirisami: ‘Kunaura, ñami achka watakunapa achka wakachiska iukangi. Chimandaka, samaspa, mikuspa, upiaspa, allilla sumagllami chisiankangi.’”

²⁰ —Chasa iuiarikunkamaka, Taita Dioska nirka: “Ja, kam mana allilla iuiaiiug. Kunantutallami kamba almatamañangapa kaiki. Nigpika chi wakachiskaka, ¿pimandasik kanga?”

²¹ —Chasa, maikanpas kikinmandalla wakachigka, Diospa ñawipi ñi ima mana iukag niraiianchu.

Taita Dios, paipa wambrakunamanda mana kungarinchu

²² Chasa nispaka, paita katiraiagkunata nirka:
—Chimandami kasa niikichita: mana iapa iuiarinakungichi: “¿Imatak mikusunchi, nukanchi kaugsankama?” u “¿Ima katangatak churarisunchi?” ²³ Kamba kaugsaika, mikuikunamanda masmi ka. Chasallata kamba kuirpupas, katangamanda masmi ka.

²⁴ Chiwakukunamanda iuiariichi. Paikunaka mana tarpunkunachu. Mikui pallaspa, wakachiduru trujapas mana iukankunachu. Chasa kagpipas, Taita Dioska ñi ima mana pisichinkunatachu. Kamkunaka, piskukunamanda mas balimi kangichi.

²⁵ —¿Pikunatak, maituku iuiarisppapas, sug palmullapas awa wiñai pudingapa kangichi? Ñi pipas manima.

²⁶ Chi uchulla ruraita mana pudispaka, ¿imapatok sug imakunamanda iapa iuiarinakungichi?

²⁷ —Kawaichi imasa liriu tugtukuna chagrapi suma wiñariskakunata. Iuiariichi: paikuna mana puchkaspa awankunachu. Ñi ima mana rurankunachu. Kasami niikichita: ñi atun mandag Salomón, pai tukui iapa suma katanga churarisppapas, chi tugtukunamanda mas suma mana kawarirkachu. ²⁸ Ugsa, kuna puncha chagrapi suma kaskata kaiandi rupachingapa kagta, Taita Dios chasa suma kawá. Kamkunataka, ¿imawantak mana mas sumaglla kawanga? Kamkuna mana allilla Taita Diosmanda iuiarispaga kagkuna, paita mas sumaglla iuiariichi.

²⁹ —Chimanda, mana iapa maskaspa purinakungichi, ima mikungapa i upiangapa iuiarispalla. ³⁰ Kai alpamandalla iuiaiwa kagkunami chasa maskaspa kaugsanakú. Kamkuna tukui ima ministiskakunamandaka, kamkunapa Taita Dios ñami iachá. ³¹ Kamkuna suma iuiarispaga kangichi, Taita Dios imasa mandaskasina kaugsangapa. Chasa kagpikunaka, kamkunata tukui ima ministiskakunatami karamunga.

³² —Nukapa kuiaska asllita ubijakunasina kaspapas, mana manchaspalla kaichi. Kamkunapa Taita Dios munakumi, kamkunapas pai suma mandakuskapi kagsamuchukuna. ³³ Kamkuna ima iukaskata lim katuspa, ministiskakunata karaichi. Chasa karaspaka, suma luarpi kulki imapas mana puchukaringasina mana ismug wakachidurupisina wakachiskami iukankangichi. Chi luarpi, sisaikuna mana tiangapa kanchu. Ñi burbujukunapas mana wagglichispa mikungapa kankunachu. ³⁴ Kamkuna maipi wakachiskapimi kamkunapa iuiaita churaska kangichi: kai luarpi u sug luarpi.

“Allichiriskasina suianakungichi”

³⁵ —Kamkuna, suma chumbilliska i bila sindichiska, allichiriskasina suianakungichi. ³⁶ Imasa piunkuna, patrunka kasaraimanda paipa wasima chaiagsamukuura, pungupi kaiagllapika, paskangapa suianakugsina kangichi. ³⁷ Piunkuna chasa rigcharaiaskata tarigsamus-paka, chi patrunka, sumaglla tiarichispa, kikinmi mikui karangapa kankunata. ³⁸ Chaugpi tuta u pakaringama chaiamuspa, chi piunkuna rigcharaiaska-ta tarigsamugpika, paikuna iapa allimi pasangapa kankuna.

³⁹ —Kasa iachaichi: wasi duiñu iachantra, ima ura sisai samungapa kagta. Iachaspaka, mana puñurispalla-char rigcharaiantra, paipa wasipi mana sisai iaikungapa. ⁴⁰ Chasallata kamkunapas, allichiriskasina suianakungichi. Kamkuna mana iuianakuurami kai Runa Tukuska chaimungapa ka.

⁴¹ Chiura, Pedro tapurka:
—Taita waugki, ¿chi parluta nukanchillatachu ubi tukuiunatachu nikungi?

⁴² Chiura, Iaia Jesuska ainirka:
—Maikan tukuiipi alli rurag runa kagtami paipa patrunka sakirka, ima wasipi kawapungapa, sug piunkuna-

ta mikui karaspa, pai kikin chaiamunkama. ⁴³ Patrún ikuti chaiagsamuspa, imasa niskasina allilla rurakugta kawaspaka, chi runata sumagllami, “Pai Siñur” nispa, kuiangapa ka. ⁴⁴ Chimandami paita maituku ima iukas-katapas mingaspa sakingapa ka.

⁴⁵ —Ikuti chi piun, kasa iuiarispa nintra: “Nukapa patrún, mana utka chaiamungapa ka”. Chasa nispaka, sug piunkunata, kari i warmikunata makai kallarintra. Kikinka, mikuspa i machagta upiaspa kantra. ⁴⁶ Chi runa kungaska mana iuiakuurami patrunka, chaiamuspa, shachigsamungapa ka. Chasa shachigsamus-paka, paita sinchimi asutingapa ka. Nispaka kachangami, pai ima niskata mana uiagkunawa justisiai tukungapa.

⁴⁷ —Chi piun, ima patrún munakuskasina allilla iachaspapas, ima tiaskakunata mana allichispa, ñi ima munakuskasina mana ruraskamanda, paita achkami asutingapa ka. ⁴⁸ Maikan piun, mana allilla iachaspalla pandarigpika, mailla asutimi chaiangapa ka. Maikanta achka karaskata chasallatami achka mañanga. Maikanta achka mingaskataka mas achkami mañangapa ka.

Jesús samugmanda, makanakugsinami tiangapa ka

⁴⁹ —Nuka samurkani, kai alpapi nina sindichigsina rurangapa. Munakunimi, ña sindi rupakugsina kantra. ⁵⁰ Nukata chaiawakumi, wañuchii tukungapa. † Manara chaiawagpi, iapa llakiiwami kani.

⁵¹ —¿Kamkuna iuiangichichu nuka kai alpama samugta, tukui sumaglla kaugsanakungapa? Niikichitami: manima. Nuka samugmanda, tukuima chaugpinakugsinami tiangapa ka. ⁵² Chasa kunaure-manda, sug wasipi pichkakuna kaugsanakuskapika, iskaime tukuspa, kimsakunawa iskaikunawami mana allilla kaugsanakungapa ka, nuka samugmanda. ⁵³ Taitandiwa wambrandiwa, mamandiwa warmi wambrandiwa, suigrandiwa nuirandiwa, chasallata mana allillami kaugsanakungapa kankuna.

Chi punchakuna ima niraiaska kagta, Jesús niskamanda

⁵⁴ Kasapasmi Jesús, tukui chipi kagkunata nirka: —Indi chingaridirunigmanda puii kawarigpika, chiurallami ningichi: “Tamiangapami ka”. I sutipa. ⁵⁵ Chasallata, alli makinigmanda sinchi wairamugpika, ningichimi: “Tapami indi ruparingapa ka”. I sutipa. ⁵⁶ Kamkuna, sungu awalla rimagkunami kangichi. Imasa awapi i alpapi kawariskakunata kawaspaka, iachangichimi ninga, punchakuna imasa kangapa kagta. Nigpika, kai punchakuna nuka ima rurakuskata kawaspaka, ¿imapatak mana iuiaringichi ima niraiagta?

⁵⁷ —¿Imapatak kam kikinkuna mana iuiaringichi, ima allilla u mana allilla kagta? ⁵⁸ Maikan kamta dimandaspa, justisiapagma pusanakugpika, paita sumaglla ri-

† “Sug baugtismuta chaskingapa”, wañuchii tukungapami niraiá.

mangi, manara justisiapagma chaiachigrigpi. Mana kagpika chaiachigriura, justisiaka kamta alwasilkunapa makipimi sakinga. Chiura alwasilkunaka, kamta karsilpimi wichkanga. ⁵⁹ Kasami niiki: chimanda mana llugsingapa kangichu, tukui kulki manara kutichinkama.

Allilla ruraikunama tigrangapa, Jesús kaiaskamanda

13 Jesús chasa iachachikugllapika, sug runakuna, chaispa, paita willai kallarkakuna:

—Galilea alpamanda sug runakuna, Diuspa atun wasipi animalkunata rupachinakuura, chi runakunataka mandag Pilatos wañuchichispa, chi animalkunapa iawarwami chapuchirka.

² Jesuska ainirkakunata:

—¿Iuianakungichichu: chi Galileamandakuna, tukui-kunamanda mas pandarigkuna kaskamandachar chasa wañuchirkakunata? ³ Niikichitami: manima. Kamkunapas, allilla ruraikunama mana tigragpika, tukuikunami puchukaringapa kangichi.

⁴ —Chasallata, chi chungu pusag runakuna, Siloepi sug askurinti iapa awa wasi paikunapa awalla urma-ura, wañuskakuna: ¿iuianakungichichu: chikuna, tukui Jerusalenpi kaugsanakuskamandapas mas pandarigkunachar karkakuna? ⁵ Niikichitami: manima. Kamkunapas, allilla ruraikunama mana tigragpika, tukuikunami puchukaringapa kangichi.

Igus sachamanda parlu

⁶ Chasa nispaka, chipi kagkunata iui ai pingasina suma parlarka, kasa nispa:

—Sug runa, ubas sachakuna tiaskapi sug igus sacha tarpuskasi iukarka. Unaipika rirka kawangapa: ¿igus ñachu tiarirka? Chiura, manara tiariska karka. ⁷ Chi-manda, chagra kawagta nirka: “Kawamui. Ñami kimsa wata samukuni, kai sachapi igus tianchu kawangapa. Ñi imapas mana tarigsamunichu. Kuchuilla. ¿Imapatak kai sacha, alpapi ianga saiakunga?”

⁸ —Chagra kawagka ainirka: “Taita waugki, kai watala sakiwai. Nuka, alpata ñutuchispaka, suma majada churasami; ⁹ chiwanka, kawangapa: ¿watapika igus tiarinchu? Mana tiarigpika, kuchungi”.

Sug iapa wasa kumuridu warmita, warda puncha Jesús aliachiskamanda

¹⁰ Sug warda puncha Jesús, sug tandaridiru wasipi iachachikurka. ¹¹ Chipi karka sug warmi ña chungu pusag wata kuku waira iaikuspa unugulla. Chi warmi, wasa kumuridu kaspera, mana pudirka, ñi imaura allilla diricharingapa. ¹² Paita kawaspaka, Jesuska kaiaspa, nirka:

—Kam warmi, ñami kamba ungui anchuriska kangi.

¹³ Nispaka, chi warmita paipa maki churarka. Churagllapi, chi warmika suma allilla saiarispa diricharirka. Nispaka, Taita Diusta nii kallarkirka: “Kam, iapa suma atunmi kangí”.

¹⁴ Chasa warda puncha aliachigta kawaspa, chi tandariduru wasimanda taitaka, Jesuswa piñarisa, tukui chipi kagkunata nirka:

—¿Manachu sugta puncha iukanchi, trabajangapa? Chi punchakuna samungichi, ambichiringapa; warda punchaka, mana.

¹⁵ Chasa niura, Iaia Jesuska nirka:

—Kamkuna, sungu awalla rimagkunami kangichi. Kamkunapa wagra u buru wataraiaskakunata, ¿manachu paskangichi, iaku upiachigringapa, warda puncha kagpipas? ¹⁶ Kai warmika, ñugpamanda taita Abrahampa iawarmi ka. Paita iaia kukumi chungu pusag wata chi unguwa wataskasina charikurka. Warda puncha kagmandaka, ¿manachu pudirí, paita unguima wataskata aliachinga?

¹⁷ Jesús chasa niuraka, tukui paiwa mana alli iuiwiwa kagkuna iapami pingai pasarkakuna. Ikuti sugkunaka, Jesús chi suma allilla ruraskakunata kawaspa, iapa kuntintarirkakuna.

Mustasa simillamanda parlu

¹⁸ Kasapasmi Jesús nirka:

—Diuspa suma mandai, ¿imasatak rigchá? Kasa nintrani. ¹⁹ Sug runa, paipa chagrapi mustasa similla tarpugsinami niraiá. Na wiñai puchukauraka, sachami tukú. Chasapika piskukunapas, malkikunapi sumagllami wasichigsamunkuna.

Libaduramanda parlu

²⁰ Kasapasmi nirka:

—Diuspa suma mandai, ¿ima kagsinatak nintrani? ²¹ Imasami sug warmi, kimsa tasa arinata libadurawa chapuuraka, suma timbuspa, miraspa achkaiagsamú: chasami niraiá.

Kichki pungusinamanda

²² Jesús Jerusalemma rikuspa, atun i uchulla puiblukunata iachachispa ialirka. ²³ Rikuskapika, sug runa paita tapurka:

—Taita waugki, ¿maillakunallachu kisingirakuna? Chiura, paika ainirka:

²⁴ —Suma luarma iaikugringapa, iuiaringichi kichki pungupisina ialingapa. Kasami niikichita: achkakuna, iaikungapa munanakugpipas, mana pudingapa kankunachu.

²⁵ —Kamkuna kanchapi kankama, wasi duiñu pungu wichkagpika, kamkuna kaiaspa, ninkangichimi: “Taita waugki, nukanchimanda pungu paskapuái”.

—Paika ainingami: “Kamkunata mana rigsiikichitachu. ¿Maimandakunachar kangichi?”.

²⁶ —Chiura, kamkuna ninkangichimi: “¿Manachu iuiangi? Kamwami mikurkanchi i upiarkanchi. Nukanchipa puiblumanda kallikunapimi kam iachachirkangi”.

²⁷ —Paika ningami: “Ikutimi niikichita: mana rigsiikichitachu. ¿Maimandakunachar kangichi? Tukui kamkuna mana allilla ruragkuna, nukapa ñawimanda anchuriichi”.

²⁸ —Ñugpamanda Abraham, Isaak i Jakob suti taitakuna i Santu Ispirituwa tukui rimagkuna, sug luarpi Dius suma mandakuskapimi kangapa kankuna. Chasa kawaspaka, kamkuna kanchama sitaska kagkuna, iapa llakispa, wakaspa, kiru mukuspami kangapa kangichi. ²⁹ Indi llugsidirunigmanda i chingaridirunigmanda, alli maki ladunigmanda i lluki maki ladunigmanda, tukui-nigmandami ringapa kankuna, Dius suma mandakuskapi tiarisa mikungapa. ³⁰ Chiura sugkuna kuna kati niraiaskakuna, ñugpa ladumami tukungapa kankuna. Ikuti sugkuna kuna ñugpa niraiaskakunaka, kati ladumami tukungapa kankuna.

Jerusalén puiblumanda, Jesús wakaskamanda

³¹ Chiurallata sug fariseokuna, Jesuspagma kailla iagrispa, nirkakuna:

—Kaimanda llugsispa, utka riilla. Mandag Herodes, kamta wañuchingapami munaku.

³² Jesuska ainirka:

—Ianga kawaichi. Chi miski simi iukaska sungu awalla rimagta kasa nigriichi: “Kuna puncha kaiandikunapas, kuku wairakunata llugsichinimi; ungugkunatapas ambinimi. Kimsa punchakunaka ñami ialinga, nukata ima chaiawakuskata rurangapa”. ³³ Kuna puncha, kaia, sug punchapas chaiawakumi ringapa. Santu Ispirituwa rimagtaka mana chaianchu, Jerusalén mana kaskapi wañuchii tukungapa.

³⁴ —¿Ai, Jerusalén, Jerusalemmanda runakuna! Kamkuna, Santu Ispirituwa rimagkunata wañuchigmi kangichi. Kamkunapagma kachamuska runakunatami rumiwa piaspa wañuchingichi. Imasami atawalpa, paipa pullitukunata kunuchingapa kaiaspa ugllari: chasallatami nukapas, achka biaji kaiaspa, tandachingapa munanakurkaikichita. Chasa munakugpipas, kamkunaka mana nukata munawarkangichichu. ³⁵ Chi-mandami kamkunapa wasikuna, sitaska tukugsamungapa kankuna. Kasami niikichita: kuna ramanda mana kawawangapa kangichichu, imaura kamkuna kasa niwankama: “Atun Taita Dius kachamuskami samukungi. Paipa iapa kuiaskami kam kangí”.

Warda puncha, pungii ungui iukaspa tukui kuirpu pungiskata, Jesús aliachiskamanda

14 Sug warda puncha Jesuska, fariseokunamanda taitapa wasima rirka, mikungapa. Chipika fariseokuna, mana allilla iuiwiwa paita chapanakurka.

² Jesuspa ñugpa ladu, sug runa, pungii ungui iukaspa, tukui kuirpu pungiskami tiakurka. ³ Chiura Jesuska, Moisés ima niskata iachachig taitakunata i fariseokunata tapurka:

—Warda punchapas ungugkunata aliachingapa, ¿pudirinchu u mana?

⁴ Chiura, upalla tianakurka. Nigpi Jesuska, ungug runata maki churaspa, ambirka. Nispaka, paipagma kacharka. ⁵ Kachaspaka, chipi kagkunata nirka:

—Kamkunapa wambra u wagra sanjapi urmagpika, ¿manachu warda pucha kagpipas chiuralla surkuntangichi?

⁶ Chiura, ñi pipas mana ainingapa pudirkakuna.

Mana atunsina iuiaiwa tukungapa, Jesús iachachiskamanda

⁷ Chi mikungapa chaiagrigrakuna, taitakuna tiaridirukunata agllanakurka tiaringapa. Jesuska, chasa kawaspa, paikunata iuiai apingasina kasami nirka:

⁸ —Maikan kamkunata kasarai mikuima kunbidachukuna: taitakuna tiaridirupi mana tiarigringichi. Chasa tiarigpika, kamkunamanda sug mas atun taita chaia-mugpika, ⁹ chi kunbidagka, samuspa, pudinmi kamkunata ninga: “Kai tiaridiruta sakipuai, kai runa tiaringapa”. Chiura, kamkunata pingaipami iuiachinga, kati ladu tiarigringapa.

¹⁰ —Kamkunata kunbidachukuna: chiuraka kati ladulla tiarigringichi. Nigpi kunbidagka, samuspa, kamkunata ningami: “Taita waugki, mas ñugpa ladu ialispa tiarii”. Chiuraka, tukui chipi kamkunawa tianakuskapa ñawipi atuniachigsina iuiachimi tukunkangichi.

¹¹ —Chasallata maikanpas atuniachirispas iuiagta, Taita Dioska uchullaiachingapami ka. Ikuti maikanpas uchullaiaspas iuiaskataka, Taita Dios atuniachingapami ka.

Maikankunata kunbidangapa, Jesús iachachiskamanda

¹² Chasa nispaka, paita kunbidag runata nirka:

—Mikungapa kunbidangapa chaiaura, mana kaia-kungi kamba iacharidukunallata, waugkindikunallata ñi kam kikinpurakunallata; iapa iukag kamba ladu suiu kaugsanakuskatapas mana kunbidakungi. Chasa kunbidagpika, paikunapas, kamta kunbidaspas, kutichingakunami.

¹³ —Chasapaka, mikungapa kunbidangapa chaiaura, kaiangi mana iukagkunata, mana allilla sarungapa i chaki mana kuiuchingapa pudiskakunata; mana ñawi kawagkunatapas kunbidangi. ¹⁴ Paikuna mana kamta kutichingapa pudigmandami Taita Diospa iapa kuiaska kankangi. Allilla iuiaiwa kagpura kaugsarii punchami pai, kamta sumaglla kutichingapa.

Kunbidaskakuna mana allilla ainigkunamanda parlu

¹⁵ Chasa uiaspaka, sug kunbidaska Jesuswa tianakuskapuraka paita nirka:

—Dios suma mandakuskapi maikan mikug, paipa iapa kuiaskami kangapa ka.

¹⁶ Chiura, Jesuska ainirka:

—Sug runa, suma mikui karangapa kaspaka, achka runakunatasi kunbidarka. ¹⁷ Ña chi mikungapa pucha chaiauuraka, sug lutrinta kacharkasi, tukui kunbidaskakunata nigringapa: “Samuichi. Ña tukui allischikallami tia”.

¹⁸ —Chasa willagriuraka, tukuikuna nirkakunasi: “Mana pudingapa kanchichu”. Sug runa nirkasi: “Kuna-

urallami sug alpa randirkani. Iukanimi kawangapa ringa. Chimanda nipuagrii, pasinsiawachu”.

¹⁹ —Sugka nirka: “Kunaurallami pichka paris wagra randirkani. Kawagrisa: ¿imasachar kapuá? Chimanda nipuagrii, pasinsiawachu”.

²⁰ —Ikuti sugka nirka: “Kunaurallami kasararkani. Chimandami manima ringapa pudini. Pai Siñur ni-puangi”.

²¹ —Chi lutrín, kutispaka, tukuikuna imasa ainiskasina mikui karangapa kagta patruunta willagrirka. Chasa uiaspaka, rabiariaspas, nirkasi: “Rii puiblu suiu tukui ñambikunama. Tukui ñi ima mana iukaskakunata, mana allilla sarungapa, mana chaki kuiuchingapa pudiskakunata i mana ñawi kawagkunatapas utka pusagrii”.

²² —Chasa ruraspaka, chi runa nirka: “Taita waugki, ñami kam imasa niwaskasina rurarkani. Chasa kagpipas, charami pagtá, mas achka mikugkuna jundachingapa”.

²³ —Chiura, patruunka nirkasi: “Ñambi suiu rispa, maikan tupaskakunatapas iaikuchigrii, kai nukapa wasi jundankama. ²⁴ Niikichitami: nuka ñugpa kunbidaska runakuna, ñi pipas kai suma mikuita mana mikungapa kankunachu”.

Cristowa purigkuna imasa sakii iukaskamanda

²⁵ Iapa achka runakuna Jesusta katiraiarkakuna. Paika, tigrarispas, nirkakunata:

²⁶ —Maikanpas, nukawa samungapa munaspaka, taitata i mamandita, warmindita, wambrakunata, waugki i panindikunata, kikinpa kaugsaitapas mana sakigsina ruragpika, mana nukata katiraiawag niraiianchu.

²⁷ Maikanpas mana krusta markarigsina ruraspas kati-raiawagkunaka, mana nukawa purigmi niraiá.

²⁸ —Maikan kamkunapura, atun awa wasi rurangapa munaspaka, manara kallarisipalla, ¿manachu tiarintra, iuiaringapa: maituku kulkiwasik pagtawanga puchukagta rurangapa? ²⁹ Mana chasa iuiarisipalla kallarigpika, pudinmi mana puchukanga. Nigpika, tukui chasa kawagkuna, asispami ³⁰ ningakuna: “Kai runa, wasi rurai kallarisipaka, mana puchukai pudirkachu”.

³¹ —Chasallata maikan mandag, sugnigmanda mandagwa manara wañuchinakungapa llugsispalla, ¿manachu iuiarintra: chungas waranga suldadukunallawachu pagtawanga, sug mandag iskai chungas waranga suldadukuna samunakuskawa wañuchinakungapa? ³² Mana pudingasina kawaspaka, chi sug mandag chara karupi samukugpita, mañangapami kachanga, mana wañuchinakui tiachu.

³³ —Chasallata maikan kamkunapurapas, tukui ima iukaskata mana sakigsina ruragpika, mana nukawa purigmi niraiá.

³⁴ —Kachi, allillami ka. Kachi waggirigpika, mana pudiringachu kachiachingapa. ³⁵ Alpa suiu ichangapa, ñi majada alpa muntunariaskapi churangapa ñi imapapas mana balingapa kanchu. Chasataka, sitaimi cháiá. Rinri iukagkuna, nuka niskata uiawaspas, suma iuiaringichi.

Ubija chingaskamanda parlu

15 Mana judíu kagkunamanda kulki chaskigkuna i mana allillata ruragkuna, achkakunami Jesus-pagma kaillaianakurka, paita uangapa. ² Chasa kawas-paka, fariseokuna i Moisés ima niskata iachachig taitakuna mana allilla iuiiwa paimanda ninakurka:

—Chi runa, mana allilla ruragkunata chaskispa, paikunawa sugllapimi mikuku.

³ Jesuska, chipi kagkunata iuii apingasina suma par-larka, kasa nispa:

⁴ —Maikan kamkunapura, patsa ubija iukaspas, sug ubija chingapugpika, ¿manachu iskun chungas iskunta sakispa, maskai kallarintra, chi ubijata tarinkama? Ari.

⁵ Chi chingaskata tarispaka, iapa kuntintarispa, markaspami apanga. ⁶ Paipa wasima chaiagrispaka, iacharidukunata i ladu suiu kaugsanakuskata kaiaspas, ningami: “Nukawa tukuikuna suma kuntintaripuaichi. Chi ubija chingapuaska, ñami taririwarka”. ⁷ Kasami niikichita: chasallata kagsina iuiarisunchi: iskun chungas iskun allilla ruragkuna mana ministinkunachu, allilla ruraikunama tigragsina tukungapa. Ikuti sug pandarig runa allilla ruraikunama tigramuuraka, paimandami mas suma kuntintarispa iuiiwa suma luar-manda kawangapa kankuna.

Kuri kulki chingaskamanda parlu

⁸ —Chasallata maikan warmi, chungas kuri kulki iukaspas, sug kulki chingapugpika, ¿manachu bila sindichispa, wasi ukuma suma allimanda pichanga, imaura chingapuskata tarinkama? ⁹ Tarispaka, paipa iacharidukunata i ladu suiu kaugsanakuskata kaiaspami ninga: “Nukawa tukuikuna suma kuntintaripuaichi. Chi kuri kulki chingapuaska, ñami taririwarka”. ¹⁰ Kasami niikichita: chasallata sug pandarig runa allilla ruraikunama tigramuuraka, Diospa anjilkunapas alli iuiachirispami kawangapa kankuna.

Wambra wasita sakispa, mana allilla ruraima riskamanda parlu

¹¹ Kasapasmi Jesús nirka:

—Sug runa, iska wambrakunasi iukarka. ¹² Uchulla waugkika, taitata nirka: “Taita, kam ima sakiwangapa kaskata nukata karawai”.

—Chiura taitandi, ima iukaskata paikunata chaugpi chaugpi kararka.

¹³ —Mailla punchakuna ialiuraka, chi uchulla waugkika, tukui ima karaskata katuspa, kulki tandachispa, sug karu alpamasi rirka. Chipika, mana allilla ruraikunapi tukui kulkita puchukarka.

¹⁴ —Tukui tukuchispa kauraka, chi alpapi iapa iarkai tukugsamurka. Chiura, chi musutaka iapa iarkai pasai kallarirka. ¹⁵ Chasa kaspaka, sug chimanda runapagma chaiagriskataka kacharka, kuchikunata mikui karag kangapa. ¹⁶ Chiuraka, diiarkai munakurka, kuchikuna mikunakuskatapas paipa wigsa jundachiringapa.

Chasa munakugpipas, ñi pi mana paita sakirkakuna mikungapa.

¹⁷ —Chiuraka iuiarirka: “Nukapa taitapagpi, tukui piunkunami mikunkuna maituku munaska. Ikuti nukaka, diiarkaimi kaipi wañukuni. ¹⁸ Atarispas, risa. Nukapa taitapagma rispa, kasami nigrisa: ‘Taita Diosmanda i kam taitata mana allilla ruraiwami pandarirkani.

¹⁹ Mana chaiawakunchu, kam nukata: “wambra” niwangapa. Kamba sug lutrintasina kangapa chaskiwaí.” ²⁰ Chasa iuiarispas, atarispas, taitapagma rii kallarirka.

—Chara karu chaiagringapa pisikugpita, taitandika, kawaspa, paimanda iapa llakii piarka. Kalpalla rispa, tupagrirka. Ugllaspas, kuiaspas mucharka. ²¹ Chiuraka, wambra nirka: “Taita Diosmanda i kam taitata mana allilla ruraiwami pandarirkani. Mana chaiawakunchu, kam nukata: ‘wambra’ niwangapa”.

²² —Taitandika, niskakunata mana uiaspalla, piunkunata nirka: “Utka mas suma katangakunata apamuspa, churachipuaichi. Chasallata makipi surtija, chakikunapi churaridirupas churachipuaichi. ²³ Maikan mas wira wagrata apigrispa, wañuchiichi. Mikuspa, tukuikuna iapa suma kuntintarisunchi. ²⁴ Kai nukapa wambraka, ña wañuskasina kaspapasmi kaugsariska tukupuarka. Chingaskasina kaspapasmi taririwarka”. Chiura, kusikui atun punchasina ialichii kallarirkakuna.

²⁵ —Atun waugkika, chagrapi kaspas, wasima kutimuspa chaiagsamukuura, musika uiachinakuskata i bailanakuskata uiarka. ²⁶ Sug piunta kaiaspaka, tapurka: “¿Ima atun punchatak kaipi ialichinakú?”.

²⁷ —Chiura, chi runa ainirka: “Kamba waugkimi kunaura chaimurka, allilla, mana ungug. Chimandami kamba taita kacharka, suma wira wagrata wañuchispa, mikuspa, kuntintaringapakuna”.

²⁸ —Chasa uiaspaka atun waugkindika, rabiarpas, mana ukuma iaikungapa munakurka. Chimanda taitandika, llugsispa, nirka: “Iaikumui”.

²⁹ —Paika ainirka: “Taita, uiawai. Maituku watakuna kam ima niwaskata imaurapas allilla ruraspalla kaugsakuni. Chasa kagpipas, nukata ñi imaurapas mana karawangichu ñi sug kuchillapas, † nukas iacharidukunawa mikuspa, kuntintaringapa. ³⁰ Kunaura ñasi kamba wambrakar chaimupurkangi, chi mana alli warmikunawa kam kulki karaskata tukuita puchukaspas. Paimandakar maikan mas wira wagratas wañuchirkangi mikungapa”.

³¹ —Chasa uiaspa, taitandika nirka: “Nukapa wambritu, kamka imaurapas nukallawami kangi. Tukui nukas ima iukaskaka, kamballami ka. ³² Chasa kagpipas, kunauraka nukanchita chaiakumi, alli iuiachirispas, kusikuchii atun punchasina ialichingapa. Kamba waugki, ña wañuskasina kaspapas, kaugsami ka. Chingaskasina kaspapas, taririwarkami”.

Ima iukaskata kawag, mana allilla ruraskamanda parlu

16 Kasapasmi katiraiagkunata iuii apingasina iachachirka:

† *griego rimaiwa: kabritu.*

—Sug iapa iukag runa, pai ima iukaskata kawangapasi sakirka. Mana unaiilapika, patrunta willarkakuna, imasa chi kawag tukui tiapuskakunata tukuchipukugta. ² Chiura patrunka, chi kawagta kiaspa, nirkasi: “Kammanda, ¿imasatak nukata willawanakú? Kam imasa trabajukuna ruraskata kawachiwai. Ña kunauremanda, mana mas nuka ima iukaskata kawapuag kangapa kangichu”.

³—Chiura, chi runataka iuiarirka: “¿Imasami rurani? Nukapa patrun, ñami llugsichiwaku. Mana animu iukanichu, alpa pikangapa. Limusna mañaspa puringapa, nukata pingaimi iuiachiwá. ⁴ Ñami iuiariwarka, ima nuka rurangapa kagta; nuka ñi pipa kawagpas mana kaura, maikanpas paikunapa wasima nukata kaiawangapa”.

⁵—Chasa iuiarispaka, paipa patrunta dibinakuskata sug sugllasi kaiarka. Sug runata tapurka: “¿Masatak nukapa patrunta dibikungi?”.

⁶—Chiura ainirka: “Patsa baril asitimi dibikuni”.

—Chasa uiaspaka, chi kawagka nirkasi: “Chiká. Kam, patrunta dibikuska listata kawai. Nispaka, utka tiarisa, pichka chungalla dibikugta churai”.

⁷—Chasallata, sug runata tapurka: “Kamka, ¿maikutak dibikungi?”.

—Chiura ainirka: “Patsa tupu trigumi dibikuni”.

—Chasa uiaspaka, chi kawagka nirka: “Chiká. Kam, patrunta dibikuska listata kawai. Nispaka, pusag chungalla dibikugta churai”.

⁸—Patrunka, paipa mana alli kawag ima ruraskata iachaspaka, nirkasi: “Mana allilla ruraspapas, surapipaka allillami rurarkangi”. Chasallata, kai alpapi tiaskakunallawa iuiarispaka kagkunaka, kikinpura imasa chaiaskasina ruradurmi kankuna, Taita Dios punchaiachiska runakunamandapas mas.

⁹—Kasami niikichita: kai mana alli alpamanda iukaskakunawa chita karaspa maskangichi, iacharidu runakuna iukangapa. Chiwanka, kai alpapi ima iukaska tukuriuraka, kamkunata ñi imaurapas mana tukuridiru suma luarpi kaugsangapami kaiangakuna.

¹⁰—Maikanpas, asllita mingaskata allilla ruragpika, chasallatami achka mingaskatapas allilla ruranga. Ikuti maikanpas, asllita mingaskata mana allilla ruragpika, chasallatami achka mingaskatapas mana allilla ruranga. ¹¹ Kai mana alli alpamanda kulki u imapas iukaskata kamkuna mana allilla ruragpika, ¿imasatak suma luarmanda sutipa iukaikunata kamkunata mingangkuna? ¹² Chasallata, sugkuna mingaskata mana allilla ruragpika, ¿imasatak kam kikinkunata chaiakuskata kuangakuna?

¹³—Ñi maikanpas, iskai patrunkunapa sugllapi mana trabajapungapa pudingapa kankunachu. Sug patrunta mana munangachu; ikuti sugtaka kuiangami. Sug patrunta wabutingami; ikuti sugtaka sumagllami rimanaga. Chasallata, Taita Diusta i kai alpamanda iukaikunata mana pudinkangichichu, iskandima suuralla iuiakungapa.

Fariseokunata, Jesús piñaskamanda

¹⁴ Chasa uiaspa fariseokunaka, iapa kulki iukangapa iuiariillawa kaspera, Jesusta unžarkakuna. ¹⁵ Jesuska nirkakunata:

—Kamkuna, runakunapa ñawipi iapa allilla ruranguksinami kangichi. Chasa kagpipas, Taita Dioska iachanmi kamkuna ima iuianakugta. Kai alpamandakunalla atuniachiska runakunata, pai mana munanchu.

¹⁶—Moisés i Santu Ispirituwa rimagkuna ima willaraiaska, Juan Bautista kaugsankamallami chaiamurka. Chiuramandaka, Diospa suma mandaimanda Alli Willaillawami willai tiangapa ka. Tukuikunami muna-nakú, imasapipas chima iaikungapa.

¹⁷—Sug luar i kai alpa luar tukurigsina kagpipas, chi ñugpamanda ima willaraiaskaka ñi mailla mana ialingapa kanchu.

¹⁸—Kasapasmi niikichita: maikanpas, kikinpa warmita sitaspa, sug warmiwa kasaragpika, atun pandariimi rurá. Chasallata, maikanpas kusa sitaska warmiwa kasaragpika, atun pandariimi rurá.

Iapa iukag runa i Lázaro suti ñi ima mana iukagmanda parlu

¹⁹—Sug iapa iukag runasi tiarka. Paika, iapa suma katanga churarisa, atun punchasina iapa alli mikuillawa kuntintulla iuiachirispasi tukui punchakuna ialichikurka. ²⁰ Ikuti Lázaro suti ñi ima mana iukag runasi tiarka. Chi runa, aicha ismui ungui iukarka. Paika, chi iapa iukagpa wasi pungupi sitaska sirikuspa, ²¹ muna-kurka, mikui mikunakuskamanda urmaskawa wigsa jundachiringapa. Alkukunalla, kaillaiaspa, paipa aicha ismuskakunata llakuanakurka.

²²—Chasa kaugsaspaka, chi mana iukag runa wañurkasi. Paitaka, anjilkuna sug luarma aparkakuna, ñugpamanda taita Abraham kaskama. Chi iapa iukagpas wañurka. Paitaka sumaglla pambarkakuna. ²³ Chiura paika, mana wañuduru ninapi rupakuspa, iapa llakiiwa kaspera, chimanda wichai kawaspaka, karupi Abrahamta i Lázaro paipa migllapi charikuskata kawarka. ²⁴ Abrahamta kaparisa, nirkasi: “Taita, nukamanda llakiriwai. Lazarota kachamuwai, maki didu puntallatapas iakupi jukuchispa, nukapa kalluta chiria-chiwagsamuchu. Kai nina sindikuska iapami rupakuni. Tukui nanaimi iukani”.

²⁵—Chiura, Abrahamka ainirka: “Wambra, iuiarii: kam kaugsankama, kamba iukaiwa iapa sumagllami kaugsankama iukarka. Kunauraka, kaipi pai alli iuiachiwami kuntintulla ka. Kamka iukangimi, tukui llakiiwa nanaiwa kanga. ²⁶ Kasapas. Nukanchiwa kamkunawa tuparingapa, iapa atun waikusinami tia. Chimanda maikanpas kaimanda kamkunapagma ialingapa munaspapas, mana alli kanchu. Chasallata, kamkunapagmanta kaima ialimungapa munaspapas, mana alli kanchu”.

²⁷ —Chiura, chi iukag runa nirkasi: “Nukapa taita, mañaikimi: Lazarota kachapuui nuka taitapa wasima. ²⁸ Pichka waugkindikunami chipi iukani. Paikunata nukamanda willagrighi, uiaspaka, mana kai iapa llakii kadiruma samungapa chaiangakunatachu”.

²⁹ —Abrahamka nirkasi: “Moisés i Santu Ispirituwa rimagkuna imasa kaugsangapa willaraiaskakunata iukankunami. Chikunata allilla iuiarisa uiachukuna”.

³⁰ —Chi iukag runa, Abrahamta ainirka: “Mana, taita. Sug wañuska kaugsarispa, paikunapagma chaigrig-pika, allilla ruraikunamami tigraspa, suma kaugsai kallarintrakuna”.

³¹ —Chasa ainiura, Abrahamka nirkasi: “Moisés i Santu Ispirituwa rimagkuna ima willaraiaskata mana uiai munaspaka, mana uiangakunachu, ñi sug wañuska kaugsarigpipas”.

Sugkunata pandariikunapi urmachigmanda

17 Kasapasmi Jesús, paita katiraiagkunata nirka: —Imaurapasmi tiangapa ka, runakunata pandariikunapi urmachingapa. Chasa tiagpipas, jai, maikan runa, sugkunata pandariikunapi urmachig! ² Maikan kai uchullakunata pandachipuagpika, paita chaiantrami, sug atun kutanga rumi kungapi walkachispa, atun kucha iakuma sitagrangapa.

Tukui waugkikunata pasinsiaskamanda

³ —Suma iuiariichi. Maikanpas mana allilla ruraipi pandarigpika, paita iuiachispa rimangi. Alli tukugpika, pasinsiangi. ⁴ Suglla puncha kanchis biaji kamta mana allilla ruraspa, kamta nigsamuchu: “Mana mas ikuti chasa rurasakichu”: tukui kanchis biaji pasinsiangilla.

Taita Diosllawa tukui suma iuiagkuna imasa pudiskamanda

⁵ Chiura Iaia Jesús agllaska runakuna, paita nirkakuna:

—Nukanchita aidai, kammanda mas iuiaringapa.

⁶ Paika nirka:

—Sug uchulla muritu mustasasinallapas kamkuna nukamanda iuiai iukantrangichi; kai sachata † nintrangichi: “Kaimanda anchurispas, atun kucha iakupi saiarigrii”. Chiurallami chi sacha, chasa rurandra.

Diuspa ñawipi, uchulla lutrinsinakunami kanchi

⁷ —Kamba lutrin chagrapi trabajakuspa u wagra kawakuspa, kutimuuraka, ¿maikan kampuratak nintrangichi: “Tiarispa, mikugsamui”? ⁸ Chasapaka, nintrangimi: “Allichirispa ianui, nukata karawangapa. Nuka mikusa i upiasa. Chiuramandaka, kamka mikungi i upiangi”. ⁹ ¿Kamkuna ima niskata rurag lutrintachu iukangichi ninga: “Pai Siñur”? Manima. ¹⁰ Chasallata kamkunapas, tukui imasa Taita Dios niskasina ruraspaka, ningichi: “Ñi imapa mana bali lutrinsinakunami kanchi. Nukanchita rurangapa chaiakuskallatami rurarkanchi”.

† griego rimaiwa: kai sikómoro suti sacha.

Chunga runakuna aicha ismui unguiwa kaskakunata, Jesús ambiskamanda

¹¹ Jesús Jerusalemma rikuspa, Samaria i Galilea alpa kuchu kuchu ialirka. ¹² Sug uchulla puiblupi chaiakugriuraka, chungu runakuna aicha ismui unguiwa kagkuna paipagma rirkakuna tupangapa. Karullapi saiarispaka, ¹³ sinchi kaparispa, nirkakuna:

—Iachachig taita, nukanchimanda llakirii.

¹⁴ Chi runakunata kawaspaka, Jesuska nirka:

—Sasirdutikunata kawachirigriichi.

Imasa uiaskasina ñambi rinakuskapika, ambirig-samurkakunata.

¹⁵ Ambiriskapura suglla, chasa kawarispaka, Jesus-pagma kutirka. Kutispaka, Taita Diusta iapa suma atun kagta kaparispa nikurka. ¹⁶ Jesuspa chaki ladu kungurispas, ñallapas alpakama kumurispas, nirka: “Pai Siñur”. Chi runa karka Samaria suti alpamanda.

¹⁷ Nigpi Jesuska, chipi kagkunata nirka:

—¿Manachu chungu runa ambiriska kankuna? Sug iskunkunaka, ¿maipitak kankuna? ¹⁸ ¿Imapatak kai mana judíu runalla kutimurka, Taita Diusta iapa suma atun kagta ningapa?

¹⁹ Chasa nispaka, chi runata nirka:

—Atarispa riilla. Kam nukamanda suma iuiariskamandami ambirigsamurkangi.

Diuspa suma mandai puncha, imasa chaimungapa kagta

²⁰ Fariseokuna, Jestusta tapurkakuna:

—Diuspa suma mandai puncha, ¿imauratak chaimungapa ka?

Chiura, paika ainirka:

—Diuspa suma mandai puncha chaimugtaka kamkunapa ñawiwa mana kawangapa kangichichu.

²¹ Mana ningapa pudirinchu: “Kaipimi ka” u “Chipimi ka”. Kam kikinkunapa chaugpipimi Taita Diospa suma mandaika ña tiagsamú.

²² Chasa nispaka, paita katiraiagkunata nirka:

—Kai Runa Tukuska illaura, kamkuna munantrangichi: “¡Amalai suglla punchallapas kutimuspa kawarigsamuntra!”. Kamkuna chasa munagpipas, mana chasa kawawangapa kangichichu. ²³ Chiura, kamkunata nukamanda ninakungami: “Chipimi ka” u “Kaipimi ka”. Chasa ninakugpipas, mana kawangapa katingichi. ²⁴ Imasami rilampa, awapi sugnigmanda punchaiachigsamuspa, sug ladukama punchaiachi: chasallatami iapa suma punchaiachiwa kutimuspa, kai Runa Tukuska kawarigsamungapa ka.

²⁵ —Ima kagpipas, ñugpami kai Runa Tukuskata chaiawaku, iapa llakii i nanai pasangapa. Kunauramanda runakunami wabutiwangapa kankuna.

²⁶ —Imasami, Noé kaugsakuura, mana iuianakuskasina tukugsamurka: chasallatami kai Runa Tukuska kawarigsamungapa puncha tukungapa ka. ²⁷ Noé kaugsakuska punchakunaka, sumaglla mikuspa, upiaspa, kasaraspami kaugsanakurka, Noé ruraska atun

kanuapi iaikunkama. Chiura, iapa atun tamia tukug-samuspa, tukuikunata puchukagsamurkakunata.²⁸ Chasallata, Lot kaugsakuura, mana iuianakuskasina-mi tukugsamurka; Sodomu suti puiblumandakuna, sumaglla mikuspa upiaspa, randispa katuspa, tarpuspa wasichispa kaugsanakurka.²⁹ Lot chi puiblumanda llugsiuraka, nina i asufrimi, awanigmada tamiagsamuspa, tukuikunata puchukagsamurka.³⁰ Chasallata-mi kai Runa Tukuska kawarigsamungapa punchapas tukugsamungapa ka.

³¹ —Chi puncha, maikanpas wasi truja awapi kagkuna mana uraikuchukuna, ukuma iaikuspa, imakuna apangapa. Imasa kaskasinalla mitikuchukuna. Chasallata, maikanpas chagrapi kagkuna mana wasima kutichukuna.³² Lotpa warmi imasa pasaskata iuiariichi.

³³ Maikan kikinpa kaugsaita kispichingapaglla iuiakugpika, kikinmi puchukaringapa ka. Ikuti maikanpas nukamanda wañuchii tukugpika, mana mas wañui kaugsaitami taringapa ka.

³⁴ —Kasami niikichita: chi tuta, suglla kawitupi iskai-kuna kaskakunata, sugtaka apangami; sugtaka sakingami.³⁵ Chasallata, iskai warmikuna sugllapi kutanakuskata, sugtaka apangami; sugtaka sakingami.

³⁶ Chiura, chasa uiagkuna tapurkakuna:

—Taita waugki, ¿maipitak chasa pasaringa?

³⁷ Chasa tapuura, Jesuska ainirka:

—Imasami gallinasukuna, pipas mana willagpi, paikuna wañuska kaskama tandarinkuna: chasami tukugsamungapa ka.

Mana allilla rurag justisiamanda parlu

18 Jesús, chipi kagkunata iachachirka, imaurapas mana sambaiaspalla Taita Diusta mañangapa chaiagta. Chasaka, iui ai apingasina suma parlarkakunata,² kasa nispa:

—Sug puiblupi tiarkasi sug justisiai rurag. Chi runa, Taita Diusta ñi pitapas mana mancharka.³ Chi puibllapita tiarkasi sug sapalla kidaska warmi. Chi warmika, justisiapagma ikuti ikuti mañangapa rikurka, kasa nispa: “Nukata piñawagta kaiaspa, justisiapuai”.

⁴ —Achka punchakuna rigpipas, chi justisiai rurag, paita mana uiangapa munarka. Nispaka, kikinlla iuiarirka: “Taita Diusta ñi pitapas sutipa mana manchani.

⁵ Chasa kagpipas, chi sapalla warmi iapa killachiwagmandaka, paimanda justisiapusami. Chimi pai mana mas killachiwagsamunga”.

⁶ Kasapasmi Iaia Jesús nirka:

—Chi mana imasa chaiaskasina justisiai rurag ima niskata iuiariichi.⁷ ¿Manachu Taita Dius agllaskakuna tuta i puncha paita mañanakugpika, paika justisiapunga, unaiachispapas? ⁸ Kasami niikichita: mana unaiaspallami paikunamanda justisianga. Chasa kagpipas, kai Runa Tukuska ikuti samuuraka, ¿paimanda suma iuiagkuna, kai alpapi charachu tianga?

Fariseo i mana judú kagkunamanda kulki chaskig-manda parlu

⁹ Sug runakuna: “Nuka, tukuipi allimi kani” iuiarispá, sugkunataka wabutinakurka. Chikunata iui ai apingasina, Jesuska suma parlarka, kasa nispa:

¹⁰ —Iskai runakuna, Diuspa atun wasimasi rirkakuna, paita iuiarispá mañangapa. Sug karka fariseo; sugka, mana judú kagkunamanda kulki chaskig.¹¹ Fariseoka, saiarispalla, Taita Diusta rimakugsina kikinmandalla kasa nikurka: “Nukapa Dius, nuka mana sugkunasina kanichu. Ñi sisai, ñi pandarig, ñi sugpa warmikunawa siririg ñi kai kulki chaskigsinapas mana kanichu. Chi-mandami niiki: ‘Pai Siñur’.”¹² Simanapi iskai punchami mana mikuspalla chisiadur kani. Tukui nuka ima ganaskatapas chungapika sugmi karadur kaiki”.

¹³ —Ikuti chi kulki chaskigka, karullapi kumuridu saiakurka, mana awasinama ñawillapas atarichispalla. Pichupi makiwa piarispá, nikurka: “Nukapa Dius, nukamanda llakiriwai. Nuka, iapa pandarigmi kani”.

¹⁴ —Kasami niikichita: chi kulki chaskig wasima kutiuraka, paitami Taita Dius, pasinsiaspa, nirka: “Mana pandarigmi niraiapuangi”. Ikuti chi fariseotaka chasa manima. Maikanpas atuniachirispá iuiagta, Taita Diuska uchullaiachingapami ka. Ikuti maikanpas uchullaiaspá iuiaskataka, Taita Dius atuniachingapami ka.

Wawakunata, Jesús maki churaskamanda

¹⁵ Suura uchullakunata, paikunapa atunkuna Jesus-pagma pusarkakuna, paikunata maki churaspa, Taita Diusta paikunamanda mañangapa. Jesusta katiraiagkunaka, pusanakugta piñaspa, nirkakuna:

—Mana kailaianakuichi.

¹⁶ Jesuska, wawakunata kaiaspa, paita katiraiagkunataka nirka:

—Ianga kawaichi, wawakuna nukapagma samuchukuna. ¿Imapatak arkanakungichi? Kai wawakunasina kagkunami suma luarma iaikugringapa kankuna.

¹⁷ Kasami nuka niikichita: maikanpas, mana Diuspa ñawipi kai uchullakunasina allilla tukugsamugpika, mana suma luarma iaikugringapa kankunachu.

Sug iapa iukag runa, Jesuswa rimanakuskamanda

¹⁸ Sug mandag runa, Jesusta tapurka:

—Alli iachachig taita, ¿imasatak iukani ruranga, mana puchukariduru suma kaugsaita taringapa?

¹⁹ Jesuska ainirka:

—¿Imapatak nukata: “Alli iachachig taita” niwakungi? Maikanpas mana alli tianchu. Taita Diusllami alli ka.

²⁰ Moisés ima niskata ñami iachangi: “Mana sugpa warmiwa siririgi. Mana wañuchingi. Mana sisangi. Mana pimandapas llullangi. Kamba taitata mamandita sumaglla kuiangi”.

²¹ Chiura, chi runa ainirka:

—Nuka, uchulla kauramandatami tukui chi niskata chasa ruraspa kaugani.

²² Chasa uiaspa, Jesuska nirka:

—Nigpika, kasami pisipukungi. Kam tukui ima iukaskata katugrii. Katuska kulkitaka mana iukaskakunata tukuita karagrii. Chasa ruraspaka, suma luarpika iapa iukagmi tukungapa kangi. Nispaka samungi, nukata katiwangapa.

²³ Chasa rimaskata uiaspaka, chi runa irkiaspami llakirirka, iapa iukag kaspaka. ²⁴ Chasa llakirigta kawas-paka, Jesuska nirka:

—Iapa iukagkuna suma luarma iaikugringapaka, iapa trabajusumi ka. ²⁵ Maschar alli kantra, sug wagra, † sug aguja ñawipi ialingapa. Chimanda mas trabajusumi ka, chi iapa iukagkuna suma luarma iaikugringapa.

²⁶ Chasa uiagkuna tapurkakuna:

—Nigpika, ¿pisik kispiringapa pudinga?

²⁷ Chiura, Jesuska ainirka:

—Ñi maikan runa mana pudiskataka, Taita Diosmi tukui pudí.

²⁸ Chiura, Pedroka nirka:

—Uiamui. Nukanchi, tukui ima iukaskata sakispami kamta katiraiianchi.

²⁹ Jesuska, paikunata ainirka:

—Kasami nuka niikichita: maikanpas, Dios suma mandakuskata munaspa, wasita, warmindita, waug-kindikunata, taita i mamandita i wambrakunata sakispa katiwagka, ³⁰ mas achkami kai alpapita chaskingapa kankuna. Suma luarpipas mana puchukariduru kaugsaitapasmi tarigringapa kankuna.

Jesús imasa wañungapa kagta, pai kimsama willaskamanda

³¹ Chunga iskai pai agllaskakunallata kaiaspaka, Jesuska nirka:

—Uiawaichi. Jerusalenmami rinakunchi. Chipika, tukui ima Santu Ispirituwa rimagkuna kai Runa Tukuskamanda ñugpamanda librupi willaraiaskata tukuipi chasami pasariwangapa ka. ³² Mana judíu kaskakunapagmami chaiachii tukungapa kani. Paikuna unžawaspa, kamiwaspa, tukawaspami kangapa kankuna. ³³ Asutiwaspaka, wañuchiwapami kankuna. Chasa wañuska kaspapas, kimsa punchapika ikutimi kaugsaringapa kani.

³⁴ Chasa niskataka, katiraiagkuna mana iacharkakuna ima niraiagta. Paikunamanda pakaska kagsina karka; chiwanka, chi ima niraiaskata mana iachangapa.

Sug runa mana ñawi kawagta, Jesús aliachiskamanda

³⁵ Jesús ña Jerikó puibluma chaiakugriskapika, sug runa mana ñawi kawag, limusna mañaspa ñambi kuchupi tiakurka. ³⁶ Chi runaka, achkakuna ialinuskata uiaspa, tapurka:

—¿Imatak pasariku?

³⁷ Chiura ainirkakuna:

—Nazaret puiblumanda Jesusmi ialiku.

³⁸ Chasa uiaspa, chi runaka kaparirka, kasa nispa:

—Davidpa wambra Iaia Jesús, nukamanda llakirii.

† griego rimaiwa: kamello suti atun animal.

³⁹ Ñugpa rinakug, paita piñaspa, nirkakuna:

—Upalla kai.

Paika, upallangataka, mas sinchimi kaparii kallarrirka, nispa:

—Davidpa wambra, nukamanda llakirii.

⁴⁰ Chasa uiaspaka Jesuska, saiarispa, kacharka, chi runata pusangapa. Chaiachigriuraka, paita tapurka:

⁴¹ —¿Imatak munakungi, nuka kamta rurangapa?

Chiura ainirka:

—Taita waugki, nuka kawangapami munakuni.

⁴² Chiura, Jesuska nirka:

—Nigpika, kawai. Kam nukamanda suma iuiariskamandami ambirigsamungi.

⁴³ Chasa nigllapi, allilla kawai kallarrirka. Nispaka, Jestusta katii kallarrirka, Taita Diusta nispa:

—Kam, iapa suma atunmi kangi.

Chasa kawaspa, tukui chipi kagkunapas Taita Diusta nirkakuna:

—Tukuikunamanda mas suma atunmi kangi.

Zakeo suti runamanda

19 Chi Jerikó puiblu ukupi, Jesús ña ialikurka.

² Chipi kaugsakurka Zakeo suti iapa iukag runa, mana judíu kagkunamanda kulki chaskigkunata mandag. ³ Chi runa munakurka, Jestusta rigsingapa. Chasa munakuspapas, iapa achka runakuna chipi kagmandaka, paitaka mana alli karka kawangapa, iapa uchulla runa kaspaka. ⁴ Chimandaka, ñugpa kalpaspa, maipi Jesús ialingapa kaskapi sug sikómoro suti sachapi sikagrirka, chimanda kawangapa.

⁵ Chi ladullapi Jesuska, ialikuspa, wichai kawaspa, Zakeota nirka:

—Utka uraikumui. Kuna puncha chaiawakumi, kambawa wasima chaiagringapa.

⁶ Chiuralla Zakeo, uraikuspa, Jestusta pusarka. Alli iuiachiiwa paipagma iaikuchigrirka.

⁷ Tukui chasa kawagkuna, paipura mana allilla iuiaiwawinakurka:

—Pandarigpagmami Jesús iaikugrirka, paiwa sugllapi kagringapa.

⁸ Zakeoka, saiarispa, Iaia Jestusta nirka:

—Taita waugki, tukui ima nuka iukaskata mana iukaskakunata chaugpimi karangapa kani. Maikanta llullachispa, kulki mañaskakunatapas chusku biaji iapawami kutichingapa kani.

⁹ Chiura, Jesuska nirka:

—Kuna punchami kai wasimanda runakuna kispirigsamurkakuna. Kai runapas, ñugpamanda taita Abrahamapa iawarmi ka. ¹⁰ Kai Runa Tukuska samurkami, maikan chingaskasinata maskaspa, tarispa, kispichingapa.

Chunga kuri kulkimanda parlu

¹¹ Jesús ña Jerusalenma kaillaiakugmanda, chasa niskata uiagkuna iuianakurka: “Diuspa suma mandai, ñachar chaimuku”. Chimanda, paikunata iuiai apingasinga suma parlarka, ¹² kasa nispa:

—Sug runa, mandagpa wambrasi tiarka. Chi runaka, sug karu alpama rirka, atun mandag tukuspa kutimungapa. ¹³ Llugsikuspaka, chungu lutrinkunata kaiaspapa, sug sug kuri kulki mingarka, kasa nispapa: “Kaiwa randispa i katuspa, mirachipuangichi, imaura nuka chaiamunkama”. ¹⁴ Pai rigllapi, chi alpamanda runakuna, paita mana munaspa, kacharkakuna, ñugpa willangapa: “Chi runata mana munanchichu, nukanchipa atun mandag kangapa”.

¹⁵ —Atun mandag tukuspa kutimuspa, chi runaka kacharka, tukui kulki mingaskakunata kaiaspa, tapungapa: masa kulkimi mirachiska tiapunkunata. ¹⁶ Chiura sug runaka, chaiamuspa, nirka: “Taita waugki, kamta chaskiskawa ña chungu biaji masmi mirachipuiki”.

¹⁷ —Chiura, chi atun mandagka ainirka: “Kam, iapa allimi kangki. Allillami rurarkangi. Chasa maillallawa mirachigmanda, chungu puiblutami mandag kankangi”.

¹⁸ —Chasallata sug runaka, chaiamuspa, nirka: “Taita waugki, kamta chaskiskawa ña pichka biaji masmi mirachipuiki”.

¹⁹ —Chiura nirkasi: “Kamka, pichka puiblutami mandag kankangi”.

²⁰ —Ikuti sugka, chaiamuspa, nirkasi: “Taita waugki, kamba kulki kaipimi tiapungi. Nuka, kamta manchaiwaka, sug piti linsupi maituspa wakachipurkaikimi.

²¹ Kamka, sinchi sungumi iukangi. Kam mana wakachiska iukaskatami tandachidur kangki. Chasallata, maipi mana tarpuskapi palladurmi kangki”.

²² —Chasa uiaspaka, chi atun mandagka nirka: “Kam kikinpa rimaiwami iachariwarka, kam mana alli kagta. Kam, allillami iacharkangi, nuka sinchi sungu iukagta; nuka mana wakachiska iukaskata tandachidur kagta; chasallata, maipi mana tarpuskapi palladur kagta.

²³ Chasa iachaspaka, ¿imapatak nukapa kulki mirangapa, mana bankupi mingapuarkangi; chasaka, nuka kutimuura, iapawa kuawangapa?”.

²⁴ —Chasa rimaspaka, chipi kagkunata nirka: “Kai lutrinta kulki kichuspa, chi chungu iukagta kuaichi”.

²⁵ —Chiura nirkakuna: “Taita waugki, paika ñami chungu iuká”.

²⁶ —Chasa niura, chi atun mandagka nirkasi: “Kasami niikichita: maikan iapa achka iukagta masmi karangapa ka. Ikuti maikan mailla iukaskataka tukuimi kichungapa ka. ²⁷ Kasapas. Maikan nuka atun mandag tukungapa mana munawaskakunataka pusagrispa, nukapa ñawipi wañuchiichi”.

Jerusalén puibluma, Jesús iaikugriskamanda

²⁸ Jesús rimai puchukaspaka, paita katiraiagkunata Jerusalem ñambi ñugparka. ²⁹ Betfajé i Betania suti puiblukuna ña kawarikuskamanda, Olivos suti lumakama chaiagrirka. Chimanda, iskai katiraiagkunata kacharka, ³⁰ kasa nispapa:

—Riichi chi ñugpa ladu uchulla puibluma. Chaiagrispaka, tarigrinkangichimi sug buru wataraiaskata, manara pipas tiariska. Chi buruta paskaspa, apamungichi.

³¹ Maikan tapuchu: “¿Imapatak buruta paskanakungichi?”: chiura ainingichi: “Iaia Jesustami ministiku”.

³² Chi kachai tukuskakuna chaiagriuraka, tukui imasa Jesús niskasina allilla tukugsamurka. ³³ Buruta paskanakuuraka, duiñukuna tapurkakuna:

—¿Imapatak buruta paskanakungichi?

³⁴ Chiura ainirkakuna:

—Iaia Jesustami ministiku.

³⁵ Apangapa sakiuraka, buruta Jesuspagma aparkakuna. Chaiachigrispaka, buru wasapi paikunapa katanagakunata churaspa, Jestusta tiarichirkakuna. ³⁶ Jesús ñambi rikuskapika, paikuna kataraiaska katanganakunata ñambi suiu mandachirkakuna, pai ialingapa.

³⁷ Ña Jerusalem chaianakugriura, Olivos lumamanda uraikunakuskapika, iapa achka runakuna Jestusta katiraiagkunata, iapa alli iuiachirrispa, kallarirkakuna, Taita Diusta kaparispa ningapa: “Kam, iapa suma atunmi kangki”. Tukui ima mana imaurapas kawaskasina pai ruraskakunata kawaskata iuiarispami chasa kaparinakurka. ³⁸ Kasapasmi kaparispa ninakurka: —Atun Taita Dios kachamuska atun mandagmi samukungi.

Paipa iapa kuiaskami kangki.

Sug luarpi, sumaglla kachu.

Taita Dios awa suma luarpi kagtami ninchi:

“Kam, iapa sumami kangki”.

³⁹ Chipi kagpura sug fariseokuna, Jestusta nirkakuna:

—Iachachig taita, kamta katiraiagkunata piñai.

⁴⁰ Jesuska ainirkakunata:

—Kasami niikichita: paikuna upallagpika, rumikunami chasallata kaparingapa kankuna.

Jerusalemmanda, Jesús wakaskamanda

⁴¹ Jerusalem ña kailla rikuspaka, chi puibluta kawaspa, paimanda wakarka. ⁴² Wakakuspaka, nirka:

—Kunaura kamkuna, kai punchakuna imasa karaskata iachantrangichi, sumaglla kaugsangapa. Nigpika, pakaskasinami ka, kamkuna mana iachai pudingapa.

⁴³ Sug punchakuna chaiamungapami ka; kamkunata wañuchingapa samugkunaka, tukuinigmanta kinchaspapa, sug awa pata ruraspami muiuchingapa kankuna, ñi pipas mana ialingasina. ⁴⁴ Nispaka, kai puibluta lim urmachispa, tukui ukupi kaugsanakuskatami wañuchingapa kankuna. Tukui piachiska rumikunapas, ñi sug mana sakingapa kankunachu. Taita Dios kachamuska kamkunapagma chaiamuura, mana rigsigmandami chasa iapa llakii pasangapa kangichi.

Diuspa atun wasi ukumanda, Jesús katugkunata llugschiskamanda

⁴⁵ Diuspa atun wasi ukuma iaikugrispaka, tukui chipi katugkunata llugsichii kallarirka, ⁴⁶ kasa nispapa:

—Ñugpamanda librupi, kasami willaraiá: “Nukapa wasi, Taita Diusta iuiarisa mañadirumi kangapa ka”. “Kamkunaka, sisai kaugsadirusinami rurarkangichi”.

⁴⁷ Chiuramanda tukui punchakuna, Diuspa atun wasi ukupimi iachachikurka. Iaia sasirdutikuna, Moisés ima

niskata iachachig taitakuna i sug taitakunapas, paita iuiarinakurka imasapipas wañuchingapa. ⁴⁸ Pai ima iachachikuskata, tukui runakuna suma allilla uiaspa kagmandami paikunata mana iacharirkakunata imasa wañuchinga.

Kamtaka, ¿pitak kachamurka, atun tukuspa puringapa?, Jesusta tapuskamanda

20 Sug punchaka Jesús, Diospa atun wasi ukupi kagkunata iachachikuspa, Alli Willaita willakurka. Chiura iaia sasirdutikuna, Moisés ima niskata iachachig taitakuna i sug taitakunapas, paipagma chaiagrispa, ² tapurkakuna:

—Nukanchita willai: ¿imapatak chasa ruraspa puritungi? ¿Pitak kamta kachamurka, atun tukuspa puritungapa?

³ Jesuska ainirkakunata:

—Nukapas, kamkunata tapusakichita. Willawaichi: ⁴ ¿pitak Juanta kacharka, baugtisingapa? ¿Taita Dioschu kachamurka? Mana kagpika, ¿runakunachu kacharka?

⁵ Chiuraka, kikipura rimarinakurka, kasa iuiarispas: —“Taita Dios kachamuskami karka” nigpika, paika ainingami: “Nigpika, ¿imapatak mana paita uiarkangichichi?”. ⁶ “Runakunalla kachamuskami karka” mana nisunchi. Tukuikunami Juanmanda iuianakú: “Santu Ispirituwa rimagmi karka”. ¡Amalai nukanchita rumiwa pi-aspas wañuchintrakuna!

⁷ Chasa rimanakuspa, Jesusta ainirkakuna:

—Mana iachanchichu, Juanta pi kachamuska kagta.

⁸ Chasa ainiura, Jesuska nirkakunata:

—Chimandami nukapas mana willaikichita, pi kachamuwaska kagta, atun tukuspa kangapa.

Ubas sachakunata almagkuna, mana allilla ruraskamanda parlu

⁹ Chasa nispaka, chipi kagkunata iui ai apingasina suma parlarka, kasa nispas:

—Sug runa, achka ubas sacha malkikunasi paipa alpapi tarpurka. Nispaka, sug runakunata chi ubas sachakunata sakirka, almaspa, chaugpi chaugpi pallangapa. Chasa sakispaka, iapa unai karu alpamarirka. ¹⁰ Na pallangapa chaiauraka, sug lutrinta chi almagkunapagma kacharka, paipa rasiunta chaskingapa. Chi runakunaka, kachai tukuskata makaspa, chusa maki kacharkakuna.

¹¹ —Chiuramanda, ikuti sug lutrintasi kacharka. Chitapas makaspa, kamispa, chasallata chusa maki kacharkakuna. ¹² Na kimsamaka, ikuti sug lutrintapassi kacharka. Chitaka lisiachispa, kanchamasi llugsichirkakuna.

¹³ —Nigpi, chi duiñuka iuiarirkasi: “¿Imatak rurasas? Nukapa iapa kuiaska wambratami kachasa. Nukapa wambra kagmanda, mana imapas rurapuangakunachu”.

¹⁴ —Nigpika chi almagkunaka, chi wambrata kawaspa, kikipura rimarirkakuna, kasa nispas: “Kai alpa

duiñupa wambrami samuku. Paitaka wañuchisunchi. Chasaka, nukanchipallami kai alpa tukunga”. ¹⁵ Chasa nispaka, paita chi alpamanda llugsichispa, wañuchirkakuna.

Chasa parlaspa, Jesús tapurka:

—Nigpi chi alpa duiñuka, ¹⁶ ¿manachu samuspa, chi runakunata tukuita wañuchigsamuntra; nispaka, chi sachakunata ikuti sugkunata almangapa sakintra?

Chasa uiagkuna ainirkakuna:

—Chasa mana pasarichu.

¹⁷ Chasa niura Jesuska, ñawima kawaspa, nirkakunata:

—Nigpi, ñugpamanda librupi kasa willaraiaska, ¿imatak niraiá?

Wasichigkuna wabutiska rumi, wasita charigmi tukugsamurka.

¹⁸ Maikan chi rumipi urmagkuna, piti pitimi tukungakuna. Chasallata, chi rumi awalla urmagpika, ñutumi tukungakuna.

Impuistumanda Jesusta tapuskakunamanda

¹⁹ Chi parluta uiaspaka, Moisés ima niskata iachachig taitakuna i iaia sasirdutikunapas nirkakuna:

—Nukanchitami uiachiku—. Chimanda, chiuralla Jesusta apichingapa munanakurka. Chasa munanakuspapas, achka runakuna chipi kagmanda, manchai apirkakunata. ²⁰ Nispaka, suma rimagkunasina kawari kaskakunata kacharkakuna, Jesusta chapangapa. Chi runakuna rirkakuna, pai rimakuskata uiaspa, imapipas pandarigpika, paita apichingapa; apispaka, tukui-kunata mandagpagma chaiachispa, paita justisiangapa.

²¹ Kachai tukuskakunaka, chaiagrispa, Jesusta sumaglla nirkakuna:

—Iachachig taita, nukanchi iachanchimi, kam mana llullaspalla rimagta. Mana pitapas kawasallami tukui-kunata iwalla sutipa kaskata iachachingi, imasa Taita Dios munaskasina ruraspa kausangapakuna. ²² Chimandami kasa tapugsamunchi: ¿allillachu ka, Romamanda iaia mandagta nukanchi impuistu kuangapa? ¿Pagasunchichu u mana?

²³ Jesuska iacharka, mana allilla iui aiwa chasa tapunakugta. Nispaka nirkakunata:

²⁴ —Impuistu kulki kuadiruta kawachiwaichi—. Kawachiuraka, tapurka— ¿Pipa ñawitak kawariku? ¿Pimandatak willaska niraiá?

Chiura ainirkakuna:

—Romamanda iaia mandagmanda.

²⁵ Chasa ainiura, Jesuska nirkakunata:

—Chasa kagpika, Romamanda iaia mandagpa kaskata paita kuaichi. Taita Diospa kaskataka Taita Diusta kuaichi.

²⁶ Chasa, tukuikunapa ñawipi, Jesús ainigmanda mana apichingapa pudirkakuna. Chi ainiskata uiaspaka, iapa ujnarisipami upalla karkakuna.

Wañuskakuna kaugsaringapa kaskamanda, Jesusta tapuskakunamanda

²⁷ Chiuramanda sug saduseo suti runakuna, Jesus-pagma chaiagrirkakuna. Chi runakuna iachachidurmi kankuna, wañuskakuna mana mas kaugsaringapa kagta. Chaiagrispaka, Jesusta nirkakuna:

²⁸ —Iachachig taita, Moiseska nukanchimanda kasasi willaspa sakirka. Sug kari kasaraspa, warmi manara wambrakuna iukagllapi wañugpika, sug waugkindisi iuká chi biudawa kasaranga; chasaka, wañug waugkindipa quinta wawakuna iukangapa.

²⁹ —Nigpika, kanchis waugkindikunasi tiarka. Atun waugkindika, kasaraspa, warmi manara wawakuna iukagllapisi wañurka. ³⁰ Chiwanka, kipamanda waugkindisi chi sapalla kidaska warmiwa kasarai iukarka. Chi waugkindipas, warmi manara wawakuna iukagllapisi wañurka. ³¹ Katimanda waugkinditapas chasallata pasarirka. Chasallatasi tukui kanchis waugkindikuna, warmi manara wawakuna iukagllapi wañurkakuna.

³² Katimakar, chi warmipas wañurka. ³³ Nigpika, wañuskakuna kaugsariuraka, ¿pipatak chi warmi kanga, chi kanchis waugkindikunawa kasadu kaspera?

³⁴ Jesuska ainirkakunata:

—Kunaura kaugsagkuna, karikuna i warmikuna kasaranakumi. ³⁵ Chasa kagpipas, maikan wañuska Diuspa ñawipi allilla kaspera, kaugsarispa, suma luarma chaiagrispa kagkunaka, kari ñi warmi mana kasaranga kankunachu. ³⁶ Paikuna, mana mas wañungapa kankunachu. Anjilkunasina kaspera, Diuspa wambra-kunami tukuska kangapa kankuna, paikunata kaugsa-chii ruraskamanda.

³⁷ —Kasapas. ¿Imapatak kamkuna ningichi: “Wañuskakuna mana mas kaugsaringapa kankunachu”? Moisespas, sacha rupakuskamanda rimaspa, chasallatami iachachirka, kasa nispa: “Atun Taita Dios, Abrahampa, Isaakpa i Jakobpa Diosmi ka”. ³⁸ Chiwanka, Taita Dios mana kanchu wañuskakunapa. Kaugsagkunapami Taita Dios ka. Paipa ñawipika, tukuikunami kaugsa kankuna.

³⁹ Chiura Moisés ima niskata sug iachachig taitakunaka, Jesusta nirkakuna:

—Iachachig taita, iapa allillami rimarkangi.

⁴⁰ Chiuramanda, Jesusta mancharispa, ñi maikan mana mas paita tapungapa munarkakuna.

Taita Dios agllaska Cristo, Davidpa iaiami ka

⁴¹ Chiura, Jesuska nirkakunata:

—Taita Dios agllaska Cristomanda, ¿imapatak ninkuna, Davidpa wambra kati wambra kagta?

⁴² ¿Manachu David kikin, Salmos suti librupi, Cristomanda kasa willarka?

Atun Taita Diosmi nukapa iaiata nirka:

“Nukapa alli ladu tiarii,

⁴³ nuka tukui kamta mana munagkunata apagrispa, kamba chaki sarudiru ukuma churankama”.

⁴⁴ Chasami David kikin, Cristomanda nirka: “Nukapa iaiata”. Nigpika, ¿imawantak Cristo, paipa wambra kati wambra kanga?

Iachachig taitakunata, Jesús piñaskamanda

⁴⁵ Chasa nispaka, tukui chipi kagkuna uianakunkama, paita katiraiagkunataka nirka:

⁴⁶ —Moisés ima niskata iachachig taitakunawa mana iapa sugllapi iuiwai kangichi. Paikuna munankunami, iapa suma kawari katangakuna churarispa puringapa. Kallipi paikunawa tupanakuskapi munankunami, iapa suma kuiwai kumurispa, “Puangi, taita waugki” ningapakunata. Tandariduru wasikunapipas munankunami, atun taitakuna tiariduru ñugpa ladu tiaringapa. Chasallata, maima kunbidagpi suma mikungapa kaiaura, ñugpa ladu tiaringapami munankuna. ⁴⁷ Warmi sapalla kidaskakunata wasikunatami kichudur kankuna. Nispaka, kawachiringapagllami unai Taita Diusta rimanakudur kankuna. Chasa ruraskakunamandami sug luarpi sugkunamandapas mas llakiipi justisiai tukungapa kankuna.

Sug mana iukag warmi, Taita Diusta kulki karaskamanda

21 Chiuramanda Jesús, iapa iukagkuna imasa kulki churadirukunapi churanakuskata kawakurka.

² Chipi chaiagrispa, sug warmi mana iukag sapalla kidaskaka, iskai uchulla kulkillami churarka. ³ Chasa kawaspaka, Jesuska nirka:

—Nukami kasa niikichita: chi warmi mana iukag sapalla kidaska, tukuikunamanda mas achka churagmi niraiá. ⁴ Sugkunaka, paikunapa puchuskatami churarkakuna. Ikuti chi warmika, mana iukaspapas, pai mikungapa charikuskatami tukuita kararka.

Diuspa atun wasita puchukai tukungapa, Jesús willaskamanda

⁵ Sug runakuna, Diuspa atun wasimanda rimaspa, ninarurka:

—Iapa atun kantiaska rumikunawa i Taita Diusta karaskakunawa saiachiska, ña iapa sumami kawariku.

Chasa uiaspa, Jesuska nirka:

⁶ —Tukui ima kamkuna kawanakuska puchukaringapa punchakunami chaimungapa ka. Chi tukui piachiska rumikuna, ñi sug mana sakingapa kankunachu. Tukuitemi urmachispa puchukangapa kankuna.

Kai alpa puchukarii puncha manara chaiagllapi, imasa kawaringapa kaskamanda

⁷ Chiura, paita tapurkakuna:

—Iachachig taita, ¿imauratak chasa pasaringa? Ña chasa pasaringapa kagta, ¿imawatak kawachinga?

⁸ Chiura, Jesuska ainirka:

—¡Ujalallapas maikan, kamkunata llullachispa pandachichukuna! Achkakunami, nukasina tukuspa, samungapa kankuna, kasa nispa: “Nukami Taita Dios agllaska Cristo kani”. Kasapasmi ningakuna: “Ñami chi

puncha chaimuku". Chasa nigpikunapas, mana paikunata katingichi. ⁹ Tukuimami mana llakispalla wañuchinakugta, ñi pita mana uiaspalla piñachirinakugta iacharingapa ka; kamkuna mana mancharinakungichi. Chasami ñugpa pasaringapa ka. Nigpipas, kai alpa puchukarii puncha manara chaimuska niraianchu.

¹⁰ Chasa nispaka, kasapasmi nirkakunata:

—Sug mandag alpanigmandakunawa sugnigmandakunawa wañuchinakuimi tiangapa ka. ¹¹ Alpa kuiurisa chapurispami ringapa ka. Sugnigmanda sugnigmanda iapa iarkai i purig unguikunapasmi tiangapa ka. Awapipas iapa manchangasina mana imaurapas kawaskasinami kawaringapa ka.

¹² —Tukui chikuna manara pasarigpimi, kamkunata apispa, mana allilla rurangapa kankuna. Tandariduru wasikunama kamkunata chaiachispa, karsilpimi wichkangapa kankuna. Kamkuna nukawa kagmanda, atun mandagkunapagmami purichingapa kankuna, justisiai rurai tungupapa. ¹³ Chiura, paikunata nukamandami willankangichi. ¹⁴ Mana iuianakungichi imasa ainingata. ¹⁵ Nukami suma iachaiwa kamkunata iuiachisakichita imasa ainingata. Chi kamkuna iachaskata, ñi maikan kamkunata piñagkuna mana pudingakunachu imapas ainingata. Upallami kangakuna.

¹⁶ —Chi punchakuna, kamkunapa atunkuna, waugkindikuna, kampurakuna i iacharidupurapasmi kamkunata apichingakuna, justisiai tungupapa. Kamkunata, achkakunatami wañuchingapa apichingakuna. ¹⁷ Tukuikunami kamkunawa rabiaringakuna, kamkuna nukawa kagmanda. ¹⁸ Chasa rabiaringpikunapas, kamkunapa umamanda ñi sug agcha mana chingachigsinami kankangichi. ¹⁹ Nukamanda iuiailawa apanakungichi. Chasaka, kamkunapa almata kispichinkangichimi.

²⁰ —Jerusalén puibluta achka suldadukuna muiuchinakugta kawaspaka, iuianakungichi, chi puiblu ña puchukaringapa kagta. ²¹ Chasa kawaspaka, Judea alpapi kaugsanakug, sachukuma mitikuchukuna. Jerusalemni kagkuna, chimanda mitikuspa, llugsichukuna. Chagrapi kagkunapas, mana Jerusalemma samuchukuna. ²² Chi punchakuna, iapa llakiimi tungupapa ka. Tukui imasa ñugpamanda librupi niraiaskasinami pasaringapa ka.

²³ —¡Ai, maikan warmijimkuna, chi punchakuna wigsawa ungug u uchulla markaska kagkuna! Kai alpapi iapa achka llakiikunami tiangapa ka. Kai Israelmanda runakunawa, Taita Diospa rabiama chaimungapa ka, tukui llakiikuna tiangapa. ²⁴ Chiura, sugkunata ispadawami wañuchingapa kankunata. Sugkunataka wataspa, sug alpakanamami apangapa kankunata. Jerusalemata, mana Israelmanda runakunami mandangapa kankuna, imaura Taita Dios paikuna chipi kangapa niraiaska puncha chaiankama.

Jesús imasa ikuti samungapa kaskamanda

²⁵ —Indi, killa, istrillakunapas, mana imaurapas kawaskasinami kawaringapa ka. Kai alpapi pasamar iakukuna iapa sinchi uiariuraka, tukui kaugsagkuna,

iapa mancharispa, tuntiadusina mana iacharingapa ka ima ruranga. ²⁶ Kai alpapi imasa pasarikugta iuiarispa, dimanchaimi wañuskasina builtanakungapa ka. Kai alpamanda awa ladu tiaskakunapasmi kuiuchii tungupapa kankuna.

²⁷ —Chiura, kai Runa Tukuskatami kawawangapa kankuna. Nukapa tukui iapa suma iachaiwa puiupimi samungapa kani.

²⁸ —Chasa pasarii kallariuraka, kuntintulla alli iuiachiiwa kangichi. Kamkunata kispichii puncha ñami chaimunga.

²⁹ Chasa nispaka, paikunata iuiai apingasina suma parlarka, kasa nispaka:

—Iigus u maikan sachata kawaspaka, iachaikuichi.

³⁰ Pangakuna ña susuriura, kamkuna kawaspaka, ningichimi: "Ñami alli punchakuna chaimuku". ³¹ Chasallata kamkuna, tukui chasa pasarinakuskata kawaspaka, ñami iachankangichi, Diospa suma mandai puncha ña chaimukugta.

³² —Kasami nuka niikichita: manara tukui kunaure kaugsagkuna wañugpimi tukui chasa pasaringapa ka.

³³ Sug luar i kai alpa luar puchukarigpipas, nuka ima niskaka mana ialingapa kanchu.

³⁴ —Sumaglla iuianakungichi. ¡Ujalallapas jiru iuiainkunallawa, machaiwa i kai alpamanda imakunapas munailawa kantrangichi! Chasa kaugsanakugpika, chi puncha chaimungami, kamkuna mana iuianakunara.

³⁵ Imasami tuglla urmá: chasallatami chi puncha, kai alpapi tukui kaugsanakugpagma chaimungapa ka.

³⁶ Chimanda, imaurapas iuiaipilla kangichi. Taita Diusta iuiarispa mañanakungichi, tukui chasa pasaringapa punchakuna chaimuura, kamkuna kispirispa kangapa; chasallata, kai Runa Tukuskapa ñugpa ladu mana manchaspalla saiarigringapa.

³⁷ Jesús, chi punchakuna Diospa atun wasi ukupi chisiagta iachachikurka. Tutakunaka, Olivos suti lumapi pakarikugrirka. ³⁸ Tutatakunaka, achka runakuna Diospa atun wasima chaianakugrirka, paita uiangapa.

Jesusta wañuchingapa iuianakuskamanda

22 Tanda mana libadurawa mikudiru paskua suti atun puncha ña chaiakuura, ² iaia sasirdutikuna i Moisés ima niskata iachachig taitakunaka, Jerusalemni achka runakuna kaskata manchanakuspa, paipura rimarinakurka, imasa Jesusta pakalla wañuchingapa.

³ Chiura, chungu iskai Jesús agllaskakunamanda Judas Iskariote suti runapa sungupimi iaia kuku iaikurka.

⁴ Chi runaka, iaia sasirdutikuna i Diospa atun wasita kawagkunapagma rispa, rimanakurka imasa Jesusta apichingapa. ⁵ Paikuna, chasa uiaspaka, sumaglla kuntintarispa, nirkakuna:

—Kulkimi kamta karasunchi.

⁶ Chiuramanda Judas, "Ari" nispa, maskai kallariurka imasa Jesusta apichingapa, mana achka runakuna kawanakuura.

Jaia Jesús, ña wañungapa chaiakuura, katiraiagkunawa mikuskamanda

⁷ Tanda mana libadurawa mikudiru atun puncha chararka; chiurallata paskua ubija wañuchispa mikungapa. ⁸ Nigpi Jesuska, Pedro i Juanta kacharka, kasa nispapa:

—Allichigriichi, paskua punchapa mikui nukanchi mikungapa.

⁹ Chiura tapurkakuna:

—¿Maipitak munangi, nukanchi allichingringapa?

¹⁰ Chiura, Jesuska ainirka:

—Kamkuna puiblupi chaiagriuraka, sug runa iaku wabkanawami tupanga. Paita katichingichi, sug wasi- ma iaikunkama. ¹¹ Chi wasiugta nigringichi: “Nukan- chita iachachig taitami kachamú, kamta tapungapa: ‘¿Maikan uku ladutak nukapa katiraiagkunawa paskua mikungapa kani?’.” ¹² Chiura chi runaka, awapi sug atun uku tukui ima ministiskakunawa tim allichiskata- mi kawachingapa ka. Nukanchi mikungapa, chipi all- ichingichi.

¹³ Chi kachai tukuskakuna chaiagriuraka, tukui imasa Jesús niskasina allilla tukugsamurka. Chipimi allichir- kakuna, paskua mikungapa.

¹⁴ Ña mikui kallaringapa chauraka, Jesús, pai agllas- ka runakunawanta tiarigrirka. Tukui mikuspa tianaku- ura, ¹⁵ Jesuska nirkakunata:

—Iapami munakurkani, kamkunawa kai paskua mikungapa, nuka manara wañuchii tukugpi. ¹⁶ Kasami niikichita: kai mikui mana mas mikungapa kanichu, imaura Diospa suma mandai puncha chaiankama.

¹⁷ Chasa nispaka, sug binu kupata makipi charirispapa, “Pai Siñur” Taita Diusta nispa, paikunata nirka:

—Chaririichi. Rasiunarispapa, upiaichi. ¹⁸ Kasami niiki- chita: kunaauramanda, ubas iaku mana mas upiangapa kanichu, imaura Diospa suma mandai puncha chaian- kama.

¹⁹ Nispaka, tandata makipi charirispapa, “Pai Siñur” Tai- ta Diusta nirka. Tandata pitichispa, paikunata kuaspa, kasami nirka:

—Kai, nukapa kuirpumi ka, kamkunamanda karaska kangapa. Nukamanda iuiarispapa, chasallata tandata pitichispa rurangichi.

²⁰ Ña mikuskauramandaka, sug binu kupata chasalla- ta charirispapa, kasami nirka:

—Kai binu kupa, nukapa iawarmi ka, Taita Dioswa i runakunawa ikuti pasinsiachirispapa sumaglla tukungapa. Kamkunamandami chi iawar llugsispa icharingapa ka.

²¹ —Uiamuichi. Sug nukawa sugllapi kai misapi tia- kugmi apichiwangapa ka. ²² Imasami ñugpamandata willaraiá: chasallatami kai Runa Tukuskata pasariwan- gapa ka. Chasa kagpipas, ¡ai, chi runa apichiwag!

²³ Chiura Jesuspa agllaska runakuna, kikinpura tapu- rinakurka:

—¿Maikansik nukanchipura Jesusta apichingapa ka?

Maikan mas atun taita kagta, Jesús iachachiskamanda

²⁴ Nispaka, kikinpura sinchi rimarinakurka, kasa iuia- rispa: “Nukanchimandaka, ¿pisik mas atun taitasina tukuska niraiianchi?”. ²⁵ Jesuska nirkakunata:

—Kai alpapi atun mandagkuna, mandanakuskapi kausagkunata ñi ima mana llakisipallami mandan- kuna. Chi mandagkunapas sutichirinkunami: “Allilla ruragkuna”. ²⁶ Kam kikinpuraka, chasa rurag runaka mana kangichi. Kamkunamanda mas atuniaska kag, mas uchullasina tukuchu. Chasallata, kamkunata mas atun taita kag, sugkunapa lutrinsina tukuchu. ²⁷ ¿Mai- kantak mas atun taita ka: mikungapa tiakug u paita mikui ialichig? Mikungapa tiakugmi ka. Chasa kagpi- pas, nukami kamkunata mikui ialichigsina kani.

²⁸ —Kamkuna, nukawami karkangichi, nuka ima llakiikuna iukagpipas. ²⁹ Chimandami kamkunata tia- rispa mandangapa kuaikichita; imasami nukapa Taita mandangapa kuawarka: chasa. ³⁰ Nispaka, maipi nuka mandakuskapi, kamkunapas nukawami mikunkangi- chi i upiankangichi. Mandadirukunapimi tiarinkangi- chi; chasaka, ñugpamanda achala taita Israelpa chun- ga iska wambrakunapa wambrakunata kawaspa, justi- siangapa.

Jesusta mana rigsinihu, Pedro ningapa kaskamanda

³¹ Kasapasmi nirka:

—Simón, Simón, uiamui. Iaia kukuka maskakumi, tri- galta chabsichigsina, kamkunata wagllichingapa.

³² Nukaka, kammanda Taita Diusta mañarkanimi, kam mana nukamanda suma iuiaita sakingapa. Kam, Taita Dioswa ikuti tigraspapa, kai waugkindikunata allilla iuiachispa kangichi.

³³ Chiura, Simón ainirka:

—Taita waugki, kamta karsilpi wichkaspa, wañuchin- gapa apagpikunapas, nuka kamwami rintrani.

³⁴ Chasa niura, Jesuska Pedrotapa nirka:

—Kasami niiki: kai tuta, gallu manara kantagpimi kamka kimsa biaji nukamanda ningapa kangichi: “Paita mana rigsinihu”.

Jesusta imasa pasaringapa ña chaimuskamanda

³⁵ Chasa nispaka, paikunata tapurka:

—Nuka kamkunata kacharkaikichita mana jigrawa, ñi kulki wakachiduruwa ñi ima chakipi churariduruwa; chiura, ¿imatak pisi karkangichi?

Paikuna ainirkakuna:

—Ñi imapas manima.

³⁶ Chiura, Jesuska nirka:

—Kunauraka, maikanpas jigra u kulki wakachiduru iukag, apaichi. Maikan mana ispada iukagpika, kikinpa katangata katuspa, sug ispada randichu. ³⁷ Kasami nii- kichita: ñugpamanda librupi imasa niraiaskasinami nukata pasariwangapa ka. Chipika, kasami willaraiá: “Paipas, jiru ruragkunawa sugllapimi kawarirka”. Tukui imasa nukamanda willaraiaskasinami tukugsamunga- pa ka.

³⁸ Chiura nirkakuna:

—Taita waugki, iska! ispadakuna kaipimi tia.

Chiura, Jesuska ainirka:

—Chilla.

Jetsemaní wirtapi, Jesús Taita Diusta mañaskamanda

³⁹ Chasa nispaka, Olivos lumama rirka; imasami tukui tutakuna ridur karka: chasa. Paita katiraiagkunapas katichirkakuna. ⁴⁰ Ña chima chaiagrispa, Jesuska nirkakunata:

—Taita Diusta mañanakuichi, tukui mana allilla rurakuna kamkunata mana chaiachu.

⁴¹ Chasa nispaka, paikunapagmanda sug rumi sitaska urmagriskasina karuajma rispa, chipi kungurispaka, Taita Diusta mañai kallarirka, kasa nispa:

⁴² —Taitiku, kam munaspaka, kai iapa llakiita † anchuchiwai. Nuka chasa munakugpipas, nuka imasa munaskasina mana tukuchu. Kam imasa munaskasina rurai.

⁴³ [Chiura suma luarmanda sug anjil, kawarig-samuspa, mas animuchirka. ⁴⁴ Iapa llakikuspa, Jesuska paipa Taita Diusta masmi mañakurka. Alpama sutuchigtami iawarsina jumbikurka.]

⁴⁵ Taita Diusta mañai puchukaspaka, atarispaka, katiraiagkunapagma kutirka. Llakiwa puñunakuskata tarigrispa, ⁴⁶ nirka:

—¿Imapatak puñurirkangichi? Atarispaka, Taita Diusta mañanakuichi, tukui mana allilla rurakuna kamkunata mana chaiachu.

Jesusta apiskakunamanda

⁴⁷ Jesús chasa rimakugllapi, achka runakuna chima chaiagrirkakuna. Chi runakunata, chungu iska! Jesús agllaskakunamanda Judas suti runami ñugparaiarka. Jesusta muchangapa iuiiwa paipagma kaillaiarka.

⁴⁸ Jesuska, Judasta nirka:

—¿Kai Runa Tukuskata muchaspallachu apichiwankangi?

⁴⁹ Ima pasaringapa kaskata kawaspaka, Jesuswa kagkuna paita tapurkakuna:

—Taita waugki, ¿ispadakunawachu micharisunchi?—

⁵⁰ Chasa tapuspa, sug Jesuswa kagpuraka, ispada surkuspa, iaia sasirdutipa lutrinta piaspa, alli ladu rinrita ialigta kuchurka.

⁵¹ Jesuska nirka:

—Chilla. Ianga kawaichi—. Chasa nispaka, chi runapa rinrita tuparispa, aliachirka.

⁵² Iaia sasirdutikuna, Diospa atun wasita kawagkuna i sug taitakunapas riska karkakuna, Jesusta apichingapa. Chi runakunataka, Jesús tapurka:

—¿Imapatak nukata, sisaitasina ispada i garuti kaspi-kunawa apiwangapa samunakungichi? ⁵³ Tukui punchakunami Diospa atun wasi ukupi nuka kamkunawa karkani. Chipika, ¿imapatak mana makiwa apiwarkangichi? Nigpika, kunaaurami kamkuna iana tutapi mandag iaia kukuwa kangichi.

† “Kai winja kupata”, iapa llakiitami niraiá.

Jesusta mana rigsinichu, Pedro niskamanda

⁵⁴ Jesusta apispaka, chi runakuna iaia sasirdutipa wasima chaiachigrirkakuna. Pedroka, karu karullapi katichikurka. ⁵⁵ Chi wasi kancha chaugpipi nina sindichispa, muiugta tiarirkakuna. Pedropas, paikunawa tiarirka. ⁵⁶ Chiura sug kawag warmika, Pedro chasa tiakuskata nina sindi punchaiachiskawa kawaspa, ikuti allilla kawaspa, nirka:

—Kai runapas, chi Jesuswami karka.

⁵⁷ Pedroka, chasa uiaspa, nirka:

—Pani, mana paita rigsinichu.

⁵⁸ Sug manancha unailapika, sug runapas, paita kawaspa, nirka:

—Kampasmi chi runapura kangi.

Pedroka, ikuti chasa uiaspaka, ainirka:

—Waugki, nuka manima paiwa kanichu.

⁵⁹ Ikuti sug urasina kauraka, sug runapas mas sinchi rimaiwa nirka:

—Kai runapas, sutipami chi Jesuswa karka. Galilea alpamandami ka.

⁶⁰ Chiura, Pedroka nirka:

—Waugki, manima iachanichu, kam imamanda chasa rimawakugta.

Pedro chara rimakugllapi, gallu kantarka. ⁶¹ Chiura Iaia Jesuska, tigrarispa, Pedrota kawarka. Chiura iuarigsamurka, imasa Jesús kikin Pedrota nigta: “Kai tuta, gallu manara kantagpimi kamka kimsa biaji nukamanda ningapa kangi: ‘Paita mana rigsinichu.’”

⁶² Chasa iuarigsamuspa, kanchama llugsispa, dil-lakii wakai kallarirka.

Judú taitapura sugllapi tandariska kaskapi, Jesús kaskamanda

⁶³ Jesusta kawag runakunaka, paita unžaspa, piaspa charinakurka. ⁶⁴ Paipa ñawita kilpaspa, piaspaka, ninakurka:

—Willamui: ¿pitak kamta piarka?— ⁶⁵ Paikuna imasa munaskasina Jesusta kaminakurka.

⁶⁶ Pakariska kauraka, iaia sasirdutikuna, Moisés ima niskata iachachig taitakuna i sug taitakunapas tandarirkakuna. Paikuna tandariska kaskamami Jesusta chaiachigrirkakuna. Chipi chaiachigriruraka, paita nirkakuna:

⁶⁷ —Kam, Taita Dios agllaska Cristo kaspaka, nukanchita willai.

Chiura, Jesuska ainirka:

—Nuka “Ari” nigpika, kamkuna mana uiawankangichichu. ⁶⁸ Nuka ima tapugpipas, mana ainiwankangichichu. ⁶⁹ Chasa kagpipas, kunaauramandata kai Runa Tukuska, tukui manduiug Taita Diospa alli ladumi tiarigringapa ka.

⁷⁰ Chiura, tukuikuna tapurkakuna:

—Nigpika kam, ¿Taita Diospa wambrachu kangi?

Chiura, Jesuska ainirka:

—Sutipami kamkuna chasa nukamanda nirkangichi.

⁷¹ Chasa ainiura, nirkakuna:

—Chiwanka, ¿imapatak chara paimanda willagkunata ministisunchi? Nukanchi kikinmi uiarkanchi, pai kikin Taita Diussina tukuspa willarigta.

Mandag Pilatos kaskapi, Jesús kagriskamanda

23 Nispaka tukui chipi kagkuna, atarispá, Pilatos suti mandagpagma Jesusta chaiachigrirkakuna.

² Chipika, Jesusmanda willai kallarirkakuna:

—Kai runa, nukanchi Israelmandakunata sug rigcha sug rigcha iuiachispa purikuskatami uiarkanchi. Nikurkami: “Romamanda iaia mandagta mana impuistu kulki kuangichi”. Kasapasmi nikurka: “Cristo, atun mandagmi kani”.

³ Chasa uiaspa Pilatoska, Jesusta tapuchirka:

—Kam, ¿judiukunapa atun mandagchu kangi?

Chiura, Jesús ainirka:

—Sutipami kam chasa nirkangi.

⁴ Chiura Pilatoska, iaia sasirdutikunata i tukui chipi kagkunata nirka:

—Kai runata mana tarinichu ñi ima pandariska kagta.

⁵ Chipi kagkunaka, mas sinchi rimaiwa nirkakuna:

—Tukui Judea alpapi, Galileamandata kai puiblukama, runakunata iachachispa, sug rigcha sug rigcha iuiachispami purikurka.

⁶ Chasa uiaspaka, Pilatoska tapurka:

—Kai runa, ¿Galileamandachu ka?— ⁷ “Ari” ainiura, Herodes Galileapi mandag Jerusalemipi kagmanda iachaspaka, Jesusta paipagma kacharka.

Mandag Herodes kaskapi, Jesús kagriskamanda

⁸ Jesusta kawaspaka, Herodeska iapa kuntintarirka. Ña unaimandata paimanda uiaspa, munakurka, ñi imaurapas mana kawaskasina ruragta kawapungapa.

⁹ Nispaka, Jesusta imakunapas achkami tapuchikurka. Nigpika Jesuska, ñi ima mana ainirka.

¹⁰ Iaia sasirdutikuna i Moisés ima niskata iachachig taitakunapas, chipi kaspá, Jesusmanda iapa sug rigcha sug rigcha willanakurka.

¹¹ Jesús mana ainigmánda, Herodeska, suldadukunawa paíta asispa, sutipa mandagsina kawaringapa, iapa suma katanga katachirkakuna. Nispaka, Pilatospagma paíta ikuti kacharka. ¹² Chi punchamanda, Pilatoswa Herodeswa ikuti allilla tukurkakuna. Ñugpata paipura piñachiriskami karkakuna.

Jesusta wañuchigriichi, Pilatos niskamanda

¹³ Pilatoska, iaia sasirdutikunata, judíu taitakunata i tukui chipi kagkunatapas tandachispa, ¹⁴ nirka:

—Kai runata pusamuspaka, niwarkangichimi: “Kaika, tukui kunatami sug rigcha sug rigcha iuiachispa purikurka”. Nukaka, kamkunapa ñawipi paíta ña tapuchispa, imasa paimanda willawaskasina ñi ima pandariipas mana taripunichu. ¹⁵ Herodespas, mana imapas tarirkachu. Nispami nukanchipagma ikuti kachamurka. Nigpika, ñi imapas mana pandariska kag-

manda, ¿imamandatak wañuchingapa cháiá? ¹⁶ Asutichispaka, kacharingapami kani.

[¹⁷ Wata watapi atun puncha chaiaura, Pilatos iacharka, sug karsilpi kaskata kacharinga.] ¹⁸ Pilatos Jesusta kacharingapa niuraka, tukui chipi kagkuna sugllasina kaparii kallarirkakuna, nispa:

—Jesusta manima. Barrabastaka kacharii.

¹⁹ Chi Barrabás, chi puiblupi mandagkunapa kuntra atarichispa, wañuchidur kagmandami karsilpi wichkaraiarka. ²⁰ Pilatoska, Jesusta kacharingapa munakuspa, ikuti rimarkakunata. ²¹ Paikunaka kaparirkakuna, nispa:

—Kruspi churai. Kruspi churaspa wañuchii.

²² Pilatoska, ña kimsama ikuti nirka:

—¿Imapitak kawarí, mana allilla ruraska kagta? Ñi ima pandariipas mana tarinichu. ¿Imamandatak paíta wañuchingapa cháiá? Asutichispaka, kacharingapami kani.

²³ Chiura, mas sinchi kaparispá, tukui kuna mañarkakuna, Jesusta kruspi churai tukungapa. Chasa kaparinakuskamanda, paikuna imasa munanakuskasina tukurka. ²⁴ Pilatospas iuiarigsamurka, paikuna mañanakuskata: “Ari” ningapa. ²⁵ Chi mandagkunawa kuntra atarichispa wañuchidurta karsilpi wichkaraiaskata kacharirka, imasa mañanakuskasina. Jesustakar kacharka, imasa paikuna munanakuskasina wañuchii tukungapa.

Jesusta kruspi klabagriskakunamanda

²⁶ Ña Jesusta llugsichinakuskapika, Sirene puiblumanda Simón suti runata apirkakuna. Chi runa, chagramandami chaimukurka. Paitaka Jesús markaspa apakuska krusta markachirkakuna; chasaka, Jesusta katichingapa.

²⁷ Achka runakuna, Jesusta katichinakurka. Achka warmikunapas, katichinakuspa, paimanda llakiiwa kaparispá wakanakurka. ²⁸ Jesuska, chi warmikunapagma tigrarispa, nirka:

—Kam Jerusalemamanda warmikuna, nukamanda mana wakanakuichi. Kam kikinkunamanda i kamkunapa wambrakunamandakar wakangichi. ²⁹ Sug punchakuna chaimuuraka, ningakunami: “Mana wambra iukagkuna, imaurapas mana wigsawa ungu-rigkuna i mana chuchuchigkuna, kuntintulla alli iuiawami kankuna”. ³⁰ Chiura, lumakunata ningakunami: “Nukanchipagma urmagsamuichi”. “Awa lumakuna, nukanchita kilpagsamuichi”. ³¹ Chawa kaspita kasa ruragpikunaka, chakiska kaskataka, ¿imasasik rurangakuna? †

³² Iskai mana allilla ruragkunatapasmi apanakurka, Jesuswa sugllapi wañuchingapa. ³³ Uma Tullu suti pambama chaigrispaka, Jesusta kruspi klabarkakuna. Chi iskandi mana allilla ruragkunatapas kruspi klabaspa saiachirkakuna: sugtaka Jesuspa alli ladu, sugtaka paipa lluki ladu. [³⁴ Jesuska nirka:

† Cristo ñi imapi mana pandariskata chasa ruragpikuna, ¿imasasik Jerusalemamanda pandarigkunata rurangakuna?

—Taitiku, paikunata pasinsiai. Mana iachankunachu ima ruranakugta.]

Jesupa katangakunataka, suldadukuna suirtipi pugllarkakuna, iachangapa: imasami chaiá, paipura sug sug apangapa.

³⁵ Tukui chipi kagkuna kawanakurka. Judíu taitakunaka, Jesusta iapa unžaspa, ninakurka:

—Kam, sugkunata kispichigsamurkangisi. Kunaura, kam kikin kispichirii, Taita Dios agllaska Cristo kaspaka.

³⁶ Suldadukunapas, unžaspa, paipagma kailliaspa, winja binu chupachispa, ³⁷ ninakurka:

—Judiukunapa atun mandag kaspaka, kam kikinlla kispichirii.

³⁸ Kruspi, Jesupa uma awa ladu, sug willaraiaskami churarkakuna. Chipi, kasami niraiarka: “Kaimi ka judiukunapa atun mandag”.

³⁹ Chi iskandi mana allilla ruragpuramanda klaba-raiaskapas, sugka, Jesusta kamsipa, nikurka:

—Kam, ¿manachu Cristo kangí? Chasa kaspaka, ¿imapatak mana kispichiringi, kam kikin i nukanchitapas?

⁴⁰ Ikuti sugka, kamikuskata piñarka, kasa nispá:

—Kam, ¿imapatak mana Taita Diusta manchangi, kai runa pasakuskasinallata pasakuspapas? ⁴¹ Nukan-chitakar sutipami chaiakurka, kasa pasangapa, pandariskakunamanda. Ikuti kai runaka, ñi imapi mana pandariska kanchu.

⁴² Nispaka, Jesusta nirka:

—Kam atun mandag tukuspaka, nukamanda iuiari-wangi.

⁴³ Chasa niura, Jesuska ainirka:

—Kasami nuka niiki: kunaauramandatami nukawa kagringapa kangí, paraíso suti suma luarpi.

Jesús wañuskamanda

⁴⁴ Ña chaugpunchasina tukuuramanda chaugpi chisikama, tukui alpa lim tutaiagsamurka. ⁴⁵ Indipas, lim amsaiarka. Diospa atun wasi ukupipas atun linsu arkaraiaska, chaugpi chaugpimi llikirigsamurka. ⁴⁶ Chiura Jesuska, sinchi kaparirka, kasa nispá:

—Taitiku, nukapa ispiritutami kamta mingaiki—. Chasa nispaka, wañurka.

⁴⁷ Imasa pasariskata kawaspaka, kapitanka, Taita Diusta iapa suma atun kagta nispá, nirka:

—Kai runa, sutipami ñi imapi mana pandarig karka.

⁴⁸ Chima kawangapa riskakunaka, tukui ima pasariskata kawaspaka, llakiiwa pichupi makiwa piarisa, paikunapagma kutirkakuna. ⁴⁹ Jesusta tukui rigsikuna i Galilea alpanigmanda paita katiraiaska warmikunaka, karumandalla tukui ima pasarikuskata kawanakurka.

Jesús pambai tukuskamanda

⁵⁰ Judíu taitapuramanda tiarka sug runa José suti, suma rurag i allilla iuiawi kag. ⁵¹ Chi Jesupa kuntra iuiarisa ruraska taitakunawa, paika chasa mana munaska karka. Judea alpa i Arimatea suti puiblumanda

karka. Diospa suma mandai chaimungapa punchata suiakurka. ⁵² Paika, Pilatospaggi iaikugrispa, Jesupa kuirputa mañarka. ⁵³ “Ari” niuraka, Jesusta krusmanda uraikuchigrispa, suma linsuwa maituspa, murtajarka. Sug rumi piñapi atun utkuchiskapi, ñi pita manara pambaska kaskapimi utkalla churagrirkakuna. ⁵⁴ Ña warda puncha chaiakugmanda, chi chisika chaiarka, tukui sumaglla allichirinakungapa.

⁵⁵ Galileamanda Jesusta katig warmikunaka, Joseta katichispa, kawarkakuna, maipi i imasa kuirputa churaspa sakigtakuna. ⁵⁶ Chimanda kutispaka, suma asnari ugsakuna i chasallata suma asna iaku allichirkakuna. Kaiandika, warda puncha kagmanda, imasa niraiaskasina samarirkakuna.

Jesús kaugsariskamanda

24 Simana kallarii puncha u duminguka iapa tuta-ta, chi warmikunaka, chi suma asnari allichiskata apaspa, Jesús pambaraiaskama rirkakuna.

² Chaiagriskapa, chi atun utkuchiska pungupi kilparaiaska rumita tim anchuchiska kaskata tarigrirkakuna. ³ Iaikuspaka, Iaia Jesupa kuirputa manima tarirkakuna. ⁴ Mana tiagmanda ujnarispa kawanakuuraka, iskai runa, iapa iura puncha katanga churariskakunami kawarigsamurkakunata. ⁵ Chi warmikuna, iapa mancharispa, ñallapas alpakama kumurispá kawanakurka. Chiura, chi runakunaka nirkakunata:

—¿Imapatak kaugsariskata maskanakungichi wañuskakuna pambadirupi? ⁶ Kaipi mana kanchu. Kaugsarirkami. Iuiariichi ima kamkunata rimaskata, Galilea alpapi kaura. ⁷ Kasami nirka: “Kai Runa Tukuskataka mana allilla ruragkuna apispa, kruspi churaspami wañuchiwangapa kankuna. Kimsa punchapika ikutimi kaugsaringapa kani”.

⁸ Chiura chi warmikunaka, Jesús chasa niskata iuiarirkakuna. ⁹ Chi pambadirumanda kutispaka, chungá sug Jesús agllaskakunata i tukui paita katiraiagkunatapas tukui imasa kawaskasina willagrirkakuna. ¹⁰ Jesús agllaskakunata chasa willagkuna karkakunami María Magdalena, Juana, Santiagopa mamandi María i sug warmikunapas. ¹¹ Paikuna chasa willanakugpipas, chi runakunataka uiarirka mana iuiailapi rimanakugsina. Chimanda mana munarkakuna, chasa kagta uangapa. ¹² Pedroka, atarispá, chi pambaraiaskama kalparka, kawangapa. Chaiagriskapa, kumurispá kawarka. Chiura, linsukunalla chipi tiarka. Chasa kawaspaka, ima pasarikugta iapa ujnarispa kutirka.

Emaús puibluma ñambipi, Jesús kawariskamanda

¹³ Chi punchallatata, iskai Jesusta katiraiagkuna Emaús suti puibluma ñambipi rinakurka. (Chimanda Jerusalem chungá sug kilumitrusinami tia.) ¹⁴ Rinakuskapika, tukui ima pasariskamanda rimanakurka.

¹⁵ Paikuna rimaspa rinakuskapi, Jesús kikin, kailliaspa, paikunawa sugllapi rii kallarirka. ¹⁶ Chasa sugllapi rinakuspapas, paikuna mana rigsingapa pudirkakuna.

¹⁷ Jesuska tapurkakunata:

—¿Imamandatak rimaspa rinakungichi?

Chiura, llakiiwa irkiaspa, saiarirkakuna. ¹⁸ Sugllapi rigpura, Kleofas sutika, ainirka:

—¿Imawantak kam mana iachangi, kai punchakuna Jerusalemipi ima pasarigta? Kamllachar, mainigmanda samuska kaspera, ñi ima mana iachangi.

¹⁹ —¿Imatak pasarirka?— Jesús tapurka.

Chiura ainirkakuna:

—Nazaret puiblumanda Jesús ima pasagta. Pai runa, Santu Ispirituwa rimag kaspera, Taita Diospa i runakunapa ñawipi mana imaurapas kawaskasina ruraspa, tukuipi allilla iachachispami karka. ²⁰ Paitaka, iaia sasir-dutikuna i nukanchipa taitakuna apichirkakuna, kruspi churaspa wañuchingapa. ²¹ Nukanchikar iuianakurkanchimi: “Paimi Israelmanda runakunata kispichinga”.

—Kasapas. Kunaura, kimsa punchami ña chasa pasariska ka. ²² Nukanchipura sug warmikuna, nukanchita ujnachirkakunami. Paikuna, kai tutata pambaraiaskama rispa, ²³ kuirputa manimasi tarigrirkakuna. Chi- manda kutimuspa, ninakurkami: “Anjilkuna, muskui ukupisina kawarirka, nirkakunasi: ‘Paika, kaugsami ka.’” ²⁴ Chiura nukanchiwa sug kagkunapas, pambara- iaskama rispa, imasa warmikuna niskasina tarigrir- kakuna. Jesuska, manimasi kawarirka.

²⁵ Chiura, Jesuska nirka:

—Ai, kam runakuna, ¿manarachar iui iukangichi? Santu Ispirituwa rimagkuna tukui ima ñugpata willa- raiaskata, ¿imawantak kamkuna, iapa allimanda iui- ringichi? ²⁶ ¿Manachu Cristota chaiarka, chasa pasan- gapa; chiwanka pai suma atuniachiska, Taita Dios kas- kapi iaiugringapa?

²⁷ Chasa nispaka, Moisés i Santu Ispirituwa tukui rimagkuna imasa willaraiaskamanda iuiachingapa kallarrirka; chasaka, tukui ima ñugpamanda librupi pai- manda willaraiaskata ima niraiagta paikuna iachanga- pa.

²⁸ Paikuna rinakuska puibluma ña chaianakugri- uraka, Jesús mas karuma ialikugsina rii kallarrirka.

²⁹ Chiura nirkakuna:

—Mana rikui. Nukanchiwa samarii. Ñami chisi ka. Kamta tutaingapami ka.

³⁰ Chasa niura, Jesuska paikunapagpi iaikurka, sama- ringapa. Nispa, ña paikunawa mikungapa tiakuspaka, tanda charirirka, “Pai Siñur” Taita Diusta nirka. Tanda- ta pitichispa, paikunata kararka. ³¹ Chasa ruraurami ñawi paskarigsina tukurkakunata. Chasaka, Jestusa rigsirkakuna. Chiuralla, paikunapa ñawipi mana mas kawarirka.

³² Chiura, paipura ninakurka:

—Ñambi samunakuskapika nukanchiwa rimana- kuspa, ñugpamanda librupi willaraiaska imasa ni- raiagta willakuura, ¿manachu nukanchita iapa alli iuia- chirigsamurka?

³³ Chasa ningallawaka, atarirka, Jerusalemma kutirka- kuna. Jesús kikin chungu sug agllaskakunapagma chaiagrirkakuna. Chipika, sugkunapas sugllapi kaska- tami tarigrirkakuna. ³⁴ Chipi kagkunaka, paikunata nir- kakuna:

—Iaia Jesús, sutipami kaugsariska ka. Simontami kawarirka.

³⁵ Chiura, paikunapas willarkakuna imasa ñambi ri- nakuskapi pasarigta. Imasa Jesús tandata pitichiura rigsigtakunapas willarkakuna.

Jesús, kaugsarispa, paita katiraiagkunata kawarirka- manda

³⁶ Chasa rimanakugllapi, Jesuska, paikunapa chaug- pipi saiarigsamuspa, “¿Allillachu kapuangichi?” nirka- kunata.

³⁷ Chiura, iapa mancharispa, ujnarispa iuiana- kurka: “Sug wairatachar kawanakunchi”. ³⁸ Chiura, Je- suska nirka:

—¿Imapatak mancharingichi? ¿Imapatak kamkunapa sungupi chasa iuianakungichi? ³⁹ Nukapa maki i chaki- kunata kawaichi. Nuka kikinllatatami kani. Llamka- waspa, kawawaichi. Waira, aicha ñi tullu mana iukan- kunachu. Ikuti nukaka, imasa kamkuna kawawanakug- sinami aicha i tullu iukani—. ⁴⁰ Chasa nispaka, maki i chakita kawachirkakunata.

⁴¹ Chasa kawaspa paikuna, iapa ujnarispa, dikuntintu manara pai kikin kaskata iuiarinakugmandaka, tapur- kakunata:

—¿Imatak mikungapa tiapungichita?

⁴² Chiura, sug piti chalwa kusaska kararkakuna.

⁴³ Chita chaskispaka, paikuna kawanakugllapi mikurka.

⁴⁴ Mikuspaka, nirkakunata:

—Nuka, ñugpa kamkunawa kaspera, kasami nirkaiki- chita: Moisés imasa rurangapa niskasina, Santu Ispiri- tuwa rimaraiaskasina i Salmos librupi tukui imasa nukamanda willaraiaskasinami iukarka pasaringa.

⁴⁵ Chasa nispaka, paikunapa umapi iuiaikunata punchaiachigsina iuiachirka; chasaka, ñugpamanda li- brupi willaraiaska ima niraiaskata iachangapa.

⁴⁶ Kasapasmi nirkakunata:

—Kasami chi librupi willaraiá: Taita Dios agllaska Cristo, iapa nanai i llakii iukaspami wañungapa ka. Nis- paka, kimsa punchapi ikutimi kaugsaringapa willaraiá.

⁴⁷ Paimanda, Jerusalemipi kallarispa, tukui alpapunapi willagringapami niraiá. Maikan pandariikunata sakispa Taita Dioswa tukugsamuskakunataka, pandariikuna pasinsiai tukungapami willaraiá.

⁴⁸ —Kamkunaka, tukui ima pasariskata kawaspa, nukamanda willagkunami kankangichi. ⁴⁹ Nigpika, nukapa Taita kamkunata karamungapa niskatami nu- ka kachamusakichita. Chimanda, kai puiblullapi suian- gichi, imaura suma luarmanda paipa iapa iachaita chaskinkama.

Suma luarma, Jesús sikaskamanda

⁵⁰ Chasa nispaka, Betania puibluma ña chaiankama paikunata pusarka. Chipi chaiagriskapa, makikunata atarichispa, Taita Diusta paikunamanda mañapurka- kunata. ⁵¹ Chasa mañakuspalla, paikuna kawanakug- llapi, suma luarmani sikai kallarrirka.

⁵² Paikunaka, Jesusta kungurirkakuna. Nispaka, suma —Kam Taitiku, iapa suma atunmi kangi.
alli iuiachiiwa Jerusalenma kutirkakuna. ⁵³ Chipika,
Diuspa atun wasipi imaurapas nidur karkakuna:

SAN JUAN

Diuspa Rimai, Jesús suti runa tukuskamanda

1 Kallariura, ñi imapas manima tiaura, timpumi Diuspa Rimai tiarka. Paimi Taita Diuspi tiarka. Diusllatatami karka.

² Kallariura, mana imapas tiaskauramandata, Taita Diuspimi tiarka.

³ Paiwami tukui ima ruraska tia. Mana pai kagpika, ñi imapas mana ruraskami kantra.

⁴ Pai kikinpami kausai tiarka. Chi kausaimi runakunapa iuiaikunata punchaiachig-samú.

⁵ Chi punchaiachig runa samurkami, maipi iana tuta iuiaiwa kaskakunata punchaiachingapa. Chi punchaiachii iuiaitaka, tutaichig mana puchukangapa pudirka. Punchallami kidá.

⁶ Tiarka sug runa, Juan suti, Taita Dius paita kachamuska. ⁷ Pai samurkami, runakunapa iuiaikunata punchaiachigmanda willag kangapa; chasaka, tukui-kuna pai ima willaskata suma iuiaringapa. ⁸ Juan, mana chi punchaiachig karkachu. Chi punchaiachig-manda willangapami samurka. ⁹ Chi punchaiachig runaka, sutipa punchaiachigmi ka. Paimi tukui runakunapa iuiaikunata punchaiachigsamú. Paillatatami kai alpama samurka.

¹⁰ Paiwa kai alpa wiñachiska kagpipas, ña kai alpama samuska kaura, kai alpamanda runakuna mana paita rigsirkakunachu. ¹¹ Pai kikinpa alpamanda runakunapagma samurka. Chiura, pai kikinpa runakuna mana munarkakuna, paita chaskingapa. ¹² Maikankuna paita suma iuiarisa chaskigkunatakar nirkakunata, Diuspa wambrakuna tukungapa. ¹³ Chi suma iuiagkuna, runapa iawarmanda, ñi kasadupuramanda ñi kari munaskamanda mana tiagsamunkunachu. Taita Diusmandallami tiagsamunkuna, paipa wambrakuna kangapa.

¹⁴ Diuspa Rimai, runa tukuspa, nukanchiwami kausagsamurka. Taita Diuspa suglla wambra kagmanda, pai iapa suma atun kagtami kawarkanchi. Iapa suma kuiag pagtami karka, ñi imapi mana llullaspalla.

¹⁵ Paimanda, Juanka sinchi rimaiwami willarka, kasa nisa: —Kai runamandami nirkaikichita: “Sug nukamanda mas iachaka, nukapa katimi samungapa ka. Paimi nukamanda mas ñugpa kallarkauramandata tiaska

ka”. ¹⁶ Pai tukui iapa allilla iukaspaka, iapa suma kuiaiwami tukui nukanchita imaurapas karamú. ¹⁷ Moisesmandami imasa Taita Dius rurangapa niskata iachanchi. Ikuti Jesucristomandaka tukui suma kuiaita i suti-pa kaskatami chaskinchi.

¹⁸ Ñi pitapas mana imaurapas Taita Dius kawariskakanchu. Paipa suglla wambra Diusllatatami, Taita Diuspi kaspapa, paita nukanchita kawachigsamurka.

Jesusmanda, Juan Bautista musuglla willaskamanda

¹⁹ Jerusalemmanda judíu taitakuna, sasirdutikunata i Diuspa atun wasipi aidagkunata Juanpagma kacharkakuna, tapungapa:

—Kam, ¿pitak kangí?

²⁰ Chiura paika, imasa kaskasina willarka, kasa nisa: —Nuka, mana Taita Dius agllaska Cristo kanichu.

²¹ —Nigpika— tapurkakuna—, ¿imatak kangí? ¿Eliaschu kangí?

Chiura, paika ainirka:

—Manima.

—Mana kagpika, ¿Santu Ispirituwa rimag samungapa niraiaskachu kangí?

—Manima.

²² Chiura tapurkakuna:

—¿Pitak kangí; chasaka, nukanchi kachamuskunata willagringapa? Kam kikinmanda, ¿imatak niringí?

²³ Chasa tapuura, Juanka ainirka:

—Nuka kanimi chusa sitaska alpapi sug sinchi rimai-wa kaparig, kasa nisa: “Imasami ñambi allichinchi: chasallata alli iuiaikunata apiichi, atun Taita Diusta chaskingapa”. Chasami Isaías suti Santu Ispirituwa ñugpamandata nukamanda willaska karka.

²⁴ Chi Juanpagma kachaska runakuna, fariseokunami karkakuna. ²⁵ Nispaka, paita tapurkakuna:

—Nigpi kamka, Cristo, ñi Elías ñi chi Santu Ispirituwa rimag mana kaspaka, ¿imapatak baugtiskungí?

²⁶ Chasa tapuura, Juanka ainirka:

—Nuka, iakullawami baugtisani. Sugmi kamkunapa chaugpipi ka. Kamkuna manara paita rigsingichichu.

²⁷ Paika, nukapa katimi samungapa ka. Paita, nuka mana pudinichu, kungurisa, paipa chakikunapi churaraiaaska wataskata paskapungapa.

²⁸ Jordán iaku sug ladu chimba, Betania suti puiblupi, Juan baugtiskuskapimi chasa pasarirka.

Jesusmanda, Juan Bautista paris willaskamanda

²⁹ Kaiandi, Jesús Juanpagma kaillaiakuskata kawaspa, nirka:

—Kawaichi. Kaimi ka Taita Diospa Ubijasina niraiaaska. Paika, kai alpapi kaugsagkunapa pandariikunatami anchuchí. ³⁰ Paimandami nuka nirkaikichita: “Sug nukamanda mas iachami nukapa kati samungapa ka. Paika, ñugpamandatami tiarka”. ³¹ Paita, nuka mana rigsirkanichu. Mana rigsispapas, nuka, samuspa, iakuwa baugtisananimi; chasaka, Israelmanda runakuna paita rigsingapa.

³² Juan, imasa kawaskasina willaspa, kasami nirka:

—Santu Ispíritu, palumasina rigcha awamanda uraikumuspa, paipagma chaiagsamuskatami kawarkani.

³³ Chikama, paita mana rigsirkanichu. Taita Dios iakuwa baugtisanangapa kachamuwagmi niwaska karka: “Kam kawankangimi, Santu Ispíritu uraikumuspa, sug runapagma chaiagsamugta. Chi runami Santu Ispirituwa baugtisag niraiá”.

³⁴ —Nukaka, chasa kawaspa, willaikichitami: “Paimi Taita Diospa wambra ka”.

Jesusta musuglla katii kallariskakunamanda

³⁵ Sug kaiandi Juanka, ikuti iskai paita katiraiagkunawa kaspá, ³⁶ Jesús ialikuskata kawaspa, nirka:

—Kawaichi. Kaimi ka Taita Diospa Ubijasina niraiaaska.

³⁷ Chasa niskata uiaspaka, chi iskandi runakuna Jesusta katii kallarirkakuna. ³⁸ Jesuska, tigrarispá, chi katinakugta kawaspa, tapurka:

—¿Imatak maskanakungichi?

Chiura ainirkakuna:

—Rabí, ¿maipitak kaugsangi?—. (Rabí niraiami: “Tachachig taita”.)

³⁹ Chiura, Jesuska nirka:

—Akushi; kawankangichimi.

Paikuna, rispaka, Jesús kaugsadiru wasita kawagrirkakuna. Ña chisi, mai las kuaru kagmandaka, Jesuswa chipi kidarirkakuna.

⁴⁰ Chi iskandi Juanta uiaspa Jesusta katigkuna, sug karkami Andrés suti Simón Pedropa waugki. ⁴¹ Paika, kikinpa waugki Simonta willagrirka, kasa nispá:

—Mesías runatami tarirkanchi—. (Mesías niraiami Taita Dios agllaska Cristo.)

⁴² Chasa nispaka, Simonta Jesuspagma pusarka. Chiura Jesuska, Simonta allilla kawaspa, nirka:

—Kam kangimi Simón, Jonaspa wambra. Kunauramanda, Sefas sutichisaki—. (Sefas niraiami Pedro.)

⁴³ Kaiandi Jesús, Galilea alpama ringapa munakuspaka, Felipe suti runata maskangapa rirka. Tarigrispaka, paita nirka:

—Katiwai.

⁴⁴ Felipe, Betsaida suti puiblumandami karka, Andrés i Pedropa puiblumandallatata. ⁴⁵ Chiuramanda Felipeka, Natanael suti runata maskangapa rirka. Tarigrispaka, paita nirka:

—Moisés ima rurangapa niskapi willaraiaskasina i Santu Ispirituwa ñugpata rimagkuna willaskasina, pai runawami kawanakurkanchi. Jesús suti Nazaret puiblumanda José suti runapa wambra ka.

⁴⁶ Natanaelka nirka:

—¿Imauratak uiaspa kanchi, Nazaret puiblumanda suma alli runa llugsigta?

Chiura, Felipeka nirka:

—Akushi; kawankangimi.

⁴⁷ Natanael kaillaiagrikura, Jesuska, kawaspa, paimanda nirka:

—Kaimi ka Israelmanda sug sutipa alli runa, ñi imapias mana llulla.

⁴⁸ Natanaelka tapurka:

—Nukata, ¿imasatak rigsiwangi?

Chiura, Jesús ainirka:

—Felipe manara kambagma chaiagrípita, kam igira sacha sikipi tiakuskatami kawakurkaiki.

⁴⁹ Chasa ainiura, Natanael nirka:

—Kam iachachig taita, Taita Diospa wambra kangi. Israelmanda runakunata iaia mandagmi kangi.

⁵⁰ Chiura, Jesuska ainirka:

—“Kam igira sacha sikipi tiakuskata kawaspa”, ¿chasa nigmandallachu chasa suma iuiariwangi? Kunauramanda mas suma mana imaurapas kawaskakunami kawangapa kangi—. ⁵¹ Kasapasmi nirka— Kasami nuka niikichita: suma luar paskariskatami kawangapa kangichi, Taita Diospa anjilkuna kai Runa Tukuspagma uraikumuspa sikanakuskata.

Kaná puiblupi kasarai budapi, Jesús kaskamanda

2 Kimsa punchapika, Galilea alpamanda Kaná suti puiblupi sug kasaraimi tiarka. Chi kasarai, Jesuspa mamapasmi kagrirka. ² Jesusta i paita katiraiagkunatapasmi kunbidarkakuna.

³ Chi kasarai, binu pisigsamurka. Chasa kagmandaka, Jesuspa mama, paita nirka:

—Binu, ña mana iukankunachu.

⁴ Paika ainirka:

—Mama, ¿imapatá chasa niwakungi? Nukapa punchamanara chaimunchu.

⁵ Paipa mamaka, chi kasarai aidagkunata nirka:

—Pai tukui imasa niskasina rurangichi.

⁶ Chi wasipi tiarka sugta atun rumi mangakuna; chikunapi, ñugpamanda judiukuna iachachiskasina maillaringapa. Sug sug mangapi, pichka chungu kanchis chungu litru pagtarka. ⁷ Nigpika Jesuska, aidagkunata nirka:

—Mangakunapi iaku jundachiichi.

Chiuralla, tukui mangakunapi jundachirkakuna.

⁸ Chiura, Jesuska nirkakunata:

—Kunaura wisipa, butijiruta tantiachigriichi.

⁹ Karaura, butijiruka iaku binu tukuskata upiarka, maimanda wisiska kagta mana iachaspalla. Iaku jundachigkunallami iacharkakuna. Upiaspaka, kusa tukungapa kagta kaiaspa, ¹⁰ nirka:

—Tukuikunapagpimi ñugpa alli binuta karankuna.

Nispaka, ña alli upiaspa kaura, mananchatami karan-

kuna. Ikuti kamka, kunankamami mas alli binuta wakachiska kangki.

¹¹ Chasami, Galilea alpamanda Kaná puiblupi, Jesús musuglla mana imaurapas kawaskasina rurarka. Chiwa, pai suma atun kagtami kawachirirka. Chasa kawaspaka, paita katiraiagkuna mas suma paimanda iuiarirkakuna.

¹² Chiuramandaka Jesús, paipa mama i waugkikuna i paita katiraiagkunawanta Kafarnaum suti puibluma rirkakuna. Chipi chaiagrispaka, sug mailla punchakunami chisiarkakuna.

Diuspa atun wasi ukumanda, Jesús katugkunata llugsichiskamanda

¹³ Judiukunapa paskua atun puncha ña chaimukura, Jesús Jerusalenma rirka. ¹⁴ Diuspa atun wasi ukuma iaikugrispaka, wagra, ubija i palumakuna katugkunata i kulki trukagkuna tianakuskata tarigrirka.

¹⁵ Chasa tarigrispaka, kabristu asutidiru patarispaka, tukui chi ukupi kagkunata, ubija i wagrakunawanta kanchama llugsichirka. Trukagkunapa kulkita misakunawanta kaima chima bulachirka. ¹⁶ Paluma katugkunatapas nirka:

—Tukui kaikunatapas kaimanda llugsichiichi. Nuka Taitapa wasita mana ruraichi randigsamudiru i katudiru wasi.

¹⁷ Jesusta katiraiagkuna iuiarirkakuna, ñugpamanda librupi kasa willaraiaskata: “Kamba atun wasita kawaspami dillakii puchukarikuni”.

¹⁸ Jesús chasa ruragmandaka, judiukuna paita tapurkakuna:

—Kamka, ¿imawatak kawachinkangi, kam chasa llugsichingapa pudigta?

¹⁹ Chiura, Jesuska ainirka:

—Kai Diuspa wasita puchukaichi. Nukaka, kimsa punchapika ikutimi saiachisa.

²⁰ Chiura, judiukuna nirkakuna:

—Kai atun wasi, chusku chungu sugta watapimi saia-chiska ka. Kamka, ¿imasatak kimsa punchallapi saia-chinkangi?

²¹ Jesuska, Diuspa wasimanda chasa nispa, pai kikinpa kuirpumandami nikurka. ²² Pai ña wañuspa, kaugsariska kaura, paita katiraiagkuna chasa niskata iuiarirkakuna. Chasa iuiarispaka, ñugpamanda librupi willaraiaskata i Jesús ima rimaskata mas suma iuiarirkakuna.

Tukuikunata, Jesús rigsiskamanda

²³ Chi paskua atun puncha Jesús Jerusalenpi kaura, achka runakuna, mana imaurapas kawaskasina pai rurakuskata kawaspaka, paita suma iuiarirkakuna.

²⁴ Chasa kagpipas, Jesuska, tukuikunata imasa sungupi iuianakuskata kawaspaka, paikunata mana allilla munarka. ²⁵ Mana paita ministirka, kikin runakuna imasa kaskasina willaringapa. Pai kikinmi kawarka, sungupi imasa iuianakugta.

Nikodemo suti runa, Jesuswa rimanakuskamanda

3 Sug judíu taita fariseo runami karka, Nikodemo suti. ² Chi runaka, sug tuta Jesuspagma chaiagrispa, nirka:

—Iachanchimi, kam iachachig taita, Taita Dios kachamuska iachachig kangapa kagta. Taita Dios mana kamwa kagpika, manachar pudintrangi, chi mana imaurapas kawaskasinata kam rurangapa.

³ Jesuska ainirka:

—Kasami nuka niiki: mana ikuti llullu wawasina tiagsamugpika, ñi maikanpas mana pudingapa kanchu, Taita Dios suma mandakuskapi kawaringringapa.

⁴ Chiura, Nikodemo tapurka:

—Ña ruku runa kaspera, ¿imasatak ikuti pudiringa tiagsamungapa? Nigpi, ¿ikutichu mamandipa wigsu ukuma iaikurispaka, pudirí tiagsamungapa; chasachu pudirí?

⁵ Chiura, Jesuska ainirka:

—Kasami nuka niiki: mana iakuwa i Santu Ispiritumanda tiagsamugpika, ñi maikanpas mana pudingapa kanchu, Taita Dios suma mandakuskapi iaikugringapa.

⁶ Mamapa wigsamanda tiagsamug, aichallami ka. Ikuti Santu Ispiritumanda tiagsamugka, alli ispiritumi ka.

⁷ “Chaiakumi, kamkuna ikuti tiagsamungapa”; nuka kamta chasa niskata mana ujnarikui. ⁸ Wairaka, maima munaskamami pukunlla. Waira pukukuskata uiaspaka, mana iachangichichu, mainigmanda pukumukugta ñi masama rikugta. Chasallatami Santu Ispiritumanda tukui tiagsamugkuna tukugsamunkuna.

⁹ Chiura, Nikodemo tapurka:

—¿Imasatak chasa kanga?

¹⁰ Jesuska nirka:

—Kam, Israelmanda runakunata iachachig taitami kangki. Ikuti chasataka, ¿imawantak mana iachangi?

¹¹ Kasami nuka niiki: nukanchika, iachaspami rimanchi; kawaspami willanchi. Nukanchi chasa willaskata, kamkunaka mana munangichichu uiangapa. ¹² Nuka kai alpapi tiaskamanda willakuskata kamkuna mana uia-wagpika, ¿imasatak suma luarpi tiaskamanda willakuskataka uiawankangichi?

¹³ —Ñi pipas mana suma luarma sikaska kanchu. Kai Runa Tukuska suma luarmanda uraikumuska, paillami ikuti suma luarma sikangapa ka. ¹⁴ Imasami Moisés, chusa sitaska alpapi sug kulibrasina rigchata atarichirka: chasallatami kai Runa Tukuskatapas chaiaku, atarichii tukungapa; ¹⁵ chasaka, paimanda tukui suma iuiagkuna mana puchukaridiru kaugsaita iukangapa.

¹⁶ Taita Dios, kai alpamanda tukui runakunata ña iapa kuiaspa, kikinpa suglla wambratami kachamurka; chasaka, paimanda tukui suma iuiagkuna, puchukaringataka, mana puchukaridiru kaugsaita iukangapakuna. ¹⁷ Taita Dios, kikinpa wambrata kai alpama mana kachamurka, kaimanda runakunata justisiai rurangapa. Nukanchita kispichingapami paita kachamurka.

¹⁸ Maikanpas Taita Diuspa wambrata suma iuiagkuna mana justisiai tukungapa kankunachu. Ikuti maikan paita mana uiagkunaka, Taita Diuspa suglla wambrata

mana uiagmanda, timpumi justisiai tukuska kankuna. ¹⁹ Kasami justisiai tukurkakuna: paikunapa iuiaikunata punchaiachig runa kai alpama samuura, paikuna, mana alli rurag runakuna kaspera, chi punchaiachigta mana munarkakuna. Munarkakunami, tutaiachiska iuiaikunallawa kaugsanakungapa. ²⁰ Maikan mana alli ruragkuna, punchaiachigta mana munankunachu. Chiwanka, chi punchaiachigpagma mana kaillaiai munankunachu. Kaillaiaipikunaka, mana allilla ruraskamandami piñai tukuntrakuna. ²¹ Ikuti maikanpas suti-pa alli ruragkunaka, punchaiachigpagma samunkuna; chasaka, paikuna ima alli runanakuskata Taita Dios imasa munaskasina kagta kawachingapa.

Juan Bautista, ña kimsama Jesusmanda willaskamanda

²² Chiuramanda, Jesús katiraiagkunawanta Judea alpama rirka. Chipi paikunawa kagrispaka, baugtisachii-mi kallarrirka. ²³ Enón suti Salim puiblu ladullapi, achka iaku tiaskapika Juanpasmi baugtisakurka. Achka runakunaka, Juanpagma chaianakugrirka baugtisingapa. ²⁴ Paika, manara karsilpi churai tukuska karkachu.

²⁵ Juanta katiraiagkuna i sug judiura sinchi rimanakurka, kasa nispa: “Baugtisarispaka, ¿imasasik Diospa ñawipi maillariskasina allilla kawaringa?”. ²⁶ Nispaka, Juanpagma kaillaiaspa, nirkakuna:

—Iachachig taita, kam Jordán iaku sug ladu chimba kaura, sug runa kamwa kaskamanda pai pi kagta willarkangi; chi runapassi kunaura baugtisaku. Tukui-kunami paiwa rinakú.

²⁷ Chiura, Juanka ainirka:

—Suma luarmanda mana paita imapas karamuska kagpika, manachar paipas ñi imapas pudintra karangapa. ²⁸ Kam kikinkunami uiawarkangichi imasa nuka nigta: “Taita Dios agllaska Cristo, nuka mana kanichu. Paimanda ñugpa rimag kachamuscallami kani”.

²⁹ Kasarai punchaka, kusa tukungapa kagmi warmita chaskí. Kusa tukungapa kagwa iachariduka, paita uiaspaka, iapa allimi iuiachirí. Chasallata nukatapas, chi runamanda uiaspa, ajai iapa allimi iuiachiriwá. ³⁰ Paitami chaiaku, kunaura nukamanda mas atuniachii tukungapa. Ikuti nukataka chaiawakumi, paimanda mas uchulla tukungapa.

³¹ Suma luarmanda samugmi tukui iaiakunamandapas mas iaia ka. Kai alpamanda kagka, kai alpamandallami ka. Chasallata, kai alpapi tiaskakunamandallami rimá. Suma luarnigmanda samugka, tukui iaiakunamandapas mas iaiami ka. ³² Pai ima kawaska i uiaskatami allilla willá. Chasa willagpipas, ñi pipas mana munankunachu uiangapa. ³³ Maikan pai ima willaskata uiaspa suma chaskigkunaka, allillami iuiaringakuna, Taita Dios kikin imapipas mana llulla kagta. ³⁴ Taita Dios, paipa Ispirituta mana tupuspallami pai kachamuskata karamurka. Chiwami paipa rimallawa willaku.

³⁵ Taita Dios, kikinpa wambrata iapa kuiaspa, paipa makipimi churarka, tukui mandag kangapa. ³⁶ Maikanpas Taita Diospa wambrata suma iuiagkuna, mana puchukariduru kaugsaitami iukankuna. Ikuti Taita Dios-

pa wambrata mana uiangapa munagkunaka, chi kaug-saita mana iukangapa kankunachu. Taita Diospa iapa rabiawa llakiitami chaskingapa kankuna.

Samaria alpamanda warmiwa, Jesús rimanakuska-manda

⁴ Fariseokunaka iachagsamurkakuna, Jesusta katiraiagkuna, Juanmandapas mas achka miraspa, baugtisingakugta. ² Jesús kikinka mana baugtisingakurka. Paita katiraiagkunami baugtisingakurka. Fariseokuna chasa iachaskata uiaspaka, ³ Jesuska, katiraiagkunawanta Judeamanda llugsispa, Galilea alpamami kutirkakuna.

⁴ Chima rinakuura, paita chaiarka, Samaria alpa suiu ialingapa. ⁵ Chi suiu ialikuspa, Sikar suti puiblumami chaiagrirka. Chi puiblu kaillaiauskapika, ñugpamanda taita Jakob, José suti paipa wambrandita chi alpata karaskasi karka. ⁶ Chipika, sug pusumi tiarka, Jakob sakiska. Jesuska, iapa saikuska purikuspa, chi pusu ladupimi tiarigrirka, ña chaugpunchasina.

⁷ Chiuraka, sug Samariamanda warmisi chaiagrirka, pusumanda iaku surkungapa. Chi warmitaka, Jesús nirka:

—Iaku karawai, upiangapa—. ⁸ (Jesusta katiraiagkuna, puiblumami riska karkakuna, mikui randingapa.)

⁹ Chi warmika ainirkasi:

—¿Imasamandatak kamka, judíu kaspera, nukata iaku mañawakungi, nuka Samariamanda warmi kaskata?— (Judiukunawa i Samariamanda runakunawa mana rimanakudur kankuna.)

¹⁰ Jesuska ainirka:

—Kam mana iachangichu, Taita Dios ima karangapa tiapugta ñi pi kamta iaku mañakugta. Kam chasa iachaspaka, mañawantrangichar, nuka mana wañuduru iakuta karangapa.

¹¹ Chi warmika nirka:

—Kam taita turika, mana imapas iukangichu, iaku surkungapa. Kai pusu, iapa jundumi ka. Nigpika, ¿imawatak chi mana wañuduru iakuta surkupuanhangi?

¹² ¿Nukanchipa ñugpamanda taita Jakobmanda mas atunchu kangi? Paisik kai pusuta nukanchimanda sakirka. Kikinsik kai pusumanda iakuta upiadur karka. Paipa wambrakuna i wagrakunapas, chillatata upiadur karkakuna.

¹³ Jesuska ainirka:

—Kai pusumanda iakuta upiagkuna, ikutimi iakunaiai iukangapa kankuna. ¹⁴ Ikuti maikanpas nuka karaska iakuta upiagkunaka, mana mas iakunaiai iukangapa kankunachu. Chi iaku nuka karaska, pai kikinkunapa kuirpupi iaku ñawi iukagsinami tukungapa ka. Chiwanka, mana puchukariduru suma kaugsaitami chaskingapa kankuna.

¹⁵ Chasa ainiura, chi warmi nirka:

—Taita turi, chi iakuta karawai, nuka mana mas iakunaiai iukangapa. Chasaka, mana nukata chaia-wangachu, ikuti kai pusupi iaku surkugsamungapa.

¹⁶ Jesuska nirka:

—Riilla. Kamba kusata kaiagrispa, kaima ikuti samungichi.

¹⁷ Chi warmika ainirka:

—Nuka, mana kusaiug kanichu.

Jesuska nirka:

—“Mana kusaiug kanichu” kam niwangi; allillami ka.

¹⁸ Pichka kusakunami iukarkangi. Kunaura kamwa kaugsakug, mana kamba kusa kanchu. Chasapi, sutipami niwangi.

¹⁹ Chiura, chi warmi nirka:

—Kam taita turi rigchawangimi Santu Ispirituwa rimag kagsina. ²⁰ Nukanchipa ñugpamanda taitakuna, kai lumapimi Taita Diusta kunguridur karkakuna. Ikuti kamkunaka ningichimi: Jerusalenllapimi Taita Diusta kungurigririduru ka.

²¹ Jesuska nirka:

—Kam warmi, nukata suma iuiawai. Kunaura chaia-mukumi, mana kai lumapi ñi Jerusalenpi kamkuna Taita Diusta kunguringapa. ²² Kamkunaka mana iachangichichu, pita kungurinakugta suma atuniachingapa. Nukanchikar iachanchimi, pita suma atuniachinakugta. Tukui runakunata kispichig, judiukunapagmandami ka.

²³ —Suianakuska puncha ñami chaimurka. Kunaura mandata Taita Diusta sutipa suma atuniachigkuna, Santu Ispirituwa i sutipa iuiawami paita suma atuniachingapa kankuna. Chasa atuniachigkunatami Taita Dius maskaku. ²⁴ Taita Diuska, ispiritullami ka. Maikanpas paita suma atuniachigkunata chaia-kumi, Santu Ispirituwa i sutipa iuiawama suma atuniachingapa.

²⁵ Chiura, chi warmi nirka:

—Nuka iachaniami, Mesías u Cristo samungapa kagta. Pai samuuraka, nukanchita tukuimi willangapa ka.

²⁶ Chasa niura, Jesuska paita nirka:

—Kamwa rimakug, kam niskaka, nukami kani.

²⁷ Chikama Jesusta katiraiagkunaka, chima chaiagrispa, paita sug warmiwa rimanakuskata kawaspaka, iapa ujnarirkakuna. Chasa kawaspapas, mana pipas paita tapurkakuna: “¿Imatak munakungi?” u “¿Imatak chi warmiwa rimanakungichi?”.

²⁸ Chi warmika, iaku apagririduru wabkanata sakispa, puibluma kalparka. Chaiagrispaka, tukui runakunata nirka:

²⁹ —Samuichi. Akushi, kawangapa. Sug runa, tukui nuka ima ruraskatami willawarka. ¿Manacha Cristo kantra?

³⁰ Chasa uiaspaka, chi puiblupi kagkunaka, llugsispa, Jesuspagma chaiagrirkakuna.

³¹ Chikamaka, Jesusta katiraiagkuna ninakurka:

—Iachachig taita, kaita maillallapas mikui.

³² Paika ainirka:

—Sug rigcha mikuimi nuka iukani. Chita, kamkuna mana rigsingichichu.

³³ Katiraiagkunaka, paipura tapurinakurka:

—¿Maikanchu paita mikui apamupurka?

³⁴ Jesuska nirka:

—Nukata kachamuwagmanda, pai imasa munaskasina tukui ruraspa puchukagta kawachiska, chimi nukapa mikui niraiá.

³⁵ —Kasapas. Kamkuna, ¿manachu ningichi: “Chusku killami chara pisiku, pallangapa”? Nukaka, kasami niikichita: chagrakunatasina ñawiwa runakunata allilla kawaichi. Paikunaka, timpumi killuiaska pallangapasina kankuna. ³⁶ Maikan pallagkunaka, ganankunami. Chi pallaskakunaka, mana puchukariduru suma kaugsaitami iukangakuna. Chasaka, tarpug i pallag sugllapimi kuntintarispa tukugsamungakuna.

³⁷ —Imasami suura ninchi kasa: “Sugka, tarpugmi ka; sugka, pallagmi ka”: ³⁸ chasallatami nukaka kachaikichita, kam kikinkuna mana tarpuskata pallagsina rurangapa. Sug ñugpamandakuna, tarpugsinami iachachirkakuna. Kamkunaka, paikuna ima tarpuskakunata pallagkunasinami kangichi.

³⁹ Chi Samaria puiblumanda warmika, chipi kaugsanakuskata Jesusmanda willagrirka, kasa nispa:

—Tukui nuka ima ruraskatami willawarka.

Chasa uiaspaka, achkakuna Jesusmanda suma iuiarirkakuna. ⁴⁰ Nispaka, paipagma chaiagrispa, mañana kurka:

—Nukanchiwa kaillapi kai.

Chimanda Jesús, iskai punchami paikunawa karka.

⁴¹ Pai rimakuskata uiaspaka, mas achkakunami paita suma iuiarirkakuna. ⁴² Nispaka, chi warmita nirkakuna:

—Ña kunaauramanda, kam rimakuskallataka mana paimanda suma iuiarinchichu. Nukanchi kikinkuna, paita uiaspami iachanchi, pai sutipa kai alpamanda runakunata kispichig kangapa kagta.

⁴³ Chi puiblupi iskai puncha chiaspaka, Jesuska llugsirka, pai kikinpa Galilea alpama ringapa. ⁴⁴ Jesús kikin willaska karka, kasa nispa: “Kikinpa alpapi, Santu Ispirituwa rimagkunata mana allilla kuiankunachu”.

⁴⁵ Chi Galilea alpapi kaugsanakug, paskua atun puncha Jerusalenpi Jesús tukui mana imaurapas kawaskasina ruraskatami kawaska karkakuna. Chimandami, Jesús chipi chaiagriuraka, paita iapa sumaglla chaskirkakuna.

Atun mandagta aidagpa wambrata, Jesús aliachiskamanda

⁴⁶ Jesús ña Galileapi kaspera, Kaná puibluma ikuti chaiagrirka, ñugpata iakuta binu ruraska kaskama. Chipi karkami sug atun mandagta aidag runa. Chi runapa wambraka, Kafarnaum puiblupi ungugsi sirikurka. ⁴⁷ Chi runaka, Jesús Judeamanda Galileama chaiakugta iachaspaka, pai kaskama rirka. Chaiagrispaka, mañai kallarirka, kasa nispa:

—Nukapa wasima ripuai, nukapa wambrata ambi-puangapa. Ñami wañupuaku.

⁴⁸ Jesuska nirka:

—Mana kamkunata imaurapas kawaskasina mana kawachigpika, mana nukamanda suma iuiawangichichu.

⁴⁹ Chi runaka nirka:

—Taita waugki, ripuai, nukapa wambra manara wañupuagpi.

⁵⁰ Chasa niura, Jesús nirka:

—Riilla kamba wasima. Kamba wambra, kaugsami ka.

Jesús niskata uiaspa, suma iuiaillawami chi runaka rirkalla.

⁵¹ Ña wasima chaiakugriuraka, paipa sug lutrinkuna, wasimanda llugsispa, tupagrirkakuna, paita willaspa: —Kamba wambra, allilla kaugsami ka.

⁵² Chiura, paika tapurka:

—¿Imasauratak ambirirka?

—Kaina, chaugpuncha ialimi rupaika anchurka— ainirkakuna.

⁵³ Chasa ainiuraka, chi ungugpa taitaka iuiarirka: “Chasaurallatami Jesús niwarka: ‘Kamba wambra, kaugsami ka.’” Chasa iuiarispaka, pai i paipa tukui wasimandakuna, Jesusmanda mas suma iuiarirkakuna.

⁵⁴ Chasaka Jesús, Judea alpamanda Galileama chaiagrispaka, ña parismami mana imaurapas kawaskata ruraraka.

Iaku kuchaiachiska pata ladupi, ungug runata Jesús ambiskamanda

5 Chiuramanda, judiukuna ikuti sug atun puncha ialichingapa chaiauraka, Jesuspas ikuti Jerusalenma rirka. ² Chi puiblupi, ubijakunata iaikuchiduru pungu ladullapi tianmi sug iaku kuchaiachiska. Chi iaku, hebreo rimaiwa suti kanmi Betzata. Chipi, pichka atun pungukunami tia. ³ Chikunapi, achka ungugkuna sirinakurka: ñawi mana kawagkuna, chakiwa mana allilla sarui pudigkuna i mana kuiurii pudigkuna. [Tukui chikuna suianakurka, chi kuchaiachiska iaku kuiurinkama. ⁴ Atun Taita Diospa anjil, diul diulpi uraikumuspa, chi iakuta kuiuchidur karka. Iaku kuiuchiuraka, maikan ñugpa iakuma iaikugka ima unguipas ambiriskasik kidadur karka.]

⁵ Chipika karka sug runa, kimsa chungu pusag wata ungug. ⁶ Chi runata kawaspaka, Jesuska, unaimandata chipi sirikugta iachaspa, tapurka:

—¿Munangichu ambiriska kangapa?

⁷ Chiura, chi ungug runa ainirka:

—Taita waugki, iaku kuiuchigsamuuraka, mana iukanichu ñi pipas nukata iakuma iaikuchiwangapa. Nuka imaurapas kaillaiakunkamaka, sugmi nukapa ñugpa iaikugrí.

⁸ Jesuska nirka:

—Atarii. Chakanata atarichispa, kamba wasima rii.

⁹ Chasa nigllapi, chi runaka ambirigsamurka. Chakanata atarichispaka, purii kallarirka.

Chi aliachiska puncha, wardami karka. ¹⁰ Chimanda judiukunaka, chi ambiriska runataka nirkakuna:

—Warda punchami ka. Kamba chakanata apangapa, kuna puncha michami ka.

¹¹ Paika ainirka:

—Nukata ambiwagllatami niwarka: “Chakanata atarichispa, kamba wasima rii”.

¹² Chiura tapurkakuna:

—¿Maikan runatak kamta: “Atarichispa, kamba wasimarii” nirka?

¹³ Chi ambiriska runa mana iacharka pi ambigta. Achka runakunapi, Jesús chapuriska karka. Chiwanka, paipa ñawimanda chingarirka.

¹⁴ Chiuramanda Jesuska, Diospa atun wasi ukupi ambiriska runata kawarispaka, nirka:

—Uiamui. Aliaskami kangi. Mana mas Diospa ñawipi pandaringi. Ikuti pandarigpika, pudinmi kunauramanda mas mana allillapas tukunga.

¹⁵ Chi runaka, judiukunapagma rispa, nigrirka:

—Nukata ambiwagka, Jesusmi suti ka.

¹⁶ Chiuramanda judiukunaka, Jesús warda puncha chasa ambiskamanda, paita kuntraí kallarirkakuna.

¹⁷ Paika nirkakunata:

—Nukapa Taita, kuna punchapasmi allilla ruraku. Nukapasmi allilla rurakuni.

¹⁸ Judiukuna, chasa niskata uiaspaka, mas wañuchingapa iuiai apirkakunata. Warda puncha ungugta alia-chiskamandallaka, mana; kikin Jesús, Taita Diussinallata tukuspa, “Nukapa Taitami ka” nigmandami muna-nakurka wañuchingapa.

Taita Diospa wambra, paiwa sugllapi tukui ruraskamanda

¹⁹ Chiura, Jesuska nirka:

—Kasami nuka niikichita: Taita Diospa wambra, kikinpa iuiaillawa mana imapas rurai pudinchu. Imasa Taita Dios rurakuskata kawaskawami rurá. Taita Dios imasami rurá: chasallatami paipa wambrapas rurá.

²⁰ Taita Dios, paipa wambrata iapa kuiaspami tukui ima rurakuskata kawachiwá. Kunauramanda, ikuti mas sug rigchapasmi ruraikunata kawachiwangapa ka; chasaka kamkunapas, nuka chasallata rurakuskata ujnarispa kawawangapa. ²¹ Imasami Taita Dios, wañuskakunata kaugsachispa, paipa kaugsaita kará: chasallatami paipa wambrapas, maikan nuka munaskata kaugsaita karani.

²² —Kasapas. Taita Dios, mana pitapas justisiai ruranchu. Chasapaka, paipa wambratami tukui iachaita kararka, tukuikunata justisiai rurangapa. ²³ Chiwanka, imasami Taita Diusta suma atuniachinkuna: chasallata paipa wambratapasmi tukuikuna suma atuniachingapa kankuna. Maikanpas Taita Diospa wambrata mana suma atuniachigpika, ¿imasatak kikin Taita Dios kachamugta atuniachingakuna?

²⁴ —Kasami nuka niikichita: maikanpas nukapa rimai-kunata uiawaspa, nukata kachamuwagmanta suma iuiagkuna, mana puchukariduru kaugsaitami iukan-kuna. Mana justisiai tukungapa kankunachu. Diltudupa wañuita kispispa, mana mas wañungapa kaugsaitami tarirkakuna. ²⁵ Kasami nuka niikichita: suianakuska puncha ñami chaiamurka; wañuskakunapas, Taita Diospa wambrapa rimaita uiangapami kankuna. Maikan uiawagkunaka, diltudupa kaugsaitami taringapa kankuna. ²⁶ Imasami Taita Dios kikin, kaugsaita iuká: chasallatami paipa wambrata kararka, kikinpa

kaugsaita iukangapa. ²⁷ Paipa wambra runa tukuska kagmanda, tukui iachaitami kararka, justisiai rurangapa.

²⁸ —Chasa uiawanakuspaka, mana ujnarinakuichi. Ñami chaimungapa ka, tukui wañuskakuna, nukapa rimaita uiawaspa, ²⁹ paikuna pambaraiaskamanda llugsingapa. Chiura, maikanpas allilla ruraspa wañuskakunaka kaugsaringapami kankuna, mana puchukariduru suma kaugsaita iukangapa. Ikuti mana allilla ruraspa wañuskakunaka, kaugsarispa, justisiaimi tukungapa kankuna, diltudupa ninama kachai tukungapa.

³⁰ —Nuka kikinpa iuiailawa mana imapas ruranichu. Nukapa Taita imasa niwaskasinawami justisiai rurani. Nuka justisiai ruraskaka, imasa chaiaskasina allillami ka. Chika, nuka mana ruranichu nuka imasa munaskasina. Nukapa Taita kachamuweg imasa pai niwaskasinami rurakuni.

Taita Dios, paipa wambramanda sutipa kagta willaskamanda

³¹ —Nuka kikinmandalla willarikugpi, manachar sutipa kantra. ³² Sugmi nukamanda willag ka. Iachaniami, pai nukamanda willakuskaka tukui sutipa kagta.

³³ —Kamkuna Juanpagma kacharkangichi, nukamanda tapungapa. Chiura pai ainiskaka, tukui sutipami ka. ³⁴ Chasa kagpipas, nukata mana ministiwanchu, ñi maikan runapas nukamanda willangapa. Kam kikin-kuna kispichii tukuska kangapagllami nuka chasa niikichita. ³⁵ Juan karkami sug bila punchaiachikug sindikugsina. Kamkunaka, chi punchaiachigsinata kawaspaka, sug ratullami alli iuiachirispas karkangichi.

³⁶ —Juanmanda mas sumami nukamanda willag tia. Imasami nukapa Taita rurangapa kachamuwarka: chasami rurakuni. Nuka ima ruraskata kawaspaka, chikunawami iachankangichi, nukapa Taita nukata kachamuwaska kagta.

³⁷ —Nukapa Taita kachamuwagpasmi nukamanda willá. Kamkunaka, mana imaurapas paipa rimaita uiaspa i pai imasa rigcha kagta kawaska kangichichu. ³⁸ Pai kachamuwaska kagta mana uiawangapa munagmandami paipa rimaita mana kamkunapa iuiapi iukangichi.

³⁹ —Diuspa Rimai librupi sumami kawangichi, kasa iuiaspa: chipimi mana puchukariduru suma kaugsaita tarirí. Chillapitami nukamandapas willaraiá, nuka kachamuska kangapa kagta. ⁴⁰ Chasa willaraiaskata kawaspapas, kamkuna mana munanakungichi, nukawa samuspa, chi kaugsaita iukangapa.

⁴¹ —Nuka mana munanichu, ñi maikan runapas atuniachiwangapa. ⁴² Kamkunata allillami rigsiikichita. Iachaniami, kamkuna mana Taita Diusta kuiagtakuna.

⁴³ —Nukaka, nukapa Taita kachamuwaskami samurkani. Chasa samugpipas, nukata kamkuna mana munawangichichu. Ikuti sug maikanpas samuntra, kikinmandalla iuiarispa; chitakar chaskinrangichimi.

⁴⁴ —Suglla Taita Dios kamkunata atuniachingapa kaskata maskangataka, kamkunapurallami atuniachi-

rispa kangichi. Chasa ruranakuspaka, ¿imasatak nukamanda suma iuiawankangichi?

⁴⁵ —Mana iuianakuichi, nuka kamkunamanda nukapa Taitapa ñawipi mana allilla ruraskakunata willagrिंगapa kagta. Moisés kikinmi kamkunamanda chasa willangapa ka, kamkuna paiwa sumaglla iuianakugpipas. ⁴⁶ Kamkuna, Moiesta sutipa suma iuiarispa, nukamandapaschar chasallata suma iuiariwanrangichi. Paimi nukamanda ñugpa willarka. ⁴⁷ Pai librupi willaska sakiskata mana uiaspa, ¿imasatak nuka rimakuskataka suma iuiawankangichi?

Pichka waranga runakunata, Jesús mikungapa karaskamanda

6 Chiuramanda, Jesús rirka Galilea u Tiberias suti kucha sug ladu chimba. ² Achka runakuna, paita katiraiarkakuna, mana aliangasina unguikunata suma ambigta kawaspas. ³ Jesuska, awa lumama sikaspa, katiraiagkunawanta tiarirka. ⁴ Judiukunapa paskua atun puncha ñami chaiakurka.

⁵ Chi lumapi tiakuspaka, Jesuska tukuikunata kawarka, chi achka runakuna paipagma kaillaianakugta. Chasa kawaspaka, Felipeta tapurka:

—¿Maipitak tanda randinchi, kai tukui runa samunakuskata karangapa?— ⁶ Chasa tapurka, Felipe imasa ainigta uiangapa. Jesús kikin allillami iacharka, imasa rurangapa chaiakugta.

⁷ Chiura, Felipe ainirka:

—Iskai patsa puncha ganaska kulkiwa tanda randispa, manachar kai tukui runakunata sug sug uchulla pitillapas karangapa pagtantra.

⁸ Sug paita katiraiag, Simón Pedropa waugki Andrés sutika, nirka:

⁹ —Kaipimi ka sug wambra. Pichka sibada tanda i iskai chawami iuká. Chika, ¿imatak pagtanga, kai tukui achka runakunata karangapa?

¹⁰ Jesuska nirka:

—Tukuikunata nigriichi, tiarichukuna.

Suma ugsa chipi tiarka. Mai pichka waranga runakuna, chipi tiarirkakuna. ¹¹ Chiura Jesuska, chi tandakunata charispa, “Pai Siñur” Taita Diusta nirka. Nispaka, chipi tianakuskata kuaspa richirka. Chalkwakunatapas chasallata kuaspa richirka. Chiura tukuikuna, masa munaska chaskispa mikurkakuna.

¹² Tukuikuna ña sagsagta mikuuraka, Jesuska katiraiagkunata nirka:

—Pitikuna puchuskakunata tandachiichi, mana sitanakuchu.

¹³ Chasa uiaspa, chi pichka sibada tanda piti piti-kuna puchuskakunata chungá iskai saparu jundami tandachirkakuna.

¹⁴ Chi mana imaurapas ruraskasinata kawaspaka, tukui chipi kagkuna nirkakuna:

—Santu Ispirituwa rimag runa kai alpama samungapa willaraiaska, kaimi chi runa kangapa ka.

¹⁵ Tukuikunami munanakurka, Jestusta apispa, atun mandag churangapa. Paika, chasa iuianakugta iachas-

paka, anchurispá, chí awa lumama kutirka, sapalla kangapa.

Iaku kuchapi, Jesús chakiwa saruspa awalla puriskamanda

¹⁶ Ña chisima kauraka, Jesusta katiraiagkunaka atun kuchama uraikurkakuna. ¹⁷ Ña tutaiaska kaura, Jesús manara paikunapagma chaiagriska karka. Chimanda, kanuapi iaiuspaka, kucha sug ladu chimba rii kallarrir-kakuna, Kafarnaum puibluma chaiagringapa.

¹⁸ Paikuna chimbanakuuraka, iapa sinchi waira, atarispá, iakuta wagtachii kallarrirka. ¹⁹ Paikuna ña mai pichka u sugta chungá kuadrásina iakupi rinakuura, Jesús, chí iakupi awalla chakiwa saruspa saruspa, paikunapagma kaillaiakugta kawarkakuna. Chasa kawas-paka, ajaimi mancharirkakuna. ²⁰ Jesuska nirkakunata:

—Nukami kani. Mana manchanakuichi.

²¹ Chasa uiaspaka, alli iuiachirispá, paita: —Kanuama samui— nirkakuna. Chasa ninakugllapi, maima rinakuskama chaiagrirkakuna.

Jesús iachachikuskata uiagkuna, paita maskanakuskamanda

²² Kaiandika, tukui runakuna chí kucha sug ladu kagkuna iuiarirkakuna, kaina suglla kanua chipi tiaska kagta; Jesusta katiraiagkunalla chí kanuapi iaiuspá rigtakuna; Jesús chipi paikunawa manima iaiuspá rigta. ²³ Chikama sugkunaka, Tiberias puiblumanda sug kanuakunapi chí ladumalla chaiagrirkakuna; maipimi kikin Iaia Jesús, Taita Diusta: “Pai Siñur” nispa, tanda mikuchirka: chí ladumalla. ²⁴ Chipika, Jesusta ñi paita katiraiagkunata manima tarigrirkakuna. Chasa kawas-paka chí runakuna, chí chusa kanuakunapi iaiuspá, sug ladu chimba Kafarnaumma maskangapa rirkakuna.

Jesús, mana wañudiru tandami ka

²⁵ Chaiagrispaka, Jesusta tarigrirkakuna. Nispaka tapurkakuna:

—Iachachig taita, ¿imauratak kaima chaimurkangi?

²⁶ Jesuska ainirka:

—Kasami nuka niikichita: mana maskawanakungichichu, imaurapas mana kawaskasina kamkunapa ñawipi ruragmanda. Kamkuna sagsagta mikuskamandami maskawanakungichi. ²⁷ Tukuriduru mikuita mana maskanakuichi. Maskaichi mana puchukariduru mikuita; chasaka, diltudupa kaugsangapa. Chí mikuita, kai Runa Tukuskami kamkunata karangapa kaikichita. Chasapami Taita Dius kikin nukata agllawarka.

²⁸ Chiura tapurkakuna:

—¿Imasatak nukanchi rurasunchi, Taita Dius imasa munakuskasina paita kawachingapa?

²⁹ Chiura, Jesuska ainirka:

—Pai nukata kachamuwagka, kamkunamanda munakumi, nukamanda suma iuiawangapa.

³⁰ Chiura, Jesusta tapurkakuna:

—¿Imasatak nukanchita kawachinkangi; chasaka, nukanchi kamta suma iuiaringapa? ¿Imaurapas mana kawaskasina ruraspachu kawachinkangi? ³¹ Nukan-chipa ñugpamanda taitakuna, chusa sitaska alpapi kaugsanakuura, “maná” suti suma luarmanda mikuita-sik mikudur karkakuna. Chasallatami ñugpamanda librupi willaraiá, kasa nispa: “Suma luarmanda tandami mikungapa karamurka”.

³² Jesuska ainirka:

—Kasami nuka niikichita: Moiseska, chí suma luar-manda tandata mana paikunata karamurkachu. Nukapa Taitami kai mana wañudiru tanda kamkunata suma luarmanda karamú. ³³ Chí Taita Dius karamuska tanda niraianmi suma luarmanda uraikumug, kai alpamanda runakunata diltudupa kaugsai karangapa.

³⁴ —Taita waugki, imaurapas mana sakispalla chí tandata nukanchita karamui— nirkakuna.

³⁵ Jesuska ainirka:

—Nukami kani mana wañudiru tanda. Maikan nukawa samugkuna, mana iarkai iukangapa kankunachu. Chasallata, nukata suma iuiawagkuna mana imaurapas iakunaiái iukangapa kankunachu. ³⁶ Chasa nis-papas, ñami nirkaikichita: ña nukata kawawas-papas, chara manara suma iuiawangichichu. ³⁷ Tukui nukapa Taita agllapuaskakuna, nukawami samungapa kankuna. Maikanpas nukawa samuskakunaka, mana kanchama llugsichii tukungapa kankunachu. ³⁸ Nukaka, suma luarmanda mana uraikumuranichu, nukapa iuiailawa imapas rurangapa. Imasa kachamuwag munakuskasina rurangapami samurkani. ³⁹ Kasami kachamuwag muná: pai agllaska nukawa samugkuna, ñi sug mana nukawa chingachii tukungapa. Puchukarii punchaka, tukui paikunata nuka kaugsachingapami muná. ⁴⁰ Kasami nukapa Taita muná: maikanpas paipa wambrata rigsiwaspa suma iuiawagkuna, mana puchukariduru kaugsaitami iukangapa kankuna. Paikunatami, puchukarii puncha, nuka kaugsachingapa kani.

⁴¹ Jesús niska karka: “Nukami kani suma luarmanda uraikumuska tanda”. Chimanda judiukuna, mana alli iuiaiwa paimanda rimanakurka, ⁴² kasa nispa:

—Kai runa, ¿manachu ka Josepa wambra Jesús? Paipa taita i mamanditapas, nukanchi rigsinchimi. Nig-pika, ¿imawantak niku: “Suma luarmandami uraikumuska kani”?

⁴³ Jesuska nirkakunata:

—Kamkunapura jiru iuiaiwa mana rimanakuichi.

⁴⁴ Nukapa Taita kachamuwag mana agllagpika, ñi pipas mana nukawa samungapa pudinkunachu. Agllaskakunallatami, puchukarii puncha, nuka kaugsachingapa kani. ⁴⁵ Santu Ispirituwa rimagkuna willaraiaskapi, kasami niraiá: “Tukuikunata, Dius kikinmi iachachingapa ka”. Maikanpas nukapa Taitata uiaspa, pai imasa iachachiskasina iachaikugkuna, nukawami samungapa kankuna.

⁴⁶ —Ñi maikan, nukapa Taitata mana kawaska kankunachu. Paipagmanda samuska kagllami paita rigsí.

⁴⁷ Kasami nuka niikichita: maikanpas suma iuiawagkuna, mana puchukariduru kaugsaitami iukankuna.

⁴⁸ —Nukami kani mana wañuduru tanda. ⁴⁹ Kamkunapa ñugpamanda taitakuna, chusa sitaska alpapi “maná” suti mikuita mikuspapas, wañurkakunami.

⁵⁰ Kai tandami niraiá suma luarmanda uraikumuska. Maikanpas kai tandata mikugkuna mana diltudupa wañungapa kankunachu. ⁵¹ Nukami kani chi mana wañuduru tanda suma luarmanda uraikumuska. Maikanpas kai tandata mikugkuna, imaurapas kaugsanangkungapagllami kankuna. Chi nuka karangapa tandaka niraiami nuka kikinpa aicha, kai alpamanda runakuna alli suma kaugsaita iukangapa.

⁵² Chiura judiukunaka, kikinpura tapurinakurka, kasa nispá:

—Kai runa, ¿imasatak paipa aichata karangapa ka, nukanchi mikungapa?

⁵³ Jesuska nirkakunata:

—Kasami nuka niikichita: kai Runa Tukuskapa aichata mana mikugka, nukapa iawarta chasallata mana upiagpika, alli suma kaugsaita mana iukangapa kangichichu. ⁵⁴ Maikanpas, nukapa aichata mikuspa, nukapa iawarta upiaspa kagkunaka, mana puchukariduru suma kaugsaitami iukankuna. Paikunatami, puchukarii puncha, nuka kaugsachingapa kani. ⁵⁵ Nukapa aicha kanmi sutipa mikui. Nukapa iawarpas, sutipami upiadiru ka. ⁵⁶ Maikanpas, nukapa aichata mikuspa, nukapa iawarta upiaspa kagkuna, nukapimi kankuna. Nukapas, paikunapimi kani.

⁵⁷ —Nukata kachamuwag kaugsa Taitamandami nuka kaugsai iukani. Chasallata maikanpas nukata mikuwagkuna, nukamandami kaugsai iukangapa kankuna.

⁵⁸ Kaimi ka suma luarmanda uraikumuska tanda. Chi “maná” suti tandata, ñugpamanda taitakuna mikuspapas wañurkakunami; chi tandasina mana kanchu. Kai tandata maikanpas mikuspaka, imaurapas kaugsallami kangapa kankuna.

⁵⁹ Kafarnaum puiblupimi Jesús chasa nirka, judiukuna tandariduru wasi ukupi iachachikuspa.

Jesuska, mana puchukariduru kaugsaimanda rimagmi ka

⁶⁰ Achka Jesusta katiraiagkuna, chasa uiaspaka, nirkakuna:

—Chi rimaikuna, iapa mana uiangasinami ka. ¿Pisik chasa uiangapa munanga?

⁶¹ Paita katiraiagkuna chasa mana alli iuiaiwa paimanda rimanakuskata iachaspaka, Jesuska nirka:

—Chasa uiaspaka, ¿nukamanda mana allichu uiari?

⁶² Kai Runa Tukuska ñugpata kaskama, chimallatata sikakuskata kamkuna kawaspaka, ¿imasatak iuiantrangichi? ⁶³ Santu Ispiritullami alli suma kaugsaita kará. Aichaka mana balinchi. Chi rimaikuna nuka kamkunata rimaskaka kanmi Ispiritupi kaugsai.

⁶⁴ Chasa kagpipas, maikankunaka mana nukawa iuianakungichichu—. Ñugpamandatami Jesús iacharka, pikuna mana paita iuiag kagkunamanda. Chasallata, pi paita apichingapa kagtapasmi iacharka.

⁶⁵ Kasapasmi nirka:

—Chimandami nirkaikichita: “Nukapa Taita mana agllagpika, ñi pipas mana nukawa samungapa pudinkunachu”.

⁶⁶ Chiuramanda paita katiraiagkuna, achkakuna anchurisa, mana mas paita katingapa munarkakuna.

⁶⁷ Chi chungá iskai pai agllaskakunataka, Jesús tapurka:

—¿Kamkunapaschu munanakungichi, nukata sakiwaspa, ringapa?

⁶⁸ Chiura, Simón Pedroka ainirka:

—Taita waugki, kamta sakispaka, ¿piwatak risunchi? Kamllami mana puchukariduru suma kaugsaita rimangkangi. ⁶⁹ Nukanchika, kammanda suma iuiaspa, ñami iachanchi, kam Taita Diospa tukuipi mas alli wambra kagta.

⁷⁰ Jesuska nirka:

—¿Manachu nuka, chungá iskaikunata agllarkaikichita? Chasa agllagpipas, kamkunapuramanda sugka, iaia kukusinami ka—. ⁷¹ Chasa nispá, Judas Iskariote suti Simonpa wambamandami rimakurka, chi runa, chungá iskai agllaskakunapuramanda kaspá, paita apichingapa kagmanda.

Jesuspa waugkindikuna, paita mana iuianakusamanda

7 Chiuramanda Jesús, Galilea alpa suiulla purikurka. Mana munarka, Judea alpapi kagringapa, judiukuna wañuchingapa paita maskanakugmanda. ² Judiukunapa sug atun punchakuna ña chaiakurka. Chi punchakuna iuiariduru karka, tambukuna ruraskallapi kaugsaska. ³ Chimanda Jesuspa waugkikunaka, paita nirkakuna:

—Kaimanda llugsispa, Judeama rii, chipi kamta katiraiagkunata kam ima rurakuskata kawachingapa.

⁴ Maikanpas rigsichiringapa munagkuna, mana pakalla rurankunachu. Kam chituku imapassik allilla rurangi; chita tukuikunapa ñawipi kawachigrii—. ⁵ Ñi kikin Jesuspa waugkindikuna, paita mana iuianakuspa-chasa kachangapa rimarinakurka.

⁶ Jesuska ainirka:

—Nuka ringapa puncha, manara chaiapuanchu. Ikuti kamkuna ringapaka, imaurapas allillami ka. ⁷ Kai alpapi tiaskakunallawa iuiagkuna, mana kamkunawa rabiai iukankunachu. Ikuti nukatami mana munawankuna, paikuna mana allilla ruraikunata piñaspa rimagmanda. ⁸ Kamkunaka riichi, chi atun punchakuna ialichingapa. Nuka ringapa puncha manara chaiapuagmanda, nukaka manara ringapa kani—. ⁹ Chasa nispaka, Galilea alpallapi chisiarka.

Jesús, Jerusalemni atun punchakuna ialichigriskamanda

¹⁰ Ña paipa waugkikuna atun punchakuna ialichingapa riskauramandaka, Jesuspas rirka. Pitapas mana kawarisipalla pakallami rirka. ¹¹ Chikama judiukunaka,

chi punchakuna paita maskanakuspa, paipura tapurinakurka:

—Chi runa, ¿maipisik ka?

¹² Chi achka runakuna, ajaimi paimanda rimanakurka. Sugkuna ninakurka:

—Iapa allimi ka.

Ikuti sugkunaka ninakurka:

—Manima. Tukui runakunata llullachispallami ka—.

¹³ Judiukunata manchaspami paimanda allilla mana kawariglla rimanakurka.

¹⁴ Chi atun punchakuna ña chaugpi ialikuuraka, Jesuska, Diospa atun wasi ukupi iaikugrispa, iachachii kallarirka. ¹⁵ Paita uiaspaka, judiukuna iapa ujnarispa-mi kikinpura tapurinakurka:

—Kai runa, ¿imasamandasik chituku iachá, ñi pi-wapas mana iachaikuspalla?

¹⁶ Chiuraka, Jesuska nirka:

—Nuka kikinpa iuiailawa mana iachachinakuiki-chitachu. Nukata kachamuwagpa iuiaiwami iachachinakuikichita. ¹⁷ Maikanpas Taita Dios imasa munaskasina rurangapa munag iachangapami ka, nuka iachachikuska, Taita Diospa iuiaiwa kagta. Mana nukapa iuiailawa kanchu. ¹⁸ Maikanpas kikinpa iuiailawa rimag, kikinmandallami atuniachiringapaglla maskarí. Ikuti kachamuwagta atuniachingapa munagka, sutipa kaskatami allilla willá, ñi imapipas mana llullaspalla. ¹⁹ ¿Manachu Moisés, kamkunapa ñugpamanda taitakunata Taita Dios imasa rurangapa willarka? Chasa willaraiagpipas, ñi pi mana chasa rurangichichu. Nukataka, ¿imapatak wañuchiwingapa munanakungichi?

²⁰ Chiura, chipi kagkuna ainirkakuna:

—Sug kuku waira iaikuskami kangi. ¿Pikunatak kamta wañuchingapa munanakú?

²¹ Chiuraka, Jesuska ainirka:

—Nuka sug runata warda puncha aliachiskamandami tukui kamkuna ujnaringichi. ²² Moiseska, kamkunata kasa rurangapami nirka: pusag punchaiug tukui kari wambrakunata marka churachingichi. Chasa niraiagpipas, Moisés mana kallarig karkachu. Paimanda mas ñugpamanda taitakunami chasa rurangapa sakiska karka. Pusag puncha iukagmandami, warda puncha kagpipas, kamkuna kari wambrakunata chi marka churachingichi. ²³ Chasaka, warda puncha kagpipas, chi marka churachingichimi, Moisés imasa niraiaskasina iuiaspa. Nigpika, ¿imapatak warda puncha sug runata nuka allilla aliachiskamanda, kamkuna nukawa jiru iuianakungichi? ²⁴ Mana allilla iachaspalla, mana imapas rimanakungichi. Maskangichi, allilla iuiarispa rimangapa.

Jesús, Taita Dios kachamuska kaskamanda

²⁵ Nigpika sugkuna Jerusalenpi kaugsanakug, paipura tapurinakurka:

—¿Manachu kai runata wañuchingapa maskanakú?

²⁶ Pai tukuiunapa ñawipi rimakugpipas, paitaka mana imapas ninkunachu. Nukanchipa taitakunaka paimanda, ¿sutipacha Taita Dios agllaska Cristo kagta

sumaglla iuiankuna? ²⁷ Nukanchika, paita allillami rigsinchi maimanda kagta. Ikuti Taita Dios agllaska runa samungapa kagtaka, mana pipas iachangapa kankunachu maimanda samukugta.

²⁸ Chasa uiaspaka Jesuska, Diospa atun wasipi iachachikuspa, sinchi kaparirka, kasa nispa:

—¿Sutipachu kamkuna rigsiwangichi? Nuka maimanda kagta, ¿sutipachu iachangichi? Nukapa iuiailawa mana samurkanichu. Nukata kachamuwag, mana imapipas llulla kanchu. Paitaka, kamkuna mana rigsin-gichichu. ²⁹ Nukaka, paita allillami rigsini. Paipagmandami samuska kani. Paimi kachamuwarka.

³⁰ Jesús chasa niura, munanakurka paita apingapa. Pai wañungapa puncha manara chaiaska kagmandami mana pipas paita apii pudirkakuna.

³¹ Chipi kagkuna, achkakuna paita suma iuiarispa-mi kikinpura tapurinakurka:

—Taita Dios agllaska samuura, ¿kai runamandapas maschu suma ruraikuna kawachigsamungapa ka?

Fariseokuna, Jesusta apingapa munanakuskamanda

³² Fariseokunaka uiarkakuna imasa chipi kagkuna Jesusmanda iapa rimanakugta. Chimanda paikuna i ia-ia sasirdutikuna, alwasilkunata kacharkakuna, Jesusta apingapa. ³³ Chiura, Jesuska nirka:

—Kunauramanda, kamkunawa mana unai kangapa kanichu. Nispaka, nukata kachamuwaskapagmami ringapa kani. ³⁴ Chiura kamkuna, nukata maskawaspapas, mana tariwangapa kangichichu. Nuka maipi kaskama, kamkunaka mana chaiagrii pudingapa kangichichu.

³⁵ Chiura judiukuna, kikinpura tapurinakurka:

—Kai runa, ¿maimatak ringapa ka; chiwanka, nukanchi paita mana tarii pudingapa? ¿Manachu munaku, sug alpakunapi judiukuna kaugsanakuskama ringapa; chipika, mana judíu kagkunatapas iachachigringapa?

³⁶ ¿Imatak niraiá kasa niskata: “Kamkuna nukata maskawaspapas, mana tariwangapa kangichichu. Nuka maipi kaskama, kamkunaka mana chaiagrii pudingapa kangichichu”?

Kaugsa iakusina, Jesús karangapa niskamanda

³⁷ Chi atun punchakunamanda mas atun puncha ialichingapa chaiaura, Jesuska, saiarispa, sinchi kaparirka, kasa nispa:

—Maikanpas Taita Diosmanda iakunai ai iukagpika, nukawa samuichi, upiagsina rurangapa. ³⁸ Ñugpamanda librupi, kasami willaraiá: “Maikanpas nukata suma iuiawagka, paipa sungumanda llugsispa, kaugsa iakusinami iukangapa ka”.

³⁹ Jesús chasa rimaskaka, Santu Ispiritumandami nikurka. Maikanpas Jesusta suma iuiagkuna, Santu Ispiritutami chaskingapa niraiarka. Jesusta manara suma atuniachiska kagmandami Santu Ispirituta manara kachamuska karka.

Jesumanda sug rigcha sug rigcha iuianakuskamanda

⁴⁰ Chasa uianakug, maikankunaka ninakurka:

—Kai runa, sutipami Santu Ispirituwa rimag ka.

⁴¹ Sugkunaka ninakurka:

—Kaimi sutipa Taita Dios agllaska kangapa ka.

Ikuti sugkunaka nirkakuna:

—Taita Dios agllaska kagpika, Galileamanda mana kangapa kagtami niraiá. ⁴² Ñugpamanda librupi, ¿manachu willaraiá, Davidpa iawarmanda, David kaugsaska Belén puiblumanda, Cristo kangapa kagta?

⁴³ Chasaka, sug rigcha sug rigchami chipi kagpura Jesumanda iuiarinakurka. ⁴⁴ Sugkuna paita apingapa munanakuspapas, ñi pipas mana tuparirkakuna.

⁴⁵ Kachaska alwasilkunaka, iaia sasirdutikuna i fariseokunapagma kutirkakuna. Chaiagriuraka, paikuna tapurkakuna:

—¿Imapatak mana Jesusta pusamurkangichi?

⁴⁶ Chiura, alwasilkuna ainirkakuna:

—Chasa rimai, ñi maikan chi runasina mana imaurapas uiaska karkanchichu.

⁴⁷ Fariseokunaka, paikunata nirkakuna:

—¿Kamkunapaschu, chi llullaiwa tuntiachii tukurkangichi? ⁴⁸ Judíu taitapura i fariseopura, ñi pipas paita mana uianchichu. ⁴⁹ Chi ianga runakuna, Moisés ima niskata mana iachaikuspami maldisiska kankuna.

⁵⁰ Chiura Nikodemo, fariseollatata kaspá, ñugpata Jesusta rimakuska kagka, nirka:

⁵¹ —Moisés ima nukanchita willaraiaskapi, ¿manachu kasa niraiá: maikan runatapas, pai ima ruraskamanda mana tapuchispalla i uiaspalla, mana justisiai rurai pudirinchu?

⁵² Chiura ainirkakuna:

—¿Kampaschu Galileamanda kangi? Ñugpamanda librupi iachaikui. Kawankangimi, Galileamanda ñi sug Santu Ispirituwa rimag mana llugsingapa kagta.

[⁵³ Chasa rimanakuspaka, tukuikuna kikinkunapa wasima rirkakuna.

Kasada warmi, sug kariwa apiriskamanda

8 Jesuska, Olivos suti lumama rirka. ² Kaiandi tutataka, Diospa atun wasima ikuti chaiagirka. Chi puiblupi tukui kaugsanakug paipagma kaillaiagriuraka, tiarisa, iachachii kallarirkakunata.

³ Chasa iachachikuuraka, Moisés ima niskata iachachig taitakuna i fariseokunaka, sug kasada warmi sugpa kariwa apiriskata paipagma chaiachigrirkakuna. Tukuikunapa chaugpipi saiachigrispaka, ⁴ Jesusta nirkakuna:

—Iachachig taita, kai warmita sugpa kariwa pandarikuskatami apirkanchi. ⁵ Moisés ima willaraiaskapi, kasami niraiá: “Maikan warmipas chasa rurakugta apispa, rumiwa piaspa, wañuchingapami niraiá”. Kamka, ¿imatak ningi?— ⁶ Chasa tapunakurka, pai rimaskata imapipas pandarigpika, uiaspa, justisia-kunata willagringapa.

Jesuska, kumurispá, maki diduwa alpapi iskribii kallarirka. ⁷ Paikuna tapui apanakuuraka, saiarispa, nirkakunata:

—Maikan ñi imaurapas mana pandarispalla kaugsag, kallarichu, sug rumi aisaspá, ñugpa warmita piangapa.

⁸ Chasa nispaka, ikuti kumurispá, alpapi maki diduwa iskribii kallarirka.

⁹ Chasa uiaspaka, mas rukukunamanda kallarispa, tukuikunami sug sug llugsispa anchurirkakuna. Jesusta chi warmillawa sakirkakuna. ¹⁰ Chiura Jesuska, saiarispa, tapurka:

—Pani, ¿maipitak kammanda willagkuna kankuna? ¿Pipas manachu justiaspá, kamta wañuchingapa nirkakuna?

¹¹ Chiura ainirka:

—Taita turi, ñi pipas manima.

Chasa ainiura, Jesuska nirka:

—Ñi nukapas mana justisiangapa niikichu. Riilla. Kunauramanda, mana mas pandaringi.]

Jesús, runakunapa iuiaikunata punchaiachig kaskamanda

¹² Chiuramanda Jesús, Diospa atun wasi ukupi kagkunata ikuti iachachispá, nirka:

—Nukami kai alpamanda runakunapa iuiaikunata punchaiachig kani. Maikanpas nukata katiraiawag, mana amsapisina puringapa kanchu. Paipa iuiaikunata punchaiachiiwa kaspá, alli suma kaugsaitapasmi iukangapa ka.

¹³ Chasa uiaspá, fariseokunaka paita nirkakuna:

—Kam kikinmandallami chasa willarikungi. Kam ima rimaska willakuska, iangami ka.

¹⁴ Jesuska ainirkakunata:

—Nuka kikinmandalla willarikuska, mana ianga kanchu; sutipami ka. Nuka maimanda samuska kagta i maima ringapa kagta, nukallami iachani. Ikuti kamkunaka mana iachangichichu, nuka maimanda samuska kagta ñi maima ringapa kagta. ¹⁵ Kam kikinkunapa iuiaillawami imapas kawangichi. Ikuti nukaka, mana pitapas chasa iuiarispá kawanichu. ¹⁶ Nuka, mana sapalla kanichu. Nukapa Taita kachamuwag, nukawami ka. Chimandaka, maikantapas nuka iuiarispá kawagpika, chi iuiariskaka sutipami ka.

¹⁷ —Moisés kamkunamanda willaraiaskapi, kasami niraiá: “Iskai runakuna chasallata willanakugpika, mana llulla kanchu”. ¹⁸ Chasaka, nuka kikinmandami willarini. Nukapa Taita kachamuwagpasmí nukamanda chasallata willag ka.

¹⁹ Chiura tapurkakuna:

—Kamba taitaka, ¿maipitak ka?

Jesuska ainirka:

—Kamkunaka, nukata ñi nukapa Taitata mana rigsingichichu. Nukata rigsiwagka, nukapa Taitata rigsinami ka.

²⁰ Diospa atun wasi ukupi, kulki churadirupi kaspami Jesús chasa iachachikurka. Paita manara wañungapa

puncha chaiankama, ñi pipas mana maki churarkakuna, apingapa.

“Nuka maima ringapa kaskama, kamkuna manima katiwangapa pudingapa kangichichu”

²¹ Kasapasmi Jesús nirka:

—Nuka ringapami kani. Chiura maskawangapami kangichi. Maskawanakuspapas, kamkuna pandariskakunata mana pasinsiai tukuspallami wañungapa kangichi. Nuka maima ringapa kaskama, kamkuna manima katiwangapa pudingapa kangichichu.

²² Chiura judiukunaka, kikinpura tapurinakurka:

—¿Imatak? ¿Kikinllachu wañuchiringapa iuiaku? ¿Chimandachu niku: “Nuka maima ringapa kaskama, kamkuna manima katiwangapa pudingapa kangichichu”?

²³ Jesuska nirka:

—Kamkuna, kai alpamandallami kangichi. Ikuti nukaka, awa suma luarmandami kani. Kamkuna, kai alpamandami kangichi. Nukaka, manima. ²⁴ Nirkaikichitami: “Kamkuna pandariskakunata mana pasinsiai tukuspallami wañungapa kangichi”. Nuka pi kagta mana iuiawaspami kamkuna pandariskakunata mana pasinsiai tukuspalla wañungapa kangichi.

²⁵ Chiura tapurkakuna:

—Kam, ¿pitak kang?

Chiura, Jesuska ainirka:

—Ñugpamandatami nuka ña kamkunata willarkaikichita. ²⁶ Kamkunamandaka iukanimi achka rimanga; chasallata, kamkuna achka pandariskakunata iuiachispa kawachingapa. Nukata kachamuwagka, ñi imapi mana llullaspallami rimá. Imasa paita uiaskasinami nuka kai alpapi kaugsanakuskata rimaikichita.

²⁷ Chasa uiagkuna mana iacharkakuna, Jesuska paipa Taita Diosmanda rimakugta. ²⁸ Chimanda, paika nirka:

—Kai Runa Tukuskata kamkuna awapi atarichiwaspami rigsiwangapa kangichi nuka pi kagta. Chasallata, nuka kikinpa iuiailawa mana imapas ruranchu. Ima nukapa Taita iachachiwaskatami rimani. ²⁹ Nukata kachamuwag, nukawami ka. Pai imasa munakusasinami nuka imaurapas rurani. Chimandami mana sapallata sakiwá.

³⁰ Jesús chasa rimaskata uiagkuna, achkakunami paiwa suma iuiarispa tukurkakuna.

Taita Diospa wambrakunamanda i iaia kukupa wambrakunamanda

³¹ Chiura Jesuska, paiwa suma iuiarig judiukunata nirka:

—Kamkuna, nuka ima rimaskata imaurapas ruragpinkunaka, sutipami nukapa iachaikugkuna kankangichi.

³² Sutipa kaskatami rigsinkangichi. Sutipa kaskata rigsispaka, kispichiimi tukunkangichi.

³³ Chiura nirkakuna:

—Nukanchika kanchimi ñugpa taita Abrahampa wambrapa wambrakuna. Imaurapas ñi maikan runakunapagma mana wataskasina kaska kanchichu. Nig-

pika, ¿imapatak kamka nikungi: “Kispichiimi tukunkangichi”?

³⁴ Chiura, Jesuska ainirka:

—Kasami nuka niikichita: maikanpas pandarichu: chi pandariikunawaka wataskasinami kangichi. ³⁵ Lutrin, mana patrunpa wambrasina chillapi kaugsakungapa niraianchu. Patrunpa wambrami imaurapas chillapi kangapa niraiá. ³⁶ Chiwanka, Taita Diospa wambra kamkunata kispichigpika, sutipami kispichiska tukunkangichi. ³⁷ Iachanimi, kamkuna Abrahampa wambrapa wambrakuna kagtakuna. Chasa kagpipas, nukapa rimaita mana uiawarkangichichu. Chi nispami kamkuna munanakungichi wañuchiwangapa. ³⁸ Nukapa Taita imasa kawachiwaskatami rimani. Kamkunapas chasallatami kamkunapa taitata imasa uiaskasina rurangichi.

³⁹ Chiura, paikuna ainirkakuna:

—Nukanchipa atun taita, Abrahammi ka.

Jesuska nirka:

—Kamkuna, sutipa Abrahampa wambrapa kati wambrakuna kagpinkunaka, Abraham imasa ruraskasinami ruranchingichi. ⁴⁰ Ikuti kunaauraka, nuka imasa Taita Diosta uiaskasina sutipa kaskata rimakugtami wañuchiwangapa munanakungichi. Chasaka, Abraham mana rurarkachu. ⁴¹ Kamkunapa taita imasa ruraskasinami kamkunapas ruranakungichi.

Chiura nirkakuna:

—Nukanchi mana kanchichu sapalla warmipa wambrakuna. Diosmi ka nukanchipa taita.

⁴² Jesuska nirka:

—Dios kamkunapa taita kagpika, nukatami kuianwanrangichi. Nukaka, Taita Diospagmanda llugsispami samurkani. Nuka kikinpa iuiailawa mana samurkani. Taita Diosllatami nukata kachamuwarka.

⁴³ ¿Imawantak nuka ima rimakuskata mana iachaikungapa munangichi? Mana munangichichu, nuka ima willakuskata uiawangapa. ⁴⁴ Kamkuna, iaia kukutami taitasina iukangichi. Imasa pai munakusasinami kamkuna ruraspa kangichi. Paika, ñugpamandata wañuchigmi niraiá. Paipa iuiapi llullalla tiagmandami manima sutipa kaskata rimag ka. Pai rimaura, tukuipi kikinpa llullailami rimá. Pai, llullachig kaska, tukui llullakunapa taitami niraiá. ⁴⁵ Ikuti nukaka, kamkunata ñi imapi mana llullaspalla willakugtaka mana munawangichichu. ⁴⁶ Ñi pipas mana nukata kawachiwangapa pudingichichu, imapipas pandarig kagta. Nuka ñi imapi mana llullaspalla nikugpika, ¿imapatak mana nukawa iuiaringichi? ⁴⁷ Diospa kagpika, Taita Diospa rimaikunatami uiá. Kamkuna, mana Diospa kaspami mana paipa rimaikunata uiangapa munangichi.

Abraham manara tiagpita, Cristoka ña tiarka

⁴⁸ Chiura, judiukuna nirkakuna:

—¿Manachu nukanchi allilla ninchi: “Kam, Samaria alpamandami kang. Kuku waira iaikuskami kang?”

⁴⁹ Jesuska ainirka:

—Nuka mana kuku waira iaikuska kanichu. Nukapa Taitamanda imapipas allillami rimani. Kamkunaka,

mana allilla iuiarispami jiru nukamanda rimangichi.

⁵⁰ Nuka kikinmanda mana maskakunichu, iapa atuniachirii tukungapa. Sugmi nukata atuniachiwangapa ka. Paimi sutipa kaskata tukuipi kawag ka. ⁵¹ Kasapasmi nuka niikichita: maikanpas nukapa rimaita uiaspa rurag, mana imaurapas wañungapa kanchu.

⁵² Chiura, judiukuna nirkakuna:

—Kunaura masmi iachanchi, kam kuku waira iai-kuska kagta. Abraham i Santu Ispirituwa ñugpamanda rimagkunapas wañurkakunami. Kamka ningimi: “Maikanpas nukapa rimaita uiaspa rurag, mana imaurapas wañungapa kanchu”. ⁵³ Nukanchipa wañuska taita Abrahammandapas, ¿maschu atun kangi? Santu Ispirituwa ñugpamanda rimagkunapasmi chasallata wañurkakuna. Kamka, ¿ima kagatak iuiakungi?

⁵⁴ Chiura, Jesuska ainirka:

—Nuka kikin atuniachiriiika, ñi imapa mana balinchi. Nukapa Taitami nukata suma atuniachiwá. Paimandallatata, ¿manachu kamkunapas ningichi: “Nukapa Taita Diosmi ka”? ⁵⁵ Paita, kamkuna mana rigsingichichu. Ikuti nukaka, paita allillami rigsini. “Paita mana rigsini” nuka nigpika, kamkunasina llullallatatami kantrani. Nuka, paita allillami rigsini. Chasa rigsispaka, paipa rimaita uiaspa, ruragmi kani.

⁵⁶ —Kasapas. Kamkunapa atun taita Abrahamta alli iuiachirirka, nuka samungapa puncha paipa suma iuiaillapi kawaspaka. Chasa kawaspaka, iapa kuntintarirka.

⁵⁷ Chiura, judiukuna nirkakuna:

—Kam, manara pichka chungu watallapas iukaspaka, ¿imawantak ningi, Abrahamta kawaska?

⁵⁸ Chasa niura, Jesuska ainirka:

—Kasami nuka niikichita: Abraham manara tiagpita, nukaka ñami tiarkani.

⁵⁹ Chasa ainigmandaka, rumi aisarkakuna, piaspa wañuchingapa. Jesuska, chipi kagkunawa chapurispaka, pakalla Diospa atun wasimanda llugsirka.

Wawita tiagsamuskauramandata mana ñawi kawagta, Jesús ambiskamanda

9 Jesús ialikuspaka, sug runa wawita tiagsamuskauramandata mana ñawi kawagtami kawarka. ² Chi runata kawaspaka, Jesusta katiraiagkunaka tapurkakuna:

—Iachachig taita, ¿imawantak kai runa, mana ñawi kawag tiagsamurka? ¿Paichu imapi mana allilla rurarka? Mana kagpika, ¿paipa atunkunachu imapi pandarirkakuna?

³ Chiura, Jesuska ainirka:

—Chasa tiagsamuskamanda, mana tukurkachu pai ñi paipa atunkuna mana allillata ruragmanda. Taita Dios kikinmi chasa sakirka; chiwanka, paipa iapa iachaita kai runawa kawachingapa. ⁴ Chara punchasina kagllapimi nukata chaiawá, kachamuwag imasa niwaskasina rurangapa. Ña tutasina tukuuraka, ñi pipas mana imapas rurangapa pudiringapa kanchu.

⁵ Nuka, kai alpapi kankama, kai alpapi kaugsanakuskapa iuiaikunata punchaiachigmi kani.

⁶ Chasa nispaka, alpapi tukaspa, turuiachispa, mana kawag ñawita kakurka. ⁷ Chasa llunchispaka, nirka: —Siloé suti kuchaichiska iakupi maillarigrii—. (Siloé niraianmi “Kachaska”).

Chiura, chi runaka rirka. Maillarigrigllapika, allillami ñawi kawagsamurka. Nispaka, paipagma rirka.

⁸ Paipa ladu suiu kaugsagkuna i chi runa limusna mañaspa ñugpa kaskata rigsigkuna, paita kawaspaka, tapurinakurka:

—Kai runa, ¿manachu ka limusna mañaspalla tiakug?

⁹ Sugkuna aininakurka:

—Paimi ka.

Ikuti sugkuna ninakurka:

—Manima. Ñalla paisina rigchami ka.

Chi runaka nikurka:

—Aja, nukami kani.

¹⁰ Chiura tapurkakuna:

—Nigpika, ¿imawantak ñawi aliaska kangi?

¹¹ Chasa tapuura, chi runaka ainirka:

—Jesús suti runami, alpata tukawa turuiachispa, nukapa ñawita kakuwaspa, niwarka: “Rii. Siloé iakupi maillarigrii”. Nuka maillarigrispaka, musugllami ñawi kawagsamurkani.

¹² Chiura tapurkakuna:

—Chi runaka, ¿maipitak ka?

Chi runaka ainirka:

—Mana iachanichu.

¹³ Chiura, chi runata fariseokunapagma pusarkakuna. ¹⁴ Warda punchami Jesús, chasa alpata tukawa turuiachispa, ñawita kakurka, pai kawangapa. ¹⁵ Chi-manda fariseokuna, chi runata tapuchirkakuna:

—¿Imasamandatak allilla ñawi kawakungi?

Chiura ainirka:

—Alpata tukawa turuiachispa, nukapa ñawipi churawarka. Nukaka maillarigrirkani. Chiurallami kawariwarka.

¹⁶ Chasa ainiura, sug fariseokuna nirkakuna:

—Chi aliachig runa warda puncha mana samaspalla trabajag, mana Taita Dios kachamuska kangapa kanchu.

Ikuti sugkunaka ninakurka:

—Pandaridurllatata runa kaspaka, ¿imawantak chasa mana imaurapas kawaskasina suma rurangapa pudí?

Chasa rimanakuspaka, iskaima tukurkakuna. ¹⁷ Chi-manda, ikuti chi ñawi ambiriskata tapuchirkakuna:

—Chi runa kamba ñawita aliachiskamanda, kamka, ¿imatatak ningi?

Chiura ainirka:

—Paika, sutipa Santu Ispirituwa rimagmi ka.

¹⁸ Chi judiukunaka mana iuianakurka, pai mana ñawi kawag kaspaka, ña aliachiska kagta. Chimandami paipa atunkunata kaiarkakuna. ¹⁹ Nispaka tapuchirkakuna:

—¿Kaichu ka kamkunapa wambra? ¿Paimandachu ningichi: paimi mana ñawi kawag tiagsamurka? ¿Imasamandatak kunaura kawaku?

²⁰ Chiura, atunkunaka ainirkakuna:

—Nukanchi iachanchimi, paika nukanchipa wambra kagta. Mana ñawi kawagmi tiagsamurka. ²¹ Chasa kunaora kawagsamugtaka mana iachanchichu: ¿pimi ñawita kawachigsamurka? Kikinta tapuchiichi. Ñami wiñaska ka. Pai kikinmi willanga.

²² Judiukuna, ñugpa rimanakuska karkakuna: “Maikanpas ‘Jesús, Taita Dios agllaskami ka’ nigpikunaka, judiukuna tandariduru wasikunamanda llugsichiimi tukungapa kankuna”. Chasa llugsichii niraiagmandami chi runapa atunkuna judiukunata mancharkakuna.

²³ Chimandami ainirkakuna: “Ñami wiñaska ka. Kikinta tapuchiichi”.

²⁴ Nigpika, chi ñawi ambiriskata ikuti kaiaspa, nirakuna:

—Diuspa ñawipi, nukanchita sutipa kaskallata willarii. Nukanchi iachanchimi, chi runa mana alli ruradur kagta.

²⁵ Chasa niura, paika ainirka:

—Pai mana alli ruradur kagta mana iachanichu. Kasallami iachani: nuka, ñugpata mana ñawi kawag kaspas, kunaoraka allillami kawani.

²⁶ Chiura, ikuti tapuchirkakuna:

—¿Imatak kamta rurarka? ¿Imasatak ñawi aliachirka?

²⁷ Paika ainirka:

—Timpumi willarkaichita. ¿Manachu uiawarkangichi? ¿Imapatak ikuti uiawangapa munanakungichi? ¿Kamkunapaschar paita katiraiagkuna tukungapa munanakungichi?

²⁸ Chiura, paita kamispa, nirkakuna:

—Kam, chita katiraiagchar kangi. Ikuti nukanchika, Moisés ima iachachiskata katiraiagkunami kanchi.

²⁹ Taita Dios Moisésta rimaskatami nukanchi allilla iachanchi. Chi kamta aliachigmandaka, nukanchi mana iachanchichu maimanda samuska kagta.

³⁰ Chi runaka ainirka:

—Nukapa ñawita aliachig maimanda samuska kagta kamkuna mana iachagpikunaka, ujnachiwanakungichimi. ³¹ Ñami iachanchi, kai alpapi mana allilla ruragkunata, Taita Dios mana uianchu. Ikuti maikan paita suma kuiaspa, pai ima munakuskata ruragkunataka uianllami. ³² Kai alpapi runakuna tiaskauramandata, ñi imaurapas mana uiariska kanchu, maikanpas mana ñawi kawag tiagsamuska kaskata aliachiskamanda.

³³ Chi runa, Taita Dios mana kachamuska kagpika, ñi imapas manachar chasa rurangapa pudintra.

³⁴ Paikunaka nirkakuna:

—Kam, tiagsamuskauramandata pandaridurmi kangi. ¿Kunaorachu tinlla kam nukanchita iachachingapa munakungi?—. Chasa nispaka, paita chimanda llugsichirkakuna.

³⁵ Chasa iachaspaka Jesuska, chi llugsichii tukuska runawa kawanakuspa, nirka:

—Kai Runa Tukuskamanda, kam, ¿sumachu iuiangi?

³⁶ Chiura ainirka:

—Taita waugki, niwai: ¿pitak ka, nuka paimanda suma iuiangapa?

³⁷ Chiura, Jesuska nirka:

—Kamwa rimakug, nukami kani. Paitami kawakungi.

³⁸ Chasa niura, chi runaka nirka:

—Kam taita waugkitami suma iuiakuiki—. Chasa nispa, paita kungurirka.

³⁹ Chiura Jesuska, chipi kagkunata nirka:

—Nuka, kai alpama samurkani, runakunata iuiachispa kawachingapa; chiwanka, suma iuiawagpikuna, mana kawaspapas, ñawi kawagsina tukungapa; ikuti mana suma iuiawagpikunaka, kawaspapas, mana ñawi kawagsina tukungapa.

⁴⁰ Chasa uiaspaka sug fariseokuna, paiwa sugllapi kaspas, tapurkakuna:

—¿Nukanchipaschu mana kawagsina kanchi?

⁴¹ Chasa tapuura, Jesuska ainirka:

—Kamkuna, sutipa mana kawanakuskasina kagpika, manachar ñi ima pandariipas iukantrangichi. Kunauraka ningichimi: “Nukanchika, tukui allillami kawanachi”. Chimandami kamkuna iapa pandariikuna iukangichi.

Ubijakunata allilla suma kawagmanda

10 Kasapasmi Jesús nirka:

—Kasami nuka niikichita: maikanpas, ubijakunapa kinchaska punguta iaikungataka, kincha awata iaikugpika, sisai u chapaspa wañuchigmi ka. ² Pungu tiaskata iaikugmi ubijakunata allilla kawag ka. ³ Paitami punguta kawag iaikuchí. Paipa rimaita, ubijakunapasmu rigsinkuna. Pai kikinpa ubijakunata, sug sug imasa suti kaskasina kaiaspami chimanda llugsichí.

⁴ Tukui paipa ubijakunata llugsichispaka, pai kikinmi ñugpankunata. Chi ubijakunaka, paipa rimaita rigsispa, katichinkunallami. ⁵ Ikuti mana rigsiskataka mana katichinkunachu. Sugpa rimaita mana rigsispaka, mitikunallami.

⁶ Jesús chasa iui ai apingasina parlakugpipas, chipi kagkuna mana iacharkakuna imamanda chasa rimakugta. ⁷ Chimanda Jesús, ikuti nirka:

—Kasami nuka niikichita: nukami ubijakunapa iaikungapa pungusina kani. ⁸ Nukapa ñugpa samugkunami karkakuna sisai u chapaspa wañuchigsina ruragkuna. Ikuti Taita Diospa ubijasina kagkunaka, mana paikunata uiarkakunachu.

⁹ —Nukami pungusina kani. Maikanpas nukawa iaikugka, kispichiimi tukungapa kankuna; imasami ubijakuna, mana manchaspalla llugsispa, iaikuspa, alli ugsa mikuspa kankuna: chasa. ¹⁰ Sisaikunaka samunkunami, sisangapa, wañuchingapa i tukui puchukan-gapa. Ikuti nukaka samurkani, kamkuna mas iapa suma kaugsaita iukangapa.

¹¹ —Nukami kani ubijakunasina almakunata allilla suma kawag. Sutipa allilla suma ubijakunata kawag, wañungapa chaiagpipas sakirinmi. ¹² Ikuti maikan kulki ganangapaglla kawagka, sacha alku samukugta kawaspaka, ubijakunata sakispa mitikunllami, paipa ubijakuna mana kagmanda. Chiura sacha alku, sug ubijakunata mikugrí; sugkunataka mitikuchí. ¹³ Chi kulki ganangapaglla iui aiwa kaspami ubijakunamanda ñi ima mana llakí.

¹⁴—Nukami kani ubijakunasina almakunata allilla suma kawag. Nukapakunata rigsinimi. Paikunapas, nukata rigsiwankunami. ¹⁵ Chasallata, nukapa Taita rigsiwá. Nukapas, nukapa Taitata rigsinimi. Nukapa ubijasinakunamanda wañungapa chaiawagpipas, sakingapami kani.

¹⁶—Sug ubijasinakunapasmi iukani, mana kai kural-manda. Paikunatapasmi chaiawaku, nukapagma kaiangapa. Paikunapas, nukapa rimaita rigsiwangapami kankuna. Chasaka, tukuikunami sugllapi tukungapa kankuna. Nuka kikinmi tukuikunata suglla allilla suma kawag kangapa kani.

¹⁷—Nukapa kaugsaita karangapami kani, wañuchii tukungapa. Nispaka, ikutimi kaugsaringapa kani. Chiamandami nukapa Taita kuiawá. ¹⁸ Ñi pipas mana nukapa kaugsaita kichuwangapa kanchu. Nuka kikinllami karangapa kani, wañuchii tukungapa. Nuka kikin karangapa pudinimi, wañuchii tukungapa. Chasallata, nuka kikin pudinimi ikuti kaugsaringapa. Chasami nukapa Taita pasangapa kachamuwarka.

¹⁹ Jesús chasa rimakuskata uiaspaka, judiukunaka ikuti iskaima tururkakuna. ²⁰ Achkakuna ninakurka: —Pai, kuku waira iaikuskami ka. Upa tukuskami ka. ¿Imapatak chara uianakusunchi?

²¹ Ikuti sugkunaka ninakurka:

—Kuku waira iaikuska kagpika, manachar chasa rimakuntra. Kuku waira iaikuska kagpika, manachar pudintra, mana ñawi kawagkunata ambingapa.

Judiukuna, Jesusta wabutiskamanda

²² Chiuramanda judiukuna, sug atun puncha Jerusalenpi ialichinakurka; Diospa atun wasita mana judíu kagkuna jiru ruraskakunata anchuchigsina iuiarispas, chasaka, ikuti sumaglla allilla tukungapa. Tamia punchakunami karka. ²³ Chi wasi ukupi, Salomonpa suti kaska kanchapimi Jesús puririkurka. ²⁴ Chiura judiukunaka, paita muiuchispas, tapurkakuna:

—¿Imaurakamatak nukanchita charikunkangi, kamanda mana iachaspalla kangapa? Kam kikin Cristo kagpika, nukanchita willarii.

²⁵ Jesuska ainirka:

—Ñami willarkaikichita. Mana uiawarkangichichu. Nukapa Taita imasa rurangapa kachamuwaskasina ruraskakunami nukamanda willaku. ²⁶ Kamkuna mana uiawangichichu, mana nukapa ubijasinakuna kaspas. ²⁷ Ikuti nukapa ubijasina kagkuna, nukapa rimaitami uiawankuna. Nukapas, paikunata allillami rigsinimi. Paikuna, nukatami katichiwankuna. ²⁸ Nukaka, paikunata mana puchukariduru suma kaugsaitami karani. Chi kaugsai iukaspaka, ñi imaurapas mana puchukaringapa kankunachu. Ñi pipas nukapa makimanda mana paikunata kichuwangapa kankunachu. ²⁹ Nukapa Taita, tukuikunamanda mas atunmi ka. Paimi nukapa makipi paikunata sakiwarka. Paipa makimandaka, ñi pipas mana paikunata kichui pudingapa kankunachu.

³⁰ Nukaka, nukapa Taitawa sugllami kanchi.

³¹ Jesús chasa niuraka, judiukuna ikuti rumi aisarkakuna, piaspas wañuchingapa. ³² Paika nirka:

—Nukapa Taita imasa munakuskasina ruraspami kawachirkaikichita, nuka achka allilla ruragta. ¿Maikan allilla ruraskamandatak nukata rumiwa wañuchiwangapa munanakungichi?

³³ Chiura, judiukuna ainirkakuna:

—Chi allilla ruraskakunamandaka mana kamta rumiwa wañuchingapa munanakunchichu. Kam ianga runa kaspas, Taita Diussina tukuspa, jiru llullaspas niskamandami wañuchingapa kanchi.

³⁴ Jesuska nirka:

—Moisés ima kamkunamanda rurangapa niraiaskapi, ¿manachu kasa willaraiá: “Niikichitami: ‘Taita Diussinami kangichi?’”. ³⁵ Chasaka, Diospa Rimaita uiagkunami Taita Diussina kankuna. Kasapas. Ñugpamanda librupi willaraiaskaka, ñi ima mana llullanchu.

³⁶ Nukataka, Taita Dios kikin agllawaskamandami kai alpama kachamuwaska samurkani. Nuka: “Taita Diospa wambrami kani” nigmandaka, ¿imapatak niwanakungichi: “Taita Diussina tukuspa, jiru llullaspami ni-kungi”? ³⁷ Nukapa Taita imasa munakuskasina nuka mana ruragpika, mana nukawa iuiawaichi. ³⁸ Ikuti nukapa Taita imasa munakuskasina ruragpika, kamkuna, mana nuka rimaskata iuiawasapapas, chi nuka allilla ruraskakunata kawaspa, suma iuiawaichi. Chasa iuiawasapapas, iachankangichimi nukapa Taita nukawa kagta i nukapas nukapa Taitawa suglla kagta.

³⁹ Chasa uiaspaka judiukunaka, ikuti Jesusta apingapa munanakurka. Paika, paikunapas makimanda llugsispa, mitukurka.

⁴⁰ Chimanda, Jordán iaku sug ladu chimba, Juan ñugpata baugtisadiru kaskama ikuti rirka. Chipika, sug punchakuna chisiagrirka. ⁴¹ Chiura achka runakuna, paipagma chaiagrispa, ninakurka:

—Juanka, ñi ima kawachiipas mana rurarkachu. Ikuti tukui ima kai runamanda willaskaka, sutipami chasa tukuku—. ⁴² Chasa nispaka, achka runakunami chipi Jesusta suma iuiarirkakuna.

Lázaro suti runata, Jesús kaugsachiskamanda

11 Betania puiblupi, Lázaro suti runa unguiwa ña wañukurka. Chi runapas panikuna, María i Marta sutikuna, sugllapi kaugsanakurka. ² Chi Mariami karka Iaia Jesusta suma asna asitiwa tallispa, paipa chakikunata kikinpa agchawa tustachig. Chi Mariapa turi Lazaromi wañukurka. ³ Chi panikunaka, Jesuspagma kacharkakuna, kasa ningapa:

—Taita turi, kamba kuiaska Lázaro, iapa unguymi ka.

⁴ Chasa uiaspaka, Jesuska nirka:

—Chi unguiwa mana wañungapa niraianchu. Taita Diusta suma atuniachingapami unguymi ka. Chi unguiwaka Taita Diospa wambratapasmi suma atuniachii tukungapa ka.

⁵ Jesús, Martata, ñañandita i Lazarota iapami kuiarka.

⁶ Chasa kuiaspapas, Lázaro unguymi kagta iachaspas, chara iskai punchami unaiarka. ⁷ Chiuramandaka, paita katiraiagkunata nirka:

—Ikuti Judea alpama risunchi.

⁸ Paita katiraiagkunata nirkakuna:

—Iachachig taita, mana iapa unai ka, kamta judiukuna rumiwa wañuchingapa munanakugta. ¿Imapatak ikuti chima ringapa munakungi?

⁹Jesuska ainirkakunata:

—Mana manchanakuichi. Puncheda, ¿manachu chungaiskai ura iuká? Puncheda purig, kai alpata punchaichigwa kaspaka, ¿imasatak takariipa? ¹⁰Ikuti maikan tutapi purikugka takaringami, kikin mana punchaichigwa purikuspa.

¹¹Chasa nispaka, kasapasmi nirka:

—Nukanchipa kuiaska Lázaro, ñami puñurirka. Paita nuka rigchachingapami ringapa kani.

¹²Chiura, katiraiagkuna nirkakuna:

—Taita waugki, pai puñuriska kagpika, ñachar askaiaku.

¹³Jesuska, Lazaromanda nikurka: “Puñukumi”, sutipa wañuska kagmanda. Ikuti katiraiagkunaka iuianaturka: “Lazaroka, sutipachar puñuilla puñuku”.

¹⁴Chasa iuianakugmanda, Jesuska mana pakaspallami nirkakunata:

—Sutipami Lázaro wañuska ka. ¹⁵Nuka mana chipi kagriskamanda, kamkunamandami kuntintariwá. Chipi kamkuna, nuka ima ruraskata kawaspaka, sumami iuiariwangapa kangichi. Kunaauralla, akushi paipagma.

¹⁶Chiura Tomás, Dídimosuti, sugllapi katiraiagkunata nirka:

—Akushi nukanchipas, paiwa wañugringapa.

¹⁷Jesús Betaniama chaiagriuraka, Lázaro ña wañuska, chusku punchasi pambaska karka. ¹⁸Betaniama Jerusalenmanda karu mana kanchu. Sug kimsa chungakuadrasinallami ka. ¹⁹Chimanda achka judiukuna, Marta i Mariapagma chaiagriska karkakuna, paikunapa turi wañuskamanda iapa llakiiwa kaskata kungachingapa.

²⁰Martaka, Jesús chaiakugta iachaspaka, tupangapa paipagma rirka. María, wasillapi suiakurka. ²¹Jesusta tupagrispaka, Marta nirka:

—Taita turi, kam kaipi kagpika, nukapa turi manami wañupuá. ²²Nukaka iachaniami: kam ima Taita Diusta mañaskaka, kamta uianllami.

²³Chiura, Jesuska nirka:

—Kamba turi ikutimi kaugsaringapa ka.

²⁴Martaka nirka:

—Puchukarii puncha, wañuskakuna kaugsaringapaka kaura, nukapa turipas kaugsaringapaga kagta; chita iachaniami.

²⁵Chasa niura, Jesuska nirka:

—Nukami kani wañuska kaskakunata kaugsachig. Nuka kikinmi kaugsai karani. Maikanpas nukata suma iuiawagkuna, wañuska kaspapas, mana mas wañungapami kaugsaringapaga kankuna. ²⁶Tukui kaugsagkuna nukata suma iuiawaspa kagkunaka, mana diltudupa wañungapaga kankunachu. Chitaka, ¿kam chasachu suma iuiangi?

²⁷—Ari, taita turi— ainirka—. Sumami iuiani, kam Taita Diospa wambra, pai agllaska, kai alpama samuska kagta.

²⁸Chasa nispaka, rirka, ñañandi Mariata kaiangapa. Kaiaspaka, pakallami nirka:

—Iachachig taita Jesús, kaipimi ka. Kamtami kaiaku.

²⁹Chasa uiangallowaka, Mariaka, utkalla atarispaga, Jesusta kawangapa rirka. ³⁰Jesús, manara chi puibluma chaiagrispalla, Martawa kawanakuskallapimi suiaurka.

³¹Judiukuna Mariawa sugllapi llakiiwa kaskata kungachingapaga kagkunaka, pai atarispaga, wasimanda kalpa llugsigta kawaspaga, katichirkakuna. Iuianaturka: “Pambaraiaskamachar riku, chipi wakangapa”.

³²Mariaka, Jesuspagma chaiagrispa, paita kawaspaga, kungurispaga, nirka:

—Taita turi, kam kaipi kagpika, nukapa turi manami wañupuá.

³³Jesuska, María i judiukuna paiwa chaiagrispa wakanakuskata kawaspaga, sungu nanagtami iapa sinchi llakirirka. ³⁴Nispaka tapurka:

—¿Maipitak pambarkangichi?

—Taita turi— ainirkakuna—, akushi kawangapa.

³⁵Chiura, Jesuska wakarka. ³⁶Chasa kawaspaga, judiukuna nirkakuna:

—¿Chitukuchar Lazarota kuiarka!

³⁷Sugkuna chipi kagkunaka nirkakuna:

—Pai mana ñawi kawag runata aliachigka, ¿manachu pudirka, chara kaugsakugllapi, Lazarotapas wañuita kispichingapa?

³⁸Jesuska, ikuti sinchi llakirispaga, Lázaro pambaraiaaska punguma chaiagrirka. Chi pungupi, sug atun rumi kilpaskami karka. ³⁹Kawagrispaga, Jesuska nirka:

—Rumita anchuchiichi.

Wañuskapa pani Martaka nirka:

—Taita turi, ñami chusku puncha pambaska ka.

Ñachar jiru asnariku.

⁴⁰Jesuska nirka:

—¿Manachu nirkaiki: “Kam suma iuiawaspa, Taita Diospa suma iachaitami kawangapa kangi”?

⁴¹Chasa uiaspaga, chi pungumanda kilparaiaska rumita anchuchirkakuna. Chiura Jesuska, awama kawaspaga, nirka:

—Taitiku, kam uiawaskamanda niikimi: “Pai Siñur”.

⁴²Nuka iachaniami, kam imaurapas uiawadur kagta. Tukui kaipi nukawa muiugta kagkunamandami niiki, kam nukata kachamuwaska kagta paikuna suma allilla iuiawangapa—. ⁴³Chasa nispaka, sinchi rimaiwa kaparirka— Lázaro, kanchama llugsimui.

⁴⁴Chasa kaparigllapi, chi wañuskaka, kuiurispaga, llugsii kallarirka, chaki i makikuna linsukunawa wataskalla, uma i ñawipas chasallata maituriskalla. Chiura, Jesuska nirka:

—Paskaichi, allilla puringapa.

Jesusta wañuchingapa, judíu taitakuna iuiarinakuska-manda

⁴⁵Achka judíu Mariapagma chaiagriska kagkunaka, Jesús chasa ruraskata kawaspaga, paita suma iuiarirka-kuna. ⁴⁶Ikuti sug judiukunaka, pai ima ruraska kawaskata fariseokunata willagrirkakuna. ⁴⁷Chasa

willagriura, iaia sasirdutikuna i fariseokunaka tukui judiukunapa taitakunata tandachirkakuna. Sugllapi kaura, rimanakurka:

—¿Imasami chi runata ruranchi? Mana imaurapas kawaskasina mas achkami ruraku. ⁴⁸ Paita nukanchi sakisunchi chasa rurakungapa; tukuikunami paiwa tukungapa kankuna. Chimandami Romamandakunapas samungapa kankuna, nukanchi Taitikupa suma atun wasita urmachingapa. Kai alpapi kaugsanakuskatapasma puchukungapa kankuna.

⁴⁹ Sug paipura, Kaifás suti, chi wata iaia sasirduti kaspas, nirka:

—Kamkuna, ñi imapas mana iachangichichu. ⁵⁰ Iuiariichi: ¿manachu allilla kantra, suglla runa nukanchipa alpapi kaugsanakuskamanda wañungapa; chasaka, tukuikuna mana puchukai tukungapa?

⁵¹ Chasa, pai kikinpa iuiailawa mana rimarka. Chi wata pai iaia sasirduti kaspami Santu Ispirituwa sutipa kaskata willarka, chi alpapi tukui kaugsanakuskamanda Jesús wañungapa kagta. ⁵² Chi alpapi kaugsanakuskamandallaka, mana; tukui Taita Diuspa wambrakuna sugpi sugpi kaugsanakuskapas suglla tukungapami wañungapa chaiarka.

⁵³ Chi punchamandaka rimanakui kallarikakuna, imasapipas Jesusta wañuchingapa. ⁵⁴ Chimanda Jesuska, judiukunata mana kawaringapaka, pakallallami purikurka. Efraín suti puiblupi, chusa sitaska alpa kuchu kuchumi kagrirka. Chipika, paita katiraiagkunawanta sug punchakuna chisiagrirka.

⁵⁵ Judiukunapa paskua atun puncha ñami chaiakurka. Manara paskua chaiagpi, chi alpa suiukunamanda achkakuna Jerusalemma chaianakugrirka, tukui pandariikunata maillariskasina rurangapa; chasaka, Diuspa ñawipi allilla kawaringapa. ⁵⁶ Chipika, Jesusta maskanakurka. Diuspa atun wasipi kagkunapas, kikinpura tapurinakurka:

—¿Imatak iuianakungichi? Kai atun puncha, ¿paipas samungacha?

⁵⁷ Iaia sasirdutikuna i fariseokuna niska karkakuna:

—Maikanpas Jesús maipi kaskata iachaspaka, willag-samungichi, paita apichingapa.

Jesuspa chakikunapi, María suma asna asiti talliskamanda

12 Paskuapa sugta puncha pisikuura, Jesuska Betania puibluma rirka Lázaro kaugsakuskama. Chi Lázaro wañuskatami kaugsachiska karka. ² Jesús chipi chaiagriuraka, suma mikui mikungapa kaiarkakuna. Marta, mikui ianuska ialichikurka. Lazaropas, Jesuswa sugllapi mikunakurka. ³ Mariaka, chipi mikunakunkama, sug librasina nardo suti suma asna asiti iapa bali kulkiwa randiskata charirispas, Jesuspa chakikunapi tallirka. Nispaka, kikinpa agchawa tustachirka. Chasa talliura, chi wasi ukupi iapa suma asnaimi tukugsamurka.

⁴ Chiura Judas Iskariote, Jesusta katiraiagpura, Jesusta apichingapa iuiakugka, nirka:

⁵ —¿Imapatak chi asitita kimsa patsa puncha ganas-ka bali kulkimanda mana katurka? Chiwa pudirirka, mana ñi imapas iukaskakunata chi kulkikunata karan-gapa—. ⁶ Paipa iuiapi chi Judaska, mana iukagkunamanda mana iuiakurka. Kikin tukui paipurakunapa kulki wakachidur kaspas, pai kikinmanda sisai kaspami chasa rimakurka.

⁷ Jesuska nirka:

—Ianga kawai. Chika, nukata pambawangapa punchapami wakachiraiarka. ⁸ Ñi ima mana iukagkunata imaurapasmi iukangapa kangichi. Ikuti nukataka sug ratullami kawawanakungichi.

⁹ Jesús Betania puiblupi kagta iachaspaka, iapa achka judiukuna chima chaiagrirkakuna. Jesusta kawangapaglla, mana; Lázaro wañuska kaugsariskata kawangapawantami rirkakuna. ¹⁰ Chimanda, iaia sasirdutikuna iuiarirkakuna, Lazarotapas wañuchingapa.

¹¹ Lázaro ikuti kaugsariska kagmandaka, achka judiukuna, chi taitakunata sakispa, Jesuswa tukurkakuna.

Jerusalén puibluma, Jesús iaikugriskamanda

¹² Chi kaiandi, iapa achka runakuna paskua atun puncha ialichingapa chaiagriska karkakuna. Jesuspas Jerusalemma chaiagrirkagta iachaspaka, chimanda llugsirkakuna ringapa, ¹³ ramus palmakuna kuchuspa, paita tupangapa. Tupagriskapa, kaparii kallarikakuna:

—Taita Diusta iapa suma kagtami ninchi.

Atun Taita Dius kachamuska

Israelmanta runakunapa atun mandag samug, paipa iapa kuiaskami kangi.

¹⁴ Jesuska, sug maltu buruta tarispa, tiarirka. Chiwanka, imasa ñugpamanda librupi willaraiaskasina tukugsamurka. Kasami niraiá:

¹⁵ Sión lumamanda warmikuna, mana manchanakuichi.

Kawaiichi. Kamkunapa atun mandagmi samuku.

Sug burapa maltu wawa burupimi tiariska samuku.

¹⁶ Jesusta katiraiagkuna, kawanakuspapas, mana iacharkakuna pai ima rurakugta. Taita Dius paita suma atuniachiskauramandami, paimanda imasa willaraiaskasina chasa ruraskata iuiarigsamurkakuna.

¹⁷ Lázaro wañuska pambaraiaskata Jesús kaugsachispa kaiagta kawagkunaka, tukuikunata willanakurka. ¹⁸ Chi imaurapas mana kawaskasinata ruraskamanda iachaspami achkakuna paita tupagringapa llugsirkakuna. ¹⁹ Chasa kawaspaka, fariseokuna kikinpura rimarinakurka:

—Kawaiichi. Ñi imapas mana rurangapa pudinakunchi. Tukuikunami paillata katinakú.

Sug mana judíu kagkuna, Jesusta kawangapa munanakuskamanda

²⁰ Sug griego suti runakunapasmi Jerusalemma riska karkakuna, paskua atun puncha ialichinakuskapi Taita Diusta kunguringapa. ²¹ Chi runakunaka, Felipepagma kaillaiagrispa, nirkakuna:

—Waugki, Jesusta kawaspa rigsingapami munana-kunchi—.

(Felipe, Galilea alpa i Betsaida puiblumandami karka.)

²² Chiura Felipeka, Andresta willagrirka. Nispa pai iskandikuna, Jesusta willagrirkakuna, nispa:

—Kamta munanakú rigsingapa.

²³ Jesuska ainirka:

—Kai Runa Tukuskata suma atuniachingapa puncha ñami chaiamuku. ²⁴ Kasami nuka niikichita: trigu simila mana alpapi urmaspa wañugsina tukugpika, chasallami kidá, ñi ima mana tukuspalla. Ikuti alpapi urmaspa wañugsina tukuspakar, wiñariura, chi simillamanda achkami tiarí. ²⁵ Chasallata, maikanpas kikinmandalla kaugsai munag, kikinmi puchukaringapa ka. Ikuti maikan kai alpapi kikinpa kaugsaita nukamanda iuiarispá, mana kispichigpika, mana puchukariduru suma kaugsaitami taringapa ka. ²⁶ Maikan nuka ima munaskata rurangapa munagka katichiwachu. Chasaka, nuka maipi kaskapi, chillapitami chi runapas kagringapa ka. Maikan nuka ima munaskata ruragta, nukapa Taitapasmí kuiangapa ka.

Jesús imasa wañungapa kaskata, pai willaskamanda

²⁷ Kasapasmi Jesús nirka:

—Kunaura, sungu nanagtami llakiwaku. Chimanda, ¿kasachu nisa: “Taitiku, kai llakiita kunaura anchuchiwai”? Mana. Chasapami samurkani—. ²⁸ Chasa nispa, Taita Diusta nirka— Taitiku, kam iapa suma atun kagta kawachirii.

Chiura, suma luarmanda rimai uiarigsamurka, kasa nispa:

—Nuka iapa suma atun kagta kamwa ñami kawachirirvani. Mas nispa, ikutimi kamllawanta kawachiringapa kani.

²⁹ Chipi kagkuna, chasa uiaspaka, sugkunaka nirka-kuna:

—Sinchimi triwinarka.

Ikuti sugkunaka nirkakuna:

—Sug anjilmi paita rimarka.

³⁰ Jesuska nirkakunata:

—Chi rimai uiariskaka, nukamanda mana uiarirkachu. Kamkunamandami uiarigsamurka. ³¹ Kuna-urami kai alpapi kaugsagkuna justisiai tukungapa kankuna. Kunaurami kai alpapi mandag iaia kuku llugsichii tukungapa ka. ³² Nukaka, alpamanda atarichii tukuspa, tukuikunatami nukapagma kaillaiachingapa kani—. ³³ Pai imasa wañungapa kaskatami chasa willakurka.

³⁴ Jesús chasa niuraka, chipi kagkunaka nirkakuna:

—Ñugpamanda librupi kawaspaka, iachanchimi, Taita Dios agllaska Cristoka ñi imaurapas mana wañungapa kagta. Nigpika, ¿imapatak kamka nikungi: “Runa Tukuskata chaiakumi, atarichii tukungapa”? Chi Runa Tukuska, ¿pimandatak nikungi?

³⁵ Chiura, Jesuska ainirkakunata:

—Mailla punchakunallami kai punchaiachig, kamkunapa chaugpipi kangapa ka. Kai punchaiachig kamkunawa kankama, nukawa puriichi; chasaka, mana

kamkunata tutaiai apigsamungapa. Tutapi purig mana iachanchu maipi rikugta. ³⁶ Kai punchaiachig kamkunawa kankama, suma iuiawaichi. Chasaka, punchaiachig Taita Diospa wambrakunami kankangichi.

Chasa nispa Jesús, paikunapagmanda anchurispá, mana kawarirka.

Judiukuna, imapa Jesusta mana allilla iuianakuska-manda

³⁷ Chituku achka suma mana imaurapas kawaskasina judiukunapa ñawipi ruragpipas, Jesuswa mana tukurkakuna; ³⁸ chasaka, Isaías suti Santu Ispirituwa rimag imasa willaskasina tukugsamungapa. Kasami niraiá:

Taitiku,

¿pikunatak munarkakuna,

nukanchi ima willaskata suma uiangapa?

Maillakunalla.

Chasallata, atun Taita Diospa iapa iachaita,

¿pikunatak kawachirka?

³⁹ Paikuna mana uiangapa, Isaías ñugpami willaska karka, kasapas nispa:

⁴⁰ Taita Diosmi paikunapa ñawita tutaiaichigsina rurarka.

Iuiaikunatapasmi kichurka.

Chasaka paikuna,

mana ñawiwa kawagsina,

mana iuiái iukagsinami tukungapa kankuna.

Mana munankuna, nukawa tigramungapa.

Tigramugpika, nukami ambintranikunata.

⁴¹ Paipa iuiái Jesús suma atun kagta ñugpata kawaspami Isaías chasa paimanda willarka.

⁴² Chasa willaraiaska kagpipas, judiukunapa achka taitakunapasmi Jesuswa tukurkakuna. Chasa tukuspapas, dimanchaimi mana kawariilla Jesusmanda rimarkakuna. Mana kagpika, fariseokunaka tandariduru wasimandami paikunata llugsichintrakuna. ⁴³ Jesuswa tukuspapas, masmi munarkakuna, kikinkunamandalla suma atuniachirii tukungapa, Taita Dios suma atuniachiita sakispa.

⁴⁴ Jesuska, kaparispá, nirka:

—Maikanpas nukawa tukuskakunaka, mana nukalla-wa iuianakunchu. Nukata kachamuwagtapasmi iuká iuianakunga. ⁴⁵ Chasallata nukata kawawanakugka, kachamuwagtapasmi kawanakú.

⁴⁶ —Kasapas. Nuka, kai alpapi kaugsanakuskapa iuiaikunata punchaiachingapami samurkani; chasaka, maikanpas nukawa tukugpikunaka, tutapisina mana kaugsanakungapa. ⁴⁷ Maikan uiawaspapas, nuka ima rimaskata mana ruragpika, pai pandariskakunata nuka mana kawakunichu. Mana samurkanichu, kai alpapi kaugsagkuna pandariskakunata kawangapa. Paikunata kispichingapami samurkani. ⁴⁸ Maikan nuka ima rimaskata mana allilla uiaspa wabutiwagpika, sugmi pai pandariskakunata kawachingapa ka. Chi nuka rimaskakunata mana uiawagmandami puchukarii puncha tukui pandariskakunata kawachii tukungapa ka. ⁴⁹ Nukapa iuiailawa mana rimakunichu. Nukapa Taita kachamuwagmi willawarka, imasa nuka rimaspa

iachachingapa kagta. ⁵⁰ Nuka iachanimi, pai niskata uiaspa, mana puchukariduru suma kaugsaita chaskingapa tiagta. Chimandami nukapa Taita imasa willa-waskasina kamkunata willaikichita.

Jesusta katiraiagkunapa chakikunata, pai maillaskamanda

13 Paskuapa rurangapa suglla puncha pisikuura, Jesús ña iacharka, kai alpamanda paipa Taita-pagma ringapa chaiakugta. Kai alpapi paiwa kagkunata iapa kuiaspa, wañunkamami munarka.

² Paita katiraiagkunawa mikunakunkama, iaia kuku, ñami Judas Iskariote suti Simonpa wambrapa sungupi iuiachiska karka, Jesusta apichingapa. ³ Jesús ña iacharka, Taita Dios paipa makipi tukui karaska kagta; chasallata, Taita Diuspagma samuspa, Taita Diuspagmallatata kutingapa kagta. ⁴ Nispaka, mikunakuskamanda atarispas, kikin kataraiaska katangata anchuchirispas, tustachiduru linsuta aiaspas, chumbillirirka. ⁵ Sug uchulla batiapi iaku tallispa, paita katiraiagkunapa chakikunata maillai kallarirka. Chakikunata maillaspa, chumbilliraiaska linsuwami chakichispa aparka.

⁶ Simón Pedropa chakita maillangapa chauraka, Pedroka tapurka:

—Taita waugki, ¿kamchu nukapa chakikunata maillawangkang?

⁷ Jesuska ainirka:

—Nuka chasa rurakuskata, kam kunaure mana iachangichu. Kipamami ima niraiaskata iachangapakangi.

⁸ Pedroka nirka:

—Kam, ñi imaurapas mana nukapa chakikunata maillawangapakangichu.

Jesuska ainirka:

—Nuka kamta mana maillagpika, kamka mana nukapakangapakangichu.

⁹ Chiura, Simón Pedro nirka:

—Taita waugki, chasa kagpika, chakikunallata mana maillawai. Makikuna umawanta armachiwai.

¹⁰ Jesuska nirka:

—Maikan ña armaska kaskata mana ikuti maillai ministinchu. Chasa armaska, ñi ima mana mapakangichu. Chasallata, kamkuna armaskasinami kangichi; nigpika tukui kunaka, manima—. ¹¹ Jesús, pi paita apichingapa kagta iachaspami nirka: “Nigpika, tukui kunaka mana armaskasina kangichichu”.

¹² Ña tukui kunapa chakikunata maillaspa, paipa kataridiruta katarispa, ikuti sugllapi tiarigrirka. Nispaka, nirkakunata:

—Nuka ima kamkunata ruraska, ¿iachangichichu ima niraiagta? ¹³ Nukata, kamkuna niwangichimi: “Iachachig taita” i “Iaia Jesús”. Chasaka, allillami niwangichi. Chasami kani. ¹⁴ Nuka, kamkunapa iaia i iachachig taita kaspapas, kamkunapa chakikunatami maillarka ikichita. Chimandami kamkunatapas chasallata chaiaku, kam kikinpura maillanakungapa. ¹⁵ Nuka, kamkunata ñami kawachirka ikichita, imasa kam kikinpura rurana-

kungapa kagta. ¹⁶ Kasami nuka niikichita: lutrin, taitakunamanda mas atun mana kanchu. Chasallata kachamuska runa, kachamugmanda mas atun mana kanchu. ¹⁷ Chi tukui ima iachachiskata suma ruraspaka, Taita Diospa iapa kuiaskami kapuankangichi.

¹⁸ —Tukui kamkunamanda, nuka mana chasa nina-kuikichitachu. Nuka agllaskakunamanda ñami iachani. Chiwanka, ñugpamanda librupi imasa willaraiaskasina tukugsamungapa ka. Kasami niraiá: “Nukawa tanda sugllapi mikugpas, nukapa kuntrami tukurka”. ¹⁹ Kuna-ura, manara chasa tukugsamugpimi willaikichita; chasa tukugsamuuraka, kamkuna, suma iuiariwaspa, nuka pi kagta rigsiwangapa. ²⁰ Kasami nuka niikichita: maikanpas nuka kachaskata chaskigpika, nukata chaskiwagmi niraiá. Chasa chaskiwaspa, nukata kachamuwagtapasmi chaskig niraiá.

Judas Iskariote Jesusta apichingapa kagta, Jesús willaskamanda

²¹ Chasa nispaka Jesuska, sungu nanagta llakirispas, imasa pasaringapa kagta willarka, kasa nispas:

—Kasami nuka niikichita: kam kikinpuramanda sugmi apichiwangapa ka.

²² Chiura paita katiraiagkuna, ñawima kawarinakuspa iuianakurka: “¿Pimandasik chasa rimaku?”. ²³ Jesusta katiraiagpura mas kuiaskaka, paita kimirispa tiakurka. ²⁴ Pai kimiraiaskataka, Simón Pedro ñawiwasiñas rurarka, tapuchingapa: ¿pimandami Jesús chasa rimaku? ²⁵ Chiura chi runaka, Jesuspagma mas kimirispa, tapurka:

—Taita waugki, willawai: ¿pitak ka?

²⁶ Chiura, Jesuska ainirka:

—Nuka sug piti tanda jukuchispa, karasa; paimi ka—. Chasa nispaka, tanda jukuchispa, Judas Iskariotetami kararka. Chika karkami Simonpa wambra.

²⁷ Chi tandata chaskispa mikuuraka, chiuralla iaia kukuka Judaspa sunguma iaikurka. Nispaka Jesuska, paita nirka:

—Kam ima rurangapa kaskata utkalla rurai.

²⁸ Ñi maikan Jesuswa mikunakugpura mana iacharkakuna, imamanda pai chasa nikugta. ²⁹ Sugkuna iuianakurka: “Judas kulki wakachidur kagmanda, atun punchapipa ima ministiskakuna randingapachar kachaku”. Ikuti sugkunaka iuianakurka: “Ñi ima mana iukaskakunatachar karangapa kachaku”. ³⁰ Judas chi tandata mikungallawa llugsiura, ña tutami karka.

Musu mandaita, Jesús iachachiskamanda

³¹ Judas ña llugsiura, Jesuska nirka:

—Kunaurami kai Runa Tukuskata suma atuniachiska tukuku. Nukawami Taita Diuspapas suma atuniachiska tukuku. ³² Taita Dioska, nukawa atuniachiska tukuspa, nukatapasmi atuniachiwangapa ka. Mana unallami atuniachiwangapa ka.

³³ —Nukapa kuiaskakuna, kamkunawa mana unai kangapa kanichu. Chiuramandaka, kamkunata iapa llakiimi tukungapa ka. Imasami judiukunata nirkani:

chasallatami kunaura kamkunatapas niikichita: “Nuka maima ringapa kaskama, kamkunaka mana rii pudingapa kangichichu”.

³⁴ —Kamkunata sug musu mandaitami sakiikichita: kam kikinpura kuianakungapa. Imasami nuka kamkunata kuiarkaikichita: chasallata kam kikinpurapas kuianakuspa kaugsangichi. ³⁵ Chasa kuianakugpika, tukuikunami iachangakuna, kamkuna nukata katiraia-wagkuna kagta.

Jesusta mana rigsinichu, Pedro ningapa kaskamanda

³⁶ Chiura, Simón Pedroka tapurka:
—Taita waugki, ¿maimatak rikungi?
Chiura, Jesús ainirka:
—Nuka maima ringapa kaskama, kunaura kam mana katiwai pudingapa kangichu. Kipamami katichiwankangi.

³⁷ Pedroka tapurka:
—Taita waugki, ¿imawantak kunaura nuka mana kamta katingapa puidiki? Kammanda wañuchiipasmi tukuntrani.

³⁸ Chasa niura, Jesuska ainirka:
—Nukamanda wañungapa munakugpipas, kasami nuka niiki: gallu manara kantagpimi kamka kimsa biaji nukamanda ningapa kangi: “Paita mana rigsinichu”.

Jesusmanda, Taita Diuspagma chaiagringapa kaskamanda

14 Kasapasmi Jesús nirka:
—Mana sungupi iapa irkiaspa kaichi. Imasami Taita Diusta suma iuiangichi: nukatapas chasallata suma iuiawaichi. ² Nukapa Taitapagpi achka kaugsadirumi tia. Mana chasa tiagpika, timpumi willaikichita. Kunaura, paipagmami ringapa kani, kamkunamanda kaugsadiruta allichigringapa. ³ Chi kaugsadiruta ña allichigrispaka, ikutimi samusa, kamkunata pusangapa; chasaka, nuka maipi kaskapi, kamkunapas kaugsagringapa. ⁴ Nuka maima rikuskamaka, kamkuna ñami iachangichi imasa chaiagringapa.

⁵ Chasa uiaspaka, Tomás nirka:
—Taita waugki, nukanchi mana iachanchi kam maima rikugta. ¿Imasatak iachasunchi maikan ñambi ringapa kagta?

⁶ Chiura, Jesuska ainirka:
—Nukami kani chaiagridiru ñambisina. Ñi imapi mana llullag, kaugsai karagpasmi kani. Nukallowami nukapa Taitapagma chaiagridiru ka. ⁷ Nukata rigsiwas-paka, nukapa Taitapasmi rigsigsina kangichi. Kuna-uramandatami ña paita rigsispa kawanakungichi.

⁸ Chasa uiaspaka, Felipe nirka:
—Taita waugki, kamba taitata nukanchita kawachii. Chillami munanchi.

⁹ Chiura Jesuska, paita ainirka:
—Nuka, ña unaimi kamkunawa kani. Nigpika, ¿manarachu kam nukata rigsiwangi? Maikanpas nukata kawawag, nukapa Taitapasmi ña kawag niraiá. Nig-pika, ¿imawantak kam niwakungi: “Kamba taitata

nukanchita kawachii”? ¹⁰ ¿Manarachu suma iuiangi, nukapa Taita nukawa i nukapas Taitawa suglla kagta? Nuka ima kamkunata rimakuskaka, nukapa iuiailawa mana rimakunichu. Nukapa Taita, nukawa suglla kaspami nuka tukui ima ruraskata rurag ka. ¹¹ Suma iuiawaichi, nukapa Taita nukawa i nukapas nukapa Taitawa suglla kagta. Mana nukata iuiawaspapas, nuka ima rurakuskallata kwaspa, chasa kagta iuiariichi.

¹² —Kasami nuka niikichita: maikanpas nukata suma iuiawag, nuka imasa ruraskasinallatatami rurangapa ka. Nukapa Taitapagmami nuka rikuni. Chimanda maikan suma iuiawag, imaurapas mana kawaskasina mas sumami mainigtapas rurangapa ka. ¹³ Kamkuna nukamanda iuiarispa mañagpikunaka, tukuimi chaskinkangichi, nukapa Taitata paipa wambrawa mas suma atuniachingapa. ¹⁴ Imapas kamkuna nukamanda iuiarispa mañagpikuna, nukapasmi karasakichita.

Santu Ispirituta, Jesús kachamungapa niskamanda

¹⁵ —Kamkuna nukata kuiawaspaka, nuka imasa niskasinami rurankangichi. ¹⁶ Nukaka, nukapa Taitata mañapusakichitami, kamkunata sug sumaglla iuiachigta kachamungapa. Paimi imaurapas kamkunawa kangapa ka. ¹⁷ Pai Santu Ispiritumi tukuipi sutipa kaskata willangapa ka. Kai alpapi tiaskakunallawa iuiagkuna, paita mana iachaspa i mana rigsispas, mana paita chaskingapa kankunachu. Ikuti kamkunaka, paita rigsingichimi. Pai, kamkunawami ka. Kamkunapa iuiaipasmi kaugsagsamungapa ka.

¹⁸ —Chasaka, kamkunata wagchusina mana sitaikichitachu. Kamkunapagma ikutimi samusa. ¹⁹ Kai alpapi tiaskakunallawa iuiagkuna, sug ratullami kawawanakú. Nispaka, mana mas kawawangapa kankunachu. Kamkunakar, ikutimi kawawangapa kangichi. Nuka kaugsalla kagmanda, kamkunapas kaugsallami kangapa kangichi. ²⁰ Chi punchamandami iachankangichi, nukapa Taitawa nuka suglla kagta; chasallata, kamkuna nukawa i nukapas kamkunawa suglla niraiagta.

²¹ —Maikanpas nuka ima niskata iachaspa suma ruragkunami sutipa nukata kuiawag kankuna. Nukata kuiawagkunataka, nukapa Taitapasmi kuianga. Nukapas, paikunata nuka kuiag kagta kawarisami.

²² Chiura sug Judas, mana Iskariote kagka, tapurka:
—Taita waugki, ¿imapatak nikungi, kai alpapi tiaskakunallawa iuiagkunata mana kawarispalla, nukanchillata kawaringapa?

²³ Chiura, Jesuska ainirka:

—Maikan nukata kuiawagkunaka, nuka imasa niskatami rurangakuna. Paikunataka, nukapa Taitapasmi kuianga. Kuiaspaka, samusunchimi, paikunapi kaugsadiru rurangapa. ²⁴ Ikuti nukata mana kuiawagkunaka, nuka ima niskata mana rurangapa kankunachu. Chi rimaikuna kamkuna uiawanakuskaka, nukapa iuiailawa mana kanchu. Nukapa Taita kachamuwaska, paipa iuiaitami willanakuikichita.

²⁵ —Nuka, chara kamkunawa kankamallami tukui chi rimaikunata willanakuikichita. ²⁶ Santu Ispiritutaka nuka mañaskamandami nukapa Taita kachamungapa ka.

Pai Ispíritu kamkunata sumaglla iuiachig, samuspaka, tukui imasa kaskasinami iachachigsamungapa ka. Nuka kamkunata kunaura tukui ima willaskatapasmi ikuti iuiachingapa ka.

²⁷—Kamkunata sakiikichitami, nukasinallatata sumaglla kaugsangapa, parijuma mana manchana-kuspalla. Chi suma kaugsai mana kanchu imasa kai alpapi tiaskakunallawa iuiagkuna kaugsankuna: chasa. Chimanda, mana llakispa manchaspa kangichi. ²⁸Ñami willarkaikichita: “Nukaka rikunimi. Chasa kagpipas, kamkunapagma ikutimi samusa”. Kamkuna sutipa kuiawagpika, nukapa Taitapagma rikugmanda uiaspa, iapami kuntintarinrangichi. Nukapa Taita, nukamanda mas atunmi ka. ²⁹Kunaura, manara chasa chaiagpimi willaikichita; chasa pasariuraka, kamkuna, nuka ima willaskata iuiarispa, suma iuiawangapa.

³⁰—Kasapas. Iaia kuku kai alpapi mandag samukugmandami nuka kamkunawa mana iapa rimangapa kani. Chi iaia kukuka mana iukancho nukawa ñi imapas kawanga. ³¹Pai chasa samukugpipas, nukataka chaiawakumi, kai alpapi kaugsagkunata kawachingapa, nukaka nukapa Taitata kuiagta; chasallata, nukapa Taita imasa niwaskasina nuka rurag kagta.

—Atariichi. Kaimanda akushi.

Jesús, ubas alli sachasina kaskamanda

15 Kasapasmi Jesús nirka:
—Nukami kani ubas alli sachasina. Nukapa Taitaka, chi suma sachata almagsinami ka. ²Sachata almag, malki mana muii apariskakunata kuchunmi. Ikuti malki muii iukaskakunataka ladu ladu malkikunata anchuchispa, suma almaspami sakí; chasaka, mas suma muiukuna tiaringapa. ³Kamkuna, nuka ima rimaskata uiawaspaka, ñami alli malkikunata almasksina kangichi. ⁴Nukawa kaichi. Nukapas, kamkunawami kasa. Imasami malki, kikin sachama mana llutaraiaipika, ñi ima muii mana tiaringapa ka: chasallatami kamkuna, mana nukawa sugllapi kagpika, chi mana muiuiug malkikunasina kanrangichi.

⁵—Nukami kani chi ubas alli sachasina. Kamkunami chi malkikunasina kangichi. Maikan nukawa sugllapi kag, nukapas paiwa kagpika, paika achka mikui muii iukagsinami ka. Mana nukawa sugllapi kaspaka, ñi imapas mana pudingapa kangichichu. ⁶Imasami malki sachamanda anchuchiska, ña tusta kauraka, tandachispa, ninapi sitankuna rupangapa: chasallatami maikan mana nukawa sugllapi kagkunaka, sitai tukungapa kankuna.

⁷—Kamkuna nukawa sugllapi kaspaka, nuka imasa niskata ruraspaka, tukui ima mañaskaka chaskinkangichimi. ⁸Kamkuna achka mikuisina iukaskawa nukapa Taitata sumami atuniachipuungapa kangichi. Chasaka, nukapa iachaikugkuna kagtami kawachingapa kangichi.

⁹—Imasami nukapa Taita, nukata kuiawá: chasallatami nukapas, kamkunata kuiaikichita. Chiwanka, sumaglla kaugsanakungichi, nukapa kuiaskakuna kangapa. ¹⁰Nukapa Taita ima niwaskata nuka ruraspaka,

paipa kuiaskami kani. Chasallata kamkunapas, nuka ima niskata ruraspaka, nukapa kuiaskakunami kangangichi. ¹¹Chasa niikichitami, nuka kamkunawa iapa suma alli iuiachiiwa kangapa. Chasaka kamkunapas, nukawa iapa suma iuiachiiwami tukuipi allilla kankangichi.

¹²—Kasa rurangapami niikichita: imasami nuka, kamkunata kuiaikichita: chasallata kamkunapas, kam kikipura kuianakuspa kaugsangichi. ¹³Maikanpas paipa kuiaska iacharidukunamanda wañugpika, tukui-kunamandapas mas kuiagmi ka. ¹⁴Nuka ima niskata kamkuna ruraspaga kagmandami nukapa kuiaska iacharidukuna kapuangichi.

¹⁵—Lutrinkuna mana iachankunachu, taitakuna ima ruranakugta. Chimandami kamkunata mana niikichita: “Lutrinkuna”. Kunauramanda, nukapa kuiaska iacharidukunami kapuangichi. Nukapa Taitata tukui imasa uiaskasinami kamkunata willaspa iachachirkaikichita.

¹⁶—Kamkuna mana nukata agllawarkangichichu. Nukami kamkunata agllarkaikichita. Chasaka, kamkuna maima riskapi, malki suma muiuiugsina kaspaka, allillami ruragrangichi. Chi alli ruraskakunaka, ñi imaurapas mana puchukaringapa kanchu. Chiwanka, tukui ima nukapa Taitata nukamanda iuiarispa mañagpikunaka, paimi kamkunata karangapa ka. ¹⁷Kasa rurangapami niikichita: kam kikipura kuianakuspa kaugsangichi.

Kai alpapi tiaskakunallawa iuiagkuna, Jesusta kati-raiagkunatapas mana munagmanda

¹⁸—Kai alpapi tiaskakunallawa iuiagkuna kamkunata mana munagpika, iuiaringichi: paikuna ñugpami nukata mana munawarkakuna. ¹⁹Kamkuna kai alpapi tiaskakunallawa iuiagkunasina kagpi, paikuna kikipurasinami kamkunata kuiantrakuna. Kamkuna mana kangichichu kai alpapi tiaskakunallawa iuiagkunasina. Nukami kamkunata kai alpapi kaugsanakuskapamanda agllarkaikichita. Chimandami kai alpapi tiaskakunallawa iuiagkuna, kamkunata wabutispa, mana munankuna. ²⁰Nuka ima rimaskata iuiariichi: “Lutrin, paipa taitakunamanda mas atun mana kanchu”. Nukata mana munawagkuna, kamkunatapasmi mana munangapa kankuna. Nuka ima rimaskata uiaspa ruragkunaka, kamkuna imasa rimaskakunatapasmi chasallata uiangapa kankuna. ²¹Ikuti mana uiagkunaka, nukata kachamuwagta mana rigsispami kamkunata chasa tukui imapas jiru rurangapa kankuna, kamkuna nukawa tukugmanda.

²²—Nuka mana samuspa, paikunata rimagsamunimi; paikuna, pandariskapas, manachar pandariska niraiantra. Chimanda, kunaura mana pudinkunachu ningapa: “Nuka mana iacharkanichu”. ²³Maikanpas nukata mana munawag, nukapa Taitatapasmi mana munag ka. ²⁴Mana pipas kawaskasinata, paikunapa ñawipi, nuka mana ruragsamunimi; paikuna, pandariskapas, manachar pandariska niraiantra. Chimanda kunaura, nuka ima ruraskata kawaspapasmi nukata mana munawankuna. Chasaka, nukapa Taitatapasmi

mana munapuankuna. ²⁵ Imasa paikunamanda ñugpa-
 manda librupi willaraiaskasinami tukugsamuku. Kasa-
 mi niraiá: “Iangami nukata mana munawarkakuna”.

²⁶ —Kasapas. Sumaglla iuiachigtami nukapa Taita-
 pagmanda kachamusakichita. Pai Santu Ispíritu kanmi
 ñi imapi mana llullaspalla sutipa kaskata willag. Nuka-
 pa Taitapagmanda samuspa, nukamandami tukuipi
 allilla willangapa ka. ²⁷ Chiuramandami kamkunapas,
 nukawa ñugpamandata kaspera, suma allilla iuiarispa,
 nukamanda willangapa kangichi.

16 —Chimandami ña nirkaikichita, kamkuna chasa
 pasarikuuraka, nukamanda ñi imapipas mana
 sug rigcha iuiawanakungapa. ² Kamkunata judiukuna
 tandaridiru wasikunamandami llugsichingapa kan-
 kuna. Chi punchakuna chaiaura, maikanpas kam-
 kunata wañuchispaka, iuianakungami: “Taita Dius
 imasa munaskasinami allilla rurakuni”. ³ Nukapa Taita-
 ta ñi nukata mana rigsispami chasa rurangapa kan-
 kuna. ⁴ Nuka willaspami sakiikichita, chasa chaiaura,
 nuka ima willaskata iuiaringapa.

Santu Ispíritu ima rurangapa kaskamanda

—Nuka mana ñugpa willarkaikichitachu, kamkunawa
 kaspera. ⁵ Ikuti kunaauraka, nukata kachamuwagpagma-
 mi ringapa kani. Ñi pipas mana tapuwangichichu:
 “¿Maimatak rikungi?”. ⁶ Nuka chasa rimaskamandami
 kamkuna, iapa irkiaspa, sungu nanagta llakiiwa kangi-
 chi. ⁷ Chasa kagpipas, sutipa kaskatami kasa niikichita:
 nuka, kamkunamanda allillapami rikuni. Nuka mana
 rigpika, kamkunata sumaglla iuiachig Santu Ispíritu
 mana samungapa kanchu. Nuka rispaka, paita kam-
 kunapagmami kachamusa.

⁸ —Pai samuspaka, kai alpapi tiaskakunallowa iuiag-
 kunata iuiachingapami ka mana allilla ruranakugta.
 Imasa chaiaskasina allilla rurangapami iuiachingapa
 ka. Kasapas. Taita Dius justisiag kagtami iachachinga-
 pa ka. ⁹ Nukata rigsingapa mana munawagmandami
 paikunata iuiachingapa ka mana allilla ruranakugta.
¹⁰ Nukapa Taitapagma riura, kamkuna mana mas
 nukata kawawangapa kangichichu. Chimandami pai,
 imasa chaiaskasina allilla rurangapa iuiachingapa ka.
¹¹ Iaia kuku kai alpapi mandag ñami justisiai tukuska
 ka. Chasa Taita Dius justisiag kagtami pai tukuipi iuia-
 chispa iachachingapa ka.

¹² —Kamkunata willangapa, achkami iukani. Chasa
 iukagpipas, kamkuna kunaura manima tukuimanda
 iachaikui pudingapa kangichichu. ¹³ Santu Ispíritu ñi
 imapi mana llullaspalla sutipa kaskata willagmi
 samungapa ka. Paika, samuspa, tukui imasa sutipa
 kaskatami kamkunata allilla suma iuiachispa iacha-
 chingapa ka. Mana rimangapa ka pai kikinpa iuiaila-
 wa. Taita Dius ima niskata uiaskatami kamkunata
 willangapa ka. Imasa mas kipama chaiangapa kaskata-
 pasmi willangapa ka. ¹⁴ Nuka rimaskata chaskiwaspa-
 mi kamkunata mas allilla iachachigsamungapa ka.
 Chasamandami pai nukata suma atuniachiwangapa
 ka. ¹⁵ Nukapa Taita tukui ima iukaska, nukapami ka.

Chimandami niikichita: “Nuka rimaskata chaskiwaspa-
 mi kamkunata mas allilla iachachigsamungapa ka”.

Llakiiwa kagkuna, alli iuiachiiwami tukungapa kankuna

¹⁶ Kasapasmi Jesús nirka:

—Sug mana unaila, nukata mana kawawangapa
 kangichichu. Sug raturama, ikutimi kawawangapa
 kangichi.

¹⁷ Chiuraka paita sug katiraiagkuna, kikinpura tapuri-
 nakurka:

—Nukanchita chasa rimaika, ¿imatak niraiá? “Sug
 mana unaila, nukata mana kawawangapa kangichi-
 chu. Sug raturama, ikutimi kawawangapa kangichi”.
 Kasapasmi nirka: “Nukapa Taitapagmami ringapa
 kani”. ¹⁸ Chi mana unaila, ¿imasik niraiá? Chasa rimai
 ima niraiagta mana iachanchichu.

¹⁹ Jesuska, paikuna chasa tapungapa iuianakuskata
 iachaspa, nirka:

—Kasami nirkaikichita: “Sug mana unaila, nukata
 mana kawawangapa kangichichu. Sug raturama, ikuti-
 mi kawawangapa kangichi”. Chasa rimaikuna-
 mandaka, ¿manachu kamkunapura tapurinakungichi:
 “¿Imatak niraiá?”? ²⁰ Kasami nuka niikichita: kamkuna,
 iapa llakirispami wakankangichi. Ikuti kai alpapi tiaska-
 kunallowa iuiagkunaka, sumami kuntintaringakuna.
 Kamkunapa llakiiwami iukaskaka, iapa alli iuiachiiwami
 tukungapa kangichi.

²¹ —Maikan warmi, wawita iukangapa puncha chaia-
 kuuraka, sinchi llakiiwami ka. Nispaka, wawita tiag-
 samuuraka, chi llakii iukaskata ñi ima mana iuiarí. Sug
 wawita kai alpama chaiachigsamuskamandami alli
 iuiachirí. ²² Chasallata kamkuna, kunaura sutipami iapa
 llakiiwa kangichi. Nuka kamkunata ikuti kawarigsamu-
 uraka, iapa alli iuiachiiwami tukungapa kangichi. Chi
 alli iuiachiitaka, ñi pipas kamkunapa sungumanda
 mana kichungapa pudingapa kankunachu.

²³ —Chi puncha, ñi imamandapas mana tapuchiwan-
 gapa kangichichu. Kasami nuka niikichita: nukamanda
 iuiarispa, tukui ima nukapa Taitata kamkuna mañagpi-
 ka, paika tukuimi karamungapa ka. ²⁴ Kunankama
 kamkuna, nukamanda iuiarispa, manara imapas
 mañaska kangichichu. Chasa mañaichi, chaskingapa.
 Chiwanka, kamkunapa iapa alli iuiachiiwami tukunga-
 pa kangichi.

Jesusta katiraiagkuna mas nispa allilla iachangapa, pai niskamanda

²⁵ Kasapasmi Jesús nirkakunata:

—Iuiar apingasina parlukunallowami rimarkaikichita.
 Ñami chaimuwangapa ka, mana parlukunallowa
 chasa rimangapa. Chiurami tukui allilla nukapa Taita-
 manda willasakichita. ²⁶ Chi punchami, nukamanda
 iuiarispa, nukapa Taitata mañangapa kangichi. Mana
 niikichitachu: nukami kamkunamanda nukapa Taitata
 mañapusakichita. ²⁷ Nukapa Taita kikinmi allilla kam-
 kunata kuiá, kamkuna nukata kuiawaspa, nuka Taita
 Diuspagmami llugsispa samuska kagta suma iuia-

wagmanda. ²⁸ Sutipami niikichita: nukapa Taitapag-manda llugsispami kai alpama samurkani. Kunauraka, ikuti kai alpata sakispa, nukapa Taitapagmami ringapa kani.

²⁹ Chiura, Jesusta katiraiagkuna nirkakuna:

—Kunaurami nukanchita allilla willakungi, mana iuiiai apingasina parlukunallawa. ³⁰ Kunaurami iachanchi, kam tukui iachagta. Chimandami mana ministingi, ñi pipas kamta tapuchingapa. Chasamandami suma iuiianchi, kam Taita Diuspagmanda llugsispa samuska kagta.

³¹ Chiura, Jesuska nirka:

—¿Sutipachu kunaura suma iuiawangichi? ³² Chaiamungapa puncha ñami chaiamurka; kamkunaka, kam kikinkunapagmami mitikungapa kangichi. Chasaka, nukata sapallami sakiwangapa kangichi. Chasa kagpipas, nukaka mana sapalla kanichu. Nukapa Taitami nukawa ka. ³³ Chasami rimaikichita, kamkuna kai alpapi iapa llakiiwa kaspapas, nukawa suma iuiarispaka, mana llakiiwa kagsina kangapa. Chasa iapa llakiiwa kaspapas, mana manchanakungichi. Nukaka, iaia kuku kai alpapi mandagta ñami mitikuchirkani.

Paita katiraiagkunamanda Taita Diusta, Jesús mañaskamanda

17 Chasa nispaka Jesús, awasinama kawaspa, kasami nirka:

—Taitiku, nukapa puncha ñami chaiamurka. Nuka kamba wambra kagta suma atuniachiwai; chasaka, nukapas kamta atuniachingapa. ² Kam, tukuikunatami nukapa makipi churarkangi, tukui kam agllapuaskakunata mana puchukariduru suma kaugsaita nuka karangapa. ³ Kam sutipa suglla Taita Dius kagta i nuka Jesucristo kam kachamuwaska kagta rigsikgunami chi mana puchukariduru kaugsaita iukankuna.

⁴—Nukaka, kam tukui imasa niwaskasina rurai puchukaspami kai alpapi suma atuniachirkaiki. ⁵ Kunaura, Taitiku, imasami, ñi imapas manara tiagpita, nuka kamwa suma atuniachiska karkani: chasallata kuna-ura, nukata kamllawanta suma atuniachiwai.

⁶—Kammi, kai runakunata kai alpapi kaugsagpura-manda agllaspa, nukapa makipi churarkangi. Paikunata, kam imasa kaskasinami nuka willarkani. Paikuna, kambami karkakuna. Kammi nukapa makipi churarkangi. Kamba rimaita allilla uiaspa, mana kungaris-pallami kankuna. ⁷ Chiwa, kunaura iachankunami, tukui ima nuka iukaskaka kam karawaskata, nuka chaskiska kagta. ⁸ Kam ima niwaskata paikunata willarkanimi. Paikuna, nuka ima willaskata suma iuiaspa, sutipami iachankuna, nuka kambagmanda llugsispa samuska kagta. Kam nukata kachamuwaska kagtapasmi sumaglla iuianakú.

⁹—Paikunamandami nuka mañakuiki. Mana mañakuikichu kai alpapi tiaskakunallawa iuiagkunamanda. Kam nukapa makipi churaskakunamandami mañakuiki, paikuna kam kikinpa kagmanda. ¹⁰ Tukui nukapakuna, kambami ka. Chasallata tukui kambakuna,

nukapami ka. Paikunapimi nuka suma atuniachiska tukuni.

¹¹—Nuka, ña mana kai alpapi kangapa kanichu. Paikunakar, charami kai alpapi kangapa kankuna. Nuka rikunimi, kamwa kangapa. Tukuipi mas alli Taitiku, kam nukapa makipi churaska runakunata kamba iapa iachaiwa charipuaikunata; chasaka, imasami nukanchi, suglla kanchi: chasallata paikunapas, suglla iuiiwa kangapakuna. ¹² Nuka, paikunawa kankama, kam nukapa makipi churaskakunata kamba iapa iachaiwa allillami kawaspa charirkanikunata. Paikuna, ñi sugmana chingarkachu. Chi chingaringapa niraiaska runallami chingarka, imasa ñugpamanda librupi willariaskasina tukugsamungapa.

¹³—Kunauraka nuka, kambagmami rikuni. Kai alpapi chasami rimakuiki, paikunapas, suma kuntintarispa, nukapa alli iuiachiiwa tukungapakuna. ¹⁴ Paikunata, kam imasa niwaskasinami willarkani. Imasami nuka, mana kai alpamanda kani: chasallatami paikunapas, mana kai alpapi tiaskakunallawa iuiagkunasina kankuna. Chimandami kai alpapi tiaskakunallawa iuiagkuna, paikunata mana munankuna. ¹⁵ Mana mañakuikichu: kam, kai alpamanda paikunata llugsichipuui. Tukui mana allilla ruraikunamanda kispichipuui, paikunamanda mañakuiki. ¹⁶ Imasami nuka, mana kai alpamanda kanichu: chasallatami paikunapas, mana kai alpapi tiaskakunallawa iuiagkunasina kankuna. ¹⁷ Tukuipi sutipa kaskata paikunata sumaglla iuiachipuui, paikuna kamballa kangapa. Kamba rimai, tukuipi sutipami ka. ¹⁸ Imasami kam, nukata kai alpama kachamuwarkangi: chasallatami nukapas, paikunata kachakuni, kai alpapi willaspa puringapa. ¹⁹ Paikuna allilla kangapami nuka ikuti niiki: “Kamballami kani”; chasaka paikunapas, kamba mana llullaspalla sutipa rimaiwa kamballa kangapakuna.

²⁰—Kaipi kagkunamandalla mana mañakuikichu. Paikuna nukamanda willaskakunawa tukui suma iuiawanakugmandapasmi mañakuiki; ²¹ chasaka tukui-kuna, suglla niraiangapa. Imasami kam Taitiku nukawa suglla kangki i nuka kamwa suglla kani: chasallata paikunapas, nukanchiwa suglla niraiangapami mañakuiki. Chasaka, kai alpapi tiaskakunallawa iuiagkunas iachangakunami, nukaka kam kachamuwaska kagta.

²²—Kam imasami nukata suma atuniachiwarkangi: chasallatami nukapas, paikunata atuniachirkani; chasaka, imasami nukanchi, suglla kanchi; chasallata paikunapas, suglla niraiangapa. ²³ Nuka paikunawa sugllapimi kani; kamps nukawa sugllami kangki; chasaka paikunapas, tukuipi suglla niraiangapa. Chasaka, kai alpapi tiaskakunallawa iuiagkunas iachangakunami, kam nukata kaima kachamuwaska kagta. Kasapasmi iachangakuna: kam imasami nukata kuiawangi: chasallatami paikunatapas kuiangi.

²⁴—Taitiku, kam nukapa makipi churawaskakunamanda, kasami munani: nuka suma luarpi kaura, paikunapas chipi nukawa kagrachukuna; chipika, nuka suma atuniachiska kaskata kawawangapa. Kai alpa

manara tiagpita kam, nukata kuiawaspami suma atun-iachiwarkangi.

²⁵ —Tukuipi allilla rurag Taitiku, kai alpapi tiaskakunallawa iuiagkuna mana kamta rigsippipas, nukami allilla rigsiiki. Kaipi kagkunaka iachankunami, kam nukata kachamuwaska kagta. ²⁶ Paikunata, kam imasa kaskasinami nuka willarkani. Masmi paikunata willangapa kani; chiwanka, imasami kam kuiawang: chasallata, pai kikinpurapas kuianakuspa kaugsangapa; chasaka, nuka paikunawa suglla tukuska kangapa.

Jesusta apiskakunamanda

18 Chasa nispaka Jesús, paita katiraiagkunawa llugsispa, Kedrón suti iaku sug ladu chimba rispa, sug wirta tiaskama iaikugrikkakuna. ² Chi wirtata Judas, Jesusta apichingapa kag, allillami rigsirka. Chipimi karka Jesuswa tukui katiraiagkunawa tandariduru. ³ Chimanda Judaska, suldadukunata, i iaia sasirdutikuna i fariseokuna kachaska alwasilkunata pusaspa, chi wirtama chaiagrikkakuna, lintirna, nina sindi i wañuchinakuduru charispa.

⁴ Jesuska, tukui imasa pasangapa kagta iachaspa, chaianakuskata kailliaspa, tapurka:

—¿Pitatak maskanakungichi?

⁵ Chiura ainirkakuna:

—Nazaret puiblumanda Jesusta.

—Nukami kani— Jesús nirka.

Judas paita apichigpasmu chi alwasilkunawa karka.

⁶ Jesús “Nukami kani” niura, chipi kagkunaka, katima kutirispa, alpama urmarkakuna.

⁷ Ikutimi Jesuska tapurkakunata:

—¿Pitatak maskanakungichi?

Chiura ainirkakuna:

—Nazaretmanda Jesusta.

⁸ Chasa ainiura, Jesuska nirka:

—Ñami nirkaikichita: “Nukami kani”. Nukata maskawanakugpika, kai nukapa runakunata ianga kawaichi richukuna—. ⁹ Chasaka nirkami, ñugpamanda librupi imasa willaraiaskasina tukugsamungapa. Chipika, kasami niraiá: “Kam nukata mingawaskakunaka, ñi sug mana chingachirkanichu”.

¹⁰ Chiura Simón Pedroka, ispada charikuskata surkuspa, Malko suti iaia sasirdutipa lutrinta piaspa, alli ladu rinrita ialigta kuchurka. ¹¹ Jesuska, Pedrola nirka:

—Kamba ispadata churachidirullapita wakachii.

Nukata chaiawakumi, nukapa Taita imasa niwaskasina iapa llakii iukangapa. †

¹² Chiuraka suldadukunata mandag i judiukunapa alwasilkuna, tukuikuna, Jesusta apispa, watarkakuna.

¹³ Nispaka, Anaspagma ñugpa chaiachigrikkakuna. Anaska, Kaifaspa suigrumi karka. Kaifaska, chi wata iaia sasirdutimi karka. ¹⁴ Chi Kaifasmi, judiukunata iuiachispa, kasa niska karka: “Kai alpapi tukui kaugsanakuskamanda chaiakumi, suglla runa wañungapa”.

Jesusta mana rigsinihu, Pedro musuglla niskamanda

¹⁵ Jesusta chaiachinakugriura, Simón Pedro i sug katiraiagpura katichinakurka. Iaia sasirdutipa wasi kancha ladulla Jesusta iaikuchigriuraka, chi sug katiraiagpas iaikurka, iaia sasirdutipa rigsidu kaspá. ¹⁶ Pedro, kancha pungullapi saiakurka. Ikuti iaia sasirdutipa rigsiduka, ukupi kaspá, llugsispa, pungu kawag warmita rimaspa, Pedrola iaikuchirka. ¹⁷ Chiura chi warmika, Pedrola tapurka:

—¿Manachu kampas, Jesusta katiraiagpura kangi?

—Mana kanichu— ainirka.

¹⁸ Iapa chiri kagmánda, iaia sasirdutipa lutrinkuna i alwasilkuna, kilimsa nina sindichispa, kununakurka. Pedropas, paikunawa kunukurka.

Iaia sasirduti kaskapi, Jesús kaskamanda

¹⁹ Iaia sasirdutika, Jesusta katiraiagkunamanda i pai ima iachachikuskamanda paita tapuchirka. ²⁰ Chiura, Jesuska ainirka:

—Tukui kawanakuurami nuka rimakurkani. Imaurapas tandariduru wasikunapi i Diospa atun wasi ukupi, maipi tukui judiukuna tandariduru kaskakunapimi iachachikurkani. Pakallaka, ñi imapas mana rimakurkanichu. ²¹ ¿Imapatak nukata chasa tapuchiwakungu? Uiwagkunata tapuchii, nuka ima paikunata rimagta. Paikuna iachankunami nuka ima rimaskata.

²² Jesús chasa niura, sug alwasil paipa ladu saiakug, paita puñitiwa piaspa, nirka:

—¿Chasachu atun taitata ainiduru?

²³ Chiura, Jesuska ainirka:

—Imapi nuka mana allilla rimaska kagpika, chita willawai. Nuka allilla rimakugpika, ¿imapatak piawakungu?

²⁴ Nigpi Anaska, Jesusta wataskalla kacharka, Kaifás suti iaia sasirdutipagma.

Jesusta mana rigsinihu, Pedro parisma niskamanda

²⁵ Chikama Simón Pedro, nina kunuspa saiakurka. Paita kawaspaka, tapurkakuna:

—Kampas, ¿manachu Jesusta katiraiagpura kangi?

Paika ainirka:

—Mana kanichu.

²⁶ Chiura iaia sasirdutipa sug lutrin, Pedro rinrita kuchuska runapapuraka, tapurka:

—Jesús kadiru wirtapi, ¿manachu nuka kamta kawarkaiki?

²⁷ Ikuti Pedro ainirka:

—Chipika, nukaka manima karkanichu.

Chasa nigllapi, gallu kantarka.

Mandag Pilatos kaskapi, Jesús kagriskamanda

²⁸ Kaifaspagmánda Jesusta aparkakuna Romamanda mandagpa suma tiaridiruma. Iapa tutatami karka. Judiukuna, chi ukuma mana iaikurkakuna; chasaka, paskua pucha mikudiruta mikui pudingapa. Mana judíu runakunapa wasima iaikuspaka, mapakunasina-

† “Winja kupata upiangapa”, iapa llakii iukangapami niraiá.

mi paikunamandaka niraiarka. ²⁹Chimanda mandag Pilatoska, kanchama llugsispa, tapurkakunata:

—Kai runa, ¿ima mana allilla ruraskamandatak willawangapa samunakungichi?

³⁰Chiura ainirkakuna:

—Kai allilla rurag kagpika, manachar kambagma apamuntranchi.

³¹Pilatoska nirka:

—Chasa kagpika, kamkuna iachaichi. Imasa kamkunapa ñugpamanda librupi niraiaskasina paita ruragriichi.

Chasa niura, judiukuna nirkakuna:

—Nukanchita mana lisinsiaraiianchu, ñi pitapas wañuchingapa—. ³²Chasa nirkakuna, Jesús kikin imasa pai wañungapa kagta, ñugpa willaskasina tukug-samungapa.

³³Pilatoska, pai suma tiaridiruma ikuti iaikuspaka, Jesusta kaiaspa, tapuchirka:

—Kam, ¿judiukunapa atun mandagchu kangi?

³⁴Chiura, Jesuska ainirka:

—¿Kamba iuiaillawachu chasa ningi? Mana kagpika, ¿sugkunachu kamta chasa nukamanda nirkakuna?

³⁵—Nuka, mana judíu kanichu— Pilatos ainirka—. Kamba alpamanda runakuna i iaia sasirdutikunami kamta kaima apamurkakuna. ¿Imatak ruraspa purikurkangi?

³⁶Chiura, Jesuska ainirka:

—Nukapa mandai, kai alpamanda mana kanchu. Kai alpamanda nukapa mandai kagpika, nukapa runakunachar michawantrakuna, judiukuna mana apiwangapa. Kai alpamanda, nukapa mandai mana kanchu.

³⁷Chiura, Pilatos tapurka:

—Chasa kagpika, ¿atun mandagchu kangi?

—Kam allillami ningi— Jesuska ainirka—, “Nuka, atun mandagmi kani”. Chasapami nuka kai alpama samurkani, ñi imapi mana llullaspalla sutipa kaskata willangapa. Maikan sutipa kaskata uangapa munagkuna, nuka ima rimaskata uiawankunami.

³⁸Chasa uiaspa, Pilatoska nirka:

—Kam chi sutipa kaskata willakuska, ¿imatak niraiá?

Jesusta wañuchigriichi, Pilatos niskamanda

Chasa nispaka Pilatos, kanchama ikuti llugsispa, judiukunata nirka:

—Chi runata mana tarinichu, ñi imapas pandariska kagta. ³⁹Kamkuna imasa kustumbri kaskasina, sug runata kacharingapami chaiawá, paskua puncha chaiakugmanda. Nigpika, ¿munankangichichu, judiukunapa atun mandagta nuka kacharingapa?

⁴⁰Judiukunaka, ikuti kaparispa, nirkakuna:

—Paitaka, mana. Barrabasta kacharii—. Barrabás, iapa isaيمي karka.

19 Chiura Pilatoska, Jesusta mana llakispalla iapa asutichirka. ²Chiuramanda suldadukunaka, ispinakunalla llaugtu simbaspa, paita umapi churachirakuna. Sutipa mandagsina kawaringapa, pichi katangapas katachirkakuna. ³Nispaka, paita kamispa, kaillaiaspa, nii kallarirkakuna:

—Puangi, kam judiukunapa atun mandag. ¿Allillachu kapuangi?—. Chasa nispaka, paita puñitiwa piaspa richirkakuna.

⁴Chiuramanda Pilatoska, ikuti kanchama llugsispa, judiukunata nirka:

—Kawamuichi. Kai kanchamami pusamukuni, kamkuna kawangapa: paita mana tarinichu, ñi ima pandariska kagta.

⁵Chiura Jesús, ispinakunalla llaugtu churachii tukuska, pichi katanga katarispa, kanchama llugsirka. Chiura, Pilatoska nirkakunata:

—Kawamuichi kai runata.

⁶Jesusta kawaspa, iaia sasirdutikuna i alwasilkunaka kaparirkakuna:

—Kruspi churai. Kruspi churaspa wañuchii.

Chasa uiaspa, Pilatoska nirka:

—Kamkuna paita apaichi, kruspi churangapa. Nuka mana tarinichu, pai ñi ima pandariska kagta.

⁷Chiura, judiukunaka ainirkakuna:

—Nukanchipa mandaraiaskapi niraiianmi, maikanpas Taita Diospa wambra tukuska nigta wañuchingapa.

⁸Chasa rimaskata uiaspaka, Pilatos masmi mancharirka. ⁹Chi wasi ukuma ikuti iaikuspaka, Jesusta tapurka:

—Kam, ¿maimandatak kangi?

Jesuska, mana imapas ainirka.

¹⁰Ikuti Pilatos tapurka:

—¿Imapatak nukata mana ainiwangi? ¿Manachu iachangi, nuka kamta kacharingapa u kruspi churachingapa pudigta?

¹¹Chiura, Jesuska ainirka:

—Awa luarnigmanda kamta mana kuagpika, manachar pudinrangi ñi imapas nukata rurawangapa. Chiuramanda kambagma apamuwagkuna, kammanda mas atun pandariikunami iukankuna.

¹²Chiuramanda, Pilatos maskakurka, imasapipas Jesusta kispichingapa. Judiukunaka, mas sinchi mas sinchi kaparirkakuna:

—Chi runata kacharigpika, kamka Romapi iaia mandagwa manachar kankangi ñi paipa rigsitudinallapas. Maikanpas atun mandag tukungapa munag, Romapi iaia mandagta llugsichingapami muná.

¹³Chasa uiaspa Pilatoska, Jesusta llugsichispa, atun mandag justisiai ruradirupi tiarigrirka. Chi tiariduru suti karkami “Rumiwa alpa pambaiachiska”. Hebreo rimaiwaka suti karkami “Gabata”. ¹⁴Paskua atun punchapa allichiduru puncha, chara tutatami karka. † Tiarigrispaka, Jesusta kawachispa, judiukunata nirka:

—Kawamuichi kamkunapa atun mandagta.

¹⁵Paikunaka kaparirkakuna:

—Anchuchii. Anchuchii. Kruspi churaspa wañuchii.

Chiura, Pilatos tapurka:

—¿Kamkunapa atun mandagtachu kruspi klabachisa?

Chiura, iaia sasirdutikunaka ainirkakuna:

—Romamanda iaia mandagllami nukanchika iukanchi. Ñi sug mas mandag mana iukanchichu.

† Griego rimaiwa: sugtama urami karka.

¹⁶ Chiura Pilatoska, Jesusta kruspi klabangapa kacharka. Chimanda, Jesusta llugsichispa aparkakuna.

Jesusta kruspi klabagriskakunamanda

¹⁷ Jesuska, krusta markaspa, Uma Tullu suti pambama rii kallariirka. (Chi pamba, hebreo rimaiwa suti karkami Gólgota.) ¹⁸ Chipi chaiagriuraka, paita kruspi klabarkakuna. Sug iskaikunatapas paiwa sugllapi kruspi atarichirkakuna, sug sug kada ladu, Jesuska chaugpipi.

¹⁹ Pilatos kasa iskribiska churangapa kacharka: “Nazaretmanda Jesús, judiukunapa atun mandag”. Chasa willaraiaskataka krus uma awa ladu churarkakuna. ²⁰ Jesusta kruspi churaskamanda, Jerusalén puibluma mana karullami karka. Chi willaraiaska, hebreo, latín i griego rimaiwipi iskribiraiarka. Chitaka, achka judiukuna kawarkakuna. ²¹ Chimanda iaia sasirdutikunaka, Pilatosta nigrirkakuna:

—Mana chasa churakui: “Judiukunapa atun mandag”. Chasapaka, kasa niraiachu: “Pai kikinmi nirirka: ‘Judiukunapa atun mandagmi kani’.”

²² Pilatoska ainirka:

—Nuka churaska kaska, churaskami ka.

²³ Suldadukunaka, Jesusta kruspi churaspa, paipa katangakunata chuskuma churarkakuna; chasaka, suldadupura sug sug apangapa. Jesús churaraiaska kusmasinaka, awamandata urakama tukui awaskallami karka, ñi imapi mana siraska. ²⁴ Chimanda suldadukunaka, paipura rimarirkakuna:

—Kaitaka mana llikichisunchi. Suirtipi pugllasunchi. Chasaka kawasunchimi: pitami chaiá—. Ñugpamanda librupi, kasami willaraiarka: “Nukapa katangakunata paipurami rasiunarirkakuna. Nuka churaraiaska kusmasinata suirtipimi pugllarkakuna”. Chasami suldadukuna rurarkakuna.

²⁵ Jesusta klabaspa atarichiskapi, paipa mama ñañandimi sugllapi saianakurka. María suti Kleofaspa warmi i María Magdalenapas, chillapita paikunawa karka.

²⁶ Paipa mama i paipa sug iapa kuiaska katiraiag sugllapi saianakugta, Jesús kawarka. Chasa kawaspaka, mamandita nirka:

—Kamba wambrata kawai.

²⁷ Chasallata, chi katiraiagtaka nirka: —Kamba mamata kawai.

Chiuramandaka, paipa wasima Jesuspa mamata pusarka, chipi kaugsangapa.

Jesús wañuskamanda

²⁸ Jesuska ña iacharka, tukui imasa kikinmanda willaraiaskasina puchukarikugta. Chimandami, ñugpamanda librupi imasa willaraiaskasina tukugsamungapa, nirka:

—Iakunaiawakumi.

²⁹ Chipi tiarka winja binu sug uchulla mangapi jundachiska. Chi binutaka sug ispunjawa aisaspa, hisopo suti birbina sachasina chaglla puntapi churaspa, Jesuspa simima atarichirka, chupachingapa.

³⁰ Chi binuta chupaspaka, Jesuska nirka:

—Tukuimi imasa willaraiaskasina tukugsamurka—. Chasa nispaka, uma kumurispa, paipa ispirituta Taita Diusta mingaspa, wañurka.

Jesuspa kustillapi, lansawa tugsiskamanda

³¹ Warda punchapa tukui suma allichiduru punchakarka. Kaiandika warda puncha kagmanda, judiukuna mana munarkakuna, kuirpukunata kruspi sakingapa. Chi kaiandi iapa atun warda puncha kagmanda, paikunaka Pilatosta mañagirkakuna:

—Kruspi churaskakunata chakikunata pakichispa, chimanda anchuchii.

³² Pilatoska: —Chasa ruraichi— nirka. Chiura suldadukunaka, rispa, Jesuswa sugllapi klabaraiaskakunapagma chaiagrispaka, sugpa chakikunata pakichirkakuna. Sugtapas chasallata rurarkakuna. ³³ Ikuti Jesuspagma kaillaiaspaka, ña wañuska kagta kawarkakuna. Chiwa, chakikunata pakichingataka, ³⁴ sug suldadu, lansawa kustillapi tugsirka. Tugsigllapi, iawar i iakumi llugsirka.

³⁵ Sutipa chasa kawagmi willaku; chasaka kamkunaspa, sutipa kagta iachangapa. Nuka kikinmi iachani, sutipa willakugta. ³⁶ Ñugpamanda librupi, kasami willaraiá: “Ñi sug tullu, mana pakichiska kangapa kanchu”. Kasapas. “Pai kikinkunami ialigta tugsiskata kawangapa kankuna”. Imasa willaraiaskasinami tukugsamurka.

Jesús pambai tukuskamanda

³⁸ Chiuramanda Arimatea puiblumanda José suti runaka, Pilatosta mañagrirka, Jesuspa kuirputa apangapa. Chi José, judiukunata manhaspa, pakalla Jesuswa rimanakudirumi karka. Chasa mañagriuraka, Pilatos paita apangapa sakirka. Chiura Joseka, rispa, Jesusta krusmanda uraikuchigrirka.

³⁹ Nikodemo ñugpata Jesuspagma tuta ridurpas chaiagrirka. Mira i aloes suti suma asna chapuska, mai patsa librasina chaiachigrirka. ⁴⁰ Chi iskandi runakuna, Jesuspa kuirputa apaspaka, chi suma asnakunawa suma linsukunawa maiturkakuna, imasa judiukuna ruradur kaskasina.

⁴¹ Jesús kruspi klabaraiaskamanda mana karullapi tiarka sug wirta. Wirtapika tiarka rumi piñapi atun utkuchiska, wañuskata pambangapa. Chi ukupi ñi pita manara pambaska karka. ⁴² Chi utkuchiska manancha karullapi kagmanda, chipi Jesuspa kuirputa churagrirkakuna. Chi chisi judiukunapa warda puncha ña kallaringapa kagmanda, utkalla chasa rurarkakuna.

Jesús kaugsariskamanda

20 Simana kallarii puncha u dmingu amsamsa chara tuta kagpita, María Magdalenaka Jesús pambaraiaskama rirka. Chaiagrispaka, chi atun utkuchiska pungupi kilparaiaska rumita tim anchuchiska kaskata kawagrirka. ² Chasa kawaspaka, kalpalla rirka

Simón Pedro i Jesuspa sug iapa kuiaska katiraiag-pagma. Chaiagrispaka, paikunata nirka:

—Iaia Jesuspa kuirputa pambaraiaskamanda apaskami ka. Mana iachanchichu maipi paita churagtakuna.

³ Chiura Pedro i chi sug katiraiagpura, llugsispa, Jesús pambaraiaskama kalparkakuna. ⁴ Iskandi, sinchi kalpanakurka. Sugka, Pedromanda mas ñugpa kalpaspaka, chaiagrirka. ⁵ Nispaka, kumurispa, ukusinama kawarka. Chi ukupika, suma linsu maituraiaskakuna tiarka. Chasa kawaspapas, mana iaikurka.

⁶ Simón Pedroka, kati chaiagrispa, ukuma iaikug-rirkalla. Paipas, chi suma linsu maituraiaskakunata chipi churaska kaskata kawarka. ⁷ Sug linsu Jesuspa umata maituraiaskatapas kawarka. Chi linsu, sugkuna-wa mana sugllapi tiarka. Supgimi patariska tiarka.

⁸ Chiura chi sug katiraiag Pedromanda ñugpa chaiagrigrpas, ukuma iaikurka. Chi linsukunata kawaspaka, iuiarirka: “Sutipami kaska”. ⁹ Paikuna manara iuiarirkakuna, ñugpamanda librupi imasa willaraiaaskata: “Chaiakumi, Cristo wañuspapas, ikuti kaugsaringapa”. ¹⁰ Chasa kawaspaka, chi iskandi kati-raiakuna kikinpa wasima kutirkakuna.

María Magdalenata, Jesús kawariskamanda

¹¹ Mariaka, Jesús pambaraiaskapi kancha ladulla wakaspa saiakurka. Wakakuspaka, kumurispa, ¹² ukusinama kawarka. Chipika, iska anjil iura churariskakuna karkakuna. Paikuna, Jesuspa kuirputa churaska kaskapi tianakurka, sugka uma ladu, sugka chaki ladu.

¹³ Paikunaka, Mariata tapurkakuna:

—Kam warmisita, ¿imapatak wakakungi?

Chiura, María ainirka:

—Nukapa iaiatami apapuarkakuna. Nuka mana iachanichu maipi churapuagrirtakuna.

¹⁴ Chasa ainispaka, katima tigrarka. Chiura, Jesús saiakuskata kawarka. Chasa kawaspapas, mana iacharka Jesús kagta. ¹⁵ Chiura, Jesuska tapurka:

—Kam warmisita, ¿imapatak wakakungi? ¿Pitatak maskakungi?

Mariaka, “Wirta kawagchar ka” iuiaspa, ainirka:

—Turi, kam paita apaska kagpika, willawai: ¿maipitak churagrirkangi?, nuka apagringapa.

¹⁶ Chiura, Jesuska nirka:

—María.

Chasa uiangallawa, tigrarispaka, hebreo rimaiwa nirka: —Rabuni—. (Rabuni niraiami “Nukapa iachachig”.)

¹⁷ Chiura, Jesuska nirka: Mana llamkawai. Manara nukapa Taitapagma sikanichu. Nukapa waugkikunata willagrii: “Nukapa i kamkunapa Taitapagmami sikangapa kani. Nukapa i kamkunapa Taita Diosmi ka”.

¹⁸ Chasa uiaspa, María Magdalenaka Jesuska katiraiagkunata kalpalla willangapa rirka:

—Iaia Jesustami kawarkani—. Nispaka, imasa Jesús niskasina willarkakunata.

Jesús, paita katiraiagkunata kawariskamanda

¹⁹ Chi dumingullatata chisima, Jesusta katiraiagkuna, judiukunata dimanchai pungukunata suma wichkarispa, chi ukuma karkakuna. Maikan punguta mana iaikuspalla, Jesuska, paikunapa chaugpipi saiarig-samuspa, nirkakunata:

—¿Allillachu kapuangichi?—. ²⁰ Chasa nispaka, maki-kunata i kustillata kawachirkakunata. Iaia Jesusta kawaspaka, paikuna iapa kuntintarirkakuna.

²¹ Ikuti —¿Allillachu kapuangichi?— nispaka, Jesuska nirkakunata— Nukapa Taita imasami nukata kachamuwarka: chasallatami nukapas, kamkunata kachaikichita.

²² Chasa nispaka, paikunata samai churaspa, nirka:

—Santu Ispirituta chaskiichi. ²³ Maikan pandariskakunata kamkuna pasinsiaspa nigpika, pasinsiaspami tukungapa kankuna. Ikuti maikan pandariskakunata kamkuna mana pasinsiaspaka, chasallatami mana pasinsiai tukungapa kankuna.

Jesús kaugsariskata, Tomás kawaskamanda

²⁴ Jesús ñugpa kawariura, Tomás, Dídimosuti, chunga iska Jesús agllaskakunapura, mana sugllapi karka. Paitaka, sug katiraiagkuna nirkakuna:

—Iaia Jesustami kawarkanchi.

²⁵ Chiura, paika nirka:

—Klabuskuna makikunapi utkuchiskakunata nuka mana kawasa; chipi nukapa didu mana churasa; kustilla utkuchiskapipas nukapa maki mana ñitisa; chasa mana kawaspa, mana iuiangapa kanichu chasa kagta.

²⁶ Pusag puncha ialiuura, Jesusta katiraiagkuna chasallata wasipi tandariska karkakuna. Chiuraka Tomaspas, sugllapi karka. Pungukuna suma wichkarispa kagpipas, Jesuska, paikunapa chaugpipi saiarigsamuspa, nirkakunata:

—¿Allillachu kapuangichi?—. ²⁷ Chasa nispaka, Tomasta kaiaspa, nirka— Kamba diduta kaipi churai. Nukapa makikunata kawai. Kamba makita suniamuspa, nukapa kustillapi ñitii. Mana iuiawag kangataka, suma iuiawag kai.

²⁸ Chiura, Tomás ainirka:

—Nukapa Iaia i nukapa Diosmi kangai.

²⁹ Chiura, Jesuska nirka:

—Kam, nukata kawawaspami suma iuiawarkangi. Mana kawawaspalla nukamanda suma iuiawagkunaka, Taita Diospa iapa kuiaskami kangapa kankuna.

Kai libru, imapa iskribiraiaskamanda

³⁰ Jesusta katiraiagkunapa ñawipi, achka mana imaurapas kawaskasina pai ruraskaka, kai librupi mana tukui willaraiianchu. ³¹ Kaipi willaraiaskaka kanmi, Jesús, Taita Dios agllaska Cristo i paipa wambra kagta, kamkuna iachaspa iuiaringapa; chasa iuiarispaka, pai-wa mana wañudiru kaugsaita iukangapakuna.

Kanchis Jesusta katiraiagkunata, pai kawariskamanda

21 Chiuramanda, Tiberias suti kucha patallapi, Jesuska paita katiraiagkunata kasami ikuti kawarirka. ² Simón Pedro, Tomás Dídimó, Galilea alpa i Kaná puiblumanda Natanael, Zebedeopa wambrakuna i sug iska katiraiagkunapas, sugllapi karkakuna. ³ Chiura, Simón Pedroka nirka:

—Nukaka chalwagrisa.

—Nukanchipas munanchimi kamwa ringapa— nirka-kuna. Chasa nispaka, tukuikuna, kanuapi iaikuspa, rirkakuna. Chi tutaka, ñi sug chalwa manima apirkakuna.

⁴ Ña pakarikuuraka, Jesús kucha patapi kawarigrirkakunata. Paita kawaspapas, katiraiagkuna mana iacharakuna Jesús kagta. ⁵ Chiuraka, paika tapurkakunata:

—Musukuna, ¿ñachu chalwa apingichi?

Chiura ainirkakuna:

—Manima.

⁶ Chiura, paika nirka:

—Kanua alli ladu ataraiata sitaichi, apingapa.

Sitagllapi, iapa achka chalwa apirkakuna. Iapa llasa kagmanda, mana pudirkakuna, kanuama ataraiata sikachingapa. ⁷ Chiuraka chi Jesuspa iapa kuiaska katiraiag, Pedrota nirka:

—Iaia Jesusmi ka.

Iaia Jesús kagta uiaspa, Simón Pedroka, llatan kaspapa, paipa katangata churarispa, iakuma saltarka, Jesus-pagma ringapa. ⁸ Kanuamanda kucha patama chaia-ringapaka, mana iapa karu karkachu. Kimsa chungatupusinallami karka. Chimanda sugkuna, chalwa junda ataraiata iakupi aliuspa, kanuawanta patama chaia-chigrirkakuna. ⁹ Kanuamanda alpama llugsiuraka, kilimsa nina sindi awalla sug chalwa kusarikugta i tanda tiaskapas kawarirka.

¹⁰ Chaiagriura, Jesuska nirkakunata:

—Kunaura apiska chalcakunata apagriichi.

¹¹ Chiura Simón Pedroka, kanuapi iaikugrispa, ataraiata alpama aliurka. Ataraiapika, patsa pichka chunga kimsa atun chalcakunami tiarka. Chituku achka chalcakuna junda tiagpipas, ataraia mana llikirirka.

¹² Chiuramanda, Jesuska nirkakunata:

—Samuichi mikungapa.

Iaia Jesús kagta iachaspaka, ñi maikan katiraiagkuna mana tapurkakuna: “Kam, ¿pitak kangí?”. ¹³ Kaillaiaspaka, Jesuska, tanda i chalcakuna aisaspaka, katiraiagkunata kararka. ¹⁴ Jesús wañuspa kaugsariskauramanda, ña kimsamami paita katiraiagkunata kawarigrirka.

Jesús, Simón Pedrowa rimanakuskamanda

¹⁵ Ña mikuskauramandaka, Jesuska Simón Pedrota tapurka:

—Jonaspa wambra Simón, ¿kaikunamandapas maschu nukata kuiawangí?

Chiura, Pedro ainirka:

—Ari, taita waugki. Kam iachangimi, nuka imasa kamta kuiagta.

Chiura, Jesuska nirka:

—Nukapa kuiaska ubija wawakunasinata kawapuangi.

¹⁶ Nispaka, ikuti tapurka:

—Jonaspa wambra Simón, ¿nukata kuiawangichu?

Chiura, Pedro ainirka:

—Ari, taita waugki. Kam iachangimi, nuka imasa kamta kuiagta.

Chiura, Jesuska nirka:

—Nukapa ubijakunasinata kawag kapuangi.

¹⁷ Kimsama ikuti nirka:

—Jonaspa wambra Simón, ¿nukata kuiawangichu?

Chiura Pedroka, Jesús paita kimsama: “¿Nukata kuia-wangichu?” tapukugmandaka, irkiarka. Llakiiwa nirka:

—Taita waugki, kam, tukui allillami iachangi. Sumagllami iachangi, nuka imasa kamta kuiagta.

Chiura, Jesuska nirka:

—Nukapa ubijakunasinata kawapuangi. ¹⁸ Kasami nukata niiki: kam chara musu kauraka, kam kikinmi, chumbillirispaka, maima munaskama ridur karkangi. Ikuti kam rukuiaska kauraka, makitami chutachinkangi. Sugmi, kamta chumbillichispa, kam maima mana munakuskama apanga—.

¹⁹ Jesús, chasa nispaka, willakurkami Pedro imasa wañungapa kagta; chasa wañuspaka, Taita Diusta suma atuniachingapa. Chasa nispaka, kasapasmi nirka— Nukata katiwai.

Jesusa iapa kuiaska katiraiagmanda

²⁰ Katima tigraspaka, Pedro kawarka, Jesús iapa kuiaska kati kati katiraiagta. Pai runa karkami paskua atun pucha mikudiru mikunakuura, Jesusta kimirispa tapug, kasa nispa: “Taita waugki, ¿pitak kamta apichingapa ka?”. ²¹ Paita kawaspaka, Pedroka Jesusta tapurka:

—Taita waugki, paipas, ¿imaták pasanga?

²² Jesuska ainirka:

—Nuka ikuti samunkama kaugsakuchu nigpika, kamtaka, ¿imaták ministí? Kam, upalla nukata katiwai.

²³ Chasa niskata mana allilla uiaspa, Jesuswa tukuskakuna rimanakuskata iacharirka, kasa nigta: “Kai Jesusta katiraiag, ñi imaurapas mana wañungapa kanchu”. Chasaka, Jesús mana nirkachu. Kasami nirka: “Nuka ikuti samunkama kaugsakuchu nigpika, kamtaka, ¿imaták ministí?”.

²⁴ Pai Jesusta katiraiagmi imasa kawaskasina willaku. Kai libruta iskribigpas, paillatatami ka. Iachanchimi, ñi imapipas mana llullaspalla sutipa kaskata pai willagta.

²⁵ Sug rigcha sug rigcha allikunaka, achkami Jesús rurarka. Chi tukui ima ruraskakunamanda sug suglla iskribiraiagpika, iuianimi: kai alpapi manachar pagtantra, chi iskribiraiaskakunata maipi wakachinga.

HECHOS

Santu Ispirituta, Jesús kachamungapa willaskamanda

1 Nukapa kuiaska Teófilo:

Nuka ñugpata willaraiaskapi, Jesús tukui ima ruraska i iachachiska, kallariuramandata pai imaura suma luarma sikankama willarkaiki. ² Manara suma luarma sikaspalla, sug runakunata agllaspa kacharka, paimanda Alli Willaita willaspa puringapa. Nispaka, Santu Ispirituwami iachachirkakunata imasa rurangapa kagta.

³ Ña wañuskauramanda kaugsarispaka, chusku chungu punchami ikuti ikuti kawarirkakunata, pai suti-pa kaugsariska kagta allilla iachangapakuna. Chi punchakuna, Taita Dios imasa suma mandakuskasina iachachikurka.

⁴ Chara pai agllaska runakunawanta kaspa, Jesuska nirkakunata:

—Ñami willarkaikichita: nukapa Taita, kikinpa Santu Ispirituta karangapami nirka. Paita kachamunkama, Jerusalén puiblupi suiangichi. Mana maimapas rinakungichi. ⁵ Iakullawami Juan baugtisarika. Kamkunakar, mailla punchakuna ialliuramanda, Santu Ispirituwami baugtsai tukungapa kangichi.

Suma luarma, Jesús sikaskamanda

⁶ Paikuna ikuti tandariska kaskapi, Jesusta tapurkaku:

—Taita waugki, ¿kai punchakunachu kuankangi, nukanchi Israelmanda runakuna ikuti kai alpapi mandangapa?

⁷ Chiura, Jesuska ainirka:

—Kamkuna mana iachangapa kangichichu, ima ura, ima puncha nukapa Taita chasa rurangapa kagta. Pailami iachá, ima puncha chasa tukugsamungapa kagta. ⁸ Kamkunapa sungupi Santu Ispíritu iaikugsamuraka, paipa iapa iachaitami chaskingapa kangichi. Chi iachaiwaka, kai Jerusalenpi, Judea i Samaria alpakunapi i tukui karu suiupasmi nukamanda willagringapa kangichi.

⁹ Chasa nispaka, paikuna kawanakugllapi, Jesús suma luarma sikai kallariirka. Puiu ukupi chingarirka. Mana mas paikunata kawarirka.

¹⁰ Jesús suma luarma sikakuskata kawanakuuraka, diulpilla iskaí runasina rigchakuna iura katanga churakuna paikuna saianakuskata kawarigsamurkakunata. Chi runakunaka nirkakuna:

¹¹ —Galileamanda runakuna, ¿imapatak awasinama kawanakungichilla? Pai Jesús ña suma luarma sikaska,

ikutimi samungapa ka; imasami kamkuna sikai kawarkangichi: chasallata.

¹² Chasa uiaspaka, chi runakunaka chi Olivos suti lumamanda Jerusalemma kutirkakuna. (Chi lumamanda Jerusalemma manancha karumi ka; imasami warda puncha lisinsiaska ka puringapa: chilla karumi ka.) ¹³ Jerusalemma chaiagrispaka, kidariduru wasima iaikuspa, chi awa ladu ukuma sikarkakuna. Chipi tandaridupura karkakunami Pedro, Juan, Santiago, Andrés, Felipe, Tomás, Bartolomé, Mateo, Alfeopa wambra suti Santiago, Simón suti kananeo runakunawa purigpura i Judas suti sug Santiagopa wambra.

¹⁴ Tukui paikuna, suglla iuiaiwa Taita Diusta mañaspa karkakuna, mana kungarispalla. Sug warmikunapasmi paikunawa sugllapi karkakuna. Jesuspa mama María i Jesuspa waugkindikunapasmi chipi karkakuna.

Matías suti runata, Jesusmanda willadur kangapa agllaskakunamanda

¹⁵ Chi punchakuna, mai patsa iskaí chungu runakunami chi ukupi sugllapi karkakuna. Tukuikuna chasa kauraka, Pedroka, chaugpipi saiarispa, kasami nirka:

¹⁶ —Taitakuna i mamakuna, uiamuichi. Judasmandaka, atun taita David, Santu Ispirituwa ñugpamanda librupi willaraiaskaka, imasa niskasinami tukugsamurka. Chi Judaska, nukanchipurami karka. Nukanchisinallata, paipas agllaskami karka, Jesusmanda willadur kangapa. Chi Judasmi, Jesusta katuspa, apigkunata pusaspa kawachigrirka. ¹⁸ Chasa Jesusta katuspaka, alpasik randirka. Nispaka, chi alpapi urai singa urmaspa, tugiarkasi, chunchullukuna llugsigta.

¹⁹ Chasa iachariskauramandaka, Jerusalemma tukui kaugsanakugmi chi alpata paikunapa rimaiwa sutichirkakuna Akéldama—. (Chi niraiami "Iawar alpa".)

²⁰ —Chi Judasmandaka, Salmos suti librupi kasami willaraiá:

Paipa wasi sitai tukuchu,
ñi pipas mana chipi kaugsangapa.

Paipa trabaju sakiskataka, sug apichu.

²¹ Chasa willaraiaskamandaka, kunauro nukanchitami chaiaku, sug runa agllangapa. Iaia Jesús nukanchiwa kaura, sug kaipi kagkunapasmi nukanchiwa puridur karkakuna. ²² Iaia Jesusta Juan baugtiskauramandata, pai suma luarma sikaurapasmi chi runakunapas nukanchiwa sugllapi karkakuna. Chi runapurataka, sugllata agllasunchi, paipas Jesús kaugsariskata nukanchiwa willadur kangapa.

† u waugki.

²³ Pedro chasa niura, pai kikipura is kai runakunata agllarkakuna. Sug runa suti karka José Barsabás. Paita nirkakuna: “Alli José”. Sugka, Matiasmi suti karka. ²⁴ Chi iskandikunata agllaspaka, Taita Diusta mañaspa, nirkakuna:

—Taitiku, kammi kangi tukuikunapa sunguta rigsig. Chimanda, nukanchita kawachii: kai iskandikunamandaka, pitatak agllankangi, ²⁵ Jesusmanda willadur kangapa; paika, Judaspa quinta tukungapa. Chi Judas, Jesusta katuspami, paimanda willadur kaskata sakispa, wañuspa, maima paita chaiakuskama rirka.

²⁶ Taita Diusta chasa mañaspaka, suirtipimi maskarkakuna. Chiuraka, Matiasmandami llugsirka. Chiuralla, paitaka chaiarka, chungu sug Jesús kikin agllaskakunawa sugllapi tukungapa.

Santu Ispíritu samuskamanda

2 Pentecostés suti atun puncha chaiamuura, Jesuswa tukui tukuska runakuna, sugllapi tandariska karkakuna. ² Diulpilla, chi ukupi tianakuska suiu, suma luarmanda sinchi waira pukukugsinami uiarig-samurka. ³ Chiura, puka nina sindisinami kawarig-samurka. Nispaka, tukuikunapa uma awa ladu sug sug tiarigsamurka. ⁴ Santu Ispiritumi tukuikunapa sungupi iaikugsamurka. Chiura, Santu Ispíritu imasa iuiachiskasina mana iachaska rimaikunawapas rimai kallarirkakuna.

⁵ Chi punchakuna, tukui alpanigmanda Jerusalemma chaiaska karkakuna Taita Dioswa suma iuiaspa kaug-sag judiukuna. ⁶ Chi sinchi uiariskata uiaspaka, iapa achkakuna, Jesuswa tukuskakuna kidariduru wasima tandarigrirkakuna. Chipika, tukui alpamanda paikunapa rimaita uiaspa, mana iacharkakuna, imamanda chasa tukugsamugta. ⁷ Iapa mancharispa ujnarispa, rimarinakurka, kasa nispaka:

—Kai tukui rimanakug, ¿manachu Galilea alpamanda runakuna kankuna? ⁸ Nigpika, ¿imasamandatak tukui nukanchi, sug rigcha sug rigcha uchulla kauramandata rimaikunata allilla uianakunchi? ⁹ Kaipi kanchimi Partia suti puiblukunamanda runakuna; sugkunaka Mediamandakuna; ikuti sugkunaka Elam alpanigmanda, Mesopotamianigmanda, Judeanigmanda, Kapadosianigmanda, Pontonigmanda, Asia alpa suinigmanda, ¹⁰ Frijianigmanda, Panfilianigmanda i Ejiptonigmanda. Libia alpa i Sirene sug ladunigmandakunapasmi kanchi. Roma puiblunigmanda kaipi kaug-sanakugpasmi kanchi. ¹¹ Chi tukuikunamandaka, sugkunaka sutipa judiumi kanchi. Sugkunaka, judiukuna imasa iachachiskata ruragkunami kanchi. Chasallata sugkunaka, Kreta i Arabia alpakananigmandami kanchi. Mainigmandakuna kaspapas, nukanchi kikinpa rimaiwa tukui ima Taita Dios iapa suma ruraskata willanakuskatami uianakunchi.

¹² Ñi imaurapas mana kawaskasina uiaskasina kagmanda, tukuikuna, iapa ujnarispa, parijuma tapurinakurka, kasa nispaka:

—¿Imamandasik chasa pasariku?

¹³ Ikuti sugkunaka, unzaspa ninakurka:

—Iapa machaskakunami rimanakú.

San Pedro imasa rimaskamanda

¹⁴ Chiura Pedroka, paipura chungu sug Jesús agllaskakunawa sugllapi saiarispa, sinchi rimagsamurkakunata, kasa nispaka:

—Uiamuichi, judiukuna i tukui kai Jerusalempe kagkuna. Rinri allilla churamuichi uiawangapa. Kasami rimangapa kaikichita. ¹⁵ ¿Imapatak iuianakungichi, nukanchi machaska kagtakuna? Kaituku chara tutata, las nuibillami chara ka. ¹⁶ Joel suti Santu Ispirituwa rimag, kai punchakunamanda kasami ñugpamandata willaska karka:

¹⁷ Taita Dios nikumi:

“Tukurii punchakuna ña chaiakuura, tukuinigmanda runakunapa sunguma nukapa Ispiritutami karangapa kani.

Chiuraka kamkunapa kari i warmi wambrakuna, Santu Ispíritu iuiachiskatami willangapa kankuna.

Kamkunapa musukuna, muskui ukupisina ima pasaringapa kaskata kawangapami kankuna.

Rukukunapas, muskui ukupisina chasallatami kawan-gapa kankuna.

¹⁸ Chi punchakuna, kari i warmi nukamanda allilla ruragkunatami paikunapa sunguma nukapa Ispirituta karangapa kani.

Chiura paikunaka, Santu Ispíritu iuiachiskatami willangapa kankuna.

¹⁹ Awa ladu, tukui imapas ujnarigta rigchakunami kawachigsamungapa kani.

Kai alpa luarpipas, iawarwa, ninawa i puiiwa kawachigsamungapami kani nuka atun kagta.

²⁰ Indi tutaingapami ka;

killapas, iawarsinami tukungapa ka, atun Taita Diospa atun puncha chaiamungapa kaura. Chi tukurii punchaka, tukui suma allilla kaskatami kawachingapa ka.

²¹ Maikanpas atun Taita Diusta mañagkunaka kispichiimi tukungapa kankuna”.

²² —Kamkuna Israelmanda runakuna, kaitapas uia-waichi. Nazaretmanda Jesusta Taita Diospa iachaitami karaska karka, kamkunapa ñawipi ujnachigta mana imaurapas kawaskasina rurangapa. Chasawaka, pai Jesús Taita Dios agllaska kagtami kamkunata kawachirka. Chitaka, kam kikinkuna allillami iachangichi.

²³ Taita Dios, ñugpamandata imasa iuiakuskasinami sakirka, pai Jesús kamkunawa kangapa. Chiura kamkunaka, mana alli runakunapa makipimi kuarkangichi, kruspi klabaspa wañuchingapa. ²⁴ Wañuchigpipas, paita mana pudirkachu, wañui chariringapa. Wañui charikuskata, Taita Dios kikinmi paita kaugsachigsamurka.

²⁵ Chasallatami ñugpamanda taita Davidpas, pai Jesus-manda kasa willarka:

Atun Taita Diusta nukapa ñugpa ladu imaurapasmi kawakuni.

Pai, nukapa alli ladullami ka;

chasaka, nuka ñi imata mana mancharispalla kangapa.

²⁶ Chimanda, nukata iapa allimi iuiachiwaku.

Suma alli iuiachiwami nuka rimakuni.

Kasapas. Nukapa kuirpu wañuspaka, kuntintullami samakungapa kani,

²⁷ nukapa almata wañuskakunawa kaskapi mana saki-puangapa kagmanda.

Chasallata, nuka kamballa kagmanda,

mana sakiwankangichu,

nukapa kuirpu ismungapa.

²⁸ Iachachiwarkangimi imasa ruraspa kaugsangapa kagta.

Kam nukawa kagmanda, iapa suma allimi iuiachiriwá.

²⁹ —Taitakuna i mamakuna, nuka sutipami ñugpa-manda taita Davidmanda kasa niikichita. Pai wañuspaka, pambaimi tukurka. Pambaraiaskapi kaskataka, nukanchi charami kawanchi. ³⁰ Chasa kagpipas, pai David, Santu Ispirituwa rimagmi karka. Paitaka, Taita Dius jurarka, kasa nispa:

Sutipami niiki:

kamba sug wambratami kuangapa kani,

kam imasa mandakuskasina atun mandag kangapa.

³¹ Chasami David, ñugpa iachaspa, willarka, Cristo kaugsaringapa kagta, mana wañuskakunawa kaskapi Taita Dius sakingapa, paipa kuirputapas mana ismungapa sakingapa kagta.

³² —Pai Jestustami Taita Dius kaugsachirka. Chasa kawaspaka, nukanchi tukui paimanda willagkunami kanchi. ³³ Pai Jestustaka, Taita Dius atuniachispa, kikinpa alli ladumi tiarichigrirka. Chipika, imasami Taita Dius niska karka: chasa Jestusta Santu Ispirituta kuaraka. Chimandaka kikin Jesuska, nukanchipagma chi Santu Ispirituta kachamurka. Chitami kamkunapas kunaura kawanakungichi i uianakungichi.

³⁴ —Kikin David wañuspaka, paipa kuirpu manara suma luarma rinchu. Davidllatatami kasa nirka:

Atun Taita Diusmi nukapa iaiata nirka:

“Nukapa alli ladu tiari,

³⁵ nuka tukui kamta mana munagkunata apagrispa, kamba chaki sarudiru ukuma churankama”.

³⁶ —Chimanda, Israelmanda tukui runakuna, kasa iachaichi: pai Jestusta kamkuna kruspi klabachiskata, sutipami Taita Dius atuniachirka, tukuikunapa iaia Cristo niraiangapa.

³⁷ Chasa uiaspaka, chipi kagkuna sungu nanagta llakirirkakuna. Nispaka, Pedrota i paipura Jesús kikin agllaskakunata tapurkakuna:

—Niwaichi, taita waugkikuna: ¿imatak nukanchi rurasunchi?

³⁸ Chiura, Pedroka ainirka:

—Kamkuna pandariskakunata sakispa, Taita Diuswa tukuichi. Jesucristopa sutiwa baugtisariichi. Chasaka, kamkunapa pandariikunata pasinsiaskami tukunkangichi. Chiwanka, Santu Ispiritutami chaskinkangichi.

³⁹ Chasallatami Taita Dius nirka, kamkunata, kamkunapa wambrakunata i karupi kaugsagkunatapas karangapa kagta. Tukuikunatami nukanchipa atun Tai-

ta Dius ni: “Nuka tukui kaiaskakunatami Santu Ispirituta karangapa kani”.

⁴⁰ Sug rigcha sug rigcha rimaspami Pedro, Jesus-manda willakurka. Kasapasmi iuiachikurka, nispa:

—Kai mana allilla iuiagkunawa mana sugllapi kangichi.

⁴¹ Pedro ima rimaskata suma uiagkuna baugtisai tukurkakuna. Chi punchalla, sug kimsa waranga runakunami Jesuswa kaskakunawa sugllapi tukurkakuna.

⁴² Chiuramanda tukui baugtisariskakuna, Jesús agllaskakuna ima iachachinakuskata uiaspa rurana-kurka, ñi ima mana sakispalla. Suglla iuiaipimi kaugsanakurka, Jesús imasa rurangapa niskasina tandarispa, tanda sugllapi mikuspa. Chasallata, Taita Diusta mañaspa rimaspami kaugsanakurka.

Imasa musuglla Jesuswa suma iuiarispa kaugsanakuskamanda

⁴³ Chiurakuna Jesús agllaskakunaka, achka sumaglla mana imaurapas kawariskasinatami ruranakurka. Tukui chasa kawagkuna, iapa mancharispami ujnarinakurka.

⁴⁴ Jesucristowa tukui suma iuiagkunaka, suglla iuiai-wa kaugsanakurka. Paikuna tukui ima iukaska, tukuikunapami niraiarka. ⁴⁵ Alpa u imapas iukagkunaka, katuspami churanakurka, ministinakuskamanda tukui-kuna aidarinakungapa. ⁴⁶ Tukui punchakuna, Diuspa atun wasipi suglla iuiaiwami tandarinakurka. Wasi suiupasmi iaikuspa purinakurka, Jesús niskasina tanda sugllapi mikuspa. Tukui sugllapi tandarispa mikuspa karkakuna, suma kuntintarispa, ñi piwapas mana atuniachirispalla. ⁴⁷ Taita Diustami ninakurka: “Kam, iapa suma atunmi kang”i. Jerusalenpi kaugsagkunaka, tukuikunami paikunata sumaglla kawanakurka. Tukui punchakuna, atun Taita Diuska achkakunatami kaia-kurka. Chasaka Jesuswa tukuskakuna, tukui punchakunami mas achka miranakurka.

Sug runa mana purig ambiriskamanda

3 Suura chaugpi chisima puncha, Taita Diusta risadiru ura ña tukukugmanda, Pedro i Juan rinakurka Diuspa atun wasima. ² Chi pungupi tiakurka sug runa, tiagsamuskauramandata mana puringapa pudig. Chi runata tukui punchakuna aparispa apadur karkakuna, Diuspa atun wasipi iapa suma suti pungu suiu tiarichingringapa. Chi pungupi, tukui ukuma iaikunakuskata kulki mañaspa tiakudur karka. ³ Chi runaka, Pedro i Juan ña ukuma iaikunakuskata kawaspaka, kulki mañarkakunata. ⁴ Chiura Pedroka, Juanwa paita allilla kawaspaka, —Kawamuwai— nirka.

⁵ Chi runaka, allilla kawarkakunata, “Karawangapami kankuna” iuiarispa. ⁶ Chiura, Pedroka nirka:

—Kulki ñi kuri mana iukanichu. Nuka ima iukaskata karasaki. Nazaretmanda Jesucristowami niiki: atarispa puririi—. ⁷ Chasa nispaka, alli ladu makita apispami atarichirka.

Atarichigllapi, chakikuna i ñudukuna allilla tukug-samurkakuna. ⁸ Chiuraka, saltaspa saiarirka. Puriimi kallariirka. Nispaka, saltaspa kalpaspa, Taita Diusta kuiaspa, Diuspa atun wasi ukuma paikunawa iaikug-riirka.

⁹ Tukui chipi kagkuna, chi Taita Diusta kuiaspa puri-kuskata kawaspaka, ¹⁰ rigsirkakuna: “Paimi ka chi mana puringapa pudig, Diuspa atun wasipi iapa suma suti pungu suiu kulki mañaspa tiakudur”. Chasa paita pasariskata kawaspaka, tukuikuna iapa mancharispa ujnariirakuna.

¹¹ Chi ambiriska runa, Diuspa atun wasi ukupi, Salomonpa kanchapi Pedro i Juanta apispa charikurka. Chipi kag tukui runakuna, iapa ujnariispa, kalpa kailla-iagrirkakuna. ¹² Paikunata kawaspaka, Pedroka kasami nirka:

—Kamkuna Israelmanda taitakuna, ¿imapatak kai runata nukanchiwanta ujnariispa kawanakungichi? Nukanchipa iachaiwa ñi nukanchipa risaiwa mana kai runa purig tukugsamurkachu. ¹³ Nukanchipa Abraham, Isaak i Jakob ñugpamanda taitakunapa Taita Diusmi paipa wambra Jesusta sumaglla atuniachig-samurka. Paitami kamkuna wañuchingapa kuarkangichi. Pilatos paita kacharingapa munakuura, kamkunaka nirkangichimi: “Mana kacharikui”. ¹⁴ Pai tukui suma allilla ruragta wabutispa, mañarkangichimi, sug runa wañuchidurta kacharingapa. ¹⁵ Pai tukuikunata kaugsai karagtami wañuchingapa: “Ari” nirkangichi.

—Chasa kagpipas, Taita Diuska paita kaugsachirkami. Chasa sutipa kawaspami nukanchi paimanda willagkuna kanchi. ¹⁶ Jesuswa suma iuiagmandami kai kamkuna kawaska i rigsiska runata aliachispa wapuaichigsamurka. Chasa suma iuiagmandami tukui kamkunapa ñawipi aliachiska tukugsamurka.

¹⁷ —Ñami iachani, taitakuna: kamkuna i kamkunapa taitakuna, pi Jesús kagta mana allilla iachaspallami paita wañuchingapa: “Ari” nirkangichi. ¹⁸ Chiwanka, imasa Taita Dius, ñugpata tukui paipa Ispirituwa rimagkunawa pai agllaska Cristomanda willaska: imasa willaraias-kasinami paita pasarigsamurka. ¹⁹ Chimanda kamkuna, pandariskakunata sakispa, Taita Diuswa tukug-samuichi. Chasaka, kamkunapa pandariikuna pasinsiarriimi tukunkangichi. ²⁰ Nigpika Taita Dius kikin, pai agllaska Jesustami kachamunga, allilla iuiachii punchakuna kamkunata tukungapa. Taita Dius ñugpamandami niraiarka, pai Jesusta kamkunamanda kachamungapa. ²¹ Paita chaiakumi, suma luarpi chara kangapa, Taita Dius tukui imasa kaskasina sumaglla churan-kama. Chasami Taita Dius, paipa Ispirituwa alli rimagkunawa ñugpamandata willarka.

²² —Pai Jesusmanda, ñugpamanda taita Moiseska sutipami kasa rimarka:

Atun Taita Dius kikinmi ni:
 “Kam kikinpuramanda
 Santu Ispirituwa sug rimagmi llugsingapa ka”.
 Paika, nukasinami kangapa ka.
 Pai tukui ima rimakuskata suma uiangichi.

²³ Maikan chi rimagta mana uiagkunaka,

Israelmanda llugsichispa,
 puchukaiimi tukungapa kankuna.

²⁴ —Tukui Santu Ispirituwa rimagkuna, Samuel rimaskauramandata, kai punchakuna imasa pasaringapa kaskataka timpumi willaraiarka. ²⁵ Kamkuna, chi ñugpamanda rimagkunapa wambrakunapa kati wambrakunami kangichi. Kamkunamandami Taita Dius, kamkunapa ñugpamanda taitakunawa allilla iuiariirka. Abrahamta kasami nirka:

Tukui alpamanda runakunapasmi
 kamba wambrapa wambrapa sug kati wambramanda
 nukapa iapa kuiaska capuangapa kankuna.

²⁶ —Taita Diuska, pai kikinpa wambrata kaugsachispa, kamkunapagmami ñugpa kachamurka; chasaka, tukui kamkuna pandariikuna sakigpika, paipa iapa kuiaska kangapakuna.

Judíu taitapura tandariska kaskapi, Pedro i Juan kaskamanda

4 Pedro i Juan chi runakunata chara rimanakugllapika, iaia sasirdutikuna, Diuspa atun wasipi kawag taita i saduseo suti taitakunaka chima chaiagrirkakuna. ² Pedro i Juan iachachinakurka, Jesús kaugsariskamanda, tukui wañuskakunapas kaugsaringapa kagtakuna. Chi taitakuna, mana chasa iuiaspami iapa rabiawa piñariispa chaiagrirkakuna. ³ Pedro i Juanta apispaka, ña chisi kagmanda, kaiandikama karsilpi churagrirkakunata. ⁴ Pedro chasa rimaskata uiagkunaka, achka runakuna Jesuswa suma iuiariirkakuna. Ña pichka warangasina mirarkakuna.

⁵ Kaiandika, judiukunata mandag taitakuna, Moisés ima niskata iachachig taitakuna i sug taitakunapas, chi Jerusalempe tandarigrirkakuna. ⁶ Chipi karkakuna iaia sasirduti, Anás suti, Kaifás, Juan, Alejandro i tukui chi iaia sasirdutipa kagkunapas. ⁷ Chasa tandariska kauraka, Pedro i Juanta chaiachigrispa, chaugpipi saia-chispa, tapuchii kallariirkakuna:

—¿Pitak kamkunata kachamurka, u pipa iachaiwatak kamkuna chasa ruranakungichi?

⁸ Chiura Pedroka, Santu Ispirituwa iuiapi junda kapa, kasami nirka:

—Israelmanda runakunapa taitakuna, ⁹ kamkunaka nukanchita kaiangichi, kai runamanda tapuchingapa, imasa pai ambiriska tukugsamugta. ¹⁰ Tukui kamkunata i tukui Israelmanda runakunata kasami niikichita: Nazaretmanda Jesucristowami kai runa kamkunapa ñawipi ambiriska saiaku. Pai Jesustami kamkuna kruspi klabachirkangichi. Pai wañuskataka, Taita Diusmi kaugsachigsamurka. ¹¹ Kasami ñugpamanda li-brupi willaraiá:

Wasichigkuna wabutiska rumi,
 wasita charigmi tukugsamurka.
 Chasallata, pai Jesusta kamkuna wabutiska, tukui-kunapa iaiami tukugsamuska ka. ¹² Kai alpapi manima tianchu ñi sug maikanpas nukanchipa pandariikunata kispichingapa. Jesús sapallatami Taita Dius kachamurka, nukanchita kispichingapa.

¹³ Chiura chi taitakunaka, Pedro i Juan mana manchaspalla rimanakuskata uiaspa, ianga runakuna mana iachagkuna kagta iachagsamuspa, iapa ujnarikakuna. Jesuswa purigkuna kaska kagtami iuiarirkakuna. ¹⁴ Chi ambiriska runapas, paikuna kaskapi saia-kurka. Chasa kawaspaka, mana iacharkakuna ima paikunata ninga.

¹⁵ Pedro i Juanta kanchama llugsichirkakuna. Nispaka, kikinpura tapurinakurka, ¹⁶ kasa nispaka:

—¿Imatak chi runakunata rurasunchi? Jerusalenpi tukui kaugsagkunami ña iachankuna, paikuna sug mana imaurapas kawaskasinata ruragtakuna. Chita, nukanchi mana piñarii pudingapa kanchichu. ¹⁷ Sugkuna chasa ruraskamanda mana uiangapaka, kasa manchachispa nisunchi: “Kunauramanda, ñi pitapas mana Jesusmanda willanakungichi”.

¹⁸ Chi taitakuna chasa iuiarispaka, Pedro i Juanta ikuti kaiarkakuna. Kasa manchachispami nirkakunata:

—Kunauramandaka, mana mas Jesusmanda rimaspa iachachispa puringichi.

¹⁹ Chasa uiaspa, Pedro i Juanka ainirkakuna:

—¿Imasatak iuianakungichi? Diospa ñawipi, ¿allillachu ka, kamkunata uangapa; u Taita Diustachu uiasunchi? ²⁰ Nukanchitaka chaiakumi, imasa kawaska i uiaskata willaspa puringapa.

²¹ Chiura, ikuti manchachispa, kacharirkakuna. Chi runa mana imaurapas kawaskasinawa ambiriska, chusku chungu wata ialimi iukarka. Chasa ambiriskamandaka, tukui runakuna Taita Diusta iapa suma atun kagta ninakurka. Chimanda chi taitakuna, Pedro i Juanta ñi ima pandariipas mana tarirkakuna, asutingapa.

Jesuswa suma iuiagkuna, Taita Diusta ima mañaskakunamanda

²³ Paikunaka, ña kacharii tukuspaka, kikinpurakunapagma rirkakuna. Chaiagripaka, chi iaia sasirdutikuna i sug taitakunapas paikunata imasa manchachispa llugsichiskamanda willagirkakuna. ²⁴ Chasa uiaspaka tukui, suglla iuiaiwa Taita Diusta rimarkakuna, kasa nispaka:

—Tukui manduiug Taitiku, sug luar, kai alpa luar i lamar iakukunata, tukui kam rurarkangi. ²⁵ Kammi [Santu Ispirituwa] nukanchipa ñugpamanda taita David kammada allilla ruragta kasa rimachirkangi: ¿Imapatak mana judíu kagkuna kaparispa killachirinakú?

¿Imapatak iangalla imapas rurangapa iuiarinakú?

²⁶ Kai alpapi atun mandagkuna i paikunapa kati mandagkuna, suglla iuiaiwami tandarirkakuna, atun Taita Diusta i pai agllaska Cristota wabutingapa.

²⁷ —Chasa ñugpamandata willaraiaskaka, sutipami tukugsamurka. Kai atun puiblupi, Herodes i Ponsio Pilatos, judíu i mana judíu kagkunawami tandarirkakuna, kamba tukui alli wambra Jesusa kam agllaskata wabutingapa. ²⁸ Chasa, kam tukui imasa ñugpa-

mandata rurangapa niraiaskataka, chi taitakunami rurarkakuna.

²⁹ —Kunauraka, Taitiku, paikuna ima manchachiskakunata kawamui. Nukanchi kamba lutrinsinakunata iachaita karamui, kamba rimaita mana manchaspalla willaspa puringapa. ³⁰ Chasallata karamui, kamba iapa iachaiwa ungugkunata ambispa, imakunapas kawachispa, kamba tukui alli wambra Jesuswa tukui mana imaurapas kawaskasinapas rurangapa.

³¹ Chasa Taita Diusta mañai puchukaura, chi wasi ukupi tandariskakunapika kuiurigsamurka. Chiura tukui chipi kagkuna, Santu Ispirituwa iuiapi jundami tukugsamurkakuna. Chiuramanda, Diospa Rimaita mas sinchimi rimaspa mana manchaspalla purii kallarirkakuna.

Tukui ima iukaska, tukui kunapa niraiaskamanda

³² Jesuswa tukuskakuna, iapa achkakuna kaspapas, tukui kunami suglla iuiaiwa karkakuna. Ñi pipas mana ninakurkachu: “Kai, nukapami ka”. Tukui ima iukaspapas, tukui kunapami niraiarka.

³³ Iaia Jesús kikin agllaskakuna, paipa iapa iachaiwami paimanda willanakurka, kaugsariska kagta. Tukui Jesuswa tukuskakunaka, Taita Diospa sumaglla iuiachiiwami kaugsanakurka.

³⁴ Jesuswa tukuskapurakunamandaka, ñi maikantapas mana ñi ima pisirkakunatachu. Maikanpas alpa u wasi iukaskakunaka, iacharkakunami katunga. ³⁵ Nispaka, chi katuska kulkitapa, Jesús agllaskakunatami iacharkakuna kuagringa. Chaskispaka, tukui imasa ministiskasina karaspami richidur karkakuna. ³⁶ Chipre alpamanda sug runa, José suti, Levipapurakunamanda, paikunawa kaugsakurka. Chi runata, Jesús agllaskakuna sutichiska karkakuna Bernabé. (Chi niraianmi “Sumaglla iuiachig”.) ³⁷ Chi runaka, alpa iukaskata katuspaka, kulkitapa, Jesús agllaskakunata kuagrirka.

Ananías warmindi pandariskakunamanda

5 Chiurakuna Ananías suti runapas, warmindi Safirawa paikuna alpa iukaskata katurkakuna.

² Chi runaka, alpa katuskata chaugpi kulkitami pakalla wakachirirka. Warmindipas, allillami iacharka. Sug chaugpi kulki kaskataka Jesús agllaskakunata kuagrirka, “Tukui kulki katuskatami kuanakuikichita” llullaspa.

³ Chiura Pedroka, Ananiasta nirka:

—¿Imawantak iaia kuku, kamba iuiapi iaikurka, Santu Ispirituwa llullachingapa? Chi alpa katuska kulkitami, chaugpimi pakalla wakachirirkangi. ⁴ Alpata manara katuura, ¿manachu kamba karka? Chasallata katuskauramanda, chi kulki, ¿manachu kamba karka? Nigpika, ¿imapatak chasa iuiaringi llullachigsamungapa? Mana runapurata llullachikungichu. Taita Diustami llullakungi.

⁵ Chasa uiaspaka, Ananías wañuskami urmagsamurka. Pai wañuskata iachagsamugkuna, tukui kunaka

iapami mancharigsamurkakuna. ⁶ Nigpi sug musu-kuna chi ukupi tianakugka, saiarispa, kuirputa maiturkakuna. Maituspaka, paita aparkakuna pambangapa.

⁷ Mai kimsa urapikar, Ananiaspa warmika iaikug-samurka, imasa pasariskata mana iachaspalla.

⁸ Chaiagriuraka, Pedroka paita tapurka:

—Willawai: ¿kaimandallachu alpata katurkangichi?

Chiura ainirka:

—Sutipa, chimandallami katurkanchi.

⁹ Chiura, Pedroka nirka:

—¿Imapatak iuiarirkangichi, atun Taita Diospa Ispirিতuta llullachingapa? Uiamui. Kamba kusata pambangapa apagkuna, kanchallapimi samunakú. Kunauraka, kamtapasmi apangapa kankuna, pambangapa.

¹⁰ Chasa nigllapi, chi warmipas Pedropa chakikunallapi wañuska urmagsamurka. Musukuna, iaikuspaka, tim wañuskatami tarirkakuna. Nispaka, chasallata llugsichispa, aparkakuna. Kusa pambaraiaska ladullapi paitapas pambagrirkakuna. ¹¹ Chiura tukui Jesuswa tukuskakunaka, iapa mancharirkakuna. Chasallata ima pasariskata iachagkunapas, tukuikunami mancharirkakuna.

Jesús agllaskakuna, achka mana imaurapas kawaskasina ruraskakunamanda

¹² Chi punchakuna Jesús agllaskakuna, Jerusalenpi kaugsanakugpa ñawipi achka mana imaurapas kawaskasina suma ruraspami karkakuna. Tukui Jesuswa tukuskakuna, Diospa atun wasipi, Salomonpa suti atun pungu ladullapimi tandaridur karkakuna. ¹³ Chi puiblupi kaugsanakugka, paikunata iapami kuiarkakuna. Paikunata kuiaspapas, sugkuna manchanakuspami paikunawa sugllapi manara tukurkakuna. ¹⁴ Chasa kagpipas, tukui punchakuna, kari i warmikuna, Iaia Jesuswa suma iuiarispas, paiwa mas miraspami rinakurka.

¹⁵ Jesús agllaskakuna iapa suma ruranakuskata kawaspas, chi puiblupi kaugsanakugka, ungugkunata wasikunamanda chakanapi llugsichispa, kalli suiu churadur karkakuna; chasaka, Pedro ialikuura, paipa sumbrallatapas chaskispaka ambiringapa. ¹⁶ Jerusalén ladukunapi kaugsanakugpas, chasallata achka ungugkunata i kuku waira iaikuskakunatapas chimallatata apadur karkakuna. Chiura, tukuikunami aliaska tukugsamudur karkakuna.

Judú taitakuna, Jesús agllaskakunata mana allilla ruraskakunamanda

¹⁷ Chasa kawaspaka, iaia sasirduti i saduseo suti paiwa purigkunaka, mana allilla iuiawa rabiarpas,

¹⁸ Jesús agllaskakunata apichispa, karsilpi churarkakunata. ¹⁹ Chiuralla atun Taita Diospa anjilka, tuta rispa, wichkaraiaska pungukunata paskaspa, paikunata chimanda llugsichigrirkakunata. Llugsichispaka, nirkakunata:

²⁰ —Riichi. Diospa atun wasi ukupi runakunata mana manchaspalla willagriichi, kasa nispa: “Jesucristo, sug rigcha musu kaugsaitami apamurka”.

²¹ Chasa uiaspaka, kaiandi tutata Diospa atun wasi ukupi iaikugrispa, iachachiimi kallarirkakuna.

Chi tutatallatata, iaia sasirduti i paiwa purigkuna, Israelmanda tukui taitakunawa tandarigrirkakuna. Ña tandariskakuna kauraka, alwasilkunata karsilma kacharkakuna, Jesús agllaskakunata pusangapa. ²² Chi ma chaiagrispaka, chi alwasilkuna manima paikunata tarigrirkakuna. Nispaka, iaia sasirdutipagma kutirkakuna willangapa. ²³ Kasasi nirkakuna:

—Chi karsil pungukuna suma wichkaskatami tarigrirkanchi. Suldadukunapas, tukui pungukunatami kawanakurka. Nukanchi pungukunata paskauraka, ñi pipas chi ukupi mana karkakunachu.

²⁴ Chasa uiaspaka, Diospa atun wasipi kawag taita i iaia sasirdutikuna, iapa mancharispa, tapurinakurka:

—Chikunawa, ¿imasik pasaringa?

²⁵ Chasa tapurinakugllapi, sug runaka paikunapagma chaiagrirka, kasa nispa:

—Kamkuna karsilpi churaska runakunaka, kaskallami Diospa atun wasi ukupi iachachinakú.

²⁶ Chasa uiaspaka, Diospa atun wasipi kawag taitaka alwasilkunawa rirkakuna, Jesús agllaskakunata pusangapa. Achka uianakugta kawaspami mancharispa, kasa nirkakuna: “¡Amalai nukanchita rumiwa piantrakuna!”. Chimandami mana imapas paikunata ruraspalla pusarkakuna.

²⁷ Chasa pusaspa, chi taitakuna tandariska kaskapi iaikuchigrirkakuna. Chipika iaia sasirduti, Jesús agllaskakunata nirka:

²⁸ —¿Manachu uiarkangichi nukanchi niskata: “Mana mas chi Jesusmanda iachachispa purinakungichi”? Kamkunaka, uiangataka, Jerusalenpi tukui runa kaugsanakuskatami iachachispa upasina purinakungichi. Kamkuna munanakungichimi, nukanchita juchachispa, chi runata nukanchi wañuchigta.

²⁹ Chiura, Pedro i paipura Jesús agllaskakunaka ainirkakuna:

—Nukanchita chaiakumi, Taita Dios imasa pai niskata uiangapa, maituku runakuna uiarinakugpipas.

³⁰ Nukanchipa ñugpamanda taitakunapa Taita Diosmi Jestu kaugsachirka. Pai Jesusmandami kamkuna mañarkangichi, kruspi klabaskakunawa warkuchispa wañuchingapa. ³¹ Taita Dioska, paita kaugsachispaka, suma luarpi atuniachispa, kikinpa alli ladumi tiarichigrirka, tukuikunapa iaia mandag i kispichig kangapa; chasaka, Israelmanda runakuna tukui pandariikunata sakiskakunata pandariikuna pasinsiai tukungapa.

³² —Nukanchika, chasa allilla kawaspami pai Jesusmanda willagkuna kanchi. Santu Ispiritupasmi pai-manda tukuipi allilla willag ka. Taita Dios, paita suma uiagkunatami Santu Ispirituta karamú.

³³ Chasa Jesús agllaskakunata uiaspaka, chi taitakuna, iapa rabiarpas, wañuchingapami munanakurka.

³⁴ Chasa iuianakugpipas, paipurakuna tiarka Gamaliel suti sug fariseo. Chi runa, Moisés ima niskata iacha-

chig taitami karka. Paita, tukui runakuna sumaglla kuiaspami uiadur karkakuna. Chi runaka, saiarispa, nirka:

—Kai runakunata sug mana unaila kanchama llugsi-chiichi—. Llugsihuriaka, chipi kaska taitakunata nirka—³⁵ Kamkuna Israelmanda taitakuna, chi runakunata manara imapas ruraspalla, allilla iuiaringichi.³⁶ Kasa iuiariichi: unai ña ka; Teudás suti runasik atun-iachirikurka, kasa nispá: “Taita Dios kachamuskami kani”. Chiurakuna, sug chusku patsa runakunasik paiwa tukurkakuna. Paita wañuchiuraka, tukui chi paita katiraiagkuna, sugma sugma rispa, puchukarirkakuna.

³⁷ —Chiuramanda, ikuti kasapasmi tukugsamurka: runakuna maituku kaugsanakuskata iachangapa tapuchinakuura, Judas suti Galileamanda runami chasallata atun tukukurka. Paipas, achka runakunatami kaiaspa purichikurka. Paitapasmi wañuchirkakuna. Chiura tukui paiwa kagkunapas, sugsinama sugsinama rispami puchukarirkakuna.

³⁸ —Chimandami kamkunata kunaure niikichita: chi runakunata ianga kawaichi. Ñi imapas paikunata mana ruraichi. Paikuna imasa ianga runakunapa iuiailawa kagpikuna, paikunapas chasallatami puchukaringakuna.³⁹ Ikuti paikuna imasa Taita Diospa iuiaiwa ruranakugpika, kamkunaka mana puchukai pudingapa kangichichu. ¡Ujalallapas kamkunawa Taita Dios rabiariagsamuchu!

Chasa uiaspaka, tukui chi taitakunaka Gamaliel rimaskata suglla iuiai iuiarirkakuna.⁴⁰ Chiuramanda, Jesús agllaskakunata kaiaspaka, asutichispa, nirka-kunata:

—Mana mas Jesusmanda rimanakungichi—. Chasa nispaka, kacharirkakunata.

⁴¹ Jesús agllaskakunaka, chi taitakunapagmanda llugsiispaka, kuntintarispa rirkakuna, kasa nispá: “Jesusmanda nukanchi nanaiwa llakii pasarkanhi. Chi-mandami iapa alli iuiachiwa rinakunhi”.⁴² Chiuramanda, antis mas mana sakispalla, tukui punchakuna, Diospa atun wasi ukupi i sug wasikunapipas Jesu-cristomanda mas rimaspa i iachachispa purii kallarirkakuna.

Kanchis aidagkunata agllaskakunamanda

6 Chi punchakuna, Jesuswa tukuskakuna miraspa miraspami rinakurka. Chiura griego suti rimaiwa kagkuna, hebreo sutiwa rimagkunamanda piñachirii kallarirkakuna, kasa nispá:

—Tukui punchakuna, mikui karanakuura, nukanchipurapa sapalla kidaska warmikuna manima sumaglla chaskinakunchu.

² Chasa uiaspaka, chungá iskaí Jesús kikin agllaskakunaka, paiwa tukui tukuskakunata tandachispa, nirka-kunata:

—Manachar alli ka, nukanchi Diospa Rimaita willanangkataka, mikui karanakuskapi unaianakungapa.

³ Chimanda, taitakuna i mamakuna, kam kikinpura kawaspa, kanchis runakunata maskaichi, mikui i imakunapas kawag tiangapa. Paikuna kachukuna tukuipi

alli runakuna, achka iachagkuna, Santu Ispiritupa iuiaita iukagkuna.⁴ Chasa tukugsamugpika, nukanchika Taita Diusta mañaimi apanakusunchi. Paipa Rimaita mana sakispallami iachachinakusunchi.

⁵ Chasa uiaspaka, tukuikuna suglla iuiaimi tukurkakuna. Nispaka, Esteban suti Santu Ispiritupa iuiaita iukagtami agllarkakuna. Paika, Iaia Jesusllawami suma iuiakurka. Chasallata, Felipe, Prócoro, Nikanor, Timón, Parmenas i Nicolás suti runakunatami agllarkakuna. Chi Nicolás, Antiokia puiblumandami karka. Ñugpata judiukuna imasa iachachinakuskata uiaspami paikunawa tukuska karka.

⁶ Chi agllaska runakunataka Jesús kikin agllaskakunapa ñawima pusarkakuna. Chiura paikunaka, umapi maki churaspa, chi runakunamanda Taita Diospa mañarkakuna.

⁷ Chi punchakuna, Diospa Rimaita mas achkakunami uianakurka. Chi Rimaita uiaspa, Jesuswa tukuskakuna masmi Jerusalenpi miranakurka. Achka sasirdutikunapasmi, Jesusmanda rimaita uiaspa, pai Jesuswa suma iuiarirkakuna.

Estebanta apiskakunamanda

⁸ Estebanka, Taita Diospa suma kuiaskami karka. Taita Diospa iapa iachaiwa runakunapa ñawipi askurinti ujnachingasina mana imaurapas kawaskakunatami rurakurka.⁹ Sug runakuna, Estebanwa piñachirii kallarirkakuna. Chi runakunaka karkakunami randiska kaskakunata kachariska suti tandariduru wasimanda. Sugkunaka karkakunasi Sirene alpamanda i Alejandría puiblumanda; sugkunaka, Silisia i Asia alpakunanigmanda.¹⁰ Chi runakuna Estebanwa piñachirinakuraka, paika Santu Ispíritu karaska iachaiwami iapa suma rimakurka. Chiwanka chi runakuna, paipa rimaita mana ainii alli kapurkakunata.

¹¹ Chimandami paikuna, pakalla sug runakunata kulki kararkakuna, Estebanmanda llullaspa, sutipa kagsina kasa ningapa:

—Chi runata uiarkanchimi, Moisesmanda i Taita Diosmanda jiru rimakugta.

¹² Chasakunawaka, chipi kagkunata, Moisés ima nis-kata iachachig taitakunata i sug taitakunatapas Estebanmanda mana allilla tukuipi rimarkakuna. Nispaka, Esteban kaskama chaiagrirkakuna. Paita apispaka, judíu taitakuna tandariska kaskamami aparkakuna.¹³ Nispaka, paimanda willangapa sug runakunata chaiachigrirkakuna. Chi runakunaka, Estebanmanda llullaspa, kasami nirkakuna:

—Kai runa, kai Diospalla kaska wasimanda i Moisés ima rurangapa willaraiaskamanda imaurapasmi kamirikonlla.¹⁴ Pai rimakuskataka, nukanchi uiarkanchimi: “Chi Nazaretmanda Jesús, kai Diospa atun wasita puchukangapasi ka”. Kasapasmi uiarkanchi: “Chi Jesús iachachirkasi: Moisés ima nukanchita rurangapa nis-kata sakispa, sug rigchasi rurasunchi”.

¹⁵ Chi taitakuna i tukui chipi tianakugkunata, Estebanpa ñawika sug anjilpa ñawisinami kawarigsamurkakunata.

Esteban kispiringapa rimariskamanda

7 Chiura iaia sasirdutika, Estebanta tapurka:
—Kammanda rimanakú; chika, ¿sutipachu ka?

² Chiura, Estebanka ainirka:

—Taitakuna, uiawaichi. Nukanchipa ñugpamanda atun taita, Abraham suti, chara Mesopotamia suti alpapi kaugsakuura, manara Arán puiblupi kaugsakugpita, nukanchipa suma atun Taita Diuska paita kawarirka, ³ kasa nispa: “Kamba alpakunata i tukui kambapurakunata kaimanda sakispa, rii. Nuka, sug mas suma alpami kawachisaki”.

⁴ —Chasa uiaspa Abrahamka, chi Kaldea alpamanda llugsispa, Arán puibluma rirka kaugsangapa. Chi-mandaka, paipa taita wañuura, kai alpapi kamkuna kunaura kaugsanakuskama chaiagsamurka. ⁵ Kai alpapi kaugsakugpipas, Taita Dius manara paita ima alpas kararka, ñi mai chaki churangapagllapas. Niillakar nirkami: “Sutipami kai alpata karasaki, kam wañu-uraka, kamba wambrapa wambrakuna kaugsangapakuna”. Taita Dius chasa niura, Abrahampa warmi manarami ñi sug wambra iukaska karka.

⁶ —Kasapasmí Taita Diuska nirka: “Kamba wambrapa wambrakuna, sug karu alpapimi kaugsagringapa kankuna. Chipika chinigmanda runakunami, chusku patsa wata paikunata mana llakispalla trabajachingapa kankunata. ⁷ Chiuramandaka, chi alpamanda runakunata trabajachipuagkunataka, nukami randichipungapa kani. Chasa pasariskauramandami kamba wambrapa wambrakuna, chinigmanda llugsimuspa, kai alpallapita kunguriwagsamungapa kankuna”.

⁸ —Taita Diuska, Abrahamwa iuiarisa, paita nirkami, kari wambrakunata marka churangapa; chasaka, Taita Diuspalla kagta niraiangapa. Chimandami Abraham, Isaak suti paipa wambra pusag pucha iukagsamus-kata chasa rurarka. Chasallatami Isaak, paipa wambra Jakobta rurarka. Paipa chungá iskaí kari wambrakunatapas, Jakob chasallata rurarka. Chi runakunami karkakuna nukanchi Israelmandakunapa ñugpamanda achala taitakuna.

⁹ —Iachanchimi, chi Jakobpa wambrakunaka, José suti waugkindiwa mana allilla iuiaiwa rabia iukaspa, paita katugtakuna, Ejipto suti alpama rinakuska apan-gapa. Chasa pai katui tukugpipas, Taita Diuska mana sakirka. ¹⁰ Chiwanka, tukui llakiiwa kaskatapasmi kispichirka. Suma iachaimi paita kararka. Chasallata, Ejiptopi iaia mandagpa ñugpa ladu José kaura, Taita Diuska chi mandagta iuiachirka, Josewa sumaglla kangapa. Chi mandag kikinmi Joseta churarka, Ejiptopi tukui kaugsanakuskata i paipa wasimandakunawantapas mandag kangapa.

¹¹ —Chiuramandaka, iapa iarkai iapa llakiiwami chi Ejipto suiu tukurka, chasallata Kanaán alpa suiupas. Chiura nukanchipa ñugpamanda taitakuna manami tarinakurka ima mikungapa. ¹² Jakobka iachag-samurkami, Ejiptopi trigu mikui iukagtakuna. Chasa iachaspaka, paipa wambrakunata u nukanchipa

ñugpamanda taitakuna niskata, paikunatami kacharka, musuglla chima ringapa.

¹³ —Paikuna ña iskaima Ejiptoma riuraka, Joseka paipa waugkindikunatami rigsichirirka. Chiura-mandaka, chi alpapi iaia mandagpas iachag-samurkami, José pipa wambra kagta. ¹⁴ Nispaka, José kacharka, taitandi Jakobta i tukui paipurakunata pusagringapa. Paipurakuna, kanchis chungá pichka runakunami karkakuna. ¹⁵ Chasamandami Jakob, Ejiptopi kaugsai kallarigrirka. Chipimi wañurka. Nukanchipa ñugpamanda taitakunapas, chillapitami wañurkakuna. ¹⁶ Paikuna wañuuraka, Sikem suti puiblumami aparkakuna, pambangapa. Chipimi ñugpata Abraham, Amorpa wambrakunata sug piti alpa kulkiwa randiska tiarka, chipi wañuskakunata pambangapa.

¹⁷ —Abrahamta Taita Dius imasa niskasina tukug-samungapa ña chaiakuuraka, Jakobpa wambrakunapa kati wambrakuna, Ejiptopi iapa miraspa miraspami rinakurka. ¹⁸ Ejiptopi Josemanda ña kungariska kauraka, sug iaia mandagmi mandai kallarirka. ¹⁹ Chi mandagka, nukanchipa ñugpamandakunata llullachispa, mana llakispallami trabajachii kallarirkakunata. Nispaka, tukui taitakunatami nirka, kari wambra tiaskakunataka sitangapa, iapa miranakugmanda.

²⁰ —Chiurakunaka, Moisesmi tiagsamurka. Paika, Diuspa ñawipi sumami kawarirka. Paipa atunkunaka, kimsa killami wasi ukupi pakalla wiñachinakurka.

²¹ Paita sitagrii chauraka, kikin iaia mandagpa sipas warmi wambrami, sitaskata tarispa, paipagma aparka. Chiuramanda, pai kikinpa wambratasinami wiñachirka. ²² Chiwanka Moisés, tukui Ejiptomanda iachai-kunatami iachaikurka. Chasaka, tukuipi iacha suma rimag, alli iuiag pagtami tukurka.

²³ —Ña chusku chungá wata iukaura, Moiseska iuiarirkami, pai kikinpa Israelmanda runakunapagma chaiagringapa. ²⁴ Chipi chaiagriuraka, sug Ejiptomanda runa, Israelmanda sug runata kaspiwa mana llakispalla piakurka. Chasa kawaspa, Moiseska, chi Israelmanda runata michaspa, chi Ejiptomandata wañugta piagirka. Chasami randichipurka. ²⁵ Chasa rurakuspa, kasami iuiakurka: “Israelmanda runakuna iachagsamungapami kankuna: ‘Kai Moisesmandami Taita Dius nukanchita kispichigsamungapa ka.’” Moisés chasa iuiakugpipas, Israelmandakunaka manami iuiainakurka, paika kispichig kangapa kagta.

²⁶ —Chi kaiandi, Israelmanda iskaí runakuna makanakuskatami Moisés tarigrirka. Tarigrispaka, pasinsia-chispami nirka: “Kamkuna, waugkindikunami kangichi. ¿Imapatak rabiachirinakuspa makanakungichi?”.

²⁷ —Chi paipura makanakui kallarigka, Moiesta tangaspa, nirka: “¿Pitak kamta mandag churarka; chasaka, nukanchita justisiangapa? ²⁸ Imasami kaina Ejiptomanda runata wañuchirkangi: chasallatachar nukatapas wañuchiwangapa munakungi”.

²⁹ —Chasa uiaspa, Moiseska mitikurka. Madián suti alpama chaiagrispaka, chi luarmanda ajinusinami kaugsakurka. Chipika, sug warmimi tarirka. Paiwa kaspa, iskaí wambrami iukarkakuna.

³⁰ —Chusku chungu watapika, Moisés, Sinaí suti chusa sitaska alpapi purikugrirka. Chipika sug anjil, nina sindi sacha rupakuskasinami kawarirka. ³¹ Chasa rupakuskata kawaspaka, Moisés iapa ujnarigsamurka. Nispaka, kaillaiaspa rirka, mas allilla kawangapa. Chi-ura, atun Taita Diospa rimaimi uiarirka, kasa nispa: ³² “Nukami kani kamba ñugpamanda taitakunapa Dios. Abraham, Isaak i Jakobpa Taita Diosmi kani”.

—Chasa uiaspaka Moisés, iapa mancharispa chugchurirka. Kawangapapas, mana pudikurka. ³³ Chi-ura, atun Taita Dioska nirkami: “Kamba chakipi chura-raiaskakunata surkurii. Kam sarukuska alpaka, nukapallami ka. ³⁴ Nukapa runakuna Ejipto alpapi iapa llakii iukaskakunatami kawakuni. Paikuna iapa llakiiwa wakanakuskatapasmi uiakuni. Chimandami uraikumurkani, paikunata kispichingapa. Nukami niiki: samui. Uiawai. Kamtami Ejiptoma kachangapa kaiki”.

³⁵ —Chi Moisesami Israelmanda runakuna wabutiska karka. “¿Pitak kamta mandag churarka; chasaka, nukanchita justisiangapa?” niska karka. Chi Moisesmi Taita Dios, mandag i kispichig churarka, paipa anjilwa nina sacha rupakuskapi kawachispa. ³⁶ Chi Moisesmi Israelmanda runakunata Ejiptomanda llugsichigrirka. Chi Ejiptomanda llugsichigrispa, Puka Kucha suti atun iakupimi ialichirkakunata. Nispaka, chusa sitaska alpapi chusku chungu watami purichirkakunata. Chi purinakuskapi, ñi imaurapas mana kawaskasinatami kawachirkakunata.

³⁷ —Chi Moisesllatatami Israelmanda runakunata nirkaka: “Taita Dios kikinmi ni, kam kikinpuramanda Santu Ispirituwa sug rimagmi llugsingapa ka. Paika, nukasinami kangapa ka”.

³⁸ —Chi Moisesllatatami Israelmanda tukui runakunawa chusa sitaska alpapi sugllapi karka. Taita Diospa anjilpasmu paiwa karka. Chi anjil, Sinaí awa lumapi paita i nukanchipa ñugpamanda taitakunatapasmi rimarka. Chi Moisesmi Taita Diospa kaugsai karag rimakunata uiaspa chaskirka; chasaka paipas, nukanchita karagsamungapa.

³⁹ —Chi Moisesami nukanchipa ñugpamanda taitakuna mana uiangapa munarkakuna. Paita wabutispa, ninakurkami: “Tukuikuna, Ejiptoma kutisunchi”.

⁴⁰ Moisés mana paikunawa kagmanda, Aarón sutita nirkakuna: “Chi Moisés nukanchita Ejipto alpamanda llugsichimuskata, nukanchi mana iachanchichu ima tukugta. Chimanda, sug diuskuna rurai, nukanchita ñugpangapa”. ⁴¹ Chi punchakunami uchulla wagrasiina kawari paikunapa dius niraiangapa rurarkakuna. Nispaka, animalkunata wañuchispa rupachispa, chi ianga diustami kungurispa mucharkakuna. Chi pai kikin-kunapa makiwa ruraskata kawaspaka, iapami kuntintarirkakuna.

⁴² —Chimanda Taita Dioska, paikunapagmanda anchurirka. Paikunata sakirka, awamanda istrillakunata dius nispa, kungurichukuna. Chimandami Santu Ispirituwa rimag ñugpamanda librupi willarka, kasa nispa:

Kamkuna Israelmandakuna,

chi chusku chungu wata chusa sitaska alpapi purinakuura,

¿nukatachu animalkunata wañuchispa rupachispa kunguriwarkangichi?

Manima.

⁴³ Molok suti ianga diuspa linsu wasitami aparispa purinakurkangichi.

Chasallata, Refán suti ianga diuspa istrillasina kawariskatapasmi purichirkangichi.

Chi imajinkunata kam kikinkunapa makiwa ruraskakunatami mucharkangichi, dius nispa.

Chimandami nuka,

kamkunata llugsichispa,

Babilonia suti sug ladu alpama kachangapa kaikichita.

⁴⁴ Kasapasmi Esteban nirkakunata:

—Chi chusa sitaska alpapi, nukanchipa ñugpamanda taitakuna, sug linsu wasimi purichinakurka. Chi wasipika, Taita Dios paikunawa kagtami niraiarka. Chi wasimanda, Taita Dios, Moisesa niska karka: “Imasami kai wasita kawachiiki: chasallatami wasichipuangangi”.

⁴⁵ Chi wasitaka, nukanchipa ñugpamanda taitakunatami Moisés sakirka. Chi wasita kai alpamami chaiachig-samurkakuna. Josué suti taita kai suiu ñugpata kaugsanakuskata puchukakuuraka, chi linsu wasi paikunawa tiarka. Chi sug runakunata, Taita Diosmi kai alpamanda llugsichirka nukanchipa ñugpamanda taitakunapa ñawipi. Chi linsu wasi, David suti atun mandag kaugsankamami tiarka.

⁴⁶ —Pai Davidta, Taita Dios suma kuiarka. Pai Davidka munakurka, suma wasi wasichipungapa; chipika, Jakobpa Taita Dios kagsamungapa. ⁴⁷ Chasa munakugpipas, paika manima; paipa wambra Salomón sutimi wasichipurka. ⁴⁸ Wasichipugpipas, runa ruraska wasikunapika, tukuimanda mas atun Taita Dios mana chipika kaugsanchu. Chimandami Santu Ispirituwa rimagka ñugpamanda librupi kasa willarka:

⁴⁹ Atun Taita Dioska, kasami ni:

“Sug luar, nuka mandangapa tiaridirumi niraiá.

Alpaka, nukapa chaki sarudirumi ka.

Nigpika, ¿imasa wasitak munanakungichi saiachipuangapa?

¿Maikantak nuka samadiru kapuanga?

⁵⁰ ¿Manachu tukui, nuka kikin ruraska ka?”.

⁵¹ Kasapasmi Esteban nirkakunata:

—Kamkuna, imaurapas upasinami karkangichi.

Mana Taita Diusta rigsigsina, mana rinri uiagsina i mana sunguiugsinami kangichi. Kamkunapa ñugpamanda taitakunasina, kamkunapas chasallatami kangichi. Imaurapas Santu Ispirituwa mana munangichichu. ⁵² Kamkunapa ñugpamanda taitakuna, Santu Ispirituwa rimagkunata, ¿maikankunatatata mana llakichispa wañuchirkakuna? Chi rimagkunata willaskami karkakuna, alli iuiag Cristo samungapa kagta. Chi alli iuiag runa ña samuuraka, kamkunaka apichispami wañuchii nirkangichi. ⁵³ Taita Dios ima rurangapa niskataka kamkunapa ñugpamandakunata anjilkunawa-

mi willarka. Chasa willagpipas, Taita Dios imasa munaskata mana rurangichichu.

Estebanta wañuchiskakunamanda

⁵⁴ Chasa uiaspa, chi taitakunaka, iapa rabiari spa, kirukunapas uiarigta mukurirkakuna, Estebanta wañuchingapa nispa. ⁵⁵ Paika, Santu Ispiritupa iuiaita iukaspapa, sug luarma Taita Dios iapa suma punchalla kas-katasi kawarka. Chasallata, Taita Diospa alli ladu Jesús saiakugtasi kawarka. ⁵⁶ Chasa kawaspaka, nirka:

—Kawaichi. Suma luar, paskaskami ka. Runa Tukuska Jesuska, Taita Diospa alli ladu saiakugtami kawakuni.

⁵⁷ Chasa rimagllapi, tukuikuna, rinri taparispapa, sinchi kaparispapa, sugllasina kalparkakuna, paita apingapa.

⁵⁸ Nispaka, chi puiblumanda paita llugsichirkakuna, rumiwa piaspa wañuchigringapa. Estebanmanda kuntra willagkuna, manara rumiwa piai kallarispa, kataridirukunata Saulo suti musuta mingagirkakuna.

⁵⁹ Chasa Estebanta rumiwa pianakuuraka, paika Iaia Jesusta nirka:

—Taitiku, nukapa ispirituta kamtami mingaiki—.

⁶⁰ Nispaka, kungurispapa, sinchi kaparirka, kasa nispapa—Taitiku, paikuna kai mana suma rurawaskakunamanda, paikunata mana imapas iuiaripuangi—. Chasa nispaka, wañurka.

Jesuswa tukuskakunata, Saulo puchukangapa munakugmanda

8 Saulopas niska karka: “Estebantaka wañuchiimi chaiá”.

Chi punchallata, Jerusalemipi Jesuswa tukuskakunata puchukangapa iuiaiwasi wasi maskai kallarikakuna. Chimanda tukui Jesuswa tukuskakunaka, Judea i Samaria suti alpa suiu mitikui kallarikakuna. Chiwanka Jesús kikin agllaska runakuna, sapallami Jerusalemipi kidarkakuna. ² Taita Diospa alli iuiarispapa kag runakunaka, iapa wakaspapa, Esteban wañuskata pambarkakuna. ³ Ikuti Sauloka, Jesuswa tukuskakunata puchukangapa iuiailawami purikurka. Wasi wasi iaikuspa, kari i warmikunata aliuspa llugsichispapa, karsilpi churachikurka.

Samaria alpapi, Alli Willaita willaskakunamanda

⁴ Jerusalemamanda llugsigkuna, tukuipimi Diospa Rimaita willaspapa purii kallarikakuna. ⁵ Chiura Felipeka, Samaria suti alpapi chaiagrispa, sug puiblupi rimai kallarikakuna, Jesús, Taita Dios agllaska Cristo kagta willaspapa. ⁶ Chasa uiaspapa achkakuna, sugllasina tukuspa, ima Felipe rimakuskata allilla uiai kallarikakuna, ñi pipas mana kawaskasina rurakugmanda. ⁷ Chiurakuna kuku wairakuna, achkakunapagmanda kaparispapa llugsichii tukurkakuna. Sugkuna kuiuringapagllapas mana pudiskakunata, chasallata mana chakiwapa puringapa pudiskakunatapas, achkakunatami aliachispapa sakirkakuna. ⁸ Tukui chasa kawaskakuna, iapa alli iuiachiiwa kuntintarirkakuna.

⁹ Chipi tiarka sug runa, Simón suti. Chi runa, ña unaimandata chi puiblupi paipa mana alli iuiaiwapa ruraspapa kausakurka. Kikinlla nikurka: “Nuka, tukuikunamanda mas iapa iachami kani”. Chasaka, tukui chipi kausanakuskata ujnachispapa kausakurka. ¹⁰ Paita manchariskasinasi suma iuianakurka. Atun taitakunapas paimanda ninakurka: “Paimi Taita Diospa iapa iachaiwapa suma ruraku”. ¹¹ Ña unaimandata paipa mana alli iuiaiwapa tukuikunata ujnachispapa charikurka.

¹² Chasapi kausanakuspapas, Felipe Jesucristomanda i Diospa suma mandaita willagsamuskata uiaspapa, Jesuswa suma iuiarirkakuna. Nispaka, kari i warmi baugtisaripi tukurkakuna. ¹³ Kikin Simonpasma, Jesucristomanda uiaspapa, suma iuiarigsamurka. Baugtisaripi tukuspapa, Felipe purii kallarikakuna. Felipe imarapas mana kawaskasina rurakuskata kawaspapa, iapa ujnarispa kawakurka.

¹⁴ Chiuramandaka, Jesús kikin agllaska runakuna Jerusalemipi kaskama iacharigsamurka, Samariamanda runakunapas Diospa Rimaita suma uianakugta. Chasa iacharigsamuuraka, Pedro i Juanta chi puibluma kacharkakuna. ¹⁵ Chi Samariamandakuna, manara Santu Ispirituta chaskiska karkakuna. Iaia Jesuspa suti llawami baugtisariska karkakuna. Chasa kagmanda, Pedro i Juanka, chaiagrispa, Taita Diustami mañarkakuna, Santu Ispiritullatata paikunawa tukugsamuchu.

¹⁷ Nispaka, umapi maki churarkakunata. Chasawa, Santu Ispiritutami chaskirkakuna.

¹⁸ Simonka kawarka, paikuna maki churaura, Santu Ispirituta chaskigtakuna. Chasa kawaspapa, paikunata kulki munachispapa, ¹⁹ nirka:

—Nukatapas chasallata iachai karawaichi; chiwanka, nuka maikantapas maki churaspa, Santu Ispirituta karai pudingapa.

²⁰ Pedroka ainirka:

—Kamba chi kulki kam kikinwantami puchukaringapapa kangichi. Taita Dios kikin paipa Ispirituta karangapapa kachamuskata, ¿kamba kulkiwachu munakungi randingapa? ²¹ Kamka, kai nukanchi suma ruranakuskapa mana pudingichu chapuringapa. Diospa ñawipi, kam mana allilla iuiaiwami kangi. ²² Kawakuikimi, kam nukanchita llakirispapa kawakugta. Kam kikin mana allilla ruraskakuna wataskasinami charinakú. Chasapapa, chi pandariikunata sakispapa, atun Taita Diusta nii: “Nuka imasa umapi mana allilla iuiakuskata pasinsiwai”.

²⁴ Chiura, Simón ainirka:

—Atun Taita Diusta nukamanda mañapuaichi, nukata imasa niwaskasina mana pasariwachu.

²⁵ Chi Jesús agllaskakuna, Iaia Jesusmanda Suma Rimaita chi puiblupi willaspapa, Samaria alpapi sug achka puiblukunatapas willaspapa ialirkakuna, Jerusalemma kutinakuspa.

Etiopía alpamanda runa, Jesuswa tukuskamanda

²⁶ Felipetaka, atun Taita Diospa anjil nirka:

—Atarispapa, alli makisinama rii. Jerusalemamanda Gaza suti puibluma ñambita rii—. (Chi ñambi, chusa sitaska alpallatami riraiá.)

²⁷ Chiura Felipe, atarisa, rirka. Chi ñambipika, Etiopía suti alpamanda sug runawa tupanakurka. Chi runa karka Kandase suti atun mandag warmipa aidag, kulkita wakachig. Jerusalemma riska karka, Taita Diusta kunguringapa. ²⁸ Kikinpa alpama kutikuspaka, kaballu aliudiru augtupi tiakuspa, Isaías suti Santu Ispirituwa ñugpamanda rimag ima willaraiaskata kawakurka.

²⁹ Felipewa chi runawa tupanakuura, Santu Ispirituka paita nirka:

—Chi augtuma kaillaiagrii.

³⁰ Chiura Felipe, kalpa kaillaiagrispa, uiarka chi runa imasa uiarikuskata. Nispaka, tapurka:

—Chi kawakuskata, ¿iachangichu ima niraiagta?

³¹ Chiura, chi runaka ainirka:

—Ñi pipas mana iachachiwankunachu. Nigpika, ¿imasatak nuka iachasa?—. Nispaka, Felipeta mañarka— Diusmanda sikamui, sugllapi nukawa tiaringapa.

³² Nigpika, kasa willaraiaskatachu chi runa kawakurka:

Imasami ubija, wañuchii tukungapa apanakuura i milma rutungapa kaura,

mana kaparí:

chasallatami paika, wañuchii tukungapa apanakuura, mana ñi ima rimarirka.

³³ Justisiakunaka, paita wabutispa, mana uiaspallami wañuchirkakuna.

Pai musu kagpita, kausaitami anchuchipurkakuna. Chimandami wambra, mana paita tiapú.

³⁴ Chasa kawaspa willaura, chi runaka Felipeta tapurka:

—Diusmanda willawai: chi rimag, ¿kikinmandachu chasa rimarka; u sugmandachu nirka?

³⁵ Chasa willaraiaskata kawaspa, Felipe chiuralla Jesusmanda willaspa, iachachii kallarrirka.

³⁶ Chasa ñambi rinakuskapika, iaku tiaskapi chaigrirkakuna. Chiura, chi runaka nirka:

—Kaipi iakumi tia. ¿Manachu nukatapas pudirintra baugtisawangapa?

[³⁷ Chiura, Felipe nirka:

—Jesucristowa kam suma iuiariska kagpika, baugtisariimi pudingi.

Chiura, chi runaka ainirka:

—Sumami iuiakuni, Jesucristo sutipa Taita Diuspa wambra kagta—.] ³⁸ Chasa nispaka, nirka— Augtuta saiachii.

Saiachiura, iskandikuna iakuma uraikuspaka, chi mandag runataka Felipe baugtisarka.

³⁹ Iskandikuna iakumanda llugsiura, atun Taita Diuspa Ispirituwa diulpilla Felipeta aisaspa aparka. Chi mandag runa, paita mana mas kawarka. Chi runaka, iapa suma kuntintulla paipa ñambi rii kallarrirka. ⁴⁰ Felipeka, Azoto suti puiblupi kawarigrirka. Chimandaka, puiblukuna suiu purispa, Jesusmanda Alli Willaita willaspa ialirka, Sesarea suti puibluma chaiankama.

Saulo, Jesuswa tukuskamanda

9 Chiurakunaka Saulo, Iaia Jesuswa tukuskakunata wañuchispa puchukangapa iuiailawami puri-

kurka. Chasa iuiarispaka, iaia sasirduti iskribiska karta mañagrirka, ² Damasko suti puiblu judiukuna tukui tandariduru wasikunapi iaikui pudingapa; chikunapika, maikan kari i warmikuna Iaia Jesuswa tukuskakunata tarispa, apispa, Jerusalemma wataspa apangapa.

³ Chasa mañaspaka, ñambi rikuskapi, ñalla Damaskoma chaiagringapa kaura, diulpilla awanigmanda paita punchaiachigsamurka. ⁴ Punchaiachigllapi, Sauloka alpapi urmagsamurka. Chiuraka, paita rimai uiarig-samurka, kasa nispa:

—Saulo, Saulo, ¿imapatak puchukawangapa iuiailawa purikungi?

⁵ Chiura, Saulo tapurka:

—Kam Taitiku, ¿pitak kangii?

Chasa tapuura, chi rimagka ainigsamurka:

—Nukami kani Jesús. Nuka kikintami puchukawangapa iuiailawa purikungi.

[⁶ Chasa uiaspaka, Saulo, dimanchai chugchuspa, tapurka:

—Taitiku, ¿imatak nuka rurangapa munakungi?

Chiura, Iaia Jesuska ainirka:]

—Atarisa rii. Chi puibluma iaikugrii. Chipimi kamta ningakuna, ima rurangapa chaiagta.

⁷ Saulowa sugllapi rinakugka, rimaita uiarkakuna. Kawaika, ñi pitapas mana kawarkakuna. Chimanda, iapa manchariska karkakuna.

⁸ Sauloka, alpamanda atariuraka, ñi ima mana ñawi kawangapa pudirka. Nigpika, paita makimanda apispa, Damaskoma pusarkakuna. ⁹ Kimsa punchami chipi karka, mana ñawi kawangapa pudi. Chi punchakuna, ñi ima mana mikuspalla upiaspallami karka.

¹⁰ Chi puiblullapita kausakurka Jesuswa tukuska runa, Ananías suti. Chi runataka Iaia Jesús, muskui ukupisina kawarisa, nirka:

—Ananías.

—Kaipimi kani, Taitiku— ainirka.

¹¹ Chiura, Iaia Jesuska nirka:

—Atarisa, Derecho suti ñambima rii. Judaspa wasi-ma chaiagrii. Chipika, Tarso puiblumanda sug runa Saulo sutimi kanga. Chi runapas, kunaura Taita Diustami mañaku. ¹² Ananías suti runa iaikuspa, maki churagtami muskui ukupisina kawarka, ikuti kawai pudingapa.

¹³ Chasa uiaspa Ananiaska, Iaia Jestusta nirka:

—Taitiku, achkakunatami chi runamanda uiaska kani, Jerusalempe kammandalla iuiarisa kagkunata puchukangapa munakugta. ¹⁴ Chi runaka, kunaura iaia sasirdutikuna kachamusikasi samuku, kaipi tukui kamwa suma iuiarisa kagkunata apispaka, wataspa apangapa.

¹⁵ Iaia Jesuska nirka:

—Kamka riilla. Paita, nukami agllarkani, mana judíu kaskakunata, paikunapa mandagkunata i Israelmanda runakunatapas nukamanda willapuangapa. ¹⁶ Nukami paita kawachingapa kani, imasa pai kikin, nukamanda iapa llakiikuna iukangapa kagta.

¹⁷ Chasa uiaspa Ananiaska, Saulo kaskamami rirka. Chipi iaikugrispaka, Saulota maki churaspa, nirka:

—Waugki, Iaia Jesús, kam kikinta ñambipi samukuskata kawarirka; pai Jesusllatatami nukata kachamuwarka, kam ikuti kawai pudingapa. Chasallata, Santu Ispiritupa iuiaitami chaskingapa kangki.

¹⁸ Chasa nigllapika, Saulota ñawi wichkaraiaska-mandami mapakunasina urmagsamurka. Chiura, ikuti allilla kawai pudirka. Nispaka, atarispá, baugtisarirka.

¹⁹ Mikuuraka, ikuti animupas chaiagsamurka.

Saulo, Alli Willaita willai kallarisikamanda

Chiuramanda Saulo, Jesuswa tukuskakuna Damaskopi kaugsanakugwa sug punchakunami chisiarka. ²⁰ Chi punchakuna, judiukuna tandariduru wasikunapi Jesusmanda willai kallarisirka, kasa nispá:

—Jesús, Taita Diuspa wambrami ka.

²¹ Tukui paita uiagkuna, ujnarispa, ninakurka:

—Kai, ¿manachu ka Jerusalenpi Jesuswa tukuskakunata puchukangapa munakug? Pai kikinsi kaima samurka, Jesuswa tukuskakunata wataspa, iaia sasirdutikunapagma apangapa.

²² Sauloka, mana manchaspalla, ñugpamanda librupi imasa willaraiaskasina iachachikurka, Jesús, Taita Dius agllaska Cristo kagta. Chasa iachachikusikamanda, Damaskopi kaugsag judiukuna, paipa rimaita ainigapa mana pudirkakuna.

Judiukuna paita wañuchingapa, Saulo kispiskamanda

²³ Achka punchakuna ialiuura, chi judiukuna, suglla iuiái tukuspa, rimanakurka, Saulota wañuchingapa.

²⁴ Puncha i tuta, chi puiblumanda llugsiduru pungukunapi chapaspa saianakurka, paita apispa wañuchingapa. Chitaka, Saulo iachagsamurka. ²⁵ Chasa iachaspaka, sug tuta Jesuswa tukuska runakuna, paita atun saparupi jundachispa, puiblu kincha awanigmanda alpama uraikuchimurkakuna. Chasapika, wañui kispirka.

Jerusalén puiblupi, Saulo kagriskamanda

²⁶ Jerusalén puibluma chaiagrispaka, Saulo munakurka, Jesuswa tukuskakunawa sugllapi kangapa. Chasa munakugpipas, tukuikuna paita manchankurka. Saulo manima Jesuswa tukuska kagta iuianankurka. ²⁷ Chasa iuianakugpipas, Bernabeka, Saulopagma chaiagrispaka, Jesús kikin agllaskakunapagma pusarka. Paikunapagma chaiachigrispaka, willarka imasa Saulo, Damaskoma ñambipi rikuura, Iaia Jesús kawarispá, paita rimagta; chasallata Damaskopi mana manchaspalla Jesusmanda willakugta.

²⁸ Chiuramandaka Saulo, chi Jesuswa tukuskakunawa Jerusalenpi purii kallarisirka. Chipika, mana manchaspallami Iaia Jesusmanda willai purikurka. ²⁹ Paika, judiukuna griego rimaiwa rimanakuskawa sinchi sug rigcha sug rigcha Jesusmanda rimanakurka. Chimandaka, chi runakuna iuiarinakurka, paita wañuchingapa. ³⁰ Chasa iachagsamuspa, Jesuswa tukuskakunaka paita pusarkakuna Sesarea puibluma. Chimandaka, Tarso puibluma paita kacharkakuna.

³¹ Chiurakuna, Judea, Galilea i Samaria alpakuna suiu, Jesuswa tukuskakuna sumaglla kaugsanakurka, mana pitapas manchaspalla. Pai kikinpura mas alli suma iuiái iuiachinakurka. Atun Taita Diusta suma manchaspá kuianakurka. Santu Ispiritu paikunata sumaglla iuiachiskawa masmi miranakurka.

Eneas suti runa ambii tukuskamanda

³² Chikama Pedroka, Jesuswa tukuskakunata kawaspá purikurka. Purikuskapika, Lida suti puibluma chaiagrirka, chipi kaugsanakuskatapas kawangapa.

³³ Chipika, Eneas suti sug runawa tupanakurka. Chi runa, mana kuirpu kuiuringapa pudi, pusag wata ungug sirikurka. ³⁴ Chi runataka, Pedro nirka:

—Jesucristomi kamta ambiku. Atarispá saiaríi. Kam puñudiruta allíchii.

Chasa nigllapi, Eneas atarispá saiarirka. ³⁵ Chasa kawaspaka, Lida i Sarón puiblukumamanda tukui runakuna Iaia Jesuswami tukurkakuna.

Dorkas suti warmi ikuti kaugsarisikamanda

³⁶ Jope suti puiblupika tiarka Jesuswa tukuska sug warmi. Chi warmi suti karka Tabita u Dorkas. (Chi niraianmi taruka.) Iapa allilla ruraspa, tukui ministidukunata aidaspa kaugsag warmimi karka. ³⁷ Chi warmi-ka, Lida puiblupi Pedro kaura, sinchi ungui iukaspa, wañurka. Paita armachiskauramandaka, awa ladu wasi atun ukupi ialichispa churagrirkakuna.

³⁸ Jopemanda Lida puibluma mana iapa karu ringapa kanchu. Jesuswa tukuska Jopepi kaugsanakugka, allillami iacharkakuna, Pedro Lidapi kagta. Chimandaka, iskai runakunata Lidama kacharkakuna, “Utkalla Jopema samuchu” ningapa.

³⁹ Chaiagrispa willagrirkakuna. Chiura Pedroka, chi runakunawa rirka. Jopema chaiachigrispaka, paita pusarkakuna wañuska kaskama. Chi ukupi iaikugriuraka, tukui chipi kag sapalla kidaska warmikuna wakaspa kallarisirka, Dorkas kaugsaura kikin ruraspa i katanga iukachiskakunata kawachingapa. ⁴⁰ Pedroka, tukuikunata kanchama llugsichirka. Llugsichispaka, kungurispá, Taita Diusta mañarka. Mañaskauramandaka, chi warmi wañuskata kawaspá, nirka:

—Tabita, ataríi.

Chiuralla, ñawi kawagsamurka. Pedrotá kawaspaka, atarispá, tiarirka. ⁴¹ Chiura Pedroka, makimanda apispa, saiachirka. Nispaka, Jesuswa tukuskakunata i chi warmikunata kaiaspa, kaugsa kagtami kawachigsamurka. ⁴² Chasa pasariskaka, Jope puiblupi tukui kaugsanakuskapagpimi iacharigsamurka. Chimanda, achkakunami Iaia Jesuswa tukugsamurkakuna. ⁴³ Chiuramanda Pedro, achka punchakuna chi puiblupi chisiarka, Simón suti wagra kara jujuspa kurtidurpagpi.

Kornelio suti suldadukunata mandag, Jesuswa tukuskamanda

10 Sesarea puiblupi tiarka sug mana judíu runa, Kornelio suti. Pai, Italiamanda suti suldadukunata mandagmi karka. ² Taita Diusta suma kuiaspa manchagmi karka, chasallata paipa wasipi tukui kagkunapas. Achka kulkiwa judíu ministidukunata aida-durmi karka. Tukui punchakuna, Taita Diusta mañadur karka. ³ Chi runataka, sug chaugpi chisima kaura, Taita Diuspa anjil, muskui ukupisina diulpilla iaiuspa, allilla kawarirka. Chi anjilka, paita nirka:

—Kornelio.

⁴ Chasa kawaspaka, Kornelio iapa mancharig-samurka. Nispaka, tapurka:

—Kam taitaka, ¿imaták munakungi?

Chiura, anjilka ainirka:

—Taita Dios, kam ima mañakuskatami uiarka. Chasallata, iapa ministidukunata kulki karakuskatami kawarka. ⁵ Kunauraka, kamba runakunata kachai Jope puibluma, Simón Pedro suti runata pusagringapa. ⁶ Chi runa, sug Simón suti wagra kara jujuspa kurtidurpa wasipimi ka. Chi Simonpa wasi, lamar iaku patallapimi saiaku.

⁷ Chi anjil rigllapi, Kornelioka, iskai paipa lutrin-kunata i sug suldadu Taita Dioswa iuiarig paipa iapa kuiaska kagtami kaiarka. ⁸ Chi runakunataka tukui ima anjil rimaskata willaspa, Jope puibluma kacharka.

⁹ Kaiandika, chi runakuna Jopema kaillaianakugriura, Pedroka, ña chaugpunchasina kaura, wasi awa ladu trujasinama sikarka, Taita Diusta mañangapa. ¹⁰ Paitaka iarkai apirka. Mikui munakurka mikungapa. Mikui ianunakunkama, paita muskui ukupisina kawarig-samurka, ¹¹ sug luar paskaska kagta. Chipika, sug atun linsusina tukui chusku puntakunata wataska uraikumukugsina kawarirka. ¹² Linsu ukupika, sug rigcha sug rigcha chusku chakiiug sachukumanda animalkuna, kulibrakuna i piskukuna tiagtasi kawarirka. ¹³ Chiuraka, Pedrota rimai uiarigsamurka:

—Atarispá wañuchii, maikantapas kam mikungapa.

¹⁴ Pedroka ainirka:

—Taitiku, nuka mana munanichu. Nuka, ñi imaurapas chi mapasina niraiaskakunata mana mikuska kanchu.

¹⁵ Ikuti chi rimaika uiarigsamurka:

—Kikin Taita Diosmi kasa ni: “Maillaskasinami kankuna”. Chimandami niiki: kam mana iuiakui, chara mapasina kagta.

¹⁶ Kimsa biaji chasallata chasallata kawachispa rimagsamurka. Chiuramandaka linsu, awasinama tukuiwa sikarka.

¹⁷ Chasa kawaspaka, Pedro iapa iuiarii kallarirka: “Chi kawariwaska, ¿imasik niraiá?”. Chasa iuiarikunkama, Kornelio kachaskakunaka, Simonpa wasimanda tapuspa tapuspa, wasi punguma chaiagrirkakuna. ¹⁸ Chipi chaiagrispaka, tapurkakuna:

—Simón Pedro, ¿kaipichu kausá?

¹⁹ Pedro chara imasa kawaskamanda iuiakuura, Santu Ispirituka paita nirka:

—Kimsa runakunami kamta maskanakú. ²⁰ Nuka kachamuskami kankuna. Chimanda uraikuspa, paikunawa riilla, mana manchaspalla.

²¹ Chiura Pedroka, uraikuspa, chi runakunata nirka:

—Nukami kani kamkuna maskanakuska. ¿Imapatak samunakungichi?

²² Chiura ainirkakuna:

—Kornelio suti suldadukunata mandagmi nukanchita kachamurka. Pai runa, alli iuiag, Taita Diusta suma kuiaspa manchagmi ka. Paita, tukui judiukunami munankuna. Paitaka, Taita Diospa tukui alli anjilsi nirka: “Kachai Pedrota pusagringapa, samuchu. Samu-uraka, uiankangimi imasami rimagsamú”.

²³ Chasa uiaspaka, Pedroka iaiukhirkakunata, pusa-da mañachingapa.

Kaiandika, paikunawa rirka. Jopemanda Jesuswa sug tukuskakunapas, sugllapi rirkakuna. ²⁴ Sug kaiandika, Sesarea puibluma chaiagrirkakuna. Chipika Kornelio, paipapurakunawa chaianakudiruwa tandachispa, paipa wasipi suianakurka. ²⁵ Chi wasima Pedro ña chaiagrikuuraka, Kornelio tupangapa rirka. Tupanakuspa, paita kungurirka. ²⁶ Pedroka atarichirka, kasa nispá:

—Saiarii. Nukapas, kamsina ianga runami kani.

²⁷ Chiuramanda, paiwa rimanakuspa, wasi ukuma iai-kugrirkakuna. Chipika, achka runakuna tandariska kaskakunata kawaspá, ²⁸ Pedroka nirkakunata:

—Kamkuna allillami iachangichi: nukanchi judiukunata michanmi, sugkunawa ianga rimanakungapa, piur paikunapa wasima iaiugringapa. Chasa kagpi-pas, Taita Dios kikinmi willawarka, mana pitapas mapasina kagta kawangapa. ²⁹ Chimandami, kamkuna pusamuwangapa chaiagrillapi, mana ñi ima piñarispalla samurkani. Chasamandami iachangapa munani: ¿imapatak kaiawanakungichi?

³⁰ Chiura, Kornelioka ainirka:

—Kasaurallatata, ña chusku punchami tukú; kai nukapa wasi ukupimi karkani. Mana mikuspalla, chisima Taita Diustami mañakurkani. Nigpika diulpilla sug runa, puncha katanga churariskami kawariwag-samurka. ³¹ Chi runaka niwarkami: “Kornelio, Taita Dios, kam ima mañakuskatami uiarka. Chasallata, iapa ministidukunata kulki karakuskatami kawarka. ³² Kuna-uraka, kamba runakunata kachai Jope puibluma, Simón Pedro suti runata pusagringapa. Pai runa, sug Simón suti wagra kara jujuspa kurtidurpa wasipimi ka. Chi Simonpa wasi, lamar iaku patallapimi ka”.

³³ —Anjil rimawagllapimi kacharkani, kamta maskagringapa. Kam, allillami rurarkangi, nukawa samungapa. Kunaura, tukuikunami kanchi Diospa ñawipi. Munanakunchimi, tukui ima atun Taita Dios kamta nis-kata uiangapa.

³⁴ Chiura, Pedroka nirka:

—Kunaura nuka sutipami iachani, Taita Diospa ñawipi, tukuikuna sug rigcha sug rigcha mana tiagta.

³⁵ Maikan runakunapas Taita Diusta suma kuiaspa

manchaiwa iuiarispa allilla ruragkunata, chi runakunatami sutipa sumaglla kawá.

³⁶ —Taita Dios, ñugpamanda achala taita Israelpa wambrakunapa kati wambrakunata Jesucristowami rimagsamurka, runakuna paiwa sumaglla kaugsai tiangapa. Pai Jesús, tukuikunapa iaiami ka. ³⁷ Kamkuna, allillami iachangichi, Galilea alpa suiu, nispaka Judea alpa suiupas imasa pasarikuskata, Juan willaspa baugtisaspa purikusauramandata. ³⁸ Iachangichimi, imasa kikin Jesús, Nazaret puiblumanda kaspá, Taita Diusta Santu Ispirituwa chaskigsamugta; chasaka, tukui allilla pudingapa. Taita Dios paiwa kagmanda, allilla ruraspami purikurka. Maikanta iaia kukuwa pagtariskatapas anchuchispami purikurka.

³⁹ —Nukanchika, Judea alpa suiu i Jerusalén puiblupi tukui ima Jesús suma ruraskata kawaspa, sutipa willagkunami kanchi. Paitaka, kruspi klabaspami wañuchirkakuna. ⁴⁰ Paita chasa wañuchigpikunapas, Taita Dioska kimsa punchapika ikutimi kaugsachirka. Nispaka sakirka, nukanchita ikuti kawarigsamungapa. ⁴¹ Tukui runakunata mana kawarirkachu. Nukanchillatami kawarigsamurka. Nukanchitami Taita Dios ñugpamandata agllarka, chasa kawaskata willagkuna kangapa. Nukanchikar, Jesús ña wañuska kaugsariskauramandata paiwa mikuspa upiaspami karkanchi.

⁴² Chiuramanda paika, nukanchitami kachamurka, tukui runakunata kasa willangapa: pai Jesustami Taita Dios churarka, tukui kaugsa i wañuskakunata justisiangapa. ⁴³ Paimandami Santu Ispirituwa tukui ñugpata rimagkuna willaska niraiarka, kasa nispa: “Maikan paiwa suma iuiarigkuna, paikuna pandariskakunata pasinsiaimi tukungapa kankuna”.

⁴⁴ Pedro rimakugllapimi kikin Santu Ispíritu, tukui kaskakunapa sungupi iaikugsamurka. ⁴⁵ Jesuswa tukuska judiukuna Pedrowa chaiagriskakunaka, chi mana judíu kagkunapas Santu Ispirituta chaskigta kawaspa, iapa ujnarirkakuna. ⁴⁶ Chi runakuna, mana iachaska rimaikunawa rimanakuskata i Taita Diusta iapa suma kagta ninakuskata uiaspami chasa ujnarirkakuna.

Chiuramanda, Pedroka nirka:

⁴⁷ —Kai runakunapas, Santu Ispirituta ñami chaskirkakuna, nukanchisinallatata. Nigpika, ¿imamandatak manara baugtisingakuna?—. ⁴⁸ Chasa nispa, nirka—Jesucristopa sutiwa baugtisariichi.

Chiuramanda chipi kagkuna, Pedrota mañarkakuna, paikunawa sug punchakuna chisiangapa.

Jerusalenpi Jesuswa tukuskakunata, Pedro willagriskamanda

11 Jesús kikin agllaskakunata i Judeapi kaugsag Jesuswa tukuskakunata iacharigsamurka: mana judíu kagkunapas, Diospa Rimaita sumami uiarkakuna. ² Pedro ikuti Jerusalenma chaiagriuraka, Jesuswa tukuska sug judiukuna mana munanakurka, paikunapa ñugpamandakuna ima rurangapa iachachiskata sakingapa. Chimandami, paita piñaspa, ³ nirkakuna:

—¿Imapatak mana judíu kagkunata chaiakugringi? ¿Imapatak paikunawa sugllapi mikukugringi?

⁴ Chiura Pedroka, pai ima pasaskata suiumandata willai kallarirka, kasa nispa:

⁵ —Nuka Jope suti kaska puiblupi Taita Diusta mañakuuraka, muskui ukupisina kasami kawarkani. Sug atun linsusina tukui chusku puntakunata wataska, awamanda nuka kaskamami uraikumukurka. ⁶ Allillami kawarkani. Chi ukupika, sug rigcha sug rigcha chusku chakiiug sachukumanda animalkuna, kulibrakuna i piskukuna tiagtami kawarkani. ⁷ Chasa kawakuuraka, kasa rimaimi uiariwagsamurka: “Pedro, atarispá wañuchii, maikantapas kam mikungapa”.

⁸ —Nukaka ainirkani: “Taitiku, nuka mana munanichu. Nuka, ñi imaurapas chi mapasina niraiaskakunata mana mikuska kanichu”.

⁹ —Chi suma luarmanda rimaika, ikuti uiariwagsamurka: “Kikin Taita Diosmi kasa ni: ‘Maillaskasinami kankuna’. Chimandami niiki: kam mana iuiakui, chara mapasina kagta”.

¹⁰ —Kimsa biaji chasallata chasallata kawachispa rimawagsamurka. Chiuramandaka chi linsu, awasinama tukuiwa sikarka.

¹¹ —Chiurallatata, kimsa runakuna Sesareamanda kachaskakunami nuka kaska wasima chaiagrirkakuna, maskawagringapa. ¹² Chiura, Santu Ispirituka niwarkami: “Paikunawa riilla, mana manchaspalla”. Sugta nukanchi waugkindikuna kaipi kagkunapasmi nukawa rirkakuna. Chasa Sesareama chaiagrispaka, chi runakunata kachagpa wasipi iaikugrirkanchi. ¹³ Chiura chi runaka, kasami nukanchita willai kallarirka: “Sug anjil nukapa wasipi saiakugtami kawarkani. Chi anjilka niwarka: ‘Kamba runakunata kachai Jope puibluma, Simón Pedro suti runata pusagringapa. ¹⁴ Pai runami rimagsamungapa ka, kam i tukui wasipi kagkuna imasa kispiringapa kagtakuna.”

¹⁵ —Nuka chasa uiaspa, rimai kallariuraka, Santu Ispiritumi paikunapa sungupi iaikugsamurka; imasami ñugpata nukanchipagma samuska karka: chasallata.

¹⁶ Iaia Jesús imasa nukanchita niskata chiurami iuiariwagsamurka. Kasami niska karka: “Juan, iakullawami baugtisarka. Ikuti kamkunaka, Santu Ispirituwami baugtisai tukungapa kangichi”. ¹⁷ Nigpi, imasami nukanchi Iaia Jesucristomanda suma iuiaskakunata, Taita Dios paipa Ispirituta karagsamurka: chasallatami paikunatapas kararka. Nigpika nuka, ¿imatak kani, Taita Dios kikin munakuskata: “Mana” ningapa?

¹⁸ Chasa uiaspa, Pedrota piñaspa kagkunaka, upallaspa, Taita Diusta nirkakuna:

—Kam, iapa suma atunmi kangí—. Kasapasmi nirkakuna— Sutipami Taita Dios, mana judíu kagkunatapas kará; chasaka paikuna, pandariikunata sakispa, mana puchukariduru suma kaugsaita iukangapa.

Antiokia puiblupi Jesuswa tukuskakunamanda

¹⁹ Estebanta judiukuna wañuchiskauramanda, tukui Jesuswa tukunakuskata wañuchingapa maskai kallarirkakuna. Chimanda sugkuna, Fenisia i Chipre suti alpa-

kunama mitikurkakuna. Sugkunaka, Antiokia suti puiblumami chaiagrirkakuna. Maimapas chaiagrispaka, judíu kagkunallatami Jesusmanda willanakurka. ²⁰ Ikuti sugkunaka, Antiokiama chaiagrispaka, mana judíu kagkunatapasmi rimaspa, Iaia Jesusmanda willai kallarrirkakuna. Chi runakuna, Chipremanda i Sirene puiblumandami karkakuna. ²¹ Chi runakunaka, atun Taita Diospa iapa iachaita iukaspami Jesusmanda suma willanakurka. Chasa uiaspaka, achka runakunami, ñugpamanda iuiakunata sakispa, Iaia Jesuswa suma iuiarirkakuna.

²² Jerusalemipi Jesuswa tukuska runakunata chasa iacharigsamurka. Chiura, Bernabetami chi Antiokiama kacharkakuna. ²³ Pai runaka karkami iapa alli, tukuipi Jesuswa suma iuiag. Santu Ispiritupa iuiaitami iukarka. Paika, chi puibluma musuglla chaiagrispa, kawarka imasa Taita Dios paikunata sumaglla kawaska kagta. Chimandami paika sumaglla kuntintarirka. Nispaka, tukui paikunatami suma iuiachispa nirka:

—Iaia Jestusa mana sakingichi. Paillawa iuiarispaka kausangichi—. Chi punchakunaka, iapa achka runakunami Iaia Jesuswa tukugsamurkakuna.

²⁵ Chiuramanda Bernabeka, Tarso puibluma rirka, Saulota maskangapa. ²⁶ Chipi tarigrispaka, Antiokiama paita pusarka. Chipi chaiagrispaka, sug intiru watami Jesuswa tukuskakunawa chisiagrirkakuna. Achkakunatami Jesusmanda iachachirkakuna. Chi Antiokia puiblupimi Jesucristowa tukuskakunata musuglla sutichii kallarrirkakuna: “cristiano”.

²⁷ Chi punchakuna Santu Ispirituwa sug rimagkuna, Jerusalemamanda chi puibluma chaiagrirkakuna.

²⁸ Chipi chaiagrigrupura sug, Agabo sutika, tukuikuna uianakuskapi saiarispa, Santu Ispirituwami rimarka, kasa nispa:

—Tukui alpapimi iapa iarkai tukugsamungapa ka—. (Imasa willaskasinami nispaka tukugsamurka, Klaudio suti Romapi iaia mandag kaura.)

²⁹ Chasa willaskata uiaspaka, Jesuswa tukuskakunaka nirkakuna:

—Manara iarkai chaiagpi, nukanchi kulki kachasunchi, Judeapi kausag Jesuswa tukuskakunamanda. Imasa pudiskasina, tukuikuna karangapa kachasunchi.

³⁰ Chasami rurarkakuna. Chi kulki tandachispaka, Bernabeta i Saulota kacharkakuna, paikuna, Judea alpama rispa, Jesuswa tukuska iacha taitakunata kuaringapa.

Santiago wañuchii i Pedro karsilmanda kispichii tukuskamanda

12 Chi punchakuna, mandag Herodeska Jerusalemipi Jesuswa tukuskakunata puchukangapa iuiaiwa apichii kallarrirka. ² Juanpa waugki Santiago sutitami ispadawa wañuchirkakuna. ³ Chasa Herodes ruragmanda, judiukunaka ajai kuntintarigsamurkakuna. Chimanda, Pedrotapasmi apichirka. Tanda mana libadurawa mikudiru punchakunami paita apirkakuna. ⁴ Paita apichispaka, karsilpimi churachirka. Chi karsilpika, chusku chusku suldadukuna trukarispa truka-

rispami kawanakurka. Herodes iuiakurka, paskua atun puncha ialiuira, Pedrota llugsichispa, judiukunata kawachingapa, manara wañuchispalla.

⁵ Pedro karsilpi kaskata, suldadukuna allilla kawanakurka. Ikuti Jesuswa tukuskakunaka, iapami Taita Diusta mañanakurka, Herodespa makimanda kispichii tukungapa.

⁶ Herodes kaiandi judiukunata kawachingapa iuiakunata, chi tutaka Pedro, iskai suldadukunapagma kadinakunawa wataska puñukurka. Sug suldadukunaka, karsil pungupi saianakurka. ⁷ Chiuraka diulpilla atun Taita Diospa anjil, karsilpi kawarigsamurka. Chiura, tukuipi punchaiagsamurka. Chi anjilka, Pedrota takachispa rigchachirka, kasa nispa:

—Utka atarii.

Chasa nigllapi, kadinakunaka Pedropa makimanda urmarkakuna. ⁸ Chiura, chi anjilka nirka:

—Chumbillirii. Chakikunapi churaridirutapas churarii.

Pedro chasa rurauraka, nirka:

—Kamba kataridiru katangata katarispa, katiwai.

⁹ Chiuralla Pedro, anjilta katichispa, llugsirka, anjil chasa sutipa kagta mana iuiakuspalla. Iuiakurka: “Muskuichar muskukuni”. ¹⁰ Uku ladu kawag suldadukunata ialirkakuna. Ikuti sug pungupi kawanakuskatapasmi ialirkakuna. Kanchama llugsingapa iru punguma chaiagriura, chi pungupasmi kikinilla paskarirka.

Llugsispa, sug kallima chaiagriura, chi anjil, Pedrota sapalla sakirka. ¹¹ Chiura Pedroka, muskuimanda rigcharigsina tukuspa, nirirka: “Kunaurami iachani, atun Taita Dioska paipa anjilta kachamuwagta, Herodespa makimanda i tukui judiukuna imasa jiru rurangapa iuianakuskatapas kispichiwangapa”. ¹² Chasa iuiarispaka, María suti Juan Marcospa mamapagmami rirka. Achka runakuna, chipi tandariska karkakuna, Taita Diusta mañaspa. ¹³ Chipi chaiagrispaka, kanchanigmanda punguta takachirka. Chiura sug sipas, Rode sutika, kaillaiagrirka kawangapa. ¹⁴ Pedropa rimaita uiaspaka, iapa kuntintarispaka, mana punguta paskaspalla, kalpalla rispa, ukupi kagkunata willagrirka:

—Pedromi pungupi saiaku.

¹⁵ Sugkunaka ainirkakuna:

—Uma tuntiariskami kangi.

—Sutipami uiarkani— chi sipaska nirka.

Chasa nikugpipas, nirkakuna:

—Pedro mana kangachu. Paipa anjillami kangapa ka.

¹⁶ “Pedroka manachar ka” ninakunkamaka, paika punguta mas sinchimi takachikurka. Punguta paskauraka, Pedrota kawaspaka, iapa ujnarrirkakuna. ¹⁷ Paika, makiwa kawachispa, upallachirkakunata. Nispaka, willarka imasa atun Taita Dios karsilmanda llugsichiska kagta. Kasapasmi nirka:

—Santiagota i waugkikunata chasa willapuagriichi—. Chasa rimaspaka, llugsispa, sugsinama rirka.

¹⁸ Pakariuraka, suldadukuna, kawagrispa, mana iacharkakuna Pedro ima tukugta. Chimanda, paipura iapa mancharirkakuna. ¹⁹ Herodeska kacharka, Pedro-

ta maskagringapa. Mana maipipas taririgmanda, chi suldadu kawagkunata tapuchispaka, wañuchichirkakunata.

Mandag Herodes imasa wañuskamanda

Chiuramandaka Herodes, Judeamanda llugsispa, Sesarea puibluma kaugsangapa rirka. ²⁰ Chipika, Tiro i Sidón suti puiblukumamanda runakunawa iapa rabiarrirka. Chi runakuna, Herodes mandakuska alpamandami tukui mikuikuna chaskinakurka. Chimandami iuiarrirkakuna, Herodespagma ringapa. Herodes kaugsaskama chaiagrispaka, Blasto suti kati mandagta sumaglla rimarkakuna. Rimaureka, chi runa, Herodesta mañapugrirka, Tiro i Sidonmanda runakunawa pasinsiachirinakungapa. ²¹ Herodeswa rimanakungapaniska puncha chaiauraka, pai Herodeska, iapa ujnachingasina kawari sumaiachiska katanga churarispa, paipa suma mandadirupi tiarispa, paikunata rimai kallarrirka. ²² Chasa uiaspaka, chi runakuna kaparii kallarrirkakuna:

—Kai rimag, runa mana kanchu. Diosmi ka.

²³ Paikuna chasa kaparigllapi, atun Taita Diospa anjilka Herodesta sug ungui kachamurka, Taita Diusta pai atuniachingataka, pai kikinlla atuniachirispa kagmanda. Chi ungui chaimuskawami wañurka, kaugsapita kurukuna mikui tukuspa.

²⁴ Iaia Jesusmanda willaskaka, mas sugnigta sugnigta iacharigsamurka. Chasa willaskata suma iuiarigkuna, masmi miraspa rirkakuna. ²⁵ Bernabé i Sauloka, kulkita Jerusalenpi sakigrispaka, chimanda Juan Marcosta pusaspa, ikuti kutirkakuna Antiokia puibluma.

SAN PABLO, DIUSPA RIMAITA WILLASPA PURII KALLARISKAMANDA

Bernabé i Saulo, Chipre alpapi kaskamanda

13 Antiokia puiblupi Jesuswa tukuskakunapura, sugkuna karkakuna Santu Ispirituwa rimagkuna; sugkunaka, Diospa Rimaita iachachigkuna. Chi runakuna suti karkakuna: Bernabé, Simón (paita, Iana nidur karkakuna), Sirene suti puiblumanda Lusio, atun mandag Herodeswa wiñaska Manaén suti i Saulo. ² Tukui chi runakuna, sugllapi karkakuna, mana mikuspalla, atun Taita Diusta mañaspa i iapa suma atun kagta nispa. Chiura, Santu Ispiritumi iuiachigsamurka:

—Nukami Bernabé i Saulota agllarkani, paikunaka tukuikunata willaspa puringapa. Chimanda, paikunata kachamuwaichi.

³ Chiura, mana mikuspalla, paikunamanda Taita Diusta mañaspa, maki churarkakuna. Nispaka, kacharkakunata.

⁴ Chiura Bernabé i Sauloka, imasa Santu Ispiritu kachaskasina Seleusia suti lamar iaku patamami rirkakuna. Chimandaka, barkupimi rirkakuna Chipre suti islama. ⁵ Salamina suti patamami chaiagrirkakuna. Chi-

pika, judiukuna tandariduru wasikunapi Diospa Rimaita willaimi kallarrirkakuna. Juan Marcos, paikunawa sugllapi aidaspa rikurka.

⁶ Chi alpa suiu purinakuspa, Pafos suti puibluma chaiagrirkakuna. Chipika, sug judiu runa, Barjesús suti tarigrirkakuna. Chi runa, mana alli iacha karka. Tukuikunata llullachispami kaugsakurka, “Nukami Santu Ispirituwa rimadur kani” nispa. ⁷ Chi iachaka, chi alpapi mandag Serjio Paulo sutiwa sumaglla kaugsakurka. Chi mandag runa karkami iapa iuiaiiug. Diospa Rimaita uiangapa munakuspa, kacharka, Bernabé i Saulota pusangapa. ⁸ Ikuti chi iachaka, paikunawa mana allilla tukuspa, mandagtaka nikurka:

—Imasa paikuna willanakuskata mana uiasunchi—. (Iacha kagmanda, suti kapurkakunata Elimas. Elimas niraianmi iacha.)

⁹ Sauloka (Pablopas suti), Santu Ispirituwa iuiaiipi junda kaspa, iachata suma kawaspa, ¹⁰ nirka:

—Kam kangimi iapa llulla. Iaia kukusina iapa mana allilla iuiagmi kangi. Tukui allilla iuianakugwa kuntrami kangi. ¿Imapatak Taita Diospa Rimaitakunata wabutispa pandachikungilla? ¹¹ Kunaurami atun Taita Dios, pai rabiarriska kamta kawachingapa ka. Achka punchakunami indi punchaiachikuskata mana kawai pudingapa kangi.

Chasa nigllapi, chi iachata ñawi tutaiagsamurka. Chasaka, mana kawai pudigsamurka. Nispaka maskakurka, sug runa makimanda aiaspa pusangapa.

¹² Chasa kawaspa, chi mandag runa, iapa ujnarispa, Iaia Jesusmanda imasa iachachikuskata suma iuiarirka.

Pablo i Bernabé, Pisidia alpapi kaskamanda

¹³ Pablo i paiwa purigkunaka, chi Pafos iaku patamanda barkupi llugsispa, Panfilia alpapi Perje suti puibluma chaiagrirkakuna. Chima chaiagriuraka, Juan Marcos, paikunata sakispa, Jerusalenma kutirka. ¹⁴ Paikunaka, Perje puiblumanda llugsispa, Pisidia alpapi Antiokia suti puibluma chaiagrirkakuna. Chipika, warda puncha chaiaura, judiukuna tandariduru wasima iaiugrispa, tiarigrirkakuna. ¹⁵ Moisés ima rurangapa niraiaaskakuna i Santu Ispirituwa imasa willaraiaskakunata uiachispaka, chipi taita kagkuna Pablo i Bernabeta mañarkakuna, kasa nispa:

—Taita waugkikuna, kamkuna, ima rimaita kaipi kagkunata iuiachingapa munanakuspa, kunaura rimaiichi.

¹⁶ Chiura Pabloka, atarispa, makiwa upallachispa, nirka:

—Tukui Israelmanda taitakuna i mamakuna i Taita Diusta suma kuiaspa manchagkunapas, kasa uiawaiichi.

¹⁷ —Nukanchi Israelmanda runakunapa Taita Dios, ñugpamanda taitakunata agllaspa, sumaglla kawarka, achka mirangapakuna, paikuna Ejipto alpapi ialigkunasinalla kaugsanakunkama. Nispaka, paipa iapa iachaiwami chimanda llugsichirkakunata. ¹⁸ Chasa llugsichispaka, chusa sitaska alpapi mai chusku chungu wata

paikuna mana allilla ruranakugpipas, mana sitarkachu.

¹⁹ —Paikuna Kanaán alpama chaiagriuraka, Taita Dios, kanchis atun puiblupi kaugsanakuskata tukui-kunata puchukarka. Chi alpataka nukanchipa ñugpamandakunata kararka. ²⁰ Sug chusku patsa pichka chungu wata ña ialiuramanda, alli iachag justisiakunata tami churarka, Samuel suti Santu Ispirituwa rimag tiagsamunkama. ²¹ Samuel paikunawa kaura, paikunaka mañai kallarikakuna, sug atun mandag tiachu. Chiura Taita Dios, ñugpamanda taita Benjamina iawarmanda kaska Sis suti runapa wambra Saul sutitami agllarka. Paika, chusku chungu watami atun mandag karka. ²² Chiuramanda, Saul mana allilla ruranakugmanda, kichuspaka, Davidtami churarka, atun mandag kangapa. Pai Davidmandami Taita Dios kikin, Samuelwa rimarka, kasa nispa:

Isaipa wambra Davidmi nuka munaskasina runa kapuá.

Paimi tukui nuka imasa munaskasina rurapungapaka.

²³ —Davidpa wambrakunapa kati wambrakunamandami sug runa samurka, Israelmanda runakunata kispichingapa. Chasami Taita Dios, Davidmanda niska karka. Chi samuska runa suti kanmi Jesús.

²⁴ —Jesús manara kawarinkama, Juan Bautistaka tukui Israelmanda runakunata kaiakurka: “Pandariikunata sakispa, baugtisariichi”. ²⁵ Juan ña wañuchii tukungapa kauraka, nirkami: “Nuka mana kanichu kamkuna imasa nukamanda iuianakuskasina. Nukapa katika, sugmi samungapa ka. Paita nuka mana pudinichu, kungurispa, paipa chakikunapi churaraiska wataskata paskapungapagllapas”.

²⁶ —Taitakuna i mamakuna, ñugpamanda taita Abrahampa wambrapa kati wambrakuna i Taita Diusta suma kuiaspa manchagkunapas, chi kispichiimanda willaika, tukui kamkunamandami willaraiá. ²⁷ Jerusalem i kaugsagkuna i paikunapa taitakunapas manima rigsirkakuna Jesús pi kagta. Tukui warda punchakuna Santu Ispirituwa rimagkuna willaskakunata uiaspapas, mana iacharkakuna ima niraiagta. Chimandami Jesus-ta mana rigsispalla wañuchichirkakuna. Chasawaka, imasa chi ñugpamanda librupi willaraiaskasinami tukugsamurka. ²⁸ Jesusta wañuchingapa munanaku-ura, ñi ima pandarii mana tarirkakuna. Chasa kagpipas, mandag Pilatosta rabiawa mañarkakuna, paita wañuchingapa. ²⁹ Pai kikin Jesusmanda tukui imasa ñugpamanda librupi willaraiaskasina tukugsamuraka, kruspi klabaraiskamanda uraikuchispa, pambarkakuna. ³⁰ Chasa wañuskata, Taita Dios kikinmi paita kaugsachigsamurka. ³¹ Chiuramandaka, Galilea alpamanda Jerusalemma paiwa sugllapi purinakuska kagkunata achka biajimi kawarigsamurka. Chi tukui kawagkunami kunaura runakunata paimanda willanakú.

³² —Nukanchipas, kasami kamkunata willanakunchi: Taita Dios imasami nukanchipa ñugpamanda achala taitakunata nirka, pai rurangapa: ³³ chika, kunaurami

tukugsamurka, Jesús kikin kaugsariska. Chasallatami willaraiá, iskaima Salmopi kasa nispa:

Kam, nukapa wambra kangi.

Nukami kuna puncha kaugsai karaiki.

³⁴ Kasapasmi niraiá:

Nuka imasami Davidta niska karkani:

chasa sutipami allilla rurangapa kani.

Chasa niska, kasami niraiá: Jesús wañuska kaskata kaugsachirka, paipa kuirpu mana ismungapa; chasaka, mana mas wañungapa. ³⁵ Chimandami ikuti sug Salmopipas kasa willaraiá:

Mana sakingapa kangichu,

kamba tukui iapa alli wambrapa kuirpu ismungapa.

³⁶ Davidka, Taita Dios imasa niskasina allilla ruraspa kaugsakuspapas, paipa wañurkami. Nispaka, paipa ñugpamanda taitakunawami sugllapi pambarkakuna. Paipa kuirpupasmi sugkunasinallatata ismurka. ³⁷ Ikuti Taita Dios kaugsachiskaka, paipa kuirpu manima wañuspa ismungapa kanchu.

³⁸ —Chimanda, taitakuna i mamakuna, kasa uiawai-chi. Pai Jesusmandami kamkunapa pandariikunata pasinsiai tukungapa kangichi. Tukui ima Moisés ruran-gapa niraiaskawa mana pasinsiai tiagpipas, ³⁹ Jesuswa suma iuiariskawaka tukui mana pandarigmi niraiangi-chi. ⁴⁰ Chimanda, allilla iuiaringichi. ¡Ujalallapas kamkunata Santu Ispirituwa rimagkuna niskasina tukugsamuchu!

⁴¹ Uiawaichi, unzaspa rimadurkuna.

Mancharispami puchukaringapa kangichi.

Nukaka, kamkuna kawanakuura,

mana imaurapas kawaskasinami rurangapa kani.

Chasa ruraskata sugkuna willagpikunaka, kamkuna manachar iuiarinrangichi chasa kagta.

⁴² Paikuna chi rimaikunata puchukaspa, tandariduru wasimanda lluginakuuraka, paikunata mañarkakuna, kasa nispa:

—Ikuti sug warda puncha chaiaura samungichi, mas chi rimaikunallatata nukanchita willangapa.

⁴³ Chimanda llugsispa rinakuskapi, achka judiukuna i mana judíu paikuna iachachiskata ruragkunapas, Pablo i Bernabewa sugllapi rinakurka. Chi runakunata rimaspa iuiachinakurka, Taita Diusta suma kuiaspa kaugsangapa, mana kungarisipalla.

⁴⁴ Warda puncha ikuti chaiauraka, ñalla tukui chi puiblupi kaugsagkuna tandarirkakuna, Diospa Rimaita uiangapa. ⁴⁵ Sug judiukunaka, chituku achka runa chipi tandariskakunata kawaspa, mana allilla iuiarispas, rabiarikakuna. Pablota kamispa, nii kallarikakuna:

—Chasa mana kanchu. Kam llullakungimi.

⁴⁶ Pablo i Bernabeka, mana mancharispalla nirakunata:

—Nukanchita chaiakumi, ñugpa kam judiukunata Diospa Rimaita willagsamungapa. Kamkunaka, chi rimaita wabutispa, mana munangichichu uiangapa. Mana puchukariduru suma kaugsaitapasmi kamkuna wabutinakungichi. Kunauramandaka, mana judíu kagkunatami nukanchi Diospa Suma Rimaita willagringapa kanchi.

⁴⁷ —Chasallatami atun Taita Dios nukanchita mingarka, kasa nispá:

Mana judiukunapa iuiaikunata punchaiachigmi ka-puangapa kangí;
chasaka, kai alpa suiu kaugsanakuskata willangapa, kispirichukuna.

⁴⁸ Chasa uiaspaka, mana judíu kagkunapas, kuntinta-rispa, nirkakuna:

—Diuspa Rimaika, iapa sumami nukanchita uia-rirka—. Mana puchukariduru suma kaugsaita iukanga-pa agllai tukuskakunami Iaia Jesuswa suma iuiarirkakuna. ⁴⁹ Tukui chi alpapi, Iaia Jesusmanda willai allillami iacharikurka.

⁵⁰ Pablo i Bernabé rimanakuskata mana uangapa munag judiukunaka, Taita Diosmanda iuiarispa chipi kaugsag mamakunata i chi puiblupi kaska taitakunata-pas iuiachigrirkakuna, kasa nispá:

—Pablo i Bernabeta kaimanda imasapipas llugsichipuaichi.

Chasa mañaskawaka, llugsichingapa pudirkakuna.

⁵¹ Pablo i Bernabeka, llugsispa rinakuskapi, paikunapa chakipi alpa llutariskata chabsirkakuna; chasawaka kawachingapa chimanda runakuna iapa pandariska kagtakuna. Nispaka, Ikonio suti puibluma rirkakuna.

⁵² Antiokia puiblupi kaugsag Jesuswa tukuskakuna, Santu Ispirituwa iuiapi junda kaspá, iapa suma alli iuiaiwa kuntintarirkakuna.

Pablo i Bernabé, Ikonio puiblupi kaskamanda

14 Ikonio puiblupi chaiagrispa, Pablo i Bernabeka judiukuna tandariduru wasipi iaikugrirkakuna. Chipi tukui suma rimaureka, achka judiukuna Iaia Jesuswa suma iuiarirkakuna. Mana judíu kagkunapas, achkakunami paiwa tukugsamurkakuna. ² Ikuti Jesuswa mana iuianakug judiukunaka, mana judíu kagkunata ninakurka:

—Pablo i Bernabé, mana allilla iachachinakunchu.

³ Unaimi chi puiblupi chisiarkakuna. Iaia Jesuswa iuiarispa, mana manchaspallami paimanda willanukurka. Iaia Jesús kikinmi paikunata karamurka, imaurapas mana kawaskasina ruraspá kawachingapa; chasawaka, paikuna Taita Diospa suma kuiaimanda rimanakuska sutipa kagta iachangapa. ⁴ Chiwanka, chi puiblupi kaugsagkunaka iskaima tukurkakuna; sugkuna, Jesús agllaskakunawa; ikuti sugkunaka, mana Jesuswa iuianakuska judiukunawa. ⁵ Chi mana Jesuswa iuianakug judiukunaka, mana judíu kagkunawa i chi puiblupi kaska taitakunawa sugllasina iuiarirkakuna, kasa nispá:

—Pablo i Bernabeta chaiakumi, kamispa, rumiwa pi-aspá wañuchingapa.

⁶ Chasa iachaspá, paikunaka mitikurkakuna Likaonia suti alpama. Chi alpapi chaiagrispaka, Listra i Derbe suti puiblukunapi i chi suiu ⁷ Cristomanda Alli Willaita willaspá purigrirkakuna.

Listra puiblupi, Pablota rumiwa piaskakunamanda

⁸ Listra puiblupika tiarka sug runa, tiagsamuskauramandata mana chaki kuiuchingapa pudig. Manima imaurapas saiariska karka. Chi ungugka, Pablo ima rimakuskata uiaspa, chi ladullapi tiakurka, ⁹ kasa iuiarispa: “Chi Jesuswami aliachiwangapa ka”. Chasa iuiakuskata kawaspaka, ¹⁰ Pablota sinchi rimaspá nirka:

—Kamba chakiwa allilla saiaríi.

Chasa nigllapi, chi runa saltaspá saiarirka. Nispaka, purii kallarirka.

¹¹ Pablo ima ruraskata tukui kawagkunaka, Likaonia-mandakunapa rimaiwa kaparii kallarirkakuna, kasa nispá:

—Nukanchipagma diuskunami uraikumurkakuna, runakunasina tukuspa—. ¹² Bernabemanda ninakurka: “Zeus iaia diuschar ka”. Pablo rimaiwa kagmanda, paimanda ninakurka: “Ermes diuschar ka”.

¹³ Chi puibluma iaikuduru pungupi tiarka Zeusta iuiariduru wasi. Chiuraka Zeusta kungurig sasirdutika, wagrakunata tugtukuna llagutuchispa, apaspá, tukui chipi kagkunawa munanakurka, wagrakunata wañuchispa rupachingapa; chasaka, Pablo i Bernabeta diustasina kunguringapa. ¹⁴ Chi Jesús agllaskakunaka, chasa kawaspa iachaspaka, iapa llakii tukurkakunata. Chimanda, kikinkunapa katangakunata llikichirirkakuna. Nispaka, paikuna kaskapi chaugpirispa chaugpirispa rirkakuna, kasa kaparispa:

¹⁵ —Waugkikuna, ¿imapatak chasa ruranakungichi? Nukanchipas, kamkunasina ianga runakunami kanchi. Kamkunata kai Alli Willaita willangapami samurkanchi, kamkuna kai ianga kawariska ruraikunata sakispa, sutipa kaugsa Taita Dios tiaskawa tukugsamungapakuna. Paimi ka sug luarta, kai alpa luarta i lamar iakuta rurag. Tukui ima chikunapi tiaskakunapas, paillatatami ruraska ka. ¹⁶ Nugpataka, tukui runakunatami sakiska karka, kikinkunapa imasa iuiariskasina kaugsangapa.

¹⁷ Chasa kaugsangapa sakispapas, paika allilla ruraspami kawachidur karka, pai suma kaugsag kagta. Tamia kachamudur; chasallata, tarpuskakuna wiñachispa suma pallai karamudur; chasaka nukanchi, mikuspa, alli iuiachiillawa kaugsanakungapa.

¹⁸ Chasa iuiachinakugpipas, mana munanakurka uangapa. Munanakurkami chi wagrakunata wañuchispa, rupachispa, diustasina kunguringapaglla.

¹⁹ Chi punchakuna, Antiokia i Ikonio puiblukunamanda judiukuna chi Listra puibluma chaiagrirkakuna. Chaiagrispaka, Listramanda runakunata imasa rimaspapas iuiachirkakunata, Pablota rumiwa piaspá wañuchingapa. Chasa piaspaka, iuianakurka: “Wañuchirkanchimi”. Chasa iuianakuspaka, paita aliuspá, puiblu manancha karullapi sitagrirkakuna. ²⁰ Jesuswa tukuskakunaka, katichispa, Pablo kaskapi chaiagrispa muiuchirkakuna. Chiura paika, allilla tukuspa, atarirka. Nispaka, ikuti puibluma iaikugrirkakuna. Kaiandika, Bernabewa llugsispa, Derbe suti puibluma rirkakuna. Chipi chaiagrispaka, ²¹ Alli Willaita willai kallarirkakuna.

Chasa uiaspaka, achka runakuna Jesuswa tukug-samurkakuna.

Chimandaka, Listra, Ikonio i Antiokiama kutirkakuna. ²² Chi puiblukunapika Jesuswa tukuskakunata suma rimaspa, nirkakunata:

—Iaia Jesuswa allilla iuiarinakuspalla kangichi, mana sakispalla—. Kasapasmi nirkakunata— Nukanchita chaiakumi, achka llakii iukangapa, Dius suma mandakuskapi manara iaikugrinkama.

²³ Chi puiblukunapi Iaia Jesuswa tukuskakunamanda agllarkakuna, maikanpas iacha taitakuna kangapa. Mana mikuspalla Taita Diusta mañaspa chisiarkakuna. Nispaka, chi agllaskakunamanda mañapurkakunata, kasa nispa:

—Iaia Jesús, kai kamwa iuiarinakugta sumaglla kuiaspa kawapuangi.

Pablo i Bernabé, Siria alpapi Antiokia puibluma kutirkakunamanda

²⁴ Pisidia alpa suiu ialispaka, Panfilia alpama chaiag-rirkakuna. ²⁵ Chi alpapika, Perje puiblupi Iaia Jesus-manda Alli Willaitami willai kallarirkakuna. Nispaka, Atalia suti lamar iaku patama rirkakuna. Chimandaka, barkupi iaikuspa, Antiokia puibluma kutirkakuna.

²⁶ Chi puiblumanda paikuna manara llugsigllapi, chipi Jesuswa tukuskakuna paikunamanda Taita Diusta mañaspa karkakuna, paipa kuiaiwa sumaglla kawapuachu. Ña tukui puchukaspaka, chimallatata kutirkakuna. ²⁷ Chipi chaiagrispaka, Jesuswa tukuskakunata sugllapi kangapa tandachigrirkakuna. Nispaka willarkakuna, tukui imasa Taita Dius paikunawa suma ruragtakuna. Kasapasmi willarkakuna:

—Mana judíu kagkunatapismi Taita Dius agllarka, Jesuswa suma iuiaringapa.

²⁸ Unaimi chi Jesuswa tukuskakunawa chisiarkakuna.

Jerusalenpi, Jesuswa tukuskakunapa taitakuna tandarirkakunamanda

15 Antiokiapi Pablo i Bernabé chisianakuura, sug runakuna Judea alpamanda chi puibluma chaiag-rirkakuna. Chipika, Jesuswa tukuskakunata iachachii kallarirkakuna, kasa nispa:

—Kamkuna, Moisés imasa niskasina mana marka churachirigpika, mana kispiriskami niraiankangichi.

² Pablo i Bernabeka, chasa iachachinakuskata uiaspaka, sinchi nirkakunata:

—Mana allilla kanchu—. Chimandami paikunawa piñachirinakui tiarka.

Chimandaka chipi Jesuswa tukuskakuna, Pablo i Bernabeta i kikinpuramanda sugkunatapas agllarkakuna, Jerusalem ringapa; chipika, Jesús kikin agllaskakunawa i iacha taitakunawapas chasa iachachinakuskamanda rimanakungapa.

³ Antiokiapi Jesuswa iuianakug kachai tukuskakunaka, Fenisia i Samaria suti alpa suiu ialigrirkakuna, chi alpa suiu Jesuswa tukuskakunata willaspa imasa mana judíu kagkunapas Taita Diuswa tukuska kagta-

kuna. Tukui chi uiagkunapas, kuntintarispa uiarkakuna.

⁴ Paikuna Jerusalemma chaiagriuraka, Jesuswa tukuskakuna, pai agllaskakuna i iacha taitakunapas sumagllami chaskirkakuna. Chiura, Pablo i Bernabeka willarkakuna, tukui imasa Taita Dius paikunawa ruraskamanda. ⁵ Chasa uiaspaka, sug fariseokuna Jesuswa ña tukuska kagkunaka, saiarispa nirkakuna:

—Chi mana judíu Jesuswa tukuskakunataka chaikumini ningapa, judiukunapa marka churachirichukuna i Moisés imasa niskasina ruraspa kaugsachukuna.

⁶ Chasa uiaspa, Jesús agllaskakuna i iacha taitakunaka tandarirkakuna, chi rimanakuskamanda allilla iuiaringapa. ⁷ Ña unai rimanakuura, Pedroka saiarispa nirka:

—Taita waugikuna, ñami iachangichi: Taita Dius, ña unaimi kam kikinpuramanda nukata agllawarka, mana judíu kagkunapas, Alli Willaita uiawaspa, Jesuswa suma iuiaringapa. ⁸ Taita Dius tukuikunapa iuiaita rigsig, Santu Ispirituta nukanchita karaska kagmi chasallata paikunatapas kararka; chasaka, paikunatapas chaskiska kagta kawachingapa. ⁹ Paikuna Jesuswa suma iuiariskakunamandami paikunatapas pandariikunata pasinsiarka. Chasawami kawachirka, paikunawa i nukanchiwa mana sug rigcha sug rigcha kagtakuna. ¹⁰ Chasa kagmandaka, ¿imapatak kunaauraka Taita Dius ima ruraskamanda mana allilla rimanakungichi? Ñi nukanchiwa ñugpamanda taitakuna ñi nukanchipas mana pudinakurkanchichu, Moisés tukui ima niskata ruraspa kaugsangapa. Kunaauraka chi Jesuswa tukuskakunataka, ¿imapatak chi mana pudingasina mandaikunata aparichigsina rurangapa munanakungichi? ¹¹ Kasami suma iuianchi: Iaia Jesús nukanchita iapa suma kuiaskamandallami nukanchi kispichiriska kanchi. Chasallatami chi mana judíu kagkunapas kispichiriska kankuna.

¹² Chasa uiaspaka tukui chipi kagkuna, ñi ima mana ainispalla, upallami tianakurka. Bernabé i Pablo imasa willanakuskatami uiai kallarirkakuna. Paikuna willanakurka imasa, mana judíu kagkunapagpi, ñi imaurapas mana kawaskasina Taita Dius paikunawa ruragta.

¹³ Paikuna ña rimai puchukaura, Santiagoka nirka:

—Taita waugikuna, uiamuichi. ¹⁴ Simón Pedromi nukanchita willaku, imasami Taita Dius, sug mana judíu kagkunatapas agllai kallarirka, paipa runakuna tukungapa. ¹⁵ Chasallatami Santu Ispirituwa ñugpamanda rimagkuna willarkakuna, kasa nispa:

¹⁶ Chiuramandami nuka, kutimuspa, Davidpa wasi urmaskata ikuti sumaglla saiachigsina ruragsamusa.

Chi wagllichiska wasita ikutimi saiachigsina ruraspa.

¹⁷ Chasawaka kawaringami, tukui puchuska runakunapas atun Taita Diusta maskanakungapa kagtakuna.

Chasallata, tukui nuka agllaska mana judíu kagkunapas samungapami kankuna,

paita maskangapa.

¹⁸ Atun Taita Diosmi

paipa rimaita mana ialingapa ni.

Imasami ñugpamandata willaska karka:

chasami tukungapa ka.

¹⁹ Kasapasmi Santiago nirka:

—Chimandami nukapa iuiaipi nini: mana judú kagkuna Taita Dioswa tukuskakunata mana nisunchi, Moisés imasa sakiskata rurachukuna. ²⁰ Kasalla nisunchi: “Tanga dius niraiaskakunata kamariku karaska aichata mana mikuchukuna; mapasinami niraiá. Kari warmiwa mana pandarichukuna. Sipiska wañuchiskakunapa aichata mana mikuchukuna. Iawartapas mana upiachukuna”. ²¹ Moisés ima niskata iachachigkunaka, tukui puiblu suiumi ñugpamandata tia. Chi willaraiaskataka judiukuna tandaridiru wasikunapi tukui warda punchakunami willanakú.

²² Chasa uiaspa, Jesús agllaskakuna, iacha taitakunapas i Jesuswa tukui tukuskakunaka iuiarigsamurkakuna, paikunapuramanda iskaí runakunata agllaspa, Pablo i Bernabewa Antiokia puibluma kachangapa. Chimanda, Judas Barsabás i Silas sutikunatami agllarkakuna, paikuna taitakuna kagmanda.

²³ Chi runakunawa, kasa willaraiaska kartatami kacharkakuna:

“Kam taitakuna i mamakuna, mana judú kagkuna, Antiokia puiblupi i Siria i Silisia alpakuna suiu kausagkunata, nukanchi Jesús agllaskakuna i iacha taitakunami, ‘Puangj’ ninchi.

²⁴ “Kaipimi iacharigsamurka, kaimanda sug runakuna nukanchi mana kachaskakuna kamkunapagma rigtakuna. Paikunapa rimaiwaka kamkunata manchachispa i tuntiachispa sakirkakuna. ²⁵ Chimandami tukui nukanchika, suglla iuiaiwa tukuspa, allilla iuiarirkanchi, nukanchipuramanda iskaí runakunata agllaspa, kamkunapagma kachangapa. Nukanchipa iapa kuiaska Bernabé i Pablowami sugllapi kachanakunchi. ²⁶ Paikuna, wañuita mana manchaspallami maipipas purinkuna, nukanchipa Iaia Jesucristomanda willaspa. ²⁷ Chasa iuiarispami Judas i Silasta kamkunapagma sugllapi kachanakunchi, paikuna tukuimanda kamkunata allilla willagringapa.

²⁸ “Santu Ispiritumi nukanchita iuiachirka, kasa ningapa: kai ministiskakunallata kamkuna rurangapa: ²⁹ ianga dius niraiaskakunata kamariku karaska aichata mana mikungapa; iawarta mana upiangapa; sipiska wañuchiskakunapa aichatapas mana mikungapa; kari warmiwa mana pandaringapa. Nukanchi ima rimaskata allilla uiaspaka, allilla ruraspami kausankangichi. Kipakama”.

³⁰ Chi kachai tukuskakunaka, Antiokiamana chaigrispa, tukui Jesuswa tukuska chipi kausanakuskata sugllapi tandachispa, chi kartata kuarkakuna. ³¹ Chi kartata kawaspaka, tukuikuna chi sumaglla iuiachiiwami iapa kuntintarirkakuna. ³² Judas i Silaspas, Santu Ispirituwa rimagkuna kaspá, chi Jesuswa tukuska-

kunata sumaglla rimaspa, animuchirkakuna, kasa nispa:

—Ñi imaurapas mana Jesusta kungaringichi.

³³ Paikuna, achka punchakuna chipi chisiarkakuna. Chiuramanda chi Jesuswa tukuskakunaka, sumagllami “Pai Siñur” nispa, kuntintulla kacharkakuna paikunata kachaskakunapagma. [³⁴ Silaska iuiarirka, mas punchakuna chipi chisiangapa. Chasaka, Judasllami Jerusalem kutirka.] ³⁵ Pablo i Bernabepas, chi Antiokia puiblupi sug punchakuna chisiarkakuna. Paikuna, miraspa, achkakuna tukuspa, Iaia Jesusmanda Alli Willaita willaspa iachachispami karkakuna.

DIUSPA RIMAITA WILLASPA, PABLO PARISMA PURISKAMANDA

Bernabé, Pablopagmanta sugma riskamanda

³⁶ Sug punchakuna ialiura, Pabloka Bernabeta nirka:

—Iaia Jesusmanda Alli Willaita tukui puiblukunapi willaskakunama ikuti risunchi, paiwa tukuskakuna imasa kaskata ikuti kawangapa.

³⁷ Bernabé chiura munakurka, Juan Marcosta paikunawa sugllapi pusangapa. ³⁸ Chi Marcos, ñugpata Panfilia alpapi paikunata sakispa, mana mas paikunawa ringapa munaska karka, Alli Willaita willangapa. Chasa kagmanda, Pablotaka iuiarirka, mana Marcoswa sugllapi puringapa. ³⁹ Paipura piñachinakurka. Chimandami chiuramanda mana sugllapi purirkakuna. Bernabé, Marcosta pusaspa, barkupi iaikuspa, Chipre alpama rirkakuna. ⁴⁰ Ikuti Pabloka, Silasta agllarka. Jesuswa tukuskakuna paikunamanda atun Taita Diusta mañaskauramanda, chimanda llugsirkakuna. ⁴¹ Siria i Silisia alpakuna suiu, Jesuswa tukuskakunata suma iuiachispa purigrirkakuna.

Pablo, Timoteota paiwa puringapa agllaskamanda

16 Derbe puibluta ialispa, Listra puibluma chaigrirkakuna. Chipika, Timoteo suti runawa tarinakurka. Chi runa, Jesuswa tukuska karka. Paipa mama, judiami karka, Jesuswa suma iuiag. Taitandika, mana judiumi karka. ² Listra i Ikonio puiblukunapi kausag Jesuswa tukuskakuna, Timoteomanda sumagllami rimanakurka. ³ Pabloka munakurkami, Timoteoka nukawa purigrichu. Tukui judiukuna chi suiu kausagkuna iacharkakuna, chi runapa taita mana judú kagta. Chimanda Pabloka, judiukunapa marka Timoteota churachirka; chasaka, judiukuna sumaglla allilla iuiaiwa kawanakungapa.

⁴ Tukui puiblukunapi ialinakuspa, Jesuswa tukuskakunata willarkakuna, imasa Jesús kikin agllaskakuna i iacha taitakuna Jerusalem rimagtakuna, mana judiukuna imasa kausangapa chaigta. ⁵ Chasaka Jesuswa tukuskakuna, tukui punchakunami mas suma iuiai aparkakuna. Chiwami mas miraspa miraspa rirkakuna.

Masedonia alpamanda runa, muskui ukupi Pablota kawariskamanda

⁶ Santu Ispíritu mana Pablota sakirka, Asia alpa suiu Diuspa Rimaita willagringapa. Chimanda, Frijia i Galasia suti alpapunapi ialirkakuna. ⁷ Misia suti alpama chaigrispaka, Bitinia suti alpama ialingapa munanakurka. Chasa munanakugpipas, Jesuspa Ispirituka mana sakirkakunata, chima iaikungapa. ⁸ Chimanda, Misiapi ialispa, Troas suti lamar iaku patama chaigrirkakuna.

⁹ Chipika sug tuta puñukuspa, Pabloka muskurka, Masedonia suti alpamanda sug runa saiakugta. Chi runaka, mañaspa, Pablota nirka:

—Kai Masedonia alpama ialimui. Nukanchita aidagsamui.

¹⁰ Pablo muskui ukupi chasa kawaskawaka iuiarir-kanchi: “Taita Dios, nukanchita sutipami kaiaku, Masedoniamanda runakunata Alli Willaita willagringapa”. Chasamanda allichirir-kanchi, chima ringapa.

¹¹ Barkupi iaikuspaka, dirichumi rirkanchi Samotrasia suti islama. Kaiandika, Neápolis suti patama chaigrirkanchi. ¹² Chimandaka, chakiwa rirkanchi Filipos suti puibluma. Chi puiblu kanmi Romamandakuna mandadiru. Chi Filipos puiblu, Masedonia alpa suiumanda mas atunmi ka. Mailla punchakunami chipi chisiarkanchi.

¹³ Chi puiblumandaka, sug warda puncha chaiaura, iaku pata patami puringapa rirkanchi, iuiaspa: judíu runakuna tandaridiruchu tarinchi; chipika, Taita Dios-manda iuiaringapa. Chipimi tiarigrirkanchi. Nispaka, Alli Willaita warmikuna tandariskakunata willai kallarrirkanchi. ¹⁴ Sug paipura, Lidia suti, Tiatira suti puiblumanda chipi karka, suma puka tila katudur, Taita Diusta suma manchaiwa iuiarispaka kausadur. Pai warmi Pablota uiakuuraka, atun Taita Dios suma iuiaita kararka, imasa willakuskata allilla chaskingapa. ¹⁵ Chasaka, tukui paipurakuna chi wasimanda baugtisarirkakuna. Nispaka, nukanchita mañaspa, nirka:

—Nuka Iaia Jesuswa sutipa tukuska kagta iuiawas-paka, samuichi. Nukapa wasipi chisiagsamuichi—. Chi-mandami nukanchita chaiarka, chipi kidaringapa.

Karsilta kawag runa, Jesuswa tukuskamanda

¹⁶ Chiuramanda, kasami pasarirka. Nukanchi Taita Diusta rimadiruma rinakuskapi, sug lutrinsina sipaswami tupanakurkanchi. Chi sipas, kuku waira iaikuska-mi karka. Chasaka, imapas mana iachariskatami willadur karka. Chi willaikunawaka iapa achka kulkimi paipa mandagkunamanda ruradur karka. ¹⁷ Chi sipas-ka, Pablota i nukanchita katichiraiarka, kasa kaparispa:

—Kai runakuna kankunami tukuimanda mas atun Taita Diospa lutrinsinakuna. Paikunami kamkunata willangapa kankuna, imasa kispiringapa kagtakuna.

¹⁸ Achka punchakunami chasallata kaparispa kaparispa katichiraiarka. Chimanda Pabloka, rabiarispa, tigrarispa, kuku wairata nirka:

—Jesucristopa sutiwami niiki: “Kai sipasmanda llugsii”.

Chasa rimagllapi, llugsirka.

¹⁹ Chi sipasta mandagkunaka, chasa kawaspa, nirka-kuna:

—Kunauramanda, nukanchi mana maschar kulki chaskisunchi—. Chasa rimarispaka, Pablota i Silasta apispa, atun kallima aparkakuna justisiakuna kaskama. ²⁰ Justisiakunapa ñawipi saiachispaka, nirkakuna:

—Kai judíu runakuna kaspera, nukanchi paubluta iapami killachispa purinakú. ²¹ Sug rigcha iuiaikunata-mi iachachinakú. Nukanchita mana chaikunachu, Romamanda kaspera, paikuna iachachiskata iachai-kuspa rurangapa.

²² Chiura tukui chipi kagkuna, Pablota i Silasta piñaspa kamispa aparkakuna. Justisiakunapas nirkakuna:

—Paikunata katanga anchuchispa, kaspi chagllawa asutiichi—. ²³ Achka asutispaka, karsilpi wichkarkakuna. Karsilpi kawagtaka nirkakuna— Paikunata allilla kawangi—. ²⁴ Chasa uiaspa, chi kawagka mas ukuma paikunata wichkagrirka. Chipika, paikunapa chakikunata kabildusina kaspi utkupi churaspa, wataspa sakirka.

²⁵ Chaugpi tutaka Pablo i Silas, Taita Diusta suma kantaspa iuiarinakurka. Sugkuna karsillapita kagkunapas, kantanakuskata uianakurka. ²⁶ Diulpillakar, alpa iapa sinchi kuiurigsamurka. Karsil saiakuska rumikunapas, chugchurigtami kuiurigsamurka. Chasa kaura, tukui pungu paskarirkakuna. Kadinakunapas, tukui karsilpi kagkunapa makikunamanda urmarkakunata.

²⁷ Karsilta kawag, rigcharispa, tukui pungukuna paskaraiaskata kawaspaka, iuiarirka: “Karsilpi kagkuna, tukuikunachar mitikuwarkakuna”. Chasa iuiarispaka, dimanchai ispada aisarka, wañuchiringapa.

²⁸ Pabloka, sinchi kaparirka, kasa nispa:

—Mana imapas rurarikui. Tukuikunami kaipi kanchi.

²⁹ Chiura karsilta kawag, punchaiachidiru mañaspa, Pablo i Silaspagma kalpalla chaigrirka. Dimanchai chugchuspa, paikunata kungurigrirka. ³⁰ Kanchama llugsichispaka, tapurka:

—Taita waugkikuna, ¿imatata nuka rurasa, kispiriska kangapa?

³¹ Chiura, paikunaka ainirkakuna:

—Iaia Jesuswa suma iuiarispami kispiriska kankangi, kam i kamba wasipi kausanakuskakunapas—. ³² Chiura, paita i wasipi tukui kagkunata Iaia Jesusmanda Alli Willaita willagrirkakuna.

³³ Chiurallata, chara tuta kagllapi, chi karsilta kawagka, Pablo i Silaspa asutii tukuska nananakuskata maillaspa ambirka. Chi wasillapita tukui kausagkuna baugtisarirkakuna. ³⁴ Nispaka, atun ukuma pusaspa, mikui kararkakunata. Pai i wasipi tukui kagkuna, Taita Dioswa suma iuiarispaka, iapa kuntintulla tukurkakuna.

³⁵ Tutata justisiakuna, alwasilkunata kacharkakuna, karsilta kawagta ningapa:

—Chi runakunata kacharii.

³⁶ Chiura chi kawag, Pablota nirka:

—Justisiakuna niwarkakunasi, kamkunata kacharingapa. Chimandami niiki: mana manchaspalla riichi.

³⁷ Pabloka, alwasilkunata nirka:

—Nukanchi Romamanda runakuna kagpipas, chi justisiakuna, nukanchita mana imamandapas tapuchispallami tukuikunapa ñawipi asutirkakuna. Nispaka, karsilpimi nukanchita wichkachirkakuna. Kuna uraka, ¿imapatak pakalla nukanchita llugsichingapa munanakú? Kikinkuna samuchukuna, nukanchita llugsichingapa.

³⁸ Imasa uiaskasina alwasilkuna, justisiakunata willagrirkakuna. Paikunaka, Romamanda runakuna kagta uiaspaka, iapasi mancharirkakuna. ³⁹ Kikin justisiakuna, karsilpi chaiagriskapa, Pablo i Silasta: —Pasin siawai— nigrirkakuna. Paikunata llugsichispaka, sumaglla mañarkakuna— Kai puiblumanda llugsipuai-chi.

⁴⁰ Karsilmanda llugsispa, Pablo i Silaska Lidiapa wasima rirkakuna. Chipika, Jesuswa tukuskakunata kawaspa, nirkakunata:

—Mana llakispa manchaspaka kaichi—. Chasa nispaka— Kaiakama— nispaka, rirkakuna.

Tesalónika puiblupi, judiukuna killachinakuskamanda

17 Anfípolis i Apolonia suti puiblukunata ialigriskapa, Tesalónika suti puibluma chaiagrirkakuna. Chipika, judiukuna tandariduru wasi tiarka. ² Imasami Pablo kustumbri iukarka: chasami kada warda puncha chi wasima iaikudur karka. Kimsa warda punchakuna, ñugpamanda librupi willaraiaskamanda chipi judiukunawa rimanakui tiarka. ³ Suma willaspa iachachikurka, kasa nispaka:

—Taita Dios agllaska Cristotami chaiarka, llakiiwa wañui pasangapa; nispaka, pai kikin ikuti kaugsarig-samungapa—. Kasapasmi nikurka— Chi Jesusmanda nuka kamkunata willakuskaka, paimi Taita Dios agllaska Cristo ka.

⁴ Chiura sug judiukuna, Jesuswa suma iuiarispa, Pablo i Silaswa tukurkakuna. Mana judíu kagpura, iapa achka Taita Dioswa iuiagkuna i mama warmikunapas chasallata Jesuswa suma iuiarirkakuna. ⁵ Ikuti mana Jesuswa iuiag judiukunaka, mana chasa munaspa, paikunawa rabiarkakuna. Nispaka, ñi ima mana rurai iukaska runakunatami tandachirkakuna. Chikunataka kacharkakuna, kalli suiu kaparispa killachispa purinakungapa. Jasón suti runapa wasimami chaiagrirkakuna, Pablo i Silasta maskaspa, chi mana alli runakunapagma apangapa. ⁶ Paikunata mana tarispaka, Jasonta i Jesuswa sug tukuskakunawantami aliuspa, chi puiblupi tiaska taitakunapagma aparkakuna, kasa kaparispa:

—Kai runakunami kankuna tukui alpa suiu mana suma rimaikunawa wagglichispa purigkuna. Kunaura, ña kaimami chaiagsamurkakuna. ⁷ Kai Jasonpa wasipimi kidariska kankuna. Tukui paikunami, Romamanda iaia mandag imasa niskapa kuntra rimaspa, ninkuna: “Sug atun mandagmi tia, Jesús suti”.

⁸ Chasa kapariuraka, chi taitakunata i tukui uiagkunata mana suma uiarirkakunata. ⁹ Chiura chi taitakunaka, Jasonta i paiwa kagkunata manara kacharispalla, kulki mañarkakuna, mana mas chasa rurangapa.

Berea puiblupi, Pablo i Silas kagriskamanda

¹⁰ Jesuswa tukuskakunaka, chi tutalla Pablo i Silasta kacharkakuna Berea suti puibluma. Chima chaiagriskapa, judiukuna tandariduru wasima iaikugrirkakuna.

¹¹ Chi judiukunaka, Tesalónika puiblupi kaugsanakuskamanda mas alli iuiawami karkakuna. Pablo imasa willakuskata uiaspa, iapa sumaglla chaskirkakuna. Tukui punchakuna, ñugpamanda librupi willaraiaskapi sumaglla kawanakurka: ¿sutipachu Pablo rimaska chasa niraiá? ¹² Chiwanka achka judiukuna, Iaia Jesuswa suma iuiarirkakuna; mana judíu kagkunapas, achka mama warmikuna i karikunapas.

¹³ Tesalonikamanda mana Jesuswa iuiag judiukunaka, Berea puiblupipas Diospa Rimaita Pablo willakugta iachagsamurkakuna. Chasa iachagsamuspa, chi puibluma chaiagrirkakuna, chipi kaugsanakuskata pandachispa i killachispa puringapa. ¹⁴ Chiuralla Jesuswa tukuskakunaka, Pablota pusarkakuna lamar iaku patama chainkama. Silas i Timoteo, chi Berea puiblupi chisiarkakuna. ¹⁵ Pablota rigkunaka, Atenas suti atun puibluma chaiagrirkakuna. Paikuna ña kutinakuuraka, Pabloka nirkakunata:

—Silas i Timoteota nipuangi, utkalla samuchukuna, nukawa sugllapi kangapa.

Atenas puiblupi, Pablo kaskamanda

¹⁶ Atenas puiblupi Silas i Timoteota suiakunkama, chi puiblupi Pablo kawarka, achka paikunapa diuskunasina iukagtakuna. Chimanda, paita iapa llakii chaiagsamurka. ¹⁷ Judiukuna tandariduru wasima iaikuspaka, judiukunawa i Taita Dioswa iuiag mana judíu kagkunawa parijuma Jesusmanda sinchi rimanakurka. Chasallata atun kallinigta sugkunawapas tukui puncha rimanakurka. ¹⁸ Iacha Epikúreo i Estoikos sutikunawa iachaikugkunawapasmi Pablo chasallata rimanakurka. Pablo nikurka:

—Jesús wañuskaka kaugsarirkami. Chasallatami nukanchipas, tukui wañuskakuna kaugsaringapa kanchi.

Chasa nigmanda, paipura tapurinakurka:

—¿Imasatak kai iapa rimadur rimaku?

Ikuti sugkunaka, mana iachaspalla ninakurka:

—Paika, mainigmanda sug diuskunamanda willakugsinami uiarí.

¹⁹ Chimanda, Pablota mañarkakuna, Areópago suti atun tandariduru wasima ringapa, kasa nispaka:

—Munantranchi, kam sug rigcha iachachikuskata iachangapa. ²⁰ Sutipami nukanchi ñi imaurapas mana uiaskata kam rimakungi. Chimandami munanchi, kam willakuska ima niraiaskata iachangapa—. ²¹ Atenas puiblumanda tukui kagkuna i sugnigmanda chaiagrisk-

kakuna chipi kaugsanakugpas munankuna, kunaura ima pasarikuskallawa rimaspa i uiaspa chisianakungapa.

²² Chi wasima chaiagrispaka, Pabloka, tukuikunapa chaugpipi saiarispa, kasami nirka:

—Atenasmanda kam taitakuna, nuka kawaikichitami diuskunawa iapa suma iuiaiwa kagtakuna. ²³ Nuka kamkunapa puiblupi purikuspa, kamkunapa diussina imajinkunatami kawakurkani. Sug altarpimi tarirkani kasa willaraiaskata: “Sug mana rigsiska diusmanda”. Chi Diustami kamkuna mana rigsispalla kunguringichi. Chi Diusmandami nuka willangapa samukuni.

²⁴ —Chi Diosmi kai alpa i chipi tukui ima tiaska rurarka. Pai chasa ruraspaka, sug luarpi i kai alpa luarpi iaia mandag kaspera, runakuna saiachiska paita iuiariduru wasikunapi mana kaugsanchu. ²⁵ Runakunapa makiwa ruraskataka, paika ñi ima mana ministinchu. Chasallata, mana paita ñi imapas pisinchi. Pai kikinmi nukanchita karamú kaugsai, samai kachangapa i tukui ima ministiska.

²⁶ —Pai Taita Diosmi, suglla runamandalla miraspa, kai tukui alpapi runakuna tianchi. Manara runakunata wiñachispalla, ñami niska karka, maituku watakuna i maipi chaiaskapi paikuna kaugsangapa kagta; ²⁷ chasaka, kikinkuna Taita Diusta maskangapa; chiwanka, mana kawakugsina kaspapas, paita iuiarispa taringapa.

—Sutipami Taita Dios tukui nukanchimanda mana karullapi ka. ²⁸ Paimandami kaugsanchi. Paimandami purinchi. Paimandami tianchi. Chasallatami kampuramanda sug iachagkunapas nirkakuna: “Nukanchipas, suglla Taita Dios wiñachiskami kanchi”. ²⁹ Sutipami nukanchi, Taita Dios wiñachiska kaspera, mana iukanchi iuiaringa: Taita Dios kanchu runapa iachai iuiaiwa kiritu u kulkita u rumita suma ruraska kagsina.

³⁰ —Kamkuna ñugpata mana paita rigsispalla ima ruraskakunata, Taita Dios munanmi kungaringapa. Ikuti kunaureka, tukui alpapi kaugsanakuskatami rimaku, kasa nispas: “Pandariikunata sakispa, nukawa samuichi”. ³¹ Kikin Taita Dioska ñami iachá, ima puncha kai alpamanda tukui runakunata justisiangapa chaiagta. Pai kikinmi sug runata agllarka, imasa chaiaskasina justisiai rurangapa. Chi runa wañuskata kaugsachispami tukuikunata kawachirka, sutipa pai chasa justisiai rurangapa kagta.

³² Wañuskata kaugsachiskamanda rimaskata uiaspaka, sugkuna iapa asirkakuna. Ikuti sugkunaka nirkakuna:

—Kam rimakuskataka ikuti suurami uiasunchi.

³³ Chasa rimai puchukaspaka, Pablo, paikunapagmanda llugsispa rirka. ³⁴ Chasa kagpipas, sugkuna, paiwa tukuspa, ima willaskata suma iuiarirkakuna. Chi suma iuiarigpuramanda, Areopagopi kagkunapura Dionisio sutimi karka. Dámaris suti warmi i sugkunapas, Iaia Jesuswa suma iuiarigsamurkakuna.

Korinto puiblupi, Pablo kagriskamanda

18 Chiuramanda Pabloka, Atenas puiblumanda llugsispa, Korinto suti puibluma chaiagirka.

² Chipika taririrka sug judíu, Akila suti. Pai karka Ponto suti alpamanda. Klaudio suti iaia mandag, paipa iachaiwa ña churaska karka, tukui judíu Roma puiblupi kaugsanakug chimanda llugsingapa. Chimandami Akila, Priskila suti kikinpa warmiwa manara unai Italia alpamanda llugsispa, Korintoma chaiagriska karkakuna. Pabloka, paikunawami tarinakurka. ³ Akila warmindi, tulda linsu siradurkunami karka. Pablopas, chasallata rurag kaspera, paikunawa sugllapi trabajaspera kaugsai kallarikar. ⁴ Tukui warda punchakunaka, judiukuna tandariduru wasima iaikuspa, chipi kagkunawa parijuma ainichirinakuspa karkakuna. Pabloka muna-kurka, judiukuna i mana judíu kagkunata pai rimakuskawa allilla iuiachingapa.

⁵ Silas i Timoteo, Masedonia alpamanda chaiagriraka, Pabloka mana trabajaspalla kallarikar, judiukunata Diospa Rimaita willaspa iachachiilla. Paikunata willakurka, Jesús sutipa Taita Dios agllaska Cristo kagta. ⁶ Ikuti paikunaka, Pablota mana suma rimaiwa kamiwanta aininakurka. Chimanda Pabloka, kikinpa katangata chabsispa, paikunata nirka:

—Kam kikinkunapa mana allilla ruraikunallowami diltudupa wañungapa kangichi. Nukawaka mana llakirinakungichi. Kunauramandaka, mana judíu kagkunapagmami ringapa kani, paikunata iachachingapa.

⁷ Chimanda llugsispa, Tisio Justo suti runapagma chaiagirka. Chi runaka karka Taita Dioswa suma iuiag. Paipa wasi, judiukuna tandariduru wasi ladullapimi karka. ⁸ Chi tandariduru wasimanda taita, Krispo suti, paipa wasipi tukui kaugsanakugpasmi Iaia Jesuswa suma iuiarirkakuna. Chasallata Korintomanda achka runakunapas, Pablo ima willakuskata uiaspa, Iaia Jesuswa tukugsamuspa, baugtisarirkakuna.

⁹ Sug tuta Iaia Jesuska, muskui ukupisina Pablota kawarigsamurka, kasa nispas:

—Mana manchaspalla nukamanda willangi, mana upallaspalla. ¹⁰ Nukaka, kamwami kangapa kani. Chimanda, ñi pipas mana kamta ima jiru rurangapa pudingapa kankunachu. Kai puiblupi achka runakunami nukawa tukungapa kankuna.

¹¹ Chimandami Pablo, Diospa Rimaita iachachispa, chi puiblupi sug wata sugta killa chisiarka.

¹² Galión suti runa chi Akaia alpata mandag kaura, judiukunaka, sugllasina tukuspa, Pablota apirkakuna. Nispaka, chi mandagpagma apaspa, ¹³ nirkakuna:

—Kai runa iachachispami puriku, Taita Diusta imasa nukanchipa ñugpamanda rurangapa willaraiaskasinata nukanchi kungaringapa. Sug rigcha iuiaikunawami iachachispa puriku.

¹⁴ Pablo ña ainingapa kaura, Galionka judiukunata nirka:

—Kam judiukuna, kai runa ima mana allillata rurag kagpi u maikanta wañuchiska kagpika, allichar kantra, nuka kamkunata uangapa. ¹⁵ Ikuti kai runa sug rigcha

rimai u sug runakunamanda iachachikugpi, u imasa kamkunapa ñugpamanda librupi willaraiaskasina mana iachachikugpika, kam kikipura iachaichi. Nuka ka mana munanichu, chikunata justisiai rurangapa.

¹⁶ Chasa nispaka, chi judiukunata wasimanda llugsi-chirka. ¹⁷ Chiura tukui mana judíu kagkunaka, Sóstenes suti judiukuna tandariduru wasimanda taitata apirkakuna. Mandag Galionpa wasi pungu ladullapimi paita makai kallarikakuna. Chi mandagtaka ñi ima mana iuiachirka.

¹⁸ Chiuramanda Pabloka, achka punchakunami chi puiblupi chisiarka. Chasa chisiaspaka, Jesuswa tukuskakunata: “Sug punchakama” nispa, barkuma iaikug-rirka, Siria alpama ringapa. Akila i Priskilapas, paiwa sugllapi rirkakuna. Manara barkuma iaikugrispalla, Senkrea suti patama chaiagrispa, Pabloka tukui agchata kuchuspa aspichirirka. Chasaka, Taita Diusta pai kikin imasa niskasinami rurarka.

Siria alpama, Pablo kutiskamanda

¹⁹ Efeso suti puibluma chaiagrispaka, Akila warmindita chipi sakispa, judiukuna tandariduru wasima iaikug-rispa, paikunawa sugllapi rimanakui kallarikirka. ²⁰ Chi judiukuna, Pablota mañanakurka mas sug punchakuna chipi paikunawa kangapa. Pabloka mana munarka. ²¹ “Sug punchakama” nispa, paikunata nirka:

—Nukanchipa Taitiku lisinsia kuawagpika, imaurapas ikutimi kamkunawa samusa—. Chasa nispaka, Efesomanda lamar iakupi ikuti rirka Sesarea puibluma.

²² Chipi chaiagrispaka, ñambi apispa, Jerusalemna chaiagrirka. Chipika, Jesuswa tukuskakunata: “Puangi” nigrirkakunata. Chimandaka, Antiokia puibluma rirka.

²³ Achka punchakuna chipi kaspaka, llugsirka. Nispaka, Galisia i Frijia alpakunapi Jesuswa tukuskakunata kawaspa, suma iuiachispa ialirka.

DIUSPA RIMAITA WILLASPA, PABLO KIMSAMA PURISKAMANDA

Efeso puiblupi, Apolos kaskamanda

²⁴ Chikama, Apolos suti judíu runami, Alejandría puiblumanda kaspera, Efeso puibluma chaiagrirka. Chi runa, ñugpamanda librupi willaraiaskakunata allilla iachaspa, sumami iachachidur karka. ²⁵ Iaia Jesús ima iachachiskata iachaspaka, pai tukui iachaskatami Jesusmanda allilla rimaspa iachachidur karka. Chasa kagpipas, Juan iakuwa baugtiskamandallami iacharka. ²⁶ Efesoma chaiagrispaka, judiukuna tandariduru wasipi mana manchaspallami willai kallarikirka. Paita uiaspaka, Priskila i Akilaka, sapallata pusaspa, Taita Dios imasa kaugsangapa niskata mas allillami iachachii kallarikakuna.

²⁷ Chiuramandaka chi Apolos, Akaia suti alpama ringapa iuiakurka. Chiura Jesuswa tukuskakunaka, paita nirkakuna:

—Iapa allillami ka—. Chasa nispaka, Akaia alpapi kaugsag Jesuswa suma iuiarigkunata iskribispa kacharkakuna, kasa nispa— Paita sumaglla chaski-puangichi.

Apolos chipi chaiagrigmandaka, Jesuswa suma iuiarigkunamanda iapa alli tukugsamurka, Taita Dios paikunata iapa kuiaskamanda. ²⁸ Tukuikunapa ñawipi, judiukunata mana manchaspalla nikurka:

—Ñugpamanda librupi willaraiaskakunata, kamkuna manara allilla iachaikurkangichichu—. Chi willaraiaska kawachispa, nikurka, Jesús sutipa Taita Dios agllaska Cristo kagta.

Efeso puiblupi, Pablo kagriskamanda

19 Korinto puiblupi Apolos kankama, Pabloka, sachuku ialispa, Efeso puibluma chaiagrirka. Chipi chaiagrispaka, Jesuswa sug tukuskakunata tarigrispa, ² tapurka:

—Kamkuna, Jesuswa suma iuiarigsamuura, ¿Santu Ispiritutachu chaskirkangichi?

Paikunaka ainirkakuna:

—Mana iachanchichu, Santu Ispíritu tiagta.

³ Chiura, Pabloka tapurka:

—Nigpika, ¿ima iuiarispatak baugtisariska kangichi? Chiura ainirkakuna:

—Juan iachachiskata iuiarispami baugtisarii tukuska kanchi.

⁴ Chiura, Pabloka nirka:

—Pandariskakunata sakigkunatami Juan iakuwa baugtiskarka, tukui runakunata kasa nispa: “Nukapa kati samungapa kagtami iukangichi suma iuiaringa”. Chika, Jesusmandami niraiá.

⁵ Chasa uiaspaka, Iaia Jesuspa sutiwami baugtisarirkakuna. ⁶ Pablo paikunata maki churauraka, Santu Ispíritu paikunapa sungupi iaikugsamurka. Iaikug-samugllapi, mana iachaska rimaikunawapasmi rimai kallarikakuna. Chasallata, Santu Ispíritu iuiachikuskatami willai kallarikakuna. ⁷ Chikuna, mai chungka iskai runakunami karkakuna.

⁸ Pabloka, chi puiblupi judiukuna tandariduru wasima iaikuspa, kimsa killami mana manchaspalla chipi iachachikurka. Taita Dios imasa suma mandakusmandanda chipi kagkunawa rimanakurka. Pabloka muna-kurka, paikunata pai rimakuskawa allilla iuiachingapa. ⁹ Ikuti sugkunaka, paita uangataka, rinri taparispa, tukuikunapa ñawipi Iaia Jesusmanda iachachikuskata wabutirkakuna. Chasa kagmanda, Pabloka paiwa tukuskakunawanta anchurirka. Nispaka, tukui punchakuna Tirano suti runapa iachachiduru wasipi iachachii kallarikirka. ¹⁰ Iskai watami chipi iachachikurka. Chiwanka, judiukuna i mana judíu kagkunapas, chi Asia alpa suiu kaugsagkuna, tukuinigmandami pudirkakuna, Iaia Jesusmanda rimaita uangapakuna.

¹¹ Taita Dioska, iapa imaurapas mana kawaskasina Pablowski ruradur karka. ¹² Pabloma ima pañuilu u katanga churariduru kaskata ungugkunapagma apadur karkakuna, ambiringapa. Chiwanka, ungugkunapa kuirputa llamkagllapimi ima unguikunapas aliadur

karkakunata. Chasallata ruraura, kuku wairakunapas mitikudur karkakuna.

¹³ Chasa kawaspa, sug judiukuna sinchikunasina ambispa puridurkunaka, Iaia Jesuspa sutiwa rimai kallarrirkakuna, kuku wairawa kaskakunata kasa nispa:

—Pablo willakuska Jesuspa sutiwami niiki: Ilugsichi—. ¹⁴ Eskeva suti iaia sasirdutipa kanchis wamburanami chasa ruranakurka.

¹⁵ Chi kuku wairaka, paikunata kasa ainirka:

—Jesusta i chi Pablo pi kagta, nuka rigsini. Ikuti kamkunata mana rigsiikichitachu. ¿Pikunachar kangichi?—. ¹⁶ Chasa nispaka, chi kuku wairaiug runa, tukui kanchiskunata saltaspa, apirkakunata. Piai richirkakunata. Lisiachispa llatan sakiuraka, iukarkakuna chi wasimanda mitikungakuna.

¹⁷ Chasa pasariskata iachaspaka, Efeso puiblupi tukui judiukuna i mana judíu kagkuna iapa mancharirkakuna. Chasawaka, Iaia Jesús masmi atuniachii tukugsamurka. ¹⁸ Iaia Jesuswa achka suma iuiarigkunapas, paikuna ima ñugpata mana allilla ruraskakunamanda tukuikunapa ñawipi willarigrirkakuna. ¹⁹ Chasallata achka jiru iachakuna, paikunapa librukunata sugllapi tandachispa, tukuikunapa ñawipi rupachirkakuna. Chi rupachiska librukunaka karkasi pichka chungawaranga bali kulkisina. ²⁰ Chasapi, Iaia Jesuspa iapa iachaiwa paimanda Alli Willaita tukuipi iacharigsamurka. Chi willaita suma iuiarigkuna, mas miraspari rirkakuna.

²¹ Chasa pasariskauramanda, Pablota iuiarichaiarka, Masedonia i Akaia alpapunapi ialispa, Jerusalemachaiagringapa. Kasapasmi nirka:

—Chimandaka iukanimi, Roma atun puibluma ringa—. ²² Chasa nispaka, iska paita aidaspa katiraiagkunata, Timoteo i Erasto sutikunata, Masedonia alpama ñugpa kacharkakunata. Pai kikinka, mas achka punchakunami chi Asia alpapi unaiarka.

Efeso puiblupi killachinakuskamanda

²³ Chi punchakuna Efeso puiblupi, iapa achka runakuna, paipura sinchi rimanakuspa killachinakurka, Iaia Jesusmanda iuiachiikunawa paikunata manima sumagmanda. ²⁴ Tukui runakunawa killachidur, Demetriomi suti karka. Chi runa, kulkita ruradurmi karka Artemisa suti ianga mama diuspa uchullita iglisiasina ruraskata walkariduru. Paiwa ruragkunapas, achka kulkimi wakanaridur karkakuna. ²⁵ Paika, chi runakunata i tukui chasa ruragkunatapas sugllapi tandachispa, nirkakunata:

—Kam waugkikuna iachangichimi: kai nukanchipa trabajuwami sumaglla kaugsanchi. ²⁶ Allillami kawan-gichi i iachangichi: kai Efesopi i ñalla tukui Asia alpapi, chi Pablo, iapa achkakunatami llullachispa, sug rigcha iuiachigsamurka, kasa nispa: “Chi runakuna ruraskaka, mana diuskuna kanchu. Iangami kankuna”. ²⁷ Tukui-kuna chasa iuiarigpikunaka, nukanchi kulkita trabajaskaka ñi imapa mana balichar tukugsamuntra. Nukanchipa Artemisa atun mama diusta iuiariduru wasitapaschar wabutii tukuntra. Kunankama kai Asiapi

i tukui alpapi, Artemisatami chara kungurinkuna. Kunauramandaka, tukuikunami Pablopaka kaugsa sakingapa kankuna.

²⁸ Chasa uiaspaka chipi kagkunaka, iapa rabiariispa, kaparii kallarrirkakuna:

—Tukui Efesopi kaugsagkunapa Artemisa, atun mama diusmi kangi.

²⁹ Chimandami chi puiblupi tukui kaugsanakug, tuntiarigsamuspa, paikunapa tandariduru wasima upakunasina kalpa iaikugrirkakuna. Masedonia alpamanda Gaio i Aristarko suti Pablowa purigkunata apispami iaikuchigrirkakuna. ³⁰ Pablo munakurka, chituku achka runakunata rimagringapa. Chasa muna-kugpipas, paiwa tukuskakunaka mana sakirkakuna. ³¹ Asia alpapi sug mandag taitakunapas, Pablopaka rigsitudukuna kaspaka, kacharkakuna, paita mañangapa, chi wasima mana iaikukuchu.

³² Chi wasi ukupi kagpura, iapa tuntiachinakurka. Sug sug rigcha, sug sug rigchami kapariispa rimanakurka. Ñalla tukuikunata mana iacharikirka, imapa sugllapi tandariska kagtakuna. ³³ Chiuraka chi tandariskakunapa chaugpimanda sug judiukunaka, Alejandro suti runata iuiachispa, ñugpa ladu tangaspa apar-kakuna, pai tukuikunata rimangapa. Chiura Alejandro, chipi kagkunata makiwa kawachispa upallachingapa munakurka. ³⁴ Tukui chipi kagkunaka, Alejandro judíu kagta iachaspa, sugllasina tukuspa, iska urasina kaparinakurka, kasa nispa:

—Tukui Efeso puiblupi kaugsagkunapa Artemisa, atun mama diusmi kangi.

³⁵ Chipi mandagpa iskribingapa aidagka, tukuikunata rimaspa upallachispaka, kasami nirka:

—Kam Efesomanda kagkuna, ¿manachu tukuikuna iachankuna: nukanchi Efesomandakuna iukanchimi, Artemisa atun mama diusta iuiariduru wasita i kikinpa imajin awa luarnigmanda urmaskata mana imapas pasaringapa kawanga? ³⁶ ¿Pitak ningapa ka, mana chasa kagta? Chimanda, kamkunata chaiakumi, upalla kangapa. Mana imapas ruraichi, mana allilla iuiarispalla. ³⁷ Kaima pusamuska runakunaka mana kankunachu nukanchipa mama diusta iuiariduru wasipi sisai-kunasina ñi paita kamidurkunasina. ³⁸ Demetrio i paiwa sugllapi kagkunaka pipa kuntra ima willangapa iukagpikunaka, chimandami justisiai ruragkuna tia. Chipimi parijuma imamandapas rimanakungapa tiag-pika, justisiata rimankangichi. ³⁹ Kamkuna rimanakuskapi mana allilla tukugpika, mañankangichimi, tukui-kuna tandarispaka, allilla rimanakungapa. ⁴⁰ Kuna puncha ima pasariskataka, mandagkuna sutipami pudinkuna nukanchimanda iuiangakuna: “Mandaita wabutispami sug rigcha ruranakú”. Kunaura pasariskata, nukanchi mana pudingapa kanchichu rimangapa, kaituku achka runakuna killachinakuskamanda.

⁴¹ Chasa nispaka, tukuikunata ilugsichirka.

Masedonia i Gresia alpakunama, Pablo ikuti riskamanda

20 Chi killachinakui ña ialiuira, Pabloka, Jesuswa tukuskakunata kaiaspa, suma iuiachirkakunata. “Sug punchakama” nispaka, Masedonia alpama rirka. ² Chi alpapi chaiagrispa, Jesuswa tukuskakuna chipi kaugsanakuskata unai rimaspa, suma iuiachirkakunata. Nispaka, Gresia suti alpama rirka. ³ Chipika, kimsa killami kagrirka. Chimanda Siria alpama iakupi ringapa kaura, allilla iachagsamurka, judiukuna paita wañuchingapa munanakugta. Chiura nirka:
—Masedonia alpatami chakiwa kutingapa kani—.
⁴ Pablowa rinakurka Berea puiblumanda Pirropa wambra Sopater suti, Tesalónika puiblumanda Aristarko i Segundo sutikuna, Derbe puiblumanda Gaio i Timoteo; Asia alpamanda Tíkiko i Trófimo suti runakunapasmi sugllapi rinakurka. ⁵ Chi runakuna, ñugpaspa, Troas puiblupi nukanchita suiagrirkakuna. ⁶ Nukanchika, mana libadurawa tanda mikudiru punchakuna ialichispa, Filipos puiblumanda iakupi llugsirkanchi. Pichka punchapika Troas puibluma chaiagrispa, chi sugkunawa tarinakurkanchi. Chipika, kanchis punchami chisiarkanchi.

Troas puiblupi, Pablo kaskamanda

⁷ Simana kallarii puncha u duminguka, tukuikuna sugllapi tandarirkanchi, Iaia Jesús imasa niskasina tanda sugllapi mikungapa. Chiura Pabloka, kaiandi ringapa iuiakuspa, chaugpi tutakamami iachachirka. ⁸ Awa ladu ukupi tukui nukanchi kaskapika, achka sira lamparakunami sindinakurka. ⁹ Sug musu, Eutiko suti, bintanapimi tiakurka. Chi musu, Pablo tuta unai rimakuskata uiakuspaka, dipuñui singukuspa, chi kimsa pisu awamandatami urmarka. Pai alpama urmaska wañuskatami atarichigrirkanchi. ¹⁰ Pablopas, uraikuspa, chi musuta aisaspa, markarispas, nirka:

—Mana llakinakuichi. Kaugсами ka.

¹¹ Chasa nispaka, ikuti sikaspa, Jesús imasa niskasina tanda pitispa mikurka. Mikuspaka, ikuti iachachii kallarrirka, ñalla pakarinkama. Nispaka, rirka. ¹² Chi wañuska musutaka kaugсами aparkakuna. Chiwanka tukui-kuna, alli iuiachiiwa kuntintarirkakuna.

Mileto puibluma, Pablo riskamanda

¹³ Nukanchika, Pablota ñugpaspa, Aso suti puibluma iakupi rirkanchi, chipi paiwa tupanakugringapa, pai imasa niskasina. Paika, chakiwa ñambi chima rikurka. ¹⁴ Sutipami chi puiblupi ikuti sugllapi tukurkanchi. Nispaka, paita barkullapita pusaspa, Mitilene suti patama chaiagrirkanchi. ¹⁵ Kaiandika, iakupi ikuti rispa, Kíio suti alpa ladullapimi ialirkanchi. Sug kaiandika, chi iaku sug ladu chimba rispa, Samos sutipi saiarigrirkanchi. Ikuti sug punchamaka, Mileto sutima chaiagrirkanchi. ¹⁶ Pablo iuiariska karka, Efeso puibluta mana iaikuspa-lla ialingapa; chasaka, chi Asia alpapi mana iapa uniangapa. Pai munakurkami, utkalla Jerusalemma

chaiagringapa; chasaka, Pentecostés atun puncha chipi ialichigringapa.

Efesomanda Jesuswa tukuskakunapura iacha taitakunata, Pablo rimaskamanda

¹⁷ Mileto puiblumandaka Efeso puibluma kacharka, Jesuswa tukuskakunapura iacha taitakunata kaiangapa. ¹⁸ Paikuna Efesomanda ña chaiagriuraka, kasami nirkakunata:

—Kamkuna ñami iachangichi, nuka kai Asia alpama chaimuskauramandata, tukui punchakuna imasa kamkunawa sumaglla kaska kagta. ¹⁹ Nuka, mana iapa atun tukuspalla, Iaia Jesús imasa niwaskasinami ruraspakani. Judiukuna nukata mana allilla rurawangapa munanakugmandami llakispas wakaspa purikuni.

²⁰ Ichangichimi, nuka ñi imapipas mana sakispalla, kamkunata sumaglla rimaspa aidaspa kagta. Tukui-kunapa ñawipi, kamkunapa wasikunapipasmi rimaspa iachachispa karkani. ²¹ Judiukunata i mana judíu kagkunatapasmi rimakurkani, kasa nispa: “Tukui pandariskakunata sakispa, Taita Dioswa tigrichi. Chasallata, nukanchipa Iaia Jesuswa suma iuiariichi”.

²² —Kunauraka, Santu Ispíritu watawaspa apawakuginami Jerusalemma rikuni. Chipika mana iachanichu, ima nukata pasariwangapa kagta. ²³ Kaillami iachani: tukui puiblukunama chaiagriskapi, Santu Ispirituwa iuiagkunami kasa willawanakú: sug runakuna suiawanakunsi, nukata maki watawaspa, karsilpi churawaspa, llakii pasachiwangapa. ²⁴ Chasa kagpipas, nuka kikinpa kaugsaimanda mana llakiwanchu. Kasallami nuka munani: nukata imasami rurangapa chaiawaku: chasami imapipas rurangapa munani. Chiwanka, imasami Iaia Jesús, nukata mingawarka, Taita Diospa suma kuiaimanda willaita willaspa puringapa: chikunatami rurangapa munani.

²⁵ —Kasapas. Kamkunapagpimi purikurkani, Taita Dios imasa suma mandakuskamanda willaspa. Nuka iachaniami, kunauramandaka kamkuna manima ikuti kawawangapa kagtakuna. ²⁶ Chimandami nuka kuna puncha allilla rimaikichita: maikanpas nuka iachachiskata mana allilla ruragmanda Taita Dios justisiai ruragpika, nukawaka mana llakirinakungichi. ²⁷ Tukui Taita Dios ima munaskatami willarkaikichita, ñi ima mana pakaspalla. ²⁸ Kam kikinkuna, suma iuiaripuangichi. Chasallata, tukui kamkunawa sugllapi Jesuswa iuiarigkunata suma kawapuangichi. Kamkunata, Santu Ispíritu churarka, paikunata suma kawag taitakunasina kangapa. Jesuswa tukui tukuskakuna, maipi kaskapi-pas, kikin Iaia Jesuspa iawarwa randiskasinami niraianchi.

²⁹ —Nuka kasami iachani: imasami mana alli sacha alkukuna, ubijakunapagma iaikuspa, mana sakispalla puchukankuna: chasallatami, nuka riskauramandaka, sug rigcha iuiachigkuna, kamkunawa iaikuspa, Jesuswa suma iuiarinakuskata wagllichingapa samungapa kankuna. ³⁰ Kam kikinpurapasmi sugkuna, sug rigcha iachachispa puringapa kankuna. Chasaka Jesuswa suma iuiagkunapas, tuntiachii tukuspa, paikunata kati-

chingapami kankuna. ³¹ Chimanda, rigchariskasinalla kangichi, kasa iuiarisa: nukaka, tukui kamkunamanda kimsa wata tuta i pucha mana samaspalla wakaspami suma iuiachirkaikichita.

³² —Kunaura, Taita Diustami kamkunamanda mañapuikichita, paipa suma kuiaimanda Suma Rimaiwa kamkunata kawapuachu; chi Rimaita tukui suma uiagkuna, wiñachiskasina kangapa. Chasaka, paipalla kagkuna, kikin Taita Dios suma luarpi karangapa niraiaskata tukuikuna chaskigringapa.

³³ —Nuka mana munarirkanichu ñi pipa kulki, ñi pipa kuri ñi pipa katanga. ³⁴ Kam kikinkuna, allillami iachangichi: nuka kikinpa makiwami trabajarkani, nuka i nukawa purigkunamanda ima ministiriskakunapas iukangapa. ³⁵ Chasa ruraspaka, tukuipimi iachachispa kawachirkaikichita: chasaka, kamkunapas iukangichimi, chasa trabajaspaka, ministiskakunatapas aidanga. Iaia Jesús kasa rimaskata iuiariichi: “Maikan karagka, chaskigkunamandapas mas alli iuiachiwa kuntintullami tukugsamú”.

³⁶ Chasa rimaspaka, Pablo i tukui chipi kagkunaka, kungurispaka, Taita Diusta paipuramanda mañai kallarikakuna. ³⁷ Chiura tukuikuna, iapa wakaspaka, paita ugllaspaka mucharkakuna. ³⁸ “Nukata mana ikuti kawawangapa kangichichu” niskamandami tukuikuna iapa llakirirkakuna. Nispaka, Pablowa rirkakuna barku saiakuskama.

Jerusalenma, Pablo riskamanda

21 Paikunata sakispaka, barkupi dirichumi rirkanchi, Kos suti alpama chaiagta. Kaiandika, Rodas suti alpama rirkanchi. Chimandaka, Pátara sutima chaiagrirkanchi. ² Chipika, ikuti sug barku Fenisia suti alpama chimbangapa rikuskata tarigrirkanchi. Chi barkupi iaikuspaka, chi puiblumanda llugsirkanchi. ³ Ialinakuspaka, Chipre alpata kawarkanchi. Chi alpata llukisinama sakispaka, Siria alpama rirkanchi. Tiro suti patapi saiarigrirkanchi. Chi barkupi ima apanakuskata iukarkakunami chipi sakinga. Chimandami nukanchipas barkumanda uraikurkanchi.

⁴ Chipika, Jesuswa tukuskakunawa kawanakurkanchi. Kanchis punchami paikunawa chisiarkanchi. Paikuna, Santu Ispirituwa Pablota iuiachinakurka, kasa nispa: —Mana Jerusalenma rikui.

⁵ Chasa iuiachinakugpipas, chi punchakuna ialiuraka, nukanchi chimanda llugsirkanchi. Tukui nukanchiwa iuiagkuna, warmindi i wambrakunawanta puiblumanda llugsispa, nukanchita sakigrirkakuna. Iaku patapika tukuikuna, kungurispaka, Taita Diusta tukui-kunamanda mañanakurkanchi. ⁶ Nispaka, parijuma: “Sug punchakama” ninakuspa, barkupi ikuti iaikurkanchi. Paikuna, wasima kutii kallarikakuna.

⁷ Nukanchika, chi Tiro puiblumanda Tolemaida suti puibluma chaiagrirkanchi. Chipika, iakupi purii puchukarkanchi. Chi puiblupika, Jesuswa tukuskakunata: “¿Allillachu kapuangichi?” nispa, suglla pucha paikunawa karkanchi. ⁸ Kaiandika, Sesarea puibluma rirkanchi. Chipi chaiagrispaka, Felipe suti Diospa Rimaita

willadurpagma iaikugrirkanchi. Jerusalenpi Jesuswa tukuskakunapuramanda kanchis runakuna ñugpa agllaskami karka. Paipa wasipimi kidarirkanchi. ⁹ Pai, chusku manara kasaraska warmi wambrakunami iukarka. Chi warmikunaka, Santu Ispirituwa rimagkunami karkakuna.

¹⁰ Nukanchi ña achka punchakuna chipi kauraka, Agabo suti Santu Ispirituwa rimagmi Judea alpamanda chaiagrirka. ¹¹ Chi runaka, nukanchi kaskapi iaikugrirka. Pablota siñidurta aisaspaka, pai kikinpa chaki makiwanta watarispa, nirka:

—Kasami Santu Ispiritu ni: “Kai siñidur iukagta, kasami judiukuna Jerusalenpi watangapa kankuna. Nispaka, mana judíu kagkunapa makipimi paita ialichigringapa kankuna”.

¹² Chasa uiaspaka, nukanchi i chipi kaugsagkunapas, Pablota maimi ninakurkanchi:

—Mana Jerusalenma rikui.

¹³ Chiura, Pablota ainirka:

—¿Imapatak kamkuna wakaspaka llakichiwanakungichi? Nukaka suiakunimi, Jerusalenpi wataskalla kangapa: mana. Munakunimi, Iaia Jesusmanda wañuchiipas tukungapa.

¹⁴ Chasa uiaspaka, mana paita sug rigcha iuiachingapa pudispaka, tukuikuna upalla sakirirkanchi, kasa nispa: —Nukanchipa Taitiku imasa munaskasina tukupuachu.

¹⁵ Chi punchakuna ialiskauramanda, imakuna ministiriska allichirispaka, Jerusalenma rirkanchi. ¹⁶ Sesarea-manda Jesuswa sug tukuskakunapas, nukanchiwa sugllapi rirkakuna Chipre alpamanda Mnasón suti ña unai watakuna Jesuswa suma iuiagpagma. Paipa wasipimi kidarigrirkanchi.

Santiagowa Pablota rimanakuskamanda

¹⁷ Nukanchi ña Jerusalenma chaiagriuraka, Jesuswa tukuskakuna iapa kuntintarispami nukanchita chaskirkakuna. ¹⁸ Kaiandi Pablota, nukanchiwa sugllapi tukuspa, Santiagopagma chaiagrirkanchi. Jesuswa tukuskakunapura tukui iacha taitakunapasmi chipi tandarigrirkakuna. ¹⁹ Pablota: “¿Allillachu kapuangichi?” nispa, suiumandatami willai kallarikka, Taita Diospa tukui munai mana judíu kagkunapagpi imasa paiwa tukugsamuskamanda.

²⁰ Chasa uiaspaka, chipi kagkunaka Taita Diusta nirakuna:

—Kam, iapa suma atunmi kangi—. Nispaka, Pablota nirkakuna— Kam taita waugkika iachangimi, maituku waranga waranga judiukuna Iaia Jesuswa suma iuiarigsamugtakuna. Tukui paikuna, Moisés imasa rurangapa niraiaskata mana sakispallami ruranakú. ²¹ Paikunaka, kammada kasa iachachikuskatasi uiarkakuna: judiukuna sug alpakanapi kaugsanakuskata iachachikungisi, Moisés ima rurangapa niraiaskata sakingapa; chasallata, kamkunapa kari wambrakunata mana judiukunapa marka churachingapa ñi ñugpamandakuna iachachiskakunawa mana ruraspaka kaugsangapa. ²² Paikuna chasa uiaskamandaka, nukanchi

chika, ¿imatak nisunchi? Paikuna iachangapami kankuna kam kaipi chaiamugta. ²³ Chimanda, kasa rurai. Nukanchipura chusku runakunami munanakú, imasa paikuna Taita Diusta: “Kasami rurasa” niskata rurangapa. ²⁴ Paikunata pusaspa, imasa rurangapa willaraiaskasina Diospa ñawipi paikunawa sugllapi maillarigriichi. Nispaka, ufrinda rupachingapa pagapungi. Chasallata, agcha kuchuchispa aspichiringapa pagapungi. Chasawaka, tukui judiukuna iachangakunami, kamanda uiaskakuna manima sutipa kagta. Chasapika kawachinkangimi, Moisés ima niraiaskata kampas rurag kagta.

²⁵ —Kasapas. Mana judíu runakuna Iaia Jesuswa suma iuiarigkunataka ñami kasa nispa kacharkanchi: “Tanga dius niraiaskakunata kamariku karaska aichata mana mikungichi. Iawarta mana upiangichi. Sipiska wañuchiskakunapa aichata mana mikungichi. Kari warmiwa mana pandaringichi”.

Diuspa atun wasipi, Pablota apiskakunamanda

²⁶ Chasa sug kaiandi, Pablo, chi chusku runakunata pusaspa, imasa rurangapa willaraiaskasina Diospa ñawipi maillarigrirkakuna. Chasa ruraspaka, Diospa atun wasi ukuma iaikurka, willangapa: ima punchami paikuna maillingapa puchukaringapa ka; chi punchaka, tukui paikunamanda ufrindata rupachigringapa.

²⁷ Ña chi kanchis puncha ialingapa kaura, Asia alpamanda samuska judiukunaka, Pablota Diospa atun wasi ukupi rigsigsamurkakuna. Paita rigsigsamus-paka, tukui chipi kagkunata kaparispa, iapa sinchi uia-rigsamurkakuna. Pablota sumaglla apispaka, ²⁸ kaparii kallarrirkakuna:

—Israelmanda runakuna, aidawagsamuichi. Kaimi ka chi runa, tukui alpapi nukanchi kikinkunamanda, Moisés tukui ima rurangapa niraiaskamanda i kai Diospa atun wasimanda kuntra rimaspa purig. Sutipami niikichita: kasapasmi rurarka: mana judíu kagkunatapasmi kai Diospa atun wasi ukuma iaikuchirka. Chasa mana allilla ruraskawaka, kai Taita Diospalla kaska wasitami mapaiachigsamurka—. ²⁹ Mas ñugpaka, Efeso puiblumanda Trófimo suti mana judíu Pablota sugllapi kallipi purinakugtasi kawaska karkakuna. Chasa kawaspasi ianga iuianakurka, Pablo chi runata Diospa atun wasi ukuma iaikuchidur kagta.

³⁰ Tukui chi puiblupi kagkuna, iapa sinchi uiarinaturka. Chimandami tukuinigmamanda kalpalla sugllapi chaiagrirkakuna. Pablota apispaka, Diospa atun wasi ukumamanda alijsa, kanchama llugsichirkakuna. Llugsichigllapi, chi wasi pungukunata lim wichkarkakuna.

³¹ Pablota ña wañuchingapa iuiawa charinakuuraka, Romamanda suldadukunata mandagpagpi iacharigrirka, tukui Jerusalenpi kagkuna ajai uiarinakugta.

³² Chasa uangallawa, chi mandagka, suldadukunata i kapitankunata tandachispa, chi achka runakunapagma kalpalla rirkakuna. Chi mandag suldadukunawa rinakugta kawaspaka, Pablota piagkuna sakirkakuna.

³³ Chiura mandagka, Pablopagma chaiagrispa, paita

apichispa, nirka, iskai kadinakunawa watachukuna.

Nispaka, chipi kagkunata tapurka:

—Kai runa, ¿pitak ka? ¿Imatak rurakurka?

³⁴ Chiuralla sug sug rigcha, sug sug rigcha kaparinaturka. Chituku achka uiarinakugmanda, chi mandagka ñi mapas mana pudirka iachangapa. Chimanda, suldadukunata nirka:

—Kai runata apaichi kamkuna kadiruma.

³⁵ Chi wasi iskalirama chaiagriura, suldadukunaka iukarkakuna, Pablota markaspa sikachingakuna, judiukuna tangaspa katichinakugmanda. ³⁶ Chi tukui kati-raiagkuna, sinchi kaparispa ninakurka:

—Wañuchiichi.

Jerusalenpi kagkunapa ñawipi, Pablo kispiringapa rimariskamanda

³⁷ Suldadukuna kadiruma pungupi iaikuchingapa kauru, Pablota paikunata mandagta nirka:

—¿Pudirinchu rimangapa?

Chi mandagka tapurka:

—¿Pudingichu griego rimai? ³⁸ ¿Manachu kam kangikai mana unai punchakuna chi Ejiptomanda nukanchita killachii rurag runa? ¿Manachu sug chusku waranga wañuchig runakunata chusa sitaska alpama pusarkangi?

³⁹ Chiura, Pablota ainirka:

—Nuka, judíu runami kani. Silisia alpapi, chi Tarso iapa uiariska puiblumandami kani. Diosmandami mañai-ki: sakiwai, kai tukui runakunata nuka rimangapa.

⁴⁰ Chi mandag “Aja” niura, Pablota, chi iskalira awa ladu saiarispa, makiwa upallaichi nigsina kawachirka. Tukuikuna upallagsamuura, paika, hebreo rimaiwa rimaspa, nii kallarrirka:

22 —Taitakuna, uiawaichi. Nuka kikin kispiringapa kaskatami willaikichita.

² Hebreo rimaiwa uiaspaka, chipi kagkuna masmi upallarkakuna. Chiura Pablota, kasami nirkakunata:

³ —Nuka, Silisia alpapi, Tarso puiblupi tiagsamuska judíu runami kani. Kai Jerusalenpi, taita Gamaliel iachachikuskawami wiñagsamurkani. Paiwa, tukui imasa nukanchipa ñugpamanda taitakuna ima rurangapa niraiaskata iachaikuspami atarirkani. Chimanda, tukui kamkuna kuna puncha kaipi kagkunasinami, nukapas Taita Dios imasa niskata allilla ruraspaka kani.

⁴ —Ñugpata nuka kikinpas, Jesusmanda Alli Willaita mana munaspa, kari i warmi Jesuswa iuiagkunata apispa, wataspa, karsilma churachispami wañuchichiiwantakarkani. ⁵ Iaia sasirduti i judíu taitakuna, tukui paikunapas nukamanda chasallatami willangapa pudinkuna. Paikunami, Damaskopi judíu kaugsanakusamanda karta iskribispa, kachawarkakuna. Chi kartawami Damaskoma rikurkani, maikan Jesuswa tukuskakunata kadinawa wataspa, kai Jerusalenma apamungapa; chasawaka, paikuna justisiai tukungapakuna.

⁶ —Nuka ñambi rikuskapi, ñalla Damaskoma chaiagringapa kauraka, chaugpunchasina kaura, diulpilla awanigmamanda ajai sinchi punchaiachiwiwami nukapa muiugta tukuwagsamurka. ⁷ Chiwanka, alpamami ur-

markani. Chiura, sug rimaika uiriwagsamurka, kasa nipa: “Saulo, Saulo, ¿imapatak puchukawangapa iuiailawa purikungi?”

⁸ —Nukaka tapurkani: “Kam Taitiku, ¿pitak kangi?”

—Chasa tapuura, ainiwagsamurka: “Nukami kani Nazaretmanda Jesús. Nuka kikintami puchukawangapa iuiailawa purikungi”.

⁹ —Nukawa sugllapi rinakugka, chasa punchaiachikuskata kawasapapas, chi rimawakugtaka manima uiarakuna. ¹⁰ Chiura, nuka tapurkani: “Taitiku, nukaka, ¿imatak iukani ruranga?”

—Chiura, Iaia Jesuska ainiwarka: “Atarisa, Damaskoma rii. Chipimi kamta ningakuna, ima rurangapa kagta”.

¹¹ —Chi sinchi punchaiachiiwa ñawi tutaiachiimi tukurkani. Chimanda chi nukawa purigkunaka, makimanda charispa, Damaskoma chaiachiwagirrakuna.

¹² —Chi puiblupi kaugsakurka Ananías suti Moisés tukui ima niraiaskasina allilla rurag runa. Judiukuna tukui chipi kaugsagkunapas, paimanda iapa suma rimadur karkakuna. ¹³ Chi runaka, nuka kaskama chaiagrispa, niwarka: “Waugki Saulo, ñawiwa kawai”.

—Chasa niwagllapi, nuka, paita kawangapa pudirkani.

¹⁴ —Chiura, chi runaka niwarka: “Nukanchipa ñugpamanda taitakunapa Taita Diosmi kamta agllarka, pai imasa munakuskata kam iachangapa; chiwanka, tukui kunamandapas mas alli runata kam kawangapa; chasallata, pai Jesús rimaskata uangapa. ¹⁵ Kam kikinaka, tukui runakunata ima paimanda kawaska i uiaskata willagmi kankangi. ¹⁶ Kunauraka, ¿imatak suaikungi? Atarisa, baugtisarii; chasaka, Iaia Jesusmanda iuiarisa, kam pandariskakunata pasinsiai tukungapa”. Chasami Ananías niwarka.

¹⁷ —Nuka Jerusalemma kutiskauramandaka, Diospa atun wasipi mañakuspa, muskui ukupisina ¹⁸ Iaia Jesustami kawagsamurkani. Paika, nukata kasami niwarka: “Utkalla kai Jerusalemmanda llugsispa rii. Kai puiblupi kaugsagkuna, kam nukamanda ima willakuskata manima uangapa kankunachu”.

¹⁹ —Nukaka ainirkanimi: “Taitiku, paikuna allillami iachankuna, nuka tandariduru wasikunapi iaikuspa, kamwa suma iuiarigkunata karsilpi churachispa i asutichispa purikugta. ²⁰ Kammanda willag Estebanta wañuchinakuura, nuka kikinpasmi, chipi kaspas, wañuchikugsina ruraspa karkani. Nuka kikinmi chi wañuchinakugpa kataridirukunata kawapug karkani”.

²¹ —Nuka chasa nigpipas, Iaia Jesuska niwarka: “Rikui kaimanda. Karumi kachangapa kaiki, mana judiukunapagma”.

Suldadukunata mandagwa Pablowa rimanakuska-manda

²² Pablo chasa rimakunkama, chipi kagkunaka upalla uianakurka. Mana judiukunamanda rimagta uiaspaka, tukuikuna, sinchi kaparispa, nii kallarirkakuna:

—Chi mana allilla iuiagta wañuchii. Chiins mana kaugsakuchu—. ²³ Chasa kaparispa, rabiawa kikin-

kunapa kataridirukunata awama bulachispa, alpa wairapi sitanakurka.

²⁴ Chasa kawasapaka, chi mandagka suldadukunata nirka:

—Kamkuna kadiruma chi runata iaikuchispa, mana llakispalla asutiichi, pai kikin willarinkama: imamandami paita chasa kaparinakú.

²⁵ Ña asutingapa wataska charinakuura, Pablota chipi saiakuska kapitanta tapurka:

—Kamkunapa willaraiaskapi, ¿allillachu ka, Romamanda runata asutingapa, manara imapas tapuchispalla?

²⁶ Chasa uiaspa chi kapitanka, mandagpagma iaikuspa, willagirka:

—Chi runa, Romamandasi ka. Manachar chaiaku, paita asutingapa.

²⁷ Chasa willaura, chi mandagka, Pablopagma iaikuspa, paita tapurka:

—Niwai: ¿sutipachu kam Romamanda kangi?

Chiura, Pablo ainirka:

—Sutipami chasa kani.

²⁸ Chiura, chi mandagka nirka:

—Nukaka, achka kulkimi iukarkani paganga, chi Romamanda runa tukungapa.

Pablota ainirka:

—Nukaka, nukapa taitakunamandami Romamanda kani.

²⁹ Chasa kagmanda, paita asutingapa kagkuna mana asutispalla anchurirkakuna. Chi mandagpas, Romamanda runata kadinawa watachiska kagta iachaspaka, iapami mancharirka.

Judíu taitakuna sugllapi tandariska kaskapi, Pablo kaskamanda

³⁰ Kaiandi, chi mandagka munakurka suma iachangapa: imamandami judiukuna, Pablomanda mana allilla rimanakú. Chimanda, Pablota kacharispaka, iaia sasirdutikuna i tukui judíu taitakunataka nirka, sugllapi tandarichukuna. Nispaka, Pablota pusaspa, chi tukui tandariskakunapi chaiachigrirka.

23 Chi tukui taitakunata allilla kawaspa, Pablota nirka:

—Taitakuna, nuka, Diospa ñawipi kuna punchakama suma allilla iuiaiwami kaugsakuni.

² Chasa niura, Ananías suti iaia sasirdutika Pablota ladullapi saianakuskata nirka:

—Chi runata simipi piaichi.

³ Pablota ainirka:

—Kamtami Taita Dios piangapa ka. Kam, mana suma llunchiska wasita iuraiachiskasinami kangi. Kam tia-kungimi, Moisés imasa niraiaskapi iachaspa, justisiai rurawangapa. Nigpika, ¿imapatak imasa justisiai rurai niraiaskasina mana allilla ruraspa piachiwakungi?

⁴ Pablota ladullapi saianakugka, paita nirkakuna:

—¿Chasachu Taita Dios agllaska iaia sasirdutita, kam kamikungi?

⁵ Chiura, Pablo ainirka:

—Taitakuna, nuka mana iacharkanichu, pai iaia sasirduti kagta. Ñugpamanda librupi willaraiaskapi, kasami niraiá: “Kamba alpapi mandagta mana kamingi”.

⁶ Chipi tandarigpura, sugkuna saduseo; ikuti sugkuna, fariseo karkakuna. Chasa iachaspa, Pablota kaparirka:

—Taitakuna, nukapas fariseomi kani. Fariseokunapa wambrami kani. Iachanimi, wañuskakuna ikuti kaugsa-ringapa kagtakuna; chimandami nuka suma iuiaiwa kaugساني. Chimandachar justisiai tukungapa pusamuwarkangichi.

⁷ Chasa nigmanda, fariseokunawa i saduseokunawa parijuma rabiachinakugsina ainichirinakurka. Chasamanda chipi kagkuna, iskaima tukurkakuna. ⁸ Saduseokuna iachachidurkunami kankuna: wañuskakuna mana massi kaugsa-ringapa kankuna. Chasallata, anjilkuna i mana kawarig kaugsagkuna mana tiagtami iachachinkuna. Ikuti fariseokunaka ninkunami: saduseokuna mana tianchu niskata tianmi. ⁹ Chasaka, iapa uiarii chaiagsamurka. Chiura fariseopuramanda sug iachachig taitakunaka, atarispas, rabiawa kaparirka-kuna:

—Kai runata ñi ima pandariska mana tarirkanchichu. Nukanchi, ¿imatak iachasunchi? Maikan ispiñitu u anjilpaschar paita chasa rimagsamurka.

¹⁰ Chasa tukui tandarigpurami mas sinchi kaparispas ainichirinakurka. Chasa kwaspa, suldadukunata mandagka, mancharispa, iuiakurka: “Pablota, ¡ujalallas piti piti rurachukuna!”. Chasa iapa uiarinakug-manda, suldadukunata nirka:

—Chi runakunapa chaugpimanda Pablota llugsichichi. Nispaka, kamkuna kadiruma ikuti pusaichi.

Judiukuna, Pablota wañuchingapa iuiariskakunamanda

¹¹ Chi tuta Iaia Jesuska, Pablota muskuipi kawarig-samurka, kasa nispa:

—Mana manchakui. Imasami kai Jerusalenpi nukamanda willarkangi: chasallatami kamta chaiangapa ka, Romapipas nukamanda willagringapa.

¹² Kaiandi pakariura, sug judiukuna, Diospa ñawipi juraspa, suglla iuiaiwa rimarinakurka, kasa nispa:

—Pablota manara wañuchinkamaka, ñi ima upiai ñi mikui mana mikungapa kanchichu—. ¹³ Chusku chungaga iall runakunami chasa iuiaiwa rimanakurka. ¹⁴ Chi runakunaka, iaia sasirdutikuna i judíu taitakunapagma chaiagrispa, nirkakuna— Nukanchi, Diospa ñawipimi jurarkanchi, Pablota manara wañuchinkama, ñi ima mikuiipas mana amullingapa. ¹⁵ Chimandaka, kasa rurasunchi: kamkuna, tukui taitakunawa sugllapi tandarispas, chi suldadukunata mandagta mañagringichi, Pablota kaia pusamuchukuna kamkunapagma; chasaka, paita mas allilla tapuchingapa. Nukanchika, allichirispami kasunchi. Pablo manara kamkunapagma chaiamugpi, ñambillapimi wañuchingapa kanchi.

¹⁶ Pablota panipa wambraka, paikuna chasa rimarinakuskata allilla iachaspaka, suldadukuna kadiruma

rirka, Pablota tukui willagringapa. ¹⁷ Chasa uiaspa Pablota, sug kapitanta kaiaspa, nirka:

—Kai musuta kamba mandagpagma pusapuai. Pai, ima willagsamungapami suiaku.

¹⁸ Chiura chi kapitan, mandagpagma chi musuta pusaspa, nigrirka:

—Chi karsilpi kaska Pablo, kaiawaspa, mañawarkami, kai musuta kambagma pusamungapa. Kamta imachar willangapa ka.

¹⁹ Chiura chi mandagka, musuta makimanda apispa, sugsinama sapalla pusaspa, tapuchirka:

—¿Imatak willawangapa kangi?

²⁰ Chiura, chi musu ainirka:

—Judiukuna, suglla iuiaiwasi rimanakurka, kamta kasa mañagsamungapa: kaia, Pablota judíu taitakunapagma pusangapa; chaiachigrispaka, paita mas allilla tapuchingapa. ²¹ Paikuna chasa nigsamugpipas, mana paikunata uiakungi. Chusku chungaga iall runakunasi pakalla chapangapa kankuna, ñambipi paita wañuchingapa. Paikuna, Diospa ñawipisi jurarkakuna, Pablota manara wañuchinkama, ñi ima upiai ñi mikui mana mikungapa. Kunaora, allichiriskasi suianakú, kam imasa ainiskata iachangapa.

²² Chasa willaura, chi mandagka musuta kacharka, kasa nispa:

—Kam kaipi ima willawaskata ñi pitapas mana willakungi.

Atun mandag Felixpagma Pablota kachaskamanda

²³ Chasa nispaka, iskai kapitankunata kaiaspa, nirka:

—Chakiwa ringapa iskai patsa suldadukunata kaiangichi. Kaballupi ringapa kanchis chungakunata i iskai patsa lansa iukagkunatapas allichingichi, kunantuta las nuibi Sesarea puibluma ringapa. ²⁴ Chasallata, sug kaballukuna Pablomandapas allichichukuna; chasaka, atun mandag Felixpagma allilla kawari chaiagringapa.

²⁵ Chasa nispaka, sug karta iskribirka, kasa nispa:

²⁶ “Nuka, Klaudio Lisias, kam atun mandag Felixtamini niiki: ‘¿Allillachu kapuangi?’.

²⁷ “Kai runata, judiukuna apispa, ña wañuchingapa charinakuskatami nukaka, pai Romamanda kagta iachaspa, nukapa suldadukunawa michaspa kispichigrirani. ²⁸ Nispaka, imamanda paita wañuchingapa rimanakuskata iachangapa, judiupuramanda taitakunapagmami paita pusarkani. ²⁹ Chipika, nuka mana tarirkanichu, ñi ima justisiai willaraiaskapi pandarig kagsina wañuchii tukungapa u karsilpi churai tukungapa chaiagta. Paikunapa ñugpamandakuna willaraiaska sakiskapi mana chasallata rurakuskamandallasi wañuchingapa munanakurka. ³⁰ Paita wañuchingapa suianakugta iachagsamuska-llawami paita kambagma kacharkaiki. Paimanda mana alli kagta willanakuskatapasmi kaiarkani, paikuna ima ningapa kaskata kam kikinpa ñawipi willagrichukuna.

“Kaiakamami niiki”.

³¹ Chi suldadukunaka, imasa niskasina tutawanta Pablota pusarkakuna Antípatris suti puibluma. ³² Ka-

iandika chakiwa rinakug suldadukunaka, paikuna kadiruma kutirkakuna, kaballupi rinakugllawa Pablota sakispa. ³³ Chikunaka, Sesarea puibluma chaiagrispa, atun mandag Felixta karta kachaskata kuagrirkakuna. Pablotapas chipi sakirkakuna.

³⁴ Chi kartata kawaspa, chi mandagka Pablota tapurka:

—Kam, ¿maikan alpamandatak kangi?

Chiura, Pablo ainirka:

—Silisiamandami kani.

³⁵ Chasa uiaspaka, nirka:

—Kammanda mana alli kagta willagkuna chaiagsamuurami kamta uiasaki—. Chasa nispaka, kacharka, Herodespa atun wasipi charinakungapa.

Atun mandag Felixpa ñawipi, Pablo kispiringapa rimariskamanda

24 Pichka punchapika, iaia sasirduti Ananías, sug judíu taitakunapas i Tértulo suti paikunamanda rimag chipi chaiagrirkakuna. Nispaka, mandag Felixta Pablomanda willai kallarkakuna. ² Pablota Felixpa ñawima chaiachigriura, Tertuloka, paimanda willaspa, kasami ailastimai kallarkirka:

—Iapa atun mandag Félix, kam sumaglla kawaskamandami nukanchi suma allilla kaugsanakunchi. Kam allilla iuiariskamandami kai alpapi kaugsagkumanda kam imasa kawaskasinawa suma tukurka.

³ Nukanchi chasa maipipas suma chaskispa, tukumanda kamta iapami “Pai Siñur” ninchi.

⁴—Kunaura, nuka mana iapa unaiachingapa, kaillami mañai: kamba suma pasinsia iukaspa, sug mana unaila uiawai. ⁵ Kaipi saia ku chi runaka; ialig ungui churagsinami ruraku. Tukui judiukuna kaugsanakuspimi sug rigcha sug rigcha iuiachispa puriku, iapa killachinakugta. Pai, chi Nazaret puiblumanda runawa iuiarigkunapa iaia tukuskami puriku. ⁶ Jerusalempe Diospa atun wasitapas ianga wasitasinami mapaiachingapa munakurka. Chasamandami paita apirkanchi, [nukanchita imasa niraiaskasina justisiai rurangapa. ⁷ Chiura Lisias suti mandagka, chaiagrispa, nukanchipa maki-manda rabiawami paita kichugrirk. Chasa kichuspaka, nukanchita nirkami, kamba ñawipi paimanda mana alli kagta willagsamungapa.] ⁸ Kam kikin, paita tapuchispami iachapuankangi, tukui nukanchi paimanda willanakuskaka sutipa kagta.

⁹ Judiukuna chipi kagkunapas nirkakuna:

—Tértulo ima willakuska, chasami ka.

¹⁰ Chi atun mandagka Pablota makiwa rimangapa kawachiuraka, Pabloka rimai kallarkirka, kasa nispa:

—Nuka iachaniami, achka watakuna kam sutipa kai alpapi sumaglla kawaspa, justisiai rurag kagta. Chi-mandami nukaka, mana manchaspalla, kam kikinpa ñawipi kispiringapa iuiani. ¹¹ Kam pudipuankangimi, pitapas tapuchispa, kasa iachapuungapa: nukaka, chunga iska punchallami Jerusalempe chaiagriska karkani. Chimaka riskami karkani, Taita Diusta kungurigringapa. ¹² Ñi maikanwa piñachinakuskata ñi runakunata sug rigcha sug rigcha iuiachikuskata mana tari-

warkakunachu. Ñi Diospa atun wasi ukupi, ñi judiukuna tandariduru wasikunapi ñi puiblu ñambikunapi mana maipipas chasa rurakuskata tariwarkakunachu. ¹³ Kunaura nukamanda ima juchachiwaskakuna sutipa kagsina mana kawachingapa pudingapa kankunachu.

¹⁴—Nigpika, nuka kasami willariiki. Chi Jesuswa iuiagkuna mana allilla kagsina paikuna nigpikunapas, nukaka, chi Jesuswa suma iuiaspa, nukanchipa ñugpamanda taitakunapa Taita Diosmanda allilla ruragmi kani. Chasa, tukui ima Moisés willaraiaskamanda i Santu Ispirituwa rimagkuna ima willaraiaskakunamandapas suma iuiaspa ruragmi kani. ¹⁵ Imasami kai kikin runakuna, Taita Dioswa iuiankuna: nukapas chasallatami iuiani, allilla i mana allilla rurag wañuskakunatapas kaugsarii tiangapa kagta. ¹⁶ Chimandami nuka munani, Diospa ñawipi i runakunapa ñawipipas imaurapas sumaglla allilla iuiaiwa kaugangapa.

¹⁷—Unai watakunapimi ikuti nukapa alpama kulki tandachiskakunawa chaiagrirkani, mana iukagkunata karangapa; chasallata, Taita Diusta kamariku sakipungapa. ¹⁸ Nuka chasa rurakuuraka, Asiamanda sug judiukuna Diospa atun wasipimi kawawarkakuna. Chipika, nuka Diospa ñawipi maillariskasinami tukuska karkani. Iapa achkakunawa mana karkanichu. Ñi piwapas mana uiarikurkanchu. ¹⁹ Chi Asiamandakunami iukankuna, kamba ñawipi nukamanda willagsamungakuna, nuka mana allilla imapi ruraska kagpi. ²⁰ Chasallata, imasami judíu taitakuna tandariska kaskakunapi nuka kaura, mana allilla ima ruraska kagta kawawarkakuna: kaipi kagkuna, chasallata kamta willachukuna. ²¹ Kasallami, paikunapa chaugpipi saiarispa, kaparirkani: “Wañuskakuna ikutimi kaugsaringapa kankuna; chimandami nuka suma iuiani. Chimandachar kunaura justisiai tukungapa pusamuwarkangichi”.

²² Atun mandag Felixka, Jesuswa tukuskakuna imasa kaskakunamanda allilla iachaspa, chipi kagkunata nirka:

—Lisias suti suldadukunata mandag chaimuaurami kamkuna ima ninakuskaka allilla tapuchispa iacharigsamunga—. Chasa nispaka, chi rimanakuskamanda suurakama sakirka.

²³ Chiwa, sug kati mandagta kacharka, Pablota mana wataspalla wichkangapa, kasa nispa:

—Maikan paipura ima ministiska sakipungapa samugpikunaka, ianga kawangi.

²⁴ Sug punchakuna ialiuira, Félix warmindi Drusila sutiwa ikuti Pablopagma chaiagrirkakuna. Chi warmika, judiami karka. Chaiagriskapa, Pablota pusangapa kacharka. Chaiachigriura, Pabloka Jesucristomanda willai kallarkirka pai imasa iuiakuskasina. ²⁵ Nii kallarkirka imasa allilla ruraspa kaugangapa chaiagta, kikin mana allilla iuiaskakunata sakingapa; nispaka, imasa Taita Dios justisiai rurangapa kagta.

Felixka, chasa uiaspaka, iapa mancharirka. Nispaka, Pablota nirka:

—Kunaura, upalla ripuai. Nuka luar iukaurami ikuti kaikasaki.

²⁶ Chiuramandaka, Félix iuiakurka: “Pablo kulki karawantra, nuka kacharingapa”. Chasa iuiakuspami paita ikuti ikuti kaiakurka, paiwa rimanakungapa. ²⁷ Iskai wata ialiuura, Félix, atun mandag kaskamanda llugsirka. Paipa kuintaka, Porsio Festo suti runami atun mandag tukurka. Felixka, judiukunata kuntintachingapa iuiarispami Pablota karsilpi sakirka.

Atun mandag Festo kaskapi, Pablo kaskamanda

25 Festoka, atun mandag tukuspaka, kimsa punchapi Sesarea puiblumanda rirka Jerusalemma.

² Chipi chaiagriuraka, iaia sasirdutikuna i sug judíu taitakunapas, Pablomanda mana allilla ruraska kagta willai kallarikakuna. ³ Kasami mañarkakuna:

—Pablota Jerusalemma chaiachimungapa kachapuai—. Chasa mañaspaka, iuianakurka, Pablota Jerusalemma ñambi pusanakuskapi, paita wañuchingapa.

⁴ Chiura, Festoka ainirka:

—Pablo, Sesarea puiblupimi wichkaraiá. Nuka kikinmi chima utkalla ringapa kani. ⁵ Chimanda kam kikinpura taitakuna, nukawami chima risunchi. Pai ima mana allilla ruraska kagpika, chipimi nukata willawan-kangichi.

⁶ Mai pusag u chungu punchalla unaiaspa, Festo, Jerusalemmanda Sesarea puibluma kutirka. Chaiagriska sug kaiandilla, pai, mandag tiaridirupi tiarispá, Pablota pusangapa kacharka. ⁷ Ña Pablo chipi chaiagriura, Jerusalemmanda chaiagriska judiukunaka paita muiugta saiarigrirkakuna. Achka mana allilla ruraska kagta paimanda willai kallarikakuna. Chasa willanakuspapas, mana pudirkakuna, sutipa kaskata ñi imapi-pas taringapa.

⁸ Pablota, kikin kispiringapa, kasami ainikurka:

—Nuka, judiukunapa ima rurangapa niraiasamanda, Diuspa atun wasimanda, ñi Romapi iaia mandagmánda ñi imapi-pas mana allilla mana ruraska kani-chu.

⁹ Festoka, judiukunata kuntintachingapa iuiarispá, Pablota tapurka:

—¿Jerusalemma ringapachu munangi; chipika, nuka kamta tukui tapuchingapa?

¹⁰ Chiura, Pablota ainirka:

—Kaipimi kani Romamanda iaia mandagpa mandadiru ukupi. Kaillapimi tapuchiwai iukangi. Kam kikinpas allillami iachangi, nuka, judiukunata ñi imapi-pas mana jiru ruraska kagta. ¹¹ Sutipa nuka wañuchingásina pandarii iukagpika, iukanimi wañuchii tukunga. Ikuti paikuna ñi ima nukamanda willaska mana sutipa kagpika, kam mana pudingichu, nukata paikunapa makima ialichiwanga. Chimanda mañaikimi: Romapi iaia mandagpagma kachawai.

¹² Pablo chasa niura, Festoka, paita allilla iuiachigkunawa rimanakuspa, nirka:

—Iaia mandagpagma ringapa mañarkangi. Paipagmami ringapa kangí.

Atun mandag Agripa, Pablota kaskamanda

¹³ Sug punchakuna ialiskauramandaka, sug alpata atun mandag, Agripa suti, Berenise suti paipa warmi-wa Sesarea puibluma chaiagrirkakuna, Festota: “Puangi” ningapa. ¹⁴ Paikuna ña achka punchakuna chipi chisianakuura, Festoka chi atun mandagta Pablomanda willarka, kasa nispá:

—Kaipimi ka sug runa, Félix karsilpi sakiska. ¹⁵ Nuka Jerusalemma kagriuraka, iaia sasirdutikuna i sug judíu taitakunapas, chi runamanda willawaspa, mañawanakurka, justiaspa wañuchingapa. ¹⁶ Nukaka, paikunata ainirkani: “Romamanda mandakuska alpakunapi kasa rurangapami niraiá: maikan runamandapas mana alli ruraska kagta willaura, chi runa manara willagkunapa ñawipi kispichiringapa willarigpika, manara paita wañuchingapa pudirinchu”.

¹⁷ —Chimanda, paikuna nukapagma chaiagsamuraka, nuka, mana unaiachispalla, kaiandi mandag tiaridirupi tiarispá, kacharkani, chi runata pusagriringapa.

¹⁸ Chaiachimura, paimanda willawaskakunaka, nuka ima iuiakuskasina mana rimarkakunachu. ¹⁹ Kasallami willawanakurka: pai kikinkuna ima iuianakuskamanda i sug wañuska Jesús sutimanda. Pablota nikurkami, chi Jesuska ikuti kaugsariska kagta. ²⁰ Nuka chasa willanakuskata uiaspaka, mana iachariwarka ima ruranga. Chimanda, Pablota tapurkani: “¿Jerusalemma ringapachu munangi; chipika, nuka kamta tukui tapuchingapa?”. ²¹ Chiura, Pablota mañawarkami: “Nukata Romapi iaia mandagpagma kachawai, pai tapuchiwachu”. Chimandami paita kacharkani, karsilpi churangapa, imaura iaia mandagpagma kachangapa chiankama.

²² Chasa uiaspa, Agripa Festota nirka:

—Nukikinpasmí munantrani, chi runata uiangapa.

Chiura, Festo ainirka:

—Kaiami paita uiasunchi.

²³ Kaiandi, Agripa Berenisewanta, suldadukunata mandagkuna i chi puiblupi mas atun taitakunapas, Festo mandadiru atun ukuma iapa sumaglla churáriska iaikugrirkakuna. Chiura, Festoka kacharka, Pablota pusagriringapa. ²⁴ Nispaka, Pablo ña iaikugriura, nirka:

—Atun mandag Agripa i tukui nukanchiwa kaipi kagkunapas, kai runata kawaichi. Paimanda, Jerusalemma i kai Sesareapipas, tukui judiukunami kaparispá mañawanakurka, paita wañuchingapa. ²⁵ Ikuti nukaka mana kawagsamunichu, ñi imapi-pas jiru ruraskamanda, paita wañuchingapa chaiakugta. Paika, nukata mañawarkami: “Romapi iaia mandagpagma kachawai, pai tapuchiwachu”. Nigpi, chimandami iuiariwarka, chi mandagpagma paita kachangapa. ²⁶ Nuka, paimanda mana imapas allilla iachanichu, iaia mandagpagma willai kachangapa. Chimandami kam atun mandag Agripa ñawima i tukui kaipi kagkunawa paita pusamungapa kachani; chasaka, kam paita tapuchi-puaura, nuka paimanda imasa uiaskata willai kachangapa.

²⁷ Nukata mana allilla chaiwakunchu, maikan karsilpi

kaskata kachangapa, pai ima ruraskata mana willaspa-lla.

Atun mandag Agripa kaskapi, Pablo kispiringapa rimariskamanda

26 Chasa niura, Agripaka Pablota nirka:
—Kunaurami pudingi, kam kikinmanda allilla imasa chaiskasina rimaringapa.

Chiura Pabloka, maki atarichispa, nii kallariirka:
²—Atun mandag Agripa, kam allillami iachangi, tukui nukanchi judiukunapura imasa kustumbri iukas-kakunamanda i nukanchi kikinpura imamanda rimana-kuskamandapas. Chimandami nukata iapa alli iuia-chiwá, kamba ñawipi judiukuna tukui ima nukata juchachispa niwanakuskamanda rimaringapa. Nukami mañaiki: mana rabiariispalla uiawai.

⁴—Tukui judiukuna allillami iachankuna, nuka imasa uchullamandata nukapa alpapi i Jerusalenpi kaug-sagta. ⁵Nuka, musu kauramandatami fariseo kani. Judiupuramandapas fariseokunaka, Taita Dios ima rurangapa niskata mas allilla ruragkunami kanchi. Chitapasmí judiukuna nukamanda allilla iachankuna. Paikuna, munaspaka, pudinkunami, nukamanda chasallata willangakuna.

⁶—Kunauraka, Taita Dios nukanchipa ñugpamanda taitakunata pai agllaska Cristota kachamungapa niskata nuka suma iuiagmandami justisiai rurawangapa munanakú. ⁷Nukanchipa chungá iska ñugpamanda atun taitakunapa wambrakunapa wambrakunawa puncha i tuta Taita Diusta kungurispa iuiarispami suianakunchi, Taita Dios imasa niskata pai kikin ruragsamungapa. Nuka chasa iuiarispá suiakugmandami judiukunaka mana allilla kagta nispa juchachiwanakú. ⁸Kamkunaka, ¿imapatak iuianakungichi, Taita Dios, wañuskakunata kaugsachingapa mana pudigta?

⁹—Ñugpata nukapas, mana iachaspa, iuiarkani: “Chaiawakumi, chi Nazaret puiblumanda Jesuswa tukuskakunata mana llakispalla jiru paikunata rurangapa”. ¹⁰Chasami Jerusalenpi rurarkani. Taita Diosmandalla sumaglla kaugsagkunata, achkakunatami karsilpi churachirkani. Iaia sasirdutikunata chasa rurangapa mañaspami chasa rurakurkani. Chi Jesuswa tukuskakunata wañuchinakuura, nukapas chasallata iuiaiwami paikunawa karkani. ¹¹Judiukuna tukui tandariduru wasi ukuma iaikuspa, achka biajimi Jesuswa suma iuiagkunata asutichirkani; chasaka, Jesusta kungaringapakuna. Iapa rabiawami paikunata kalpachidur karkani. Sug alpapunapi kaugsanakuskapagmapasmí chaiagridur karkani, Jesuswa tukuskakunata apingapa.

¹²—Nuka chasallata rurangapa iuiaiwami Damasko puibluma rikurkani. Iaia sasirdutikuna iskribiska karta kuawaskawami chasallata apingapa rikurkani. ¹³Ñambi rikuskapika, chaugpuncha diulpillami awanigmamanda indimandapas mas sinchi sindi punchaiachiwagsamurka. Chi punchaiachii, nukata i nukawa rinakuskatami muiuchigsamurka. ¹⁴Tukuikunami alpama urmarkanchi. Chiuraka, hebreo rimaiwa uiariwag-

samurka, kasa nispa: “Saulo, Saulo, ¿imapatak puchukawangapa iuiailawa purikungi? Imasami wagrata tawinawa takaura, tawinata aitaspa, nanachiri: chasallatami kam kikin rurarikungi”.

¹⁵—Chiura, nuka tapurkani: “Kam Taitiku, ¿pitak kangi?”.

—Chasa tapuura, Iaia Jesuska ainiwarka: “Nukami kani Jesús. Nuka kikitami puchukawangapa iuiailawa purikungi. ¹⁶Chasa kagpipas, atarispá saiarí. Kasamandami kamta agllaspa kawariiki: nuka ima niskata uiawaspa rurangapa; chasallata, nuka kikinmanda kam ima kawaska i kunauramanda kam ima kawangapa kaskata kwaspa willaspa puringapa. ¹⁷Nuka kikinmi judiukunamanda i mana judíu kagkunamandapas kispichisaki. Paikunapagma kachasakimi, ¹⁸paikunapas, amsapisina kaugsanakugmanta Taita Diospa suma iuiaita apispa, punchaiachigsinawa sumaglla kaugsangapakuna; chiwanka, iaia kukuwa mana alli kaugsaita sakispa, Taita Dioswa tukugsamungapakuna. Chasa nukawa suma iuiarispaka, pandariikunata pasinsiaimi tukungapa kankuna; chasapika, tukui nukamandalla sumaglla kaugsagkunawa Taita Dios niskata chaskingapa”.

¹⁹—Atun mandag Agripa, Iaia Jesús chasa suma luar-manda kawariwauramandatata, pai tukui imasa niwaskasinami nuka suma uiaspa rurani. ²⁰Damasko puiblupimi kallariirani; nispa, Jerusalenpi i Judea alpa suiu; nispa, mana judíu kagkunapagpipasmí willaspa purirkani, paikuna pandariskakunata sakispa, Taita Dioswa tigrangapa; chiwanka, mana allilla rurakunata sakispa, alli ruraikunawa kaugsangapa.

²¹—Chasa kagmandami judiukunaka, Diospa atun wasi ukupi apiwaspa, munanakurka wañuchiwangapa. ²²Chasa kagpipas, Taita Dios kispichiwagmandami kunankama atunkunata i uchullakunata willai apakuni. Moisés i Santu Ispirituwa rimagkuna ñugpamanda willarkakuna ima tukugsamungapa kagta; chillatamí nukapas willakuni. ²³Ñugpamandatami paikuna willaska karkakuna, Taita Dios agllaska Cristoka, iapa llakii nanai iukaspa, wañuchii tukungapa kagta. “Paika, tukui wañuskakunamanda ñugpami kaugsaringapa ka. Chiuramandaka, paimanda willaimi tiangapa ka; judíu i mana judíu kagkunapa iuiaikunata suma punchaiachiimi tiangapa ka”.

²⁴Pablo kispiringapa iuiaiwa chasa rimakuuraka, Festoka paita kaparirka, nispa:

—Kam, upami tukurkangi. Iapa iachaikukuspami kamba uma tuntiarirangi.

²⁵Pabloka ainirka:

—Atun mandag Festo, nuka mana upaiaska kanichu. Allilla iuiaipimi nuka, sutipa kaskata rimanakuikichita. ²⁶Pai atun mandag Agripapas, tukuimi chikunata allilla iachá. Nuka mana iuianichu, chasa pasariskata, pai mana iachagta. Pakallapi chasa mana pasarirkachu. Chasa kagmandami nuka, paipa ñawipi mana manchaspalla rimani. ²⁷Atun mandag Agripa, Santu Ispirituwa ñugpamanda rimagkuna imasa willaskakunata,

¿manachu suma iuiangi? Iachanimi, kamps chita suma iuiagta.

²⁸ Chiura Agripaka, Pablota ainirka:

—Maillamandami nukatapas Jesucristowa tukuska-nunawa kangapa iuiachiwangi.

²⁹ Chasa ainiura, Pablota nirka:

—¡Chasa Taita Dios munapuantra! Maillamanda u achkamanda imapas, kamllapas mana; ¡amalai kuna puncha kaipi tukui kagkunapas, nukasina iuiantrangi-chi! Nuka kai kadinakunawa wataskasinaka, mana.

³⁰ Pablo chasa niuraka, atun mandag Agripa, atun mandag Festo, Berenise i tukui chipi tianakugkunapas saiarirkakuna. ³¹ Rinakuskapika, kikinpura rimarina-kurka, kasa nispas:

—Chi runata ñi imapipas mana chaiakurkachu, wañuchii tukungapa ñi karsilpi kangapa.

³² Chasa rimarinakuskapi, Agripaka Festota nirka:

—Iaia mandagpagma kachai tukungapa mana mañanmi, alli karkami, paita kacharingapa.

Roma atun puibluma, Pablo kachai tukuskamanda

27 Nukanchita Italia suti alpama ringapa ña chaia-ura, Pablota i sugkuna karsilpi kaskakunatapas Augusta suti batallunpa kapitan Julio sutitami mingarkakuna. ² Chasaka, nukanchita chaiarkami, Adramitio sutimanda barkupi iaikungapa. Chi barku, Asia alpapi iaku pata pata sugpi sugpi iaikuspa ringapa karka. Masedonia alpa i Tesalónika puiblumanda Aristarko suti runapasmi nukanchiwa sugllapi rirkanchi. ³ Sug kaiandika, Sidón patamami chaiagrirkanchi. Chipika kapitan Julioka, suma llakirispas, Pablota sakirka, paipa rigsidikunapagma ringapa, ima ministiskakuna paita karachukuna.

⁴ Chimanda nukanchi, llugsispa, iakupi rinakuuraka, sinchi waira sugsinama tanganakugmanda, muiuspa, Chipre alpa mana waira tiaska ladutami ialirkanchi.

⁵ Silisia i Panfilia alpakuna pata pata lamar iakupi ialispaka, Lisia suti alpapi Mira sutimami chaiagrirkanchi.

⁶ Chipi kapitanka, Alejandriamanda Italiama rikuska barkutami tarirka. Chimami nukanchita ialichirka.

⁷ Achka punchakuna waira arkagmanda, iapa allimanda rispa, Gnido suti sug ladu chimba chaiagrirkanchi. Iapa sinchi wairakugmanda, mana chima pudirkanchi iaikugringapa. Chiwanka, Salmón suti puibluta karumandalla kawaspa ialispa, Kreta alpa mana waira tiaska ladutami rirkanchi. ⁸ Waira arkagmanda, iapa allimanda rispa, Alli Saiariduru suti patamami chaiagrirkanchi. Chi patamanda Lasea suti puibluma mana iapa karu kanchu.

⁹ Iapa waira arkai tukuspa, iapa unaiaspami rinakurkanchi. Atun tamiami ña chaiamungapa karka. Chimandami ña mana alli karka, iakupi ringapa. Chimanda Pablota, chipi kagkunata iuiachikurka, kasa nispas:

¹⁰ —Taitakuna, mana alli pasangasinami kawariwaku. Kai barkupi ima apanakuska, kikin barku i nukanchi kikinkunapas pudinchimi puchukaringakuna.

¹¹ Suldadukunata mandagka, Pablo chasa nikuskata mana munarka uiangapa. Barkupi pusag i chi barku duiñullatami chi mandag munarka uiangapa. ¹² Chi patapi tamia punchakuna ialichingapaka, manima kawarirkakunata, allilla kangapa kagsina. Chimandami ñalla tukuikuna ninakurka:

—Kaimanda llugsisunchi. Pudirintrapash, Fenise suti patapi chaiagrispa, tamia punchakuna chipi ialichingapa—. Chi puiblupi, Kreta alpapi kaspas, tamia punchakuna mana iapa chima sinchi waira piagridiru karka.

Lamarpi askurinti sinchi waira piaskamanda

¹³ Masama ringapa munanakuskasinama waira samugmanda, paikunaka iuiarirkakuna: “Allimi ka, chima ringapa”. Nispaka, barkuta saiachidiruta aisaspas, Kreta alpa pata pata rii kallarirkanchi. ¹⁴ Mailla rinakugllapika, iapa sinchi waira, diulpilla chi alpanigmanda atarirka. ¹⁵ Chiwanka, barkuta sugsinama tangai kallarirka. Waira imasa apakuskata mana sinchia-chingapa pudirkachu. Chiwanka, apai tukurkanchi masama tangakuskama. ¹⁶ Kauda suti uchulla isla waira piakuska wasa ladu ialinakuspaka, kispichiduru uchulla kanuata nukanchipa barku aliukuskata iapa mana alli pasaspami pudirkanchi, apispa barkuma iaikuchingapa. ¹⁷ Chita iaikuchispaka, barku muiugtas waskakunawa watarkakuna, mana pakiringapa. Nispaka, Sirte suti iakupi piñakuna tiaskawa mana takarigringapa, barkuta purichiduru linsuta uraikuchispa, sakirkakuna; chasalla, masamapas wairawa apai tukungapa.

¹⁸ Sug kaiandi mas sinchi waira chaiamugmanda, barkupi ima apanakuskata iakuma sitai kallarirkakuna.

¹⁹ Kimsa punchama rinakuspa, barkuta shamaichingapaka, kikinkunapa makiwa chi ukupi ima tiaskata sitarkakuna. ²⁰ Iapa achka punchakunami indi ñi istri-llakuna mana kawarirka. Iapa manchangasina iaku, nukanchita sinchi piakurka. Chasapika, mana iuianakurkanchi: “Kaugсами llugsisunchi”.

²¹ Ña achka punchakunami mana mikuska karkanchi. Chimanda Pablota, chipi kagkunapa chaugpipi saiarispa, nirka:

—Taitakuna, ¿manachu nuka nikurkani: “Kreta alpamanda mana llugsisunchi”? Chasaka, manami kasa llakiiwa kanchi. ²² Kunauraka, kasami niikichita: sinchi sungu iuiarisunchi. Kam kikinpuramanda ñi pipas mana wañungapa kangichichu. Kai barkullami puchukaringapa ka. ²³ Nuka, Taita Diospami kani. Paipa lutrinsinami kani. Chimandami sug anjil pai kachamuska, kunantuta kawariwarka. ²⁴ Kasami niwarka: “Mana manchakui. Iukangimi, Romapi iaia mandagpa ñawima chaiagringa. Kammandami tukui kamwa rinakuskatapas Taita Dios wañuita kispichingapa ka”. ²⁵ Chimandami nini: taitakuna, mana manchanakuichi. Taita Diosllawami nukaka suma iuiani. Paipa anjil imasa willawaskasina, chasami tukungapa ka.

²⁶ Iukanchimi, sug isla alpama imasapas chaiagringa.

²⁷ Ña chungas chusku puncha i tutakuna wairallawa apai tukunakuspaka, Adriático suti lamar iakupi ialina-

kurkanchi. Ña chaugpi tuta kangasinaura, barkuta pusanakugtaka rigcharkakunata, ña sug alpama chaianakugrigrisina. ²⁸ Tupudiru kachariuraka, sug chungu tupusinami jundu karka. Chimanda mailla karulla riskapika, ikuti tupudiru kacharirkakuna. Chipika, kanchis tupulla ña tukugsamurka. ²⁹ Iaku uku piñapi takaringapa manhaspa, barkuta saiachiduru chusku llasa irukunatami barku wasa ladu kacharirkakuna, saiachingapa. Chasa kacharispaka, askurintimi iuanakurka: “¡Amalai utka pakaripuantra!”

³⁰ Barkuta pusagkunaka, alpama mitikungapa iuiawa uchulla kanuata iakuma uraikuchii kallarirkakuna, kasa llullaspa:

—Barku ñugpa ladu saiachiduru irukunatami iakuma uraikuchingapa kanchi.

³¹ Pabloka, kapitanta suldadukunawanta kasami nirka:

—Kai nukanchita pusagkuna rigpikunaka, kamkunaka wañuita mana kispiringapa kangichichu.

³² Chasa niura suldadukunaka, chi uchulla kanuata chariraiaska waskakunata kuchuspa, urmachirkakuna.

³³ Pakarii suianakunkama, Pabloka tukuikunata nirka:

—Maillapas mikuichi. Ña chungu chusku punchami, suiaspa, mana mikuspalla kangichi. ³⁴ Chimandami niikichita: maillapas mikuichi; chasaka, mas wapulla tukungapa. Kam kikinkunapa umamanda ñi sug agcha mana kichui tukungapa kangichichu.

³⁵ Chasa nispaka, sug tanda apispa, tukuikunapa ñawipi “Pai Siñur” Taita Diusta nispaka, tandata chaugpispaka, mikuimi kallarirka. ³⁶ Chasa kawaspaka, tukuikunata alli iuiachigsamurkakunata. Chiura, paikunapas mikui kallarirkakuna. ³⁷ Chi barkupi, iska patsa kanchis chungu sugtakunami karkanchi. ³⁸ Ña sagsagta mikuspaka, triguta iakuma sitarkakuna, barkuta shamaiaichingapa.

Barku puchukariskamanda

³⁹ Ña pakariuraka, mana iacharirkakunata maikan alpama chaianakugrigta. Chi barkumanda sug suma plaiami kawarkanchi. Chasa kawaspaka, barkuta pusagkuna iuiarirkakuna: “Pudintranchipash, chi plaia ma barkuta chaiachigringapa”. ⁴⁰ Chasa iuiarispaka, barkuta saiachiduru irukunata kacharispaka, iaku ukuma urmachirkakuna. Barkuta kaima chima pusag palakuna wataraiaskakunata paskarkakuna, mana muruchulla ringapa. Ñugpa ladu purichiduru linsuta awama churarkakuna; chi linsuwaka, waira tangaspa, alpama chaiachigringapa. ⁴¹ Ña kailla rinakuskapika, iskandi ladu iaku jundu chaugpipika awalla ñutu alpa tiaskapi mi pambarigrirka. Chiura chi barku ñugpa ladu, pambarispaka, urai singa kasilla kidagsamurka. Ikuti kati ladutaka, iapa sinchi iaku piakugrispa, pakichiimi kallarirka.

⁴² Chasa tukugsamugmanda, suldadukunaka nirka-kuna:

—Kaipi prisu apanakuskata, tukuikunatami wañuchii chaiaku. Mana kagpika, iakupi waitaspami mitikungakuna.

⁴³ Ikuti paikunata kapitanka, Pablota kispichingapa iuiaspa, nirka:

—Chasa mana chaiachu—. Kasapasmi nirka— Waitangapa pudigkunaka, ñugpa iakuma saltaichi, tustama llugsingapa. ⁴⁴ Ikuti mana pudigkunaka, barkumanda pakiriska tablakunapi u imapipas wangu-rispa llugsiichi.

Chasapimi tukuikuna alpama kaugsa llugsirkanchi.

Malta alpapi, Pablo kaskamanda

28 Chasa kispirikauramanda, iachagsamurkanchi mi chi alpa, Malta suti kagta. ² Chi alpapi kaug-sagkunaka, tukui nukanchita iapa allillami chaskirkakuna. Tamiawa iapa chiri kagmanda, achka nina churaspami nukanchita kunungapa kaiarkakuna.

³ Pablo chamisa tandachispa, chi ninapi sitakuura, sug kanidur kulibraka, nina rupakusanigmamanda mitikukuspa, paipa makipimi saltaspa wangurirka. ⁴ Makipi chasa wanguriskata kawaspaka, chipi kaugsanakug kikinpura nirkakuna:

—Kai runaka, wañuchidurchar ka. Iakumanda kispigpipas, justisiag diusmi kawaku. Chimandami wañungapa ka.

⁵ Pabloka, chi kulibrata ninama chabsirispa sitarka. Ñi imapas mana paita tukurka. ⁶ Chipi kawanakugka, iuiaspa suianakurka: “Maki puingami; diulpillami wañuska urmanga”. Ña unai suianakuspaka, kawarkakuna ñi ima mana tukugta. Chiura, sug rigcha iuiarispa, nirkakuna:

—Kai, diuschar ka.

⁷ Mana iapa karullapi kaugsakurka chi alpata mandag, Publio suti. Chi runapa wasipi kimsa punchami iapa sumaglla karkanchi. ⁸ Chi mandagpa taita, iapa rupaiwa i iawar ialichiiwami sirikurka. Chasa iachaspaka, Pabloka ungugpagma rirka. Nispaka, Taita Diusta mañapuspa, umapi maki churaspa, aliachirka. ⁹ Chasa iachariura, chi alpapi kaugsanakug, tukui ungugkunata Pablopagma pusarkakuna, “Ambipuai” mañangapa. ¹⁰ Tukui ambirigkunaka, nukanchita sumagllami: “Pai Siñur” nirkakuna. Nukanchi ña chi alpamanda llugsinakuura, nukanchita tukui ima minis-tiskami kararkakuna.

Romama, Pablo riskamanda

¹¹ Kimsa killa ialiuuraka, nukanchita chaiarkami, sug barku Kástor i Pólux suti diuskunapa imajin tiaskapi iaikungapa. Chi barku, Alejandría puiblumanda chaiagrispa, tamia punchakuna kagmanda, chi Malta alpallapita chisiaska karka. ¹² Chi barkupi llugsispaka, Sirakusa suti patama chaiagrirkanchi. Chipika, kimsa punchami karkanchi. ¹³ Chimanda llugsispaka, alpa pata pata ialispa, Rejio sutima chaiagrirkanchi. Kaiandika, alli makinigmamanda suma waira chaiagsamurka. Chi wairawaka sug kaiandi Puteoli sutimami chaiagrirkanchi.

kanchi. ¹⁴ Chipika, Jesuswa tukuskakunawami kawana-kurkanchi. Paikunaka, nukanchita mañarkakuna:

—Kaillapi nukanchiwa chisiaichi sug kanchis puncha—. Chimanda, chakiwa Romama rirkanchi.

¹⁵ Romapi kaugsag Jesuswa tukuskakunaka, nukanchi chaianakugta iachaspa, Foro de Apio i Kimsa Tabirna sutikunama llugsirkakuna, nukanchita tupangapa. Chi runakunata kawaspa, Pabloka, Taita Diusta “Pai Siñur” nispa, alli iuiachiiwami tukugsamurka.

¹⁶ Nukanchi ña Romama chaiagriura, kapitanka Pablota sakirka, sug wasipi suldadu kawakungapa.

Romapi, Pablo kaskamanda

¹⁷ Kimsa puncha ialiura, Pabloka chipi judiukuna kaugsanakuskapura taitakunatami kaiarka. Paikuna ña tandariska kauraka, nirka:

—Taitakuna, nuka, nukanchipa runakunata ñi imapi jiru mana ruraska kanichu. Chasallata, nukanchipa ñugpamanda taitakuna imasa willaraiaskamanda sug rigcha ñi ima mana iachachiska kanichu. Chasa kagpipas, nukata Jerusalenpi karsilpi chariwaspa, Romamanda taitakunapa makimami Sesareama kachawarakuna. ¹⁸ Chi taitakunaka, nukata tukui tapuchiwaspa, mana tariwarkakunachu nuka ima jiru ruraska kagta, wañuchii tukungapa. Chimandami kachariwangapa munanakurka. ¹⁹ Judiukuna iapa juchachiwanakugmandami iukarkani mañanga: “Kachawai, Romapi iaia mandagpa ñawipi tapuchiwachukuna”. Chasa mañaspapas, nukapa waugki judiukunamanda kuntra mana imapipas rimangapa kanichu. ²⁰ Chimandami kaiarkai-kichita, kamkunawa kawanakuspa willangapa. Tukui Israelmanda runakunawa Taita Dios agllaska Cristota suiakugmandami nuka kaipi kasa kadinawa chariwanakú.

²¹ Chiuraka ainirkakuna:

—Nukanchi, Judea alpamanda ñi ima kartapi kammanda mana iacharkanchichu. Chasallata nukanchipura chaiamuspa, ñi maikanpas kammanda ñi ima mana allilla ruraskamanda mana willankunachu.

²² Ikuti kamsina chi Jesuswa iuiarigkunamandaka iacharikumi tukui kuntrasinalla rimanakugta. Chimandami munanchi, kam ima iuiakugta iachangapa.

²³ Chipika iuiarirkakuna, ima puncha tukuikuna tandariska rimanakungapa. Chi puncha chaiauraka, achka judiukuna Pablo kaskama tandarigrirkakuna. Chiura paika, tutatamandata kallarirka, chisiagta Taita Dios imasa sumaglla mandakuskamanda willangapa. Imasa Moisés niskawa i Santu Ispirituwa ñugpamanda rimagkuna willaskawa Jesusmanda iuiachikurka.

²⁴ Chipi uiagpura sugkunaka, Pablo ima rimakuskata suma uiagsamurkakuna. Ikuti sugkunaka mana munarkakuna. ²⁵ Chasaka, sugllasina mana iuiarispalla llugsirkakuna. Llugsinakuura, Pabloka kasami nirka:

—Isaías suti runawa Santu Ispíritu, kamkunapa ñugpamanda taitakunata allillami rimarka, ²⁶ kasa nispa:

Kai alpapi kaugsanakuskata nigrii:
“Rinriwa uiaspapas, mana uiagsinami tukunkangichi. Ñawiwa kawaspapas, mana kawagsinami tukunkangichi”.

²⁷ Kai runakunapa iuiai, iana tutapi kagsinami tukugsamurkakuna. Rinri tapariskasinami tukugsamurkakuna. Ñawi wichkaskasinami tukugsamurkakuna. Chasaka paikuna, mana ñawiwa kawagsina, mana rinriwa uiagsina, mana iuiai iukagsinami tukungapa kankuna. Mana munankuna, nukawa tigramungapa. Tigramugpika, nukami ambintranikunata.

²⁸ —Chimanda, kasa iachaichi: Taita Dios, mana judíu kagkunapagmami kacharka, pai imasa kispichingapa kaskamanda willangapa. Paikunami allilla uangapa kankuna.

²⁹ Pablo chasa niura, judiukunaka, kikipura iapa rimariska ainichirinakuspa, llugsirkakuna.

³⁰ Pabloka, iskai intiru watami pai pagakuska wasipi chisiarka. Tukui paipagma chaiagriskakunata sumami chaskikurka. ³¹ Taita Dios imasa sumaglla mandakuskamanda willaspa, Iaia Jesucristomanda iachachispa karka, mana manchaspalla. Pai ima iachachikuskata, ñi pi mana pudirkakunachu ningapa:

—Ama chasa rurakui.

ROMANOS

1 Nuka, Jesucristopa lutrinsinami kani. Taita Dios agllaska kachamuskami kani, paimanda Alli Willaita willaspa puringapa. ² Santu Ispirituwa rimagkunawami ñugpamanda librupi niska karka, chi Alli Willaita willagsamungapa. ³ Chi Alli Willaiwami ninchi, nukanchipa Iaiia Jesucristo, sutipa Taita Diospa wambra kagta. Pai Jesucristo runa tukuskapa, atun mandag Davidmi paipa ñugpamanda achala taita kapurka. Pai wañuskataka, Taita Dios kikinmi, Santu Ispirituwa iapa iachaiwa kaugsachispa, kawachirka paipa wambra kagta. ⁵ Taita Diosmi, Jesucristowa nukanchita iapa kuiaspa, agllaspa kacharka, Alli Willaita willaspa puringapa; chasaka tukui puiblu nira iaskakunamanda kaugsagkuna, paimanda uiaspa, paiwa suma iuiarispapa, pai ima niskata ruraspa kaugsangapa. ⁶ Kamkunapas chasallata agllaskakunami kangichi, Jesucristopa kangapa.

⁷ Romapi kaugsanakuskatami kai karta kachaikichita. Tukui kamkunata, Taita Dios iapa kuiaspa agllarkami, paimandalla kaugsangapa. Nukanchipa Taita Dios i Iaiia Jesucristo, kamkunata kuiaspa, suma iuiiwa kawa puachu.

San Pablo, Romama chaiagringapa munakuskamanda

⁸ Kamkuna Jesucristowa suma iuiarigkuna kaskamanda, tukui alpapimi iachari. Chimandami, tukui imanda ñugpa, tukui kamkunamanda nukapa Taita Diusta: "Pai Siñur" nini, Jesucristota iuiarispapa. ⁹ Taita Dios ima niskata nuka tukui iuiiwa ruraspa, paipa wambamanda Alli Willaita willagmi kani; paimi iachá, nuka kamkunamanda paita mana kungarispalla mañakugta. ¹⁰ Paitami tukui mañakuni, pai munagpika, nuka imasapas kamkunapagma chaiagringapa. ¹¹ Iapami munanakuikichita kawagringapa; chiwanka, Santu Ispirituwa imapas kamkunata karaspa, tukui allilla charingapakunata. ¹² Chasallata, nuka kamkunawa, Jesucristowa iuiagkuna kagmanda, parijuma sumaglla iuiachinakungapami kagringapa munakuni.

¹³ Taitakuna i mamakuna, nuka munanimi, kamkuna kasa iachangapa: achka biajimi nuka munakurkani, kamkunapagma chaiagringapa. Chasa munakuspapas, imamandachar arkarispa, kunankama manara pudiriwá ringapa. Kamkunawa kagrispa, munakunimi, achka runakuna manara Cristowa tukuskakunata tandachingapa, paimandalla kangapakuna; imasami sug alpapakunapi rurarkani: chasallata. ¹⁴ Chaiwakumi, tukui griegokunata i augkakunata Alli Willaita willagringapa. Chasallata iachagkunata i ñi ima mana

iachagkunatapas Alli Willaita willagringapami chaiawaku. ¹⁵ Chimandami munakuni, nukanchipa Taitiku chasa munagpika, kamkuna Romapi kaugsanakuskatapas Alli Willaita willagringapa.

Alli Willaita uiaspa suma iuiarigkuna kispiringapa pudiskamanda

¹⁶ Nukata ñi imapi mana manchawanchu, Alli Willaita willaspa puringapa. Tukui chita uiaspa suma iuiarigkunata, Taita Diosmi pudí kispichingapa. Ñugpa, judiukuna; nispaka, mana judíu kagkunapasmi pudinkuna kispichii tukunga. ¹⁷ Chi Alli Willaiipi kasami niraiá: chita uiagkuna, Cristowa suma iuiarispallami Taita Diospa ñawipi mana pandarig niraiankuna. Chasallatami ñugpamanda librupi willaraiá, kasa nispa:

Taita Diospa ñawipi alli
kawarig runaka,
paiwa suma iuiarispallami
kaugsanga.

Tukui runakuna, pandarig kaskakunamanda

¹⁸ Runakuna Taita Diusta mana manchaspalla, tukui jiru ruraspalla kaugsagkuna, sutipa Alli Willaita mana uiangapa munankunachu. Chi runakunawa Taita Dios, pai iapa rabiariispa kagtami suma luarmanda kawachimungapa ka. ¹⁹ Chi runakuna, Taita Diosmananda ima iachariskata allillami iachankuna. Taita Diosllatami paikunata kawachimurka. ²⁰ Taita Diusta mana kawasppapas, pai wiñachiskakunata kawasppami paimanda allilla iachankuna pai tiagta. Kai alpa tiaskauramandata, chi alpallawantami allilla kawachí, Taita Dios diltudupa tukui pudig tiagta. Chimandaka, paikuna mana ningapa pudinkunachu: "Nukanchi mana iacharkanchichu". ²¹ Taita Diosmananda chasa iachaspapas, mana paita nirkakunachu: "Kam, iapa suma atun Taita Diosmi kangí" u "Pai Siñur". Chasapaka, ianga iuiaikunallowami kankuna. Chiwanka, paikunapa iuiiuga mana iuiiugmi tukuska kankuna. Iana tutapisinami kaugsanakú. ²² "Nukanchi, iachami kanchi" nigpikunapas, paikuna upami tukuska kankuna. ²³ Taita Dios mana wañugta: "Kam, iapa suma atunmi kangí" ningataka, wañunga runakunasina rigcha ruraskatami iuiarispapa munanakú. Chasallata, piskukunasina, chusku chakiiugkunasina i kulibrakunasina rigcha ruraskakunatapasmi iuiarispalla kaugsanakú.

²⁴ Chimandami Taita Dios paikunata sakirka, imasa jiru iuiaskasina ruraspa kaugsangapa. Chasa sakii tukuspami, pai kikinpura tukui pingaipa ruranakuspa

kaugsanakú. ²⁵ Taita Diosmanda sutipa Alli Willaita uiangataka, llulla willaikunatami paikuna uianakú. Chasallata, Taita Dios wiñachigta kungurispas, pai ima niskata munangataka, pai wiñachiskakunatami iuiarispas munanakú. Pai Taita Diusta nukanchi nisunchi: “Kam, imaurapas iapa suma atunmi kangsi. Chasa kachu”.

²⁶ Chimandami Taita Dios paikunata sakirka, iapa pingaipa jiru iuiaikunata ruraspa kaugsangapakuna. Chasaka paikunapa warmikuna, kariwa kaugsanakuskata sakispa, kikin warmipura mana ruraridukunatami ruranakuspa kaugsanakú. ²⁷ Chasallata karikunapas, warmiwa kaugsanakuskata sakispa, askurintimi munanakú, kikin karipura mana ruraridukunata ruranakungapa. Karipuralla pingaiachig ruraridukunatami ruranakuspa kaugsanakú. Chasa pandarigkuna, pai kikinkunapa kuirpupimi llakii nanai iukangapa kankuna.

²⁸ Paikuna mana Taita Diusta rigsingapa munaskamandami pai Taita Dios sakirka, paikuna jirulla iuiangapa; chasaka, mana chaiaskakunata ruraspa kaugsangapakuna. ²⁹ Paikuna, chasa tukui sug rigcha sug rigcha jiru iuiaikunawa junda kaspas, jirumi tukui rurankuna. Kikinmandallami sugkunapata munarinkuna. Tukui jiru rurangapa iuiaspallami purinakú. Sugkunata jiru iuiaspallami kawankuna. Wañuchinkunami. Piñachirinakuspallami rimanakú. Llullachinkunami. Sugkunamanda wasami rimankuna. ³⁰ Sugkunamanda iangami juchachinkuna. Taita Diusta mana munankunachu. Ainirinkunami. Atun tukuspa, nirinkunami: “Nuka, sugkunamanda masmi kani”. Maskankunami, imasa sug rigcha jirupas rurangapa. Paikunapa taitata i mamata mana uiankunachu. ³¹ Mana munankunachu alli iui ai pingapa. Paikuna rurangapa niskata mana rurankunachu. Mana pitapas kuiankunachu. Mana pitapas pasinsiankunachu. Ñi mailla mana pimandapas llakinkunachu. ³² Chasa jiru ruragkunatami Taita Dios niska ka: paikunata wañungapami chaiá. Taita Dios chasa niskata iachaspapas, mana sakinkunachu, chasakunata rurangapa. Sugkunapas chasallata jiru ruranakuskata paikuna kawaspa, alli iuiachiwami tukunkunata.

Taita Dios sutipa kaskata justisiag kaskamanda

2 Chimandami kam, pi kaspapas, mana sug runakunata ningapa chaiá: “Jiru ruragmi kangsi”. Kasa iuiarii: kam kikinpas, chi runakuna ruranakuskasinallatata ruragmi kangsi. Chimanda, paikunata chasa nispa kagpi, kam kikinta Taita Diosmi justisianga. ² Iachanchimi, Taita Dios chasa jiru ruranakuskata diltudupa ninama sitaura, imasa sutipa kaskata justisiai ruradur kagta. ³ Chimanda kampas sugkunata: “Jiru ruragmi kangsi” nispa, kam kikin chasallata rurag kaspapas, ¿imasatak iuiakungsi, Taita Dios mana kamtapas diltudupa ninama sitangapa kagta? ⁴ Taita Dios iapa suma kuiaspa, mana utkalla piñarig kagmanda, chasataka, ¿manachu munakungsi? ¿Manachu iachangsi, Taita Dios chasa kamta kuiaspa kaiakugta, kam jiru ruraiku-

nata sakispa, paiwa tukugsamungapa? ⁵ Chasa kaiakugpipas, kamba iui ai muruchu rumisina kaspas, mana paiwa tukungapa munangsi. Chimanda, Taita Diusta rabiachiskata pai rabiariaspas, alli justisiangapa kawachirig puncha chaiaurapa wakachirigsinami rurakungsi. ⁶ Chiurami Taita Dios, tukui kunata imasa ruraskasina allilla u mana allilla kaskata kawachingapa ka. ⁷ Maikanpas alli ruraikunata mana sakispalla, suma puncha luarpi diltudupa kagringapa maskagkunataka: “Allimi kangsi” nispa, mana puchukariduru suma kaugsaitami karangapa ka. ⁸ Ikuti maikanpas kikinmandalla iuiarispas, sutipa willaskata mana uiaspa, jiru ruragkunawaka askurinti iapa rabiariaspami kangapa ka. ⁹ Tukui jiru ruragkunapa almakunaka, iapa llakispas irkimi kangapa kankuna. Ñugpa, judiukuna; nispa, mana judiu kagkunapasmi chasallata llakispas kangapa kankuna. ¹⁰ Ikuti tukui allilla ruragkunataka: “Allimi kangsi” nispa, karangapami ka, suma puncha luarpi sumaglla kaugsagringapa. Ñugpa judiukunata; nispa, mana judiu kagkunatapasmi chasallata karangapa ka.

¹¹ Taita Diospa ñawipi, ñi pipas mana tianchu sug rigcha. ¹² Chimanda, Moisés ima rurangapa willaskata mana iachaspalla jiru ruragkunaka, Moisés willaskapi ima niraiaskamanda mana justisiai tukuspami puchukaringapa kankuna. Moisés willaskata iachaspapas, jiru ruragkunaka, Moisés willaskapi ima niraiaskamanda justisiai tukuspami chasallata diltudupa ninama sitai tukungapa kankuna. ¹³ Moisés ima willaskata uiaspapas mana ruragta, Taita Dios mana ningapa kanchu: “Kam, mana pandarigmi kangsi”. Moisés willaskata uiaspa allilla ruragkunami allillapi kankuna. ¹⁴ Mana judiu kagkunaka, Moisés willaskata mana iachaspapas, Moisés imasa willaskasina paikunapa suma iuiailawa allilla ruraspa kagpikunaka, paikunapa alli iui ai Moisés willaskasina allilla tukugsamú. ¹⁵ Paikuna, allilla ruraskawami kawachinkuna, Moisés imasa willaskasina paikunapa iui ai charinakugta. Pai kikinkunapa alli iui ailatami chita kawachí. Chiwanka, paikunapa iui ai illawa kawarispami willaringapa kankuna, allilla u mana allilla ruraspa kaugsagtakuna. ¹⁶ Tukui runakuna imapas pakalla iui askata i ruraskata, Taita Diosmi Jesucristowa kawachingapa ka; chiurami willaringapa kankuna. Chasallatami nuka willaska Alli Willaipi niraiá.

Judiukuna, Moisés ima willaskata mana ruraskamanda

¹⁷ Maikan kampura nichu: “Judiumi kani; Moisés ima rurangapa willaskatami iui arini”. “Taita Diospallami kani” iui arispas, atunmi tukungsi. ¹⁸ Taita Dios ima munaskata allillami iachangsi. Moisés willaskata iachaikuspa, iachangimi allilla ruraita agllangapa. ¹⁹ Kasapasmi iui arikungsi: “Nawiwa mana kawagsinakunata, nukami allilla pusag kani. Iana tutasinapi kaugsagkunapa iui aikunata punchaiachigsinami kami. ²⁰ Moisés willaskata iukaspa, Taita Diosmanda sutipa kaskatapasmi iachani. Chasaka, mana iui ai iugkunata iui achigmi kani. Wambrasinakunata iachachigpasmi kani”.

²¹ Kam chasa: "Sugkunata iachachigmi kani" iuiarispa-ka, ¿imapatak kam kikin mana allilla iuiaringi? "Mana sisakungi" nikuspaka, kam kikin, ¿imapatak sisangi? ²² "Mana sugpa warmiwa siriringi" nikuspaka, ¿imapatak kam kikin, sugpa warmiwa siriringi? Ianga diuskunata mana munaspaka, ¿imapatak kam kikin, chi diuskunata iuiariduru wasikunapi ima tiaskata sisagsina rurakungi? ²³ Moisés willaskata iukaskawa atun tukuspaka, ¿imapatak chipi ima niraiaskata wabutispa, Taita Diusta kamigsina jiru rurakungi? ²⁴ Chasallatami ñugpamanda librupi willaraiá, kasa nispa:

Kam judiukunamandami
mana judíu kagkuna Taita Diusta kamispa kankuna.
²⁵ Moisés tukui ima niskata kam ruragpika, judiukunapa marka kamba kuirpupi churaraiaskaka allillami ka. Ikuti Moisés niskata kam mana ruragpika, chi marka mana churaskasinami niraiangapa ka.
²⁶ Chimanda maikanpas chi marka mana churaska kagka, Moisés imasa niskasina allilla rurakugpika, ¿manachu chi marka churaraiaskasina niraiagsamú?
²⁷ Maikan chi marka kuirpupi mana churaska kaspapas, Moisés imasa niskasina allilla ruragka, paimi kawachingapa ka, kam jiru rurag kagta. Kam, chi marka churaraiaska kaspas, Moisés niskata iachaspapas, mana allilla ruragmi kangi. ²⁸ Sugkunapa kawailapi all iuiag kagta kawarigka, mana alli judíu niraianchu. Chasallata, judiukunapa marka kuirpupi churaraiag, chillawa mana niraianchu, sutipa judíu kagta. ²⁹ Paipa suma alli iuiasikawami alli judíu niraiá. Chasallata, tukui jiru iuiakunata anchuchirig, chimi judiukunapa marka iukagsina niraiá. Chi marka mana niraianchu Moisés imasa willaskasina ruraskawa. Santu Ispirituwami chasa marka churagsina niraiá. Chasa niraiagkunata, kai alpamanda runakunaka mana ningapa kanchu: "Allimi kangi". Taita Diosmi: "Allimi kangi" ningapa ka.

3 Chasa niraiagpika, judíu kagpika, ¿imapitak alli ningapa niraiá? Chasallata judiukunapa marka churaska kagpika, ¿imapitak mas allilla kapunga? ² Achkapimi mas allilla kapunga. Kaiwami kallarirka: Taita Dios, pai iuiachikuskasina rimaitami judiukunata mingagsamurka. ³ Sug judiukuna paipa rimaita mana uiangapa munagpikunaka, chika, ¿imatak niraiá? ¿Niraianchu, Taita Dios kikin, pai ima rurangapa niskata sakingapa kagta? ⁴ Chikar, ñi imapas manima. Tukui runakuna llulla kagpipas, Taita Dioska, imaurapas pai rurangapa niskata sutipami rurangapa ka. Chasallatami ñugpamanda librupi willaraiá, kasa Taita Diusta nispa:

Kam ima niskakunata rurag kagmanda, niikimi: "Kam, allimi kangi".
Chasallata, kam tukui ima ruraskata kawariskaka, tukuipi allillami kapungapa kangi.
⁵ Kunauraka, runakunapa iuiaiwami rimani. Sugka nichu: "Nukanchi mana allilla ruraskakunamandami Taita Dios alli justisiag kagta kawachirí; chika, ¿imatak niraiá? ¿Niraianchu, Taita Dios, nukanchiwa rabiarispa, pandarikugta?". ⁶ Ñi imapipas manima. Taita Dios kikin

pandarii iukagpika, ¿imasatak pudintra, kai alpapi, kaugsagkunata allilla justisiangapa?

⁷ Kasapas iuiarispa nichu: "Nukapa llullai balintra, Taita Dios mana llulla kagta mas suma iacharingapa. Chasakuna baligpika, ¿imawantak niwangapa ka, nuka pandariska kagta? ⁸ Chasapaka, nukanchi jiru ruraspalla kaugsanakusunchi. Chasapika, paimanda tukui allillami tukugsamungapa ka". Chasallatami sugkuna, nukanchi iachachinakuskata juchachispa kankuna. Paikunatami chaiaku, diltudupa ninama sitangapa.

Tukuikuna, pandarig kaskamanda

⁹ Chasa kagpika, nukanchi judiukuna, ¿sugkunamanda mas allichu kanchi? Ñi imapas manima. Ñami nirkaikichita, judíu i mana judíu kagkuna, tukuikunami pandariwa wataskasina kankuna. ¹⁰ Chasallatami ñugpamanda librupi willaraiá, kasa nispa:

Mana pandarig,
ñi sug mana tianchu.
¹¹ Taita Dios ima niskata,
ñi pipas mana iuiarig tianchu.
Taita Diusta maskagpas,
ñi sug mana tianchu.
¹² Tukuikunami, Taita Dios ima niskata sakispa,
sug rigcha ianga iuiaita katirkakuna.
Allilla ruragka, mana tianchu ñi sugllapas.
¹³ Paikunapa simi kanmi wañuskata pambadiru paskaraiaskasina.
Chi ukuma wañuska ismuska asnarikugsinami ka.
Paikunapa kalluwami llullankuna.
Paikunapa simiwa jiru rimaska, kulibra kanigsinami rurankuna.
¹⁴ Paikuna ima rimaskapipas,
jiru millaillawami kaminkuna.
¹⁵ Paikunapa chakiwa kalpankunami, wañuchispa, iawar kawangapaglla.
¹⁶ Paikuna maipi puriskapipas,
tukuita llakichispa,
puchukaspami purinkuna.
¹⁷ Mana iachankunachu, imasa sumaglla kaugsangapa.
¹⁸ Mana imaurapas iuiarinkunachu, Taita Diusta manchangapa.
¹⁹ Kasami iachanchi: Moisés tukui ima niskapi, chi niskawa wataskasina kagkunata ima rurangapa willaraiá; chasaka tukui kai alpapi kaugsagkuna, Taita Diospa ñawipi upalla kaspas, paikuna jiru ruranakuskata kawachii tukungapa. ²⁰ Moisés niskata uiaspa ruraskakunallowaka, mana pandarig, ñi pipas mana niraiangapa kanchichu. Moisés niskawami iachagsamunchi, nukanchi pandarig kagtakuna.

Cristowa suma iuiarispa, mana pandarig niraiaskamanda

²¹ Kunauraka, Moisés ima rurangapa willaskata sakispa, Taita Dios iachachinmi, imasa nukanchi mana pandarig niraiangapa. Moisés i Santu Ispirituwa

rimagkunapas, chasallatami ñugpata willaska karka. ²² Jesucristowa suma iuiarispami Taita Diospa ñawipi mana pandarig niraianchi. Maimanda runakunapas, tukui paiwa iuiarigkunami mana pandarig niraianchi. ²³ Tukuikunami pandarinchi. Chimandaka, Taita Dios atun sumaiachiskamanda iapa karupisinami karkanchi. ²⁴ Pai Taita Dioska, tukuikunata suma kuiaspa, Jesucristowami kispichí, nukanchi paita ñi ima mana karagpipas; chasaka nukanchi, mana pandarigkuna niraiangapa. ²⁵ Chasapika, Taita Dios nirka, Jesucristo wañuchii tukuspa, paipa iawar ichariskawa nukanchipa pandariikunata anchuchingapa. Paiwa suma iuiarigmandami pasinsiai tukurkanchi. Ñugpamanda maituku pandarii ruragpikunapas, Taita Dios, nukanchimanda iapami llakii iukarka. Chasawami tukui chi pandariikunata kungarirka. Chasaka, Jesucristo wañuskawami kawachirka, pai imapipas imasa chaiaskasina allilla rurakugta. ²⁶ Kunaura kaugsagkunatapasmi kawachí, pai imapipas imasa chaiaskasina allilla rurakugta. Paillatami nukanchita ni: "Jesusa suma iuiarispami mana pandarig niraiangichi".

²⁷ Chasa kagpika, ¿pudinchichu, Taita Diospa ñawipi atun tukungapa? Mana pudinchichu. ¿Imamanda? ¿Moisés ima niskata ruraskamanda? Manima. Jesusa suma iuiarispami mana pudinchi, Taita Diospa ñawipi atun tukungapa. ²⁸ Chasamandami ninchi: maikanpas Jesucristowa suma iuiarispami mana pandarig niraianchi, Moisés ima niskata mana ruragpipas.

²⁹ Taita Dioska, ¿judiukunapallachu ka? ¿Manachu ka mana judíu kagkunapa Diospasmi ka. ³⁰ Taita Dios, sugllami tia. Paimi ka judiukunapa marka i mana marka churaskakunatapas nig: "Jesusa suma iuiarispami mana pandarig niraiangichi". ³¹ Chasa suma iuiarigpikunaka, Moisés ima rurangapa willaska, ¿iangachu tukugsamú? Ñi imapas manima. Chasapaka, ninchimi: "Masmi Moisés willaska, allilla ka".

Ñugpamanda taita Abraham, Taita Dioswa suma iuiariskamanda

4 Chasa kagpika, ¿imasatak niipa, nukanchipa ñugpamanda achala taita Abraham mana pandarig niraiagta? ² Abraham paipa allilla ruraikunallawa mana pandarig niraiagpika, pai pudirkami, "Runapuramanda tukuipa mas allimi kani" iuiaringa; ikuti Taita Diospa ñawipika, chasaka manima. ³ Ñugpamanda librupi, kasami Abrahammanda willaraiá:

Abrahamka, Taita Dios ima niskata iuiarispami karka: "Chasami tukunga".

Chimandami pai mana pandarig niraiá. ⁴ Maikanpas ima ruraskamanda kulki chaskigpika, mana niraianchu kuiaspalla karaska. Paita chaiaskata chaskiskami niraiá. ⁵ Ikuti maikanpas, ñi ima mana ruraspapas, Taita Dios pandarigkunata chaskigwa suma iuiarichu: chasa iuiarigmandami pai mana pandarigsina niraiá. ⁶ Ñugpamanda achala taita Davidmi pandariska runamanda nirka: "Taita Dios paita: 'Mana pandarigmi niraiapuangi' nigpika, iapa alli iuiachiiwami kanga". Kasami nirka:

⁷ Jiru ruraskakunata pasinsiai tukuspa, pandariikunata anchuchiskakunaka, iapa alli iuiachiiwami tukunkunata.

⁸ Maikan runa pandariskamanda, atun Taita Dios mana imapas nispa sakigpika, iapa alli iuiachiiwami kangapa ka.

⁹ ¿Judiukunapa marka churaskakunallatachu chasamanda alli iuiachiiwa tukungakunata? ¿Chi marka manara churaskakunatapaschu chasallata alli iuiachiiwa tukungakunata? Ñami ninchi: "Abraham Taita Dioswa suma iuiariillawa kagmandami pai mana pandarig niraiá". ¹⁰ ¿Imauratak paita nirka, mana pandarig niraiagta? ¿Judiukunapa marka ña churaska u manara churaska kaurachu chasa nirka? Churaska kaura, manima; manara churaska kagpitami chasa nirka. ¹¹ Chasa niskauramandami Abraham judiukunapa marka churachirirka. Chi markawa kawachirirkami, Taita Dioswa suma iuiariillawa kagmanda, pai mana pandarig niraiaska kagta. Chimandami Abraham, Taita Dioswa suma iuiarigmanda, tukui paikunapa ñugpamanda achala taita niraiá, judiukunapa marka mana churaska kagpipas; chasaka paikunapas, mana pandarig niraiangapa. ¹² Judiukunapa marka churaska kagkunapa ñugpamanda achala taitapasmi niraiá. Imasami Abraham, manara judiukunapa marka churachirirka, Taita Dioswa suma iuiariska kaugsakurka: chasallatami paikunatapas kaugsangapa chaiá.

Taita Dios karangapa niskata, Abraham suiakuskamanda

¹³ Taita Dios, Abrahamta nirka: "Kamba wambrapa wambrakunapa kati wambrakunatami kai alpata karangapa kani". Mana chasa nirkachu, Moisés ima niskata Abraham ruraskamanda. Taita Dioswa suma iuiariillawa kagmandami chasa nirka. Chasa iuiariskamandami paita nirka, mana pandarig niraiagta.

¹⁴ Moisés niskallata ruraspa, Taita Dios niskata chaskingapa kagpika, iangami Taita Dioswa suma iuiarintranchi. Taita Dios niskapas, iangami tukuntra.

¹⁵ Moisés niskata iachaspapas mana ruragkunawa, Taita Dios iapami rabiarí. Ikuti Moisés niskata mana iachagkunaka, chi niskamanda mana pandariska niraianchu.

¹⁶ Chimanda, Abraham Taita Dioswa suma iuiariskamandami pai Taita Dios nirka, chasa karangapa, Chasaka, Abrahampa wambrapa wambrakunapa tukui kati wambrakunata, Taita Dios, suma kuiaspa, sutipami ima niskataka karangapa kankunata. Chika mana niraianchu, Moisés niskata ruragkunamandalla. Maikanpas Abrahamsina Taita Dioswa suma iuiarigkunamandapasmi niraiá.; Paimi tukui nukanchipa ñugpamanda achala taita ka. ¹⁷ Chasallatami ñugpamanda librupi willaraiá, Abrahamta kasa nispa: "Achka alpaku-napi kaugsagkunapa iaia taita tukungapami agllarkai-ki". Taita Dios chasa niskatami Abraham suma iuiarirka. Taita Diosllatami ka wañuskakunata kaugsachig i ñi ima mana tiaskakunatapas wiñachig.

¹⁸ Chasa Taita Dius, Abrahamta niska karka: “Kamta agllarkaikimi, achka alpakunapi kaugsagkunapa iaia taita tukungapa” i “Kamba wambrapa wambrapa kati wambrakuna, iapa achkakunami tukugsamungapa kankuna”. Chasa, Taita Dius niska mana tukungasina kagpipas, Abrahamka suma iuiaspallami suiakurka. ¹⁹ Pai ñalla patsa wata iukaspa, ñi sug wambra mana iukaska karkakuna. Chasallata paipa warmi, chusami karka. Chasa kagpipas, Taita Dius ima niskata iuiaspallami Abraham suiakurka. ²⁰ “Taita Dius ima niskata mana chasa tukugsamungachu” iuiaringataka, paiwa mas sumami iuiarispa suiakurka. “Kam, iapa suma atunmi kangii” nispami iuiarikurka. ²¹ Pai, iuiariillapimi iuiakurka: “Imasami Taita Dius rimarka: chita tukuimi chasa tukugsamungapa ka”. ²² Chasa iuiariillawa kagmandami Taita Dius paita nirka: “Mana pandarigmi niraiangi”.

²³ Chasa willaraiaskaka mana niraiianchu Abrahammandalla. ²⁴ Nukanchimandapasmi chasa willaraiá. Taita Dius nukanchipa Iaia Jesucristo wañuskata kaugsachigwa suma iuiarigkunatapasmii ningapa ka: “Mana pandarigkunami niraiangichi”. ²⁵ Nukanchipa pandariikunamandami Jesucristo wañuchii tukurka. Nukanchi mana pandarig niraiangapami pai, wañuspa, kaugsarirka.

Mana pandarig niraiaspaka, ima chaskiskamanda

5 Nukanchi Iaia Jesucristowa suma iuiariskapi mana pandarig niraiaspaka, paimandami Taita Diuswa pasinsiachinakuska niraiianchi. ² Paiwa suma iuiariskapimi pai kikinwa Taita Diuspa suma kuiaita chaskigsamurkanchi. Taita Dius nukanchita kuiaskawami allilla iuiarispa kanchi. Nukanchi paiwa suma puncha luarpi kagringapami suianakunchi. Chasa suianakuspaka, alli iuiachiiwami kanchi.

³ Kasapas. Ima llakiikuna chaiagpipas, alli iuiachiiwami kanchi. Kasami iachanchi: chi llakiikunawaka iachachigta imapipas mana sambaiaspalla kaugsangapa. ⁴ Mana sambaiaspalla kaugsanakuskataka, Taita Dius ningami: “Allillami kaugsakungi”. Taita Dius chasa nukanchita nigpika, iapa suma iuiaiwami suianakusunchi. ⁵ Chasa iuiaiwaka mana ianga suianakusunchichu. Santu Ispiritutami Taita Dius nukanchita karamurka. Santu Ispirituwami iachanchi, Taita Dius nukanchita iapa kuiag kagta.

⁶ Nukanchi imasapipas mana kispirii pudinakugmandami, Taita Dius kikin agllaska puncha chaiaura, Cristo pandarigkunamanda wañugsamurka. ⁷ Maikan alli runamanda, maikanpas manachar wañuntra. Maikan iapa alli runamanda tiantrami maikan paimanda wañungapa. ⁸ Ikuti nukanchi ñi imapi mana alli runakuna kagmandami Cristo wañugsamurka. Chasapimi Taita Dius kawachigsamurka, imasa nukanchita sutipa iapa kuiagta.

⁹ Chasa Cristo wañuskamandami kunaura mana pandarig niraiianchi. Chasa kagmandami Cristollatata, tukurii puncha Taita Dius rabiakuskata nukanchita kispichigsamungapa ka. ¹⁰ Nukanchi manara Taita

Diusta munag kaurami nukanchiwa i pai kikinwa pasinsiachigsamurka, paipa wambra wañuskamanda. Chasa pasinsiachinakui tukuskamanda, Cristopa kaugsaiwami tukurii puncha nukanchita kispichingapa ka.

¹¹ Kasapas. Iaia Jesucristowa nukanchi ña pasinsiachinakui tukuspa, paillawantami Taita Diuswa alli iuiachiiwa kanchi.

Adanmanda i Cristomandu

¹² Suglla runamandami kai alpapi pandariikuna tukugsamurka. Pai pandariskamandaka, wañuipasmi chaiagsamurka. Chasallatami tukuikuna pandarirkakuna. Chimandami tukui runakunata wañui chaiarka.

¹³ Moisés ima rurangapa willaska manara tiagpitami ña kai alpapi pandariikuna tiarka. Chasa pandarigpikunapas, manara Moisés willaska tiagmanda, Taita Dius chi pandariskakunata mana justisiangapa iuiarkachu.

¹⁴ Mana iuiachigpipas, Adán pandariskauramandata Moisés kaugsankama, tukui pandarigkunami wañurkakuna. Adán, Taita Dius ima niskata mana uiarkachu. Sugkunaka, sug rigcha pandariikuna ruraspami wañurkakuna.

Adanta kawaspaka, niraiarkami katima sug runa samungapa kagta. ¹⁵ Chasa niraiagpipas, Adán pandariskawa i Taita Dius nukanchita karamuskawaka manima alli kanchu imasa ninga. ¹⁶ Ari, suglla runa pandariskawa i Taita Dius karamuskawa manima alli kanchu imasa ninga. Chasa, Adán suglla pandarii ruraskamandami Taita Dius, justisiai ruraspa, wañuita kachamurka. Ikuti Taita Dius nukanchita kispichigta kachamurka; paiwaka, nukanchi achka pandariikuna ruraspapas, mana pandarig niraiangapa. ¹⁷ Suglla runa pandariskamandami wañui chaiamurka, tukui runakunata mandagsina kangapa. Ikuti Taita Diuska, nukanchita iapa kuiaspami pasinsia, mana pandarig niraiangapa. Tukui chasa niraiagkunaka, suglla Jesucristomanda paiwa mandangapami kaugsagringapa kanchi.

¹⁸ Chasamanda, imasami, suglla runa pandarii ruraskamanda, tukui runakunata wañui chaiarka: chasallata, suglla mana pandarig runa wañuskamanda, tukui paiwa iuiarigkuna, mana pandarig niraiaspa, kaugsagringapakuna. ¹⁹ Imasami, suglla runa Taita Dius niskata mana ruraskamanda, tukui runakuna pandarig niraiagsamurkakuna: chasallata, suglla runa Taita Dius niskata allilla ruraskamandami achka runakuna mana pandarig niraiangapa kankuna.

²⁰ Moisés ima rurangapa willaskaka tukugsamurkami, maikan pandariikuna kagta iacharingapa. Pandariikuna maituku achka tiagpipas, Taita Diuska paipa suma kuiaitami mas allipa kawachirka. ²¹ Imasami runakuna, pandariikunawa mandai tukunkuna wañunkama: chasallatami Taita Diuspa suma kuiaiwa mandai tukunkuna; chasawaka, mana pandarig niraiaspa, nukanchipa Iaia Jesucristowa mana puchukaridiru suma kaugsaita iukangapa.

**Pandaringapa wañuskasina kaspaka, Cristowa
kaugsariskamanda**

6 Chasa kagpika, ¿kasachu nisunchi: “Pandariilla apasunchi; chasaka, Taita Diospa suma kuaiaita mas nukanchita kawachingapa?”² Ñi imapas manima. Mana mas pandaringapa wañuskasinami kanchi. Chasa kaspaka, mana iukanchichu, ikuti pandarispakaugsanakunga.³ Tukui baugtisai tukuskakuna, Jesucristowa tukuspa, paiwa wañuskasinami niraianchi. Chita, ¿manachu iachangichi?⁴ Chimanda, nukanchi baugtisai tukuspa, paiwa pambai tukuskasinami niraianchi, sugllapi wañuskasina niraiangapa. Chasaka, imasami Taita Diospa iapa suma iachaiwa Cristo wañuskata kaugsachirka: chasallata nukanchipas, musu kaugsaita iukaspa, kaugsasunchi.

⁵ Nukanchi Cristowa sugllapi wañuskasina niraiaspaka, paisinallatatami kaugsarisunchi, paiwa sugllapi kagringapa. ⁶ Kasami iachanchi: nukanchi ñugpa kaugsaska, Cristowa kruspi klabaskasinami niraiarkanchi; chiwanka, nukanchipa pandaringapa iuiaikuna puchukarispaka, pandariwa mana wataraiaskasina kaugsangapa. ⁷ Maikan pandariikunamanda wañuskasina kagpika, wataraiaskamanda kachariskasinami tukú. ⁸ Nukanchi Cristowa sugllapi wañuskasina niraiaspaka, kasami iuiarinchi: kaugsarispaka, paiwa sugllapi kagringapa. ⁹ Kasapasmi iachanchi: Cristo, wañuska kaugsarispaka, mana imaurapas ikuti wañungapa kagta. Wañui, mana ikuti paita chaiyai pudingapa kanchu. ¹⁰ Tukuikunapa pandariikunamandami Cristo sug biajilla wañurka. Kaugsariskauramandaka, Taita Diosmandallami kaugsaku.

¹¹ Chasamanda kamkunapas, mana mas pandaringapa wañuskasina tukungichi. Jesucristowa iuiarispaka, Taita Diosmandalla kaugsangichi.

¹² Chimanda, kamkunapa ismunga kuirpupi pandariikuna mandagsina mana tiachu. Chasa tiagpika, imasa jiru iuiaskasina ruragkunami tukunrangichi. ¹³ Chasalata, kamkunapa kuirpupi ima iukaskawa mana sakiriichi; chikunawaka, jiru rurangapa. Chasapaka, wañuspa, kaugsariskasina niraiaspaka, Taita Diospa lutrinsina tukuichi. Kamkunapa kuirpupi ima iukaskakunatapas paita iukachiriichi; chikunawaka, tukuipi allilla rurangapa. ¹⁴ Chasaka pandariikuna, kamkunapa kuirpupi mana mandagsina tiangachu. Moisés ima rurangapa willaskawa mana wataskasina kangichichu. Taita Diospa suma kuaipimi wataraiaskasina kangichi.

**Taita Dios ima niskata rurangapa, paipa lutrinsina
tukusunchi**

¹⁵ Chasa kaspaka, ¿kasachu nisunchi: “Moisés niskawa ña mana wataskasinami kanchi. Taita Diospa suma kuaipimi wataraiaskasinami kanchi. ¿Chimandachu pandarisunchi?” Ñi imapas manima. ¹⁶ ¿Manachu kasa iachangichi? Maikan, patrunpa lutrin tukuspa, iukanmi pai ima niskata ruranga. Pandariikunawa wataskasina tukugpika, paita wañuimi chaianga. Ikuti

Taita Dios ima niskata rurangapa paipa lutrinsina tukugpika, allilla ruraspami kaugsanga. ¹⁷ Kasamandami Taita Diusta: “Pai Siñur” nipiukichita: kamkuna, pandariikunawa wataskasina kaspapas, kunaauraka Cristomanda iachachiskata uiaspa, tukui iuiaiwami pai ima niskata ruraspakaugsanakungichi. ¹⁸ Pandariikunawa wataraiaskamanda kachariskasina tukuspaka, Taita Diospa lutrinsinami tukurkangichi, allilla ruraspakaugsangapakuna. ¹⁹ (Kamkuna, nuka iachachikuskata manara allilla iuiai apingichichu. Chimandami runakuna uiangasina rimaspaka iachachinakuikichita.) Ñugpata, kamkunapa kuirpupi ima iukaskawami sakirirkangichi, wataskasina, jiru mana chaia ruraspakaugsangapa. Kunaauraka chasallata, kamkunapa kuirpupi ima iukaskata Taita Diusta iukachiriichi; chikunawaka, allilla ruraspaka, paimandalla sumaglla kaugsangapa.

²⁰ Kamkuna pandariikunawa wataskasina kaugsanakuspaka, Taita Diospa lutrinsina mana karkangichichu, imapipas allilla ruraspakaugsangapa. ²¹ Chi jiru ruraskamanda, ¿imatak chaskirkangichi? Chasa ruraskakunamandaka, kunaura kamkunata iapa pingaipami iuiachiku. Chasa ruragkunaka, wañuillami chaskinkuna. ²² Ikuti kunaauraka, pandariikunawa wataraiaskamanda kachariskasina tukuspa, Taita Diospa lutrinsinami tukurkangichi. Chasa, paipalla kaspaka, mana puchukariduru suma kaugsaitami chaskigringapa kangichi. ²³ Pandarispaka ruragka, wañuitami chaskí. Ikuti Taita Dioska, nukanchipa Iai Jesucristowa mana puchukariduru suma kaugsaitami kará.

**Moisés ima rurangapa willaskamanda kachariskasina
tukuskamanda**

7 Kam taitakuna i mamakuna, Moisés ima rurangapa willaskata allillami iachangichi. ¿Manachu kaspapas iachangichi? Maikanpas chi willaskawa mandai tukugka, kaugsankamallami chita rurá. ² Kusaiug warmika, kusa kaugsankamami imasa Moisés niskasina iuká, kusawa wataskasina kanga. Ikuti kusa wañugpika, Moisés niskata wataraiaskasina kaskamanda kachariskasinami tukú. ³ Kusa chara kaugsakugpita, chi warmi sug kariwa sugllapi kaugsagrípika, iapa atun pandariimi rurá. Ikuti kusa wañugpika, Moisés niskata wataraiaskasina kaskamanda kachariskasina mi tukú. Nispaka, sug kariwa kasaragpika, ñi ima pandarii mana niraianchu.

⁴ Chasalata, nukapa kuiaska taitakuna i mamakuna, Cristo wañuskamanda, kamkunapas, wañuskasina niraiaspaka, Moisés ima rurangapa willaskamanda kachariskasinami kangichi; chasaka, sug kusa niraiagsina Cristowa tukungapakuna. Cristo wañuspa kaugsarigwami kunaura tukunchi; chasaka, Taita Diosmandaka tukuipi allilla ruraspakaugsangapa.

⁵ Nukanchipa kuirpupi iuiailawa ruraspakaugsanakuspaka, Moisés ima rurangapa willaskawami iuiachii tukurkanchi, nukanchi imasa munaskasina pandarispakaugsangapa. Chasa kaugsaspaka, Taita Diospa ñawipi wañuskami niraiarkanchi. ⁶ Ikuti kunaauraka, Cristowa wañuska niraiagsamuspa, Moisés ima

rurangapa willaskamanda kachariskasinami tukurkanchi; chasaka, Taita Diospa lutrinsina allilla ruraspa kaugsangapa. Ñugpa willaraiaska niskamanda, manima; Santu Ispirituwa musu kaugsaita iukaspami paipa lutrinsina allilla ruraspa kaugsanakunchi.

Pandaringapa iuiái, nukanchipa kuirpupi tiaskamanda

⁷ Chasa kagpika, ¿nisunchichu, Moisés ima rurangapa willaska, pandarii niraiagta? Ñi imapas manima. Mana chasa kagpipas, Moisés willaska mana tiagpika, manami iachangapa karkani ima ruraikuna pandarii niraiagta. Moisés niskapi willaraiá: “Sugkuna iukaskakunata mana munaringi”; mana chasa willaraiagpika, manami iachangapa karkani sugkunapata munarii, pandarii niraiagta. ⁸ Chasa kagpipas, Moisés niska tiaskamandaka, pandarii kaskata iachagsamuskawami iuiachiriwarka, tukui ima sugkuna iukaskata munaringapa. Moisés niska mana tiagpika, chi pandariikuna wañuskasinami niraiiantra. ⁹ Nuka ñugpata Moisés ima rurangapa niskata mana iachaspallami kaugsakurkani. Moisés niskata nuka iachagsamuuraka, pandariikuna nukapa iuiaiipi kaugsarigsinami tukugsamurkakuna. ¹⁰ Chiura nukaka, Taita Diospa ñawipi wañuskami tukurkani. Chasaka, Moisés niskata chaskispa, kaugsaita iukangataka, wañuska kagsinami tukurkani. ¹¹ Chasaka, Moisés niska tiaskamanda, chita iachaspa, pandariikunawami pandachii tukurkani. Chi niskapi pandarispami wañuskasina tukurkani.

¹² Moisés tukui ima rurangapa willaskaka, ñi ima mana pandariipi niraiianchu. Tukuipi allillami ka. Tukuipi allipami niraiá. ¹³ Chasa kagpika, ¿chi alli willaskawachu wañuskasina tukurkani? Ñi imapas manima. Pandariskawami wañuskasina tukurkani. Chi alli willaskawami pandarii ima kaskata iachagsamurkani. Chasa iachaspami, pandarispami, wañuskasina tukurkani. Chasaka, Moisés willaskawami kawachí, pandariikuna ruraika, iapa mana allilla kagta.

¹⁴ Iachanchimi, Moisés ima rurangapa willaska, Santu Ispíritu iuiachiska kagta. Ikuti nukaka, kai kuirpupi kaugsankama, katuskasina kaspami, pandariikunawa wataraiaskasinami kani. ¹⁵ Nuka mana iachanichu ima rurakugta. Nuka ima allilla rurangapa munakuskata mana ruragmi kani. Ikuti ima mana rurangapa munakuskata, chitami rurani. ¹⁶ Nuka ima mana munakuskata ruraskawami iuiarini, Moisés niska alli kagta. ¹⁷ Chasa kagpipas, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa. ¹⁸ Iachanimi, nukapa kuirpupi mana ñi imapas alli iuiái tiagta. Ima allilla rurangapa iuiái samuwagpipas, mana pudinichu chita rurangapa. ¹⁹ Allilla rurangapa munakuskata mana rurani. Ikuti jiru rurangapa mana munakuskata, chitami rurani. ²⁰ Chasa nuka mana rurangapa munakuskata ruragpika, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa.

²¹ Chimandami iachani, nuka allilla rurangapa munakuura, pandaringapa iuiái, nukapa kuirpupi tiagta.

²² Nukapa iuiaipika, Taita Dios ima niskatami allilla rurangapa iuiani. ²³ Chasa kagpipas, nukapa kuirpupika sug rigcha jiru mandai tiagtami kawani. Chi jiru mandai nukapa kuirpupi tiaspaka, suma iuiaiipi kaska mandaskawa makanakugsinami tukugsamú. Chi jiru mandai, wataskasinami chariwaku. Chasaka, pandariikuna rurangapagllami munachiwá.

²⁴ ¡Ai nukajim, imachar pasasa! ¿Pitak pudí, kai kuirpupi diltudupa wañuima chaiachiwakugriskata kispichiwangapa? ²⁵ Taita Diosllami pudí, nukanchipa Iaiá Jesucristowa kispichiwangapa. Chimandami Taita Diusta: “Pai Siñur” nini. Chasaka, nukapa iuiaiwa Taita Dios niskatami rurag kani. Ikuti nukapa kuirpuwaka imapiipas pandarispami kani.

Santu Ispíritu iuiachiskasina kaugsasunchi

8 Kunaura, Jesucristowa tukuskakunaka, manima diltudupa ninama sitai tukungapa kankunachu.

² Santu Ispíritu iuiachiska mandaiwaka kaugsaitami kará; chi mandaiwami jiru pandariikunata Jesucristomanda kispichiska kanchi; chasaka, mana diltudupa wañuima chaiagringapa. ³ Nukanchi pandarigkuna kaskamanda, Moisés ima willaskawa mana rurangapa pudiriskata, Taita Diosmi rurarka. Pai kikinpa wambrata kachamuspami chasa rurarka. Cristoka, pandarigkunapa kuirpuwasina aichaiug tukuspa, nukanchipa pandariikunamandami wañugsamurka. Chasaka, Cristopa kuirpuwami nukanchipa pandariikunata puchukaspa chingachirka; ⁴ chasaka, Moisés ima niskata nukanchi rurai pudingapa. Nukanchipa kuirpupi iuiailawa ruraspa mana kaugsanakunchichu. Santu Ispíritu ima iuiachiskallawami chasa kaugsanakunchi.

⁵ Maikanpas kikinpa kuirpupi iuiailawa kaugsag, kai alpapi ima tiaskakunallowami iuiaspalla kanga. Ikuti Santu Ispíritu iuiachiskallawa kaugsagka, chasallata Santu Ispiritumanda allilla iuiaspallami kanga. ⁶ Kai alpapi ima tiaskakunallowa iuiagkuna, diltudupa wañuimami chaiagringakuna. Ikuti Santu Ispirituwa allilla iuiagkunaka, sumaglla kaugsaitami tarinkuna. ⁷ Kai alpapi ima tiaskakunallowa iuiagkuna, Taita Dios-tami mana munankuna. Pai ima nikuskata mana uiagkunami kankuna. Mana pudinkunachu, pai ima nikuskata uiangapa. ⁸ Maikanpas kikinpa kuirpupi iuiailawa kaugsagkuna, Taita Diusta mana pudinkunachu kuntintachingapa.

⁹ Taita Diospa Ispíritu kamkunapa iuiaiipi sutipa kaugsakugpika, kam kinkunapa kuirpupi iuiailawa mana kaugsangapa kangichichu. Santu Ispíritu ima iuiachiskallawami kaugsangapa kangichi. Maikanpas Cristopa Ispirituta mana iukaspaka, Cristopa mana kanchu. ¹⁰ Cristo kamkunapa iuiaiipi kaugsakugpika, kamkunapa kuirpu pandariskamanda wañungapa kagpipas, kamkunapa ispirituka kaugsami ka, kamkuna mana pandarig niraiaskamanda. ¹¹ Taita Dios, Jesucristo wañuskata kaugsachigpa Ispíritu kamkunapa

iuiaipi kaugsakugpika, kikin Taita Dioska kamkunapa wañuska kuirputapasmi diltudupa kaugsachingapa ka. Paipa Ispíritu kamkunawa kaugsakuspami chasa kaugsachingapa ka.

¹² Chasamanda, taitakuna i mamakuna, mana iukanchichu, nukanchipa kuirpupi iuiakuskallawa kaugsanga. Santu Ispíritu ima iuiachiskallawami kaugsai iukanchi. ¹³ Kam kikinkunapa kuirpupi iuiakuskallawa kaugsanakugpika, diltudupami wañungapa kangichi. Ikuti Santu Ispirituwa kamkunapa jiru rurangapa iuianakuskata sakigpikunaka, diltudupa kaugsaitami tarinkangichi.

¹⁴ Taita Diospa Ispíritu ima iuiachikuskata tukui kati-raiagkuna, chikunami Taita Diospa wambrakuna niraianchi. ¹⁵ Kamkuna, wataraiangasina ispirituta mana chaskirkangichichu, ikuti manchaiwa kaugsangapa. Taita Diospa Ispiritutami chaskirkangichi; chasaka, paipa wambrakuna tukungapa. Santu Ispirituwami, Taita Diusta kaiaspa, ninchi: "Taitiku". ¹⁶ Kikin Santu Ispiritumi nukanchipa ispirituta iuiachispa willá, Taita Diospa wambrakuna kagta. ¹⁷ Paipa wambrakuna kagmanda, Taita Dios iukaskaka Cristo kikinpami ka; chiwanka, nukanchipapasmi niraiá. Nukanchi kai alpapi Cristosina llakii pasagpika, paiwa suma puncha luarpimi kagrisunchi.

Sug luarpi, iapa suma punchapi kagringapa kaskamanda

¹⁸ Kasami nini: kai punchakuna kaugsanakunkama iapa llakiikuna pasagpikunapas, nispaka Taita Dios sug luarpi iapa sumami nukanchita kawachingapa ka. Chasa iuiarigpika, chi llakiikuna mana imapas niraiangapa kanchu. ¹⁹ Taita Diospa wambrakuna, sumagllami sug luarpi kawarigringapa kanchi. Tukui ima Taita Dios wiñachiskakunapas, askurinti munaspami suianakú, chi puncha chaiangapa. ²⁰ Tukui ima Taita Dios wiñachiskakuna, runa pandariskamanda maldisiimi tukurka. Chi wiñachiskakuna kikinpa munaimandaka, manima; Taita Dios chasa munagmandami chasa tukugsamurka. ²¹ Chasa tukugpipas, Taita Dios pai ima wiñachiskata chasa maldisiskata kispichingapa kagtami iuianchi; chasaka, mana puchukaringapa. Taita Diospa wambrakuna, kispichiska, suma puncha luarpi kaugsai kallarigrirurami tukui ima pai wiñachiskakunapas maldisiskata kispichiskallatata tukungapa kankuna.

²² Kasami iachanchi: imasami unguringapa warmi, uchulla iukangapa puncha chaiaura, nanaimanda wakai kallari: chasallatami tukui ima Taita Dios wiñachiskakuna, kunankama wakanakugsina apanakú. ²³ Kasapas. Nukanchi kikinkunapasmi, Santu Ispirituwa kaspá, iuiaipi uchinanakugsina llakii iukanchi. Santu Ispirituta iukagmanda nukanchita kawachinmi, suma luarpi imapas chaskigringapa kagtakuna. "Nukapa wambrakunami kangichi" Taita Dios nukanchita kaiangapa puncha chaiangapa, askurinti iuiaillami suianakunchi. Chi punchami nukanchipa kuirputapas sumaiachiska kangapa ka. ²⁴ Chasa

suianakuskawami kispichii tukurkanchi. Ima suianakuskata ña makipi charinakuspaka, ¿imatak mas suianakusunchi? ²⁵ Ikuti ima iukangapa suianakuska manara chaiamugpika, iukanchimi chi iuiaita upalla suianakunga.

²⁶ Nukanchi sambaiaskasina kaura, Santu Ispiritul-latatami aidá. Mana iachanchichu, imasa chaiakuskasina Taita Diusta mañangapa. Chasa kagpipas, kikin Santu Ispiritumi nukanchimanda paita mañá. Mana rimai pudigsinami wakaspa mañá. ²⁷ Taita Dios, tukuikunapa iuiaita iachagmi iachá, Santu Ispíritu ima mañakugta. Santu Ispíritu, Taita Dios ima munakuskasinami Taita Diospalla kagkunamanda mañá.

Cristowa, nukanchi tukui binsigkuna kaskamanda

²⁸ Kasami iachanchi: allilla u mana allilla pasarigpipas, Taita Diosmi chasa ni, paita kuiagkunamanda allil-lapa tukungapa. Pai imasa munaskasina kawaspami nukanchita kaiarka. ²⁹ Pai ñugpamandata rigsigkunatami agllarka, pai kikinpa wambrasina kangapakuna; chasaka paipa wambra, achka waugkindi i panindikunamanda mas atun kangapa. ³⁰ Taita Dios ñugpamandata agllaskakunatami kaiá. Kaiaskakunataka ninmi: "Kamkuna, mana pandarigkunami niraiapuanguichi". Chasa niraiaskakunataka, paipa suma puncha luarmami pusá, sumaiachingapa.

³¹ Chasa kagpika, ¿imatak nisunchi? Taita Dios nukanchiwa kagpi, ¿pitak pudinga, nukanchimanda kuntra kanga? Ñi pipas manima. ³² Taita Diosmi kikinpa wambrata mana michaspalla kachamurka, tukuikunamanda wañuchii tukungapa. Nigpika, ¿manachu paiwa nukanchita tukui allilla chasallata karangapa ka? ³³ Taita Dios kikin agllaskakunata, ¿pitak pudinga, paikuna ima pandariikuna iukagta ningapa? Ñi pipas manima. Taita Dios kikinmi timpu paikunamanda niska karka: "Cristo wañuchii tukuskamandami mana pandarig niraiangapa kankuna". ³⁴ Nigpika, ¿pitak pudinga, nukanchita diltudupa ninama sitangapa? Ñi pipas manima. Jesucristo, wañuchii tukuspa kaugsarisipami Taita Diospa alli ladu kagrí; paimi nukanchimanda tukui sumaglla mañaku. ³⁵ Cristo nukanchita iapa kuiagmanda, ¿pitak pudinga, nukanchita paiwa kaskamanda anchuchingapa? Llakii, ñi nanai, ñi iarkai, ñi mana katanga iukai, ñi manchai, ñi jiru iuiaspa kalpachigkuna ñi wañuchigkuna, ñi pipas mana pudingapa kanchu, Cristowa kaskamanda nukanchita anchuchingapa. ³⁶ Chasallatami ñugpamanda librupi willaraiá, kasa Taita Diusta nispa:

Kammandami nukanchita chisiagta suianakú wañuchingapa.

Ubijata wañuchingapa munanakugsinami nukanchita kawanakú. ³⁷ Tukui chi llakii pasagpikunapas, Cristo nukanchita kuiagmandami tukui suma binsispa llugsinchi. ³⁸ Chasallata, allillami iachani, Taita Dios, nukanchipa Iaia Jesucristowa nukanchita kuiagta. Pai kuiagmandami mana imawapas pudiringapa ka, Cristowa kaskamanda nukanchita anchuchingapa. Chasa, ñi wañuiwa ñi kaugsaiwapas, ñi anjilkunawa ñi

kuku wairakunata mandagkunawapas, ñi kunaura ñi kipama ñi imaurapas, ³⁹ ñi sug luarpi ñi kai alpa ukupi ima tiaskakunawapas, ñi Taita Dius sug ima ruraskakunawapas mana pudiringapa kanchu, Cristowa kaskamanda anchuchingapa, Taita Dius nukanchita kuiagmandanda.

Taita Dius, Israelmanda runakunata agllaskamanda

9 Nuka, Cristowa iuiarispa kaskamandami sutipa kaskata niikichita, mana llullaspalla. Santu Ispíritu iuiachiwakuskawa, nukapa iuiapi chasallatami mana llullaspalla kasa niikichita. ² Nuka, imaurapas iapa llakiwami kani. Nukapa llakiipi, sungu nanagtami llakiswa kani. ³ Nukapa waugkindi judiukunamandami chasa llakiwa kani. Paikuna Cristowa tukuntrakuna iuiarispa, Taita Diusta mañantrani, nuka kikinka, Cristomanda anchuchii tukuspa, maldisiskapas tukungapa. ⁴ Paikuna, ñugpamanda achala taita Israelpa iawarmi kankuna. Taita Diusmi paipa wambrakunatasina charirka; chasaka, paiwa sumaiachiska kangapakuna. Paikunawami Taita Dius ikuti ikuti allilla tukugsamurka; chasaka, sugllapisina kangapa. Paikunamandami Moisés imasa ruraspa kaugsangapa niraiaskata chaskirka. Chimandaka iachachirkakunatami, imasa ruraskakunawa Taita Diusta kunguringapa chaiagta. Paikunatami Taita Dius nirka: “Nuka agllaska Cristo samungapa kaskata suiangichi”. ⁵ Paikunami kankuna nukanchipa ñugpamanda achala taitakunapa wambrakunapa kati wambrakuna. Paikunapuramandami Cristo runa tukugsamurka. Paika, tukui iai mandag Diusmi ka. Imaurapasmi paita iapa suma atun kagta nisunchi. Chasa kachu.

⁶ Mana ninichu, Taita Dius, Israelmanda runakunata karangapa niskata mana karagta. Ninimi: ñugpamanda achala taita Israelpa wambrakunapa kati wambrakuna, mana tukuikuna, Diuspa ñawipi paipa wambrakuna niraiagta. ⁷ Chasallata, ñugpamanda achala taita Abrahampa wambrakunapa wambrakunapas, tukuikuna, Diuspa ñawipi paipa wambrakuna mana niraiankunachu. Chasapaka, Taita Diusmi Abrahamta nirka:

Kamba wambra Isaakmandallami achka wambrakuna niraiapungapa kangi. ⁸ Chasa nispaka, Abrahampa wambrakuna kagmandalla, Taita Diuspa wambrakuna mana niraiangapa kankunachu. Taita Dius Abrahamta wambra karangapa niskamanda tiagsamuska wambra wambrakunallami paipa wambrakuna niraiangapa kankuna. ⁹ Kasami Taita Dius, Abrahamta nirka:

Ima killa chaiamuurami kutimusa.

Chi killami kamba warmi Sara kari wambra iukangapa ka.

¹⁰ Kasapas. Nukanchipa ñugpamanda achala taita Isaakpa warmi Rebeka, iska kari wambrakunami suuralla iukarka. ¹¹ Chi wawakuna manara tiagsamugpita, Taita Diuska Rebekata niska karka: “Ñugpa tiagsamuska wambra, kati wambra ima niskata ruragmi kangapa ka”, paikuna ima allilla u mana allilla manara

ruragpikuna. Chasaka, Taita Dius kikinmi kawachí, maikan paita allilla kawariskata ñugpamandata aglladur kagta. Chasa Rebekata nispaka, kawachirkami, allilla u mana allilla runanakugpipas, pai imasa munaskasina agllagta. ¹³ Chasallatami ñugpamanda librupi willaraiá, kasa nispa:

Jakobtami kuiarkani.

Ikuti Esautaka mana munarkanichu.

¹⁴ Chasa agllaskamandaka, ¿imatak nisunchi? Taita Dius chasa agllaspaka, ¿mana allillachu rurarka? Ñi imapas manima. ¹⁵ Moiestami Taita Dius kasa nirka:

Maikanmanda nuka llakiriskamandami llakirisa.

Chasallata, maikanta nuka kuiangapa munaskatami kuiasa. ¹⁶ Chasaka Taita Diuska, runakunata mana agllanchu, paikuna munanakuskamanda u ima allilla ruraskamanda. Taita Dius llakiriskamandallami pai pita munaskata agllá. ¹⁷ Chasallatami ñugpamanda librupi willaraiá. Kasami Taita Dius, Ejipto alpapi atun mandagta nirka:

Kasamandami kamta atun mandag kangapa churarkaiki:

nuka tukui pudig kagta kam nukamanda kawachingapa;

chasallata, tukui alpakunapi nuka Taita Dius kagta iacharigsamungapa. ¹⁸ Chasaka, maikanmanda Taita Dius llakiringapa munaskamandami llakirí. Chasallata maikanta iui ai tutaiachingapa munaskataka, paillami chasa pudí rurangapa.

¹⁹ Chimanda, kamka niwankangichar: “Chasa kaspaka, ¿imapatak Taita Dius, maikan runatapas ni: ‘Mana allilla ruragmi kangi?’ Pai ima rurangapa munaskataka, ¿pisik pudinga: ‘Chitaka mana rurakui’ ningapa?”.

²⁰ Kam runa, ¿imatak kangi, Taita Diusta imasa rurakuskata tapuchingapa? Alpata ruraska mangaka mana pudingapa ka, ruragta tapuchingapa: “¿Imapatak chasa rurawarkangi?”. ²¹ Alpata imapas ruragka, ¿manachu pudí, chi alpallatata sug kuashagsina atun punchakuna upiadiru ruranga; ikuti sugka, ianga punchakuna upiadiru ruranga?

²² Jiru ruraspa, diltudupa ninama sitai tukungapa kagkunata, Taita Diusmi suiarka, mana piñakuspalla; chasaka, pai rabiarispa, tukui pudig kagta kawachingapa. ²³ Chasallata, sugkunamanda llakii iukaspa, ñugpamandatami agllarka, paiwa suma puncha luarpi kagrungapa; chasaka, pai askurinti iapa atun suma kagta kawachingapa. ²⁴ Chi agllaskapi, nukanchipasmi kanchi. Judiupurakunapi i mana judíu kaskakunapipasmi agllarka. ²⁵ Chasallatami Oseas suti Santu Ispirituwa rimag willaska librupi willaraiá, kasa nispa:

Mana nukapa runakuna kaskatami ningapa kani: “Nukapa runakunami kapuangichi”.

Mana kuiaskatami ningapa kani:

“Nukapa kuiaskami kapuangi”.

²⁶ Maipimi nirkani:

“Nukapa runakuna mana kangichichu”: chillapitami ningapa kani:

“Taita Dios kausagpa wambrakunami kapuangichi”.

²⁷ Ikuti Israelmanda runakunamandaka, Isaías suti Santu Ispirituwa rimag, kasa nispami willá:

Ñugpamanda achala taita Israelpa wambrakunapa wambrakuna

kaskajusina achka mana kuintangasina kagpikunapas,

maillakunallami kispiringapa kankuna.

²⁸ Atun Taita Dios, kai alpapi ima rurangapa niskata mana unailami justisiagsamungapa ka. ²⁹ Isa-

iasllatami ñugpata willaska karka, kasa nispa: Tukui manduiug atun Taita Dios mana sakinmi,

kati kati wambrakuna tiangapa; nukanchipas, Sodoma i Gomorra suti puiblukunasina-
mi ña puchukariska kanchi.

Achka judiukuna, Alli Willaita mana uiaskakunamanda

³⁰ Chasa kagmandaka, ¿imatak nisunchi? Mana judíu kagkuna, Taita Diospa ñawipi alli kangapa mana maskanakugpipas, paikuna Cristowa suma iuiaripa kagmandami mana pandarig tukugsamunkuna. ³¹ Iku-

ti Israelmanda runakunaka, Moisés ima rurangapa willaskata katichiraiaspapas, mana pudirkakunachu, Taita Diospa ñawipi allilla tukungapa. ³² ¿Imapatak mana chasa pudirkakuna? Cristowa iuiaringataka, Moisés ima rurangapa willaraiaskallata katichiraiaspa-

mi mana pudirkakuna, Taita Diospa ñawipi allilla tukungapa. Imasami runakuna, rumipi takaripa ur-

mankuna: ñallapas chasallata Cristo kruspi wañuska-
manda, paikunata iapa mana sumami uiarigsamurka. ³³ Chasallatami ñugpamanda librupi willaraiá, kasa nispa:

Kawamuichi. Sión lumapi,

atun rumisina runatami churani, runakuna paita takaripa urmagsina tiangapa.

Ikuti maikanpas paiwa suma iuiaripa kagkunamanda,

Taita Dios manami kungaringa.

10 Taitakuna i mamakuna, tukui iuiaiwa iapa munaspami Taita Diusta mañakuni, Israelmanda runakuna kispichii tukuchukuna. ² Paikunamanda willanimi: askurintimi munanakú, Taita Dios ima niskata rurangapa. Chasa munanakugpipas, pai ima munakuskataka manara allilla iachankunachu. ³ Manara iachankunachu, imasamanda Taita Dioswa mana pandarig niraiagtakuna. Mana chasa iachaspami munanakú, kikinkunapa allilla ruraikunallawa mana pandarig niraiangapakuna. Chasa iuiaspami Taita Dios ima niskata mana munarkakuna suma uiangapa.

⁴ Moisés tukui ima rurangapa niraiaskaka, Cristopimi puchukarirka; chasaka tukuikuna paiwa suma iuiarigkuna, mana pandarig niraiangapa.

⁵ Moisés ima niskata ruraspa, mana pandarig niraiangapa kaskamandaka, Moisés kikinmi kasa nirka: “Tukui ima niskata ruragkunami kausai iukagta niraiangapa kankuna”. ⁶ Ikuti Cristowa suma iuiaripa, mana pandarig niraiangapa kaskamandaka, kasami willaraiá: “Kamba iuiaipei mana ningi: ‘¿Pitak sug luar-

ma sikanga?’,” Cristota nigringapa: “Uraikumui”.

⁷ “Chasallata, kamba iuiaipei kasapas mana ningi:

‘¿Pitak alpa ukuma uraikunga?’,” Cristota nigringapa: “Wañuskakunapagmanda llugsimui”. ⁸ Chasapaka, kasami willaraiá:

Diospa Rimai, kamba ladullapimi ka.

Kam kikinpa simiwami pudingi rimanga.

Kam kikinpa iuiaiwami pudingi iuiaringa.

Chi Rimaitami willanchi, Cristowa suma iuiaringapa.

⁹ Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami

iukangichi suma iuiaringa, pai wañuskata, Taita Dios kausachiska kagta. Chasa iuiaiwa kagmandami

kispichii tukungapa kangichi. ¹⁰ Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami

kispichii tukungapa kangichi.

¹¹ Chasallatami ñugpamanda librupi willaraiá, kasa nispa: “Paiwa suma iuiaripa kagkunamanda, Taita Dios manami kungaringa”. ¹² Judiukuna i mana judíu kagkuna, sug rigcha sug rigcha mana niraianchu. Jesucristo, tukuikunapa iaiami niraiá. Tukui paiwa suma iuiaripa mañagkunata, mana michaspallami ima mañaskata karamú. ¹³ Chasallatami willaraiá, kasa nispa:

Atun Taita Dioswa tukui suma iuiaripa mañagkuna kispiriskami tukungapa kankuna.

¹⁴ Paiwa mana iuiarispalla kausanakuspaka, ¿imasatak paita mañangakuna? Paimanda ñi ima mana uiaspaka, ¿imasatak paiwa iuiaringakuna? Ñi pipas mana paikunata Alli Willaita willagrigrigkunaka, ¿imasatak iachangakuna? ¹⁵ Paikunapagma Taita Dios ñi pitapas mana kachagpika, ¿pitak willagrinda? Chasallatami willaraiá, kasa nispa:

Maikanpas Alli Willaita willangapa chaiaimugpika, iapa allimi uiarigsamú.

¹⁶ Maituku Alli Willaita willanakugpipas, mana tukuikuna munankunachu, chi willaita uiangapa. Chasallatami Isaías kasa niska karka:

Taitiku, ¿pikunatak munarkakuna, nukanchi ima willaskata suma uiangapa?

Maillakunalla. ¹⁷ Chasamanda, Alli Willaita uiaspami Cristowa iuiarii pudinchi. Chi Alli Willaita, pai kikin Cristo kachamuskami niraiá.

¹⁸ Chasa niraiagpipas, nuka tapuni: ¿manachu Alli Willaita uiarkakuna? Chitaka allillami uiarkakuna. Chasallatami willaraiá, kasa nispa:

Chi rimai, tukui kai alpapimi uiarigsamurka. Maipi runakuna tiaskapipasmi iacharigsamurka.

¹⁹ Kasapasmi tapuni: chasa kagpika, Israelmanda runakunaka, ¿manachu chasa iacharkakuna ima niraiagta? Ñugpata, Moiseska kasami nirka:

Atun Taita Diosmi ni:

“Mana nukapa runakuna kaskata nuka agllaska kagmandami iuiachingapa kaikichita,

paikunata mana allilla iuiaspa kawangapa.

Nuka, mana iuiaiug runakunata agllaspa kagmandami rabiachingapa kaikichita”.

²⁰ Isaiaspas, mana manchaspallami kasa nirka:

Atun Taita Diosmi ni:

“Mana maskawanakugmi tariwarkakuna.

Mana nukamanda tapunakuskatami kawarirkani”.

²¹ Ikuti Israelmanda runakunamandaka kasami nirka:

Nuka ima niskata mana uiawaspa piñarispalla kagkunataka chisiagtami iskandi makikunawa chaskingapa suiakurkani.

Israelmanda runakuna, maillakuna Cristomanda agllai tukuskakunamanda

11 Chasa kagmandaka, ikuti tapusa: Taita Dios, ¿pai agllaska runakunatachu wabutirka? Ñi imapas manima. Nukapasmi Israelmandapura kani. Nukapa ñugpamanda achala taita, Abrahammi karka. Paipa wambra Benjaminpa iawarmi kani. ² Taita Dioska, pai ñugpamanda agllaska runakunata mana wabutirkachu. Ñugpamanda librupi, Elías suti Santu Ispirituwa rimagmandaka willaraiaskata, ¿manachu iachangichi? Paika, Taita Diusta mañakuspa, Israelmanda runakuna mana allilla kagtakuna willaspa, kasami nirka:

³ Taitiku, kamba Santu Ispirituwa rimagkunatami wañuchirkakuna.

Kammanda rupachiduru altarkunatapasmis wagllichirkakuna.

Nukallami chara kausga kani.

Nigpika, nukatapasmis wañuchiwangapa munanakú.

⁴ Chiura Taita Dioska, kasami paita ainirka:

Baal suti ianga diuspa ñugpa ladu mana kunguringapa,

kanchis waranga runakunatami nukamanda wakachirirkani.

⁵ Kuna punchakunapas, chasallatami Taita Dios, Israelmanda runakunata suma kuiaspa, maikankunata agllaku. ⁶ Taita Dios, paipa iapa suma kuiaiwami agllaku; mana kanchu paikuna ima allilla ruraskamanda. Allilla ruraskamanda Taita Dios agllakugpika, pai suma kuiaska, ñi imapaschar mana niraiantira.

⁷ Chasa kagmandaka, ¿imatak nisunchi? Israelmanda runakuna maskarinakurka, mana pandarig tukungapa. Nigpika, manima chasa tarirkakunachu. Taita Dios agllaskakunallami mana pandarig tukugsamurkakuna. Ikuti chi sugkunataka paikunapa iuiai tutaiachiskasinami tukugsamurkakunata. ⁸ Chasallatami ñugpamanda librupi willaraiá, kasa nispa:

Taita Dios, paikunata iapa puñuipisina iukangapami iuiachirka;

chiwanka, ñawiwa kawaspapas,

mana kawagsina tukungapa;

rinriwa uiaspapas,

mana uiagsina tukungapa.

Kunankamami chasa runakuna tiankuna. ⁹ Davidpas, kasami chi runakunamanda nirka:

Moisés ima rurangapa willaska,

paikuna suma achka mikui iukagsinami ka.

Chi willaraiaskapi urmangapa waskakunasina u tugllasinami tukupungapa kankunata.

Chi tugllapi urmagkunataka

diltudupa ninamami sitai tukungapa kankuna.

¹⁰ Paikunapa ñawi wichkaskasinami tukugsamungapaka;

chasaka, mana kawagsina tukungapakuna.

Wasa pakiskasinami

patariska imaurapas kangapa kankuna.

Mana judíu kagkuna, kispiringapa pudiskamanda

¹¹ Mana kagpika, ikuti tapusa: judiukuna chasa Cristomanda takarigsina ruraspas, ¿diltudupachu urmaskasina tukurkakuna? Ñi imapas manima. Kikin judiukuna Cristota mana uiaskamandami mana judíu kagkunaka pudinkuna kispiringapa; chiwanka judiukuna, chasa kawaspa, paikunasinallatata Cristowa tukugsamungapakuna. ¹² Judiukuna Cristota mana uiaspa sitai tukugmandami mana judíu kagkunaka, Taita Dioswa iapa iukagsina tukugsamurkakuna. Tukui judiukuna Taita Dioswa ikuti tukugsamuuraka, askurinti iapa suma allillami tukugsamungapa ka.

¹³ Kunauraka, kamkuna mana judíu kagkunatami kasa niikichita. Cristo kikinmi nukata kachamuwarka, mana judíu kagkunata Alli Willaita willaspa puringapa. Chimandami, nukapa suma alli iuiaita suma iuiarispas, chita willaspa purikuni, ¹⁴ kasa munaspa: jamalai nuka kikinpa runakunapas munantrakuna, kamkunata kawaspa, Cristowa tukugsamungapakuna; chasaka, kispiringapakuna! ¹⁵ Taita Dios, judiukunata wabutispa, mana judiukunatami agllarka; chasaka, tukuikuna paiwa pasinsiachirispas kangapakuna. Judiukunata Taita Dios ikuti kaiauraka, ¿imatak niraiangapa ka? Wañuska kaspas, kausgariskami niraiangapa ka. ¹⁶ Kasapas. Ñugpa ruraska tanda Diuspallas niraiangapa kagpika, tukui tanda rurangapa chapuskapasmi paipallas niraiangapa ka. Chasallata, sacha angu Diuspallas niraiangapa kagpika, malkikunapasmi paipallas niraiangapa ka.

¹⁷ Alli olivos sachamanda sug malkikunata kuchuskasinami sug judiukunaka tukurkakuna. Ikuti kamka, mana judíu kaspas, sachukupi wiñaska olivos malkisinami kangis. Chi malkita apaspa, alli olivos kuchuska malkima tarpuskasinami llutaska kangis. Chasaka, chi alli olivos sacha angukunawa Diuspa kausaiwami kallarikangis. ¹⁸ Chimanda, ¿ujallapas iuiakungi: “Alli olivos sachamanda kuchuska malkisinakunamanda mas allimi kani!” Chasa iuiaspaka, iuiarii, kamka mana anguta charig kagta. Chasapaka iuiarii: angukunami kamta charig kankuna.

¹⁹ Kasachar niwantrangi: “Chi malkikuna kuchugsinami tukurka, nukata chima tarpugsina llutaspa ruwangapa”. ²⁰ Ari. Judiukuna mana Cristowa iuiarigmandami chi sacha malki kuchugsina tukugsamurka. Ikuti kamka, paiwa suma iuiariskamandallami chi

kuchuskama tarpuskasina llutaska tukugsamurkangi. Chimanda, mana atun tukungi. Chasapaka, Taita Diusta suma kuiaspa manchaspalla iuiakungi. ²¹ Imasami Taita Dios, chi sacha kikinpa malkisinakunata mana chillapi sakirka: kampasmi chasallata pudingi pasanga, mana allilla kagpika. ²² Chimanda iuiarii, Taita Dios iapa alli kagta; chasallata, iapa rabiariig kagta. Paita mana uiagkunata iapa rabiariigmi ka. Ikuti kamwaka iapa allimi ka. Chasa kagmanda, kamka iukangimi, mana kungarisipalla, Taita Dios kamwa iapa alli kagta iuiarisipalla kanga. Kungarigpika, kampas chi sachamanda malki kuchuskasinami tukunkangi. ²³ Chi judiukuna Cristowa mana iuiarigkuna paita uiagsamugpikunaka, Taita Dios, chi sachamallatatami paikunata ikuti tarpugsina llutaspa ruragsamunga. Taita Diosmi pudí, chasallata ruragsamungapa. ²⁴ Sachukupi wiñaska olivos sachamanda malkita kuchuspa, alli olivos sachama tarpugsina llutaspami kamta rurarka. Mana chasa rurangapa pudiringasina kagpipas, allillami chasa rurarka. Taita Dios, kamta chasa ruraspaka, ¿manachu mas allilla pudinga, chi alli olivos sachama judiukunata ikuti tarpugsina llutaspa ruranga? Ari.

Israelmanda runakunatapas, Taita Dios kispichingapa kaskamanda

²⁵ Taitakuna i mamakuna, munakunimi, manara pipas iachaskata kamkuna iachangapa; chasaka, kamkuna mana iuianakungapa: "Nuka, tukuimi iachani". Israelmanda runakuna maikankunata iuiai tuta-iachiskasinami tukurkakunata; chika, mana judiukunata maituku achka agllaska, Cristowa tukugsamunkama. ²⁶ Chasa tukugsamuurami tukui Israelmanda runakuna kispiringapa kankuna. Chasallatami ñugpamanda librupi willaraiá, kasa nispa:

Sión lumamanda, kispichigmi samungapa ka.

Paika, ñugpamanda achala taita Jakobpa wambrakunapa wambrakuna jiru ruraskakunatami kispichigsamungapa ka.

²⁷ Nuka ñugpata paikunawa iuiarispa rimaskaka, kasami tukungapa ka:

paikuna mana allilla ruraskakunata nuka pasinsiaura.

²⁸ Israelmanda runakuna, Alli Willaita wabutispa, Taita Diusta manami munagsamurkakuna; chasaka, kam mana judíu kagkunamanda allilla tukungapa. Chasa kagpipas, paikunapa ñugpamanda achala taitakunata Taita Dios agllaskamandami paipa kuiaska chara kankuna. ²⁹ Taita Dios ima karaskata mana kichunchu. Pai kikin agllaskakunata mana wabutinchu. ³⁰ Chasallata, imasami kamkuna, ñugpata mana Taita Diusta uiarkangichi; ikuti kunauraka, judiukuna paita mana uianakugmanda, pai kamkunamanda suma kuiaspa llakirirka: ³¹ chasallatami, judiukuna kunaura mana paita uiagkuna kagpipas, mas nispa paillatata ikuti judiukunamanda llakiringapa ka; imasami kamkuna-manda llakirirka: chasallata. ³² Tukuikunatami Taita Dios sakirka, paita mana uiagkuna kangapa; chasaka,

tukuikunata suma kuiaspa llakirirka, pai kikin kispichingapakunata.

³³ Taita Dios, ña askurinti sumami kuiá. Ña askurinti iuiai iachami ka. Pai ima iuiakuskata, ñi pipas mana iachangapa pudinchichu. Mana imapas pudinchichu, pai ima rurakuskata iachangapa ima niraiagta.

³⁴ Chasallatami ñugpamanda librupi willaraiá, kasa nispa:

Atun Taita Dios ima iuiakuskata, ñi pipas mana iachanchu.

Paita ñi pipas mana imapas iuiachinchu.

³⁵ Ñi pipas mana paita imapas ñugpa kararkachu, pai kutichingapa. ³⁶ Tukuimi paimanda karaska tia. Paimi tukui rurarka. Pai kikinmandami tukui ruraska tia. Paita imaurapas iapa suma atun kagta nisunchi. Chasa kachu.

Taita Diosmandalla sumaglla kaugsangapa

12 Taitakuna i mamakuna, Taita Dios suma kuiaspa llakiskamandami kasa mañaikichita: kam kinkinkuna, Taita Diusta kamarikusina iukachiriichi, paimandalla kaugsangapa; chasaka, pai suma kuntintulla kamkunata kawangapa. Chasami kamkunata chaiaku, tukui iuiaiwa Taita Diusta suma atuniachingapa. ² Mana kaugsaiichi, kai alpamandakunallawa iuiarispa. Iukangichimi, Taita Dios kamkunapa iuiaita sug rigcha iuiachiskakunawa mas suma iuiarispa kaugsangkuna. Chasa kaugsaspaka, iachankangichimi, Taita Dios ima munakuskata rurangapa. Paipa ñawipi sumaglla kagta kawachispami tukuipi allilla ruraspa iukangichi kaugsanga.

³ Taita Dios suma kuiawaskamandami tukui kamkunata kasa niikichita: imasa kikinmanda iuiai iukaskamanda mas atun mana iukangichi iuianga. Chasapaka, imasami Taita Dios, pai imasa munaskasina sug sugta karamú, paiwa suma iuiarispa kangapa: chasallatami iukangichi iuiaringa. ⁴ Imasami suglla kuirpupi, chaki, maki, uma, imapas achka iukagpipas, sug sug rigcha, sug sug rigcha rurankuna: ⁵ chasallatami nukanchipas, achkakuna kaspapas, Cristowa suglla kagsina kanchi. Nukanchi tukuikunami suglla kuirpu niraianchi.

⁶ Taita Dioska, nukanchita sugta sug rigcha, sugta sug rigcha, pai imasa munaskasinami karamú, nukanchi kikinpura aidanakuspa kaugsangapa. Pai kikin Santu Ispirituwa rimangapa karamugpika, pai imasa iuiachiskasina willasunchi, paiwa suma iuiarispa. ⁷ Sugkunamanda tukuipi allilla rurangapa karamugpika, paikunamanda allilla suma rurasunchi. Sugkunata iachachingapa karamugpika, paikunata allilla iachachisunchi. ⁸ Sugkunata sumaglla iuiachingapa karamugpika, paikunata sumaglla iuiachisunchi. Kulki u imapas karangapa chaiagpika, mana karagsina iuiarispa karasunchi. Mandag kangapa chaiagpika, allilla iuiarispa suma mandachu. Ministiskakunata suma kwaspa, imapas karangapa chaiagpika, alli iuiachiiwa karasunchi.

Cristowa tukuskakuna, imasa Diusmandalla kaugsai iukaskamanda

⁹ Tukui iuiwai sutipa allilla kuianakuichi. Mana mu-naichi jiru ruraikunata. Ikuti tukui allilla ruraikunataka suma ruraspa kaugsaiichi. ¹⁰ Waugkindikunasina parijuma kuianakuichi. Sugkunata: "Nukanchimanda mas allimi ka" kam kikinpuramanda iuiaripa kaichi.

¹¹ Ima ruraikunapas allilla ruraichi, mana killaspalla. Iaiia Jesús imasa munakuskasina tukuipi allilla iuiaripa ruraichi.

¹² Paita suma iuiwai suaspa, alli iuiachiwa kaichi. Iapa llakiikuna chaimugpika, mana llakiwa kagsina kawachiichi. Mana sakiichi, Taita Diusta mañaspa kaugsangapa.

¹³ Taita Diuspalla kagkunata ima ministiriska karaichi. Kamkunapa wasima pipas chaiagrípika, sumaglla "Taikui" niichi. ¹⁴ Kamkunata jiru rurangapa iuiaspa kawagkunataka niichi: "Taita Dius, kamta iapa kuiaspa kawapuachu". Paikunata mana randichingapa iuiachi. Chasapaka, Taita Diusta paikunamanda mañapuichi.

¹⁵ Alli iuiachiwa kagkunawa kangapa chaiagpika, chasallata alli iuiachiwa kaichi. Chasallata, wakanakuskawa kangapa chaiagpika, paikunawa llakii iukaichi.

¹⁶ Kam kikinpura sugllasina iuiaripa kaugsanakuiichi. Atun tukugsina iuiaripa mana kaichi. Chasapaka, uchulla kaskakunawa sugllapi tukuichi. Mana iuiaripa kaichi: "Nuka, tukuimi iachani".

¹⁷ Kamkunata mana allilla ruragkunataka mana randichiichi. Iuiariichi, tukuikunapa ñawipi allilla ruraspa kaugsangapa. ¹⁸ Kamkunata imapas rurangapa chaiagpika, allilla ruraichi; chiwanka, tukuikunawa sumaglla kaugsanakungapa.

¹⁹ Nukapa kuiaskakuna, kamkunata mana munagkunataka mana chasallata randichiichi. Chasalla sakiichi. Taita Diusmi paikunata justisiangakunata. Chasallatami ñugpamanda librupi willaraiá, kasa nispa:

Atun Taita Diusmi ni:

"Nukami justisiasa.

Paikuna jiru ruragpikunaka, nukatami chaiawaku,

chasallata paikunata rurangapa". ²⁰ Ikuti:

Kamta mana munag iarkaiwa kagpika, kam iukangimi mikui karanga.

Iakunaiwa kagpika,

iukangimi upiangapa karanga.

Kam chasa allilla ruragpika,

paitaka ñawi ruparipa,

pingaisinami iuiachinga. ²¹ Kamta ima jirukuna rurangapa iuiaita mana sakiringi. Chasapaka, alli ruraikunawa jiru iuiaikunata bisingi.

13 Tukuikunami iukanchi, mandagkuna ima niska-ta uanga. Mandagkunata Taita Dius mana churagpika, ñi pipas manachar tiantra. Kunaura mandagkunaka, Taita Dius churaskakunami kankuna.

² Chimanda, chi mandagkunata mana uiagkunaka, Taita Dius mandangapa churaskatami wabutinkuna.

Chasa mana uiagkunaka justisiaimi tukungapa kankuna. ³ Mandagkunaka, alli ruragkunata manchachingapa mana kankunachu. Mana alli ruraspa kaugsanakuskata manchachingapami churaska kankuna. ¿Manachu munangichi, mandagkunata mana manhaspalla kaugsangapa? Chasa munaspaka, allilla ruraspa kaugsaiichi. Chasa kaugsagpika, mandagkuna kamkunata ningapami kankuna: "Alli runami kangí". ⁴ Mandagkunaka, Taita Diusta aidagkunami kankuna, kamkuna allilla kaugsangapa. Kamkuna imapi mana allilla ruraspa, iukangichimi manhaspa kangakuna. Mandagkuna, Taita Diusta aidagkaspaka, mana ianga barata charirinkunachu. Mana allilla ruragkunamandaka asutigkunami kankuna. ⁵ Chi-mandami chaiá, paikuna ima niskata uiangapa. Asutii tukungapa manhaspalla, manima; kamkunapa alli iuiapi iuiarispami iukangichi chasa uanga. ⁶ Paikuna mandagkuna kagmanda iukangichimi, paikunata kulki paganga. Mandagkuna, Taita Diusta aidagkuna kaspaka, iukankunami imaurapas paikunata imasa chaiaskasina ruraspa kaugsanakungapa.

⁷ Tukui mandagkunata imasa chaiaskasina kuaichi. Impuistu chaskigta kulki kuaichi. Rama † mañagtaka rama kuaichi. Suma kuiangapa chaiaskataka suma kuaichi. Suma rimai iukaskataka suma rimaichi.

⁸ Mana pitapas dibiichi. Iukaichi dibisinaka, kam kikinpura sumaglla kuianakuspa kaugsangapaglla. Sugkunata kuiagkuna, tukui ima Moisés niskata allilla ruragkunami niraiankuna. ⁹ Chi niskapi, kasami willaraiá: "Mana sugpa warmiwa kariwa siriringi. Mana pitapas wañuchingi. Mana sisangi. [Mana pimandapas llullangi.] Sugkuna iukaskakunata mana munaringi". Sug mandaikunapasmi tia. Chasa tiagpipas: "Kam kikintasinami iukangi, tukui runakunatapas kuianga"; chasa ruragpika, tukui ima Moisés niskata allilla ruragkunami niraiankuna. ¹⁰ Chasa kuiagkuna, mana pitapas jiru rurangapa iuiankunachu. Chimandami, chasa kuianakuspa kaugsanakugmanda, tukui ima Moisés niskata allilla ruragkuna niraiankuna.

¹¹ Kasapas iuiariichi: kuna punchakuna imasa kagta. Nukanchi Iaiia Jesucristowa suma iuiaringapa kallarisaka, kunaaurami kispichii puncha sutipa ña chaia-muku. Chimanda, puñunakugsina niraiagkuna rigchariichi. ¹² Tuta ña pakarii tukugsinami chaimuku. Chimanda, iana tutapisina mana allilla ruraikunata sakisunchi. Wañuchinakudiru katanga churarigsina tukusunchi; chasaka, punchapisina kaugsangapa. ¹³ Punchapi purinakugsina, tukuipi allilla ruraspa kaugsanakusunchi. Mana kaugsasunchi, iapa mikuspa i machagta upiaspa. Chasallata, maikan kari warmiwa pandaripa i jiru ruraikunata ruraspa mana kasunchi. Mana piñachirinakuspalla i sugkunata jiru iuiwai mana kawaspalla kasunchi. ¹⁴ Chasapaka, Iaiia Jesucristopa iuiaita churarigsina tukungichi. Mana iuiangichi, kam kikinkunapa kuirpupi ima jiru iuiaskasina rurangapa.

† Rama kuangapa niraianni imasa chaiaskasina kuntribusiun kuangapa.

Cristowa sug tukuskakunata mana piñasunchi

14 Manara Cristota allilla rigsigkunata sumaglla chaskiichi, mana imapipas llakichinakuspalla.

² Cristowa tukuskakuna, maikankuna iuiankunami, tukui mikui, mikudiru kagta. Ikuti sugkunaka, manara Cristota allilla rigsisa, iuiankunami, aicha mikuspaka, pandarig niraiagta. ³ Tukui mikuikunata mikugka, aicha mana mikugta mana wabutichu. Chasallata aicha mana mikugka, tukui mikuikunata mikugta mana ñi imapas nichu. Taita Diosmi iskandikunata ni: "Allillami ka". ⁴ Kam, ¿imapatak sug patrunpa lutrinta ningi: "Mana allilla ruraspami kangi"? Pai allilla u mana allilla rurakuskata, kikin patrunmi iuká kawanga. Chasa kagpipas, Iaia Jesusmi paita aidanga, allilla tukugsamungapa. Chimandami mikug u mana mikug kaskakunata pai ningapa ka: "Allillami ka".

⁵ Kasapas. Sugkuna iuiankunami, sug puncha, sugkunamanda mas atun wardadiru tiagta. Ikuti sugkuna iuiankunami, ñi imapas mana atun wardadiru puncha tiagta. Kamkuna imasa mas suma rurangapa iuiariskata ruraspaka kapuaichi. ⁶ Maikanpas wardadiru puncha samakuspaka, Iaia Jesusmanda iuiarispas samachu. Tukui mikuikunata mikugka, Taita Diusta: "Pai Siñur" nispa, Iaia Jesusmanda iuiarispas mikuchu. Aicha mana mikugpas, Iaia Jesusmanda iuiarispas mana mikuchu. Paipas, Taita Diusta: "Pai Siñur" nichu.

⁷ Ñi pipas mana kaugsanchichu nukanchimandalla. Chasallata wañuipas, mana nukanchimandalla wañunchichu. ⁸ Kaugsanakunkama, Iaia Jesusmandami kaugsanakunchi. Wañuurapas, Iaia Jesusmandami wañusunchi. Chasapika, kaugsanakuspa wañuurapas, Iaia Jesuspallami kasunchi. ⁹ Iaia Jesucristo, wañuspa, kikinmi kaugsarirka; chasawaka, wañuskakunata kaugsagkunatapas iaia mandag kangapa.

¹⁰ Nigpika kamka, ¿imapatak Cristowa tukuskakunata nikungi: "Kam, mana allilla ruraspami kangi"? ¿Imapatak paikunata wabutikungi? Tukuikunami iukanchi, Taita Diospagma chaiagringa. Chipimi allilla u mana allilla ruraskakunata kawachii tukusunchi. ¹¹ Chasalatami ñugpamanda librupi willaraiá:

Atun Taita Diosmi kasa ni:

"Nukapa kaugsaiwami sutipa kasa nini:

Tukuikunami nukapa ñugpa ladu kunguriwangapa kankuna.

Tukuikunami niwangapa kankuna:

'Kam, tukuimanda mas alli, mas suma, tukuikunapa iaiami kangi'." ¹² Chasaka, tukuikunami iukanchi, Taita Diospa ñawipi ima ruraskakunata willarigringa.

¹³ Chimandami iukanchi, parijuma mana pitapas ninakunga: "Mana allilla ruraspami kangi". Chasapaka, kasa iuiarisunchi: Cristowa tukuskakunata mana imapipas pandachispa, pandariipi urmachisunchi.

¹⁴ Iaia Jesusmanda iuiarispas, iachaniami, ñi ima mikui, Diospa ñawipi mapasina mana kagta. Ikuti maikanpas: "Mapami ka" iuiarigpika, chasa iuiarigmanda mapami niraiapunga. ¹⁵ Kam, sug waugki pandarig niraiaska mikuita paipa ñawipi mikukugpika, mana parijuma

kuianakugsinami tukungi. ¡Amalai kam chasa mikukuskata kawaspaka, chi runa Cristowa iuiakuskata sakindra, Cristo paimanda wañugpipas! ¹⁶ Chimanda, kamkuna tukui mikuikunata mikug kagpipas, mana tiachu ñi pipas kawaspas, ningapa: "Chika, mana allilla kanchu". ¹⁷ Taita Dios ima niskata ruraspas kaugsangapaka mana niraianchu kasa u chasa mikuspa upiaspa kaugsangapa. Santu Ispirituwa alli iuiachiiwa allilla ruraspas, sumaglla kaugsangapami niraiá. ¹⁸ Chasa kaugsaspa, Cristo ima niskata ruragka, Taita Diusta sumagllami kuntintachí. Chasa allilla ruragmandami maikan runapas ninkuna: "Pai, allimi ka".

¹⁹ Chimanda maskasunchi, imapipas tukuikunawa sumaglla kaugsanakungapa; chasaka tukuikuna, alli suma iuiái iuiachinakuspa kangapa. ²⁰ Kam ima sugkunapa ñawipi mikuskamanda, ¡ujalallapas Taita Dios paikunata suma ruraska kaskata puchukagsina rurakungi! Tukui mikui, mikudirumi niraiá. Chasa niraiagpipas, kam ima mikukuskata sug waugki, kawaspas, nichu mana allilla kagta: chiwanka, sutipami kammandami mana allilla tukunga. ²¹ Cristowa tukuskakuna mana pandaringapa, mas allilla kantra, aicha mana mikungapa, binu mana upiangapa, ñi imapas pandachigsina mana kangapa. ²² Kam ima mikudiru iuiakuskata Taita Diospa ñawillapi iuiakungi. Maikanpas, mikukuspa, paipa iuiapi mana tiachu imapipas mana allilla ruraska kagta: chi runaka, Taita Diospa iapa kuiaskami ka. ²³ Ikuti maikanpas, mikukuspa tapurikuchu: "Kai mikui, ¿allilla u mana allillachu ka?": paika, ña pandarigmi tukú. Ima ruraipipas alli kagta suma iuiaringataka, sug rigcha iuiarispas ruragpika, paika pandariipimi ña urmaska niraiá.

Iuiarisunchi, sugkuna allilla kangapa

15 Nukanchi Cristowa suma iuiarispas kagkunaka iukanchimi, manara paita allilla rigsigkunata, paikuna ima iuianakuskamanda ñi imapas mana ninga. Nukanchi kuntintarispas kangapa mana iuiarisunchi. ² Tukuikunami iukanchi iuiaringa, sugkunapas allilla kangapa; chasaka paikunapas, alli suma iuiái iuiachii tukungapakuna. ³ Cristopas mana iuiakurkachu, kikinlla kuntintarispas kangapa. Nigpika, kasami ñugpamanda librupi paimanda willaraiá: "Kamta kamsipa rimaskakunaka, nukatami chaiawarka". ⁴ Taita Diosmi ñugpamandata tukui iskribichirka, nukanchita iachachingapa. Chi willaraiaskapi nukanchi iachaikuspaka, iukanchimi, sumaglla iuiachirispalla, chi iuiailawa mana sakispalla suiagakuna. ⁵ Taita Diosmi sumaglla nukanchita iuiachimú, mana sakispalla kaugsangapa. Paimi kamkunata iuiachimú, kam kikinpura suglla iuiaiwa kaugsanakungapa; imasami Jesucristo kaugsarka: chasallata. ⁶ Chasaka, sugllapi suglla rimagsina, nukanchipa Iaia Jesucristopa Taita Diusta ningichi: "Kam, iapa suma atunmi kangi".

Mana judíu kagkunata, Alli Willaita willaskamanda

⁷ Chasamanda, imasami Cristo, kamkunata suma chaskirka: chasallata kam kikinpura suma chaskinakuichi; chasawaka, Taita Diusta ninakungapa: “Kam, iapa suma atunmi kangí”. ⁸ Kasapasmi niikichita: Cristo samurkami, judiukunamanda allilla rurag kangapa; chasaka, Taita Dios ima nukanchipa ñugpamanda taitakunata niska tukungapa. Chiwami kawachirka, Taita Dios ima niskata sutipa rurag kagta. ⁹ Mana judíu kagkunamandapasmi Cristo samurka. Paikunamandapasmi Taita Dios llakirirka; chasa iachaspaka, paita: “Kam, iapa suma atunmi kangí” ningapakuna. Chasallatami Cristomanda ñugpamanda librupi willaraiá, Taita Diusta kasa nispa:

Mana judíu kagkunapa chaugpipipas ningapami kaiki:

“Iapa suma atunmi kangí”.

Kamta suma atuniachispa kantangapami kaiki. ¹⁰ Kasapasmi willaraiá:

Kamkuna mana judíu kagkuna, Taita Dios agllaska runakunawa alli kuntintarispa iuiachiriichi. ¹¹ Ikuti kasapasmi willaraiá:

Tukui kamkuna mana judíu kagkuna, atun Taita Diusta niichi:

“Kam, iapa suma atunmi kangí”.

Tukui alpapi kaugsagkuna, chasallata paita nisunchi. ¹² Ikuti Isaiaspas, kasami willarka:

Isaí suti runapa iawarmandami tiagsamungapa ka, mana judíu kagkunatapas iaia mandag tukugsamungapa.

Paitami mana judíu kagkunapas suma iuiiwa suiangapaga kankuna.

¹³ Taita Dios suma iuiiwa suiangapa iuiachig, pailatata tukui kamkunata iuiachichu, paiwa suma iuiarispas, alli iuiachiiwa sumaglla kaugsanakungapa; chasaka, Santu Ispiritupa iapa iachaiwa paita imapipas suma iuiiwa suiaspalla kaugsangapa.

¹⁴ Nukapa taitakuna i mamakuna, nuka kamkuna-mandami allilla iuiani, tukupi alli kaspas, allilla iachaiwa kagtakuna. Chiwanka pudingichimi, kam kikinpura sumaglla iuiachinakuspa kaugsanakunga. ¹⁵ Nuka chasa iuiaspapas, kai kartapi mana manchaspallami imakunamanda rimarkaikichita, kamkunata iuiachingapa. Taita Dios, iapa kuiawaspa, mingawaskamandami chasa rimarkaikichita; ¹⁶ chasaka, Jesucristo ima niwaskata ruraspas, mana judíu kagkunata Taita Dios Alli Willaita karamuwaskata willangapa. Munakunimi, mana judíu kagkunata Taita Diospa ñawipi sug kamarikutasina chaskiwangapa; chasaka paikuna, Santu Ispirituwa Taita Diospalla kangapakuna.

¹⁷ Chimandami, Taita Dios ima munakuskata nuka ruraskamanda, Jesucristowa kaspas, iapa alli iuiachiiwa kani. ¹⁸ Nuka kikinmandalla ñi imapas mana rimarinichu. Cristo kikinmi iuiachiwarka, nuka mana judíu kagkunata kaiangapa; chasaka paikunapas, Cristowa tukungapakuna. Chimandami nuka mana

manchaspalla rimani. Rimaikunawa i ruraikunawa, ¹⁹ mana imaurapas ruraska ujnachingasina kawachikunawa, Santu Ispiritupa iapa iachaiwami mana judíu kagkunata kaiangapa iuiachiwarka. Chiwanka, Jerusalemamanda kallarispa, Iliria alpakama, tukuiipimi Cristomanda Alli Willaita willaspa purirkani. ²⁰ Chasa kagpipas, sugkuna willai kallarispa, mana; chasapaka munakurkani, Cristopa sutita manara iachariska alpakanapi Alli Willaita willagringapa. ²¹ Chasallatami ñugpamanda librupi willaraiá, kasa nispa: Paimanda ñi ima mana iachariska alpakanapimi chi Alli Willaita uangapa kankuna. Paimanda ñi imaurapas mana uiagkunami iachagsamungapa kankuna.

Romama ringapa, San Pablo iuiakuskamanda

²² Chasa willai purikuspami, kamkunapagma ikuti ikuti chaiagringapa munakuspapas, mana pudirkani.

²³ Ikuti kunaauraka, ñami kai alpakanapi puchukarkani willaspa puringapa. Ña achka watamandatami munakurkani, kamkunapagma chaiagringapa. ²⁴ Chimandami iuiakuni, España suti alpama rikuspa, kamkunata kwaspa ialigringapa. Kamkunapagma chaiagriura, iapa allimi iuiachiwangapa ka. Kamkunaka, ima ministiskami karawankangichi, nuka Españama chaiagringapa. ²⁵ Kunaauraka, Jerusalemami rikuni, Taita Diospalla kagkunata mailla kulkiwa aidagringapa.

²⁶ Masedonia i Akaia alpakanapi kaugsaspa Cristowa tukuskakunaka munanakurkami, kulki tandachispa, Jerusalemamanda kachangapa; chitaka, mana ñi ima iukasaka Taita Diospalla kagkunata karangapa. ²⁷ Paikunapa iuiailawami chasa aidangapa munarkakuna. Paikunatami chaiarka, chasa aidangapa. Taita Dios judiukunata Alli Willaita karamuskata chi mana judíu kagkuna chaskiskamandaka, iukankunami judiukunata ima ministiskakunata aidangakuna. ²⁸ Chimanda, chi tandachiska kulkita Jerusalemipi kaugsanakuskata nuka karagringapa puchukauraka, Españama rikuspa, kamkunapagpi iaikuspami ialigrisa. ²⁹ Kasami iachani: kamkunapagma nuka chaiagriura, Cristomi nukanchita mas suma kuiangapa ka.

³⁰ Taitakuna i mamakuna, nukanchipa Iaia Jesucristomanda i Santu Ispiritu karamuska kuiaimandami mañaikichita: nukamanda Taita Diusta suma mañaspa aidawaichi. ³¹ Mañapuaichi, Judea alpapi kaugsaspa Cristowa mana uiagkunamanda Taita Dios michawachu. Chasallata mañapuaichi, Taita Diospalla kagkunaka, Jerusalemipi nuka apakuska kulkita sumaglla mana piñarispalla chaskiwachukuna. ³² Chiwanka, Taita Dios munagpika, kamkunapagma alli iuiachiiwa chaiagrispa, kamkunawa allilla samaringringapa mañapuaichi. ³³ Taita Dios sumaglla kaugsaita karag, tukui kamkunawa kapuachu. Chasa kachu.

San Pablo rigsiskakunata: “Puangi” niskamanda

16 Nukanchipa mama pani Febeta allilla chaskipuaichi. Paika, Senkrea puiblupi Cristowa

tukuskakunata aidagmi ka. ² Imasami chaiá, Taita Diuspalla kagkunata chaskingapa: chasallata paitapas chaskipuaichi, Iaia Jesusta iuiarispas. Chi panika, achkakunata i nukatapas aidagmi ka. Allilla ruraskamanda, paita ima ministiskata karapuaichi.

³ Pani Priskata i paipa kusa Akilata: “Puangi” nipuaichi. Paikunapas, nukawa Jesucristomanda Alli Willaita willagkunami kankuna. ⁴ Paikuna, nukamanda asllamandallami kispirkakuna wañungapa. Chimanda paikunata, nukalla mana “Pai Siñur” ninichu. Tukui mana judiukuna, Cristowa tukuspa, maipi kagkunasmasi, “Pai Siñur” ninakú. ⁵ Priska i Akilapa wasipi Cristowa tukuskakuna sugllapi tandariskakunatapas: “Puangi” nipuaichi.

Nukapa kuiaska waugki Epenetotapas: “Puangi” nipuaichi. Paika, Asia alpapi tukuikunamanda ñugpa Cristowa tukuskami ka.

⁶ Pani Mariatapas: “Puangi” nipuaichi. Paika, kamkunapuramanda achka allillami rurarka.

⁷ Nukapa alpamanda nukawa wichkaraiaskapi kaska waugki Andronikota i Juniastapas: “Puangi” nipuaichi. Paikunamandaka, Jesús kikin kachaska runakunami ninkuna: “Iapa allimi kankuna”. Nukamanda mas ñugpami Cristowa tukuska kankuna.

⁸ Iaia Jesuswa suma iuiarig kagmanda, nukapa kuiaska waugki Ampliatotapas: “Puangi” nipuaichi. ⁹ Waugki Urbano, nukanchiwa Cristomanda Alli Willaita willagtapas: “Puangi” nipuaichi. Nukapa kuiaska waugki Estakistapas: “Puangi” nipuaichi. ¹⁰ Waugki Apeles, Cristowa suma iuiarig kagta kawachirigtapas: “Puangi” nipuaichi. Waugki Aristobulopa wasipi kaugsanakuskatapas: “Puangi” nipuaichi. ¹¹ Nukapa alpamanda kaska waugki Erodiontapas: “Puangi” nipuaichi. Waugki Narsisopa wasipi Iaia Jesuswa suma iuiarigkunatapas: “Puangi” nipuaichi. ¹² Pani Trifenata i pani Trifosatapas: “Puangi” nipuaichi. Paikunapas, Iaia Jesusmanda allilla ruragkunami kankuna. Nukapa kuiaska pani Persidatapas: “Puangi” nipuaichi. Paika, Iaia Jesusmanda iapa sinchi ruragmi ka. ¹³ Iaia Jesús agllaska waugki Rufota i paipa mamatapas: “Puangi” nipuaichi. Paipa mamaka, nukapa mamasinami kapuá.

¹⁴ Waugki Asinkritota, waugki Flegonteta, waugki Ermesta, waugki Patrobasta, waugki Ermasta i tukui paikunawa waugkikunatapas: “Puangi” nipuaichi. ¹⁵ Waugki Filologota i pani Juliata, waugki Nereota i paipa panita, waugki Olimpasta i tukui paikunawa Taita Diuspalla kagkunatapas: “Puangi” nipuaichi.

¹⁶ Kam kikinpura Taita Diusmanda iuiarispas, “Puangi” muchanakuspa ninakuichi. Cristowa tukuskakuna maipi kagkunapas, tukuikunami kamkunata: “Puangi” ninakú.

¹⁷ Kam taita i mamakunata mañaikichitami: maikankunapas Cristowa tukuskakunata iskaima

tukungapa piñachirinakuspa pandachigkuna kaskata kawapuaichi. Chasa pandachigkunaka, kamkuna Alli Willaita iachaikuskata tuntiachigsinami ruranakú. Paikuna kaskamanda anchuriichi. ¹⁸ Chasa ruragkunaka, nukanchipa Iaia Cristo imasa munakuskasina mana ruranakunchu. Pai kikinkuna iuiarispas munaskakunallatami ruranakú. Paikunapas miski simiwa, suma rimaiwami maikan manara allilla iachagkunapa iuiaita tuntiachinakú.

¹⁹ Kamkunaka Cristo ima niskata ruragkuna kagta, tukuikunami iachanchi. Chimandami kamkunamanda, nuka iapa alli kuntintulla kani. Kamkuna chasa kagpipas, munanimi, kamkuna iachakunasina mas suma ruraikunata agllaspa kangapa. Ikuti jiru rurangapaka, mana iachagsina kaichi. ²⁰ Taita Dius, kamkunata sumaglla kaugsaita karag, mana unailami iaia kukuta kamkunapa chaki sarudiru ukuma pambangapa ka. Nukanchipa Iaia Jesús, kamkunata sumaglla kawapuchu.

²¹ Waugki Timoteo, nukawa Alli Willaita willagmi kamkunata: “Puangi” niku. Nukapa alpamanda kaska waugkikuna Lusio, Jasón i Sosipaterpasmi, “Puangi” ninakú.

²² Nuka kikin Tersio, kai kartata Pablomanda iskribig, Iaia Jesusta iuiarispami, “Puangi” niikichita.

²³ Waugki Gaiomi kamkunata: “Puangi” niku. Paipa wasipimi nuka Pablo kaugsakuni. Tukui Cristowa tukuskakunapasmi kaipi tandarinkuna. Waugki Erasto kai puiblupi kulki wakachigpasmi, “Puangi” niku. Waugki Kuartopasmi “Puangi” niku.

²⁴ [Nukanchipa Iaia Jesús, tukui kamkunata sumaglla kawapuchu. Chasa kachu.]

Taita Diusta iapa suma atun kagta nispa, puchukariskamanda

²⁵ Taita Diusta nisunchi, iapa suma atun kagta. Paimi pudí, kamkunata tukuipi allilla charingapa. Chasallatami nuka, Jesucristomanda Alli Willaita iachachispa willani. Chi Willaita, kai alpa manara tiagsamuskauramandata, mana pipas iachaska kaskatami. ²⁶ Taita Dius, pailla iachaskata kunaura willangapa kachamurka. Ñugpamandata Santu Ispirituwa rimagkuna iskribiraiaskapipas, chi Willaita willaskami tiarka. Taita Dius kikin mana wañugmi chasa willangapa kachamurka; tukui kai alpapi kaugsagkunaka, chi Willaita iachaspa, suma iuiarispas, Taita Dius ima niskata ruraspa kaugsangapa.

²⁷ Taita Dius suglla tukui iachagta Jesucristowa nisunchi: “Kam, iapa suma atunmi kangí, maituku waranga waranga watakuna ialigpipas”. Chasa kachu.

1 KORINTOPI

1 Taita Dios nukata munawaskamanda, Jesucristo agllaska kachamuskami kani, Alli Willaita willaspa puringapa. Sóstenes suti waugkiwa kaspá, ² kamkuna Taita Dioswa tukuskakuna Korinto puiblupi kaugsagkunatami kai karta kachaikichita. Kamkuna, Jesucristowa suma iuiarigmandami Taita Diuspalla kangichi. Taita Diosmi kamkunata agllarka, paimandalla kaugsangapakuna. Nukanchipa Iaia Jesucristomanda iuiarispá paita mañagkuna maipi kaskapipas, paikunatapasmí chasallata agllarka. Jesucristoka, paikunapa i nukanchipa iaiami ka.

³ Nukanchipa Taita Dios i Iaia Jesucristo, kamkunata suma kuiaspa, suma iuiaiwa kawapuachu.

Taita Dios, Jesucristowa nukanchita suma allilla karamuskamanda

⁴ Taita Dios, Jesucristowa kamkunata iapa kuiaspami suma allilla karamurka. Chasamandami nuka, kamkunamanda imaurapas nukanchipa Taita Diusta: “Pai Siñur” nini. ⁵ Kamkunaka Cristowa tukuskakunamanda, Taita Dios tukuipipasmí suma iuiaipipa allillata karamurka; chasaka kamkuna, mas suma allilla iachaspa, sugkunata iachachingapa. ⁶ Chasawaka, imasami Cristomanda willarkaikichita: chasallatami tukuipi allilla tukugsamurka. ⁷ Chasa, Santu Ispíritu sug rigcha sug rigcha karamuikunaka mana imapas kamkunata pisigsamunchu. Chasa sumaglla kaugsaiwami suianakungichi, nukanchipa Iaia Jesucristo ikuti samunkama. ⁸ Paimi kamkunata allillapi charinga, tukurii punchakama. Chasaka, nukanchipa Iaia Jesucristo samug puncha, mana pipas kamkunamanda ningachu: “Mana alli runami karka”. ⁹ Taita Dios ima rurangapa niskata chasami rurag ka. Paimi kamkunata agllarka, paipa wambra nukanchipa Iaia Jesucristowa suglla iuiaiwa tukuspa kaugsanakungapa.

Korintopi kaugsag Cristowa tukuskapura, sug rigcha sug rigchama tukunakuskamanda

¹⁰ Taitakuna i mamakuna, nukanchipa Iaia Jesucristomandami kasa mañaikichita: tukui suglla iuiaipei tukugsamuichi, mana sug rigcha sug rigcha rimanakuspalla. Tukuipi suglla iuiaiwa sugllapi iuiarispá kaugsapuaichi. ¹¹ Pani Kloepa familiakunami willawagsamurkakuna: kam kikipura piñachirinakuspasi sug rigcha sug rigchama tukunakungichi. ¹² Sugkuna ninakungichisi: “Nukanchi, Pablowami kanchi”. Sugkunaka ninakungichisi: “Nukanchika, Apoloswami kanchi”. Ikuti sugkunaka ninakungichisi: “Nukanchika, Pedrowami kan-

chi” i “Nukanchika, Cristowami kanchi”. ¹³ Kamkuna chasa ninakugpipas, ¿Cristo pitichiskachu ka? ¿Nuka Pablochu kamkunamanda kruspi klabai tukurkani? ¿Nukapa sutiwachu kamkuna baugtisai tukurkangichi? Manima. ¹⁴ Kamkunata ñi pitapas nuka mana baugtisarkaikichitachu. Chimandami Taita Diusta: “Pai Siñur” nini. Iskaikunallatami baugtisarkani: Krispo i Gaiollata. ¹⁵ Chimanda, mana pipas pudinchu ningapa: “Pablopa sutiwami baugtisai tukurkani”. ¹⁶ Kunaaurami iuiariwá: Estefanaspa wasipi kaugsanakuskatapasmí baugtisarkani. Sugkunata nuka baugtisaska, mana iuianichu. ¹⁷ Cristoka mana kachamuwarkachu baugtisingapa. Alli Willaita willangapami nukata kachamuwarka. Mana kachamuwarkachu, iapa ailastimaiwa iachasina iachachingapa. Cristo kruspi wañuchii tukuskamanda iachaskallowami munani, paiwa suma iuiarigsamuchukuna.

Taita Dios tukui pudig i iachag kagta, Cristo kawachiskamanda

¹⁸ Cristo kruspi wañuchii tukuska, chi rimaika, diltudupa puchukaringapa kagkunataka sug upa rimaisinami paikunataka uiarí. Ikuti nukanchi kispichii tukungapa kagkunataka, Taita Dios iapa pudig kagta mi chi rimai uiarí. ¹⁹ Ñugpamanda librupi, Taita Dios niskaka kasami willaraí:

Iachagkunapa iachaita nukami puchukangapa kani.

Iuiaiugkunapa iuiaikunatapás wabutingapami kani.

²⁰ Kai alpamanda iachaikunaka, Taita Diospa ñawipi upakunapa iuiaisinami niraiá. Chimandaka iachakuna, iachachigkuna i kai alpamanda iachaiwa sug rigcha sug rigcha rimanakugka, iangami ka; ñi imapa mana balinchu. ²¹ Taita Dioska, tukuipi iachaspa, mana sakirkachu, kai alpapi kaugsagkuna kikinkunapa iachaiwa paita rigsingapa. Chasapaka munanmi, Alli Willaita willaskawa, paiwa suma iuiarigkunata kispichingapa, sugkunataka chi Alli Willaita upakunapa rimaisina uiarigpipas.

²² Judiukuna mañanakú, paikuna mana imaurapas kawaskasina ruraskata kawangapa. Mana judíu kagkuna, suma iachaiwa rimanakuskata uiangapami maskanakú. ²³ Chasa maskanakuskataka, nukanchimi willanakunchi, Cristo kruspi wañuchii tukuska kagta. Chasa willauraka, judiukunataka iapa mana sumami uiarinkunata. Mana judíu kagkunataka upakunapa rimaisinami uiarinkunata. ²⁴ Chasa kagpipas, Taita Dios kikin agllaska judíu i mana judíu kagkunapas, Cristo-

manda uiaspa, Taita Dios tukuipi allilla pudig i iachag kagtami ninchi. ²⁵ Taita Dios mana iuiiugsina rurskata kawarigpipas, maikan runakuna mas iacha ruraskamanda mas allillami ka. Chasallata, pai mana pudigsina ianga ruraskata runakunapa ñawipi kawarigpipas, maikan iacha mas allilla pudiskamanda mas allilla ruraskami ka.

²⁶ Taitakuna i mamakuna, iuiaripuaichi: kamkuna, Taita Dios kikin agllaskakunami kangichi. Kai alpapi tiaskakunallawa iuiagkunapa ñawipi, maillakunallami iacha kangichi. Chasallata, maillakunallami atun i mandagsina kangichi. ²⁷ Kai alpapi tiaskakunallawa iuiagkunapa ñawipi, upakunasinatami Taita Dios agllarka; chasaka, iachakunata tuntiachingapa. Mana pudigkunasinatami Taita Dios agllarka; chasaka, pudigkunata tuntiachingapa. ²⁸ Tukuipi wabutiskakunasinatami Taita Dios agllarka. Ari, mana imapapas balig niraiaskakunatami agllarka; chasaka, balig niraiagkuna mana baligsina tukungapa. ²⁹ Chasawaka, Diospa ñawipi ñi pipas mana ningachu: "Nukami mas atun kani". ³⁰ Pai Taita Dios munagmandami kamkuna Jesucristowa tukuska kangichi. Cristowami Taita Diospa iachaita nukanchi chaskinchi, mana pandarig niraianchi i kispichiska kanchi, paimandalla kaugsangapa. ³¹ Chasamanda, imasa ñugpamanda librupi willaraiaskasina, kasami niraiá: "Maikanpas atun tukuspa iuiarigka iuiarichu: 'Atun Taita Diospalla kaspami atun kani'."

Jesucristo kruspi wañuchii tukuskamanda Alli Willamanda

2 Taitakuna i mamakuna, nuka kamkunapagmami rirkani, Diospa Rimaite ñi pipas mana iachaskata willangapa. Chitaka, iapa ailastimaiwa iachasina mana willarkaikichitachu. ² Nuka kamkunawa sugllapi kaura, Jesucristollawami iuiakurkani, sug rigchaka mana iuiaspalla. Ari, Cristota kruspi wañuchii tukuskallawami iuiakurkani. ³ Nuka iapa manchaiwa chugchuspa i sambaiaskasinami kamkunapagma chaiagrirkani. ⁴ Nuka rimaiwa willakuura, mana iapa iachasina iuiachinakurkaikichitachu. Santu Ispirituwa i paipa iapa iachaiwami iuiachinakurkaikichita. ⁵ Chasaka kamkuna, mana runakunapa iachaiwa Jesucristowa tukusamurkangichichu. Taita Diospa iapa iachaiwami Cristowa tukugsamurkangichi.

Santu Ispirituwa, Taita Dios nukanchita kawachiriskamanda

⁶ Allilla wiñaskasina Cristowa iuiarigkunatami Taita Diospa iachaita willanchi. Chi iachaika, kai alpamandakunapa mana kanchu. Chasallata, kai alpapi mandagkuna mana chita iachankunachu. Chi runakunapa iachaika, ñami puchukaringapa kankuna. ⁷ Taita Diospa iachaitami nukanchi willanchi. Chi iachaitaka, ñi pi ñugpamandakunapas manara iacharkakunachu. Kai alpa manara tiagpita, Taita Dios niska karka, chi iachaiwa nukanchi diltudupa suma puncha luarpi kagringa-

pa. ⁸ Chi iachaitaka, ñi maikan kai alpapi mandagkuna mana iacharkakunachu. Chita iachaspaka, manami suma atun Iaia Jesusta kruspi klabankuna.

⁹ Chasamandami ñugpamanda librupi willaraiá, kasa nispa:

Ñi pipas mana kawaskasina,
uiaskasina i iuiariskasinatami

Taita Dios wakachiraiá,
maikan paita kuiaskakunata karangapa.

¹⁰ Chi mana pipas iachaskataka, nukanchitami Taita Dios paipa Ispirituwa iachachirka. Santu Ispiritu, kawakuspa, tukuimi iachá. Taita Dios kikin ima iuiakuskatapasmi tukui iachá.

¹¹ Ñi maikan runapas, sug runa ima iuiakuskata mana iachangapa pudinchu. Chi kikin runapa iuiai ispiritullapimi iachá. Chasallata ñi pipas, Taita Dios ima iuiakuskata mana iachangapa pudinchichu. Diospa Ispiritullami iachá. ¹² Nukanchika, kai alpamandalla iuiaikunata mana chaskirkanchichu. Taita Dios kachamuska Ispiritutami chaskirkanchi; chasaka Taita Dios, nukanchita suma kuiaspa, pai ima karamuskakunata iachangapa. ¹³ Chikunataka kai alpapi kaugsagkunapa iuiaimandalla iachachiska rimaikunawa mana willanchichu. Santu Ispiritu iachachiska rimaikunawami willanchi. Chasaka, Santu Ispiritu ima iuiachiskata Santu Ispirituwa kagkunatami willanchi.

¹⁴ Maikanpas kai alpapi tiaskakunallawa iuiagka, Diospa Ispiritu karamuskakunata mana chaskingapa munanchu. Chi karamuskakunamandaka "Upakunapami ka" nispami wabutí. Chi iachaikunataka mana iachangapa pudinchu. Santu Ispiritu iuiachiskallawami chikunata iachangapa pudirí. ¹⁵ Santu Ispirituta iukagka, tukuipimi kawaspa iachá, alli u mana alli kagtakuna. Ikuti paimandaka, ñi pipas kai alpamanda iuiaiwa mana pudinkunachu ninga, alli u mana alli kagta. ¹⁶ Chasallatami ñugpamanda librupi willaraiá, kasa nispa:

Atun Taita Diospa iuiaita,
¿pitak rigsí?

¿Pitak paita imapas iachachingapa pudí? Ñi pi.
Chasa willaraiagpipas, nukanchika Cristo iuiachiskatami iuianchi.

Taita Diusta aidag taitakunamanda

3 Taitakuna i mamakuna, nuka mana pudirkaikichitachu, Santu Ispiritullawa iuianakuskataka rimangapa. Runakunapa iuiailawa kagkunatasinami iukarkaikichita rimanga. Kamkuna, Cristowa tukuska kaspapas, wawakunasina manara iachagkunami kangichi. ² Chimanda, llullu wawakunata lichilla upiachigsinami iachaikuita iachachirkaikichita. Ña atunkuna mikudiru kagsina iachaikunata manara pudirkanichu, kamkunata iachachingapa. Kunankama manara pudingichichu, chi iachaikunata iachangapa. ³ Charami runakunapa iuiailata iukangichi. Chimandami kam kikinpura jiru iuiaiwa kawanakuspa i piñachirinakuspa kaugsanakungichi. Chasa kaugsanakuspaka, ¿manachu runakunapa iuiailawa kaugsanakungichi? ⁴ Sug-

kuna ninakungichisi: “Nuka, Pablowami kani”; “Nuka, Apoloswami kani”; chasa ninakuspaka, ¿manachu runakunapa iuiaillawa ninakungichi?

⁵ Pablo i Apoloska, ¿imatak kanchi? Iaia Jesús ima nis-kata willagkunallami kanchi. Nukanchita uiaspallami kamkuna paiwa iuiarirkangichi. Imasami Iaia Jesús, nukanchita sug sugta mingarka: chikunatami ruranchi. ⁶ Nukaka, chagra tarpugsinami ruraspa, Alli Willaita willarkaichita. Apoloska, chi tarpuskasinata iaku tallichigsinami paipa rimaiwa rurarka. Nukanchi chasa ruraskapi, Taita Diosmi chi rimaikunata wiñachí. ⁷ Chasaka, ñi tarpug ñi iaku tallichig mana imapas kagsinami niraianchi. Taita Diosmi tukuipi ka. Paimi chi rimai-kunata wiñachig ka. ⁸ Tarpug i iaku tallichigka, iwallami Diospa ñawipi niraianchi. Imasami sug sug, alli u mana alli rurarkanchi: chimandami imasa chaiaskasina chaskisunchi. ⁹ Nukanchika, Taita Diusta aidagkunami kanchi. Kamkunaka, Taita Dios alpapi tarpuspa wiñachingapa chagrasinami kangichi.

Chasallata, Taita Dios saichikuska wasisinapasmi kangichi. ¹⁰ Taita Dios, suma kuiawaspa, alli iuiaitami karawarka. Chiwanka, alli iachagsina, wasichingapa kallariska rumita churagsinami Alli Willaita willarkaichita. Sug iachachigka, chi kallariska rumi awapi wasi saichikugsinami paipa rimaiwa ruraku. Sug sugta chaikumi iuiarispas, allilla iachachingapa; chasaka, chi awalla wasichikuska allilla kidagsina tukungapa.

¹¹ Wasita kallariska rumi, ña churaskami ka. Chika, Jesucristo kikinmi niraiá. Chi kallariska rumi tiaskapika mana pudirinchi, sug rumipas churangapa. ¹² Chi kallariska rumi awapika, kaikunawami wasi saichingapa pudirí: kuriwa, kulkiwa, iapa suma rumikunawa, kaspikunawa, ugsawa, wirukunawa. ¹³ Chasawa saichigkuna ruraskataka ninawa rupachispami iacharingapa ka, maikanwa allilla ruraska kagta. Chasallata, justisiai puncha chaiaura, sug sug imasa allilla u mana allilla iachachiskakunata ninallowantami rupachispa iacharingapa ka. ¹⁴ Maikanpas, ima ruraska ninawa mana rupagpika, suma luarpi allimi tukugsamunga. ¹⁵ Ikuti maikanpas, ima ruraska rupagpika, ñi imapas mana chaskingachu. Tukui chingachiskami niraianga. Chasa kagpipas, pai kikinka ninapi ialispami kispirigapa ka.

¹⁶ Kamkuna, Taita Dios kikin kaugsadirumi niraiangichi. Paipa Ispiritumi kamkunawa sugllapi kaugsaku. Chita, ¿manachu iachangichi? ¹⁷ Taita Dios kaugsadiru, paimandallami ka. Chi kaugsadiru, kam kikinkunami kangichi. Nigpika, maikanpas Taita Dios kaugsadiru niraiaskata paipa mana suma iuiaiwa wagglichigpika, chi runata Taita Dios kikinmi puchukangapa ka.

¹⁸ Mana pipas pandaringichi. Maikanpas kikinpa iuiapi iuiakuchu: “Nuka, kai alpapi mas iachami kani”: chasa iuiakugka iukanmi iuiaringa: “Diuspa ñawipi, ñi ima mana iachanichu”. Chasa iuiarispaka, sutipa iachagmi tukungapa ka. ¹⁹ Kai alpamanda iachaikunaka, Diospa ñawipi upakunapa iuiaimi niraiá. Chasallatami ñugpamanda librupi willaraiá, kasa nispa: Taita Dios sakinmi,

iachagkuna pai kikinkunapa iachaiwa wanguskasina urmangapa.

²⁰ Kasapasmi niraiá:

Iachagkunapa iuiaitapas, atun Taita Diosmi iachá, ianga kagta.

²¹ Chasamanda, ñi pipas mana iuiaringichi: “Kai runawa chi runawa purikuspa, nuka mas atunmi kani”.

Tukui iachachig taitakunami kamkunapa kanchi.

²² Pablo, Apolos i Pedro, kamkunapami niraianchi.

Chasallata, kai alpa, kaugsai i wañui, kuna puncha i samug punchakuna, tukuimi kamkunamanda allillapa niraiá. ²³ Kamkuna, Cristopami niraiangichi. Cristo, Taita Diospami ka.

Iaia Jesús kachaska runakunata, pai ima rurangapa mingaskamanda

4 Nukanchimanda kasa iuiaringichi: “Paikuna, Cristota aidagllami kankuna”. Taita Dios ñugpamandakunata mana willaskata kuna iachachingapami nukanchita mingarka. ² Kasapas. Maikan mingai tukuskakunaka iukanchimi, nukanchita ima rurangapa kachamuskata suma ruranga. ³ Kamkuna u maikan justisia runakunapas ninakuchu, nuka mana allilla rurakugta: chasa ninakugpipas, nukata mana llakiriwanchu. Ñi nuka kikin mana nirinichu, allilla u mana allilla rurakugta. ⁴ Nuka kikinmanda kuntra mana ima iuiachiriwagpipas, chi mana niraianchu, nuka mana pandarig kagta. Iaia Jesusmi niwangapa ka, nuka allilla u mana allilla ruraska kagta. ⁵ Chimandami kamkunapas iukangichi, Iaia Jesús manara samunkama, mana maikantapas ninga, allilla u mana allilla kagta. Paimi, samuspa, iana tutapisina ima pakalla kaskakunatapas punchaichigsamungapa ka. Nukanchipa iuiaillapi munaskatapas, paimi kawachingapa ka. Chiurami Taita Dios kadaunta ningapa ka, allilla u mana allilla ruraska kagta.

⁶ Taitakuna i mamakuna, nukamanda i Apolosmandami chasa rimarkaichita, kamkuna tukui allilla kangapa. Chasaka kamkuna, nukanchita iachaikuska-waka Diospa Rimaita iachaspa, chitami rurankangichi, mana imapas iapaspalla. Chasaka, mana sug runamanda atun tukuspa ninkangichichu: “Paika, mas allimi ka”, sug runataka wabutispa. ⁷ Kam chasa niskataka, ¿pitak “Sugkunamanda mas allimi kangi” niku? Kamta tukui ima Santu Ispíritu karamuskaka, ¿manachu Taita Dios karamuska ka? Pai tukuita karamuska kagpika, ¿imapatok kam kikin ruraskasina iuiaspa, atun tukukungi?

⁸ Kamkuna, ña tukui ima munaska iukaspami, “Santu Ispíritu karamuskawa iapa iukagsinami kanchi” iuiaringichi. Chasawaka iuiaringichimi, nukanchita mana ministispalla, “Nukanchi, Diospa suma mandakuskapi atun mandagsinami kanchi”. ¡Amalai Diospa suma mandakuskapi sutipa mandagkuna tukugsamuntran-gichi; chasaka nukanchipas, kamkunawa sugllapi mandagkuna kangapa! ⁹ Nukapa iuiaipika, Taita Dioska nukanchita Cristo kachamuska runakunataka kati

ladumi churarka; imasa nukanchita wañuchii tukungapa niraiagsina: chasa. Nukanchita chasa pasariskata, kai alpapi kaugsagkuna i anjilkunapasmi kawanakú.

¹⁰ Nukanchi, Cristomanda kaspaka, upasinami niraianchi. Ikuti kamkunaka, “Cristowami iachag kanchi”, chasami iuiaringichi. Nukanchi, ñi imapas mana pudigsinami kanchi. Ikuti kamkunaka, “Tukui pudigmi kanchi”, chasami iuiaringichi. Kamkuna, “Suma atunmi kanchi”, chasami iuiaringichi. Ikuti nukanchika, wabutiska kagtami iuiarinchi. ¹¹ Nukanchi kunankama iar-kaimanda, iakunaimanda, mana katangawami kanchi. Piaipasmi tukunchi. Wasipasmi mana iukanchi.

¹² Nukanchi kikinkunapa makiwami saikugta trabajanchi. Nukanchita mana munaspa kamigkunata nin-chimi: “Kamkunata, Taita Dios iapa kuiaspa kawapua-chu”. Nukanchita puchukangapa munagkunata mana ainirispalla, upallami kanchi. ¹³ Nukanchita juchachigkunata sumaglla iuiachispami paikunata rimanchi. Nukanchita ninkunami, kai alpapi ñi imapa mana baligta. Tukuikuna sitaskami kunankama kanchi.

¹⁴ Kamkunata pingaiachingapa, mana chasa niikichitachu. Nukapa kuiaska wambrakunatasinami iuiachingapaglla chasa niikichita. ¹⁵ Kamkuna, chungawaranga Cristomanda iachachigkunata iukaspapas, achka taitakunaka mana iukangichichu. Nukami, Alli Willaita kamkunata willaspa, Jesucristowa iuiarigkunapa taitasina tukurkani. ¹⁶ Chimandami mañai-kichita: nuka imasa kaugsakuskasina kaugsapuaichi.

¹⁷ Chasa mañaspmi Timoteota kachaikichita. Paika, Iaia Jesuswa suma iuiarig kaspas, nukapa kuiaska wambrasinami kapuá. Paika, kamkunapagma chaiagrispa, nuka Jesucristowa suma iuiarig kaspas imasa kaugsakuskatami iuiachigringapa ka. Imasami nuka, maipipas tukui Cristowa tukuskakunata iachachini: paipas chasallatami kamkunata iachachigringapa ka. ¹⁸ Kam kikinpura sugkunaka, nuka mana kamkunapagma chaiagrigmada, iuiarinakú: “Nuka, mas atunmi kani”.

¹⁹ Chasa iuiarinakugpipas, Iaia Jesús munagpika, nuka utkallami kamkunapagma chaiagringapa kani. Chiuraka, chi atun tukugkuna ima rimanakuskata mana uiasachu. Paikuna ima rurai pudinakuskatapasmi kawagrisa. ²⁰ Dios suma mandakuskaka, mana rimailawa kawachirinchi. Taita Dios tukuiapa suma rurai pudig kaskawami kawachí. ²¹ Nuka kamkunapagma chaiagriuraka, ¿imatak munangichi: asutigringapa u iapa kuiaspa, mana piñaspalla kawagringapa?

Sug runa paipa mama ningawa kaugsakugta justisiaskamanda

5 Kamkunapura sug runaka, mama ningawa sugllapi kaugsanakugtami uiani. Chi atun pandariitaka, Taita Diusta mana rigsikgunapasmi mana munankuna. ² Kamkunapura chasa jiru ruraspa kaugsanakugpika, ¿imapatak atun tukuspa iuianakungichi? Chasapaka iukangichimi, wañuskamanda llakispa, wakanakugsina kanga. Chi jiru ruragta iukangichimi, kamkunawa kaskamanda llugsichinga. ³ Nukaka, mana kamkunawa chipi kaspapas, nukapa iuiaipika

kamkunawami kani. Nuka, mana kamkunawa kaspapas, chi jiru ruragtami nini, llugsichu. ⁴ Chimanda kamkunaka, nukanchipa Iaia Jesucristopa ñawipi iuiarispa, sugllapi tandariichi. Nukapa iuiiaka, kamkunawami kagringapa ka. Nukanchipa Iaia Jesuspa iapa iachaipimi tandaringapa kangichi. ⁵ Chiura, chi jiru ruragta iaia kukuta kuapuaichi, pai kuirputa nanachingapa. Chasawaka pudinmi, chi jiru ruraskata sakispa, Iaia Jesuswa tigramunga; chiwanka, pai samuuraka, kispiringapa.

⁶ Chi jiru ruragpa chaugpipi kaugsaspa, mana iukangichichu atun tukuspa kanga. ¿Manachu iachangichi: imasami asllita libadurawa achka mukutapas puchukichí: chasallatami chi jiru rurag pudí, tukuikunatapas wagllichinga? ⁷ Mana bali libadurata sitagsina ruraichi. Chi jiru ruraspa kaugsakuskata llugsichiichi. Chasa llugsichispaka, judiukunapa paskua puncha mikudiru mana libadurawa musu tanda ruraskasinami tukunkangichi. Chi paskua puncha chaiaurami Taita Diusta karaska Ubija, Cristo niraiaska, nukanchimanda wañuchii tukurka. ⁸ Chimanda, paskua atun puncha ialichig-sina, pandariwa i jiru iuiawiwa mana kaugsasunchi. Pandariikunawa kaugsakugka niraiami mana bali libadurawa tanda kagsina. Chasapaka, tukuipi alli iuiawami iukanchi kaugsanga, mana llullaspalla. Chasa kaugsakugka niraiami mana libadurawa tanda kagsina.

⁹ Sug kartapi, kasami nirkaikichita: “Kari warmiwa jiru ruraspa kaugsanakuskawa mana sugllapi tukuichi”.

¹⁰ Chasa nispa, mana munarkanichu ningapa, manara Iaia Jestusta rigsisa kari warmiwa jiru ruraspa kaugsanakugwa, sugkunapata munarigkunawa, llullachispa kulki surkugkunawa i ianga diuskunata kungurispas muchagkunawa sugllapi mana tukungapa. Paikunawa mana sugllapi tukungapa pudirigpika, kai alpapi kaugsagkunamanda anchuringapachar chaiantra. ¹¹ Chasapaka, kasami munarkani ningapa: maikapas, “Jesuswa tukuskami kani” nispa, kari warmiwa jiru ruraspa kaugsagwa, sugkunapata munarigwa, ianga diuskunata kungurispas muchagwa, sugkunata juchachigwa, machagwa, llullachispa kulki surkugwa, chasa kagkunawa mana sugllapi tukuichi. Ñi mikungapagllapas mana paikunawa sugllapi tandariichi. ¹² Nukata mana chaiawakunchu, Iaia Jestusta manara rigsiskakunata justisiangapa. Jesuswa tukuskakunatami iukangichi justisianga. ¹³ Ikuti manara paita rigsiskakunata, Taita Diosmi justisianga. Chasamanda, chi jiru ruragta kamkunawa kaskamanda llugsichiichi.

Cristowa tukuskapura rabiachinakuskamanda

6 Kam kikinpura imapipas rabiachinakuspa kagpi, ¿imapatak mana Taita Diusta rigsig justisiakunata willanakugringichi? Iukangichimi Taita Diospalla kagkunata willangakuna. ² ¿Manachu iachangichi, Taita Diospalla kagkunaka, kai alpapi tiaskakunallawa iuiagkunata justisiangapa kagtakuna? Nigpika, ¿imapatak mana pudingichi, chi asllita rabiachinakuskata kam kikinpura pasinsiachinakungapa? ³ ¿Manachu iachangichi, mana alli anjilkunatapas nukanchi justisiangapa

kagtakuna? Chasa justisiangapa kaspaka, pudisunchimi kai kaugsaipi ima rabiachinakuskata pasinsia-chingapa. ⁴ Chimanda, kam kikipura kai kaugsaipi imajmandalla rabiachinakuskapika, ¿imapatak Cristowa tukuskapura mas uchulla niraiagpipas justisiangapa mana willanakungichi? ⁵ Kamkunata pingaiachingapami chasa niikichita. Kam kikipura, ¿manachu sugllapas iachag tia, waugkindi rabiachinakuskata pasinsia-chingapa? ⁶ ¿Imapatak waugkindi rabiachinakuskata mana Cristota rigsikgunata justisiangapa willanakugringichi?

⁷ Kam kikipura chasa rabiachinakuiwa tiagmandaka, imapipas mana allilla tukugsamunchu. Maikan kam kikipura sug waugkindita mana allilla ruragpika, ¿imapatak mana ianga kawangichi? Maikan imapas kichugpika, paita chasallata ianga kawaichi. ⁸ Ikuti kamkunaka, waugkindipurami mana allilla ruranakungichi i kichunakungichi.

⁹ ¿Manachu iachangichi, Dios suma mandakuskapi, mana alli ruragkuna manima iaikugringapa kagtakuna? Mana pandariichi. Kari warmiwa jiru ruraspa kaugsagkuna, ñi ianga diuskunata kungurispamuchagkuna, ñi sugpa warmiwa kariwa siririgkuna, ñi karikuna warmisina tukuspa kaugsagkuna, ñi karipura warmiwasi pandarigkuna, ¹⁰ ñi sisaikuna, ñi sugkunapata kichungapa munarigkuna, ñi machagkuna, ñi sugkunata juchachigkuna, ñi llullachispa kulki surkugkuna, Dios suma mandakuskapi manima iaikugringapa kankunachu. ¹¹ Kamkunapura maikankunaka, ñugpata chasami kaugsanakurkangichi. Chasa kaugsanakugka, chi pandariikunata sakigmanda, ñami mailariskasina tukugsamurkangichi. Taita Diospallami kunaura kangichi. Iaia Jesucristota iuiarispas, nukanchipa Diospa Ispirituwa mana pandarigkunami niraiagsamurkangichi.

Iaia Jesusmi ka nukanchipa kuirputapas mandag

¹² Maikankuna, kasami ninkuna: “Nuka imasa munaskasina ruraspami kaugsangapa pudini”. Chasa pudirigpipas, tukui ima munaska ruraika mana allilla kanchu. “Nuka imasa munaskasina ruraspami kaugsangapa pudini” nigpipas, mana sakiringapa chaianchu, ima mana alli ruraikunawa wataskasina tukungapa.

¹³ Kasapasmi ninkuna: “Mikuika, wigsamandami ka; wigsaka, mikuimandami ka”. Chasa nigpipas, Taita Diosmi iskandikunata puchukangapa ka. Chasallata, nukanchipa kuirpuka mana kanchu, kari warmiwa jiru ruraspa kaugsangapa. Iaia Jesusmanda kaugsangapami chi kuirpu ruraska ka. Iaia Jesusmi ka nukanchipa kuirputapas mandag. ¹⁴ Imasami Taita Dios, Iaia Jesús wañuskata kaugsachirka: chasallatami paipa iapa iachaiwa nukanchipa kuirputapas kaugsachingapa ka.

¹⁵ ¿Manachu iachangichi, kamkunapa kuirpukuna, Cristopa kuirpumanda niraiagsina kagtakuna? Chimanda, ¿Cristopa kuirpumanda niraiaskatachu anchuchispa, karisapa warmiwa suglla tukusa? Ñi imaurapas chasaka manima. ¹⁶ ¿Manachu iachangichi, maikanpas karisapa warmiwa suglla tukugka, suglla kuirpusina

kagta? Chasallatami ñugpamanda librupi willaraiá, kasa nispa:

Kari warmiwa iskandikuna, suglla kuirpusinami tukunkuna.

¹⁷ Ikuti maikanpas Iaia Jesuswa suglla tukugka, suglla ispirituwami paipa tukugsamunchi.

¹⁸ Chimanda, mana iuiaichi, chi jiru pingaipa rurangapa. Tukui sug rigcha pandariikunata mana kikipa kuirpupi ruraska niraianchu. Ikuti maikanpas kari warmiwa jiru pingaipa pandariskaka, chikar kikipa kuirpupimi pandariska rurá. ¹⁹ ¿Manachu iachangichi, kamkunapa kuirpu, Santu Ispiritu kaugsadiru kagta? Santu Ispiritutami Taita Dios kamkunata karamurka. Pai Santu Ispiritumi kamkunapi kaugsaku. Chimanda, kam kikinkuna mana kangichichu kam kikinkunamanda. ²⁰ Jesucristo wañuskawami Taita Dios kamkunata iapa balimanda randiska kangichi. Chimandami chaiá, kamkunapa kuirpuwapas Taita Diusta suma atuniachispa kaugsangapa.

Kasadukunamanda i mana kasadukunamanda

7 Kamkuna tapungapa kachamurkangichi; chikunataka kunaurami ainingapa kaikichita. Karikuna mana kasarangapa, allillami ka. ² Chasa kagpipas, kari warmiwa jiru ruraspa kaugsanakungapa munaikuna tiagmandami chaiaku, karikuna, kasaraspas, kikipa warmiwa kaugsanakungapa; warmikunapas, chasallata kasaraspas, kikipa kusawa kaugsanakungapa. ³ Kusaka, kikipa warmita imasa chaiaskasina suma kuiachu. Warmipas chasallata kusata imasa chaiaskasina suma kuiachu. ⁴ Warmipa kuirpuka, mana pai kikipa kanchu; kusapami ka. Kusapa kuirpupas, mana pai kikipa kanchu; warmipami ka. ⁵ Chimanda, kusawa warmindiwa mana micharinakungichi. Iskandikuna sugllapi iuiarispas pudingichimi, sug punchakuna kuianakuskata sakispa, kamkunapa tukui suma iuiaiwa Taita Diusta imapas mañangakuna. Nispaka, ikutimi iukangichi sugllapi kuianakunga. Mana kagpika, iaia kuku pudinmi, kamkunata jiru pingaipa pandariikunapi urmachingakunata.

⁶ Nuka chasa niskawa, mana niikichitachu: “Kasarai-chi”. Iuiachigsinallami niikichita. ⁷ Nukapa iuiaipika nintraikichitami: tukuikuna nukasina kaichi, mana kasaraska. Chasa nigpipas, Taita Dioska kadaunta sug rigcha sug rigcha kaugsangapami ni.

⁸ Manara kasaraskakunata i sapalla kidaska warmikunataka kasami niikichita: kamkuna nukasina mana kasaraspas kaugsagpikunaka, allillami ka. ⁹ Chasa kagpipas, kamkunapa iuiai munaikunata mana arkangapa pudigpika, allillami ka kasarangapa. Chi iuiailawa puchukarikugtaka mas allillami ka kasarangapa.

¹⁰ Ña kasaraskakunataka, nuka mana niikichitachu. Iaia Jesusmi kasa ni: warmika, kusata mana sitachu.

¹¹ Kusawa sitanakuspa kaugsangapa chaiagpika, mana sug kari iukachu. Chasapaka, kikipa kusawa ikuti kaugsagsamuchu. Kusapas chasallata mana warmita sitachu.

¹² Ikuti sugkunataka mana Iaia Jesús niskata, nukami kasa niikichita: maikan waugkipa warmi, manara Cristota rigsiska kagpipas, paiwa kaugsangapa munagpika, pudinmi kaugsangakuna. ¹³ Chasallata maikan warmipa kusa, manara Cristota rigsiska kagpipas, paiwa kaugsangapa munagpika, pudinmi kaugsangakuna. ¹⁴ Manara Cristota rigsiska kusaka, paiwa tukuska warmimanda Taita Diuspalla tukuskami niraiá. Chasallata manara Cristota rigsiska warmipas, paiwa tukuska kusamandami Taita Diuspalla tukuska niraiá. Mana chasa kagpika, wambrakunapas mana Cristowa tukuskakunasinachar niraiantra. Kunauraka, Taita Diuspallami niraiankuna. ¹⁵ Chasa kagpipas, maikan mana Cristota rigsisk warmi u kusa sitanakungapa munagpika, sitanakuchu. Sitaska waugki u panika, ña mana wataskasina kanchu. Taita Diuska, kamkunata agllarkami, sumaglla mana piñachinakuspalla kaugsangapa. ¹⁶ Kam warmi, ¿imasatak iachankangi, kamba kusata Cristomanda kispichii tukungapa kagta? Chasallata kam kusapas, ¿imasatak iachankangi, kamba warmita Cristomanda kispichii tukungapa kagta?

¹⁷ Imasami Iaia Jesús, kadaunta kararka: chasatami kaugsangapa chaiá. Taita Dius kamkunata agllaura, imasami karkangichi: chasallapita kaugsanakuichi. Chasallatami tukuikunapi Cristowa tukuskakunata iachachini. ¹⁸ Maikanpas, Taita Dius agllaura, ña judiukunapa marka churaska kagka, chasapi kidachu. Chasallata maikanpas, Taita Dius agllaura, chi marka mana churaska kagka, mana churachirikuchu. ¹⁹ Judiukunapa marka churaska u mana churaska, ñi ima mana niraianchu. Taita Dius ima niskakunatami allilla ruraspa kaugsangapa chaiá. ²⁰ Sug sug, imasami Taita Dius agllaura kaugsanakurka: chasallapita kaugsanakuchu.

²¹ Chasallata, Taita Dius kamta agllaura, lutrin kaspaka, alli iuiachiwa kangki. Chasa kaspapas, patrunkamanda kacharichii pudigpika, mas allimi kanga. ²² Iaia Jesuswa tukungapa Taita Dius agllaura, lutrinka Iaia Jesusmanda kaugsangapami kachariska tukugsamú. Chasallata maikanpas, Taita Dius agllaura, mana patrunka lutrinsina kagka Iaia Jesuspa lutrinsinami tukugsamú. ²³ Jesucristo wañuskawami Taita Dius kamkunata iapa balimanda randiska kangichi. Chimanda, runakunapa iuiaiwa wataskasina mana tukugsamuichi. ²⁴ Taitakuna i mamakuna, sug sug imasami Taita Dius agllaura karkangichi: chasallapita kaugsanakuichi, Taita Diusmandalla sumaglla kaugsaspa.

²⁵ Mana kasadukunamandaka tapungapa kachamurkangichi. Iaia Jesús, mana imapas niwarkachu. Chasa kagpipas, Iaia Jesús nukata llakiriwaspa, “Allillami rurangi” niwagmandami nuka mana ianga rimaikichita. Chimanda, nuka iuiakuskatami kasa niikichita. ²⁶ Nukapa iuiaipei nintraikichitachar: kai punchakuna iapa llakiiwa kaugsangapa chaiaskamanda, sug sug imasa kaugsakuskapi kapuaichi. ²⁷ Kam kari, warmiiug kaspaka, mana iuiakungi sitangapa. Mana warmiiug kaspaka, mana kasarangapa iuiakungi. ²⁸ Kasaraspaka, mana pandaringichu. Chasallata, maikan sipas kasa-

raspaka, mana pandarinchu. Chasa kagpipas, kasaragkunaka llakiiwi iukangapa kankuna, kaugsankama. Chasa llakiiwuna mana iukangapami chasa iuiachina-kuikichita.

²⁹ Taitakuna i mamakuna, kasami niikichita: sug ratullami kai alpapi kaugsangapa kanchi. Chimanda, kuna-uramanda kusakunata chaiá, mana warmiiug kagsina kaugsangapa; chasaka, Iaia Jesús ima niskata tukui iuiaiwa rurangapa. ³⁰ Llakiiwa wakagkunapas, mana llakiiwa kagsina kaugsangapami chaiá. Atun pucha kusikuspa sumaglla ialichigkunapas, mana chasa kagsina kangapami chaiá. Randigkunapas, mana kikinpa kagsina iuiaspami kangapa chaiá. ³¹ Chasallata, kai alpapi maituku ima iukaskapas, ñi ima mana iukagsina iuiaspami kangapa chaiá. Kai alpapi imasa kawariskakuna, ñami tukuriska riku.

³² Kamkunata munaikichitami: mana llakiiwwa sumaglla kaugsanrangichi. Mana kasaraska kari, Iaia Jesusllawa iuiarispas, paita kuntintachingapagllami kaugsangapa chaiá. ³³ Ikuti kasaraska karika, kai alpapi ima tiaskamanda iuiarispas, paipa warmitapas kuntintachingapami kaugsá. ³⁴ Chiwa iskandima —Iaia Jesusmanda i warmindimandapas— iuiarispami kaugsangapa chaiá. Chasallata, mana kasaraska warmi u sipas, Iaia Jesusllawa iuiarispas kaugsangapami chaiá. Chasaka, paipa kuirpu i isíritu, Taita Diuspallami kanga. Ikuti kasaraska warmika, kai alpapi ima tiaskamanda iuiarispas, paipa kusatapas kuntintachingapami kaugsá.

³⁵ Chasa nispaka, piñai mana piñaikichitachu. Kamkuna allilla kaugsangapami chasa iuiachiikichita; chasaka, Iaia Jesusmanda tukui iuiaiwa allilla kaugsangapa.

³⁶ Maikanpas, paita animuriska warmimanda iuiakuspa nichu: “Ña watakuna iukaspaka, allillami ka, nukanchi kasarangapa”: chasa iuiarispaka, allillami ka kasarangapa. Kasaraskapika, ñi ima pandariipas mana tianchu. ³⁷ Ikuti maikanpas, suma iuiarispas, kikinlla nichu: “Nukata mana ministiwanchu animuskawa kasarangapa”: chi runaka, kikinpa iuiaiwa chasa munagpika, allillami ka. ³⁸ Chasaka, maikanpas paita animuriskawa kasaragka allillami rurá. Maikanpas mana kasaragka, mas allillami rurá.

³⁹ Kusaiug warmika, kusa kaugsankama, paiwa wataskasinami niraiá. Kusa wañugpika, ña mana wataskasina kaspas, pudinmi maikan munaskawa kasaranga. Iaia Jesuswa tukuska runallowantami chaiá kasarangapa. ⁴⁰ Nuka chasa nigpipas, nukapa iuiaipika, mana ikuti kasaragpika, mas allillami kaugsaiapa. Nukapas, Diuspa Ispirituwa kagta iuiaspami chasa niikichita.

Ianga diuskunata kamariku karaska aichamanda

8 Kunauraka, ianga diuskunata kamariku karaska aichamandami willangapa kaikichita. Sutipami tukuikuna allilla iachanchi, ianga dius mana imapas niraiagta. Chasa iachaiwaka atuniachiskasinami iuiarispas tukunchi; chika mana allilla kanchu. Parijuma kuiana-

kuiwami Cristowa suma iuiarig wiñagsina tukug-samunchi. ² Maikanpas ña allilla iachag kagta iuiaris-papas, imasa allilla iachangapa chaiaskataka manara allilla iachanchu. ³ Ikuti maikanpas Taita Diusta kuiag-ka, Taita Diuspa rigsiskami niraiá.

⁴ Chasamanda, ianga diuskunata kamariku karaska aichata mikungapa kaskamanda kasami niikichita: kai alpapi ianga diuskunaka, mana imapas niraiianchu. Suglla Taita Dius tiagtami iachanchi. ⁵ Sugkuna nichukuna: "Sug luarpi i kai alpa luarpi achka diuskuna i achka iaiakunasi tia": ⁶ chasa ninakugpipas, nukanchi-mandaka suglla Taita Diusmi tia. Paika, tukui ruragmi ka. Nukanchipas, paipami kanchi. Chasallata, suglla Ia-ia Jesucristomi tia. Paimandami tukui imapas tiag-samú. Nukanchipas, paimandami kaugsanchi.

⁷ Chasa willaskakunata, tukuikuna manara iachan-kunachu. Maikankuna, ianga diusta kungurispa muchag kaskakuna, aicha mikuspa, iuiankuna: "Sug diusta kamariku karaska aichatami mikuni". Chasa mikuspaka, manara Cristota allilla rigsispami pai-kunapa iuiiakunata mapaiachigsina rurarinkuna.

⁸ Chasa rurarigpipas, Taita Diuska mana chaskigsina ruranchu nukanchi ima mikuskata. Chi aichata mikug-pi u mana mikugpika, paipa ñawipika mana niraiianchu mas alli u mana alli. ⁹ Chi aichata mikungapa pudirig-pipas, ujala Cristota manara allilla rigsigkuna, kamta chasa kawaspa, chasallata mikuspa, sug diusta muchagsina ruragkunata iuiarispa pandarichukuna!

¹⁰ Kam, allilla iachag kaspera, ianga diusta iuiaridiru ukupi mikukugpika, Cristota manara allilla rigsigka, kamta chipi kawaspa, ¿manachu paipas munaringa, ianga diusta kamariku karaska aichata mikungapa? Chasaka paipas, ianga diusta iuiarigsinami ruranga. ¹¹ Chi-wanka kam, allilla iachag kaspera, chi manara Cristota allilla rigsigta puchukagsinami rurangi, Cristo paimanda wañuchii tukuska kagpipas. ¹² Cristota manara allilla rigsigkunata chasa pandachispa, paikunata mana allillami rurangi. Chasa ruraspaka, Cristotami pandaringi. ¹³ Chimanda, nuka ima mikuskawa nukapa waugkindita pandachigpika, nuka ñi imaurapas mana mas chi aichata mikusachu. Chasa kawaspaka, paika mana pandaripuungachu.

Iaia Jesús kachaskakuna, ima sugkunata mañangapa pudiskamanda

⁹ ¿Manachu pudini, nuka ima munaskasina rurangapa? ¿Manachu nukanchipa Iaia Jesús kikin kachamuwaska runa kani? ¿Manachu nukanchipa Iaia Jesusta kawarkani? ¿Manachu kamkuna, paimanda nuka rurakuskata allilla kawachipuag kangichi? ² Sugkunaka, nukamanda nichukuna: Iaia Jesús mana kachamuwaskasi kani. Ikuti kamkunaka, nukamanda allillami iachapuungichi. Kamkuna Iaia Jesuswa tukuspami kawachipuungichi, Iaia Jesús kikin kachamu-waska kagta.

³ Wasa rimawagkunataka kasami ainini: ⁴ nukanchi Alli Willaita willaspa purigkunaka, ¿manachu pudinchi, mikui i upiai chaskispa kaugsanga? ⁵ ¿Manachu pudin-

chi, Jesuswa tukuska warmiwa kasaraspa pusangapa; imasami sugkuna Iaia Jesús kikin kachaskakuna, paipa waugkindikuna i Pedro, warmindita pusankuna: chasa? ⁶ ¿Bernabé i nukallachu iukanchi trabajaspa kaugsanakunga? Manima.

⁷ Ñi maikan suldadu tukuspa, mana kikinpa kulkiwa kaugsangapa kanchu. Pipas ubas u ima mikui tarpuspa iukaskata, ¿manachu pukuura pallaspa mikungapa pudí? Ubijakuna iukagpas, ¿manachu lichi kapispa upiangapa pudí? ⁸ ¿Nuka kikinpa iuiailawachu nuka chasa rimakuni? ¿Manachu Moisés iskribiska sakiskapipas chasallata willaraiá? ⁹ Kasami Moisés niska librupi willaraiá:

Triguta saruspa iskug wagrata
mana simita watangi.

Taita Diuska, mana wagrakunamandalla chasa willarkachu. ¹⁰ ¿Manachu nukanchimanda chasa willarka? Ari, nukanchi allilla kangapami chasa willarka. Chasaka, tarpungapa alpata allichig i triguta iskuchigpas, ima rasiunpas chaskingapa iuiaspami chasa trabajan-kuna. ¹¹ Chasamanda, nukanchi kamkunapa umapi tarpugsina Alli Willaita willaspaka, ¿manachu iukanchi, pallagsina kai alpapi ima ministiskakunamanda kamkunata chaskinga? ¹² Sug iachachigkuna kamkunata imapas chaskii pudigpikunaka, nukanchika, ¿manachu maspas pudinranchi chaskingapa?

Nukanchi chasa pudispapas, mana imapas mañanchichu. Chasapaka, ima llakiiwa kaspapas, upallami kanchi; chasaka, Cristomanda Alli Willaita mana imapi-pas arkagsina rurangapa. ¹³ ¿Manachu iachangichi, Taita Diuspa atun wasipi aidagkuna, chi wasima ima kamariku apaskakunata mikuspa kaugsanakugta? Altarpi aidagkunapas, chi altarma ima mikui apaskakunata mikuspami kaugsanakú. ¹⁴ Iaia Jesuska chasallatami nirka: Alli Willaita willagkuna, chi Willaimanda ima mikui karaskawami kaugsanakunga. ¹⁵ Chasa kagpipas, nukaka, Alli Willaita willaskamanda, ñi pitapas mana imapas mañakunichu. Kunaupas, mana chasa niikichitachu, kamkuna imapas karawangapa. Nuka manara pitapas mañaspallami munantrani wañungapa; chiwanka, chi Willaimanda ñi ima mana mañaspallakaspera, alli iuiachiillawa wañungapa.

¹⁶ Alli Willaita nuka willakuskaka, mana kanchu nuka kikin atuniachiringapa. Nukata chaiawanmi, tukui-kunata willaspa puringapa. Alli Willaita nuka mana willaspaka, ¿jai, imachar pasariwantra! ¹⁷ Nukapa iuiailawa Alli Willaita willakugpika, iukantranimi imapas kamkunata mañanga. Nukata chaiawagmandami, Taita Dius mingawaskallata willakuni. ¹⁸ Chasa willaspa puriskamanda, ¿imatak mañaspa kani? Mana imapas mañaspallami willaspa purini. Alli Willaita willaspa puriskamanda, ima mañangapa pudispapas, mana imapas mañanichu.

¹⁹ Nuka, ñi pipa lutrin mana kanichu. Chasa kaspapas, tukuikunapa lutrinsinami tukuspa purini; chasawaka achka runakuna, nuka Cristomanda rimaskata uiawaspa, paiwa tukungapakuna. ²⁰ Judiukunawa nuka kauraka, judiusinami tukuni, paikuna Cristowa tukun-

gapakuna. Chasallata, Moisés ima rurangapa willaskata uiagkunawa nuka kauraka, nuka chi willaraiaskawa mana kaugsaspapas, chi willaskata uiagsinami tukuni; chasaka paikunapas, Cristowa tukungapakuna. ²¹ Moisés niskata mana iukagkunawa nuka kauraka, paikunasinami tukuni; chasaka paikunapas, Cristowa tukungapakuna. Nuka chasa tukuspapas, Taita Dios ima rurangapa niskatami iui ai apani. Chiwanka, Cristo ima niskatami ruraspa kaugsani. ²² Cristota manara allilla rigsigkunawa nuka kaura, paikunasinami purini; chasaka paikunapas, Cristowa tukungapakuna. Maikanwa nuka kaurapas, paikunasinami tukuspa purini; chasaka, imasapipas maikankunallapas kispirispas, Cristowa tukungapakuna. ²³ Imasa purispapas, Alli Willaita willaspami purikuni; chasaka, Taita Dios ima karangapa niskata nukapas chaskigringapa.

²⁴ ¿Manachu iachangichi: kalpanakugpura pugllaipi, achkakuna kalpanakuskamanda sugllami primiuta chaskí? Chimanda kamkunapas, primiuta chaskingapa kalpanakugsina kaugsai chi. ²⁵ Maikan pugllangapa allichirikugta chaiakumi, tukui ima mana chaia kaskata sakingapa. Chasawaka, allilla llugsigpika, pudinmi tukuridiru primiuta chaskinga. Ikuti nukanchika, mana tukuridiru primiuta chaskingapami kalpanakugsina kaugsanchi. ²⁶ Chimandami nukaka, maíma chaiagringapa mana rigsispalla kalpakugsina mana rurakuni. Chasallata, nuka makanakuskapi wairallata piakugsina mana rurakunichu. ²⁷ Chasapaka, nuka kikinpa kuirputami asutispasina charini, mana pandaringapa. Chasaka, nuka ima allilla munaskatami ruraspa. Mana kagpika, pudinimi, sugkunata allilla iuiachikuspapas, nuka kikinka ñi ima primiutapas mana chaskinga.

“Tanga diuskunata mana iuiaringichi”

10 Taitakuna i mamakuna, mana kungaringichi nukanchipa ñugpamanda achala taitakunata ima pasariskata. Tukui paikuna, Taita Dios pusakuska puii ukupimi rinakurka. Chasallata tukuikuna, Puka Kucha suti kaskapimi ialirkakuna. ² Chi puiiwa i iakupi ialispami tukuikuna baugtisaska niraiarkakuna, Moiseswa tukungapa. ³ Tukuikunami Taita Dios kachamuska mikuita mikurkakuna. ⁴ Chasallata tukuikunami Taita Dios kachamuska upi aita upiarkakuna. Paikuna chusa sitaska alpapi purinakuskapi, sug atun rumisina kawarimi paikunawa purikurka. Chika, kikin Cristollatatami karka. Chi rumimandami iaku llugsirka, tukui-kuna upiangapa. ⁵ Chasa kagpipas, ñalla tukuikunami Taita Diusta mana kuntintachirkakuna. Chimandami, chi chusa sitaska alpapi purinakuspa, ñallapas tukui wañurkakuna.

⁶ Chasami paikunata pasarirka, nukanchi chasapi allilla iuiaringapa. Paikuna, mana allillata munarkakuna; ñujalallapas nukanchita chasallata munarigsamuchu!

⁷ Paipura sugkuna, ianga diuskunata iuiarirkakuna; ñujalallapas kamkuna, chasallata iuiarinakungichi!

Kasami paikunamanda willaraiá:

Paikuna, mikungapa i upiangapami tiarirkakuna.

Nispa atarirkakuna,

jiru pugllaikuna pugllangapa.

⁸ Paipura sugkuna, kari warmiwa pandarirkakuna; ñujalallapas nukanchi, chasallata pandarinakusunchi! Chasa pandarigkunaka, sug punchallami iskai chungakimsa waranga wañurkakuna. ⁹ Sugkunaka, Taita Diusta ninakurka: “Abir: ¿pudingichu?”; ñujalallapas nukanchi, chasallata Cristota ninakusunchi! Chasa ñugpata nigkunataka, kulibrakuna kanispami wañuchii tukurkakuna. ¹⁰ Sugkunaka, Taita Diosmanda mana allilla rimanakurka. Chasa rimanakuskataka, sug wañuchig anjilmi puchukagsamurkakunata. ñUjalallapas kamkuna, imapipas chasa rimanakungichi!

¹¹ Nukanchipa ñugpamanda achala taitakunata chasami pasarirka, nukanchi chasapi allilla iuiaringapa. Chasa ñugpamanda librupimi willaraiá, nukanchi kai tukurii punchakuna kaugsagkuna, chasa pasariskata iachaspaka, mana pandaringapa. ¹² Chimanda maikanpas “Nuka, allimi kani” iuiarispas kag, ñujalallapas imapipas pandarichu! ¹³ Kamkunata ima pandariipi urmachingapa iuiakuna chaiagpika, chikunata nukanchi runakuna, Taita Diospa iapa iachaiwami pudinchi bisinga. Taita Dioska, pai tukui ima niskatami rurá. Paika mana sakingapa kanchu, mana bisingasina jiru iuiakuna chaiangapa. Kamkunata ima jiru iuiaipas chaiaura, paillatatami sumaglla iuiaitapas iuiachingapa ka; chiwanka, jiru iuiakunata bisingapa.

¹⁴ Chimanda, nuka kuiaskakuna, sakiichi, ianga diuskunata iuiaringapa. ¹⁵ Allilla iuiaiugkunatami rimankuikichita. Nuka ima rimakuskataka, kam kikinkunami iukangichi iuiaringakuna. ¹⁶ Bindisaska kupamanda, “Pai Siñur” Taita Diustami ninchi. Chi kupapi upiaspa, ¿manachu Cristopa iawarwa suglla tukugsina niraianchi? Chasallata, tandata chaugpi chaugpi pitichispa, nukanchi mikuska, ¿manachu Cristopa kuirpuwa suglla tukugsina niraianchi? ¹⁷ Nukanchi, maituku achkakuna kaspapas, suglla tandata tukuikuna mikuspa, suglla tukugsinami niraianchi.

¹⁸ Israelmanda runakuna ima ruraskakunamanda iuiariichi. Taita Diusta kamarikusina karaska animalkunapa aichata mikugkunaka, ¿manachu chi kamarikuwa suglla tukugsina niraiankuna? ¹⁹ Chasa nispaka, mana niikichitachu ianga diuskuna ima niraiagta, ñi chi diuskunata kamariku karaska aichaka, sug aichakunamandapas mas bali kagta. ²⁰ Kasami niikichita: Taita Diusta manara rigsigkuna, ianga diusta kamariku karaskaka, kuku wairakunatami karankuna. Chasa kagmandami mana munani, kamkuna chasa ruraspa, kuku wairakunawa suglla tukungapakuna. ²¹ Mana iukangichichu, kuku wairakunawa suglla tukugsina kangapa kupapi upiangakuna; nispaka, ikuti Iaia Jesuswa suglla tukugsina niraiangapa kupapipas upiangakuna. Chasallata, mana iukangichichu, kuku wairakunawa suglla tukugsina niraiangapa mikungakuna; nispaka, ikuti Iaia Jesuswa suglla tukugsina niraiangapapas mikungakuna. ²² Chasa iskandima ruranakugmandaka, ¿munanchichu Iaia Jesusta rabiachingapa? ¿Nukanchi paimanda mas pudigkunachu kanchi? Manima.

Tukuipi Taita Diusta atuniachii iukaskakunamanda

²³ Maikankuna, kasami ninkuna: “Nuka imasa munaskasina ruraspami kaugsangapa pudini”. Chasa pudirigpipas, tukui ima munaska ruraika mana allilla kanchu. “Nuka imasa munaskasina ruraspami kaugsangapa pudini” nigpipas, tukui ima munaska ruraika, nukanchimanda allillapa mana kanchu. ²⁴ ¡Ujalallapas kam kikinkunamandalla ima ruraspapas kaugsangichi! Sugkunamandapasmi iukangichi allilla ruraspa kaugsanangkuna.

²⁵ Aicha katudirupi randiska aichata mikuichi, mana imapas iuiarispalla i tapuspalla. ²⁶ Kai alpa i tukui ima alpapi tiaskapas, atun Taita Diospa kaskamandami pudingichi tukui mikungu. ²⁷ Maikan manara Cristota rigsig mikungapa kunbidagpika, riichi. Ima karaskata mikungichi, mana imapas iuiarispalla i tapuspalla. ²⁸ Ikuti “Kai aicha, sug diusta kamariku karaskami ka” maikan nigpika, chita mana mikungichi. Chasa willagmanda i paipa iuiaimandami mana iukangichi mikungakuna. ²⁹ Kam kikinpa iuiaimandaka mana chasa niikichitachu. Chi willag iuiakumi, chi aichata mikuspa, sug diusta iuiarigsina ruragta; chimandami chasa niikichita.

Chasa kagpipas, sugka nichu: “Nuka ima rurai munaskakataka, ¿imapatak mana chasa rurai pudini, sug runa sug rigcha iuiakugmanda? ³⁰ Nuka Taita Diusta: ‘Pai Siñur’ nispa mikugpika, ¿imapatak nuka mikuskamanda pipas piñawanga?”. ³¹ Kamkuna ima mikuspa, upiaspa u ruraspa, tukuipi Taita Diusta: “Pai Siñur; iapa suma atunmi kangi” nispa kangichi. ³² Kasapasmi iukangichi kaugsanga: mana imapipas pandachispalla judiukunata, ñi mana judíu kagkunata ñi Taita Dioswa tukuskakunata. ³³ Chasa munaspami nuka kaugsani, tukuikunata tukuipi kuntintachispa kangapa. Nukamandalla mana imapas ruraspa kaugsakunichu. Tukui sugkunamandami allilla ruraspa kaugsakuni; chasaka paikunapas, Cristowa tukuspa, kispiringapa.

11 Imasami nuka, Cristosina allilla kaugsaspa kani: chasallata kamkunapas, nukata kawawaspa, allilla kaugsangichi.

Warmikuna, umapi katarichukuna, niskamanda

² Kamkuna imapipas iuiariwanakuskamanda i nuka willaspa iachachiskakunata katichinakuskamanda, niikichitami: “Allillami ruranakungichi”. ³ Chasa nisapas, munanimi kamkunata kasa iachachingapa: Cristoka, tukui karikunapa iaiami ka, uma kagsina. Chasallata, imasami Taita Dios, Cristopa iaia ka: chasallata kuspapas, paipa warmipa iaiami ka. ⁴ Maikan karipas, Taita Diusta mañakuspa u Santu Ispíritu iuiachiskata willakuspa, paipa umata ima katangapas churarispa kagpika, Cristota unzagsinami rurá. ⁵ Maikan warmipas, Taita Diusta mañakuspa u Santu Ispíritu iuiachiskata willakuspa, paipa umata mana katarispaka, chasallata paipa kusata unzagsinami rurá. Paipa umata mana katariskaka, agcha rutuskasinami niraiá. ⁶ Maikan war-

mi umata mana katarigpika, tukui agchata rutuchichu. Maikan warmita agcha limpiu rutuskaka, pingaipami kawarí. Chimanda, umapi imawapas katarichu. ⁷ Kari-ka, Taita Diussina ñalla rigcha kaspas, pai suma atun kagta kawachigmanda, umata mana imapas taparichu. Ikuti warmika, kusa suma atun kagtami kawachí. ⁸ Taita Dioska, ñugpa karita mana warmimanda surkuspa rurarkachu. Ñugpa warmitami karimanda surkuspa rurarka. ⁹ Chasallata Taita Dioska, ñugpa karita mana warmimanda allillapa rurarkachu. Warmitami karimanda allillapa rurarka. ¹⁰ Chimandami warmi iuká, umapi katariska kangas; chasaka, kusa iaia kagta niraianagapa. Anjilkunapas tiagmandami umapi katariska iuká kangas.

¹¹ Chasa kagpipas, Iaia Jesuspa ñawipi mana tianchu kari mana warmiwa, ñi warmi mana kariwa. ¹² Imasami ñugpa warmi, karimanda surkui tukuspa tiagsamurka: chasallatami kunaurakuna karipas, warmimanda tiagsamú. Chasa kagmandami tukui iskandikuna Taita Diospa makimanda tiagsamunkuna.

¹³ Kam kikinkuna iuiariichi: warmi Taita Diusta mañakuspa, umapi mana katariska kagpika, ¿allillachu ka u mana allillachu ka? ¹⁴ Kari paipa agchata suni wiñachirigpika, pingaipami kawarí. Chita, ¿manachu iuiaringichi, pingaipa mana allilla kagta? ¹⁵ Ikuti warmika, paipa agchata suni wiñachiska iukagpika, sumagllami kawarí. Chi suni agchata, Taita Diosmi karamurka; chiwanka, umata katariska kangapa. ¹⁶ Maikanpas nuka iachachiskata wabutigka, kasa iuiarichu: ñi nukanchi ñi Taita Dioswa tukuskakuna sugnigta kaugsagkunapas, mana sug rigcha kaugsanchichu.

Iaia Jesusta iuiaringapa tandarinakuskapi, jiru ruranakuskamanda

¹⁷ Nuka kunaora ningapa kaskamandaka mana niikichitachu: “Allillami ruranakungichi”. Kamkuna sugllapi tandariska kaskapika, allilla rurangataka, tandaringichimi, mana allilla rurangapaglla. ¹⁸ Tukuimanda ñugpaka, kasami uiani: kamkuna, Taita Diusta iuiaringataka, kallaringichisi, sug rigcha sug rigcha rimaspa achkama tukunakunga. Chitaka, sug mailla sutipa kagtami iuiani. ¹⁹ Sug rigcha sug rigcha iuiakunami tiangapa ka; chasawaka, kam kikinpura maikankuna Cristowa suma iuiarig kagkuna kawaringapa. ²⁰ Kamkuna, mana suglla iuiaiwa tandaringichichu. Chiwami kamkuna mana mikunakungichi, Iaia Jesusta allilla iuiarispas. ²¹ Kamkuna mikungapa tandariuraka, sug sug kikinpa mikuita mikuimi kallaringichi, sugkunata mana sugllapi kangapa suiaspalla. Chasapika sugkuna, iarkaimandami kankuna. Ikuti sugkunaka, machagtami upiankuna. ²² Chasa ruranakuspaka, ¿manachu Taita Dioswa tukuskakunata wasa churagsina ruranakungichi? ¿Manachu mana mikui iukagkunata pingaiachigsina ruranakungichi? ¿Manachu wasi iukangichi, chipika mikungapa i upiangapa? ¿Imatak nisakichita? ¿Nisakichitachu: “Allillami ruranakungichi”? Chasa ruranakuskata niikichitami: “Mana allilla ruranakungichichu”.

²³ Iaia Jesús ima nukata willawaskatami kamkunatapas kasa iachachigsamurkaikichita. Iaia Jesusta apingapa tuta kaura, paika, tandata makipi charirispa, ²⁴ “Pai Siñur” Taita Diusta nispa, tandatami pitichirka, katiraiagkunata kasa nispa: “Kai, nukapa kuirpumi ka, kamkunamanda karaska kangapa. Nukamanda iuiarispa, chasallata rurangichi”. ²⁵ Ña mikuskauramandaka, sug binu kupata chasallata charirispa, kasami nirka: “Kai binu kupa, nukapa iawarmi ka, Taita Diuswa i runakunawa ikuti pasinsiachirispa sumaglla tukungapa. Imaurapas chasallata upiaspaka, nukamanda iuiarispa rurangichi”. ²⁶ Chasamanda kamkuna, imaurapas chasallata tanda mikuspa, kupa binu upiaspaka, Iaia Jesús wañuskamandami willangichi, pai ikuti samunkama.

²⁷ Chasa kaskamandaka, maikanpas Iaia Jesús “Mikuichi” niska tandata mana suma iuiarispalla mikugpika, “Upiaichi” niska kupa binuta mana suma iuiarispalla upiagpika, Iaia Jesuspa kuirputa i iawarta sarugsinami rurá. Paitaka, Taita Diusmi justisiangapa ka. ²⁸ Chimandami, manara tandata mikuspa i binuta upiaspalla, iukangichi iuiaringa, kikinpa iuiapi allilla u mana allilla kagta. ²⁹ Maikanpas Iaia Jesuspa kuirpu kaskata mana suma iuiarispalla mikuchu upiachu: kikin justisiai tukungapami mikú i upiá. ³⁰ Chimandami kam kikinpura achkakuna, ungug i sambaiaska tiangichi. Sugkuna, chasamandami wañuska kankuna.

³¹ Nukanchi kikinkuna allilla iuiarispa kagpikunaka, manachar chasa llakiikuna iukanranchi. ³² Chi llakiikunawami Iaia Jesús nukanchita iuiachí; chasaka, kai alpapi jiru ruraspa kausanakugsina mana tukuspa, diltudupa ninama sitai tukungapa.

³³ Chimanda, taitakuna i mamakuna, sugllapi mikungapa tandaringapa chaiaura, suianakungichi, tukui-kuna chaiankama. ³⁴ Sutipa iarkaimanda kagkunaka, kikinpa wasipi mikugrichukuna. Chasaka, Taita Dius mana justisiangakunatachu. Sug imakunaka, nuka kamkunapagma chaiagrispami allilla iachachisakichita.

Santu Ispiritupa sug rigcha sug rigcha karamuikunamanda

12 Taitakuna i mamakuna, Santu Ispiritupa sug rigcha sug rigcha karamuikunamandaka munanimi, kamkunata kasa iachachingapa.

² Ñami iachangichi: kamkuna, manara Cristota rigsikuna kaspaka, sakirirkangichimi, mana rimagianga diuskunapagma sugllapi tukuspa ringapa. ³ Chimandami munani, kamkuna kasa iachangapa: ñi pipas Diuspa Ispirituwa rimagka mana pudinchu ninga: “Jesús, maldisiska kachu”. Santu Ispiritullawami maikanpas Jesusta ningapa pudí: “Nukapa iaiami kangí”.

⁴ Santu Ispiritu, nukanchita sugta sug rigcha, sugta sug rigchami karamú, suma iuiaiwa rurangapa. Chasa karamuspapas, suglla Ispiritumi tia. ⁵ Iaia Jesusmanda sug rigcha sug rigchami allilla ruranchi. Chasa ruragpipas, suglla Iaia Jesusmi tia. ⁶ Chasallata, sug rigcha sug rigchami pudinchi allilla rurangapa. Chasa pudirigipi-

pas, suglla Taita Diusmi tia. Paimi tukuikunata karamú, tukuipi allilla rurangapa.

⁷ Tukuikunatami Taita Dius paipa Ispirituta karamú, nukanchiwa kagta kawachingapa; chasaka, tukuikuna parijuma aidanakungapa. ⁸ Maikankunataka paipa Ispirituwa karamunmi, paipa iachaiwa rimangapa. Chasallata sugkunataka paipa Ispiritullawantami karamú, paipa suma iuiaiwa iachachingapa. ⁹ Ikuti sugkunataka paipa Ispirituwami iuiachí, ima kagpipas, pai ima niskata suma iuiaringapa. Sugkunataka suglla Santu Ispirituwami karamú, ungugkunata ambingapa. ¹⁰ Chasallata karamunmi, sugkunaka imaurapas mana kawaskasina rurangapa, i sugkunaka paipa Ispiritu iuiachiskata willangapa. Sugkunataka karamunmi, paipa alli Ispirituwa u mana alli kuku wairawa rimanakuskata rigsingapa. Chasallata sugkunataka iuiachinmi, mana iachaska rimaikunawa rimangapa i chi rimai-kunawa rimaska ima niraiaskata allilla willangapa. ¹¹ Kikin suglla Santu Ispiritumi tukui chasa iuiachispa karamú. Pai imasa munaskasinami tukuikunata sugta sug rigcha, sugta sug rigcha chi suma iuiaikunata karamú.

Tukui nukanchi, Cristopa suglla kuirpu tukuska niraiaskamanda

¹² Suglla kuirpupi, chaki, maki, uma, imapasmi iukan-chi. Chasa achka iukaspapas, tukui suglla kuirpumi kanchi. Chasallata Cristowa tukuskakunaka, suglla kagsinami niraianchi. ¹³ Tukui nukanchi baugtisaskakuna, judíu i mana judíu kagkunapas, patrunkuna i lutrinkunapas, suglla Santu Ispirituwa kagmandami suglla kuirpusina niraianchi. Tukui nukanchi, chi suglla Ispirituta chaskigkunami tukurkanchi.

¹⁴ Nukanchipa kuirpupi mana suglla suti tianchu; achkami tia. ¹⁵ Chaki, kasa nintra: “Nuka, maki mana kanichu. Chimanda mana kuirpumanda kanichu”; chasa nigpipas, kuirpumanda kangapa mana sakinchu. ¹⁶ Chasallata, rinri nintra: “Nuka, ñawi mana kanchi. Chimanda mana kuirpumanda kanichu”; chasa nigpipas, kuirpumanda kangapa mana sakinchu.

¹⁷ Tukui kuirpu ñawilla kagpika, manachar uangapa pudirintra. Chasallata, tukui kuirpu rinrilla kagpika, manachar asnangapa pudirintra. ¹⁸ Kuirpupi, Taita Dius tukuimi churarka, imasa munaskasina chaia kangapa. ¹⁹ Kuirpupi suglla suti tiagpika, manachar kuirpu kantra. ²⁰ Achka suti tiagpipas, suglla kuirpumi niraiá.

²¹ Chimanda ñawi, makita mana pudí ningapa: “Kamta mana ministiikichu”. Chasallata uma, chakikunata mana pudí ningapa: “Kamkunata mana ministiikichitachu”. ²² Kasapas. Kuirpupi mana balingasina kagkuna pudinmi, mas ministiska kangakuna. ²³ Kuirpupi tiaska mana munaskakunapasmi mas suma kuiaska kankuna. Chasallata, nukanchipa pingaikunata allillami kilpachirinchi. ²⁴ Ikuti mana pingaikunataka manapas kilpachirii chaianchu. Chasa kuirpupi, Taita Dius tukui-pimi allilla rurarka; chasaka, mana munaska kagkunapas mas suma kuiaska kangapa. ²⁵ Chasapika, mana sug rigcha sug rigcha iuiaikuna tiangachu. Kuirpupi

tukui tiaskakunawa allilla iuiaripa aidanakuspa kangapami Taita Dios chasa rurarka. ²⁶ Kasapas. Kuirpupi imapas nanagpika, tukui kuirpupimi nanai sintirí. Imapipas suma kuiaskasina kagpika, tukuimi alli iuiachirí.

²⁷ Imasami nirkaikichita: chasa kamkunapas, Cristopa suglla kuirpu tukuskami niraiangichi. Paipa kuirpumanda imasa chaiaskasinami tukuikuna kangichi.

²⁸ Cristowa tukui tukuskakunapuramanda, Taita Dios ñugpaka churarkami, Cristo kikin kachamuska runakuna tiangapa; paikunaka, Alli Willaita willaspa puringapa;

iskaimaka, paipa Santu Ispíritu iuiachiskata willagkuna tiangapa;

kimsamaka, paipa Suma Rimaita iachachigkuna tiangapa;

chimandaka, mana imaurapas kawaskata ruragkuna tiangapa;

chimandaka, ungugkunata suma ambigkuna, sugkunata suma aidagkuna, Cristowa tukuskakunata mandagkuna i mana iachaska rimaiwa rimagkuna tiangapa.

²⁹ Mana tukuikuna, Cristo kikin kachamuska runa kankunachu.

Mana tukuikuna, Santu Ispíritu iuiachiskata willagkankunachu.

Chasallata, mana tukuikuna, iachachigkuna i mana imaurapas kawaskata ruragkankunachu.

³⁰ Ikuti chasallata, mana tukuikuna, ungugkunata suma ambig, i mana iachaska rimaiwa rimag i chi rimaiwa rimaska ima niraiaskata allilla willagkankunachu.

³¹ Chimanda, Taita Diusta mañaichi karamuchu, chasakunamanda mas allilla ruragkuna tiangapa. Chasa tiagpipas, imasa askurinti mas allilla kaugsangapa kagtami kunaura iachachingapa kaikichita.

Sugkunata kuiaimanda

13 Tukui runakunapa i anjilkunapa rimaitapas nuka rimaspa, mana sugkunata kuiaspa kagpika, sug iru u platillu "Chilin Chilin" uiachirigsinallachar kantrani. ² Santu Ispíritu iuiachiskata nuka willantrani, i tukuimanda mana pipas iachaskawanta iachantrani, i Taita Dios ima niskata suma iuiaripa, lumakunata anchuchispa, sugma ialichingapa pudintrani; chasa kagpipas, sugkunata mana kuiaspa kagpika, ñi imapachar mana balintrani. ³ Mana ñi imapas iukaskakunata tukui ima nuka iukaskata karantrani, i nuka kikinpa kuirputa Cristomanda kuantrani rupachiwangapa; chasa kagpipas, sugkunata mana kuiaspa kagpika, iangallachar chasa rurantani.

⁴ Sugkunata kuiai niraianmi ima ministiska kaskakunata aidangapa i paikunawa mana piñachirinakuspalla kaugsangapa; paikunata jiru iuiaiwa mana kawangapa; chimanda, mana atuniachirigsina iuiaripa kangapa; "Sugkunamanda masmi kani; iapa bali mi kani": chasaka mana iuiaringapa. ⁵ Sugkunata kuiai niraianmi mana imajmandalla subirbiaspa i rabiarijsa

kangapa; mana kikinmandalla iuiaspa ima iukaskatapas kangapa; i maikan jiru ruraspas rabiachiskakunata mana iuiaringapa. ⁶ Sugkunata kuiai niraianmi maikan tapas ima llakii pasariskata iachaspaka, mana kuntintaringapa; ikuti maikanta ima allilla pasariskata iachaspaka, "Allillami ka" iuiaripa kuntintaringapa. ⁷ Chasa kuiag niraianmi Taita Dios ima niskata imapipas suma iuiaripa suiangapa; chasaka sugkuna, paiwa tukungapakuna; chimandaka, mana piwapas llakichirinakuspalla, ima llakiiwa kaspas, upalla kangapa.

⁸ Kuianakuika, imaurapasmi mana tukurispalla tiangapa ka. Ikuti Santu Ispíritu iuiachiskata willagkunaka tukuringapami kankuna. Mana iachaska rimaiwa rimagkuna i Diospa iachaiwa rimagkunapasmi chasallata tukuringapa kankuna. ⁹ Kunaura, imakunatapas maillallami iachanchi. Chasallata, Santu Ispíritu iuiachiskata chara maillami willanchi. ¹⁰ Tukui tukui allilla iacharigsamuuraka, chi mailla iachaika tukuringapami ka.

¹¹ Nuka uchulla kaura, imasa rimaspa, iuiaspa, iachaspa, uchullasinami iuiaspa karkani. Ikuti ña atun wiñaska kauraka, uchullasina iuiakunata sakirkanimi.

¹² Chasallata, kunaura mana suma ispijupi kawarigsinami Taita Diusta iuiapi kawanchi. Mas nispami ñawi ñawi paiwa kawanakusunchi. Kunaura, maillallami iachani. Mas nispaka, imasami Taita Dios, nukata rigsiwá: chasallatami nukapas, allilla rigsiwá i iachaiwa paita kawasa.

¹³ Taita Dios ima niskata suma iuiariikuna, paita suma suaikuna i suma kuianakui, imaurapas tiangallami. Chi kimsandimanda mas ministiskaka kanmi kuianakui.

Mana iachaska rimaikunawa rimagkunamanda i Santu Ispíritu iuiachiskata willagkunamanda

14 Imaurapas kuianakuspa kaugsangichi. Chasallata munangichi, Santu Ispíritu karamuchu, allilla ruragkuna tiangapa. Santu Ispíritu iuiachiskata willangapa masmi iukangichi munanga. ² Maikanpas mana iachaska rimaiwa rimagka, sug runakunata mana rimanchu. Taita Diosllatami rimá. Santu Ispirituwa chasa rimagpipas, paita uiagkunaka mana imapas iachangapa pudinkunachu. ³ Ikuti Santu Ispíritu iuiachiskata willagka, sugkunata alli suma iuiachingapami willá. ⁴ Mana iachaska rimaiwa rimagka, kikinllatami alli suma iuiai iuiachirí. Ikuti Santu Ispíritu iuiachiskata willagka, Cristowa tukuskakunatami alli suma iuiai iuiachí.

⁵ Tukui kamkuna, mana iachaska rimaikunawa rima nakunrangichi; nuka masmi munantrani, kamkuna, Santu Ispíritu iuiachiskata willanrangichi. Santu Ispíritu iuiachiskata willag, mana iachaska rimaiwa rimagmanda mas allillami ka. Mana iachaska rimaiwa rimaska ima niraiaskata willachu, Cristowa tukuskakunata alli suma iuiai iuiachingapa: chipas, allillami rurá.

⁶ Chasaka, taitakuna i mamakuna, nuka kamkunapagma chaiagrispa, mana iachaska rimaikunawa rimagpika, ñi imapas mana kamkunamanda allilla

tukunchu. Ikuti imasa Taita Dios muskui ukupisina kawachiwaskata u allilla iachaskata iachachispa, paipa Ispíritu iuiachiwaskata willagpika, kamkunamanda mas allimi tukú.

⁷ Flaugta, arpa i sug rigcha uiachidirukuna, tukui-kuna sugllasina uiarinakugpika, mana iacharintrachu maikanta uianga. ⁸ Chasallata, sug puibluwa sug puibluwa wañuchinakuima llugsingapa bututu mana sinchi pukui uiarigpika, ñi pipas manachar allichirintra-kuna, chi wañuchinakuima ringapa. ⁹ Chasallata kamkunapas, uiagkuna mana iachaska rimaiwa rimanakugpika, ¿imasatak iachangakuna ima niraiagta? Iangallami wairata rimagsina kantra.

¹⁰ Kai alpapi maituku rimaikunapasmi tia. Ñi maikan rimaipas, ianga mana pudí tianga. ¹¹ Chasa tiagpipas, maikan mana nuka iachaska rimaiwa rimawagpika, chi rimaika ima niraiaskata nuka mana iachaspaka, sug alpamanda kagsinami parijuma kantranchi. ¹² Chasa kaskamanda, kamkuna, Santu Ispíritu karamuskakunawa allilla ruragkuna tiangapa munaspaka, iukan-gichimi mas munangakuna, Cristowa tukuskakunata alli suma iuiai iuiachispa iuiaikunawa kangapa.

¹³ Maikanpas mana iachaska rimaiwa rimagka, Taita Diusta mañachu, chi rimaita ima niraiaskata allilla iachangapa. ¹⁴ Mana iachaska rimaiwa Taita Diusta nuka mañakuspa kagpika, nukapa ispiritullawami mañakuni; nukapa iuiaiika, nukawa mana kagsinami ka. ¹⁵ Chasa kagpika, ¿imatak iukani ruranga? Iukanimi, nukapa ispirituwa Taita Diusta mañakuura, nukapa iuiaiwapas sugllapi kanga. Chasallata nukapa ispirituwa kantakuura, iukanimi nukapa iuiaiwapas sugllapi kankungu. ¹⁶ Kamba ispiritullawa Taita Diusta: “Pai Siñur” nispa kagpika, mana iachagka, kam chasa nikuskata uiaspa, ¿imasatak pudinga kamwa ningapa: “Chasa kachu”? ¹⁷ Taita Diusta: “Pai Siñur” kam sumaglla nigpipas, chi sugka, uiaspapas, mana iachaspaka, ¿imasatak alli suma iuiai iuiachii tukunga? ¹⁸ Nukaka, tukui kamkunamandapas mas mana iachaska rimai-kunawa rimagmandami Taita Diusta: “Pai Siñur” nini. ¹⁹ Chasa nisppapas, Cristowa tukuskakunawa nuka tandariska kaura, paikuna mana iachaska rimaiwa chungu waranga rimariskata rimai pudispapas, munanimi, paikuna iachaska rimaiwaka pichka rimaillata rimangapa; chasaka, paikunapas iachaikungapa.

²⁰ Taitakuna i mamakuna, mana wambrakunasina iuiaiichi. Chara uchulla kagsina kaichi, ñi ima jiru rurangapa mana iuiaspalla. Ikuti Santu Ispiritupa karamuskawaka ña wiñai puchukaska runasina iuiaiichi. ²¹ Isaías sakiska librupi, kasami willaraiá:

Atun Taita Diosmi ni:

“Mana iachaska rimaikunawa i sug alpamandakunawami kai alpapi kaugsagkunata rimasa.

Chasa rimagpipas, mana uiawangapa kankunachu”.

²² Chasaka, mana iachaska rimaikunawa rimangapa, mana balinchi Cristowa iuiarigkunata iuiachingapa. Paita manara rigsikgunata iuiachingapami niraiá. Ikuti

Santu Ispíritu iuiachiskata willangapaka, mana balinchi manara Cristota rigsikgunata. Balinmi, paiwa iuiarigkunata alli suma iuiai iuiachingapa.

²³ Cristowa tukuskakuna sugllapi tandariska kaura, tukuikuna mana iachaska rimaikunawa rimanakugpika, maikan Cristomanda manara iachag u paita manara rigsik iaikuspa uiagpika, ¿manachu ninga: “Kamkuna, upami tukurkangichi”? ²⁴ Ikuti tukui kamkuna Santu Ispíritu iuiachiskata willanakugpika, maikan Cristota manara rigsik u paimanda manara iachag iaikuspa, tukuikuna ima willanakuskata uiaspaka, pai kikin pandarig kagtami iuiaringa. Justisiai tukungapa kagtapasmi iachanga. ²⁵ Paipa iuiapi ima tiaskatapasmi iuiaringa. Chiwanka, Taita Diustami kungurispa kumuringa, “Sutipami Taita Dios kamkunawa ka” nispa.

²⁶ Nigpika, kam taitakuna i mamakuna sugllapi tandariska kauraka, kasa rurangichi. Kampura sugkuna ima suma kantu birsiachu, ima iachachichu, ima muskui ukupisina Taita Dios kawachiska willachu, mana iachaska rimaiwa ima rimachu, chi rimaskaka ima niraiaskata iachaspa willachu: chasa ima ruraspapas, tukuikuna mas alli suma iuiai iuiachinakungapa kachu. ²⁷ Mana iachaska rimaiwa rimanakugpika, iskai u kimsakunallaka sug suglla suiumandata rimachukuna. Chasa rimanakuskata ima niraiagta iachangapaka, sugka tiachu, uiaspa willangapa. ²⁸ Chasa rimanakuskata ima niraiagta ñi pipas mana willai pudigpika, chi rimaikunawa mana rimanakuchu. Kikinmandalla iuiarispas, Taita Diosllata upalla rimachukuna. ²⁹ Chasallata, Santu Ispíritu iuiachiskata willagkunaka, iskai u kimsakunalla willachukuna. Sugkunaka, uiaspa, iuiarichukuna: “¿Sutipacha Santu Ispíritu iuiachiskata willaku?”. ³⁰ Chipi tianakuskata willakuura, Santu Ispíritu sug runata iuiachigpika, ñugpa willagka upalla kachu. ³¹ Chasaka, tukuikunami sug sug pudinkangichi, Santu Ispíritu iuiachiskata willangapa; chiwanka tukuikuna, uiaspa, iachaikuspa, sumaglla parijuma iuiachinakuspa kaugsangapa. ³² Santu Ispíritu iuiachiskata willakug pudinmi, pai kikin rimakuskata upallachiringa. ³³ Taita Dioska mana munanachu, killachinakui tiangapa. Sumaglla tukuipi kaugsanakungapami muná.

Imasami Taita Dioswa tukuskakuna maipipas tandariska kaskapi, ³⁴ warmikunaka upalla kankuna: chasallata kamkuna tandariska kaskapipas upalla kachukuna. Mana paikunata sakiska kanchu, tandariskakunata rimangapa. Paikunapa kusata suma uiachukuna. Chasallatami Moisés sakiska librupi willaraiá. ³⁵ Ima iachangapa munaspaka, kikinpa kusata wasipi tapuchukuna. Cristowa tukuskakuna sugllapi tandariska kaura, mana allilla kanchu, warmikuna rimangapa.

³⁶ Kasapas iuiariichi: Diospa Rimaita willangapaka, mana kamkunawa kallarikachu. Mana kamkuna-mandalla chaiarkachu. ³⁷ Maikanpas iuiachu: “Santu Ispíritu iuiachiskata willag u paiwa iuiagmi kani”: chi runaka, kasa iachapuachu: Iaia Jesús kikin niskatami

nuka Pablo willanakuikichita. ³⁸ Maikanpas nuka ima willakuskata mana munagpika, paitapasmi mana chaiaku munangapa.

³⁹ Chimanda, taitakuna i mamakuna, munapuaichi, Santu Ispiritu iuiachiskata willangapa. Mana iachaska rimaiwa rimagkunataka sakiichi rimangapa. ⁴⁰ Tukuipi allilla imapipas suiumandata ima rurangapa chaiskata ruraichi.

Jesucristo kaugsariskamanda

15 Taitakuna i mamakuna, Alli Willai timpu willaskatami iachachiikichita. Chi Alli Willaita uiaspaka, kunankama mana kungarisipallami kaugsanakungichi. ² Chi Alli Willaita suma iuiarispami mana sakispalla kagkuna kispichiska niraiangichi.

³ Nuka kikin ñugpa iachaikuskatami kamkunata kasa iachachirkaikichita. Imasa ñugpamanda librupi willaraiaskasinami tukurka: Cristoka, nukanchipa pandarii-kunamandami wañuchii tukurka. ⁴ Wañuskata pambaska kaspaka, ikuti imasa ñugpamanda willaraiaskasina, kimsa punchapimi kaugsarirka. ⁵ Ña kaugsariskauramandaka, Pedrotasi ñugpa kawarirka. Nispaka, pai kikin chungu iska agllaskakunatapassi kawarirka.

⁶ Chiuramandaka, pichka patsa ial katiraiagkunata sugllapi kaskakunatapassi kawarirka. Chi runakuna, maillakunami wañuska kankuna. Charami sugkunaka kaugsanakú. ⁷ Chiuramandaka, Santiagotasi kawarirka. Nispaka, tukui pai kikin agllaska runakunatapassi kawarirka.

⁸ Tukuikunamanda katimakar, nukatapasmu kawariwarka. Nuka sug sulluska tiagsamuska kagsinatapasmi Jesús kawariwarka. ⁹ Sugkunata Cristo kikin agllaskakunamanda mas uchullasinami nuka kani. Taita Dioswa kagkunata nuka puchukangapa kalpachidur kagmanda, nuka mana iukarkanichu, Cristo kikin agllaska runa tukugsamunga. ¹⁰ Chasa kagpipas, Taita Dios nukata iapa kuiawagmandami kunauro Cristo kachamuska kani. Taita Dios chasa kuiawaspa, tukui karawaskakuna mana ianga tukurkachu. Tukui sugkuna Cristo kachaskakunamanda masmi Alli Willaita willaspa purikuni. Chasa purispapas, nuka kikinpa iuiailawa mana willakunichu. Taita Dios kikin nukata iapa kuiawaspa iuiachiwagmandami chasa willaspa purikuni. ¹¹ Nuka i sugkuna Cristo kachaskakuna willaska, chillatatami tukuikuna willanchi. Chi willaskatami kamkuna, uiaspa, suma iuiaringichi.

Wañuskakuna, ikuti kaugsaringapa kaskakunamanda

¹² Cristo wañuspa, kaugsariska kagtami nukanchi willanchi. Nigpika, ¿imapatak kamkunapura sugkuna ninakú: “Wañuskakuna mana mas kaugsaringapa kankunachu”? ¹³ Wañuskakuna mana kaugsaringapa kagpika, Cristopaschar mana kaugsariska kantra. ¹⁴ Cristo mana kaugsariska kagpika, nukanchi Alli Willaita willaska iangachar kantra. Chasallata kamkunapas, iangachar paita iuiarispaka kantrangichi. ¹⁵ Cristo mana kaugsariska kagpika, nukanchi nintranchi: “Taita Dios-

mi Cristota kaugsachirka”; chasa nispa, Taita Dios- manda llullami kantranchi. Wañuska runakuna mana kaugsaringapa kagpika, Taita Dios manachar Cristota kaugsachiska kantra. ¹⁶ Wañuskakuna mana kaugsaringapa kagpikunaka, Cristopaschar mana kaugsariska kantra. ¹⁷ Cristo mana kaugsariska kagpika, kamkuna iangachar paita iuiarispaka kantrangichi. Kamkunapa pandariikunata manarachar anchuchiska kantrangichi. ¹⁸ Chasallata Cristowa iuiarispaka wañuskakunapas, diltudupa puchukariskachar kantrakuna. ¹⁹ Nukanchipas, kai alpapi kaugsanakunkamalla Cristota iuiarispaka kagpika, tukuikunamanda mas llakingasinachar kantranchi.

²⁰ Cristo, wañuspapas, sutipami kaugarirka. Pai tukuikunamanda ñugpa kaugsariskamandami sug wañuskakunapas ikuti kaugsaringapa kankuna.

²¹ Imasami suglla runamanda kai alpapi wañui chaia-murka: chasallatami, suglla runa wañuspa kaugsariskamanda, tukui wañuskakuna kaugsaringapa kankuna. ²² Imasami Adanmanda, tukuikuna wañungapa niraianchi: chasallatami Cristomanda, tukuikuna kaugsachii tukugsamungapa kanchi.

²³ Imasa kadaunta chaiskasinami kaugsachii tukungapa kanchi. Cristomi tukuikunamanda ñugpa kaugarirka. Kipama, Cristo kai alpama ikuti samuuraka, paiwa tukuska kagkunami kaugsaringapa kanchi. ²⁴ Chiuramandami puchukarii puncha chaiaungapa ka. Chiura Cristoka, tukui mandagkunata, tukui iachagkunata i tukui justisiagkunata anchuchispaka, pai kikin, tukuipi mandag tukungapa ka. Tukui chi mandakunataka paipa Taita Diosami ialichingapa ka. ²⁵ Pai Cristo, mandagmi kangapa ka, “imaura tukui paita mana munagkunata apagrispa, paipa chaki sarudiru ukuma churankama”. ²⁶ Tukui paita mana munagkunata chasa rurauraka, wañuitapasmi puchukangapa ka, mana mas wañui tiangapa.

²⁷ Taita Diosmi, tukuikunata kungurichispa, paipa sarudiru ukuma churarka. Chasa tukuikunata churaska kagpipas, kungurichig Taita Dios kikinka Cristopa ñugpa ladu mana kunguringapa kanchu. ²⁸ Chasapaka, tukuikuna Cristota kunguriuraka, pai kikin Taita Diospa wambrapas, paipa Taita Diospa ñugpa ladumi kunguringapa ka —Taita Diosmi ka tukuikunata Cristopa ñugpa ladu kungurichig— chasawaka Taita Dios, tukuikunata tukuipi mandag iaia kangapa.

²⁹ Kasapas. Wañuskakuna mana mas kaugsaringapa kagpika, ¿imapatak sugkuna, wañuskakunapa quinta baugtisarinakú? Chasa baugtisarispaka, iangachar rurankuna. ³⁰ Nukanchipas chasallata mana ikuti kaugsaringapa kaspaka, ¿imapatak imaurapas purinakunchi, wañuchiwangapa munanakugta iuiarispaka?

³¹ Taitakuna i mamakuna, tukui punchakunami wañuita manchaiwa nuka purikuni. Imasami kamkuna nukanchipa Iaia Jesucristowa tukuskamanda, nuka sutipa iapa alli iuiachiiwa kani: chasallatami sutipa kaskata willanakuikichita. ³² Nukaka Cristomanda Efeso puiblupi rabiag sachukumanda animalkunasinawa makanakurkani; kai alpapi tiaskakunallawa iuiaspa

chasa makanakugpika, ñi imapa mana baligsinami ka. Wañuskakuna mana kaugsaringapa kagpika, imasami sugkuna ninkuna: “Mikuspa upiaspa kusikusunchi; sug punchakuna ñami wañusunchi”.

³³ Mana pandaringichi. “Mana allilla iachachigkuna-wa kamkuna sugllapi tukugpika, alli kaugsaitami paikuna pandachingakuna”. ³⁴ Suma iuiiwa tukugsamui-chi. Mana mas pandariichi. Kamkunapura sugkunaka, Taita Diosmanda mana imapas iachangichichu. Kamkunapa pingaipa kagmandami chasa niikichita.

Wañuskakuna, imasa kaugsaringapa kaskamanda

³⁵ Sug tapuchu: “Wañuskakunaka, ¿imasatak kaugsaringapa kankuna? ¿Ima kuirpuwatak tukugsamungapa kankuna?”. ³⁶ Chasa tapugka, upasinami rimá. Kam tarpuska ima simillapas ismuskauramandami, pangakuna llugsispa, wiñai kallari. ³⁷ Imapas ña wiñaska atuntaka mana tarpungichu. Trigu u maikan simillatami tarpungi. ³⁸ Chiuramandami Taita Dioska, pai imasa munaskasina wiñachí; sug sug simillakunamandaka sug rigcha sug rigchami wiñá: chasa.

³⁹ Tukui kuirpukunapas, mana suglla rigcha kawarin-kunachu. Chasapaka, runakunapa kuirpuka, sug rigchami kawari; animalkunapa kuirpuka, ikuti sug rigcha; piskukunapaka, ikuti sug rigcha; chalwakunapaka, ikuti sug rigcha. ⁴⁰ Chasallata, awa luarpi i kai alpapi kuirpukuna tiagpipas, awa luarpi tiagkunaka, sug rigchami suma kankuna. Kai alpapi tiagkunaka, ikuti sug rigchami suma kankuna. ⁴¹ Indika, sug rigchami suma punchaiá. Killaka, ikuti sug rigchami suma punchaiá. Istrillakunaka, ikuti sug rigchami suma punchaiankuna. Istrillapurapas, sug rigcha sug rigchami suma punchaiankuna.

⁴² Wañuskakuna kaugsariipas, chasallatami ka. Alpa ukuma pambaraiaskaka ismunmi. Ikuti kaugsariskaka, mana mas ismungapa kanchu. ⁴³ Pambaraiaskaka, millaimi kawari. Ikuti kaugsariskaka, sumaiaskami kawaringapa ka. Pambaraiaskaka mana imapas pudinchu kuiuringapa. Ikuti kaugsarigka, tukui saludu i animuwami kangapa ka. ⁴⁴ Kai alpallata ruraska kuirpumi pambaraiá. Ikuti chi kuirpu kaugsariskaka, ispiritusina mi sug luarmanda kangapa ka. Imasami kai alpallata ruraska kuirpu tia: chasallatami ispiritusina sug luarmanda kuirpupas tia.

⁴⁵ Kasami ñugpamanda librupi willaraiá:

Ñugpa ruraska runa, Adán suti, kaugsai almawami Taita Dios wiñachirka. Ikuti Cristo katima Adán niraiagka, diltudupa kaugsai Ispíritu iukaskatami karamú. ⁴⁶ Ispiritusina sug luarmanda kuirpu, mana ñugpa tukugsamuska kanchu. Alpallata ruraska kuirpumi ñugpa ruraska ka. Chiuramandami ispiritusina sug luarmanda kuirpuka tukugsamungapa ka. ⁴⁷ Ñugpa runa alpata ruraska kag, kai alpamandallami ka. Ikuti katima Runa Tukuska tiagsamuska, suma luarmandami samurka. ⁴⁸ Imasami chi ñugpa runa, alpata ruraska karka: chasallatami kai alpapi kaugsagkunapas, kai alpamanda niraianchi. Imasami Cristoka, suma luarmanda niraiá: chasallata-

mi nukanchipas, paiwa kaspera, suma luarpi paillawanta kagringapa kanchi. ⁴⁹ Imasami nukanchi, chi ñugpa runa alpata ruraskasina rigcha kanchi: chasallatami Cristo suma luarmanda niraiagsina rigchapas tukugringapa kanchi.

⁵⁰ Taitakuna i mamakuna, kasami niikichita: nukanchi kai kuirpupi kaugsankama, manara pudinchichu, Dios suma mandakuskapi kagringapa. Chasallata, nukanchi ismunga kuirpupi kaugsankama, manara pudinchichu, mana imaurapas ismungasina karangapa tiaskata chaskigringapa. ⁵¹ Kunaurami pipas mana iachaskata willangapa kaikichita. Mana tukuikuna wañungapa kanchichu. Chasa kagpipas, tukuikunami sug rigcha kawari tukugsamungapa kanchi. ⁵² Mana unaiilla, ñawichkarigllapi, katima bututu uiarigsamuurami sug rigcha kawari tukugsamungapa kanchi. Chi bututu uiarigllapimi wañuskakuna kaugsarii kallaringapa kankuna, imaurapas mana mas wañungapa. Chiurallatami nukanchi sug rigcha kawari tukugsamungapa kanchi. ⁵³ Kai ismunga kuirpu, ñi imaurapas mana ismugmi tukungapa ka. Chasallata kai wañunga kuirpu, ñi imaurapas mana wañugmi tukungapa ka.

⁵⁴ Kai ismunga kuirpu, mana ismug tukuska kaura, mana mas wañungapa; chiurami ñugpamanda librupi willaraiaskasina pasaringapa ka, kasa nispa:

Wañuita puchukaspaka, tukui binsigsamuskami niraiá.

⁵⁵ Kunaura, kam wañuika, ¿maipitak tiapungi, kam bisingapa iuiakuska?

¿Maipitak kam tugsispa wañuchiduru tiapungi?

⁵⁶ Nukanchi pandariskakunamandami wañuika tugsispa wañuchigsina tiagsamú. Moisés ima niskata nukanchi mana allilla ruraskamandami pandariskakuna niraianchi. ⁵⁷ Chasa kagpipas, Taita Dios kikinmi Iaia Jesucristowa paipa iapa iachaita nukanchita karamú; chasawaka, wañuita binsii pudingapa. Chimanda, pai-ta nisunchi: “Pai Siñur”.

⁵⁸ Chasamanda, nukapa kuiaska taitakuna i mamakuna, Iaia Jesuswa suma iuiarispa kangichi, mana kungarispalla. Pai ima kamkunata rurangapa niskata imaurapas mas animuwa allilla ruraspa kangichi. Kasapami kamkuna allilla iachangichi: Iaia Jesuswa tukuska kaspera, mana iangalla ruraspa kangichichu.

Ministiskakunamanda kulki tandachiskamanda

16 Taita Diospalla kagkunapagma kachangapa kulki tandachingapaka, ñami imasa Galasia alpapi Cristowa tukuskakunata iachachirkani: chasallatami kamkunapas iukangichi rurangakuna. ² Tukui simana kallarii u dumingu punchakuna chaiaura, mailla maillapas kulki ganaskata wakachingichi. Chasaka, nuka chaiaagriura, mana mañai iukasachu. ³ Nuka kamkunapagma chaiaagripaka, kamkuna aglaska runakunatami kartakunawa kachasa, kamkuna karaska kulkita Jerusalén puibluma apangapa. ⁴ Nukata ringapa chaia-wagpika, paikuna nukawami Jerusalem ringakuna.

Sugma sugma ringapa, San Pablo iuiakuskamanda

⁵ Masedonia alpata ialigrispami kamkunapagma chaiagrisa. Chaiawakumi, Masedoniata ialigringapa. ⁶ Sug punchakuna u tamia ialinkamami kamkunawa kangapa chaiawanga. Chiuramandaka, kamkuna pudinkangichimi aidawanga, nuka maima rii iukaskama chaiagringapa. ⁷ Nuka mana munakunichu, kamkunata ñawiwa kawaspalla ialingapa. Iaia Jesús sakiwagpika, munakunimi achka punchakuna kamkunapagpi unaiangapa. ⁸ Chasa munakuspapas, Pentecostés atun punchakamami kai Efeso puiblupi chisiangapa kani. ⁹ Suma alpasina tarpungapami kaipi tarirkani; chasapika, Alli Willaita nuka achkakunata umapi tarpugsina willangapa. Nukata mana munawagkunapasmi achkakuna kankuna.

¹⁰ Waugki Timoteo kamkunapagma chaiagrigrigpika, suma kaiaspa chaskipuangichi; chasaka, kamkunawa iacharidusina iuiarispas kangapa. Paipas, nukasina Iaia Jesusmanda willagmi ka. ¹¹ Chimanda, ñi pipas paita mana wasa churapuangichi. Chasapaka, paita aida-puangichi; chasaka, nukapagma sumaglla chaiag-samungapa. Paita sug waugkikunawantami suiakuni.

¹² Waugki Apolostaka sumagllami mañarkani, sug waugkikunawa kamkunapagma richu. Chasa mañag-pipas, kuna nura mana munarkachu ringapa. Pai imaura pudiurasi kamkunapagma chaiangapa ringapa ka.

Kaiakama, niskamanda

¹³ Rigcharaiagsina kaichi, kamkuna Cristowa suma iuiariskata mana sakispalla. Sinchi saiariskasina kaichi,

mana ñi imatapas mancharispalla. ¹⁴ Tukui ima rurana-kuskapipas, suma kuiaiwa kuiaspa rurangichi.

¹⁵ Kam taitakuna i mamakuna iachangichimi, waugki Estefanaspa wasipi kausagkuna, Akaia alpapi tukui-manda ñugpa Alli Willaita sumaglla chaskigtakuna. Paikunaka, Taita Diuspalla kagkunata aidaspami kaus-sanakú. Chimandami mañaikichita: ¹⁶ paikunata sumaglla uiapuaichi; chasallata, tukui paikunawa allilla ruranakuskatapas.

¹⁷ Estéfanos, Fortunato i Akaiko nukapagma samus-kakunamandami iapa alli iuiachiwá. Paikunata kawaspaka, kamkuna karupi kaskata kawakugsinami iapa alli iuiachiwagsamurka. ¹⁸ Paikunaka, nukapa llakii-kunata anchuchispa, sumagllami iuiachiwagsamurka-kuna. Chasallatami kamkunatapas sumaglla iuia-chingakuna. Paikunataka iukangichimi, “Pai Siñur” ningakuna.

¹⁹ Asia alpapi Cristowa tukuskakunami kamkunata: “Puangi” ninakú. Waugki Akila, warmindi Priska i paikunapa wasipi sugllapi tandarispas Cristowa tukuskakunapasmi, Iaia Jesusmanda iuiarispalla, “Puangi” ninakú. ²⁰ Tukui waugkikuna i panikuna kaipi kagkunapasmi, “Puangi” ninakú. Kam kikipura Taita Diuswa iuiarispas muchanakuspa, “Puangi” ninakuichi.

²¹ Nuka Pablo, nuka kikipura makiwami iskribiska, kai saludaita kachaikichita.

²² Maikanpas Iaia Jesusta mana kuiagka, maldisiska kachu. Nukanchiwa utkalla samui, Iaia Jesús.

²³ Nukanchiwa Iaia Jesucristo, kamkunata suma kuiai-wa kawapuachu. ²⁴ Tukuikunatami Jesucristowa sugllapi kuiaikichita.

2 KORINTOPI

1 Taita Dios nukata munawaskamanda, Jesucristo kachamuwaskami kani, Alli Willaita willaspa puringapa. Timoteo suti waugkiwa kaspera, kamkuna Taita Dioswa tukuskakuna Korinto puiblupi kaugsanakuskata i Taita Diuspalla tukui kagkuna Akaia alpa suiu kaugsanakuskatapasmi kai karta kachaikichita. ² Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

Taita Dios, imapipas llakiikunata samachigmanda

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangi”. Paimi ka nukanchimanda llakiiug. Imapipas llakiikunata samachigmi ka. ⁴ Nukanchi ima iapa llakiiwa kaskata, paimi samachi; chasaka nukanchipas, sugkuna ima iapa llakii iukagpika, paipa suma iuiachiillawanta paikunata samachingapa. ⁵ Imasami nukanchita chaiá, Cristomanda iuiaripa iapa llakiiwa pasangapa: chasallatami Cristo, nukanchita chi llakiikunata samachi. ⁶ Nukanchi, iapa llakiiwa pasanakunchi; chasaka, kamkunapa llakiikunata samachispa kispichingapa. Cristo, nukanchita chi llakiikunata samachi; chasaka, kamkunapa llakiikunata samachispa, chiwanka nukanchisina iapa llakiikunawa pasanakuskata apai pudingapa. ⁷ Imasami kamkuna, nukanchisina iapa llakiikunawa pasanakungichi: chasallatami nukanchisina llakiikunata samachii tukunkangichi. Chasa iachaspami nukanchi kamkunamanda tukui allilla tukugsamungapa suianakunchi. ⁸ Nukanchi Asia alpapi kaura, iapa llakii iukarkanchi. Munanakunchimi: kam taitakuna i mamakuna chasa iachapuaichi. Askurinti mana awantangasina llakiiwami pasanakurkanchi. Chiwanka, iuianakurkanchimi: “Ña mana maschar kaugsasunchi”. ⁹ Wañuchii tukungapa kagsinami iuianakurkanchi. Chasawami iachaikurkanchi, nukanchi kikinpa iuiaikunallawa mana imapas awantai pudingapa kagta. Taita Dios wañuskakunata kaugsachigwa iuiarispallami pudingapa kanchi awantangapa. ¹⁰ Paimi chi iapa manchangasina wañuita nukanchita kispichirka. Nispaka, chasallata ikutimi kispichingapa ka. Ari, paillatami suianakunchi, ikuti ikuti nukanchita kispichigsamungapa, ¹¹ kamkunapas Taita Diusta nukanchimanda mañaspa kagpikuna. Achkakuna nukanchimanda Taita Diusta mañagpikuna, achkakunallatatami, Taita Dios nukanchita suma iuiaiwa kawakugmanda, paita: “Pai Siñur” ningakuna.

San Pablo, Korinto puibluma imapa mana riskamanda

¹² Kasamandami alli iuiachiiwa kanchi: nukanchipa iuiaiwami iachanchi, nukanchi kai alpapi i maspas kamkunawa, suglla suma iuiaiwa tukuipi allilla kaugsaspa kagtakuna. Mana chasa kaugsanakunchichu nukanchi kikinpa iuiailawa. Taita Dios kikin suma kuaiaita karamuskawami chasa allilla kaugsanakunchi. ¹³ Kamkunapagma nukanchi kartakuna kachaskapika, nukanchi ima iuianakuskallatami ninakunchi, kamkuna iachangapa. Kamkuna, chikunata kawaspaka, kunankama maillami nukanchi ima iachachiskata allilla iachangichi. Munakunimi, kamkuna tukuipi allilla iuiapi iachangapa. Chasaka, nukanchipa Iaia Jesús samug pucha chaiaura, imasami nukanchi, kamkunamanda iuiaripa, alli iuiachiiwa kanchi: chasallatami kamkunapas, nukanchimanda iuiaripa, alli iuiachiiwa kankangichi.

¹⁵ Kamkuna chasa kagmanda alli iuiaspa, nuka munakurkani, ñugpa kamkunapagma chaiagringapa. Chiwanka munakurkanchi, iskai biaji kamkunata kawagrispa, kamkuna iapa allilla kangapa. ¹⁶ Kamkunapagta ialispa, Masedonia alpamami ringapa karkani; chimanda kutimuspa, ikuti kamkunata kawagsamungapa. Chimanda, kamkuna aidawangapami karkangichi, Judea alpama chaiagringapa. ¹⁷ Nuka chasa iuiakuspaka, ¿manachu munakurkani chasa rurangapa? ¿Kamkuna iuiangichichu, nuka iskai iuiai iukagta; chasaka, kamkunata: “Kasami rurasu” nispaka, ikuti chiurallatata: “Mana chasa rurasachu” ningapa? ¹⁸ Taita Dios, nukanchimanda iachanmi: nukanchi, kamkunata: “Kasami rurasu” nispaka, ikuti chiurallatata sug rigcha rurangapa mana ninchichu. ¹⁹ Silvano, Timoteo i nuka, kamkunata Taita Diospa wambra Jesucristomanda willarkanchi; pai Jesucristoka, “Kasami rurasu” nispaka, ñi imaurapas mana ninchu: “Mana chasa rurasachu”. Pai niska, tukui chasami tukú. ²⁰ Tukui ima Taita Dios karangapa niska, Jesucristowami nukanchita karamú. Chimanda, chasa niskamanda nukanchi uiaspa, paimanda iuiaripa, ninchimi: “Chasa kachu”; chiwanka, Taita Diusta suma atuniachingapa. ²¹ Taita Diosmi Jesucristowa nukanchita i kamkunata tukuipi allilla charí. Paimi nukanchita agllarka. ²² Paimi Santu Ispirituwa nukanchita siñalarka, paipa kagta niraiangapa. Paillatatami Santu Ispirituta kachamurka, nukanchiwa sugllapi kangapa. Chasamandami iachanchi, nukanchi sugllarpi tukui sumaglla chaskigringapa kagtakuna.

²³ Taita Dius, nuka ima iuiakuskata iachanmi, nuka kamkunata ima nikuska sutipa kagta: kamkunata mana piñangamandami mana Korinto puibluma rirkani. ²⁴ Mana munanchichu, kamkunata ningapa: “Kasa u chasa Cristowa iuiariichi”. Kamkuna, ña sumami paiwa iuiaringichi, mana sakispalla. Chasapaka munanchimi, kamkunawa sugllapi aidanakungapa; chasaka kamkuna, alli iuiachiiwa kangapa.

2 Chimandami iuiarirkani, manara ikuti kamkuna-pagma chaiagringapa; chasaka, mana kamkunata llakichingapa. ² Nuka chasa kamkunata llakichigpika, ¿pitak nukamanda llakintra, alli iuiachiwangapa? Kamkunallami, nukawa llakichii tukuspa, pudintrangichi, nukata alli iuiachiwangapa. ³ Chimandami chasa karta kacharkaikichita. Chiwanka, nuka chaiagriura, kamkunawa mana llakirisa kasachu. Chasapaka, kamkunawa kuntintullami kasa. Sumami iuiani, nuka alli iuiachiiwa kagpika, tukui kamkunapas alli iuiachiiwa kangapakuna. ⁴ Kamkunamanda iapa llakispa wakaspami chi kartata kacharkaikichita. Mana kacharkaikichitachu, kamkuna kawaspaka, llakirigsamungapa. Nuka kamkunata iapa sumaglla kuiag kagta iachangapami kacharkaikichita.

Jiru rurag runata, San Pablo pasinsiaskamanda

⁵ Llakichiwagka, mana nukallata llakichiwarkachu. Tukui kamkunatapasmi maillallapas llakichirka. “Maillallapas” ninimi; iapaspa llullagsina mana ninichu. ⁶ Chi runa jiru ruragta ña unaimi kamkuna kaskamanda llugsichiska ka; chika, allillami rurarkangichi, chasa sugkuna mana iuiagpipas. Kunaura, chilla. ⁷ Kunauramanda iukangichimi, paita pasinsiaspa, iuiachispa, paipa llakiita kungachinga. Mana kagpika, jujalallapas iapa llakii iukaspa, iuiarintra mana mas kaugsangapapas! ⁸ Chimandami suma mañaikichita: paita kawachipuaichi ikuti kuiagtakuna. ⁹ Paimandami ñugpa kartata kacharkaikichita, iachangapa: nuka tukui ima niskata, ¿kamkuna rurankangichichu u manachu rurankangichi? ¹⁰ Maikantapas kamkuna pasinsiagpikunaka, nukapasmi pasinsiani. Ima pasinsiangapa tiagpika, kamkuna kuiaska kagta iuiarispami Cristopa ñawipi pasinsiani. ¹¹ Chasami pasinsianchi. Mana kagpika, iaia kuku, nukanchiwa rikugsinami tukunga. Chi iaia kuku imapipas jiru rurangapa munag kagta allillami iachanchi.

Troas puiblupi, San Pablo llakiiwa kaskamanda

¹² Nuka Troas puiblupi Cristomanda Alli Willaita willangapa chaiagriuraka, Iaia Jesús kikin, alli alpa suma tarpungapa tiagsinami kawachiwarka; chasapika, achkakunata Alli Willaita willangapa. ¹³ Chipi nuka kaura, waugki Tito mana kawariwarkachu. Chimandami nuka llakiiwa karkani. Chimanda, chipi kagkunata: “Kaiakama” nispa, Masedonia alpamami rirkani.

Nukanchi, Jesucristowa binsig kagkunamanda

¹⁴ Taita Diusmi nukanchita imaurapas paipa iapa iachai karamú, Jesucristowa iaia kukuta mitikuchingapa. Chasallata, nukanchita maimapasmi kachá, Alli Willaita willaspa purigringapa —chi Alli Willaika, iapa miski asnarigsinami ka— chita uiaspaka, sugkunapas paita rigsigsamungapa. Chimandami paita nini: “Pai Siñur”. ¹⁵ Imasami insinsu rupachiura, miski asnarí: chasallatami Cristo, nukanchita kachamú, Taita Diusmanda miski asnarigsina paipa Alli Willaita willangapa. Chi Alli Willaitaka, † kispiringapa kagkuna i mana kispiringapa kagkunapasmi uankuna. ¹⁶ Mana kispiringapa kagkunataka chi Alli Willaita uiaskawaka diltudupa wañuimi chaiangapa kankunata. Ikuti kispiringapa kagkunaka, diltudupa kaugsaimi chaskingapa kankuna. Chasa tukungapa kaskamandaka, ¿pitak tia, tukui chikunata allilla willangapa? Ñi pipas manima. ¹⁷ Nukanchika, Diuspa Rimita mana willanakunchichu, nukanchi kulkiringapa, achkakuna chasa ruragpikunapas. Taita Dius kachamuskakuna kaspami, Diuspa ñawipi Cristomanda willanakunchi, mana imapipas llullaspalla.

Taita Diuswa i runakunawa ikuti sumaglla tukuskakunamanda Alli Willaimanda

3 Chasa nispa, ¿ikuti nukanchi kikinkunachu ninakunchi: “Mas allimi kanchi”? Sugkunata chái, kikinkunamanda alli niska karta apamuspa kawachigsamungapa; chasaka, Diuspa Rimita iachachingapa. ¿Chasallatachu nukanchitapas chaiaku, karta kamkunata kawachigsamungapa i kamkunapagmandapas apaspa ringapa? Manima. ² Kam kikinkunami niraiangichi nukanchimanda alli niska kartakuna kagsina. Nukanchipa iuiapi niska karta kagsinami kangichi. Kamkunata kawaspami tukui runakuna, nukanchi allilla iachachig kagtakuna kawangakuna. ³ Kamkuna kangichimi Cristo kachamuska karta, nukanchi iuiarisa iskribiska kagsina. Tintawa iskribiraiaskasina mana kangichichu. Kaugsag Taita Diuspa Ispirituwami nukanchi iachachiska iskribiraiaskasina kangichi. Chasallata, rumi pambapi iskribiraiaskasina mana kangichichu. Kamkunapa iuiapimi nukanchi iachachiska iskribiraiaskasina kangichi.

⁴ Taita Diusta Cristowa iuiarispami chasa ninchi. ⁵ Nukanchi kikinpa iuiailawa ñi imapas mana pudinchichu. Taita Diuspa iapa iachaita nukanchita karamugmandami pudinchi. ⁶ Taita Dius kikinmi paipa iachaita karamurka; chasaka, paiwa i runakunawa ikuti pasinsiachirisa sumaglla tukuskamanda nukanchi willangapa. Chika mana niraianchu Moisés ñugpata willaskawa. Santu Ispíritu iuiachiskawami chasa niraiá. Moisés ima rurangapa willaraiaskapi niraiami, pandarigkuna wañuchii tukungapa. Ikuti Santu Ispirituka, suma kaugsaitami karamú.

† griego rimaiwa: chi asnarigsina.

⁷ Ima rurangapa rumipi willaraiaskata iapa punchawami Taita Dios, Moisesa kuagsamurka; chiwami Moisespa ñawipas iapa puncha kawarigsamurka. Chasataka Israelmanda runakuna, mana paipa ñawita kawangapa pudirkakunachu. Chi punchaiaskaka, mailla mailla wañurisa wañurispami rirka. Chi runakuna wañungapa willaraiaskatami ña iapa punchawa Moisesa kuagsamurka. ⁸ Ikuti kikin Santu Ispiritu karamuskaka iukanmi, askurinti mas iapa punchawa tukugsamunga. ⁹ Ari, justisiai tukungapa willaraiaskata iapa punchawami Moisesa kuagsamurka; mana pandarig niraiangapa Alli Willaita uiaspa iukanmi, Santu Ispirituwa askurinti mas iapa punchawa tukugsamunga. ¹⁰ Chi willaraiaskata Moisés chaskiura, iapa punchaiachigpipas, kunaura askurinti iapa puncha Alli Willaimanda chi ñugpamandaka ñi imapas mana puncha niraianchu. ¹¹ Chi puchukaringapa willaraiaskata iapa punchawa Moisesa kuagsamurka. Ikuti mana imaurapas puchukariduru Alli Willaika iukanmi, chi willaraiaskamanda mas iapa punchawa tukugsamunga.

¹² Chasa tukugsamungapa kagta nukanchi allilla iachaspami, mana manchaspalla chi Alli Willaita willanakunchi. ¹³ Nukanchika, mana Moisesina ruranakunchichu. Paika, ñawita linsuwa kilparispami karka; chiwanka Israelmanda runakuna, paipa ñawi punchaiaskata mailla mailla wañurisa wañurisa rikuskata mana kawangapa. ¹⁴ Chasa kilpariska kaskata, paikuna mana iacharkakuna ima niraiagta. Kunaurapas, Diospa ñugpamanda Rimaipi willaraiaskata uiaspapas, paikunapa iuiaipi chi linsuta kilparaiaskasinami chara kankuna. Chasaka, mana allilla iachagsamungapa pudinkunachu. Cristollawa iuiariskapimi chi kilparaiaska linsuta anchuchigsina tukugsamú. ¹⁵ Ari, paikuna, Moisés willaraiaskata kawaspapas, kunankama paikunapa iuiaipi linsuwa kilparaiaskasinami chara kankuna; chasaka, mana allilla iachagsamungapakuna. ¹⁶ Ikuti maikanpas Iaia Jesuswa tukugsamuraka, chi kilparaiaska linsuta anchuchigsinami tukugsamú, allilla iachagsamungapakuna. ¹⁷ Atun Taita Dioska, ispiritumi ka. Paipa Ispiritu, wataskasina maipi kaskapi kaskakunata kacharigsinami ruragsamú. ¹⁸ Chi mandami tukui nukanchika, ñawi kilparaiaskata anchuchigsina tukugsamuspa, Iaia Jesús suma punchalla kagta ispijupisina sugkunata kawachirinakunchi. Chiwanka nukanchi, pai suma punchalla kagsinallatatami mailla mailla suma punchalla tukugsamunakunchi. Atun Taita Diospa Ispiritumi chasa nukanchita ruraku.

4 Nukanchi, chasa iachaspaka, Taita Dios nukanchimanda llakirispapa Alli Willaita willangapa mingaskata mana sambaiaspallami charinchi. ² Chi Alli Willaita willangapaka, tukui pingaipa pakalla jiru ruraikunata wabutispami sakinchi. Chasaka, mana sug rigcha iuiaspallami willanchi. Diospa Rimaitapas mana sug rigcha niraiaskata iachachinchichu. Chasapaka, sutipa kaskata willaspami, tukui runakunata kawachirispapa, Diospa ñawipi suma iachachinchi. ³ Nukanchi willana-

kuska Alli Willaika, sugkunata linsuwa kilparaiaskasinami amsa tukú; chika kanmi diltudupa puchukaringapa kagkunamanda. ⁴ Kai alpamanda diussina iaia kukuka, manara Cristota rigsikunapa iuiaita tuntiachigsinami rurarka; chasaka, iapa suma punchaiachig Cristomanda Alli Willaiwa paikunapa iuiaita mana punchaiachigsina tukugsamungapa. Pai Cristoka, Taita Diospa ñawi kagsinami kawarigsamú. ⁵ Nukanchi kikinkunamandaka ñi ima mana willanakunchichu. Jesucristolla tukuikunapa iaia kagtami willanakunchi. Jesusmandalla iuiarispapa, kamkunapa lutrinsinakunami kanchi. ⁶ Taita Diosmi nirka: "Iana tutapi, punchaiachu". Taita Diosllatatami nukanchipa iuiaikunata punchaiachigsamurka; chi punchaiachiskawaka, pai tukuipi suma atun kagta nukanchi iachangapa. Chi punchaiachiimi Cristo kikinpa ñawipi kawachirigsamú.

Iaia Jesuswa suma iuiarispapa kaugsaimanda

⁷ Nukanchipa kuirpu alpa mangasina kagpipas, chasa kuirpukunapi chi punchaiachigsina Alli Willaitami chariraianchi; chasaka, nukanchipa iachaiwa mana kagta kawachingapa. Taita Diospa iapa iachaiwa kagta kawachingapami chi Alli Willaita chariraianchi; ⁸ chasaka, iapa llakiikuna chaigpipas, ñi imapipas mana sambaiaspalla kangapa. Chasallata, iapa llakiikunawa iuiaikuna chaigpipas, Cristowa suma iuiariskata mana sakispallami kaugsanchi. ⁹ Sug runakuna jiru rurangapa munanakugpipas, Taita Dios, nukanchita mana sapalla sakinchu. Urmagta piagpikunapas, mana puchukaringapa kanchichu. ¹⁰ Maima rispapas, nukanchipa kuirpupi llakiita apaspa, Jesús wañuchii tukuskatami kawachinchi. Chi llakiita apakuspapas, Jesús nukanchiwa kaugsakugtami mana sambaiaspalla kawachinchi. ¹¹ Chasaka, nukanchi kaugsanakunkama Jesusmanda willanakugmandami sugkunaka tukui punchakuna munanakú, nukanchita wañuchingapa; chiwanka nukanchi, Jesuspa kaugsaita nukanchipa wañunga kuirpupi kawaringapa. ¹² Chasamanda, nukanchita wañuimi katiraiá. Ikuti kamkunataka kaugsaimi katiraiá.

¹³ Kasami ñugpamanda librupi willaraiá:

Taita Dioswa suma iuiarirkani.

Chimandami paimanda rimarkani.

Chasallata nukanchipas, Iaia Jesuswa suma iuiarinchi. Chimandami paimanda rimanchi, ¹⁴ kasa iachaspa: Taita Dios, Iaia Jestusta kaugsachig, nukanchitapas paiwami kaugsachingapa ka. Nukanchita kaugsachispaka, kamkunawantami pusangapa ka, pai kikinpa ñawipi kagringapa. ¹⁵ Tukui llakiikuna u ima nukanchita pasariska, kamkunamanda allillapami ka; chasaka mas achka runakuna, Taita Diospa suma kuiaita chaskigsamungapa; chiwanka mas achkakuna, paita: "Pai Siñur" nispa, iapa suma atuniachingapa.

¹⁶ Chasamandami imaurapas mana sambaiaspalla kanchi. Nukanchipa kuirpu rukuiakugpipas, nukanchipa almataka kada punchami Taita Dios mas sumaia-chiku. ¹⁷ Nukanchi kaugsanakunkama llakii iukaskakunaka, mana unailami ialí; ñi ima mana kagsinami

iuiachí. Chi llakiikuna iukaskawa, nukanchi iapa alli suma iuiachi mana puchukaridiru kaugsaiwami kaugsagringapa kanchi. ¹⁸ Kawaridiru, tukuringallami. Ikuti mana kawaridiruka, mana imaurapas tukuringapa kanchu. Chimanda, kawaridirukunallawa mana iuianakusunchi. Mana kawaridirukunawami iukanchi iuianakunga.

5 Kasapasmi iachanchi: nukanchipa kuirpu, sug wasi mana unaiaspalla tukurigsina puchukariura, suma luarpika sug musu wasisina kuirpumi iukangapa kanchi. Chi wasisina kuirpu, mana runa ruraska kanchu. Taita Dios kikin ruraskami ka. Chi wasisina kuirpu suiakumi, nukanchi chipi diltudupa kaugsagringapa. ² Chimandami, kai kuirpupi kaugsanakunkama, wakanakugsina iuiarispas, munanakunchi nukanchipa suma luarmanda wasisina kuirpupi kaugsanakugringapa. ³ Chi musu kuirpupi churaraiagsina kaspaka, mana kawarisunchichu mana kuirpuwa. ⁴ Kai karpa wasisina kuirpupi kaugsanakuspaka, llakiiwa wakanakugsinami kanchi. Mana munanakunchichu, mana kuirpuwa kawarinakungapa. Musu kuirpupi churariskasina tukugsamungapami munanakunchi; chasaka kai wañungapa kuirpu, diltudupa musu kaugsaiwa allilla tukungapa. ⁵ Taita Diosmi nukanchita wiñachirka, chi musu kaugsaita chaskigringapa. Paillatami Santu Ispirituta nukanchita karamurka; chiwanka, nukanchi chaskigringapa kaskata iachangapa.

⁶ Chimandami nukanchi imaurapas chasa tukungapa kagta iuiarispalla kanchi. Kasapasmi iachanchi: nukanchipa kuirpupi kaugsankama, karupi kagsina manara Iaia Jesuswa sugllapi kangapa chaiagta. ⁷ Paiwa suma iuiarispami kaugsanchi, manara ñawi ñawi kawanakuspapas. ⁸ Chasa kaugsaspapas, paiwa sugllapi kagringapa kagta iuiarispallami kanchi. Kasapasmi munanakunchi: jamalai mana mas kai kuirpupi kaugsaspa, Iaia Jesuswa sugllapi ña kaugsagrintranchi! ⁹ Chimanda, kai kuirpupi u suma luarmanda kuirpupi kaugsaspapas, Iaia Jesusta kuntintachingapagllami iuiaspa kaugsanakunchi. ¹⁰ Tukuikunami iukanchi, Cristopa ñugpa ladu kawarigringa; chipika, allilla u mana allilla kaugsankama ruraskakunawa imasa chaiaskasina chaskingapa.

Taita Dioswa pasinsiachiriichi, niskamanda

¹¹ Chimandami, Iaia Jesusta sumaglla manchangapa chaiaskata iachaspa, runakunata allilla willanchi, paikunapas Jesuswa tukungapa. Nukanchi imasa kaskata, Taita Diosmi allilla iachá. Munakunimi, kamkunapas nukanchi imasa kaskata allilla iachangapa. ¹² Kamkunata mana ninakunchichu: "Nukanchi, allimi kanchi". Kamkuna, nukanchimanda "Allillami kankuna" iuiarispas, kuntintulla tukungapami chasa ninakunchi. Chasaka, chi mana iuiaiipi kaskata iuiaspalla kawaskallawa atun tukugkunata pudinkangichimi iuiachingakunata. ¹³ Nukanchi upasina kagta paikuna nigpikunaka, Taita Diosmandami chasa kanchi. Ikuti suma iuiaiiug rigcha kaspaka, kamkunamanda allillapami chasa kanchi. ¹⁴ Cristo, nukanchita iapa kuiaspa, imasa

kaugsangapami iuiachí. Kasami iachanchi: Cristollami tukui runakunamanda wañurka. Chasamandami tukui nukanchi, Diospa ñawipi paiwa wañuska niraianchi.

¹⁵ Imasami Cristo, tukuikunamanda wañuspa, kaugsarirka: chasallatami nukanchipas, paiwa kaugsarispa, kikinmandalla mana kaugsai niraianchi. Pai Cristomandallami kaugsai niraianchi. ¹⁶ Chimandaka, imasami kai alpamanda runakuna pimandapas iuianakú: chasaka mana iukanchichu kunaoramanda iuianga. Cristomandapas kai alpamanda runakunasina nukanchi ñugpamanda iuianakuskaka, kunaoramanda pai-manda mana chasa iuiasunchi. ¹⁷ Maikan Cristowa kagkuna, ikuti musuiachigsinami tukugsamunkuna. Ñugpamanda ruku kaugsai, ñami ialirka. Ikuti sug rigcha kaugsaiwa musuiachigsinami tukugsamurka.

¹⁸ Taita Diosmi tukui chasa rurag ka. Paimi nukanchita kikinwa pasinsiachirka. Cristowami chasa rurarka. Paimi nukanchita mingarka, tukuikunata pai kikinwa pasinsiachingapa. ¹⁹ Pai Taita Dios, Cristowa kaspas, kai alpamanda runakunata kikinwa pasinsiachirka, paikunapa jiru ruraikunata mana iuiarispalla. Paimi nukanchita mingarka, "Taita Dioswa pasinsiachiriichi" tukuikunata nispas puringapa. ²⁰ Chimandami nukanchika, Cristo kachamuska willagkuna kanchi. Taita Dios, nukanchiwa kamkunata mañagsinami ka. Cristomandami suma mañanchi: "Taita Dioswa pasinsiachiriichi".

²¹ Cristo kikin ñi ima pandarig mana kagpipas, Taita Dioska, nukanchimanda pandarigsinallatatami paita kawarka; chasaka nukanchi, Cristowa mana pandarig niraiangapa.

6 Nukanchi, Taita Dioswa aidanakugsina kaspas, kamkunata kasami mañanchi: Taita Dios kamkunata chasa iapa kuiaskamandaka, ñujalallapas kamkuna ianga chaskingichi! ² Chasallatami ñugpamanda librupi willaraiá, kasa nispas:

Allipi kawachingapa puncha chaiaurami uiarkaiki.

Kispichingapa puncha chaiaurami aidarkaiki.

Kunaurami chi allipi kawachingapa puncha chaia-muska ka. Kunaurami ka chi kispichingapa puncha.

³ Ñi pitapas mana pandachispa kaugsanchichu.

Chasaka, ñi pipas nukanchi Alli Willaita willanakuska-manda mana ningapa kankunachu, mana alli kagta.

⁴ Chasapaka, tukuipimi kawachinchi, nukanchi Taita Dios ima niskata rurag kagtakuna. Nukanchita iapa llakichigpipas, ima ministirigpipas, ima pasarigpipas,

⁵ asutigpipas, karsilpi churagpipas, nukanchita killachigpipas, saikugta trabajangapa chaiagpipas, mana puñuspalla i asllitalla mikuspa kaugsangapa chaiagpipas,

tukuipi mana sakispallami kawachinchi, Taita Dios ima niskata rurag kagtakuna. ⁶ Chasa kagtakunami kawachinchi, ñi ima jiru iuiaikuna mana iukaspa,

sumaglla iachaiwa kaspas, ñi pitapas mana piñaspalla, tukuikunawa sumaglla kaspas, Santu Ispirituta iukaspa,

tukui suma iuiaiwa kuiaspa, ⁷ Diospa Rimai sutipa kagta willaspa, Diospa iapa iachaiwa allilla ruraspa; chasa kaugsanakuspami kawachinchi, Taita Dios ima niskata rurag kagtakuna. Chasa tukuipi alli kaspas kaugsaska-

wami pudinchi, mana allilla kaugsaita arkaspa binsingapa. ⁸ Nukanchita suurakuna kuiankunami; ikuti suurakunaka kaminkunami. Nukanchimanda suurakuna mana alli kagtakunami ninkuna; ikuti suurakunaka alli kagtakunami ninkuna. Nukanchita llulla kagtakuna nigpipas, nukanchika sutipa kaskatami willanchi. ⁹ Nukanchimanda nichukuna, mana rigsiska kagtakuna: chasa nigpipas, nukanchi allilla rigsidukunami kanchi. Ña wañungasina kaspapas, kaugsallami kanchi. Wañunaigta asutigpipas, mana wañunchichu. ¹⁰ Llakii iukaspapas, imaurapas alli iuiachiiwami kanchi. Ñi ima mana iukag kaspapas, Alli Willaita willaspa, achkakunata iukag kangapa karagsinami ruranchi. Mana ñi ima iukaspapas, Diuspa ñawipi tukuikunata iukagmi niraianchi.

¹¹ Kamkuna Korintopi kaugsanakuskata mana imapas pakaspallami willanchi. Nukanchipa tukui iuiakunawami kamkunata kuianchi. ¹² Kamkunata kuiaspa, mana sug rigcha kamkunamanda iuianchichu. Ikuti kam kikinkunaka, nukanchimanda sug rigcha iuiawami kangichi. ¹³ Chasa kagmandami nukapa wambra-kunatasina mañaikichita: imasami nukanchi, kamkunamanda iuianchi: chasallata kamkunapas, nukanchimanda kuiaspalla iuiapuaichi.

Taita Diuspa wasisinami nukanchi niraianchi

¹⁴ Mana Cristota rigsikunawa mana sugllapi tuku-nakungichi. Allilla ruragkunawa mana allilla ruragkunawa mana pudirinchi, sugllapi tukungapakuna. Chasallata, iuiakunata punchaiachiska kagkunawa iana tutapisina kagkunawa mana pudirinchi, suglla iuiai apanakungapa. ¹⁵ Cristowa iaia kukuwa mana pudirinchi, suglla iuiai kangapa. Chasallata, Cristowa suma iuiagwa manara paita rigsigwa, suglla iuiaiwa mana kangapa pudirinchi. ¹⁶ Ianga diuskunawa mana pudirinchi, Diuspa wasi ukupi sugllapi kangapa. Nukanchimi kaugsag Diuspa wasisina niraianchi. Chasallatami ñugpamanda librupi Taita Dius kikin willarka, kasa nispa:

“Paikunapa chaugpipi purispami kaugsangapa kani. Paikunapa Taita Diusmi kangapa kani. Paikunaka, nuka agllaska runakunami kapuangapa kankuna”.

¹⁷ Chimanda, kasapasmi atun Taita Dius ni: “Nukata manara rigsiwaskakunapuramanda llugsi-muichi.

Mana paikunawa sugllapi tukunakuichi. Mapa niraiaskatapas mana tuparingichi. Chasaka nuka, kamkunata sumagllami chaskisakichita.

¹⁸ Kamkunapa Taitami kangapa kapuikichita. Kamkunaka, nukapa wambra-kunami kapuangapa kangichi”.

Chasami tukui pudig atun Taita Dius ni.

7 Chiwanka, kuiaska taitakuna i mamakuna, Taita Dius chasa nukanchimanda sumaglla rurangapa niskamanda, nukanchipa kuirputa i ispirituta tukui ma-

pa niraiaskakunata anchuchirisunchi. Paipalla kangapa iuiarisa, paita sumaglla manhaspa kaugsasunchi.

Korintopi kaugsag Jesuswa tukuskakuna, Taita Diuswa ikuti tigraskamanda

² Nukanchi kamkunata sumaglla kuiangapa sakirii-chi. Ñi pitapas mana llakichirkanchichu. Ñi pitapas mana wagllichirkanchichu. Ñi pitapas mana ñi ima kichurkanchichu. ³ Chasa rimaspaka, mana ninakuiki-chitachu, kamkunata nigsina: “Mana allimi kangichi”. Ñami nirkaikichita, kamkunaka nukanchipa kuiaska kagtakuna, sugllapi sumaglla kaugsangapa, wañunkama. ⁴ Ñi ima mana pakaspallami rimanakuikichita. Nukaka, kamkunamanda iapa alli iuiachiiwami kani. Nukanchi ña iapa llakii pasaspapas, iapa suma kuntintullami kani.

⁵ Nukanchika, Masedonia alpama chaiagsamuura-mandata mana samarii pudirkanchichu. Kaipika, tukui-pimi llakii-kunalla tarinakurkanchi. Nukanchipa muiundi kagkunawami killachinakuiwa kaugsanakurkanchi. Nukanchipa iuiaipika iapa manchaiwami karkanchi. ⁶ Chasa kagpipas, Taita Dius sambaiaska iuiaiwa kagkunata suma iuiachigka, Tito chaiagsamugmandami nukanchita chi llakii-kunata sumaglla kungachirka. ⁷ Pai chaiagsamugmandallaka, mana; kamkunata kawagrispa, iapa kuntintarispa kagmandami nukanchitapas iapa alli iuiachirka. Pai Titomi nukanchita willag-samurka: kamkuna munanakungichisi, nukanchita iku-ti kawangapa; iapa llakii-wasi kangichi; nukata juchachiwanakuskamanda michawangapa iuiaspasi kangichi. Nuka chasa uiaspaka, masmi alli iuiachii tukuwag-samurka.

⁸ Nuka chi kartawa kamkunata llakichispapas, kuna-uraka ñi ima llakii mana iuiachiwanchu. Ñugpata chi kartawa sug ratulla kamkunata llakichiskata iachaspaka, nukapas llakii-wami karkani. ⁹ Ikuti kuna-uraka, alli iuiachii-wami kani. Kamkunata llakichiskamandaka, mana; kamkuna llakichii tukuspaka, Taita Diuswa ikuti tukugsamugkunamandami iapa kuntintulla kani. Taita Diuspa ñawipi kikin imasa munakuskasinasi llakirig-samurkangichi. Chasaka nukanchi, ñi imapipas mana kamkunata wagllichigsina rurarkanchichu. ¹⁰ Taita Dius imasa munaskasina kachamuska llakii iukagka, Taita Diuswami tukugsamú; chasaka, diltudupa wañuita kispiringapa. Chasa llakii iukaspaka, kipama mana ñi imapipas llakii iukangachu. Ikuti kai alpapi tiaskakunallawa iuiarisa llakii iukagka, mana diltudupa wañuita kispiringapa kanchu. ¹¹ Kamkuna, Taita Dius imasa munakuskasina chi llakiita iukaskamandaka, kuna-uraka kawaichi imasa iapa alli tukugsamugta. Allillami iuiarir-kangichi. Chi jiru ruraita micharig iuiaiwami tukug-samurkangichi. Allillami chi jiru ruragta piñarkangichi. Chi jiru ruraimanda allipami mancharirkangichi. Nispaka, munanakurkangichimi kawawangapa. Michawangapa iuiaipasmi iukarkangichi. Chi jiru ruragta allillami justisiarkangichi. Tukui chasa ruraskakunawami kawachirirkangichi mana pandariska kagtakuna.

¹² Nuka, chi kartata kamkunapagma kachaspaka, chi jiru ruragmanda ñi chi jiru rurai tukugmanda iuiarispa-lla mana kacharkaikichitachu. Kamkuna Diospa ñawipi nukanchimanda iapa llakii iukagkunata kawachingapami chi kartata kacharkaikichita. ¹³ Kamkuna chasa allilla ruraskamandami nukanchi, uiaspa, iapa alli iuiachii-wa kanchi.

Kasapas. Tito iapa alli iuiachiiwa chaiagsamuskata kawaspami nukanchita askurinti alli iuiachiiwa kuntintarigsamurkanchi. Tukui kamkuna, paipa iuiaita sumaglla musuiachigsinami ruragsamurkangichi. ¹⁴ Tito manara rigpitami nuka kamkunamanda: “Alli runakunami kankuna” paita willarkani. Pai kikinmi kawagrirka nuka imasa willaskasina sutipa kagta. Imasami nukanchi tukui ima kamkunata willaskakuna sutipa ka: chasallatami kamkunamanda Titota allilla willarkanchi. ¹⁵ Tukui kamkuna, suma mancharispa chugchurispa, pai Tito ima willaskata uiaspa, sumami rurarkangichi. Chasa iuiarispa kamkunata iapa kuiá. ¹⁶ Kamkuna tukui ima uiaskata allilla runakugta iachaspami kamkunawa iapa alli kuntintulla iuiachiwá.

Alli iuiaiwa karai iukaskakunamanda

8 Munanakunchimi, kam taita i mamakunata kasa willangapa: Taita Dioska, Cristowa tukuskakuna Masedonia alpapi kaugsanakuskatami kawachirigsamurka iapa suma kuiagta. ² Paikunata iapa llakii-kuna chaiagpipas, mana iapa iuiarispa, alli iuiachii-llawami kankuna. Ñi ima mana iukaspapas, iukagsinami kulki karankuna, mana llakispalla. ³ Nuka kikin, chasa kawaspami willaikichita: paikuna, karai pudiskamanda masmi karankuna, ñi pipas manara nigpi. ⁴ Sinchimi nukanchita mañarkakuna, kasa nispa: “Kai karaskata chaskiichi; chika, Taita Diospalla kagkunata aidaringapa”. ⁵ Nukanchi iuianakuskamandapas masmi kararkakuna. Ñugpami Taita Dios imasa munakuskasina Iaia Jesusta iukachirirkakuna. Mas nispaka, nukanchitapas kulkimi kararkakuna. ⁶ Chimandami Titota mañarkanchi, kamkunapagma ringapa; chasaka kamkuna, sumaglla kuiaiwa karangapa kaskakunata pai ikuti kallarispa, tandachii puchukangapa. ⁷ Kamkuna, Cristowa iapa suma iuiarispa, tukuipi suma rimaspa, tukui suma iachaspa, tukui suma ruraikunata ruraspa, nukanchita suma kuiaspami allilla rurakugta kawachiringichi. Tukuipi allilla rurakugta kawachiringapaka, kunaumanda iukangichimi, chi mana imapas iukagkunata sumaglla kuiaspa, achka imapas paikunamanda karangakuna.

⁸ Chasa nispaka, mana niikichitachu: “Nuka ima nikuskata chasa ruraichi”. Sugkuna suma iuiaiwa karaskakunata kamkuna iachangapami chasa niikichita; chasa iachaspaka, kamkunapas, chasallata karaspa, tukui suma alli iuiaiwa kuianakuskata kawachiringapa. ⁹ Nukanchipa Iaia Jesucristo imasa suma kuiai iukaskata ñami allilla iachangichi. Paika, iapa iukag kaspapas, kamkunata iapa kuiaspami mana imapas iukagsina tukugsamurka. Pai chasa tukugsamuskas-

mandaka, kamkunaka, Diospa ñawipi mana ñi ima iukaspapas, iapa iukagsinami tukurkangichi.

¹⁰ Kamkuna ministiskakunamanda kulki tandachingapa kallarispa, ña sug watami tukurka. Kallariilla mana kallarirkangichichu. Iapa munaspami kallarirkangichi. Chimanda, kamkuna allilla kangapami kasa iuiachiikichita: ¹¹ kunaura kamkuna kallariskata puchukapuaichi. Chiwanka, imasami iapa munaspa suma iuiaiwa kallarirkangichi: chasallatami suma iuiaiwa iukangichi, imasa pudiriskasina puchukangakuna. ¹² Maikanpas alli iuiaiwa karangapa munaskataka, Taita Dios sumagllami kawá, achka u mana achka karagpipas. Taita Dios mana mañanchu, ima mana iukaskata karangapa.

¹³ Mana niikichitachu, kamkuna ima karaskawa sugkuna sumaglla kaugsangapa, nispa kam kikinkunaka pisi llakiiwa pasanakungapa. ¹⁴ Tukuikuna iwalla pasangapami chasa niikichita. Kunaumi kamkuna iukangichi; ima iukaskawaka, sugkunata ima ministiskakunata aidangapa. Chasallata suura, kamkuna ministikuura, paikuna iukaskatami karangakuna. Chasaka, kamkuna paikunawa imapipas iwallami pasankangichi. ¹⁵ Chasallatami ñugpamanda librupi willaraiá, kasa nispa:

Achka tandachigtaka
mana puchupurkachu.
Ñi asllita tandachigkunatapas
mana pisipurkachu.

Titota i sugkunatapas kachakuskamanda

¹⁶ Imasami nuka, kamkunamanda suma iuiaiwa kani: chasallatami Taita Dios, Titotapas iuiachirka. Chi-mandami Taita Diusta: “Pai Siñur” nini. ¹⁷ Nuka Titota kamkunapagma ringapa mañauraka, Arimi ainiwarka. Kamkunata kawagringapa iuiaiwa kaspami pai kikinpa munaiwa kamkunapagma ringapa ka.

¹⁸ Sug waugkitapasmi Titowa kachanakunchi, kamkunapagma ringapa. Chi waugki Alli Willaita willaspa purigmandaka, Cristowa tukui tukuskakuna sugnigta kaugsanakuskapasmi ninkuna: “Alli runami ka”. ¹⁹ Kasapas. Tukui Cristowa tukuskakuna, paitami agllarkakuna, nukanchiwa rispa, paikunapa sumaglla kuiaiwa kulki karaskakunata apaspa, ministiskakunata karagringapa. Chi karaskata chaskigkunaka, atun Taita Diusta: “Iapa suma atunmi kangii” ningapa i nukanchi suma iuiaiwa karaskata kawachingapami chasa karagringap kanchi. ²⁰ Chi waugki, nukanchiwa richu, chi achka kulki tandachiskakunata ministiskakunata karagringapa: chasapika iuianchimi: ñi pipas mana sug rigchakuna iuiangapa pudingakunachu. ²¹ Munanakunchimi, Iaia Jesupa ñawipi i runakunapa ñawipipas allilla rurakugta kawachingapa.

²² Paikunawa sug waugkitapasmi kachanakunchi, kamkunapagma ringapa. Paitaka sug rigcha sug rigchapimi kawarkanchi, tukuipi allilla rurag kagta. Kuna-ura paika, kamkunata iapa alli iuiaiwa kaspas, masmi suma munaku, allilla ruraspa kamkunawa kagringapa. ²³ Titomanda pipas tapugpikunaka, paimanda ainingi-

chi: “Nukawa purigmi ka; kamkunamanda nukawa sugllapi allilla ruragmi ka”. Chi sug waugkikunamandaka pipas tapugpikunaka, paikunamandaka ainingichi: “Paikunapas, Cristowa tukuskakuna sugnigta kaugsanakuskatami kachamuska kankuna. Paikunapa suma kaugsaiwami Cristota suma atuniachigisina rurankuna”.²⁴ Paikunata kawachipuaichi, kamkuna sutipa kuiaspa kagtakuna; chasaka, Cristowa tukuskakuna sugnigta kaugsanakugpas iachangapa. Kasapas paikunata kawachipuaichi, nukanchi mana ianga kamkunamanda alli iuiachiwa kagtakuna.

Taita Diuspalla kagkunamanda tandachinakuska kulkimanda

9 Taita Diuspalla kagkunamanda tandachinakuska kulkimanda mana chaiawakunchu, kamkunata ñi imapas willangapa.² Kamkuna chasa tandachingapa munanakugta ñami iachani. Kai Masedonia alpapi Cristowa tukuskakunata, kamkunamanda alli iuiachiwa kaspas, ninimi: “Akaia alpapi kaugsanakug sumaglla iuiaiwa aidangapa niska, ña sug watami tukurka”. Kamkuna chasa suma iuiaiwa kagkunata uiaspaka, achkakunami animurirkakuna, paikunapas karangapa.³ Chasa kagpipas, chi waugkikunata kamkunapagmani kachakuni; chasaka, nukanchi kamkunamanda sugkunata willaska mana llullasina kangapa. Chiwanka kamkuna, karangapa iuiailawa suianakungichi.⁴ Masedoniamanda maikankuna, nukawa rispa, kawagrichukuna kamkuna manara tandachispa suianakugta: chasa kawaspaka, nukanchika, kamkunamanda allilla iuiaiwa kaspapas, pingaipami pasantranchi. Chasawaka kamkunaka, masmi pingaipa pasantranchi.⁵ Chimandami iuiarirani: “Chaiawakumi, chi waugkikunata mañangapa”; paikuna, ñugpa kamkunapagmani rispa, kamkunata iuiachigrichukuna; chasaka, kamkuna ima karangapa niskata ña tandachiska kangapa. Mana munanchichu, nukanchi mañanakuska-manda kamkuna karachukuna. Kam kikinkunapa suma iuiailawa karangapami munanakunchi.

⁶ Kasa iuiariichi: asllita tarpug, asllitami pallá. Ikuti achka tarpugka, achkami pallá.⁷ Tukuikuna iukangichimi, kam kikinkunapa iuiaipei imasa karangapa niskasina karangakuna. Mana karangichi llakispa u mañanakugmandalla. Alli iuiaripa kuntintulla karagtami Taita Dios kuiá.⁸ Taita Dioska pudinmi, kamkunata ima ministiska ialigtapas karamunga. Chasaka, kamkuna iukaskawa pudingichimi, imaurapas sugkunata imapiapas aidanga.⁹ Chasallatami ñugpamanda librupi willaraiá, kasa nispas:

Mana imapas iukagkunata ialigtami achka kará.

Pai allilla ruraskakunaka,

ñi imaurapas mana tukuringapa kanchu.

¹⁰ Taita Dios tarpungapa simillata i mikungapa mikuita karag, paillatami kamkunatapas tukui karangapa ka. Chi karaskakunaka, wiñachigsinami tukugsamungapa ka. Chasaka, kamkuna tarpugsina sugkunata karaskakunaka mas nispaka achka sumaglla pallangapasina-

mi tukugsamungapa ka.¹¹ Chasapika kamkuna, tukuipi iapa iukagsinami tukugsamunkangichi; chiwanka, sugkunata allilla iuiaiwa karangapa. Chi kulki kamkuna tandachinakuskata nukanchi karagriuraka, chita chaskigkuna Taita Diusta: Pai Siñurmi ningapa kankuna.¹² Chi kulki Taita Diuspalla kagkunata karaspaka, paikuna mana imapas iukagmandalla mana karangapa kanchichu. Paikunataka iuiachingapami kanchi, Taita Diusta ikuti ikuti: “Pai Siñur” ningapakuna.¹³ Kamkuna karaskata kawaspami iachangapa kankuna, Cristomanda Alli Willaita kamkuna iachaspa, allilla ruraspa kagtakuna. Chimandami paikuna, Taita Diusta ningapa kankuna: “Kam, iapa suma atunmi kangí”. Kamkuna allilla iuiaiwa paikunata i tukuikunata karaskamandapasmi paita iapa suma atun kagta ningapa kankuna.¹⁴ Chasallatami kamkunamanda Taita Diusta mañangapa kankuna, kasa nispas: “Sumaglla kawapuchukunata”. Taita Dios kamkunata askurinti suma kuiaiwa kawaskamandami paikunapas kamkunata kuiangapa kankuna.¹⁵ Mana ima rimaiwapas parlai pudingasinawa nukanchita kispichingapa kachamuskamanda, Taita Diusta nisunchi: “Pai Siñur”.

San Pablota juchachinakuskata, pai ainiskamanda

10 Cristo tukuikunata llakispa kawaspas, mana atuniachirispalla kagmandami nuka Pablo kikin kasa mañaikichita. Kamkunapura sugkunaka, nukamandasi ninkuna: nuka kamkunawa kagriura, manchaspallasi rimaikichita. Ikuti kamkunapagmandakarupi kauraka, askurinti sinchi piñaspasi iskribiichita.² Nukamanda chasa nigpikunapas, mañaikichitami: nuka ikuti kamkunapagpi chaiagriuraka, ñujalallapas chaiawachu, chasa rimanakugta sinchi piñagringapa! Paikuna, nukanchimanda kai alpapi tiaskakunallawa iuianakugtami juchachinakú. Allichiriskami kani, chasa juchachiwanakuskata sinchi ainingapa.

³ Nukanchi, kai alpapi kaugsanakuspapas, mana kai alpamanda runakunasina makanakuspa kaugsanchichu.⁴ Chasallata, kai alpamanda wañuchinakudiru mana iukanchichu. Taita Dios kikin karamuska pudig binsidirusinami iukanchi. Chikunawaka, iaia kuku arkaska patakunata urmachigsinami rurangapa pudinchi.⁵ Chasallata, tukui atun tukuspa Taita Diusta rigsigsamungapa arkaska iuiaikunatami anchuchingapa pudinchi. Tukui nukanchipa mana alli iuiaita arkagsinami charingapa pudinchi; chasaka, Cristo imasa niskallata rurangapa.⁶ Tukui paita mana uiaskakunata justisiangapa allichiriskami kanchi, pai tukui ima niskata kamkuna allilla ruraspa tukugsamuura.

⁷ Kamkunapa ñawiwa kawaspallami imapas iuiaringichi, allilla u mana allilla kagta. Maikanpas Cristopa kagta iuiarigpika, kasapas iuiarichu: imasami paikuna, Cristopa kankuna: chasallatami nukanchipas kanchi.

⁸ Iaia Jesús kikin nukanchita kachamuskata nuka atun tukuspa sinchi rimakuspapas, nukata chimanda mana manchariwanachu. Mana kamkunapa iuiaita wagllichingapa nukanchita kachamurkachu. Kamkunata alli suma iuiai iuiachingapami kachamurka.⁹ Mana iuian-

gichi, kamkunata manchachingapa nuka kartakuna kachaska kagta. ¹⁰ Nukapa kartakunamanda kasasi ninkuna: "Paika, ajai sinchimi kartapi rimá. Ikuti pai kikin kaipi kauraka, wañungasinami rimá. Pai rimaspapas, pipas ninkunami: 'Asichingasinallami rimá.'"

¹¹ Chasa nigkuna iachachukuna: imasami nukanchi, karupi kaspera, kartakunapi rimaspa kanchi: chasallatami, kamkunawa kaspera, ima ruraikunapas ruraspa kangapa kanchi.

¹² Chi runakuna iuiarinkuna: "Nuka, mas atunmi kani". Nukanchika mana munanchichu, paikunasina tukungapa. Paikuna kikinpurami tapurinakú: "¿Pisik mas iacha kanchi?"; chikunaka, mana iuiiugkunami kankuna. ¹³ Nukanchika, atun iacha kagta nirisppapas, mana ialigta atun tukungapa munanchichu. Taita Diosmi nukanchita iuiachiku, maikama Alli Willaita willaspa puringapa. Paillatami nukanchita kacharka, kamkunapagma chaiagringapa. ¹⁴ Chimandami, kamkunata kai kartakunapi iuiachispa, mana ialigta iskribinchi. Nukanchi manara kamkunapagma chaiagrisa kagpika, sug rigchachar kantra. Nukanchi, tukuikunamanda ñugpami kamkunapagma chaiagrisa kanchi, Cristomanda Alli Willaita willangapa. ¹⁵ Mana iskribinchi, sugkuna Cristomanda ruraskakunawa atun tukuspa. Chasa iskribigpika, iapa ialigtami niraiantira. Kasapasmi nukanchi munanakunchi: kamkuna Cristowa mas suma kuianakuspa iuiarigsamugpikunaka, Taita Dios imasa munakuskasina nukanchi kamkunapura Alli Willaita mas willaspa mirangapakuna. ¹⁶ Chiwanka, kamkunapa alpamanda mas karupi kaugsanakuskatapas chi Alli Willaita willagringapa, sugkuna ñugpa willai kallarikakunawa mana atun tukuspalla.

¹⁷ Maikanpas kikinmandalla iuiarispas nirichu: "Nuka, mas atunmi kani": chasaka, mana. "Atun Taita Diosmandallami atun kagsina kani" iuiarichu. ¹⁸ Maikanpas, kikinlla nirichu: "Nukami atun kani": paitaka atun Taita Dios mana ninchu chasa kagta. Maikanta Taita Dios atun kagta niskatami atun niraiá.

Atuniachirispas llullaspas iachachigkunata ainiskamanda

11 ¡Amalai nuka sug mana bali upasina rimakuskata uiawai pudinrangichi! Imasa rimakugpipas, uiawaichi. ² Taita Dios imasami munaku, kamkuna paipalla kangapa, mana pimandapas tukuspalla: chasallatami nukapas munakuni. Kamkunata Cristowa kasarangapa animuchigsinami rurarkani, manara kari rigsiska sipassina paita kawachingapa iuiarispas. ³ Chasa rurasppapas, nuka kasami manchaspa iuiarini: imasami iaia kuku kulibra, paipa iapa jiru iuiaiwa Evata llullaspa pandachirka: ¡ujalallapas kamkuna chasallata sakirinrangichi, imapipas pandachii tukungapa! Chasa pandarigpikunaka, kantrami tukui kuiaspa iuiaiwa Cristomandalla kaugsanakuspa, paita kungaringapakuna. ⁴ Nukanchi kamkunata Jesusmanda ñugpa willagriskauramanda, maikan kati chaiagrispa, Jesusmanda sug rigcha willaskatami suma uiaspa kangichi. Santu Ispirituta allilla chaskiska kaspapas, katima rimaskata uiaspa, sug rigcha ispiritutami sumaglla

chaskingichi. Chasallata, sutipa Alli Willaita uiasppapas, mas nispaka sug rigcha willanakuskatapasmi sumaglla uianakungichi. ⁵ Chi Cristo kikin kachamuwaska kagta nirispa atun iachachigkunaka, ¿nukamanda mas iachachu kankuna? Chita iuianiami, mana chasa kagta. ⁶ Panda panda nuka rimakuskata allillami iachani ima rimakugta. Imapipas, nukanchi imasa ruraskakunawami kamkunata kawachirkanchi chasa allilla iachagta.

⁷ Kasapas. Nuka, Taita Dios karamuska Alli Willaitami willarkaikichita, mana imapas kamkunata mañaspalla. Kamkunata aidangapami, nuka kamkunawa sugllapi tukuura, ima rurai tiaskata ruraspa karkani. Chiwanka, ¿pandarirkanichu? ⁸ Cristowa tukuskakuna sugnigta kaugsanakuskatami kulki chaskirkani, kamkunapagpi Alli Willaita willagringapa. Chasaka, kamkunamanda paikunata kulki kichugsinami rurarkani. ⁹ Kamkunawa kaura, nukata ima ministiska ñi pitapas mana mañar-kanchi. Masedonia alpamanda waugkikuna, chaiagrispami nukata ima ministiska karawagrirkakuna. Chimandami kamkunata mana mañaspas imapas llakichirkaikichita. Chasallatami mana mañaspas imapas llakichingapa kaikichita. ¹⁰ Cristomanda sutipa Alli Willaita nuka iachaspami kasa niikichita: tukui Akaia alpapi ñi imapas mana mañar-kanchi. Chasamanda nuka alli iuiachiiwa kaskata, ñi pipas mana kichuwangapa kanchu. ¹¹ ¿Imapatak chasa rimarini? ¿Kamkunata mana kuiaspachu chasa rimarini? Taita Diosmi allilla iachá, nuka sutipa kamkunata kuiagta.

¹² Nuka rurakuskaka mana sakispallami imapas mana mañaspalla rurakungapa kani. Chasaka, chi kulki mañaspas iachachigkunaka mana imaurapas pudingakunachu, nukanchisina alli iuiachiiwa kangapakuna. ¹³ Chi kulki mañaspas iachachigkunaka, Cristo kikin mana kachamuska kankunachu. Llullaspa iachachigkunami kankuna. Cristo kachamuskasina tukuspami llullaspa purinakú. ¹⁴ Chasa iachachispa purinakugmandaka mana ujnaringasina kanchu. Kikin iaia kuku mi alli anjilsina punchaiachiska kawarí. ¹⁵ Chasallatami kawarí: chi iaia kuku ima niskata ruragkunapas tukui alli iachachinakugsina tukugpikunaka, mana ujnaringasina kanchu. Chasa kagpipas, imasa jiru ruraskakunawami diltudupa puchukaringapa kankuna.

San Pablo imasa Iaia Jesusmanda iapa llakii iukaskamanda

¹⁶ Ikuti kasami niikichita: mana pipas iuiachukuna, nuka upasina kagta. Chasa iuiagpikunapas, nuka sug mailla atun tukuspa, upasina rimangapa kaskata uiawaichi. ¹⁷ Chasa rimaspaka, Iaia Jesús munaskasina mana rimangapa kaikichitachu. Upasinami rimangapa kani, atun tukuspalla. ¹⁸ Achkakuna, kai alpapi imasa kaskamanda iuiarispas, atun tukuspami kankuna; chasallatami nukapas, atun tukungapa kani. ¹⁹ Kamkunaka, allilla iachagkunasinakaspera, chi upa iuiiugkunatapas suma kuntintullami uiangichi. ²⁰ Maikanpas imasa munaskasina kamkunata trabajachigpipas, kamkunapata kichugpipas, kamkunata llullachigpipas, atun tukuspa unzagpipas, ñawipi wagttagpipas, kam-

kunaka ñi imapas mana ainingichichu. ²¹ Ikuti nukan-chitaka manchaimi apirka, chasa kamkunata rurangapa. Chasaka manhaspallami niikichita.

Chasa kagpipas, imasami sugkuna, kai alpapi kaskamanda iuiaripa, atun tukunkuna: chasallatami nukapas, upasina rimaspa, atun tukuni. ²² Paikuna hebreo runa kagpikunaka, nukapas chasallatami kani. Paikuna Israelmada kagpikunaka, nukapas chasallatami kani. Paikuna ñugpamanda achala taita Abrahampa kagpikunaka, nukapas chasallatami kani. ²³ Paikuna Cristo ima niskata rurag kagpikunaka, upasina rimaspa niikichitami: nukaka, paikunamanda masmi kani. Paikunamanda mas sinchi ruragmi kani. Paikunamanda mas achka biajimi karsilpi wichkaraiaska kani. Paikunamanda mas achka biajimi asutii tukuska kani. Achka biajimi wañui kispiska kani. ²⁴ Pichka biajimi judiukuna kimsa chunga iskunkama asutiwarkakuna. ²⁵ Kimsa kimsa kimsa chagllawa asutiwarkakuna. Sug biajimi rumikunawa piawarkakuna. Nuka rikuska barkuka, kimsa biajimi iaku ukuma jundarirka. Sug biaji sug tuta i punchami lamar iakupi waitakurkani, wañunga kispigta. ²⁶ Achka biaji ñambikunapi, iaku jundaska wañui kispiska, sisaikuna wañuchiwangapa kispiska, judiukuna i mana judiu kagkuna wañuchiwangapa kispiskami kani. Puiblukunapi i chusa sitaska alpakunapi wañuchiwangapa kispiska, lamar iakupi wañui kispiska, llullaspa waugkikunasina wañuchiwangapa kispiskami kani. ²⁷ Nuka kikinpa makiwa saikugtami ima trabajukunapas rurarkani. Achka biajimi mana puñuspalla pakarirkani. Iarkaiwa i iakunaiwami karkani. Achka biajimi mana mikui mikurkani, Taita Diusta iuiaripa. Mana katangawa kaspas, chiriwami karkani.

²⁸ Imasami nirkaikichita: tukui chikunawa i sug imakuna pasariwaskawa iuiaripa, tukui punchakunami Cristowa tukui tukuskakunamanda maipi kaugsanakuskamanda llakiiwa chisiakuni. ²⁹ Maikan Jesuswa kaspas paita katingapa sambaiagpika, ¿manachu nukatapas sambaiwantra? Chasallata, pipas maikanta pandachigpika, ¿manachu nukata iapa llakiriwantra?

³⁰ Imapipas nuka atun tukungapa chaiwagpika, nuka kikinpa iuiaiwa ñi ima mana rurai pudigsina kaskawami atun tukuska kagsina iuiasa. ³¹ Nuka mana llullaspalla willaskata, Iaia Jesuspa Taita Diosmi iachá. Paita imaurapas nisunchi: “Kam, iapa suma atunmi kangi”. ³² Damasko puiblupi nuka kagriuraka, atun mandag Aretas iukarka sug mandag; chi mandagka apiwangapami munakurka. Chimanda, chi puiblumanda tukui llugsidiru pungukunata chapangapami churarka, nuka mana llugsii pudingapa. ³³ Nigpika, nukata sug atun saparupi churawaspa, puibluta muiuchiraiaska atun pata kincha awanigmanda alpamami uraikuchiwarkakuna. Chasapimi paipa makimanda kispirirkani.

Iaia Jesús, ima muskui ukupisina San Pablota kawachiskamanda

12 Nuka kikinlla atun tukuspa iuiariskawaka ñi ima allilla mana surkunichu. Chasa kagpipas, Iaia

Jesús ima muskui ukupisina kawachiwaskamanda i ima kawariwaskamandami iukani rimanga. ² Cristowa tukuska kag runatami rigsini. [†] Chi runaka, kimsa awa ialiska sug luarmami apai tukurka. Chasa pasariskaka, chunga chusku watami ka. ¿Kuirpundiwachu u ispiritullawachu chi runa chasa apai tukurka? Chita mana iachanichu. Taita Diosllami iachá. ³ Chi runataka, ¿kuirpundiwachu u ispiritullawachu chasa apai tukurka? Chita mana iachanichu. Taita Diosllami iachá. ⁴ Chi runaka, paraíso suti suma luarmami apai tukurka. Chitaka allillami iachani. Chipika, pipas mana iachaska, pipas mana rimangapa lisinsiaska rimaikunatami uiarka.

⁵ Nukata chasa pasariwaskamandami atun tukuni. ^{††} Ikuti nuka kikinmandaka mana atun tukunichu. Nuka kikinpa iuiaiwa ñi ima mana rurai pudigsina kaskawami atun tukuni. ⁶ Nuka atuniachiringapa munaspa, manachar upasina kantrani. Nuka, mana ñi imapi llullanichu. Chasa kagpipas, nuka kikinka mana atuniachirinichu. Chasaka maikanpas, nuka ruraskata kawawaspa, nuka rimaskata uiawaspa, mana iuiangachu, nuka imasa kagmanda mas atun kagta.

⁷ Nuka muskui ukupisina iapa suma luarmanda kawariskakunata kawaskamandami iaia kuku churawarka, nukapa kuirpupi tugsispa iapa nanai iukangapa. Chasa lisinsiaimi tiarka, nuka mana iapa atuniachiriska iuiaiwa kangapa. ⁸ Kimsa biajimi Iaia Jesusta nuka mañarkani:

—Kai nanaita anchuchiwai.

⁹ Paika ainiwarka:

—Kamta, nuka achka kuiaimi iukaiki. Chillami chaiá. Maikanpas sambaiaspa mana pudigsina kaskapimi nukapa iapa iachaita mas allilla kawachini.

Chasamandami nuka, sambaiaspa mana pudigsina kaspapas, alli iuiachiiwa kani; chasaka Cristopa iapa iachai, nukawa kawachii tiangapa. ¹⁰ Chimanda nuka, sambaiaspa mana pudigsina u iapa ministiska u llakiiwa kaspapas, u kamiwanakugpipas u jiru rurawangapa munawanakugpipas; Cristomanda imapas kagpika, alli iuiachiiwami kani. Nuka sambaiaspa mana pudigsina kaura, Cristowami tukui pudig kani.

Korintopi kaugsag Cristowa tukuskakunamanda, San Pablo llakikuskamanda

¹¹ Upasinami nuka kikinmanda rimarkani. Kamkunami iukarkangichi nukamanda ningakuna: “Pai, alli runami ka”. Chasa kamkuna nigpikunaka, nuka manami upasina rimani. Nuka iangasinalla kagpipas, chi “Cristo kikin kachamuwaskami kani” nirispa atun iachachigkuna, paikunaka ñi imapipas nukamanda mas atun mana kankunachu. ¹² Nuka kamkunawa kauraka, mana pipas kawaskasinakunawa, ujnaringasinakunawa i mana pipas pudiskasinakunawami, Cristo kikin kachamuwaska kagta mana sambaiaspalla kawachirirkani. ¹³ Imasami Cristowa tukuskakuna sugnigta kaugsanakuskawa karkani: ¿manachu kamkunawapas chasallata karkani? Chasallata ima kagpipas,

[†] Chi runa, kikin San Pablomi niraiá. ^{††} griego rimaiwa: Chi runamandami atun tukuni.

kamkunata ñi imapas mana mañaspa llakichirkaiki-chitachu. Chasa mana mañaskamandaka, pasinsiawai-chi.

¹⁴ Uiawaichi. Ña allichiriskami kani, kimsama kamkunata kawagringapa. Kai biajipas, mana imapas mañaspa llakichingapa kaikichitachu. Kamkunapataka ñi ima mana munarikunichu. Kam kikinkunatami munanakuikichita. Uchulla wambrakunata mana chaiakunchu, taitamanda i mamamanda kulki tandachingapa. Taitata i matatami chaiaku, wambrakunamanda tandachingapa. Chasallatami mana kamkunata chaiaku, nukamanda kulki tandachingapa. Nukatami chaiawaku, tukui ima kawangapa. ¹⁵ Nuka tukui ima iukaskatami alli iuiachiwa kamkunamanda tukuchisa; nuka kikipas puchukariginsinapasmu tukusa; chasaka, kamkunapa alma allilla kispiringapa. Nuka chasa kamkunamanda iuiarisa kuiaspa ruragpipas, rigchawanami, kamkunaka nukata mana munawagkunasina.

¹⁶ Kamkunata ñi imapas nuka mana mañaska kagpipas, sugkunaka, chasa iachaspa, ninakumi: “Pai, iachag tukuspami kamkunata llullachispa krichirka”.

¹⁷ ¿Maikanta kamkunapagma kachaspachu, kamkunata llullachispa, imapas kichurkaikichita? Manima.

¹⁸ Titota kamkunapagma ringapa mañaspa, kai sug waugkiwanta kacharkani; ¿Titochu, kamkunata llullachispa, imapas sisarka? ¿Manachu nukanchi iskandi, suglla iuiaiwa suma allilla ruraspa purirkanchi?

¹⁹ Kamkuna iuianakungichichar, kamkunapa ñawipi nukanchi allilla kangapa chasa rimanakugta. Chasa mana kanchu. Taita Diospa ñawipi Cristopa kaspami chasa allilla rimanakunchi. Nukapa kuiaskakuna, kamkunata alli suma iuiai iuiachingapami tukui chasa rimanakunchi. ²⁰ Kasapasmi llakiwaku: nuka kamkunapagma chaiagriura, nuka imasa munaskasina mana kamkunata tarigringapa. Chiura, nuka kamkunata piñagpika, kamkuna imasa munawaskasina chasallata mana kawawangapa kangichichu. Kamkunata kasa tarigringapami llakiwaku: kampa piñachirinakuspa, jiru iuiaiwa kawanakuspa, rabiachirinakuspa, parijuma minusarinakuspa, juchachinakuspa, wasa rimanakuspa, atun tukuspa, killachinakuspa kagpikuna.

²¹ Chasa kagpika, nuka kimsama kamkunapagma chaiagriuraka, iapami llakiriwangapa ka. Nukapa Taita Diospa ñawipi kamkunamanda pingaipami pasangapa kani. Kamkunapura achkakuna, ñugpamandata jiru ruraspa, kari warmiwa pandarisa, chasallata ima jiru iuiai munaikunata ruraspa kaugsanakugmanda; chimandaka, Taita Dioswa mana tigrangapa iuianakuskamanda wakangapachar chaiawanga.

Korintopi kaugsanakuskata ikuti iuiachiskamanda

13 Ña kimsamami kamkunata kawagringapa kaikichita. Nuka chaiagriura, “Maikan pandariska ninakugpika, iskai u kimsa kawagkunami willangakuna chasaka sutipa kagta. Chasaka, allillami kanga”.

² Imasami nuka, iskai biajima kamkunawa kagriura nirkaikichita: chasallata kunaora, mana chipi kaspapas, ñugpata jiru ruraspa kaugsanakuskata i tukui kamkunata kasami ikuti niikichita: chasa kaugsanakugpika, nuka, kamkunapagma chaiagriura, mana llakispallami piñagringapa kaikichita. ³ Chasawami kamkuna imasa iuianakuskasina kawawankangichi, nuka, Cristowa kaspapa, kamkunata chasa rimakugta. Cristo kikinka, kamkunawa mana kanchu mana pudigsina. Kamkunapa chaugpipi tukui pudigmi ka. ⁴ Paika, sambaiaspa mana pudigsina kruspi wañuchii tukuspapas, Taita Diospa iapa iachaiwami tukui pudig kaugsaku. Nukanchipas chasallata Cristowa sambaiaspa mana pudigsinami kanchi. Chasa kaspapas, Taita Diospa iapa iachaiwami Cristowa tukui pudig kaugsanakunchi; chasaka, kamkunamanda tukuipi allilla tukungapa.

⁵ Tukuikuna allilla iuiaripuaichi, ari u mana Cristowa suma iuiarinakugta. Iuiaripuaichi, imasa allilla u mana allilla kagtakuna. ¿Manachu iuiaringichi, Jesucristo kamkunawa kagta? Paiwa mana kaspami kamkuna mana suma iuiariwa kangichi. ⁶ Kasami munani: nukanchi allilla iachachig kagtakuna, kamkuna iachangapa. ⁷ Taita Diusta mañapuikichitami, kamkuna ñi ima jiru mana ruraspa kaugsanakungapa. Nuka mana mañapuikichitachu; chiwanka, nukanchi allilla iachachig kagtakuna kawaringapa. Kamkuna allilla ruraspa kaugsanakungapagllami mañapuikichita, nukanchi ianga iachachig kawarigsina kaspapas. ⁸ Nukanchi mana pudinchichu ningapa, sutipa Alli Willai, mana alli kagta. Iukanchimi, Alli Willaita iachaspaka, sutipa kagta rimangakuna. ⁹ Chimanda, nukanchi sambaiaspa mana imapas pudigsina kagpi, ikuti kamkunaka tukui pudig kagpikunaka, chasa iachaspa, nukanchita iapa allimi iuiachi. Kasapasmi kamkunamanda mañanchi: kamkuna tukuipi iapa alli tukungapakuna. ¹⁰ Nuka manara kamkunawa kagrispami chasa ninakuikichita. Chiwanka, nuka kamkunapagma chaiagriura, mana chaiawangachu, kamkunata sinchi piñagringapa. Iaia Jesuska mana kachamuwarkachu puchukangapa. Alli suma iuiai kamkunata iuiachingapami kachamuwarka.

Kaiakama, niskamanda

¹¹ Kunaora, taitakuna i mamakuna, alli iuiachiwa kuntintaripuaichi. Tukuipi alli ruraspa kaugsapuaichi. Kam kikipura sumaglla iuiachirinakuspa kapuaichi. Suglla kagsina iuiarisa, sumaglla kaugsapuaichi. Taita Dios, kamkunata iapa kuiag i sumaglla kaugsaita karagmi kamkunawa kangapa ka. ¹² Kam kikipura Taita Dioswa iuiarisa, muchanakuspa, “Puangi” ninakuichi. ¹³ Taita Diosmandalla tukui kaipi sumaglla kausagkuna, kamkunata: Puangimi ninakú.

¹⁴ Iaia Jesucristo, kamkunata sumaglla kawapuachu. Taita Dios, suma kuiaspa charipuachu. Santu Ispíritu, tukuikunawa sugllapi kaugsapuaachu.

GALASIAPI CRISTOWA TUKUSKAKUNATA

1 Jesucristo kachamuskami nuka kani, Alli Willaita willaspa puringapa. Nukataka, mana runakuna agllawarkakunachu. Jesucristo i Taita Dios, pai wañuskata kaugsachigmi agllawarka. ² Tukui waugkindikunawa kaipi kaspera, kamkuna Galasia alpapi tukui Cristowa tukuskakunatami kai karta kachaikichita. ³ Nukanchipa Taita Dios i Iaia Jesucristo, kamkunata kuiaspa, suma iuiwaiwa kawapuachu. ⁴ Jesucristo, nukanchipa pandariikunamandami sakirirka, wañuchii tukungapa; chasaka, nukanchita kai alpapi tukui jiru mana alli kaskakunamanda kispichingapa. Chasami nukanchipa Taita Dios munarka. ⁵ Pai Taita Diusta nisunchi: “Iapa suma atunmi kangji, maituku waranga waranga watakuna ialigpipas”. Chasa kachu.

Cristomanda Alli Willai, suglla tiaskamanda

⁶ Cristo kamkunata iapa kuiagmandami Taita Dios kamkunata agllarka. Kamkuna chituku mana unaiilla paita kungarinakugtami ujnariwá. Munanakungichisi, sug rigcha: “Alli Willaimi ka” niskata katichingapa. ⁷ Cristomanda sug rigcha Alli Willai mana tianchu; sugllami tia. Sugkunaka, kamkunata pandachispa, “Cristomanda Alli Willaitami willanakuikichita” nispami kamkunata sug rigcha krichinakú.

⁸ Sutipa Alli Willaitami nukanchi kamkunata willarkanchi. Chimanda, nukanchi kikinkuna i sug luarmanda anjil, sug rigcha willaita kamkunata willanakupika, maldisiskami niraiá. ⁹ Nugpatapas chasami rimarkaikichita. Kuna rapasmi ikuti niikichita: kamkuna, sutipa Alli Willaitami uiaspa chaskirkangichi. Chimanda, maikan sug rigcha willaita kamkunata willanakupika, maldisiskami niraiangakuna.

¹⁰ Nuka chasa rimaspa, ¿runakunawa sumaglla kangapachu munani? Manima. Taita Dioswami munani, sumaglla kangapa. ¿Runakunata alli iuiachingapagllachu munani? Chasa kagpika, manachar Cristopa lutrin-sina kantrani.

San Pablo imasa Alli Willaita willaspa purii kallariskamanda

¹¹ Taitakuna i mamakuna, kasapas iachaichi. Alli Willaita nuka willani; chika mana kanchu runapa iuiwai. ¹² Ñi maikan runa, mana chita willawaspa iachachiwarkachu. Kikin Jesucristomi iuiachiwaspa iachachiwarka.

¹³ Nugpata, imasa ñugpamanda judiukuna iachachinakuskatami nuka katichikurkani. Chita, ñachar kamkuna iachangichi. Nuka, iapa rabiawa mana allilla iuiwai-

wami munakurkani, Taita Dioswa tukuskakunata puchukangapa. Chitapas ñachar iachangichi. ¹⁴ Judiukuna imasa Taita Diosmanda iachachiskakunata nuka iachaikuspa, achka nukapa kumpañirukunamandapas mas achka iachaikuskami karkani. Chiwanka, iapa micharispami karkani. Munakurkanimi, nukapa ñugpamanda taitakuna ima iachachiskakunata ñi maikan judiupas mana sakichukuna.

¹⁵ Nuka chasa kagpipas, manara tiagsamugpitami Taita Dios agllawaska karka. Paipa iapa suma kuiaiwami kaiawarka. Pai munaura, ¹⁶ paipa wambratami rigsi-chiwarka; chasaka, nuka mana judíu kagkunata Jesucristomanda willaspa puringapa.

Chiura nukaka, mana pipagmapas rirkanichu tapungapa: “¿Imasatak rurasá?”. ¹⁷ Ñi Jerusalemma mana rirkanichu, Cristo agllaska runakuna nukamanda mas ñugpa kaskakunawa rimanakungapa. Chasapaka, Arabia suti alpamami rirkani. Chimandaka, Damasko pui-blumami kutirkani.

¹⁸ Kimsa wata ialiuami Jerusalemma rirkani, Pedrota rigsingapa. Chunga pichka punchami paiwa karkani. ¹⁹ Sugkuna Jesucristo agllaskakunataka mana kawarkanichu. Iaia Jesuspa waugki Santiagollatami kawarkanani. ²⁰ Taita Diospa ñawipi nuka mana llullaspallami chasa willanakuikichita.

²¹ Chiuramandaka, Siria i Silisia suti alpakunamami rirkani. ²² Judea alpapi Cristowa tukuskakunaka, nukata manara rigsiwarkakunachu. ²³ Paikuna, nukamanda kasasi uiarinakurka: “Ñugpata nukanchi Cristowa iuiagkunata limpiu puchukangapa munakudur, kunauraka Cristomanda Alli Willaitami willaspa puriku”.

²⁴ Chasa nukamanda uiarinakuspaka, Taita Diusta: “Pai Siñur” ninakurka.

Iaia Jesús ñugpata agllaska runakuna, San Pablota sumaglla chaskiskamanda

2 Chunga chusku watapika, waugki Bernabewa ikuti Jerusalemma rirkani, Tito suti waugkitapas pusaspa. ² Taita Dios chasa iuiachiwagmandami rirkani. Chipika, Jesucristowa tukuskakunapura taita niraiaskakunallawa sugllapi tandarispaka, paikunata willarkani, nuka imasa Alli Willaita mana judíu kagkunata willaspa purikugta; chasaka iachangapa: nuka ñugpamandata Cristowa iuiarispaspa willaska: ¿allilla u mana allillachu ka? ³ Titoka, nukawa Jerusalemma ris-kaka, mana judíu karkachu. Chasa kagpipas, chi taita niraiaskakunaka mana nirkakunachu: “Paita chainmi, judiukunapa marka churangapa”. ⁴ Ikuti chillapita sug

runakunaka, “Cristowami kanchi” llullaspa, nukanchi-manda pakalla iaikuspa, munanakurka, Titota chi markata churachingapa. Chikunaka, nukanchita shachingapami katiraiarkakuna. Imasa Jesucristowa tukuskakunaka Moisés ima rurangapa willaskata libriagsina kaskata kawangapami katiraiarkakuna. Moisés ima iachachiskapi nukanchita ikuti wataskasina charingapami munanakurka. ⁵ Chasa munanakugpipas, ñi sug ratullapas mana sakirirkanchichu, paikunapa iuiiwa kangapa. Munanakurkanchimi, Cristomanda Alli Willai mana llullaspalla kamkunawa kagamuchu.

⁶ Chi taita niraiaskakuna —taita kagpipas, nuka-manda mana imapas niraiianchu; Taita Diospa ñawipika, ñi pipas mana tianchu sug rigcha— chi taita niraiaskakunaka, nuka Alli Willaita willaskata ñi imapi mana iapapuarkakunachu. ⁷ Chasapaka, paikuna iuiarirkakuna: imasami Taita Dios, Pedrotro mingarka, judiukunata Alli Willaita willangapa: chasallatami nukatapas mingawarka, mana judiukunata Alli Willaillatata willangapa. ⁸ Kikin Taita Dios, imasami Pedrotro kacharka, judiukunata willag kangapa: chasallatami nukatapas kachawarka, mana judíu kagkunata willaspa purigringapa.

⁹ Kasallapasmi nukanchita nirkakuna: atun taitakunasina. Paikunaka iuiarirkakunami, nukatapas Taita Dios kikin, kuiawaspa, mana judíu kagkunapagma kachamuwaska kagta. Nispaka, nukata i Bernabeta alli maki kuarkakuna; chasaka, paikunawa nukanchi sugllasina kagta niraiiangapa. Kasami nukanchita nirkakuna:

—Kamkuna, mana judíu kagkunata willaspa purigriichi. Ikuti nukanchika, judiukunatami willaspa purisunchi.

¹⁰ Kasallapasmi nukanchita nirkakuna:

—Judea alpapi mana ñi ima iukaskakunamanda mana kungaringichi—. Nuka, paikunata aidangapami tukuipi allilla rurakuni.

San Pablo, San Pedrotro piñagsina rimaskamanda

¹¹ Chiuramanda, Pedro Antiokia puibluma chaiagriuraka, nukaka ñawi ñawimi paita piñagsina rimarkani, pai mana judíu kagkunawa tiakuspa anchurigmada.

¹² Santiago kachaska judiukuna manara chaiankama, pai Pedro, mana judíu kagkunawami mikuspa tiakurka. Ikuti chi judiukuna chaiagriuraka, paika sakispa anchurirka. Nispaka, judiukunallawami mikungapa tiarigrirka. “Mana judiukunata marka churangapami chaiá” nigkunata iachaspami, mancharispa, chasa mana allilla rurarka. ¹³ Chipi kag judiukuna Cristowa iuiarispaga kagkunaka, Pedro anchurigta kawaspa, chasallatami anchurirkakuna. Bernabepas, chasallatami pandachii tukurka.

¹⁴ Nuka kawarkanimi, chi anchurig judiukunaka sutipa Alli Willaita niraiaskata mana katinakugta. Nuka, chasa kawaspaka, tukuikunapa ñawipimi Pedrotro nirkani:

—Uiamui. Kam, judíu kaspapas, ¿manachu mana judiusina kausakurkangi? Nigpika, ¿imapatak mana judíu kagkunataka ningapa kangi: “Judiukunasina kausangichi?”

¹⁵ Nukanchi, judiumi tiagsamurkanchi. Chiwami mana judíu pandarig kagkunasinana mana kanchi.

¹⁶ Chasa kagpipas, kasami iachanchi: Moisés ima niskata uiaspa ruraskakunallawaka, pipas mana pandariikunata anchuchii tukunchichu. Jesucristowa suma iuiarispami mana pandarig niraiianchi. Chasa iachaspami nukanchipas Jesucristowa iuiarigsamunchi. Chasaka, ñugpata Moisés niskata uiaspalla, manima; Cristowa suma iuiarispami mana pandarig niraiianchi. Moisés niskata uiaspa ruraskakunallawaka, pipas mana pandariikunata anchuchii tukunchichu.

¹⁷ Chasaka ninchimi, Cristollawa mana pandarig niraiiangapa. Chasa nisppapas, iuiarinchimi, nukanchipas pandariikunawa kagta. Chasa iuiarispaga, ¿niraiianchu Cristowa nukanchi pandarig kagtakuna? Manima.

¹⁸ Imasami wasi saiakuskata waggllichispa, nispaka chikunallawanta ikuti chillapita saiachigpi, mana iuiaipisina niraiá: chasallatami kamkuna, Moisés niskata sakispa, ikuti chillatata katichii kallarispaga, ikuti pandariikunawa tukugsamungichi.

¹⁹ Nuka ñami wañuskasina niraiiani, Moisés niskata mana uiangapa. Chi niskallawantami nuka wañuskasina niraiiani; chasaka, Taita Dios niskallata uiaspa, nuka kausangapa. Nuka, Cristowa sugllapi kruspi klabaskasinami niraiiani. ²⁰ Chiwanka, nuka kikin mana kausanichu. Cristomi nukawa sugllapi kausá. Nuka, kunauro kuirpupi kausakuspapas, Taita Diospa wambrawa suma iuiariskallawami kausakuni. Paimi, nukata iapa kuiawaspa, nukamanda sakirirka, wañuchii tukungapa.

²¹ Chimandami Taita Diospa kuiaita mana munani sakingapa. Ima Moisés niskata uiaspa ruraskakunallawa nukanchi pandariikunata anchuchii tukuntranchi; nigpika Cristoka, iangami wañuska niraiiantra.

Moisés ima rurangapa willaskamanda i Cristowa suma iuiariskamanda

3 ¡Ai, Galasiamanda runakuna, iapa upashkunasinami kangichi! Kam kikinkuna Jesucristota kawanakuskasinami pai kruspi klabai tukuskamanda willarkanchi. Nigpika, ¿pitak kunaureka kamkunapa iuiaita tuntiachiku? ² Kaillami tapuchingapa munaikichita: ¿Moisés ima niskata uiaspa ruraskakunawachu kamkuna Santu Ispirituta chaskirkangichi? Mana kagpika, Cristomanda Alli Willaita uiaspa, ¿pauwa suma iuiarispachu chaskirkangichi? ³ ¿Chituku upashkunachu kangichi? Kamkuna Santu Ispirituwa kallariskakunataka, kunaureka, ¿kam kikinkunapa iachaillawachu munanangkungichi, tukuipi alli iuiag tukungapa? ⁴ Nigpika kamkuna, ¿iangachu Cristomanda iapa llakii pasarkangichi? Munantranimi, chasaka mana ianga tukuchu.

⁵ Taita Dios, Santu Ispirituwa mana imaurapas kawaskakunata kamkunapa ñawipi kawachimuura, ¿Moisés niskata uiaspa ruragmandachu chasa kawa-

chimú? Mana kagpika, Cristomanda Alli Willaita uiaspa, ¿paiwa suma iuiariskamandachu chasa kawa-chimú?

⁶ Chasallatami ñugpamanda librupi willaraiá, kasa nispa:

Abrahamka, Taita Dios imasa niskata iuiarispami karka:

“Chasami tukunga”.

Chimandami paika

mana pandarig niraiá.

⁷ Chasa willaraiaskamanda, kasa iachaichi: Cristowa suma iuiarigkunaka, chikunami Abrahampa wambra-kuna niraianchi.

⁸ Ñugpamandatami Diospa Rimaipi kasa niraiá: mana judíu kagkuna Taita Dioswa iuiarigsamugkuna-tapasmi pandariikunata anchuchí. Chasaka Taita Dios, kai Alli Willaita Abrahamta nirka:

Kammandami tukui alpamanda runakunapas

Taita Diospa iapa kuiaska tukugsamungapa kankuna.

⁹ Chasamandami, Abraham Taita Dioswa suma iuiarispa kagmanda, Cristowa suma iuiarigkunapas, Abrahamwa pariju Taita Diospa iapa kuiaska kanchi.

¹⁰ Maikanpas Moisés ima rurangapa willaskallata katichispa kaugsagkunaka, maldisiskami niraiankuna. Chasallatami ñugpamanda librupi willaraiá, kasa nispa:

Maikanpas librupi tukui ima willaraiaskata

mana uiaspalla ruragkuna

maldisiskami niraiankuna.

¹¹ Kasa sutipami ka: ñi pipas Moisés ima niskallata kati-chigkuna, Taita Diospa ñawipi tukuiipi alli mana kankunachu. Chasallatami ñugpamanda librupi willaraiá, kasa nispa:

Taita Diospa ñawipi alli kawarig runaka,

suma iuiarispallami kaugsanga.

¹² Taita Dioswa suma iuiariskawaka, Moisés niskata katiraiaskaka ñi ima mana niraianchu. Tukui ima Moisés niskata suma allilla rurangapami chaiá. Chasallatami ñugpamanda librupi willaraiá, kasa nispa:

Tukui ima Moisés willaskata

ruragkunami kaugsangkuna.

¹³ Nukanchi mana tukui chi niskata ruragmandaka, maldisiskami karkanchi. Nigpika, Cristomi nukanchita kispichigsamurka. Cristo kikinmi nukanchimanda maldisii tukurka. Chasallatami ñugpamanda librupi willaraiá:

Maikanpas kaspipi wañungapa warkuchiska,

maldisiskami niraiá.

¹⁴ Jesucristo chasa wañuskamandami, Taita Dios Abrahamta ima sumaglla karangapa niraiaskata, mana judíu kagkunapas chaskinkuna. Chiwanka nukanchi, Cristowa suma iuiarispaka, Taita Dios paipa Ispirituta karamungapa niskatami chaskinchi.

Moisés ima mandaskamanda i Taita Dios Abrahamta ima karangapa niskamanda

¹⁵ Taitakuna i mamakuna, kunaure imasa runakuna ruradur kagtakunami rimangapa kaikichita. Maikan

runa iskriturapi firmaska kaskata, mana pipas pudinchu chita: “Mana allilla kanchu” ningapa, ñi ima niraiaskata iapangapa. ¹⁶ Taita Dios, Abrahamta nirka:

Kamba wambamanda kati samug wambtratami ima karangapa kani.

Achka wambtrakunamanda mana niraianchu. Kamba wambamanda kati samugllatami chasa karangapa niraiá. Chika, Cristomi ka. ¹⁷ Kasapasmi niikichita: chi Taita Dios Abrahamwa iskriturapisina firmagsina rurarka; chimanda chusku patsa kimsa chungu watamanda Moisés niskawaka mana pudirinchu ningapa: “Chi Taita Dioswa Abrahamwa iskriturasina ruraska mana allilla kanchu”. Iukanmi, Taita Dios imasa niskasinalla kanga. ¹⁸ Moisés ima niskallata ruragpikunaka, Taita Dios karangapa suianakuskaka manachar niraianchu Taita Dios karangapa niskata suianakugta. Ikuti Abrahamka, Taita Dios ima karangapa niskata chaskirkami.

¹⁹ Chasa kagpika, Moisés ima rurangapa niraiaskaka, ¿imapatak balí? Balinmi imakunapi pandariikuna niraiaskata iachangapa. Chi Moisés ima rurangapa willaskataka Abrahamta karangapa niraiaskamami iapachigsamurka, imaura Taita Dios kachamungapa niska wambra samunkama. Taita Dios ima niskata, anjilkunami Moiesta willarkakuna, paika paipurakunata willangapa. Chasa Taita Dioska, Moieswami runakunata rimadur karka. ²⁰ Ikuti iskaikunalla rimana-kuskapika mana ministinchu, sug tiangapa. Chasa Abrahamtaka, Taita Diosllami rimarka. †

Moisés ima rurangapa willaskaka imapa sakiskamanda

²¹ Chasa kagpika, Moisés willaskawa i Taita Dios karangapa Abrahamta niskawa, ¿kuntrachu niraiankuna? Manima. Sug mandai tiantra, mana diltudupa wañungapa; chasa niskata ruragkunami mana pandarig niraianchu. ²² Chasapaka, imasami ñugpamanda librupi willaraiá: tukui pandariskakuna wichkaraiaskasinami niraianchi. Chimandami Jesucristowa suma iuiarigkunaka, kispirispaka, Taita Dios ima karangapa niskata chaskingapa kanchi.

²³ Manara Cristowa iuiaringapa puncha chaimugpika, nukanchika Moisés ima rurangapa willaskawami wichkaraiaskasina karkanchi. Cristowa iuiaringapa punchakamami suianakurkanchi. ²⁴ Chi Moisés willaskawaka nukanchi, wambra iachaikunakugsinami karkanchi, Cristo samunkama; pai samuskauramandaka, paiwa suma iuiariskamanda mana pandarig niraiangapa. ²⁵ Nigpika, Cristowa iuiaringapa punchakunaka ñami chaimurka. Chiwanka, Moisés willaskata iachaikug wambbrasina mana kanchichu.

²⁶ Tukui kamkuna, Jesucristowa suma iuiarispaka, Taita Diospa wambtrakunami niraiangichi. ²⁷ Tukui baugti-sariskakuna, Cristowa tukuspa, Cristopa iuiaita churariskasinami kangichi. ²⁸ Kunaure, judíu i mana judíu kagpipas, Taita Diospa ñawipi sugllasinami kangichi. Chasallata, lutrin i patrun, kari i warmi kagpipas, tukui-kunami, Jesucristowa tukuspa, sugllasinami kangichi.

† 3.20 griego rimaiwa: Suglla Taita Diosmi tia.

²⁹ Chasa Cristopa kagmandami Abrahampa wambra-
 manda kati samug wambrakuna niraiangichi. Chi-
 mandami, Taita Dios ima sumaglla karangapa niraias-
 kata kamkunapas chaskingapa kangichi.

4 Kasami niikichita: maikan ima sakikuskata
 chaskingapa chaiakugpika, uchulla wambra kan-
 kama lutrinsinallatatami niraiá, paipa tukui niraiagpi-
 pas. ² Chi uchullamanda, maikan paita kawagkuna i
 charipugkunami iuká tianga, paipa taita niska puncha
 chaiankama. ³ Chasallatami nukanchipas, uchulla
 wambrakunasina karkanchi. Kai alpapi iuiaikunallawa-
 mi wataskasina karkanchi.

⁴ Taita Dios niska puncha chaiauuraka, paipa wam-
 brata kai alpamami kachamurka. Sug warmimandami
 tiagsamurka. Moisés ima niskasina allilla rurangapami
 samurka. ⁵ Moisés ima willaskata ruranakuskata kspi-
 chingapami samurka; chasaka nukanchi, Taita Diospa
 wambrakuna niraiagsamungapa.

⁶ Kamkunapas paipa wambra tukuska kagmandami
 Taita Dioska paipa wambra Ispirituta kachamurka,
 kamkunawa sugllapi kaugsangapa. Paipa Ispirituwami
 Taita Diusta ningichi: "Taitiku". ⁷ Chasamanda, kuna
 lutrinsina mana kangichichu. Taita Dios kuiagmanda,
 paipa wambrakunami niraiangichi. Paipa wambrakuna
 niraiagmanda, tukui ima karangapa niska, kamkuna-
 pami niraiá.

Cristowa tukuskakuna sug rigcha iuiaikunapi richu- kuna manchakuskamanda

⁸ Ñugpata, kamkuna manara Taita Diusta rigsiuraka,
 ianga dius kagkunata iuiaspa, chikunapa lutrinsinami
 karkangichi. ⁹ Ikuti kunaureka, sutipa Taita Diustami
 rigsingichi. Chasa kagpipas, Taita Dioska kamkunata
 ñugpamandatami allilla rigsirka. Nigpika kamkuna,
 ¿imapatak ikuti munanakungichi, chi ñi imapapas
 mana balig dius niraiaskakunawa tigrangapa; chasaka,
 ikuti paikunapa lutrinkunasina tukungapa? ¹⁰ Charami
 kamkunaka, punchakunata, killakunata, watakunata i
 sug punchakunatapas judiukunasina wardangichi.

¹¹ Manchawakumi, nuka kamkunata iachachiska ianga
 kidapuachu.

¹² Taitakuna i mamakuna, nuka, kamkunasinami
 tukurkani. Chimandami mañaikichita: kamkunapas,
 nukasina tukuichi. Kamkuna, nukata ñi imapipas jiru
 mana rurawaska kangichichu. ¹³ Kamkuna ñami
 iachangichi: nuka, ungu kaspami musuglla Alli Willai-
 ta willarkaikichita. ¹⁴ Nuka chi jiru unguiwa kagpipas,
 kamkuna, mana wabutiwaspalla ñi wasa churawaspalla
 uiawarkangichi. Taita Dios kachamuska anjilta-
 sinami sumaglla chaskiwarkangichi. Kikin Jesucristo
 kagtasinami kaiawarkangichi. ¹⁵ Nuka kamkunawa chi
 punchakuna kaura, alli iuiachiiwami karkangichi. Ikuti
 kunaureka, ¿imapatak mana alli iuiachiiwa kangichi?
 Kamkunamanda kasami allilla iuiarispa niikichita:
 pudirigpika, nukata dikuiai kam kikinkunapa ñawi
 murutapaschar surkurispa kuawantrangichi. ¹⁶ Nigpika
 kunaureka, kamkunata sutipa kaskata rimagmanda,
 ¿kamkunawa kuntrachu tukuska kani? Manima.

¹⁷ Chi sug iachachigkunaka, kamkunawa munana-
 kugsina kaspapas, mana alli iuiaiwami kamkunata
 munanakú. Kamkunata munanakumi, nukanchipa
 iuiaiwa mana sugllapi kachukuna; chasaka kamkuna,
 paikunallawa iuiarispa kangapakuna. ¹⁸ Allillami ka,
 sugkunawapas suma iuiaiwa munanakungapa; chasa-
 ka, paikunawapas allilla kangapa. Chasa kagpipas, nu-
 ka kamkunawa kankamalla, mana; munanimi, imaura-
 pas tukuikuna allilla munanakuspa kaugsangapa.

¹⁹ Nukapa wambritukuna, imasami sug unguringapa
 warmita nanaikuna chaiá, wambra tiangapa: chasalla-
 tami nukapas, llakii ikuti ikuti iukani, kamkuna Cristo-
 sina tukunkama. ²⁰ ¡Amalai nuka, kunaureka kamkunawa
 sugllapi kantrani; chasaka, sug rigcha kamkunata
 rimangapa! Mana iachariwanchu, kamkunamanda ima
 iuianga.

Agar i Sara suti warmikunamanda iachachiskamanda

²¹ Kamkuna Moisés ima niskata ruraspa kaugsanga-
 pa munanakugka, kasa willawaichi: ¿manachu iachar-
 kangichi chi niskapi ima willaraiagta? ²² Kasami chi
 ñugpamanda librupi willaraiá: Abraham, iska wambra-
 kuna iukagta. Sug wambra iukarka sug warmi randis-
 kapi. Ikuti sug wambra, pai kikinpa warmipimi iukar-
 ka. Paipa warmika, ñi pita mana randiska karka. ²³ Chi
 warmi randiskaka, kari munaskamandallami wawita
 iukarka. Ikuti mana randiska warmika, imasa Taita
 Dios niskasina kagmandami wawita iukarka.

²⁴ Chasa willaraiaskawaka nukanchita kasami iacha-
 chiku: chi iska warmikunaka niraiami Taita Dioswa i
 runakunawa sug sug iuiaringapa. Sug iuiaridirutaka,
 Sinaí suti lumapimi Taita Dios rimamurka. Chi iuiari-
 diruwa tiagsamugkunaka, wataskasinami kaugsanakú.
 Agar suti randiska warmipimi chasa kagta niraiá.

²⁵ Agar niraiami Sinaí luma. Chi luma, Arabia suti
 alpapimi ka. Chi Sinaí luma niraiami kai alpapi tiaska
 Jerusalén puiblu. Chi puiblu i chimanda kagkunapas,
 Moisés ima niskata rurai iukaspa, wataskasinami ni-
 raiankuna. ²⁶ Ikuti suma luarpi tiaska Jerusalén puiblu-
 manda kagkunaka niraiami ñi pita mana randiska-
 kuna kagta. Chi puiblu, nukanchipa mamasinami ni-
 raiá.

²⁷ Chasallatami ñugpamanda librupi willaraiá, kasa
 nispa:

Chusa warmi mana wambra iukadur, suma kuntintari-
 rii.

Mana imaurapas uchulla wawita iukag, alli iuiachirii-
 wa kaparigsamui.

Sitai tukuska warmika,
 kusawa warmi kaugsanakuskamandapas mas achka
 wambra iukanga.

²⁸ Taitakuna i mamakuna, kamkunaka Abrahampa
 kikin warmindipa wambra Isaak sutisinami niraiangi-
 chi. Taita Dios kikin Abrahamta niskatami paipa wam-
 brakuna niraiangichi.

²⁹ Chasa kagpipas, ñugpata imasami kari munaska-
 mandalla tiagsamuska wambra, Santu Ispirituwa tiagsa-
 muska wambra jiru rurangapa munakurka: chasa-

llatami kunaaurapas pasariku. ³⁰ Chasa pasarikugpipas, žimasatak ñugpamanda librupi willaraiá? Kasami willaraiá:

Randiska warmita
paipa wambrawanta
kaimanda llugsichii.
Chi randiska warmipa wambra mana pudinchu,
mana randiskapa wambrawaka
taita ima sakingapa kaskata
chaugpi chaugpi partinakungapa.

³¹ Taitakuna i mamakuna, nukanchika, randiska warmipa wambakuna mana niraianchichu. Mana randiska warmipa wambakunami nukanchi niraianchi.

Mana ikuti sakirisunchi, Moisés ima niskawa wataskakunasina tukungapa

5 Cristomi nukanchita libriachigsamurka, Moisés ima rurangapa willaskata sakispa, mana wataskakunasina kaugsangapa. Chimanda, mana watai tukuskasina kaugsanakungichi. Mana ikuti sakiringichi, Moisés ima niskawa wataskakunasina tukungapa.

² Uiawaichi. Nuka Pablo, kasami kamkunata niikichita: kamkuna judiukunapa marka churachirigpinkunaka, Cristoka mana imapapas balipungapa kangichitachu. ³ Kasapasmi niikichita: maikanpas marka churachirigpinkunata chaianmi, Moisés tukui ima niskata ruraspaga kaugsangapa. ⁴ Kamkuna, Moisés ima niskata ruraskakunallawa mana pandarig nirai iuiagkunaka, Cristopagmanda anchuriskasinami niraiangichi. Taita Diuspa kuiaita mana munagsinami kangichi.

⁵ Ikuti nukanchika, Cristowa suma iuiariskawa Santu Ispirituwa suianakunchimi, mana pandarig niraiangapa. ⁶ Nukanchi Jesucristowa tukugkuna, judiukunapa marka churaska u mana churaska kagpipas, ñi ima mana niraianchu. Cristowa suma iuiarispaga, kuiaspaga kaugsaiwami allilla niraiá.

⁷ Kamkuna, allillami kaugsanakurkangichi. Nigpika, žimawantak kunaura sutipa Alli Willaita mana iuiaspaga kaugsanakungichi? ⁸ Taita Dius mana kamkunata agllarkachu, sug rigcha iuianakungapa. ⁹ Imasami asllita libadurawa achka mukuta puchkuchi: ŷujalallapas chasallata kamkuna, chi jiru iuiakunawa wagliichiringichi! ¹⁰ Nuka, Iaia Jesusmanda iuiarispaga, kasami suma iuiani: kamkuna, nukasina alli iuiarispaga kaugsantrangichi. Chi kamkunata pandachispaga puridur, pi kagpipas, diltudupa ninamami sitai tukungapa ka.

¹¹ Taitakuna i mamakuna, nuka chara judiukunapa marka churachingapa iachachikugpika, judiukunaka manachar jiru rurawangapa munawanakuntra. Chiwanka, Cristo kruspi wañuskamanda rimaitaka manachar wabutintrakuna. ¹² Chi kamkunata pandachispaga puridurkunaka, ŷamalai kikin kapai rurarintrakuna!

¹³ Ari, taitakuna i mamakuna, Taita Dius, kamkunata agllarkami, mana wataskakunasina kaugsanakungapa. Chasa kagpipas, ŷujalallapas kamkuna iuianakungichi, imasa munaskasina ruraspaga kaugsangapa! Chasapaga, kam kikinpura kuianakuspa, lutrinsina aidanakuspa parijuma kangichi.

¹⁴ Kasami ñugpamanda librupi niraiá:

Kam kikintasinami iukangi,
tukui runakunatapas kuiangaga.
Chi suglla niraiaskata allilla ruraspaga, tukui ima willaraiaskata ruragsinami niraiangapa ka. ¹⁵ Ikuti kam kikinpura rabiawa kaninakuspa mikunakugsina kaugsanakugpika, ŷujalallapas parijuma puchukarinakungichi!

Santu Ispiritu ima iuiachiskaka, jiru iuiaiwaka kuntrami ka

¹⁶ Chimandami kasa niikichita: Santu Ispiritu imasa iuiachiskasina ruraspaga kaugsanakungichi. Chasa kaugsanakugpika, kam kikinkunapa jiru iuiaiwaga mana rurangapa kangichichu. ¹⁷ Kai alpamanda jiru iuiaiwaga kagkunaka, Santu Ispirituwa kuntrami kankuna. Chasallata Santu Ispiritu ima iuiachiskaka, jiru iuiaiwaga kuntrami ka. Ari, jiru iuiaiwaga i Santu Ispirituwa iuiachiiwaga kuntrami kankuna. Chimandami kamkuna mana iukangichi, ima jiru munaskata rurangaga. ¹⁸ Santu Ispiritu imasa iuiachiskata ruraspaga, ña Moisés ima rurangapa willaskawaga mana wataskasina kangichichu.

¹⁹ Jiru iuiaiwaga kagkunaka, kawariillami rurankuna: kari warmiwami pandarinkuna; mana chaia ima millaikunatapasmi rurankuna; ²⁰ ianga diuskunatami muchankuna; mana alli iacha pukuspami rurankuna; parijuma piñachirinakuspa, ainichirinakuspa i rabiachirinakuspami kaugsankuna; sugkunata mana allilla iuiaiwami kawankuna; pai kikinkunamandallami tukui munankuna; sugkunaga sumaglla kaugsanakuskata chaugpirigsina tukuspa, sug rigcha sug rigchami iachachinkuna; ²¹ sugkunapatami munarinkuna; wañuchinkunami; machaspaga i iapa mikuspami kaugsankuna; chasallata sug rigchapasmi jiru rurankuna. Kamkunata timpumi willaska kaikichita; chita ikutimi niikichita: chasa ruraspaga kaugsanakugka, Taita Dius suma mandakuskapika manima iaikugringaga kankunachu.

²² Ikuti Santu Ispirituwa kaugsagkunaga, kasami rurankuna: kuianakumi; alli iuiachiiwami kankuna; sumagllami kaugsanakú; mana piñaspalla, sugkuna-manda llakispami kawanakú, tukui allillami rurankuna; suma ruraikunaga mana kungarinkunachu; ²³ mana atuniachirigsina iuiankunachu; ima mana allilla iuiarispaga munai apigpipas, chita mana rurankunachu. Chasa allilla rurankuskamandaga ñi maikan mandaikunapipas mana michanchu. ²⁴ Cristowa tukuska kagkuna, tukui mana alli iuiai munanakuskata kruspi wañuchiskasini sakirkanchi. ²⁵ Santu Ispirituwa kaugsanakugpika, Santu Ispiritullataga nukanchita iuiachichu, imasa sumaglla ruraspaga kaugsangapa. ²⁶ Mana kasunchi atuniachirinakuspa, ñi kikinpura rabiachirinakuspa ñi sugkuna iukaskata munarispaga.

Nukanchi kikinpura aidanakusunchi

6 Taitakuna i mamakuna, maikanpas pandarikuspa apirigpika, kamkuna Santu Ispirituwa kagkunaga,

mana atun tukuspalla iuiarispa, paita: “Mana chasa rurakui” ningichi. Chasa nispaka, allilla iuiaringichi, kam kikinkunapas mana chasa pandariikunapi urman-gapa. ² Kam kikipura ima llakii iukaskata iuiachirina-kuichi kungaringapa. Chasa iuiachirinakuspaka, Cristo ima niskatami ruranakungichi.

³ Maikanpas, atun tukuspa, iuiarispa nichu: “Nuka, atunmi kani”: chi runaka, mana chasa kaspaka, kikin-llatatami pandariku. ⁴ Sug sug, kikin imasa ruraspa kaugsakuskata iuiarispa tapuringichi: “¿Allilla u mana allillachu kaugsakuni?”. Chasa allilla kagta iuiarispaka, kikinmandallami alli iuiachi tukunkangichi, mana pita-pas kawaspalla. ⁵ Sug sugmi Diuspa ñawipi kawachin-kangichi, kai luarpi imasa ruraska.

⁶ Maikanpas Diuspa Rimaita iachachigta iachaikug-kunaka iukangichimi, tukui ima iukaskata kamkunata iachachigwa rasiunaringakuna.

⁷ Mana pandaringichi. Ñi pipas, Taita Diusta llulla-chingapa mana pudirinchu. Imasami tarpunchi: chasa-llatami pallasunchi. ⁸ Maikanpas jiru iuiaikunata tarpugsina ruragakuna, chasa iuiaita ruraspaka, diltudupa wañuitami pallangakuna. Chasallata, maikan-pas Santu Ispiritupa iuiachiikunata tarpugsina rurag-kunaka, chasa iuiachiita ruraspaka, diltudupa suma kaugsaitami pallangakuna. ⁹ Chimandaka, allilla ruraspa kaugsagkuna mana sambaiasunchi. Chasa ruran-gapa mana sakigkunaka, pallangapa puncha chaiaura, chi diltudupa kaugsaitami chaskisunchi. ¹⁰ Chasa kag-manda, imaura pudiriura, tukuikunamanda allilla ruraspa kasunchi. Cristowa iuiagkunamandami mas iukanchi, allilla ruraspa kanga.

Kaiakama, niskamanda

¹¹ Kawaichi. Kaituku atun litrakunawami nuka kikipa makiwa iskribiikichita. ¹² Chi kamkunata judiukunapa marka churachingapa iachachigkuna munanakumi, sugkunapa ñawipi allilla kangapaglla. Paikuna Cristo kruspi wañuskamandalla willanakugpika, paikunapas-mi kalpachii tukuntrakuna. ¹³ Ñi maikan marka chura-chii tukugkunapas mana pudinkunachu, Moisés tukui ima niskata ruraspa kaugsanakunga. Kasamandallami kamkunata marka churachingapa munanakú: kam-kunapa kuirpupi chi marka churachiskawa pai kikin-kuna mas atun tukungapa.

¹⁴ Ikuti nukaka, ñi imawapas mana atun tukungapa munanichu. Nukanchipa Iaia Jesucristo kruspi wañuskamandallami alli iuiachiiwa kani. Cristo kruspi wañugmandami kai alpapas nukamanda wañuskasina tukupuá; nukapas, kai alpamanda wañuskasinami tukuni.

¹⁵ Judiukunapa marka churaska u mana churaska, ñi ima mana niraiianchu. Nukanchi sug rigcha musu kaugsaiwami allilla niraiá. ¹⁶ Tukui ima nuka iachachis-kata ruraspa kaugsanakugmi niraiá, Taita Diuspa suti-pa Israelmanda runakuna kagta. Tukui chasa kaugsan-akugmanda Taita Dios llakirichu, paikuna sumaglla kaugsanakungapa.

¹⁷ Kunaauramanda mana pipas nukata uma nanachi-waspa kachukuna. Iaia Jesusmanda nuka willaska-mandami nukapa kuirpupi nanachiwarkakuna. Chi nanachiwaskakunawami niraiani nuka Jesuspa kagta.

¹⁸ Taitakuna i mamakuna, Iaia Jesucristo, tukui kam-kunata sumaglla kawapuachu. Chasa kachu.

EFESOPÍ CRISTOWA TUKUSKAKUNATA

1 Nuka, Taita Dios munaskamanda, Jesucristo kachamuskami kani, Alli Willaita willaspa puringapa. Kamkuna Jesucristowa iuiarispa, Taita Diuspalla kaspas, Efeso puiblupi kaugsanakuskatami kai karta kachaikichita. ² Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

Taita Dios, Cristowa iapa sumaglla kawaspa karamuskamanda

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangí”. Paimi, Cristowa tukui ima suma luarpi iukaspa, nukanchita iapa sumaglla kawaspa, karamú. ⁴ Paillatami, kai alpa manara tiagpita, Cristowa nukanchita agllarka; chasaka nukanchi, paimandalla kaugsaspa, paipa ñawipi ñi imapipas mana mapasina kangapa. ⁵ Ñugpamandata nukanchita kuiaspa agllarka, Jesucristowa paipa wambarkuna niraiangapa. Chasami ñugpamandata munarka. ⁶ Paipa kuiaska wambra Jesucristomandami nukanchita iapa suma kuiarka. Chimandami Taita Diusta imaurapas ninchi: “Iapa suma atunmi kangí”.

⁷ Cristo wañuchii tukuspa, paipa iawarwami nukanchita randirka. Chiwanka, nukanchita iapa suma kuiaspa, mana allilla ruraikunata pasinsiarka. ⁸ Chasa kuiaspami nukanchita karamurka, suma iuiai apispa, suma iachaita iukangapa. ⁹ Chasaka, pai ima munaska pipas mana iachaskatami nukanchita rigsichirka. “Chasami Cristowa ruraspa” ñugpamandata niskatami kawachirka. ¹⁰ Pai chasa niskata rurai puchukangapa punchakuna chaauraka, Cristota churangapami ka, tukui sug luarpi i kai alpa luarpi kagkunata suglla mandag kangapa.

¹¹ Nukanchi Cristowa tukuskakunamanda, Taita Dios ñugpamandata agllarka, pai ima iukaska nukanchipapas kangapa. Chasapasmi pai munarka. Pai imasa munaskasinami tukui allilla rurá. ¹² Chasa agllaska kaspami nukanchi ñugpa Cristota iuiagkuna iukanchi Taita Diusta: “Iapa suma atunmi kangí” nispa kaugsanakunga.

¹³ Kamkunapas, chi kispiringapa kaskamanda Alli Willaita uiaspa, Cristomanda sutipa willaskatami suma iuiarirkangichi. Chiura, Santu Ispirituwami siñalalai tukurkangichi, paipa kagta niraiangapa. Santu Ispirituwami ñugpamandata chasa karamungapa niska karka.

¹⁴ Santu Ispirituwami nukanchi kasa iachanchi: paipa kagkunata diltudupa kispichiura, pai ima iukaskata chaskingapami kanchi; chasaka tukuikunaka, Taita Diusta: “Iapa suma atunmi kangí” ningapa.

Taita Diospa suma iachai, Cristowa tukuskakunata karachu, mañaskamanda

¹⁵ Kamkuna Iaia Jesuswa iuiarinakuskataka allillami iachani; chasallata, tukui paimandalla sumaglla kagsagkunata kuianakugtapas. ¹⁶ Chasamanda mana sakinichu, kamkunamanda Taita Diusta: “Pai Siñur” ningapa. ¹⁷ Nukanchipa Iaia Jesucristopa iapa suma atun Taita Diusta mañapuikichitami, paipa suma iachai kamkunata karapuachu; chiwanka, pai ima iuiachimuskata kamkuna iachagsamungapa; chasallata, pai kikinta mas allilla rigsingapa. ¹⁸ Paita mañapuikichitami, kamkunapa iuiaikunata punchaiachipuachu. Chiwanka, kasami iachankangichi: pai agllaskakuna suma luarpi ima chaskingapa suianakugta. Tukui ima chipi iapa suma iukaska, Taita Diuspalla kagkunamandami niraiá.

¹⁹ Kasapasmi iachankangichi: paipa iachaika, askurinti iapa atunmi ka. Chi iapa iachaiwami nukanchitapas paiwa suma iuiarigsamú. Chi iapa atun iachaillawantami, ²⁰ Cristo wañuskata kaugsachispa, suma luarpi paipa alli ladu tiarichigrirka. ²¹ Chipika, mandagkunamanda, atuniachiska kagkunamanda, awa wairapi iapa pudi mandagkunamanda, tukuikunamandas mas awapi mandag kangapami tiarichigrirka. Kuna puncha ima tiaskakunata, paimi mandag ka. Kati samug punchakuna ima tiangapa kaskakunatapasmis chasallata mandag kangapa ka. ²² Taita Dios, tukuikunatami churarka Cristopa chaki ukuma kagsina, pai ima niskata rurangapa. Paitaka churarkami, uma kagsina, paiwa tukui tukuskakunapa iaia kangapa. ²³ Cristowa tukuskakuna niraianmi pai kikinpa kuirpu. Cristowa i paiwa tukuskakunawa, suglla kuirpusinami tukú, ñi ima manima pisi. Paimi ka tukui jundapi junda, ñi imapas mana pisi.

Taita Diospa suma kuiaimanda, nukanchi kispichii tukuskamanda

2 Kamkunaka, ñugpata mana allilla ruraspa kaugsanakuspa, wañuskakunasinami niraiarkangichi. ² Kai alpapi tiaskakunallawa iuiaspa kaugsanakurkangichi, iaia kuku wairapi mandag munaskata ruraspalla. Chi iaia kuku, Taita Dios ima niskata mana uiagkunatami jiru rurangapa iuiachí. ³ Tukuikunami ñugpata chasallata kaugsanakurkanchi, imasa munaskasina jiru ruraspa. Nukanchipa aicha jiru munaikunata i sug rigcha sug rigcha iuiaikunata, chasakunata ruraspami kaugsanakurkanchi. Chasa kaugsanakugmandaka, Tai-

ta Dios, askurinti rabiariſpa, sugkunatasina nukanchi-tapas diltudupa ninama kachangapa karka. ⁴ Chasa kagpipas, Taita Dioska, nukanchimanda iapa llakispa kawaspami nukanchita suma kuiarka. ⁵ Chasaka, nukanchi kikin mana allilla ruraskakunamanda Diospa ñawipi wañuska kaspapas, kaugsachiskami niraianchi, Cristowa sugllapi kangapa. Taita Diospa suma kuiaimandami kispichii tukurkangichi. ⁶ Nukanchita kaugsachispaka, suma luarpi tiarichigsinami niraianchi, Jesucristowa sugllapi kangapa. ⁷ Chasaka, mana puchukariduru punchakuna chaiaura, paika, iapa suma llakispa, nukanchita Jesucristowa askurinti iapa suma kuiagta-mi kawachingapa ka.

⁸ Taita Dios suma kuiagmandami, kamkuna, paiwa suma iuiariſpa, kispichiska tukurkangichi. Mana kispirirkangichichu kam kikinkunapa iuiailawa. Taita Dios kikin karaskallawami kispichii tukurkangichi. ⁹ Kam kikinkuna allilla ruraskamanda mana kispirirkangichichu; chasaka, ñi pipas mana atuniachirispa ningapa: "Nuka kikinllami kispirirani". ¹⁰ Taita Diosmi nukanchita chasa rurarka. Jesucristowami tiagsamurkanchi; chasaka, alli ruraikunata nukanchi ruraspa kaugsagsamungapa. Chi ruraikunaka, ñugpamandatami nukanchimanda allichiska suiakurka, nukanchi chasa allilla ruraspa kaugsagsamungapa.

Cristo, tukuikunawa pasinsiachig kagmanda

¹¹ Chimanda kamkuna mana judíu kagkunaka, imasa ñugpata kaskata iuiariichi. Judiukuna kuirpupi marka churagkunaka, kamkunamanda ninkunami, mana marka churaska kagtakuna. ¹² Kamkuna, ñugpata mana Cristowami karkangichi. Israelmanda runakunawa manara sugllapi karkangichichu. Taita Dios ima karangapa niskatapas, kamkuna manara chaskingapa niraiarkangichichu. Ñi ima mana suiaspalla, mana Taita Dioswa iuiariſpallami kai alpapi kaugsanakurkangichichu. ¹³ Taita Diospagmanda karupi kaugsagsinami ñugpata karkangichi. Ikuti kunaureka, Jesucristowami Taita Diospagma kaillaiarkangichi. Cristo kruspi wañuska iawarmandami chasa kaillaiarkangichi.

¹⁴ Cristomi ka tukuikunawa pasinsiachig. Paimi judiukunawa mana judíu kagkunawa piñachirinakuskatapas pasinsiachigsamurka. Ima arkaraiaskata anchuchigsinami rurarka; chiwanka, iskandikuna sugllasina tukungapa. ¹⁵ Pai kruspi wañuskawami Moisés tukui ima rurangapa niskata lim puchukarka. Chasa ruras-paka, pai kikinwa judiukunata i mana judíu kagkunatapas sugllasinami musuiachigsamurka. Chiwanka, iskandima piñachirinakuskatami pasinsiachirka. ¹⁶ Pai kikin, kruspi wañuspami, iskandima piñachirinakuskata pasinsiachispa, suglla kuirpusina rurarka. Chasa iskandikuna pasinsiachii tukuspa, Taita Dioswapasmi sumaglla tukurkakuna.

¹⁷ Pai Cristo, samuspa, chi suma pasinsiaita tukui-kunatami willagsamurka. Kamkuna Taita Diospagma karupi kaskakunata, judiukuna mana karupi kaskakunatapasmi chasa willarka. ¹⁸ Judíu i mana judíu kaspapas, tukuikunami Cristowa pudinchi, suglla San-

tu Ispirituwa Taita Diospagma kaillaianga. ¹⁹ Chi-manda, kunaureka kamkuna mana sug karu alpa-manda samuskasina kangichichu. Taita Diospalla kag-purami tukuikuna kangichi. Taita Diospa wambrakunapasmu kangichi. ²⁰ Kamkuna, sug atun wasisinami kangichi. Jesucristo kikin agllaska runakuna i Santu Ispirituwa rimagkunaka, chi wasi kallariska rumikunasinami kankuna. Paikunapa awalla saiachiskasinami kangichi. Kikin Jesucristoka, chi wasita charig rumi kagsinami niraiá. ²¹ Chasa paiwa sugllapi, chi intiru wasika, alli alli saiarispa, suglla suma wasisinami tukugsamú; chasaka, Iaia Jesuswa Taita Diospalla kaska wasisina tukugsamungapa. ²² Kamkunapas chasallata Cristowa sugllasinami tukunakungichi. Chasaka, Diospa Ispiritu kaugsadiru wasisinami tukugsamunakungichi.

Mana judíu kagkunata Alli Willaita willaspa puringapa, San Pablo mingai tukuskamanda

3 Chimandami nuka Pablo, Jesucristomanda Alli Willaita kamkuna mana judíu kagkunata willaskamanda kai karsilpi wichkaraiani. ² Ñami iachangichi: Taita Dios, nukatami mingawarka, paipa suma kuiaimanda willangapa; chasaka, kamkuna allillapi kangapa. ³ Mana pipas iachaskatami Taita Dios nukata iuiachiwarka. Chita ñami sug kartapi mailla willarkaiki-chita. ⁴ Chi kartata kawaspaka, pudingichimi, chi Cristomanda mana pipas iachaskata nuka iachagta iachagsamungapakuna. ⁵ Chi ñi maikan ñugpamandakunatapas mana iachachiskata, Taita Diosmi kunaureka, paipa Ispirituwa, paipalla kag agllaska runakunata i Santu Ispirituwa rimagkunata willagsamurka. ⁶ Kasami kunaureka willarka: tukui mana judiukunapas Alli Willaita uiagkunaka, suma luarpi tukui ima iukaska, kamkunapapasmi niraiá. Kamkunapas, Cristopa kuirpusinallatami niraiangichi. Chasallata Jesucristowa, Taita Dios ima karangapa niskatami kamkunapas chaskigringapa kangichi.

⁷ Nukaka, chi Alli Willaita willangapami mingai tukurkani. Taita Dios, suma kuiawaspa, paipa iapa iachaiwami chasa mingawarka. ⁸ Nuka kanimi Cristowa tukui tukuskakunamandapas mas uchulla. Nuka chasa kagpipas, Taita Dios iapa kuiawaspa mingawarka, mana judíu kagkunatapas Cristomanda willangapa. Cristo, nukanchimanda niraiami suma luarpi iapa achka mana kuintangasina iukag kagta. ⁹ Kai alpa manara tiaskauramandata, Taita Dios ima rurangapa niskata mana pipas iacharkachu; chitami kunaureka nukata mingawarka, tukuikunata willangapa. Pai Taita Diosmi tukui rurag ka. ¹⁰ Chasami mingawarka, suma luarpi iapa pudig mandagkunata kunaureka tukui Cristowa tukuskakunawa kawachingapa: Taita Dios, imapipas iapa iachami ka. ¹¹ Taita Dios, kai alpa manara tiaskauramandata chasa kawachingapami niska karka. Nukanchipa Iaia Jesucristowami chasa tukui rurarka.

¹² Cristowa suma iuiariſpami nukanchi pudinchi, paiwa suglla tukuspa, Taita Diusta mana manchaspalla rimangapa, imapas mañaspa. ¹³ Chasamandami mañaikichita: nuka kamkunamanda kai karsilpi iapa

llakii pasakugpipas, kamkuna mana sambaiangichi. Kamkuna allilla kangapami chasa pasakuni.

Cristo, nukanchita maituku kuiag kaskamanda

¹⁴ Chasamanda, Taita Diospa ñawipimi kungurini, kamkunamanda mañangapa. ¹⁵ Pai Taita Dios kag-manda, sug luarpi i kai alpa luarpi tukuikunaka paipa wambrakunami niraianchi. ¹⁶ Taita Dios iapa suma achka iukagmandami paita mañapuikichita, paipa Santu Ispirituwa kamkunapa iuiaita paipa iapa iachai karamuchu. ¹⁷ Chiwanka, kamkuna paiwa suma iuiarig-mandami Cristo kamkunapa iuiaipi kaugsanga. Chasami kamkuna, Taita Diospa suma kuiaipi angukunawa muruchuiaska sachasina kankangichi. ¹⁸ Chasawaka, kamkuna i tukui Cristowa tukuskakunapas allillami pudinkangichi iachanga, Cristo nukanchita maituku kuiagta. Paipa kuiaika, ñi imapipas mana puchukarin-chu. Ñi imawapas mana pudirin-chu, paipa kuiaita tupungapa. ¹⁹ Ñi pipas mana iachanchichu, pai nukanchita maituku kuiagta. Kasapasmi Taita Diusta mañapuikichita: kamkuna, chi kuiaita iachaspa, Taita Diospalla tukuipi kangapakuna.

²⁰ Taita Dioska, nukanchi ima mañanakuskamanda mas achkami pudí karamunga, mana iuianakuskasina. Nukanchipa iuiaipi kaugsakug iapa iachaiwami chasa karamungapa pudí. ²¹ Tukui Jesucristowa tukuskakuna Taita Diusta nisunchi: “Kam, imaurapas iapa suma atunmi kangi. Chasami diltudupa kamta ninakungapakanchi, maituku waranga waranga watakuna ialigpipas. Chasa kachu”.

Santu Ispirituwa, suglla iuiaiwa kaugsanakusunchi

4 Chasamanda nuka Pablo, Iaia Jesusmanda kaipi wichkaraiaspa, kamkunata kasami mañaikichita. Imasami Taita Dios, kamkunata kaiarka, imapipas allilla kangapa: chita uiaspa, Taita Diosmandalla sumaglla kaugsanakungichi. ² Imapipas tukuiwa sumaglla mana atuniachirispas kangichi. Kam kikin-pura kuianakuspa, sumaglla llakinakuspa, mana piñachirinakuspalla kaugsangichi. ³ Taita Diospa pasinsiachiiwa kamkuna suglla niraiaspa, Santu Ispirituwa suglla iuiaiwa kaugsanakungichi.

⁴ Tukui Cristowa tukuskakuna, suglla kuirpumi niraianchi. Santu Ispiritupas, sugllami ka. Chasallata Taita Dios, tukui kamkunata suma luarmami kaiarka, suglla iuiaiwa suianakungapa. ⁵ Suglla Iaia Mandagmi tia. Chaiami, suglla iuiaiwa Jesucristowa iuiaringapa. Baugtisaipas, sugllami tia. ⁶ Suglla Taita Diosmi tia. Paimi tukuikunapa Taita niraiá. Paimi tukuikunata mandag ka; tukuikunawa rurá; tukuikunapi kaugsá.

⁷ Chasa kaspapas, Taita Dioska, suma kuiaspa, Cristo imasa karamungapa iuiakuskasinami tukui nukanchita sug sug karamurka, tukuikuna allilla kangapa. ⁸ Chiamandami ñugpamanda librupi kasa willaraiá:

Tukui apii tukuska runakunata pusaspami awama sikarka.

Runakunataka karamurkami,

tukuikuna allilla kangapa.

⁹ Chi “awama sikaska”, ¿imatak niraiá? Niraiami, Cristo ñugpa kai alpa ukuma uraikugta. ¹⁰ Uraikus-paka, Cristollatata tukui sug luarmanda mas awamami sikarka; chasaka pai kikin, tukui jundaipi junda mana ñi imapas pisi kangapa. ¹¹ Awama sikaspaka, kikinmi karamurka:

sugkunaka, pai kikin kachaska runakuna tukungapa, Alli Willaita willaspa puringapa; sugkunaka, Santu Ispirituwa rimagkuna tukungapa; sugkunaka, Diospa Rimaita willaspa puringapa; sugkunaka, Cristowa tukuskakunata iachachispa, suma kawagkuna kangapa.

¹² Chasaka, paipalla kagkunata allichirkami, paimanda allilla ruraspa, Cristopa kuirpu niraiaskakunata wiñachigsina tukungapa. ¹³ Chasawaka tukui nukanchi, Taita Diospa wambrawa suglla suma iuiaiwa kaspa, paita allillami rigsisunchi. Chasapimi wiñachiskasina alli iuiaipi tukusunchi. Cristosinami tukusunchi, ñi imapipas mana pandarispalla. ¹⁴ Chiura, mana kasunchichu uchulla wambrakunasina, ima sug rigcha sug rigcha iachachiskata uiagkuna. Chasa llulla iachachigkuna, waira aliuspa apagsinami rurankuna, uianakuskata miski simiwa pandachingapa. ¹⁵ Chasapaka nukanchika, sutipa Alli Willaita kuiaiwa rimanakuspa, Iaia Cristo uma niraiagsinawa tukuipimi wiñanakunchi.

¹⁶ Imasami nukanchipa kuirpupi, maki, chaki, tukui kuirpu angukunawa suma wataskasina ka: chasallatami tukui Cristowa kagkuna, paiwa suglla kuirpusina kanchi. Chasa kaspaka, tukuikuna, sug sug imasa chaiaskasina parijuma allilla ruraspa, kuiaiwa allillapimi suglla kuirpusina wiñanakunchi.

Cristowa musuiachigsina iuiaikuna iukasunchi

¹⁷ Chasamanda, Iaia Jesús imasa niskasina, kasami kamkunata mingaspa ninakuikichita. Mana mas kaugsai-chi Taita Diusta mana rigsikgunasina. Paikunaka, mana Taita Dios tiagsinami kaugsanakú, mana allilla iuiarispalla. ¹⁸ Uma tuntiachiska iuiaiwami kaugsanakú. Paikunapa iuiai iana tutapisina tukuspami Taita Diusta mana rigsinkuna. Chiwanka, paipa kaugsaita karamuskamanda anchuriskami kankuna. ¹⁹ Paikunapa alli iuiaikunata wañuchigsina ruraspa, kallarikakunami, tukui jiru i mana allillakunata kusikuspa rurangapa. ²⁰ Kamkuna chasa kaugsangapakana, Cristo mana iachachirkachu. ²¹ Sutipami kamkuna, paimanda uiaspa, tukuipi sutipa Alli Willaita iachaikurkangichi. ²² Kasami kamkuna iachaikurkangichi: ñugpamanda mana alli kaugsaita sakingapa. Chasa kaugsagkuna, tukui jiru munai iuiaikunawa pandarispas, ismuskasinami niraiá. ²³ Chi mana allilla kaugsaita sakispaka, tukuipi suma iuiaita apiichi. Chasaka, musuiachiska iuiaikunami iukankangichi. ²⁴ Chi musu kaugsaita chaskiichi; chasaka, Taita Diussina alli tukungapa. Chi kaugsaita sutipa chaskiska kagkuna, Taita Diospalla kaspa, imapipas allilla ruraspami kaugsankangichi.

²⁵ Chasaka, mana mas llullachingichi. Tukuikuna, suglla kuirpusina niraiaspa, iukangichimi ñi ima mana llullaspalla sutipa kaskallata rimanakunga.

²⁶ Rabiawa kaspapas, mana pandaringichi. Intiru puncha chisiagta mana rabiawa kangichi. ²⁷ Chasaka, mana sakirinkangichichu, iaia kuku kamkunata iuia-chingapa.

²⁸ Maikan sisai kag, kunaauramanda mana mas sisangichi. Chasapaka, kam kikinkunapa makiwa trabajai kallaringichi. Chasa allilla trabajaspaka, pudingichimi, ministiskakunata mailla maillallapas karanga.

²⁹ Jiru rimaikunata mana rimangichi. Sumaglla imasa allilla chaiaskasina rimaikunata rimangichi. Chasaka, maikan uiaspaka, sumaglla iuiarispa, wiñachiskasina-mi kanga.

³⁰ Taita Diuspa Santu Ispirituta mana llakichingichi. Pai Ispirituwami siñalai tukungichi, imaura diltudupa kispichii puncha chaiamunkama. ³¹ Chimandaka, tukui mana alli iuiaikunata, piñaspa rabiariikunata, rabi-arispa kapariikunata, mana alli kamispa rimaikunata, tukui mana alli ruraikunatapas sakiichi. ³² Kam kikin-pura tukui sumaglla alli aidachirinakuspa kaugsangichi. Imasami Taita Dius, Cristowa kamkunapa pandariikunata pasinsiarka: chasallatami kam kikinpura iukan-gichi pasinsianakunga.

Taita Diuspa wambrakuna, imasa kaugsai iukaska-kunamanda

5 Chimanda, Taita Diuspa kuiaska wambrakuna kaspas, paisinallatata tukui sumaglla kaugsanakungichi. ² Imasami Cristo, nukanchita suma kuiarka: chasallata kam kikinpurapas sumaglla kuianakuspa kaugsangichi. Pai kikinmi sakirirka, nukanchimanda wañuchii tukungapa. Imasami judiukuna Taita Dius-manda ubijata wañuchispa rupachiura, kusnisina suma asná: chasallatami Cristo wañuchii tukugmanda, Taita Diuspa ñawipi sumaglla tukugsamurka.

³ Kamkunaka, ña Taita Diuspallami kangichi. Chimandaka, kari warmiwa pandariskamanda, sug rigcha jiru pandariskakunamanda i sugkunapata munariskakunamanda kamkunapura mana iacharichu. ⁴ Millai, jiru, upa parlukunatapas mana rimanakungichi. Chasa parlukuna, mana kamkunata chaianchu rimangapa. Chasapaka, Taita Diusta: “Pai Siñur” nispallami iukangichi kaugsanakunga. ⁵ Kasami iachangichi: maikan kari warmiwa pandarig, sug rigcha jiru pandariikunapas rurag, sugkuna iukaskata munarig, Cristo i Taita Dius suma mandakuskapi mana pudingakunachu iaikugringapa. Chasa munarigkunaka, ianga diuskunata kungurigsinami rurankuna.

⁶ ¡Ujalallapas ianga rimaikunawa llullachispa, kamkunata pandachichukuna! Chasa jiru ruraskakunamandaka, Taita Dius, pai ima niskata mana ruragkunawa askurintimi rabiariigsamungapa ka. ⁷ Chimanda kamkuna, mana paikunawa iuianakungichi, chasa jiru rurankungapa.

⁸ Kamkuna, ñugpata iana tutapisinami kaugsanakurkangichi. Ikuti kunaureka, Iaia Jesuswa kaspaka, pun-

chapi kaugsagsinami kangichi. Chimandami kamkunapas sugkunata punchaiachigsina kaugsai iukangichi.

⁹ Chasa kaugsagkunami, sugkunata tukui allilla sumaglla ruraspa, ñi imapipas mana llullaspalla kaugsankuna. ¹⁰ Iaia Jesús ima munakuskata iuiarispa, tukui allilla rurangichi.

¹¹ Iana tutapisina kaugsagkuna, Diuspa ñawipi ñi imapa mana balimi rurankuna. Mana paikunawa sugllapisina jiru ruraspa kaugsanakungichi. Paikuna jiru ruranakuskamanda, piñaspa iuiachingichi. ¹² Paikuna ima pakalla ruranakuskamanda iachaspa rimagpika, pingaimi tukugsamungakunata. ¹³ Chi pakalla jiru ruranakuskamanda punchaiachig kawachiura, tukuimi iacharigsamungapa ka. ¹⁴ Cristo kikin punchaiachig-samuuraka, tukuimi punchaiachii tukungapa kankuna. Chimandami kasa niraiá:

Kam puñukug, rigcharii.

Wañuskasina kaspas, atarii.

Cristomi kamba iuiaikunata punchaiachigsamungapa ka.

¹⁵ Chimanda, allilla iuiariichi, imasami iukangichi kaugsanga. Upakunasina mana kaugsanakuichi. Chasapaka, tukui alli iachagsina kaugsanakungichi.

¹⁶ Kaugsankama iukangichimi, tukui allilla ruraspa chisianakunga. Nukanchita chaiakumi, mana alli ruranakug kaskapi kaugsangapa. ¹⁷ Chimanda, upakunasina mana kangichi. Iaia Jesús ima rurangapa munakuskata iachaikuspa, chita ruraspa kangichi.

¹⁸ Mana machangichi. Machaska purigkunaka, tukui-pimi mana allilla rurankuna. Chasapaka Santu Ispiritu, kamkunapa iuiapi jundagsamuchu. ¹⁹ Taita Diusta tukui sug rigcha sug rigcha suma kantukuna birsiaspa, kam kikinpura sumaglla iuiachirinakuspa kangichi. Tukui iuiawami iukangichi, Iaia Jestusta kantaspa, “Ia-pa allimi kangi” nispa kangakuna. ²⁰ Imaurapas tukui-manda “Pai Siñur” Taita Diusta nispa kangichi, nukanchipa Iaia Jesucristota iuiarispa.

Cristowa tukuskakuna, imasa sugkunawa kaugsanakui iukaskamanda

²¹ Cristota suma manhaspa, kam kikinpura parijuma sumaglla uianakuspa kaugsangichi.

²² Warmikunata niikichitami:

imasami Iaia Jestusta uiangichi: chasallata kamkunapa kusata sumaglla uiangichi. ²³ Imasami Cristo, uma kagsina, tukui paiwa tukuskakunapa iaia ka: chasallatami kamkunapa kusapas, warmipa iaia ka. Cristo kikinmi ka tukui paiwa tukuskakunata kispichig. Tukui paiwa tukuskakunaka, paipa kuirpumi niraianchi. ²⁴ Imasami Cristowa tukuskakuna, paita uianchi: chasallatami warmikunapas iukangichi, kamkunapa kusata imapi-pas uiana.

²⁵ Kusakunata niikichitami:

imasami Cristo, tukui paiwa tukuskakunata kuiaspa, nukanchimanda wañurka: chasallata kusakunapas, kamkunapa warmita sumaglla kuiaspa kaugsangichi.

²⁶ Nukanchimanda Cristo wañurka; chasaka, Diuspa Rimaita uiaspa, iakuwa baughtisarisa, Taita Diusmanda-

Ila kaugsangapa; ²⁷ chasaka tukui Cristowa tukuskakuna, paipa ñawipi imapipas allilla sumaglla kawaringapa, ñi imapipas mana mapasina kaspera, paipalla kangapa.

²⁸ Imasami kusakuna, kam kikinkunapa kuirputa kuidaringichi: chasallatami iukangichi, kamkunapa warmita sumaglla kuiaspa kanga. Maikanpas kikinpa warmita sumaglla kuiagpika, kikinllatata kuiagsinami niraiá. ²⁹ Ñi pipas pai kikinpa kuirpuwaka mana rabiaringinchi. Chasapaka, mikui karaspa, sumaglla kuidaspa mi kuirputa charí. Chasallatami Cristo, tukui paiwa tukuskakunata sumaglla kawaspa charí. ³⁰ Cristowa tukuskakunaka, paipa kuirpumi niraianchi.

³¹ Kasami Taita Dios ñugpata nirka:

Chimandami kari,
paipa taitata mamandita sakispa,
paipa warmiwa iskandikuna
sugllasina tukugsamungapa kankuna.

³² Chi rimaita, iapa atun kagmanda, ñi pipas mana iachagsamungapa kanchu. Chasa kagpipas, nuka kasami niikichita: Cristo i tukui paiwa tukuskakunawa suglla kagtami niraiá. ³³ Kasapasmi niraiá: tukui kusakuna, imasami kam kikinkuna kuiaspa kuidaringichi: chasallatami iukangichi, kamkunapa warmitapas kuianga. Warmikunaka, kamkunapa kusata sumaglla uiangichi.

6 Wambrakunata niikichitami:

Iaia Jesusta kuiaspa, kamkunapa taita i mama tukui ima niskata allilla rurangichi. Chasa ruraspaka, allillami ka. ² “Kamba taitata mamandita sumaglla kuiangi”; chi ñugpa mandaiwami chasa uiagkunata, Taita Dios kasa karamungapa nirka:

³ Kam chasa kuiagpika,
tukuipimi alli kankangi;
kai alpapi unaimi kaugsankangi.

⁴ Taitakunata i mamakunata niikichitami: kamkunapa wambrakunata mana llakichingichi. Chasapaka, Iaia Jesuspa kuiaiwa paikunata iuiachispa, suma asutispa wiñachingichi.

⁵ Lutrunkunata niikichitami:

imasami Cristota manchaspa uiantrangichi: chasallata kamkunapa kai alpapi patrún niraiaskakuna tukui ima niskata allilla rurangichi. ⁶ Mana kawanakugmandalla allilla ruraspa kangichi, “Sumami rurakungi niwachukuna” iuiaspalla. Imasami Cristo ima niskata allilla rurangichi: chasallatami iukangichi, kamkunapa patrún ima niskata tukui iuiaiwa allilla rurangkuna. Chasami Taita Dios muná. ⁷ Runakuna ima niskata ruragsinaka mana iuiangichi. Iaia Jesús ima niskata ruragsinami iukangichi, tukuipi imapas allilla rurangkuna. ⁸ Kasapasmi iachangichi: tukui lutrin u patrúnkuna allilla ruragpikunaka, Iaia Jesuska imasa kadaunta chaiaskasinami karagsamungapa ka.

⁹ Patrunkunapas, chasallata kamba lutrinkunawa alli kangichi. Mana manchachingichi, “Asutingapami kaiki” nispa. Iuiariichi, paikunata i kamkunata mandag Taita Dios suma luarpi kagta. Paipa ñawipi, ñi pipas mana tianchu sug rigcha.

Taita Dios karamuska tukui katangasinata churarisun-chi

¹⁰ Kunauraka, kasapasmi niikichita: Iaia Jesuswa i pai tukui rurag iachaiwami sinchi wapu iukangichi tukunga. ¹¹ Taita Dios karamuska tukui katangasinata churariichi; chasaka, iaia kukupa llullachiikunata kispiringapa. ¹² Aichaiug iawariug runakunawaka nukanchi mana makanakunchichu. Kai iana tutaiaskasina alpapi iapa pudi mandag i atuniachispa kuku wairakunawa, awa wairapi iapa pudig kuku wairakunawami makanakugsina kanchi. ¹³ Chimanda, Taita Dios karamuska tukui katangasinata churariichi; chasaka, mana alli punchakuna chaiamuura, chi kukukunawa makanakuipi wapulla saiarispa mitikuchingapakunata.

¹⁴ Chasa paikunata mitikuchingapaka, sutipa Alli Willaita allilla chumbilliskasina kaichi. Alli rurailawa kaugsaspaka, pichupi iru katanga churariskasini tukungichi. ¹⁵ Chakipi churaraikasina niraianmi sumaglla kaugsaimanda Alli Willaita willai. ¹⁶ Imaurapas Cristowa suma iuiarispa kaichi; chasaka, michadiruta makipi chariskasina kangapa. Chasa iuiarispa, iaia kuku tukui kachaska flicha sindisina millai iuiakunata kispiringapami kangichi. ¹⁷ Cristo kamkunata diltudupa kispichingapa iuiarispa kaichi; chiwanka, michadiruta umapi churaraikasina kangapa. Santu Ispíritu karamuska makanasinaka niraianmi Diospa Rimai. ¹⁸ Santu Ispíritu iuiachiska rimaiakunawa imaurapas Taita Diusta mañangichi i ruangichi. Chasa rurangapaka, sumaglla iuiaiwa allichiskasina kaichi, mana sambaiaspalla. Tukui Diospalla kagkunamanda paita mañapuichi.

¹⁹ Nukamandapas chasallata Taita Diusta mañapuichi, tukuipi nuka sumaglla rimangapa; chasaka, pitapas mana manchaspalla, Alli Willaita mana pipas iachaskata nuka willangapa. ²⁰ Kikin Taita Diosmi nukata kachamuwarka, chi willaita tukuikunata willangapa. Chi willailatata nuka willaskamandami kunaora kaipi wataska wichkaraiani. Taita Diusta mañapuichi, nuka rimangapa chaiaura, mana manchaspalla Alli Willaita willangapa.

Kaiakama, niskamanda

²¹ Nukanchipa kuiaska waugki Tíkiko, Iaia Jesusmanda tukuipi alli ruragmi ka. Paika, kamkunapagma chaiagrispa, nuka imasa kaskamanda tukui ima rurakuskatami willagringa. ²² Kasamandami paita kamkunapagma kachakuni: nukanchi kaipi imasa kaskamanda willagringapa. Chasaka, kamkuna mana sambaiangkichichu.

²³ Taita Dios i Iaia Jesucristoka, kam taita i mamakunata sumaglla kaugsaita karaspa, kuiaspa, iuiachipuachu, paiwa suma iuiarispa kangapa. ²⁴ Mana tukurig kuiaiwa, nukanchipa Iaia Jesucristota tukui kuiagkunata, Taita Dios sumaglla kawapuachu.

FILIPOSPI CRISTOWA TUKUSKAKUNATA

¹ Nukanchi Pablo i Timoteo, Jesucristopa lutrinsinakunami kanchi. Tukui kamkuna, Jesucristowa tukuspa, Taita Diuspalla kaspas, Filipos puiblupi kaugsagkunatami kai karta kachanchi. Kamkunata iachachig taitakunata, kamkunata aidag taitakunata i tukui kunatapas, ² nukanchipa Taita Dios i Iaia Jesucristo, kuiaspa, suma iuiaiwa kawapuachu.

Cristowa tukuskakunamanda Taita Diusta mañaskamanda

³ Nuka, kamkunamanda imaurapas iuiarispas, nukapa Taita Diusta Pai Siñurmi nini. ⁴ Chasallata, paita kamkunamanda iuiarispas mañaura, imaurapas alli iuiachiiwami tukuikunamanda mañapuikichita. ⁵ Kamkuna, Cristowa tukuskauramandata aidawanakungichimi, paimanda Alli Willaita willaspa nuka puringapa. ⁶ Kasami allilla iachani: Taita Dios, kamkunawa allilla rurai kallarispa, chasami rurakunga, ikuti kikin Jesucristo samunkama. ⁷ Tukui kamkunata nuka suma kuiaspami alli ka, nuka chasa iuiangapa. Nuka karsilpi kaspapas, justisiakunapa ñawipi mana manchaspallami saiarispa, nini: “Kai Alli Willai, sutipami ka”. Chasawaka, tukui kamkunapas nukawa Taita Diospa suma kuiaitami chaskinakungichi, imapipas allilla rurawagmanda.

⁸ Taita Diosmi iachá, nuka kamkunata kuiagta; imasami Jesucristo nukanchita suma kuiá: chasallata. ⁹ Chimandaka, kasami paita mañapuikichita: kamkuna mas sumaglla kuianakuspa, tukui punchakuna kaugsanakungapa; chiwanka, allilla iachaspa i imapipas alli iuiaiwa kangapa. ¹⁰ Chasami iachankangichi, maikan mas suma ruraikuna agllaspa, ruraspa kaugsanakungapa. Chasaka, Cristo ikuti samuura, kamkuna tukuipi alli mana imapipas pandariskami kawarinkangichi. ¹¹ Kamkuna allilla ruraspa kaugsaspaka, Jesucristowa tarpuskata pallaskasinami tukunkangichi. Chasaka, Taita Diusta suma atuniachispami pai alli kagta kawachinkangichi.

Cristo kikinmi nukapa kaugsai kapuá, niskamanda

¹² Taitakuna i mamakuna, kasapasmi nuka willaichita: nuka kai karsilpi kagpipas, Alli Willaitaka mas sumagllami miraspa uiariku. ¹³ Kai iaia mandagpa wasipi i sugkunapagpipas, tukuikunami iachankuna, nuka Cristomandalla kaipi wataraiagta. ¹⁴ Chasallata, Iaia Jesuswa tukuskakuna, ñalla tukuikuna, nuka wichkaraiagta iachaspaka, animurispas, Diospa Rimaita mana manchaspallami willanakú.

¹⁵ Sugkunaka, nukamanda mana allilla iuiaspa kawawagkuna, Cristomandallatatami willanakú, “Nuka, Pablomanda masmi kani” kikinkuna iuiarispas. Ikuti sugkunaka, alli iuiaiwami paimanda sumaglla willanakú. ¹⁶ Paikunaka, nukata kuiawaspami Cristomanda willanakú, kasa iachaspa: Taita Diosllatata kai karsilpi chariwakugta; chasaka, Alli Willaita mana manchaspalla willakungapa. ¹⁷ Chi sugkunaka, “Nuka, Pablomanda masmi kani” kikinkuna iuiarispami Cristomandallatatami willanakú. Chikunaka, kikinmandalla iuiarispami willanakú. Nuka karsilpi kaskatami mas llakichiwangapa munanakú. ¹⁸ Chasa munanakugpipas, nuka ninimi: “Paikuna iachachukuna”. Allilla u mana allilla iuiaiwa willanakugpipas, Cristomanda willanakugpika, nukataka allimi uiariwá.

Kasamandami mas alli iuiachiiwa kangapa kani: ¹⁹ kamkuna Taita Diusta mañapuaskamanda i Jesucristopa Ispíritu aidawaskamanda, iachanimi nuka kaimanda llugsingapa kagta. ²⁰ Suma alli iuiaiwami suiakuni, nukata Cristomanda tapuchiwanakuura, nuka tukuipi allilla ainingapa. Chiwanka, sug biakunasinana, kunaurapas mana manchaspallami ainisa. Chasaka, nuka kaugsangapa u wañungapa chaiawagpipas, munanimi, Cristota mas suma atuniachiska kapuachu. ²¹ Chasawaka, nuka kaugsankama, Cristo kikinmi nukapa kaugsai kapuá. Nukata wañui chaiamuwaraka, tukui alli sumagllami sug luarpi tukupuagringapa ka. ²² Nuka chara kaugsangapa chaiawagpika, Taita Diosmandallami imapas allilla ruraspa kaugsakusa. Chasa iuiarispapas, mana iachariwanachu, maikanta agllanga: kaugsaita u wañuita. ²³ Iskandinigmandami chariwanakú. ¿Wañungapachu munantrani; chasaka, Cristowa sugllapi kagringapa? Chasawaka, mas allilla-char kantrani. ²⁴ Ikuti nuka kamkunawa mas unai kaugsakugpika, kamkunamandami mas allilla kantra. ²⁵ Chasa iuiarispaka, iachanimi, nuka mas unai kamkunawa kangapa kagta; chasaka kamkuna, Cristowa mas suma iuiarispas, alli iuiachiiwa kangapakuna. ²⁶ Chasa nuka ikuti kamkunawa kauraka, kamkuna Jesucristomanda mas suma alli iuiachiiwami tukunkangichi.

²⁷ Kasallami mañaikichita: Cristomanda Alli Willaita mana kungarispalla, allilla ruraspa kaugsapuangichi. Chasaka, nuka kamkunata kawangapa rigpi u mana rigpipas, kamkunamanda iachasami, suglla iuiaiwa chi Alli Willaita mana sakispalla kaugsanakugta. Chasallata tukui kamkuna, sugllasina tukuspa, Alli Willaita suma iuiaspa charingichi. ²⁸ Kamkunata piñagpikunaka, mana imapipas paikunata mancharingichi.

Chasa mana manchagpikunaka, paikunamanda niraianmi puchukaringapa rinakugta. Ikuti kamkuna- mandaka niraianmi kispiringapa kagtakuna. Tukui, Taita Diosmi chasa rurá. ²⁹ Taita Diosmi Cristomanda kamkunata kararka, paiwa suma iuiaringapaglla, mana. Paimanda llakii pasangapapasmí nirka. ³⁰ Kamkuna i nuka, sugllapisinami binsingapa iuiaiwa llakii iukanchi. Nuka llakiita binsikugta kawawarkangichimi. Nuka kunaura llakiita binsikugtapas ñami iachangichi.

Cristosina mana atun tukuspa iuiaiwa kasunchi

2 ¿Manachu Cristo, kamkunata suma kuiaspa iuiachi? Santu Ispíritu, ¿manachu kamkunawa sugllapi ka? ¿Manachu kam kikipura kuianakuspa, llakiwa kaskakunata sumaglla iuiachinakuspa kapuan- gichi? ² Chasa kagpika, nukata iapa sumami kuntinta- chiwankangichi, sugllasina tukuspa, sugllasina kuiana- kuspa i sugllasina iuiarispalla kaugsapuanakugmanda.

³ Mana imapas rurangichi, “Nukanchi, sugkuna- manda masmi kanchi” iuiarispá ñi kam kikinkuna atun tukugsina iuiarispá kangapa. Chasapaka, mana atunia- chirispalla, sugkunamanda iuiarispá kangichi: “Nukan- chimanda mas allimi kankuna”. ⁴ Mana imapas mas- kangichi kam kikinkunamandalla. Sugkunamandapas- mi iukangichi, chasa allilla rurangapa iuiarispá kanga- kuna.

⁵ Iukangichimi, Jesucristo imasa iuiariskata iuiarispá kangakuna. ⁶ Paika, Taita Dios imasa kaskasinallatata kaspapas, mana nirka: “Atuniachirisami, Taita Dioswa iwalla kangapa”. ⁷ Chasapaka, pai kikin, tukuipi suma atun Taita Diussina kaspapas, sakispa, nukanchisina aichaiug tukurka, sugkunamanda lutrinsina kangapa. Nukanchi runasina ña kaspá, ⁸ mana atun tukuspa, Tai- ta Dios ima munaskata rurarka, kruspi wañuchii tukugta.

⁹ Chimandami Taita Dios, paita tukuikunamanda mas atuniachirka. Paipa suti kaskatapas nirka, tukui suti- kunamandapas mas atun kangapa. ¹⁰ Chimanda, Je- suspa sutita uiaspa, tukuikunami kunguringapa kan- kuna: sug luarpi, kai alpa luarpi i alpa ukuma kagkuna- pas. ¹¹ Tukuikunami ningapa kankuna: “Kam Jesucristo, tukuikunamanda Iaiami kangi”. Chasa nispaka, Taita Diustami suma atuniachingapa kankuna.

Tuta alpapi kaugsanakuskata punchaiachigsina kasun- chi

¹² Chimandami niikichita, nukapa kuiaskakuna, imasami, nuka kamkunawa kaura, imaurapas nuka niskata rurarkangichi: chasallata, nuka mana kam- kunawa kagpipas, nuka imasa nikuskata ruraspa kaug- sanakungichi. Kamkuna diltudupa kispiringapa iuia- rispa, manchaiwa chugchurigsina kaspá, tukui allilla ruraspa kangichi. ¹³ Taita Diosmi kamkunata iuiachiku, pai imasa munaskasina allilla iuiapi ruraspa kaugsa- nakungapa.

¹⁴ Ima ruraipipas, sugkunamanda mana wasa rimas- palla, mana piñachirinakuspalla kaugsangichi.

¹⁵ Chasaka, ñi pipas mana pudingakunachu, kamkuna- manda imapas ninga. Taita Diospa ñawipi, ñi imapipas mana mapasina tukuipi alli wambrakuna kangichi, kai alpapi jiru mana allilla ruradurkunapa chaugpipi kaug- sangapa chaiagpipas. Chasa kaspaka, paikuna tuta al- papi kaugsanakuskata punchaiachigsinami kankangi- chi. ¹⁶ Kamkunapa suma kaugsaiwami kawachinkangi- chi, Taita Diospa Rimai iapa suma allilla kagta. Kam- kuna chasa kaugsagpikunaka, Cristo samuura, nuka mana ianga kaugsaskata i willaskata iachaspa, iapa alli iuiachiiwami kangapa kani. ¹⁷ Kamkuna, Cristowa suma iuiarispá, Taita Diosmanda wagra ufrinda rupa- chispa miski asnachiskasinami allilla ruranakungichi. Kamkunapa ufrindapi churagsina, nukapa kaugsaita puchukangapa chaiawagpipas, nuka iapa alli iuiachii- wami kangapa kani. Ari, tukui kamkunawami iapa alli iuiachiiwa kangapa kani. ¹⁸ Kamkunapas, chasallata alli iuiachiiwa kuntintulla kangichi. Ari, tukuikuna nukawa alli iuiachiiwa kuntintulla kasunchi.

Waugki Timoteomanda

¹⁹ Iaia Jesús munagpika, iuiakunimi, waugki Timoteo- ta mana unaila kamkunapagma kachangapa; chasa- ka, pai kutimuspa, kamkuna imasa kaskata willawaura, sumaglla kuntintulla iuiachiwangapa. ²⁰ Timoteomi nukasina kamkunamanda tukui allilla iuiarispá ka. Sug paisinaka mana iukanichu. ²¹ Ikuti sugkunaka, pai kikinkunamandallami iuiarinkuna. Jesucristomandaka mana iuiarinkunachu. ²² Chasa kagpipas, Timoteo imasa alli kagta ñami iachangichi. Paika, nukapa wam- bra kagsinami ka; tukui parijsu Alli Willaita willaspami puriku. ²³ Chimandami iuiakuni, paita kamkunapagma kachangapa, nukamanda iacharigllapi ima nukata justisiakuna rurawangapa kagtakuna. ²⁴ Chasa kachas- papas, Iaia Jesustami mañakuni, nukapas rispa, utkalla kamkunapagma chaiagringapa.

Waugki Epafroditomanda

²⁵ Allimi rigchawaku, waugki Epafroditotapas kam- kunapagma ikuti kachangapa. Paimi nukawa sugllapi imapipas alli ruraspa purirka. Chasallata parijuma ani- muchigmi kapuá. Kam kikinkunami paita kachamur- kangichi, nuka ima ministiskata kawapuangapa. ²⁶ Pai- ka, ajaimi munaku, ikuti kamkunata kawagringapa. Paimanda unguiwa kagta kamkuna iachagta uiaspaka, iapami llakirirka. ²⁷ Chika, sutipami pai iapa ungug kar- ka, ña wañungasina. Chasa kagmanda, Taita Dios pai- manda llakirirkami. Paimandalla mana; nukamanda- pasmi llakirirka; chasaka, nuka mana mas llakiikuna iukangapa. ²⁸ Chimandami munakuni, mas utkalla kamkunapagma paita kachangapa; paita ikuti kawas- paka, kamkuna alli iuiachiiwa kangapakuna. Chasaka, nukapa llakiikunata kungarigsinami iuiachiwanga. ²⁹ Paita alli iuiachiiwa chaskipuangichi, Iaia Jesusta: “Pai Siñur” nispá. Paisina kaugsanakuskata muna- puangichi. ³⁰ Cristo imasa munaskasina pai rurakuspa- mi ñalla wañungapa karka. Paipa kaugsaita nuka-

manda llakispa, wañui kispigta churarka, kamkuna iapa karupi kaspera, nukamanda mana imapas rurangapa pudirigmanda.

Jesucristo, tukuikunamanda mas bali kaskamanda

3 Kunaura, taitakuna i mamakuna, Iaia Jesuswa alli iuiachiillawa kapuaichi. Mana saikuwanchu, kamkunata chasallata ikuti ikuti rimakungapa; chasaka, kamkuna allilla kangapakuna.

² ¡Ujalallapas alkusina rabiawa kaugsaspa jiru ruragkunawa sugllapi kangichi! Paikunaka, judiukunapa markata kuirpupi churachigkunami kankuna. ³ Ikuti nukanchimi sutipa markata churaska niraianchi. Santu Ispirituwa Taita Diusta kungurispas, Jesucristowa alli iuiachirispami kanchi. Nukanchi imasa kaskasinallawa mana iuiarinchichu kispiringapa. ⁴ Chasa kagpipas, nukaka pudintranimi, nuka imasa kaskasinallawa kispiringapa.

Maikanpas imasa kaskasinallawa kispiringapa iuiarigpika, maspasmi nuka pudintrani iuiaringapa.

⁵ Pusag puncha tiagsamuska kauraka, judiukunapa marka kuirpupi churaskami kani. Ñugpamanda achala taita Israelpa iawarmi kani. Nukapa ñugpamanda achala taitaka, Benjaminmi suti karka. Nukapa taita i mama, hebreomi karkakuna. Chimandami nukapas hebreollatata kani. Moisés ima rurangapa niskata iachaikuspa, fariseomi nuka karkani. ⁶ “Moisés niskata tukui allillami rurakuni” iuiaspa, Cristowa tukuskakunata puchukangapa kalpachidurmi karkani. Moisés tukui ima niskata allillami rurarkani. Chasaka, ñi pipas mana pudirkakunachu, nukamanda imapas niwangakuna.

⁷ Nuka chasa kagpipas, tukui ima ñugpata nukamanda baligsina niraiaskaka kunaureka ñi ima mana balinchu, nuka Cristowa kagmanda. ⁸ Iaia Jesucristota nuka rigsimganda, paimi nukamanda tukui tukupuarka. Chimandami nini: tukui ima mana paiwa kaskaka, ñi imapas mana balinchu. Cristowa nuka tukuskamandami tukui ima iukaska, kichui tukugsina kani. Chi tukui ima mana paiwa kaskaka, ismuskasinami niraiá. Chimanda, tukui sakispa, ⁹ Cristopagma chaiagrispa, paiwa kagringapa: chasaka, tukuimanda mas allimi ka.

Nuka mana munanichu, Moisés niskallata uiaspa ruraskawa mana pandarigsina kangapa. Cristowa suma iuiariskawami mana pandarig niraiangapa munani. Ari, munanimi, paiwa suma iuiarispas, Taita Diuspa ñawipi mana pandarig niraiangapa.

¹⁰ Kasapasmi munani: Cristota mas allilla rigsingapa i pai iapa iachaiwa imasa kaugsariska kagta iachangapa. Pai imasa llakii iukaskata, nukapas paiwa llakii iukangapami munani. Imasami pai wañurka: nukapas chasallatami munani. ¹¹ Chasa wañuspaka, nukapas ikuti kaugsaringapami iuiani.

Munasunchi, tukuipi Jesucristo imasa munaskasina kaugsangapa

¹² Nuka mana nikunichu, ña tukui chi munaskakunallawaka tukuipi allilla tukuska kagta. Imasami Jesucristo, nukata agllawarka: chasamandami nuka munakuni, pai imasa munawaskasina kaugsangapa. ¹³ Taitakuna i mamakuna, mana niikichitachu, tukuipi pai imasa munawaskasina ña kaugsakugta. Nuka ñugpata imasa kaugsakuskata sakispa, kunaura munanimi, kati kati sinchi paita katichispalla kangapa; ¹⁴ chasaka, maipi chaiagridiruma chaiagringapa. Chiwa, imasami Taita Dius, Jesucristowa nukata kaiawá: chasamandami suma luarpi ima karawangapa kaskata chaskigringapa suiakuni.

¹⁵ Imasami Jesucristowa allilla iuiarispas kanchi: chasallatami iukanchi, iuiarispalla kangakuna, paipagma chaiagringama. Kamkuna imapipas sug rigcha iuianakugpika, chitapasmi Taita Dius allilla iuiachinga. ¹⁶ Chasa kagpipas, nukanchi ña iachaskatami iukanchi alli iuiarispas kangakuna.

¹⁷ Taitakuna i mamakuna, kawawaichi imasa nuka kaugsakugta. Chasallatami kamkuna iukangichi kaugsangakuna. Maikan imasa nukanchi iachachiskasina kaugsanakuskatapas kawaspa, chasallata kaugsangichi. ¹⁸ Ña achka biajimi kasa willarkaikichita. Ikutimi kunaurepas wakaspa niikichita: Cristo kruspi wañugpipas, achkakunami paita mana munaspa kaugsanakú. ¹⁹ Chasa kaugsanakugka, kai alpa tukurii puncha, diltudupa chingangapa luarma sitai tukungapa kankuna. Kunaura paikunapa wigsallami dius niraiapunkunata. Paikunapa jiru ruraikunawa pingaiachirigsina tukungataka, chikunawa atuniachirigsinami iuiarinkuna. Kai alpapi ima tiaskakunallowami iuiarispas kaugsankuna.

²⁰ Ikuti nukanchika, suma luarpi kaugsagringapami niraianchi. Chimandami Iaia Jesucristo kispichig ikuti samunkama suianakunchi. ²¹ Pai Jesucristomi nukanchipa ismungapa kuirputa sug rigcha ruragsamungapa ka, pai kikinpa suma kuirpusinallatata kawari. Paipa iapa iachaiwami chasa ruragsamungapa ka. Paipa iapa iachaillawami tukuipi pai ima niskata tukugsamungapa ka.

Iaia Jesuswa imaurapas alli iuiachiillawa kasunchi

4 Chasamanda, nukapa kuiaska taitakuna i mamakuna, Iaia Jesusllawa iuiarispas kangichi, mana sambaiaspalla. Nuka, ajaimi munakuni kamkunata kawagringapa. Kamkunawami alli iuiachiwa kani. Kamkunami nukapa llaugtusina kangichi.

² Pani Evodiata i pani Sintiketaka kasami mañaikichita: Iaia Jesuswa suma iuiarispas ñañandisina, suglla kagsina tukugsamuichi. ³ Chasallata, kam waugki nukawa Taita Diusmanda allilla ruragtapasmi kasa mañaiki: chi panikunata iuiachispa aidapuai, sugllasina kaugsanakungapa. Paikunaka, waugki Klementewa i sug nukawa waugkikunawanta, Alli Willaita mana munana-

kuskatapasmi willai aparkakuna. Paikunapa sutikuna, diltudupa kaugsangapa willaraiaska librupimi willaraiá.

⁴ Iaia Jesuswa imaurapas alli iuiachiillawa kapuangi-chi. Ikutimi niikichita: paiwa alli iuiachiillawa kangichi.

⁵ Tukuikuna kamkunamanda iachachukuna, tukuipi sumaglla ruraspa kaugsanakugta. Iaia Jesús samungapa puncha, ñami chaiaku.

⁶ Ñi imamandapas mana llakiswa kangichi. Chasapaka, tukui imamandapas Taita Diusta willanakungichi. Paita tukui mañaspa, “Pai Siñur” ningichi. ⁷ Chasa kaugsanakuskataka, Taita Dioska paipa sumaglla kaugsaitami karamunga. Chi sumaglla kaugsaita, tukui iuiaita ialigtami ka. Chi sumaglla kaugsaita karawaskawaka, kamkunapa uma i suma iuiái, Jesucristopa wakachiska kagsinami kankangichi.

Alli kaskakunallata iuiarisa kasunchi

⁸ Taitakuna i mamakuna, kasapasmi niikichita: tukui sutipa kaskata iuiarisa kangichi. Chasallata iuiaringichi, tukui allilla uiangapa chaiakuskata, tukui suma alli chaia kaskata, tukuipi alli kagta niraiaskata i ima suma alli kaskamanda suma rimangapa chaiakuskata. Chikunamandami iukangichi iuiarisa kangakuna.

⁹ Imasami nuka iachachispa rimaskata uiawarkangichi i imasami nuka ruraskata kawawarkangichi: chasallata ruraspa kaugsapuangichi. Kamkuna chasa kaugsanakugpika, Taita Dios suma iuiailapi charigmi kamkunawa sugllapi kangapa ka.

Filiposmandakuna, San Pablota kulki karaskamanda

¹⁰ Kamkuna ikuti nukata iuiariwagmanda, Iaia Jesuswa iapami alli iuiachiwarka. Nuka chasa nigpipas, mana niraianchu, kamkuna nukata kungariwaska kagta. Nukata maituku iuiariwanakugpipas, mana pudirkangichichu aidawangapa. ¹¹ Nukata ima pisiwagmandaka mana rimaikichitachu. Iachaikurkani, nuka ima iukaskallawa allilla iuiarisa kaugsangapa.

¹² Iachaniami ima ministiska kaugsaita. Achka iukaspas

kaugsaitapasmi iachani. Iacharidumi kani, imasa kaugsagpipas, allilla iuiarisa kaugsangapa: sagsagta mikuspa u iarkaiwapas, puchugta iukaspas u ñi ima mana iukaspapas. ¹³ Cristomi kuawá, nuka chasa suma kaugsangapa. Tukui, paiwami pudini. ¹⁴ Chasa pudigpipas, nuka llakiiwa kaura, kamkuna suma allilla karawaskawami aidawarkangichi.

¹⁵ Kam Filiposmanda runakuna iachangichimi, nuka ka Alli Willaita willagringapa kamkunapa Masedonia alpamanda manara llugsigpi, Cristowa iuiagkuna sugnigta kaskakuna, ñi maikanpas mana aidawagtakuna. Kamkunallami, nuka ima willaskata uiaspa, Taita Diusta karagsina kulkita karawarkangichi. ¹⁶ Nuka Tesalónika puiblupi kaurapas, nuka ima ministiskakunamanda ikuti ikutimi karawangapa kachapuarangichi. ¹⁷ Nuka chaskikungapaglla mana munanichu. Kamkunamanda munaniami, chi karawaskakunawaka, Taita Diospa ñawipi kamkuna achka miraskata chaskigringapa. ¹⁸ Kamkuna tukui ima kachamuwaskawaka puchugtami iukani. Epafroditowa ima kachamuwaskatami chaskirkani. Chiwanka, ñi ima mana pisiwanchu; kamkuna ima karawaskaka, Taita Diosmanda insinsu rupachiura, miski asnami niraiá: chasa. Chitami Taita Dios, suma kawamuspa, kuntintarisa, chaskigsina rurá. ¹⁹ Imasami nukapa Taita Dios, Jesucristowa iapa achka tukui suma iuká: chasallatami kamkunatapas tukui ima pisikuska karamunga. ²⁰ Nukanchipa Taita Diusta nisunchi: “Kam, iapa suma atunmi kangi, maituku waranga waranga watakuna ialigpipas”. Chasa kachu.

Kaiakama, niskamanda

²¹ Tukui Jesucristowa tukuskakunata: “Puangi” nipuachi. Nukawa kaipi kag waugkikunami kamkunata: “Puangi” ninkuna. ²² Taita Diospalla kagkuna tukui kaipi kagkunapasmi, “Puangi” ninkuna. Iaia mandagpa wasipi kagkuna, masmi kamkunata: “Puangi” ninkuna.

²³ Iaia Jesucristo, tukui kamkunata sumaglla kawapuachu. Chasa kachu.

KOLOSASPI CRISTOWA TUKUSKAKUNATA

¹ Taita Dios munaskamanda, Jesucristo kachamu-waskami nuka kani, Alli Willaita willaspa puringapa. Waugki Timoteowa kaspera, ² kamkuna Cristowa suma iuiarispa Taita Diospalla kaspera taita i mamakunata, Kolosas puiblupi kaugsagkunatami kai karta kachaikichita. Nukanchipa Taita Dios, kamkunata kuiaspa, suma iuiaiwa kawapuachu.

Cristowa tukuskakunamanda Taita Diusta mañaskamanda

³ Nukanchipa Iaia Jesucristopa Taita Diusta imaurapas kamkunamanda mañaspa, Pai Siñurmi ninchi. ⁴ Kamkuna Jesucristowa suma iuiariskamandami iachagsamurkanchi. Chasallata, tukui paimandalla sumaglla kaugsanakugta, kamkuna kuianakuspa kagtakunami iachagsamurkanchi. ⁵ Kamkuna suma luarpi ima chaskigringapa suianakuspasi chasa kaugsanakungichi. Sutipa Alli Willaita uiaspasi chasa suianakungichi. ⁶ Imasami tukui alpapi chi Willaita suma iuiarigkuna mas miraspa rinakú: chasallata kamkuna kaskapi; chi Willaita uiaspa, Taita Diospa suma kuiaita sutipa kagta iachaskauramandasi mas allilla ruraspa kaugsanakungichi. ⁷ Nukanchipa kuiaska waugki Epafraswasi chasa iachaikurkangichi. Paika, nukanchiwa Cristopa lutrinsinami ka. Kamkunamandapas tukuipi allilla ruragmi ka. ⁸ Paimi nukanchita willagsamurka imasa kamkuna, Santu Ispirituwa kuianakuspa, sumaglla kaugsanakugta. ⁹ Chasamanda nukanchipas, kamkunamanda chasa uiaskauramandata mana sakinchichu, Taita Diusta kasa nispa mañangapa: imasa chaiaskasina, paipa suma iachaita kamkunata karapuachu. Chasaka, Santu Ispirituwa tukui ima pai munakuskata allilla iuiarispa mi iachankangichi. ¹⁰ Chiwanka, imapipas paita alli iuiachispa, ima ruraikunapipas tarpuskata sumaglla pallakugsina kawachispa i Taita Dios imasa kagta maspas iachagsamuspa, Taita Diospa wambrakunasina sumagllami kaugsankangichi. ¹¹ Kasapasmi kamkunamanda Taita Diusta mañanchi: paipa iapa suma iachaiwa kamkunata tukuipi allilla charipuachu. Chasaka kamkuna, mana sakirispalla, ñi pitapas mana piñaspa llami kaugsanakunkangichi, ¹² alli iuiachiillawa Taita Diusta: "Pai Siñur" nispa. Paimi kamkunata sumaglla kangapa iuiachirka, paipalla kagkunawa, paipa suma punchapi, pai ima karangapa niskata chaskigringapa. ¹³ Paimi, nukanchi iana tutapisina iuiaiwa kaskata anchuchispa, punchaiachigsamurka. Chasaka, paipa kuiaska wambra suma mandakuskapimi iaiugsamur-

kanchi kaugsangapa. ¹⁴ Paipa wambramandami nukanchi kispichiska kanchi; nukanchipa pandarii-kunatapas pasinsiai tukunchi.

Cristo wañuchii tukuskamanda, Taita Dioswa pasinsiai tukuskamanda

¹⁵ Cristomi ka mana kawarig Taita Diospa kawarig. Tukui ima tiaskakunamanda mas ñugpa, paimi tiarka. ¹⁶ Paiwami tukui ima ruraska tia. Sug luarpi i kai alpa luarpi, kawariska i mana kawariska, kai alpamandakunata mandag i sug mana kawarig luarpi mandakunatapas, tukuimi paiwa i paimanda ruraska tia. ¹⁷ Ñi imapas manara tiagpi, paika ñugpami tiarka. Tukui ima kunauro tiaskataka, paimi suma chariraiá. ¹⁸ Cristowa tukui tukuskakuna suglla kuirpusina niraiaskapi, paillatami iaia ka, uma kagsina. Paimi ka tukuikunamanda mas ñugpa. Pai wañuspa, tukuikunamanda ñugpami diltudupa kaugsarigsamurka; chasaka, paillatata tukuipi imapipas ñugpa ladu kangapa. ¹⁹ Paimi ka Taita Dios imasa kaskasinallatata. Chasami Taita Dios munarka.

²⁰ Kasapasmi munarka: Cristowa, kai alpapi i sug luarpi tukui kagkunawa kikin Taita Dioswa pasinsianakungapa. Cristo kruspi wañuspa, iawar ichaskawami tukuikunawa Taita Dioswa pasinsiachinakurka.

²¹ Kasapas. Kamkunaka, ñugpata mana allilla ruraspa kaugsaiwa Taita Diusta mana rigsigsinami karkangichi. Kamkunapa iuiapi paita mana munarkangichichu.

²² Ikuti kunauroka, Cristo wañuchii tukuskawami kamkunawa Taita Dios kikinwa pasinsiachigsamurka; chasaka kamkuna, tukuipi alli kaspera, ñi imapipas mana piñai tukungasina i mapasina kaspera, pai kikinpa ñawipi kawarigringapa. ²³ Kamkuna chasa kangapaka, imasami suma saiachiska muruchu wasi mana kuiurí: chasami iukangichi, Cristowa suma iuiaringakuna. Alli Willaita uiaspaka, paita iuiaspallami suianakungichi; chi iuiaita mana sakispalla kangichi. Chi Alli Willaitaka kai alpapi tukuipimi willanakú. Nuka Pablopasmi agllai tukuska kani, chi Willaita willaspa puringapa.

Cristowa tukuskakunata aidag kangapa, San Pablo mingai tukuskamanda

²⁴ Nuka, kunauro kamkunamanda iapa llakii pasakuskawami alli iuiachirriwa kani. Imasami Cristo, paiwa tukuskakuna pai kikinpa kuirpusina niraiaskamanda iapa llakii pasarka: nukapa kuirpumanda llakiikunawapas chi kuirpumallatatami pisikuskata churakuni.

²⁵ Cristowa tukuskakunata aidagmi nuka kani. Chasami

Taita Dios mingawarka, kamkuna allilla kangapa. Paipa Rimaita tukuikunata allilla willagringapami mingawarka. ²⁶ Ñi maikan ñugpamandakunapas mana iachaskata, Taita Dios kunaura paimandalla kaugsagkunatami willagsamurka. ²⁷ Paimandalla kaugsagkunatami Taita Dios munarka, kunaura kasa rigsichukuna: chi pipas mana iachaskaka, mana judíu kagkuna- mandapasmi niraiá, iapa suma achka iukagsina kangapa. Chi iapa iukaika niraiami Cristo kamkunawa sugllapi kangapa. Paimi ka kamkunapa suianakuska; chasaka, suma puncha luarpi paiwa kagringapa.

²⁸ Pai Cristomandami nukanchi willaspa purinchi. Tukuikunata tukui iachaiwami allilla iachachispa i iuiachispa purinchi; chasaka tukuikuna, allilla wiñachiskasina Cristowa kawarigringapa. ²⁹ Chasa kangapami Cristo karamuwarka, tukui animuwa i iapa iachaiwa sinchi ruraspa puringapa.

2 Kamkunamanda, Laodisea puiblupi kaugsanakuskamanda i tukui mana ñawi ñawi rigsiwagkunamandapas Taita Diustami iapa sinchi nuka mañapuikichita. Chita, kamkuna iachangapami munani. ² Kasami mañani: paikunata alli sumaglla iuiachichu; chasaka paikuna, sugllasina kuianakuspa, imapipas alli iuiapi tukugsamuspa, Taita Dios ñugpata mana pitapas iachachiskata allilla iachachukuna. Chika, Cristota rigsigi niraiá. ³ Cristopimi tia tukui alli iachaikuna i suma iuiakuna wakachiriska. ⁴ Chasami niikichita, ñi pipas mana kamkunata miski simiwa pandachichukuna. ⁵ Nuka kikin, mana kamkunawa kaspapas, iuiapimi kamkunawa kagsina kani. Chasa kaspaka, kamkuna Cristota mana sakispalla suma iuiarispapa imapipas alli kagtakuna iachaspami nukata iapa alli iuiachiwá.

Cristowa musuiachiska kaugsaita iukasunchi

⁶ Chasamanda, imasami Iai Jesucristota chaskirkangichi: iukangichimi pai imasa niskasina kaugsanakunga. ⁷ Imasami sacha, muruchu angukuna iuká: chasallatami kamkuna, ima iachachiskallatata uiaspa, iukangichi Cristowa kangakuna. Imaurapas Taita Diusta: “Pai Siñur” nispa kangichi.

⁸ Allilla iuiarispapa uiangichi. ¡Ujalallapas maikan, kikinpa iuiaimandalla iuiarispapa, ianga rimaskawa kamkunata pandachichukuna! Paikunaka, ñugpamanda runakuna ima rimaskallatami iachachinkuna. Chasa paikuna iachachiskaka, kai alpamandallami niraiá. Cristo allilla iachachiskataka mana willanakunchu.

⁹ Cristopa kuirpupi, Taita Dios kikin tukui ima kaskami kagsá. ¹⁰ Kamkunapas, paiwa kagmandami ñi ima mana pisi tukuska kangichi. Paika, uma kagsina, sug luarpi iapa iachaiwa mandagkunamandapas iaiami ka. ¹¹ Paiwa kagmandami kamkuna marka churai tukuska kangichi. Chi marka, kuirpupi judiukunapa makiwa churaska mana kanchu. Tukui pandarii tiaskakunata anchuchispa kagmandami Cristopa marka churai tukuska niraiangichi. ¹² Kamkuna baugtisariskapimi Cristowa wañuspa pambaskasina niraiangichi. Chasallata, Taita Diospa iapa iachaiwa, pai Cristota kaugsa-

chiskawa suma iuiarispami paiwa kaugsachiska niraiangichi.

¹³ Kamkuna judiukunapa marka mana churaska kagkuna, ñugpata pandarispapa kaugsaskakunamanda Diospa ñawipi wañuskasinami karkangichi. Kamkuna chasa kagpipas, Taita Dios, tukui mana allilla rurai-kunata pasinsiaspa, Cristowami kamkunata kaugsachigsina rurarka. ¹⁴ Nukanchi mana allilla ruraskakunamanda diltudupa ninama sitai tukungapa iskribiraiaska, chitami anchuchigsamurka. Cristo kruspi wañuskawami chi iskribiraiaskata krusllapita klabagsina ruragsamurka. ¹⁵ Cristowami, iapa iachaiwa kuku mandagkunata binsispa, tukuikunapa ñawipi kawachispa kumurichispa kungurichirkakunata.

Sug rigcha iachachiskakunata mana uiangichi

¹⁶ Chasamanda, kamkunata ima mikui, ima upiai mana michanchu. Chasallata, samadiru u atun punchakuna u wawa killakuna mana judiukunasina wardachigpipas, kamkunata mana pipas pudingakunachu ñi ima ningapa. ¹⁷ Chi kustumbrikunamandaka niikichitami: Cristo samungapa kaskata kawachigllami karka. Ikuti kunaureka, sutipa kikin Cristomi kawarigsamurka. ¹⁸ ¡Ujalallapas pipas, kamkunata pandachispa, suma luarpi ima chaskigringapa kaskata kichuchu! Chi pandachigkunaka, uchullasina- mi tukunkuna; anjilkunatami kungurinkuna; muskui ukupisina kawaskamandallami iuiankuna; kikinkunapa iuiaimandalla iuiarispami nirinkuna: “Nuka, iapa atunmi kani”. ¹⁹ Paikuna, Cristo uma kagsina kaskawa mana sugllapi kankunachu. Imasami umamanda tukui samú, angukunapi iawar tukuskawa suglla kuirpu suma wiñangapa: chasallatami Cristowa, paipa kuirpu niraiaskakuna, Taita Dios imasa munaskasina wiñanchi.

²⁰ Kamkunaka, kai alpamandalla niraiaskakunata sakispa, Cristowa wañuskasinami niraiangichi. Chasa niraiagpika, ¿imapatak kai alpamanda ima niskakunata chara uianakungichi? ²¹ Kamkunata ninkunami: “Mana chita tantiangichi. Mana chita mikungichi. Mana chita apingichi”. ²² Tukui chikunaka, imasapas tukurinllami. Chi iachachiskakunaka, runakunapa iuiailawami iachachiska ka. ²³ Chi iachachiikunaka, suma kagsinami rigchá; chasaka, Taita Diosmanda iuiaringapa, mana atun tukuspa kangapa, kikinpa kuirputa sinchi alli ruraikunapi charingapa. Ikuti jiru iuiai munaikunata manima chikunawa pudirinchu arkangapa.

Maskasunchi, suma luarwa iuiarispapa kaugsangapa

3 Kamkunaka, Cristowa ña kaugsachiskami niraiangichi. Chiwanka maskaichi, awa suma luarwa iuiarispapa kaugsangapa. Chipika Cristo, Taita Diospa alli ladumi tiaku. ² Mana iuiachi kai alpapi tiaskakunallawa. Awa suma luarwami iukangichi mas iuiarispapa kaugsangakuna. ³ Kamkuna, Cristowa wañuskami niraiangichi. Kamkunapa kaugsaika, Cristowa Taita Diospa makipimi pakaskasina ka. ⁴ Cristomi kamkunapa

kaugsai niraiá. Pai kawarigsamuuraka, kamkunapas paiwa suma pucha luarpimi kawarigrinkangichi.

Ñugpata kaugsaimanda i musu kaugsaimanda

⁵ Chasamanda, tukui kai alpamanda mana allilla iuiaikunata wañuchigsina ruraichi. Kari warmiwa mana pandaringichi. Ima jiru iuiarispapas, mana rurangichi. Ima mana suma munai i iuiai iuiachigpipas, mana chasa rurangichi. Sugkuna iukaskata mana munaringichi, kamkunapa kangapa. Chasa munarigkunaka, ianga diuskunata kungurigsinami rurankuna. ⁶ Taita Diusta mana uiagkuna chasa mana allilla ruraskakunamandami pai, askurinti rabiawa llakirispas, diltudupa ninama sitangapa ka. ⁷ Kamkunapas, ñugpata chasallata ruraspami kaugsanakurkangichi. ⁸ Kunauramanda tukui kaikunata sakingichi: rabiarpas piñaikunata, mana allilla rurangapa iuiaikunata, kamispa rima i tukui jiru rimaikunatapas. ⁹ Mana kam kikinpura llullachinakungichi.

Kamkuna ñugpata mana alli iuiaspa i ruraspa kaugsanakuskata ñami sakirkangichi. ¹⁰ Kunaura, musu iuiaitami kamkuna ña apigsamurkangichi. Chi musu iuiaita, Taita Diusmi ikuti ikuti iuiachigsamuku; chasaka kamkuna, paipa ñawipi ñallapas paisinallatata sumaglla kangapa. Chasawami pai Taita Diusta allilla rigsinkangichi.

¹¹ Kunauramanda mana kawanakusunchi, judíu u mana judíu kagta. Chasallata, judiukunapa marka churaska u mana churaska kagta, sug maimanda kagta, patrún u lutrin u sachukumanda runasina † kagta, chasa mana kawanakusunchi. Iukanchimi iuiarispas kawanga, tukuikunamanda Cristo kagta.

¹² Taita Diusmi kamkunata suma kuiaspa agllarka, paipalla kangapa. Chimanda, tukuikunamanda llakirinakuspa, tukuikunawa alli i sumaglla kaspas kaugsanakungichi, mana pitapas piñaspalla, mana iapa atunichiriskasina iuiarispalla. ¹³ Kam kikinpura mana piñachirinakuspalla kangichi. Maikanpas ima rabiachingsina nigpika, kamkuna ningichi: “Pasinsianakusunchi”. Imasami Iaia Jesús, kamkunata pasinsiarka: chasallata kamkunapas, parijuma pasinsianakungichi. ¹⁴ Tukui-manda mas suma katanga churarigsina, tukuipi parijuma kuianakuspa kaugsai. Chasa tukuikuna kuianakuskapimi tukuipi parijuma sugllasina tukugsamú. ¹⁵ Cristo kamkunata iuiachichu, sumaglla kaugsanakungapa. Chasapami agllaska kangichi, suglla kuirpusina kangapa. Taita Diusta: “Pai Siñur” nispa kangichi.

¹⁶ Cristomanda willaraiaskata kamkuna suma iuiarispas kaugsanakungichi. Kamkuna, tukui suma iachaskawa parijuma iachachinakuspa, iuiachinakuspa kapuangichi. Taita Diusta: “Pai Siñur” nispa, tukui sug rigcha sug rigcha suma kantukunata birsiaspa kangichi. ¹⁷ Tukui ima rimaska i ruraska, Iaia Jesusmanda iuiarispas kapuangichi. Pai Jesusllawantami pudingichi, Taita Diusta: “Pai Siñur” ningapa.

Cristowa kagkuna, imasa sugkunawa kaugsanakui iukaskamanda

¹⁸ Warmikunata niikichitami: kamkunapa kusakunata sumaglla uiangichi. Chasami Iaia Jesuswa kagkunata chaiá kangapa.

¹⁹ Kusakunata niikichitami: kamkunapa warmikunata sumaglla kuiangichi. Paikunata mana piñaspalla, mana llakichispalla kaugsangichi.

²⁰ Wambrakunata niikichitami: kamkunapa taita i mama tukui ima niskata allilla rurangichi. Chasa ruraspaka, Iaia Jesustami suma kuntintachinkangichi.

²¹ Taitakunata i mamakunata niikichitami: kamkunapa wambrakunata mana llakichingichi. Llakichigpika, kamkuna iuiachispas rimanakuura, manami munangakuna uiangapa.

²² Lutrinkunata niikichitami: kamkunapa kai alpapi patrún niraiaskakuna tukui ima niskata suma uiaspa, allilla ruraspa kangichi. Mana kawanakugmandallaka allilla ruraspa kangichi, “Sumami rurakungi niwachukuna” iuiaspalla. Chasapaka, Iaia Jesusta suma kuiaiwa manhaspa, tukui alli iuiaiwa allilla rurangichi. ²³ Runakuna ima niskata ruragsinaka mana iuiaichi. Kasa iuiaichi: “Iaia Jesús ima niskata ruragmi kani”. Chasa iuiaspaka, imapipas tukui animuwami rurankangichi. ²⁴ Kasami iachangichi: kamkuna alli ruraskakunamandaka, Iaia Jesús ima karangapa kaskata, pai kikinmi kamkunata karangapa ka. Iaia Cristomi kamkunapa patrún niraiá. ²⁵ Ikuti maikanpas mana allilla ruragka, justisiaimi tukungapa ka. Taita Diuspa ñawipi, ñi pipas mana tianchu sug rigcha.

4 Patrunkunata niikichitami:

kamba lutrinkunataka tukuipi sumaglla allilla kawaspa charingichi. Kamkunapas, sug patrún suma luarpi iukagta iuiarispas kangichi.

² Taita Diusta mañangapa mana kungaringichi. Suma iuiaiwa tukuipi kaspas, imapipas “Pai Siñur” nispa kangichi. ³ Nukanchimandapas chasallata Taita Diusta mañapuangichi: Cristomanda Alli Willaita pipas mana ñugpata iachaskata nukanchi willaura, paikunapa iuiaika allilla iuiarigsamuchukunata. Chi Alli Willaita iachachiskamandami nuka kaipi wataska wichkaraiani. ⁴ Taita Diusta mañapuaichi, nuka willangapa kallariura, tukuipi allilla iuiachiwachu rimangapa.

⁵ Manara Taita Diusta rigsigkunawa kamkunata kangapa chaiagpika, tukuipi allilla iachaiwa iuiapi ruraspa kangichi. Kaugsanakunkama iukangichimi, tukuipi allilla ruraspa chisianakunga. ⁶ Kamkunata piwapas rimangapa chauraspa, imaurapas suma chaia rimangichi. Maikanpas ima tapugpika, iukangichimi imasa paikunata allilla ainingata iachanga.

Waugki Tíkiko kachai tukuskamanda

⁷ Waugki Tíkiko kikinmi, kamkunapagma chaiagriura, nuka imasa kaskata willagringa. Paimi ka nukanchipa

† griego rimaiwa: eskita.

kuiaska waugki. Nukanchiwa kaspera, Iaia Jesús ima nis-kata tukuipi allilla ruragmi ka. ⁸ Kasamandami paita kamkunapagma kachakuni: nukanchi imasa kaskata willagringapa; chasaka, kamkunata sumaglla iuiachin-gapa. ⁹ Nukanchipa kuiaska waugki Onesimopasmi sugllapi ringapa ka. Pai kanmi kamkunapura. Tukuipi allilla ruragmi kapuá. Paikunaka, tukuikuna kaipi imasa kaskatami willagringakuna.

Kaiakama, niskamanda

¹⁰ Waugki Aristarko nukawa wichkaraiaipasmi kam-kunata: "Puangi" niku. Waugki Bernabepa primu Marcospasmi, "Puangi" niku. Marcosmanda ñami allilla iachangichi. Chimanda, pai kamkunapagma chaiagrig-pika, sumaglla chaskipuangichi. ¹¹ Waugki Jesús suti Justo ninchi; paipasmi kamkunata: "Puangi" niku. Taita Dios imasa suma mandakuskata nukawa iachachig-pura, paikunallami judíu kankuna. Paikunami nukata llakiikuna anchuchiwarkakuna. ¹² Kamkunapura waug-ki Epafrasmi, "Puangi" niku. Paika, Jesucristopa lutrin-sina kaspera, imaurapasmi kamkunamanda Taita Diusta suma mañaku; chasaka kamkuna, imapipas sinchi

iuiapi kangapa i Taita Dios tukui ima munaskata tukui iuiaiwa allilla ruraspa kangapakuna. ¹³ Paimanda kasa-pasmi willaikichita: kamkunamanda, Laodisea puiblupi kaugsanakuskamanda i Ierápolis puiblupi kaugsana-kuskamandapas iapa sumami Taita Diusta mañaku. ¹⁴ Lucas, kuiaska ambidur, i waugki Demaspasmi kam-kunata: "Puangi" ninkuna.

¹⁵ Waugkikuna Laodiseapi kaugsanakuskata, kam-kuna "Puangi" nipuaichi. Pani Ninfata i paipa wasi ukupi sugllapi tandarigkunatapas: "Puangi" nipuaichi. ¹⁶ Kai kartata tukui kamkuna ña uiaspaka, Laodiseapi Cristowa tukuskakunapagma kachapuangichi, pai-kunapas iachangapa. Chasallata, Laodiseama nuka kachaska karta kamkunapagma chaiagriuraka, kam-kunapas iachankangichimi nuka ima nikugta. ¹⁷ Waug-ki Arkipotaka kasa nipuaichi: Iaia Jesús ima rurangapa mingaskata allilla rurachu.

¹⁸ Nuka Pablo, nuka kikinpa makiwami iskribiska, kai saludaita kachaikichita. Iuiaripuaichi, nuka kaipi wichkaraiaigta. Taita Dios, kamkunata sumaglla kawa-puachu. [Chasa kachu.]

1 TESALONIKAPI CRISTOWA TUKUSKAKUNATA

1 Nuka Pablo, Silvano i Timoteowa kaspá, kamkuna Tesalónika puiblupi Cristowa tukuskakunatami kai karta kachaikichita. Kamkuna, Taita Dioswa i Iaia Jesu-cristowa sugllapi tukuskami kangichi. Taita Dios, kamkunata kuiaspa, suma iuiaiwa kawapuachu.

Tesalonikapi Cristowa tukuskakuna, paiwa suma iuiarispa kaugsanakuskamanda

² Imaurapas tukui kamkunamanda mañaspa, Taita Diusta: “Pai Siñur” nispami kanchi. ³ Kamkuna, chituku paiwa suma iuiarispa i kuiaspa, allillami ruraspa kaugsanakungichi. Nukanchipa Iaia Jesucristota iuiarispa suiaspami kangichi, mana sambaiaspalla. Nukanchi, chasa iuiarispa, nukanchipa Taita Diusta imaurapas kamkunamanda mañaspami kanchi. ⁴ Taita Diospa kuiaska taitakuna i mamakuna, iachanchimi pai kamkunata agllaska kagta. ⁵ Nukanchi, kamkunata Alli Willaita willaspa, mana rimailawa iachachirkanchichu. Paipa iapa iachaiwa i Santu Ispirituwami iachachirkanchi, chi Alli Willai sutipa kagta allilla iachaspa. Nukanchi kamkunawa kankama, kamkunata kuiaspa, sumagllami kaugsanakurkanchi. Chita, allillami iachangichi.

⁶ Kamkunapas, nukanchita kawaspaka, nukanchisina i Iaia Jesussinami sumaglla kaugsanakurkangichi. Kamkuna Iaia Jesusmanda achka llakii iukagpipas, Santu Ispiritumi kamkunata kuntintulla kangapa iuiachirka. Chasaka, Diospa Rimaita alli iuiachiiwami uiaspa karkangichi. ⁷ Chasamanda, kai Masedonia i Akaia alpakunapi tukui Cristowa tukuskakunata kamkunapa suma kaugsaimi kawachirkangichi. Chasaka paikunapas, mas allilla ruraspami kaugsai kallarirkakuna.

⁸ Kamkunapagmanda Iaia Jesusmanda rimaita uiarigsamurka, kai alpakunallapi, mana. Tukuimami iacharigsamurka imasa kamkuna, Taita Dioswa suma iuiarigtakuna. Chasaka, nukanchita mana ministinchu, imapas paikunata ningapa. ⁹ Paikunallatatami nukanchimanda rimankuna, imasa kamkuna, nukanchi chaiagriura, sumaglla chaskigtakuna. Rimankunami imasa kamkuna, ianga dius kaskakunata sakispa, sutipa Taita Dioswa tukugsamugtakuna; chasaka, sutipa kaugsag Taita Diosmandalla kaugsangapa. ¹⁰ Kasapasmi rimankuna: kamkuna suianakungichisi, Taita Diospa wambra Jesús suma luarmanda samungapa kagta. Jesús wañuskatami Taita Dios kaugsachirka. Taita Dios iapa rabiarispa llakii puncha, Jesusmi nukanchita kispichingapa ka.

Tesalonikapi, San Pablo ima ruraskamanda

2 Taitakuna i mamakuna, kam kikinkunami iachangichi: nukanchi, kamkunapagma ianga mana rir-kanchichu. ² Kamkuna ñami iachangichi: nukanchika, Filipos puiblupi mana allilla pasaska i kamii tukuskami karkanchi. Chasa pasagpipas, Taita Diosmi nukanchita iuiachirka, paimanda Alli Willaita kamkunata willagrिंगapa, achkakuna kamispa piñanakugpipas. ³ Panda llulla rimaiwa u jiru iuiaiwa mana kamkunata willanakurkanchichu. ⁴ Chasapaka, imasami Taita Dios, nukanchita agllaspa mingarka, paimanda Alli Willaita willangapa: chitami nukanchi willanchi. Runakunata suma kuntintachingapaglla mana rimanchichu. Taita Dios nukanchipa tukui iuiaita kawagta suma kuntintachingapami rimanchi. ⁵ Kamkuna ñami iachangichi: miski simiwa mana rimanchichu. Chasallata, kulki chaskingamanda mana rimanchichu; chitaka, Taita Diosmi iachá. ⁶ Mana maskanchichu, kamkuna ñi sug runakuna nukanchita ningapa: “Mas atunmi kangichi”. ⁷ Nukanchi, Cristo kikin agllaska runakuna kaspá, pudirkanchimi, kamkunata imapas mañanga. Nukanchi chasa pudispapas, mana chasa ruranchichu. Chasapaka, imasami mama, kikinpa wawakunata kuiaspa wiñachi: chasallatami nukanchi, kamkunata kuianchi. ⁸ Chasa kuiaspami Taita Dios iuiachiska Alli Willaita rimarkanchi. Kamkunata iapa kuiaspa, kamkunamandapasmi wañuntranchi. ⁹ Taitakuna i mamakuna, kamkuna iuiaringichimi, imasa nukanchi saikugta sinchi trabajagtakuna. Diospa Alli Willaita kamkunata rimanakunkama, tukui puncha tutaigta mana samaspallami trabajaspa kaugsanakurkanchi; chasaka, kamkunata mana ñi ima mañaspalla kaugsangapa.

¹⁰ Nukanchi, kam Cristowa iuiarigkunawa kankamaka, allilla ruraspami Taita Diosmandalla sumaglla kaugsanakurkanchi. Chasaka, ñi pipas mana pudinkunachu, nukanchimanda imapas ninga. Chitaka, kamkuna allillami iachangichi. Taita Diospasmi allilla iachá. ¹¹ Imasami taitakuna, paikunapa wambrakunata suma kawankuna: chasallatami nukanchipas, tukui kamkunata allilla iuiachirkanchi. Chitapasmi kamkuna allilla iachangichi. ¹² Kamkunata iachachirkanchimi, Taita Diospa wambrakunasina sumaglla kaugsangapa. Taita Diosllatatami kamkunata agllarka, paipa suma puncha mandakuska luarpi kamkunapas sugllapi kagringapa.

¹³ Kasamandapasmi Taita Diusta imaurapas: “Pai Siñur” ninchi: Diospa Rimaita nukanchi willaura, kamkuna, uiaspaka, mana nirkangichichu: “Kai, runakunapa iuiailawami ka”. “Diospa Rimaimi ka”; chasami nirkangichi. Chasami ka. Chi rimaiwami kamkuna Cristowa iuiarigkunata Taita Dios iuiachispa iachachí.

¹⁴ Kam taita i mamakunata, kam kikinpura kaugsanakugka piñaspa unžaspami aparkakuna. Chasaka, Taita Dioswa tukuskakuna Judea alpapi kaugsanakuskasina llatatami pasarkangichi. Paikuna Jesucristota kuiagmanda, judiukuna kikinpura kaugsanakug chasallatami paikunatapap jiru rurarkakuna. ¹⁵ Judiukunami ñugpata Santu Ispirituwa rimagkunata wañuchirkakuna. Pai kikinpuramandallatatami Iaia Jesustapas wañuchirkakuna. Pai kikinkunallatatami nukanchitapas kalpachispa llugsichirkakuna. Chasa ruraspaka, Taita Diusta mana kuntintachirkakunachu. Tukui runakunawapas mana allilla kaugsankunachu. ¹⁶ Nukanchita mana sakinkunachu, mana judíu kagkunata Diospa Rimaita willangapa; chita uiaspaka, paikunapas kispiringapa. Chasa ruragunami mas achka pandarii mirachirinakú. Chasamandami Taita Dios kunaura paikunawa iapa sinchi llakirigsamurka.

Tesalonikama ikuti chaiagringapa, San Pablo munakuskamanda

¹⁷ Nukanchi, kam taita i mamakunapagmanda sug ratu anchurispapas, mana kamkunata kungarinchichu. Askurintimi munanakunchi, nukanchi kamkunata ikuti kawangapa. ¹⁸ Chimandami munanakurkanchi, kamkunapagma chaiagringapa. Nuka Pablo, ikuti ikutimi chasa munakurkani. Chasa munakugpipas, iaia kuku ka nukanchitami arkarka. ¹⁹ ¿Pitak nukanchita alli iuiachinga? ¿Imatak suianakunchi? Nukanchipa Iaia Jesús samuuraka, kam kikinkunami paipa ñawipi kawaringapa kangichi. Kamkuna chipi kaskakunata kawaspami nukanchita iapa alli iuiachingapa ka. ²⁰ Ari, kamkunami kangichi nukanchita suma alli iuiachiiwa kangapa.

3 Chimanda nukanchi, ña mana mas suiái pudispa, iuiarirkanchimi, waugki Timoteota kamkunapagma kachangapa. Nuka sapallami Atenas puiblupi chisiarkani. Pai Timoteomi ka Taita Dios munaskata allilla rurag. Cristomanda Alli Willaita nukanchiwa willagmi ka. Paitami kacharkanchi, kamkunata iuiachigringapa; chasaka kamkuna, Cristowa mas suma iuiariiwa kangapa. ³ Chasawaka kamkuna, llakiiwa kagpikunapas, ñi pi Cristota mana wasa churankangichichu. Kam kikin-kuna ñami iachangichi: nukanchita chaianmi, chasa llakiiwa kangapa. ⁴ Ñugpata, nukanchi kamkunawa karaka, willanakurkaikichitami nukanchi llakiiwa kangapa kagta. Chasallatami kamkuna iachaskasina pasarirka. ⁵ Chasamandami nuka, mana mas suiái pudispa, Timoteota kamkunapagma kacharkani; chasaka, kamkuna imasa iuianakuskata katinakugta iachangapa. Iuiakurkanimi: jujalallapas iaia kuku, kamkunata pandariikunapi urmachichu; chiwanka nukanchi, kamkunata willaska ianga kangapa!

⁶ Kunauraka Timoteoka, kamkunapagmanda kutimuspaka, nukanchita sumami willagsamurka, kamkuna Cristowa suma iuiarispapa, kam kikinpura kuianakuspa kaugsanakugta. Kasapasmi willarka: kamkuna, nukanchimanda imaurapas suma iuiarispapa, munanangkungichisi, ikuti kawanakungapa; imasami nukanchi munanakunchi: chasa. ⁷ Chasamanda, taitakuna i mamakuna, nukanchi tukuipi iapa llakiiwa kaspapas, kamkunamanda sumaglla iuiachiimi tukunchi, kamkuna Cristowa suma iuiariiwa charinakugta iachaspa.

⁸ Kamkuna Iaia Jesuswa mana sakispalla iuiarigtakuna iachaspaka, mas musukunasinami iuiaiwa kanchi.

⁹ Kamkuna nukanchita iapa alli iuiachiskamanda, nukanchi iukanchimi, Taita Diospa ñugpa ladu kaspapa, imaurapas paita: “Pai Siñur” kamkunamanda ninga.

¹⁰ Tuta i puncha paita askurintimi mañanchi, kamkunata kawagringapa; chasaka, ñawi ñawi kawanakuspa, kamkuna paiwa iuiarispapas, manara iachai-kuskata iachachingapa. ¹¹ Ari, nukanchipa kikin Taita Dios i Iaia Jesús, nukanchita kamkunapagma ringapa lisinsia kuachu. ¹² Kamkunataka, Iaia Jesús mas suma kuiai karapuachu. Chasaka, kam kikinpura i tukui-kunawa mas kuianakuspami sumaglla kaugsankangichi. Chasallatami nukanchipas kamkunata kuianchi.

¹³ Nukanchipa Iaia Jesuska, tukui paipalla kagkunawami ikuti samungapa ka. Pai Jesús, chi punchakama kamkunata tukuipi allilla charipuachu. Chasaka, Taita Diospa ñugpa ladu kamkuna tukuipi alli kawarigriura, ñi pipas mana kamkunamanda ningachu: “Mana alli runami ka”. [Chasa kachu.]

Imasa Taita Diusta suma kuntintachispa kaugsangapa chaiagta

4 Kasapasmi kam taita i mamakunata Iaia Jesús imasa niskasina nukanchi mañaspa ninchi. Imasami nukanchi, kamkunata iachachirkanchi, Taita Diusta suma kuntintachispa kaugsangapa; imasami kunaura kaugsanakungichi: kunaoramanda chasallata sumaglla kaugsanakungichi.

² Iaia Jesús imasa niskasinami kamkunata iachachirkanchi. Chi iachachiskakunata, kamkuna ñami iachangichi. ³ Kasami Taita Dios kamkunamanda muná: paimandalla suma kaugsangichi, kari warmiwa mana pandarispalla. ⁴ Tukui karikuna, sug warmillawa sumaglla kuianakuspa, Taita Diosmandalla kaugsanakungichi. ⁵ Manara Taita Diusta rigsigsina jiru iuiaiwa, kamkunaka mana kaugsanakungichi. ⁶ Ñi pipas, sug waugkindita llullaspa, paipa warmita kichugsina mana rurangichi. Ñami kamkunata willarkanchi: chasa ruragkunataka, Iaia Jesús iapa rabiawa llakirispami justisianga. ⁷ Taita Dios, nukanchita mana agllarkachu, jiru ruraspa kaugsanakungapa. Paimandallami suma kaugsangapa nukanchita agllarka. ⁸ Chasamanda, maikanpas chi iachachiskakunata wabutig, mana runallata wabutinchi. Taita Dios paipa Santu Ispirituta karsakatami wabutí.

⁹ Kamkunapura kuianakuskataka, nuka mana iukanchi ñi ima ninga. Taita Diosmi kamkunata iuiachispa

iachachí, parijuma kuianakungapa. ¹⁰ Sutipami Masedonia alpapi tukui Jesuswa tukuskakunawa kuianakuspa kaugsanakungichi. Chasa kuianakugpipas, kam taita i mamakunata ninchimi: maspas kuianakuichi. ¹¹ Nukanchi imasa kamkunata mingaskasina, kam kikinkunapa makikunawa trabajaspas, mana sugkunapata kawaspalla sumaglla kaugsanakungichi. ¹² Kamkunata chasa kawaspaka, manara Cristota rigsikunapas ñi imapipas mana unžai pudingakunachu. Chasallatami ñi imapas kamkunata mana pisinga.

Iaia Jesús imasa ikuti samungapa kaskamanda

¹³ Taitakuna i mamakuna, nukanchi munanchimi, kamkuna allilla iachangapa, wañuskakuna imasa kaugsaringapa kagtakuna. Chasa iachaspaka, kamkuna mana llakispallami kaugsankangichi. Sugkunaka mana iachankunachu, kaugsaringapa kagtakuna. Chiwami llakispalla kaugsanakú. ¹⁴ Nukanchi iachanchimi, Jesús wañuspa, kaugsarigsamugta. Chimandami kasapas iachanchi: imasami Taita Dius, Jesusta kaugsachirka: chasallatami paiwa tukuspa wañuskakunatapas kaugsachingapa ka.

¹⁵ Iaia Jesús nukanchita iuiachiskatami kasa kamkunata ninchi: Iaia Jesús samungapa punchakama nukanchi kaugsanakugpika, wañuskakunamanda ñugpaka mana sug luarma ringapa kanchichu. ¹⁶ Kikin Iaia Jesusmi suma luarmanda uraikumungapa ka. Sinchi rimaiwa mandaspami uraikumungapa ka. Chiurallatami iaia anjil kaparimungapa ka. Taita Diuspa bututusinapasmi uarigsamungapa ka. Chiuraka Cristowa tukuspa wañuskakuna, ñugpami kaugsarigsamungapa kankuna. ¹⁷ Chiuramanda nukanchi chara kaugsanakugka, paikunawanta puiupimi apai tukungapa kanchi, Iaia Jesuswa awapi tarinakungapa. Chiuramanda, diltudupami Iaia Jesuswa sugllapi kagringapa kanchi. ¹⁸ Chasa iachaspaka, chi iachachiskawa kam kikinpura sumaglla iuiachirinakuspa kaugsanakungichi.

5 Ima puncha, ima ura Iaia Jesús samungapa kagtakana, mana ministirinchu, kam taita i mamakunata willangapa. ² Kam kikinkuna allillami iachangichi: imasami sisai, tuta mana willaspalla samú: chasallatami Iaia Jesuspas, mana iuianakuura chaiagsamungapa ka. ³ Sug runakuna, kungaskami ninakungapa ka: “Alli sumagllami kaugsanakunchi”. Chasa kungaska kaura, chi puchukarii puncha diulpillami chaiamungapa ka. Imasami unguringapa warmita nanai chaiá: chasallatami chi puncha, paikunata chaiamungapa ka. Chitaka, ñi pi mana kispiringapa kankunachu.

⁴ Ikuti kam taitakuna i mamakunaka, iana tutapisina mana kaugsanakungichichu. Chimanda Iaia Jesús, sisaisina mana willaspalla samugpipas, kamkunata mana kungaska shachingapa kanchu. ⁵ Tukui kamkunapa iuiai punchapisinami allilla kaugsanakungichi. Nukanchipa iuiai, iana tutapisina ñi amsapisina mana kanchichu. ⁶ Chiwanka, sugkuna puñunakuskasina mana kaugsanakusunchi. Chasapaka, rigchariskalla mana machaskasina kaugsanakusunchi. ⁷ Tutami puñugkuna puñunkuna. Machagkuna chasallata tuta-

mi machankuna. ⁸ Ikuti nukanchika, punchapisina kaspa, mana machaskasina kaugsasunchi. Tukui jiru iuiakunata kispiringapaka, iukanchimi kuianakuspa, Cristowa suma iuiarispa, tukuipi allilla kanga. Chasallata, umapi ima michag churariskasina kaspaka, iukanchimi diltudupa kispiringapa iuiaita charinga. ⁹ Taita Dius mana nukanchita agllarkachu, pai rabiawa justisiangapa. Nukanchipa Iaia Jesucristomanda kispichii tukungapami nukanchita agllarka. ¹⁰ Jesucristoka, nukanchimandami wañurka; chasaka nukanchi, pai samuura wañuska u kaugsa kaspapas, paiwa sugllapi kaugsaringapa. ¹¹ Chimanda, kam kikinpura mas alli suma iuiachinakuspa kaugsangichi; imasami kunaora allilla ruraspa kangichi: chasa.

Cristowa tukuskakunata iuiachiskamanda

¹² Kam taita i mamakunata kasami mañaikichita: Iaia Jesusmanda allilla ruraspa, kamkunata iachachispa, iuiachispa kagkunata allilla uiapuungichi. ¹³ Paikuna allilla ruranakuskamandaka, sumaglla kuiaspa charipuungichi. Kam kikinpura sumaglla kaugsanakungichi.

¹⁴ Kasapasmi mañaikichita, taitakuna i mamakuna: killa wangukunata piñapuungichi. Llakiiwa kaskakunata sumaglla rimapuungichi. Mana allilla iachaikus-

kakunata sumaglla iuiachispa iachachipuungichi. Tukui kunawa mana piñanakuspalla kaugsapuungichi.

¹⁵ Maikanpas kamkunata jiru ruraskata mana chasallata randichingichi. Chasapaka, iukangichimi imaurapas allilla ruranga, kikinpura u mana kikinpura kagpipas.

¹⁶ Imaurapas suma kuntintulla kangichi. ¹⁷ Taita Dius- ta imaurapas iuiarispa mañaspa kangichi. ¹⁸ Tukui ima pasarigpipas, “Pai Siñur” nispa kaugsangichi. Chasami Taita Dius muná, kamkuna, Jesucristowa tukuspa, “Pai Siñur” nispa kaugsangapakuna.

¹⁹ ¡Ujalallapas Santu Ispíritu iuiachiskakunata kungaringichi! ²⁰ Mana wabutingichi maikanpas Santu Ispirituwa ima willakuskata. ²¹ Tukui ima willakuskata iukangichimi iuiaringa: “¿Sutipacha Santu Ispirituwa willawaku?”. Allilla kaskatami iukangichi katichinga. ²² Ikuti mana allilla ruraikunamandaka tukuipi anchuringichi.

²³ Kikin Taita Dius sumaglla kaugsaita karag, kamkunata charipuachu, tukuipi paimandalla kaugsangapa. Kamkunapa alma, iuiai i kuirpuwanta suma charipuachu; chasaka kamkuna, mana jiru ruraspalla kaugsangapa, nukanchipa Iaia Jesucristo samunkama.

²⁴ Taita Dius kamkunata agllagka, mana llulla kanchu. Paillatami nuka imasa mañaskasina rurangapa ka.

Kaiakama, niskamanda

²⁵ Taitakuna i mamakuna, nukanchimandapas Taita Diusta mañapuungichi. ²⁶ Cristowa tukui tukuskakunata Taita Diusmanda iuiarispa, “Puangi” muchaspa nipuaichi. ²⁷ Iaia Jesús imasa niskasinami niikichita: Cristowa tukui tukuskakunata kai kartata uiachipuachi. ²⁸ Nukanchipa Iaia Jesucristopa suma kuiai, tukui kamkunawa kachu.

2 TESALONIKAPI CRISTOWA TUKUSKAKUNATA

¹ Nuka Pablo, Silvano i Timoteowa kaska, kamkuna Tesalónika puiblupi Cristowa tukuskakunatami kai karta kachaikichita. Kamkuna, nukanchipa Taita Dioswa i Iaia Jesucristowa sugllapi tukuskami kangichi.

² Taita Dios i Iaia Jesucristo, kamkunata kuiaspa, suma iuiaiwa kawapuachu.

Cristo samuura, Taita Dioska jiru ruragkunata justisiangapa kaskamanda

³ Taitakuna i mamakuna, imaurapasmi iukanchi, kamkunamanda Taita Diusta: “Pai Siñur” ninga. Kamkuna Cristowa mas suma iuiarinakugmanda, kam kikinpura mas sumaglla kuianakugmandami nukanchita chaiá, chasa “Pai Siñur” ningapa. ⁴ Kamkunata piñaspa, unžaspa apanakugpipas, kamkuna Cristowa suma iuiariskata mana sakispallami kangichi. Kamkuna chasa kagmanda, nukanchi kikin, Taita Dioswa tukuskakuna sugkunapi kagkunata alli iuiachillami kamkunamanda rimanchi. ⁵ Kamkuna mana allilla pasanakupapas, Cristomanda mana kungarigmandami Taita Dios allillapi justisiai rurangapa ka. Chasawaka pudinkangichimi, Taita Dios suma mandakuskapi iaikugringa.

⁶ Kamkunata piñaspa unžaspa kagkunataka allillami ka, paikunata Taita Dios rabiawa justisiachu; ⁷ chasallata, kamkuna mana alli pasanakuskataka nukanchiwanata tukui chi pasanakuskata samachichu. Iaia Jesús iapa iachag anjilkunawa suma luarmanda kawarigsamuura, chi punchami chasa samachigsamungapa ka. Paika, nina sindi chaugpipimi samungapa ka. ⁸ Taita Diusta mana rigsikunata, nukanchipa Iaia Jesusmanda Alli Willaita mana uiagkunata rabiawami justisiangapa ka. ⁹ Chi mana uiagkunataka, mana imaurapas wañudiru ninamami sitangapa ka. Iaia Jesuspa ñawimanda, paipa suma atun mandadiru tiakuskamanda, karumami sitai tukungapa kankuna, mana mas kawanakungapa. ¹⁰ Chi puncha Iaia Jesús samuuraka, paimandalla kaugsagkunaka paita ningapami kankuna: “Kam, iapa suma atunmi kangí”. Tukui nukanchi paiwa iuiarigkuna, suma ujnarispa, alli iuiachiwami paita kawangapa kanchi. Kamkunapas, nukanchi ima willaskata uiaspami chasallata nukanchiwa paita ningapa kangichi: “Kam, iapa allimi kangí”.

¹¹ Chimanda, nukanchipa Taita Diusta kamkunamanda imaurapas kasami mañanchi: imasami pai, kamkunata agllarka: chasallata tukui allillapi kawapuaspa charichu. Kasapasmi paita mañanchi: kamkuna, paiwa suma iuiariikunawa imapas ruranakus-

kaka, tukui chikuna, pai kikinpa iapa iachaiwa allilla tukugsamuchu. ¹² Chasaka kamkunamanda, Iaia Jesús mas suma atuniachiimi tukungapa ka. Chasallata, kamkunapas paiwa suma atuniachiimi tukungapa kangichi. Nukanchipa Taita Dios i Iaia Jesucristo, kamkunata suma kuiaspami chasa charipuangapa ka.

Iaia Jesús ikuti samungapa kaskamanda, mas allilla iachachiskamanda

² Taitakuna i mamakuna, nukanchipa Iaia Jesucristo ikuti samuura, nukanchi paiwa sugllapi kagringapa kaskamanda kasami willanchi. ² Sugkuna nichukuna: “Iaia Jesús samui puncha, ñami chaiamurka”: chasa ninakugpipas, kamkuna mana sug rigcha iuiangichi; mana mancharingichi. “Santu Ispirituwami chasa rimani” nikugpipas, maikan runa chasa rimakugpipas, maikan nukanchi kartapi kachaskasina chasa iachachikugpipas, ³ jujalallapas kamkunapa suma iuiaita pandachichu! Manara chi puncha chaiamugpimi Taita Diusta mana munagkuna kawarigsamungapa kankuna. Diltudupa chingangapa luarma sitai tukungapa kag jiru rurag runapasmi kawarigsamungapa ka. ⁴ Chi runaka, tukui dius niraiaskakunata i tukui kungurii ruragkunata piñaspa, kalpachispa, llugsichispa, tukui-kunamanda mas atunmi tukungapa ka. Taita Diospa atun wasi ukupi paipa mandadirupi tiarispa, kikin Taita Diussinami niringapa ka.

⁵ ¿Manachu iuiaringichi, nuka, chara kamkunawa kaska, chasakuna rimakugta? ⁶ Kunauraka iachangichimi, pi chi jiru rurag runata arkakugta. Chasaka, paipa puncha chaiankama, manara kawarigsamungachu. ⁷ Jiru rurachig, mana pipas iachagpipas, ñami kagsamú. Paita arkakugta anchuchiurami chi runa kawarigsamungapa ka. ⁸ Ari, chi punchami chi jiru rurag runa kawarigsamungapa ka. Chitaka Iaia Jesús, kikinpa simiwa pukuspami wañuchigsamungapa ka. Ari, Iaia Jesús iapa suma kawarigsamuskawami chi runata puchukagsamungapa ka.

⁹ Chi jiru rurag runaka, iaia kukupa iachaiwami samungapa ka. Iapa iachag kaska, ñi pipas mana imaurapas kawaskasina ruraspami llullachigsamungapa ka. ¹⁰ Tukui jiru ruraikunawa, mana imaurapas wañudiru ninama sitai tukungapa kag runakunata llullachispami purigsamungapa ka. Chi runakunaka mana munarkakuna, sutipa Alli Willaita uiangapa. Mana kagpika, kispirinkunami. ¹¹ Chimanda, Taita Diosmi paikunata sakí, pandachii tukungapa, llullachigkunata uiangapa. ¹² Chasaka tukui paikuna, sutipa Alli Willaita

mana uiaspa, jiru ruraikunawa alli iuiachiriskakuna-
mandami diltudupa ninama sitai tukungapa kankuna.

Taita Dius agllaskakuna, diltudupa kispichii tukungapa kaskamanda

¹³ Iaia Jesús kuiaska taitakuna i mamakuna, nukanchika imaurapasmi iukanchi, kamkunamanda Taita Diusta: “Pai Siñur” ninga. Taita Diusmi kamkunata ñugpa agllarka, kispichii tukungapa. Santu Ispirituwami chasa kispichirka, kamkuna paimandalla kaugsangapa. Kamkuna sutipa Alli Willaita suma iuiariskamandami kispichirka. ¹⁴ Chasa kispichingapami nukanchi Alli Willaita willaskawa kamkunata kaiarka. Chasaka, nukanchipa Iaia Jesucristowa, paipa suma puncha luarpimi kamkunapas kagringapa kangichi.

¹⁵ Chasamanda, taitakuna i mamakuna, nukanchi kamkunata rimaspa i karta kachaspa ima iachachiskata mana sakispalla, mana kungarispalla kangichi. ¹⁶ Nukanchipa Iaia Jesucristo kikin i nukanchipa Taita Dius, kamkunata allilla iuiachispa charipuaçu; chasaka kamkuna, imapipas allilla rimaspa i ruraspa kaugsangapa. Pai Taita Dius, nukanchita suma kuiaspami iuiachirka, alli suma iuiaiwa kaspera, mana puchukaridiru kaugsaita suiangapa.

Nukanchimanda Taita Diusta mañapuaichi, niskamanda

3 Kunaura mañaikichitami, taitakuna i mamakuna, nukanchimanda Taita Diusta kasa mañapuaichi: imasami kamkuna, Iaia Jesusmanda rimaita uiaspa, suma apirkangichi: chasallata mana unailla, chi rimaita tukuikuna suma uiaspa chaskichukuna. ² Sugkunaka, manara Jesuswa iuiarinkunachu. Chimanda, kasapas Taita Diusta mañapuaichi: jiru iuiag runakunamanda, pai nukanchita kispichichu. ³ Iaia Jesús ima rurangapa niska, chasami kanga. Paimi kamkunata allillapi charingapa ka; chasaka, mana pandarispapa kaugsangapakuna. ⁴ Iaia Jesusmanda iuiarispami iachanchi, nukanchi imasa niskasina kamkuna ruranakugta i chasallata rurangapa kagtakuna. ⁵ Iaia Jesús kamkunata iuiachichu, Taita Diusta kuiangapa i kikin Jesucristowa imapipas allilla rurangapa, mana sakispalla.

Mana killaspalla kaugsasunchi

⁶ Kam taita i mamakunata, nukanchipa Iaia Jesucristo imasa niskasinami kasa ninchi: maikan waugki, killaspalla, nukanchi imasa iachachiskasina mana kaugsanakuskapagmanda anchuriichi. ⁷ Kamkuna allillami iachangichi: imasami nukanchi, kamkunawa kankama, mana killaspalla trabajaspapa kaugsarkanchi: chasallatami kamkunapas kaugsai iukangichi. ⁸ Randispallami mikurkanchi. Tukui puncha tutaiaigta mana samaspallami sinchi jumbigta trabajaspapa kaugsarkanchi; chasaka, kamkunata mana mañaspalla kangapa. ⁹ Nukanchi, kamkunata iachachig taitakuna kaspera, pudirkanchimi, kamkunata: “Aidawai” ningapa. Chasa pudispapas, kamkunata kawachingapami sinchi jumbigta trabajarkanchi. Chiwanka, kamkunapas iukangichimi chasallata kaugsanga. ¹⁰ Nukanchi, kamkunawa kankama, kasami nirkanchi: “Maikan mana trabajangapa munag mana mikuchu”. ¹¹ Nigpika uianakunchimi: sugkunaka, wasi wasillasi purinakungichi, ñi ima mana ruraspalla. ¹² Chasa kaugsanakuskatami iuiachispa ninchi: Jumbispa saikugta trabajaspami iukangichi mikunga. Iaia Jesucristomi chasa muná.

¹³ Taitakuna i mamakuna, mana sambaiangichi, allilla rurangapa. ¹⁴ Maikanpas nukanchi kai kartapi ima iachachiskata mana uiagtaka kawaichi: pimi ka. Chikunawaka mana sugllapi kangichi. Chasaka, sitaskakunasina kagtami iuiaringakunata. ¹⁵ Chasa kagpipas, paikunata mana chariichi kuntrakuna kagsina. Waugkinditasinami iukangichi sumaglla iuiaiwa kawanga.

Kaiakama, niskamanda

¹⁶ Iaia Jesús kikin sumaglla kaugsaita karag, imapipas imaurapas kamkunata sumaglla kaugsaita karapuaçu. Iaia Jesús, tukui kamkunawa kachu.

¹⁷ Nuka Pablo, nuka kikinpa makiwami iskribiska, kai saludaita kachaikichita. Tukui nuka kachaska kartakunapimi chasallata iskribini. ¹⁸ Nukanchipa Iaia Jesucristo, tukui kamkunata sumaglla kawapuaçu.

1 TIMOTEOTA

1 Jesucristo kachamuskami nuka kani, Alli Willaita willaspa puringapa. Taita Dios nukanchita kispichig i nukanchi suianakuska Jesucristomi chasa niwarka. ² Kam Timoteotami kai karta kachaiki. Kam, Jesucristowa suma iuiarigmandami nuka kikinpa wambrasina kapuangi. Taita Dios i nukanchipa Iaia Jesucristo, kamta kuiaspa, llakispa, suma iuiaiwa kawapua-chu.

Llullachispa iachachigkunata piñai iukaskamanda

³ Nuka Masedonia alpama llugsingapa kaspera, kamta Efeso puiblupi kangapami mañarkaiki. Chasa kunaupas chillapita kapuangi; chasaka, mana allilla iachachigkunata kam upallachingapa. ⁴ Ianga parlukunata mana puchukangasina ñugpamandakunapa wambra-kunapa wambrakunamanda sugkuna willanakuskata mana uianakuchu. Chi parlukunawaka ianga rimana-kuimi tia. Chikunawaka mana alli kankunachu, Taita Dios ima niskata rurangapa. Paiwa suma iuiarispami chasa ruranchi.

⁵ Chasapaka iachachingi, tukuipi suma allilla mana jiru iuiaspalla, Cristowa sutipa suma iuiarispalla tukui parijuma kuianakuchu. ⁶ Sugkunaka, chasa kuianakun-gapa sakispa, ianga piñachirinakuspallami kaugsa-nakú. ⁷ Paikuna, sutipa chasa kagta nispa rimaskata mana iachaspapas, munanakumi, Moisés ima rurangapa niskata iachachig taitakuna tukungapa.

⁸ Kasami iachanchi: Moisés niskata imasa allilla ruraspa kaugsangapa iachachigpika, sumami ka. ⁹ Kasapami iachanchi: Moisés niska, allilla kaugsanakuskata iuiachingapa mana kanchu. Subirbiaspa mana uiagkunamandami ka. Chasallata, mana Taita Diusta manchagkunamanda i tukuipi mana allilla ruragkunamanda, Taita Diusta mana munagkunamanda i paita kamirigkunamanda, taitata i mamata wañuchigkunamanda, pitapas wañuchingapa munagkunamanda, ¹⁰ kari warmiwa pandarigkunamanda, karipura warmi-wasina pandarigkunamanda, runakunata randispa katugkunamanda, llullagkunamanda, llullaspa juragkunamanda i Jesucristomanda allilla iachachiskata tukui sug rigcha sug rigcha nispa wabutigkunamanda-pasmi ka. ¹¹ Chi allilla iachachii, tukuipi alli Taita Diospa askurinti suma Alli Willaitami willaraiá. Chi Alli Willaitami mingawaska ka, nuka willaspa puringapa.

Taita Dios, San Pablomanda llakirispas, suma kawaskamanda

¹² Nukanchipa Iaia Jesucristomi iapa animu karawarka. Pai ima niskata nuka rurangapa kagta iachaspami pai kikin agllawarka, pai ima niskata rurag kangapa. Chimandami nuka paita: “Pai Siñur” nini. ¹³ Ñugpata karkanimi paimanda mana allilla rimaspa kamidur. Chasallata, paiwa tukuskakunata puchukangapa kalpachidurmi karkani. Paiwa manara iuiarispas, paita mana allilla iachaspami chasa rurakurkani. Chimandami Taita Dios nukamanda llakiripuarka. ¹⁴ Nispa nukanchipa atun Taita Dios, iapa sumami kawawarka. Chasallata, Jesucristowa karamuwarka, paiwa iuiarispas, sumaglla kuiaspa kaugsangapa.

¹⁵ Jesucristo, kai alpamami samurka, pandarii iukagkunata kispichingapa. Chasa rimaika, tukuipi sutipami ka. ¡Amalai tukuikuna, chasa iuiantrangichi! Tukui-kunamanda mas pandarii iukagmi nuka kani. ¹⁶ Nuka chasa kagpipas, Jesucristo ñugpa nukawa kawachirka, pai tukui pasinsiawa kagta. Chimandami Taita Dios nukamanda llakiripuarka. Chasapika, nuka tukug-samurkani, sugkunata kawachigsina pai iapa pasinsiadu kagta; chasaka paikunapas, Jesucristowa suma iuiarispas, mana puchukariduru kaugsaita chaskingapa. ¹⁷ Suglla Taita Dios, imaurapas iaia mandagmi ka. Paimi mana kawarig i mana wañug ka. Pai nukanchimanda iapa llakirispas suma kawaskamanda, paita nisunchi: “Kam, iapa suma allilla atunmi kangi, maituku waranga waranga watakuna ialigpipas”. Chasa kachu.

¹⁸ Timoteo, nukapa wambrasina kagmanda, imasami Santu Ispirituwa rimagkuna ñugpata kammamanda willarkakuna: chasallatami kamta mingakuiki, alli suldadusina Diospa Rimaimanda makanakugsina kangapa. ¹⁹ Chasaka, Cristowa suma iuiarispas, tukui allilla iuiaiwa imasa chaiaskasina ruraspami kaugsankangi. Ikuti sugkunaka, kikinpa alli iuiaita mana uiaspa, pandarispas, Cristowa iuiariskakunatami wabutirkakuna. ²⁰ Imeneo i Alejandromi chasapi kankuna. Paikunataka iaia kukutami kararkani, Taita Diusta mana kamingapa iachaikuchukuna nispa.

Imasa Taita Diusta mañai iukaskamanda

2 Tukuimanda ñugpa, kasa iachachingapami mañai: tukuikunamanda Taita Diusta mañaspa i ruaspa, “Pai Siñur” nispa kangichi. ² Atun mandagkunamanda i tukui paikunawa kagkunamandapasmi mañai iukangichi; chasaka nukanchi, Taita Diusta iuia-

rispa, tukuipi alli iuiwai iukaspa, sumaglla allilla kaugsanakungapa. ³ Chasa mañagpikunaka, allillami ka. Taita Dios nukanchita kispichidurtami suma kuntintachisunchi. ⁴ Paika munanmi, tukuikuna kispichiska kangapa. Paimanda sutipa Alli Willaita iachachukunami muná.

⁵ Suglla Taita Diosmi tia. Suglla runami tia, Taita Dioswa i runakunawa pasinsiachig. Chi runa kanmi Jesucristo. ⁶ Pai kikinmi sakirirka, tukuikunamanda wañuchii tukungapa; chasaka, nukanchita kispichingapa. Imasami Taita Dios, chi punchapa niska karka: chasami tukugsamurka. ⁷ Chimandami nukapas Jesucristo agllaska kachamuska kani; chasaka, Alli Willaita willaspa puringapa. Chasa nukata chaiawaku, mana judíu kagkunatapas chi sutipa Alli Willaita allilla iachachingapa, paikunapas Cristowa iuiaringapa. Nuka, mana llullaspallami sutipa kaskata niiki.

⁸ Chasamandami munani: karikuna, maipi kaskapiipas, Taita Diusta suma iuiaripa mañaspa kangichi, awasinama maki churaspa. Tukuipi alli iuiwai mañaspa kangichi, mana piñachirinakuspalla, mana ainirinakuspalla.

⁹ Chasallatami munani: warmikunapas, mana iapa awapi i mana achka kulkiwa randiska katangakuna churrichukuna. Umamanda agchakunatapas mana iapa sumaiachichukuna. "Sumaiasami" iuiaripa, iapa bali katangakuna, kurita pirlakunata ruraska u imakunapas mana churarispa kaugsachukuna. ¹⁰ Chasapaka, imasami Taita Diusta iuiaripa warmikuna iukanakuna kaugsanga: chasallata tukuipi allilla ruraska kaugsanakuchu.

¹¹ Warmikuna, tukui ima iachachikuskata upalla uiaspa iachaikuchukuna. ¹² Warmikunata mana sakinichu, karikunata iachachispa, mandag kangapa. Paikuna iukankunami, ima iachachikuskata upalla uianakunga. ¹³ Adantami Taita Dios ñugpa wiñachirka; nispaka Eva. ¹⁴ Chasallata, Adán mana ñugpa llullachii tukurkachu. Warmimi ñugpa llullachii tukurka. Chimandami pandarig tukugsamurka. ¹⁵ Chasa tukugsamuspapas, warmikunaka alli mama kaspami kispiringapa kankuna, tukuikunawa allilla iuiwai kaspas, Cristowa suma iuiaripa, tukuikunata kuiaspa i Taita Diosmandalla kaugsaspa.

Cristowa tukuskakunapura iachachig taitakuna, imasa kaugsai iukaskakunamanda

3 Kasa sutipami niiki: maikanpas Cristowa tukuskakunapura iachachig taita kangapa munag, allilla rurangapami munaku. ² Chimandami iachachig taitata chaiá, ñi imapipas mana piñai tukungasina kangapa. Sug warmillawa kaugsachu. Mana iapa urdimal kachu. Tukuwiwa allilla iuiwai, sumaglla kuiwai tukug, wasima pipas chaiagriskata: "Taiku!" nidur kachu. Allilla iachachingapa pudí kachu. ³ Mana kachu machangichu, piwapas piñachirinakug, kulkimandalla iuiaspa kaugsag. Piliaringataka, pasinsialla iuiwai kachu. ⁴ Kikinpa wasipipas sumaglla kaugsangapa iachachichu, paipa wambrakuna sumaglla kuiaspa uia kangapakuna. ⁵ Maikanpas kikinpa wasipi kaugsanakuskata sumaglla

kaugsanakungapa mana iachachii pudigpika, çimasatak Taita Dioswa tukuskakunata pudí, sumaglla kawaspa iachachingapa? ⁶ Cristowa iuiaringapa musuglla kallarikugsina mana kachu. Paiwa musuglla iuiarig kagpika, pudinmi atun kagta iuiaringa. Chiwanka, imasami iaia kuku, urmaspa, justisiai tukurka: chasallatami justisiai tukunga. ⁷ Cristowa manara iuiarigkunapas paimanda: "Allillami kaugsá" iuiaripa kawanakuchu. Mana chasa kagpika, pudinmi chi iaia kukupa tugllapinsina urmaspa, tukui wagllinga.

Cristowa tukuskakunata aidagkuna, imasa kaugsai iukaskakunamanda

⁸ Cristowa tukuskakunata aidagkunatapas chasallatami chaiá, ñi imapipas mana piñai tukungasina kangapa; chasaka, suma iuiwai kawachukuna. Paikuna rimaska mana ianga kachukuna; mana machangichu kachukuna; chasallata, imasapipas kulki mirachingapa iuiailawa mana kachukuna. ⁹ Cristomanda iuiariska mana pipas ñugpata iachaskata charirichukuna, tukuipi allilla iuiwai tukuspa. ¹⁰ Kasapas. Paikunata chaiakumi, ñugpa kawaspa, imasa kagtakuna iachachingapa. Nispaka, tukuipi alli kagta kawarigpikunaka, pudingakunami, Cristowa tukuskakunata aidag kangapa.

¹¹ Warmikunatapas chasallatami chaiá, ñi imapipas mana piñai tukungasina kangapa; chasaka, suma iuiwai kawachukuna. Mana kachukuna wasa rimagkuna i iapa urdimalkuna. Suma ruraikunata mana kungarichukuna.

¹² Cristowa tukuskakunata aidag runakunaka, sug warmillawa kaugsaspa, paikunapa wambrakunata i wasipi kaugsagkunata sumaglla kaugsangapa iachachichukuna. ¹³ Chi aidagkunataka, allilla ruraskamanda, suma iuiaiwami kawangakuna. Chasaka paikuna, Jesucristowa suma iuiariskamanda mana manchaspallami willangakuna.

Nukanchi Cristomanda iuiariska iachaika, askurinti sumami ka

¹⁴ Kambagma utkalla chaiagringapa iuiakuspapas, kai kartatami kachaiki. ¹⁵ Chiwanka, nuka unaiagpika, kam iachankangimi, Diospa wasimandapura imasa kaugsanakugta. Diospa wasimandakunaka niraiami Taita Dios imaurapas kaugsagwa tukuskakuna. Imasami wasita pilarkunawa rumikunawa sinchi chari: chasallatami Cristowa tukuskakuna, sutipa Alli Willaita charig kankuna. ¹⁶ Sutipami kasa niiki: nukanchi Cristomanda iuiariska mana pipas iachaskata iachaika, askurinti sumami ka. Kunaura, kasami iachanchi:

Cristoka, runa tukuspami kawarigsamurka.
Santu Ispiritumi kawachirka,
kaugsai pi wañuipipas, pai ñi ima mana pandarig kagta.

Anjilkunatami pai kawarirka.
Mana judíu kagkunatapasmi
paimanda willai uiarigrirka.

Kai tukui alpapimi
chi paimanda Alli Willaita
iuiaringapa tukugsamurka.
Paika, sug luarmami apai tukurka,
suma punchapi kagringapa.

Cristowa iuiariskata sakigkunamanda

4 Santu Ispíritu, allita willaspa, kasami ni: “Tukurii punchakuna ña chaimukuura, sugkunaka, Cristowa iuiariikunata sakispa, llullachig kuku wairakunawa iachachigkunatami uiangapa kankuna. ² Chi iachachigkunaka, miski simimi iukangapa kankuna. Tukuipi llullaspami kangapa kankuna. Jiru ruraskamandami paikunapa alli iuiaita wañuchii tukuskasina kangapa kankuna. ³ Chi llullaspa iachachigkunami ningakuna mana kasarangapa; maikan mikuita mikungapa, sug mikuikunataka sakingapa”. Chi mikuikunataka, Taita Diusmi ruraska ka; chasaka, paimanda sutipa Alli Willaita iuiarispaga kagkuna, paita: “Pai Siñur” nispa, mikuspa kachukuna. ⁴ Taita Dius ima ruraskaka, tukui allillami ka. Chimanda, ñi imatapas mana wabutii chianchu. Sumaglla “Pai Siñur” nispami mikudiru ka. ⁵ Diuspa Rimaimanda i paita: “Pai Siñur” niskakunamandapasmi chi mikuikuna mana mapa kagsina niraigsamú.

Jesucristopa alli lutrinsinamanda

⁶ Nuka ima nikuskata Jesucristowa tukuskakunata kam iachachigpika, paipa alli lutrinsinami kankangi. Chi Alli Willaikunata nuka iachachiskata kam uiaspa katchikugpika, alli mikui mikukugsinami kankangi. ⁷ Kasapasmi niiki: kai alpamandalla ianga parlukunatapas mana uiakungi. Chasapaka, Taita Diusta iuiarispalla kanggi. ⁸ Pugllaikuna iachaikuika, mailla allimi ka. Ikuti Taita Diusta iuiariika, tukuimanda mas allimi ka. Kaipi kaugsaimanda i sug luarmandapasmi alli ka. ⁹ Chasa rimaika, tukuipi sutipami ka. ¡Amalai tukui-kuna, chasa iuiantrangichi! ¹⁰ Chimandami nukanchi, sinchi trabaju pasaspa ruranchi. Mas iapa llakiikuna pasanakuspapas, Taita Dius imaurapas kaugsagta suma suiaspami chasa mana sakirinchi. Paika, tukui-kunata kispichigmi ka. Paiwa suma iuiarigkunatami mas kispichingapa muná.

¹¹ Nuka ima nikuskata rurangapami iukangi suma iuiachispa iachachinga. ¹² Mana pipas kamta wasa churachukuna, “Musumi kanggi” nispa. Chasapaka, iukangimi tukuipi alli kanga: rimaskapi, suma kaugsaskapi, kuiaskapi i iuiaskapi, tukui jiru iuiaikunata sakispa; chasaka, Cristowa suma iuiarigkunata imasa kaugsanakungapa chaiagta kawachingapa. ¹³ Nuka manara chaiagrinkama, Diuspa Rimai iskribiraiaskata uiachispa, suma iuiachispa, allilla iachachispa kanggi. ¹⁴ Cristowa tukuskapura iacha taitakuna, Santu Ispirituwa rimaspa, kamta maki churaura, Taita Dius karaska; chitapas mana kungarispalla iuiakungi.

¹⁵ Tukui chikunata rurangapaka, tukuipi suma iuiarispaga kanggi. Chasaka, tukuikunami kawangakuna, kam

allilla iachaita mas iachaikukugta. ¹⁶ Kam kikin iuiaringi, alli iuiaiwa kangapa. Kam kikin iachachikuskatapas kawangi, allillachu ka. Tukuipi mana sakispalla kanggi. Chasa ruragpika, kam kikin kispirinkangimi. Kamta uiagkunapasmi kispirinkakuna.

Imasa sugkunawa kaugsai iukaskamanda

5 Achala runakunata mana sinchi rimangi. Kamba taitatasinami iukangi suma iuiachinga. Musukunatapas chasallata waugkinditasina suma iuiachingi. ² Achala warmikunataka mamatasina suma iuiachingi. Sipaskunataka, mana jiru iuiaspalla, paninditasina suma iuiachingi.

³ Mana iukag sapalla kidaska warmikunataka ima ministiskakunata aidangi. ⁴ Maikan biudapas wambrakuna i wambrakunapa wambrakuna iukagpika, chi wambrakunata ñugpa iachachingi, pai kikinpura suma llakirispaga, imakunapipas mamata i taitata: “Pai Mami-ta, Pai Siñur” nispa aidanakuchu. Chasa ruragkunami Taita Diusta suma kuntintachinkuna. ⁵ Ikuti sapalla kidaska warmika iukanmi, tuta punchapas Taita Diusta iuiarispalla mañaspa, paita iuiaspalla kanga. ⁶ Maikan biudapas kikinmandalla alli iuiachirispaga kaugsagka, wañuskasinami niraiá.

⁷ Nuka ima nikuskata rurangapaka, allilla iachachingi. Chasawaka uiaspa ruragkunata, ñi pipas mana piñai pudingakunatachu. ⁸ Ikuti maikanpas paipurakunamanda i maspas kikinpa wasipi kaugsanakuskamanda kuidangapa kungarigka, chi Alli Willaita uiaskata piñarigmi niraiá. Taita Diusta mana uiagkunamanda mas pandarigmi niraiá.

⁹ Sapalla kidaska warmikunata aidangapa willaraiaska librupika churangi sugta chungga iall wataiug i suglla kusa iukaskakunallata. ¹⁰ Iukangimi, paikuna allilla ruraspaga kagkunata kasa rigsinga: wambrakunata alli wiñachispachu ka; paipa wasima chaiagriskakunata sumagllachu chaski; Taita Diuspalla kagkunata chakikunata maillaspachu ka; ima llakii iukaskakunatapas sumagllachu aidangapa kawá; nisunchi: tukui imapipas allilla ruraspaga kagta, chasakunata chi librupi churangi aidangapakunata.

¹¹ Ikuti mas sipas biudakunapa sutikunataka mana chi librupi churangi. Pudinkunami, paikunapa iuiaska munaita mana sakingapa pudispa, Cristota wasa churagsina ruraspaga, ikuti kasarangapa munankunga. ¹² Chasa ruraspaga, paikuna mana imasa Cristota niskasina ruragmandami pandarig tukugsamunkuna. ¹³ Kasapasmi tukugsamunkuna: killa wangu tukuspa, wasi wasillami puringapa munankuna. Mana killa wangulla tukunkunachu. Chankualkuna tukuspa, tukuipi rimarispami purinkuna. Imasa mana chaiaska parlukuna wasa rimaikuna rimaspallami purinkuna. ¹⁴ Chimandami munantrani: sipas biudakunaka ikuti kasarankakuna, wawita iukachukuna; allilla wiñachichukuna; kikinpa wasipi tukui allilla ruraspaga kaugsachukuna. Chasaka, iaia kukuka mana pudingachu, ñi ima juchachinga. ¹⁵ Maikan biudakuna, ñami Cristowa iuiariskata sakispa, iaia kukuta katchinakú.

¹⁶ Kasapas. Maikan [warmi] Cristowa iuiarig, sug biudata paipura iukagpika, chi biudata sumaglla kawaspa, ima ministiskakunata aidachukuna. Chasaka, tukui Cristowa tukuskakunata mana chaiangachu paita kawangapa. Chiwanka, paikuna pudingakunami, sapa-lla warmi kidaskakunata aidangapa.

¹⁷ Cristowa tukuskapura iacha taitakunata iukangimi, is kai biaji "Pai Siñur" nispa munanga. Diospa Rimaita willaspa iachachispalla kagkunataka masmi chaiaku kulki karanga. ¹⁸ Chasallatami ñugpamanda librupi willaraiá, kasa nispa:

Triguta saruspa iskug wagrata
mana simita watangi.

Chasallatami niraiá:

Maikan trabajagkunatapas chaianmi,
trabajaskamanda paganga.

¹⁹ Cristowa tukuskapura iacha taitakunamanda pipas ninakuchu: "Mana allilla ruranchu": is kai u kimsa kawaskakuna mana chasallata willagpikunaka, kam mana ñi imapas uiakungi. ²⁰ Maikanpas ikuti ikuti pandarigtaka tukuikunapa ñawipi iuiachispa piñangi. Chasa kawaspaka, sugkunaka, mancharispa, mana chasa pandariikunata rurangakunachu. ²¹ Taita Diospa, Jesucristopa i agllaska anjilkunapa ñawipimi kai nira-iskata mingaiki: nuka ima kamta niska iuiachiskakunata rurangi, ñi pitapas mana agllaskasina iuiaspalla. ²² Manara allilla rigsispaka kawaspalla, kamba maki mana pitapas churakungi, Cristowa tukuskapura iacha taita kangapa. Mana kagpika, paikuna mana allilla ruragpikuna, kam pandarikugsinami tukunga. Ima-kunapipas sumaglla iuiaipi kangi.

²³ Kam ikuti ikuti wigsa nanai ungu kaspa, kuna-ramanda niikimi: mana iakulla upiangi. Aslla aslla binu-tami iukangi upianga.

²⁴ Sugkuna pandariskamanda ñami iacharí, manara kabilduma chaiagrípita. Ikuti sugkuna pandariska-kunamandaka mas nispami iacharí. ²⁵ Chasallata, ima allilla ruraskakunamanda ñami iacharí. Ikuti manara iachariskaka, mana pakalla kidanchu. Imaurapasmí iacharí.

6 Maikan lutrinpas, kikinpa patrunta tukuipi suma iuiaiwa uiachukuna. Chasaka, Taita Dios i pai-manda ima iachachiskakuna mana kamirispalla kachu-kuna. ² Cristowa iuiarig patrun iukagkunaka mana ni-chukuna: "Nukapa patrun, nukawa waugkindisinami ña kanchi. Chiwanka, paita mana uiasa". Chasapaka iuiarichukuna, chi patrunkuna Cristowa iuiarig kuiaska waugkindisina kagtakuna. Chasa iuiarispaka, mas alli-lla rurachukuna. Chi niskakunatami iukangi, sinchi iuiachispa iachachinga.

Taita Dioswa suma iuiarispaka, iapa iukagsinami kan-chi

³ Maikanpas, Iaiá Jesucristopa alli suma rimaikunawa i Taita Dioswa iuiaringapa iachachiskakunawa iuiar-ingataka, sug rigcha iachachigkunaka, ⁴ atun tukuspa, "Iachami kani" iuiarispaka, ñi imapi allilla iuiaita mana iukankunachu. Chi runakunaka, ima rimaipipas mas-

karinkunami, sugkunawa ainichirinakuspa ningapa: "Kam rimaskaka, mana allilla kanchu". Chimandami kasa mana allilla tukugsamú: sugkunata jiru iuiaiwa kawangapa; piñachirinakungapa; kaminakungapa; mana allilla sugkunamanda iuianakungapa; ⁵ sutipa kaskata sakispa, jiru iuiagpura piñachirinakungapa, mana tukurinkama. Chasakuna iuiankunami, Taita Dioswa iuiarispaka, iapa kulki iukag tukugsamungapa kagtakuna. Paikunapagmandaka anchuringi. ⁶ Taita Dioswa suma iuiarispaka, mana ñi ima iukaspapas, iapa iukagsinami kanchi. Chasaka, Taita Dios ima karas-kallawa allillami kaugsasunchi. ⁷ Nukanchi tiagsamu-ura, ñi imawa mana chaiagsamurkanchichu. Chasalla-ta, wañuura, ñi imapas mana apaspa ringapa kanchi-chu. ⁸ Mikungapa i katanga churaringapa tiachu: chi-kunallowami iukanchi kuntintarispa kanga. ⁹ Ikuti iapa iukangapa iuiarispaka munagkunaka, manami pudinga-pa kankuna, chasa iuiaikunata sakingapa. Tugllapisina urmaspa, wagglichirinkunami. Iapa upasina, tukui iukangapami munagsamunkuna. Chasa iuiailawa kas-kakuna, diltudupami waggllirispaka puchukarinkuna. ¹⁰ Kulki iapa kuiaspa munag, tukui mana allillapi urmachigmi ka. Sugkunaka, kulkillawa iapa iuiaspa, Cristowa iuiariskata sakispa, sug mana alli ñambitami rigsina rurankuna. Chasaka, iapa llakii iukaspallami kaugsankuna.

Timoteo ima rurai iukaskamanda

¹¹ Kamka, Taita Diospa runa kaspa, tukui chi jiru iuiai-kunamanda anchurispaka kaugsangi. Taita Dios ima munaskata ruraspaka, paita suma iuiarispaka, Cristowa tukui iuiariskata mana sakispalla kaugsakungi. Chasa-llata, tukuikunata kuiaspa, mana piñanakuspalla, mana atuniachirispalla iuiaipi kangi. ¹² Cristomandalla iuiarispaka tukuipi binsispa kangi. Mana puchukariduru suma kaugsaita, ñujalallapas kichui tukungi! Chi kaug-saita iukangapami Taita Dios kamta kaiarka. Chasa-mandami, achkakunapa ñugpa ladu, kam Cristowa tukuskata allilla willarkangi.

¹³ Taita Dios tukuita kaugsai karagpa ñawipi i Jesu-cristopa ñawipi kasami niiki. (Kikin Jesucristopas, Pon-sio Pilatospa ñawipi kikinmanda tapuchiura, allillami willarka.) ¹⁴ Nuka ima niskata allilla ruraspaka kaugsangi, mana pandarispalla. Chasa kaugsagpika, kamta mana chaiangachu, ñi imapipas piñai tukungapa. Chasa ruraspaka kaugsangi, nukanchi Iaiá Jesucristo ikuti samunkama.

¹⁵ Taita Dios kikin munaska punchami Jesucristota ikuti kachamunga. Pai Taita Diosmi ka suglla, tukuipi iapa suma pudig. Atun mandagkunamanda i iaiá mandagkunamandapas mas iaiami ka. ¹⁶ Paillami ñi imaurapas mana wañungapa ka. Mana pipas chaian-gasina punchapimi kaugsá. Paita, ñi maikan runa mana kawaska kanchu. Pai, ñi ima mana kawarigmi ka. Tukuikuna imaurapas paita kuiaspa nisunchi: "Kam, diltudupa tukuikunamanda mas atun mandag-mi kangí". Chasa kachu.

Iapa iukagkunata iuiachiskamanda

¹⁷ Kai alpapi iapa iukag runakunata nipuai, mana iapa atuniachiriska iuianakuchu; kaipi tukurig iukaskunallawa mana iuiarinakuchu; kaugsag Taita Diosllata iuiaripa kaugsanakuchu. Taita Diosmi tukui puchugta kará; chikunawaka, nukanchi allilla kaugsangapa. ¹⁸ Chi iapa iukagkuna, tukuipi allilla rurachukuna. Chi ruraskakunawami, Taita Diospa ñawipi iapa iukagsina niraiangakuna. Mana michaspalla, ima iukaskata karaspa kachukuna. ¹⁹ Chasa ruragkunaka, saiachingapa wasi muruchu rumikuna kagsinami

suma luarpi iukangakuna. Chiwanka, sutipa mana puchukaridiru suma kaugsaitami taringakuna.

Kaiakama, niskamanda

²⁰ Timoteo, kamta mingaskata allilla kawangi. Kai alpamandalla ianga parlukunata mana uiangi. Chasallata, llullaspa alli iachai kagta sug rigcha sug rigcha iachachiskakunata mana tuparingi. ²¹ Sugkunaka, chi iachachiskakunata katispa, Cristowa iuiariskata sakispa, sug mana alli ñambitami rigsina rurankuna.

Taita Dios, kamwa kagkunata sumaglla kawapuachu.

2 TIMOTEOTA

1 Taita Dios nukata munawaskamanda, Jesucristo kachamuwaskami kani; chasaka, paipa suma kaugsaita Jesucristowa karangapa niskamanda Alli Willaita willaspa puringapa. ² Kam Timoteotami kai karta kachaiki. Kam, nukapa kuiaska wambrasinami kapuangi. Taita Dios i nukanchipa Iaia Jesucristo, kamta kuiaspa, kammanda llakispa, suma iuiaiwa kawapuachu.

Cristomanda willai iukaskamanda

³ Nuka, tuta i puncha Taita Diusta mañaspa, kammanda imaurapas iuiarisa, Pai Siñurmi nini. Imasami nukapa ñugpamanda taitakuna, Taita Dios imasa niskasina rurarkakuna: chasallatami nukapas, tukuipi suma iuiaiwa pai ima niskata ruraspa kaugsakuni.

⁴ Nuka kambagmanda llugsikuura, kamba wiki wakaskatami iuiariwá. Chimandami askurinti munakuni, kamta kawangapa; chasaka, alli iuiachiwangapa. ⁵ Kam Cristowa sutipa suma iuiarigtapasmi iuiarini. Ñugpaka, kamba achala mama Loida, nispaka kamba mama Eunisemi chasa Cristowa suma iuiarisa karkakuna. Kammandapasmi iuiani, paikunasinallatata Cristowa suma iuiarisa kagta.

⁶ Chasa kaskamanda, kasami niiki: kamta nuka maki churaura, Taita Dios karamuska; chi karamuskataka masmi kamba iuiapi kaugsachirii iukangi. ⁷ Mana sugkunata manchaiwa kaugsangapami Taita Dios paipa Ispirituta nukanchita karamurka. Paipa iapa iachaita iukaspa, tukuikunata kuiaspa, tukuikunawa alli iuiaiwa kaspaga kaugsangapami Santu Ispirituta karamurka.

⁸ Chasa mana manchaspallami nukanchipa Iaia-manda iukangi willanga. Nuka paimanda wichkaraiagpipas, mana mancharikungi. Chasapaka, kamtapas Alli Willaimanda llakichigpika, nukasinallatami iukangi pasanga. Taita Diosmi kamta paipa iapa iachaita karanga, ima llakiikunapas chaigpika, alli iuiachiwa kangapa.

⁹ Taita Dios kikinmi nukanchita kispichispa agllarka, paimandalla kaugsangapa. Nukanchita mana agllarkachu, nukanchi ima allilla ruraskamanda. Pai kikin imasa munaskasinami nukanchita iapa kuiaspa agllarka. Kai alpa manara tiaskauramandatami, Jesucristomanda iuiaspa, nukanchita iapa kuiarka. ¹⁰ Kunaura, Jesucristo nukanchita kispichig samuskawami chi kuaiaita kawachigsamurka. Jesucristomi wañuita binsigsamurka. Alli Willaiwa willaspa, mana wañudiru suma kaugsaitami iachachigsamurka, nukanchipas taringapa.

¹¹ Chi Alli Willaita willaspa puringapami Jesucristo agllaska kachamuska runa kani. Chasami nukata chaiawaku, chi Alli Willaita allilla iachachingapa. ¹² Chi-ta willagmandami kaipi llakiwa pasakuni. Chasa kagpipas, nuka iachaniami piwa iuiarikugta. Chimandami mana manchaiwa kani. Kasapasmi paimanda iachani: pai Alli Willaita mingawaskata, pai kikin samunkamami iuká kawanga.

¹³ Imasami nuka, kamta allilla rimaikunawa iachachirkaiki: chasallata kaugsangi. Jesucristowa suma iuiarisa, tukuikunata kuiaspa kaugsangi. ¹⁴ Santu Ispiritu nukanchiwa sugllapi kaugsagwa, Taita Dios paipa Alli Willai mingaskata suma kawangi, mana sug rigcha tukungapa.

¹⁵ Ñami iachangi, Asia alpamanda tukui nukawa kagkuna nukata sakiwagtakuna. Paipura kankunami Fijelo i Ermójenes. ¹⁶ Waugki Onesiforollami achka biaji kawawagsamurka. Paimi nukata alli iuiachiwagsamurka. Chimandami Iaia Jesusta nini: paipa wasipi kaugsanakuskata sumaglla kawapuachu. Paika, nuka wataska wichkaraiaskamanda iachaspaka, mana ñi imapas mancharirkachu. ¹⁷ Chasapaka, Romama chaigsamungallawa kallarikami, mana samaspalla maskawangapa, tariwankama. ¹⁸ Tukurii puncha chaia-muura, Iaia Jesús paimanda llakirisa suma kawapuachu. Ñami iachangi, Efeso puiblupipas pai ikuti ikuti nukanchita aidagta.

Jesucristopa alli suldadusina kaskamanda

2 Kam nukapa wambrasina kagmandami niiki: Jesucristo kamta suma kuiakuskawami iukangi sinchi muruchu tukunga. ² Achkakunapa ñawipi nuka iachachiskata uiawarkangi; chi iachachiskataka Cristomanda tukuipi allilla rurag iachachii pudigkunata ni-puangi, paikuna sugkunata iachachichukuna.

³ Kamka, Jesucristopa alli suldadusina kaspaga, iukangimi tukui llakiikunata chaskinga. ⁴ Ñi maikan suldadu tukuska mana iukanchu, mana suldadukunapa iuiaita chapuringa. Iukanmi, paita mandag ima niskallata ruranga. ⁵ Chasallata, maikan pugllagpas pugllangapa chaikasina mana pugllagpika, pri-miuta manami chaskinga. ⁶ Chasallata, maikan saikugta tarpug pudinmi, ñugpa pallagranga. ⁷ Chi nuka rimaskataka allilla iuiaripuai. Iaia Jesusmi iuiai karanga, kam tukui ima niraiaskata iachangapa.

⁸ Jesucristomanda iuiaringi. Paipa ñugpamanda achala taita, atun mandag Davidmi karka. Pai Jesucristo wañuspa, pai kikinmi kaugsarirka. Chi paimanda

Alli Willaitami nuka willakuni. ⁹ Nuka chasa willakuska-
mandami kaipi wataska chariwanakú, wañuchidurta-
sina. Ikuti Diospa Rimaika mana wataska kanchu.

¹⁰ Chimandami Taita Dios agllaska runakunamanda
tukui llakiita chaskikuni; chasaka paikunapas, kispri-
rispa, Jesucristowa mana puchukariduru suma pun-
chapi chaiagringapa.

¹¹ Kai niraiaskaka, sutipami ka:

Nukanchi paiwa sugllapi wañuska niraiagpika,
paillawantami kaugsaringapa kanchi.

¹² Paimanda llakii iukagpika,
paiwa sugllapimi kagringapa kanchi, mandangapa.
“Paita mana rigsinichu” nigpika,
paipasmi nukanchimanda chasallata ningapa ka.

¹³ Nukanchi paimanda kungarigpipas,
paika nukanchimanda mana kungarinchu.

Pai ima niskata,
pai kikin mana pudinchu:

“Mana chasa ruraspa” ningapa.

Diospa ñawipi, allilla rurag kawariskamanda

¹⁴ Chi niraiaskata iuiachipuui. Diospa ñawipi nipuai,
ianga rimai niraiaskakunamanda mana ainichirina-
kuchu. Chi ainichirinakuskaka, ñi imapa manima allilla
kanchu. Chi uiagkuna allilla iuianakuskatami pandachí.

¹⁵ Kamka, mana sakirispallami sinchi iuiui iukangi;
chasaka, Diospa ñawipi allilla rurag kawaringapa.
Chasa allilla ruraspami ñi imapipas mana mancharis-
palla kankangi. Sutipa Suma Rimaika imasa niraiaska-
sina allilla iachachipuui.

¹⁶ Kai alpamandalla ianga parlukunata mana uia-
kungi. Chasa rimagkunaka, mailla mailla Taita Diusta
mana manchagmi tukunkuna. ¹⁷ Chasa pandachispa
iachachigkunaka, uiagkunata ismuchigsinami ruran-
kuna. Chasa iachachigpura kankunami Imeneo i Fileto.
¹⁸ Paikunaka, sutipa Alli Willaita sakispami llullaspa ni-
nakú: “Cristowa tukuskakunaka, ñami kaugsariska
kanchi”. Chasa rimaikunawami sugkuna Cristowa iuia-
rigkunata pandachinakú. ¹⁹ Chasa ninakugpipas, Taita
Dios kikin willaskaka wasita kallariska suma rumipi
saichiskasinami ka, ñi pipas mana kuiuchingasina.
Chipika, kasami willaraiá:

Atun Taita Dioska,
paipa kaskakunata
allillami rigsí.

Kasapasmi willaraiá:

Tukuikuna Jesús nukapa iaia kagta iuiarigkunaka,
jiru iuiiakunata sakichukuna.

²⁰ Kasapas. Atun wasipi mana tianchu kurita i kulkita
ruraska upiadirukunalla. Kaspita i alpata ruraskakuna-
pasmi tia. Chikunaka kankunami: sugkunaka, atun
punchakunapalla; ikuti sugkunaka, imaurapipas.

²¹ Nukanchi atun punchapasina kangapa chaianmi,
tukui jiru ruraikunata sakispa kaugsangapa. Chasaka,
Iaia Jesuspalla kaspera, paimandalla allipimi kasunchi.
Tukuipi allilla rurangapa allichiskasinami kasunchi.

²² Musukunapa mana allilla iuiui munaikunata anchu-
riskasina kaugsangi. Alli ruraspas, Cristowa suma iuia-

rispa, alli kuiaspa, sumaglla kaugsangi. Iaia Jesusta
tukuipi suma iuiuiwa mañagkunawa sugllapi kangi.
²³ Ianga upasina rimanakuskata mana uiakungi. Ñami
iachangi, chasa rimanakuskamanda piñachinakuduru
chiamudur kagta. ²⁴ Iaia Jesuspa lutrinsina mana
iukanchu, ñi piwapas piñachinakuspa kaugsanga.
Chasapaka iukangimi, tukuikunawa alli kanga, tukui-
kunata allilla iachachinga i tukuikunawa mana piñana-
kuspalla iuiuiwa kanga. ²⁵ Kamta piñagkunata rima-
ngapa chaiaura, mana atuniachirispalla iuiiachingi-
kunata. Chasa iuiiachigpika, Taita Dioska paikunata
pudinmi karanga, paiwa tukugsamuspa, sutipa Alli
Willaita iachagsamungapa. ²⁶ Chiwanka, paikuna
pudinkunami, rigcharigsina tukuspa, iaia kuku ima
munakuskata rurangapa wataskasina tugllamanda
mitikunga.

Tukurii punchakuna, imasa runakuna kaugsangapa kaskamanda

3 Kasapas iachapuui: tukurii punchakuna chaimu-
uraka, iapa llakii punchakunami chaimungapa
ka. ² Chi punchakuna kaugsanakugka, kikinkuna-
mandalla iukangapa iuiuiwa, iapa kulkita kuiaspa
munaiwami kangapa kankuna. Chasakunaka, atunia-
chirispas, nirispami kankuna: “Nukami tukuikuna-
manda mas kani”. Taita Diusta kamispami rimangapa
kankuna; taitata i mamata mana uiangapa kankuna-
chu; mana “Pai” nispallami kangapa kankuna; Taita
Diusta mana manchangapa kankunachu; ³ ñi pitapas
mana kuiangapa kankunachu; piñanakuspaka, mana
kungarigkunami kangapa kankuna; iangami pitapas
juchachispa kangapa kankuna; jiru iuiiakunata mana
arkangapa pudingapa kankunachu; ima kawariskata
puchukaspami ringapa kankuna; tukui allilla kaska-
kunatapasmi puchukangapa munangapa kankuna;
⁴ pitapas llullaspa apichispami munangapa kankuna;
mana iuiarispallami imapas rurangapa kankuna; atun-
iachirispas iuiaspami kangapa kankuna. Taita Diusta
munangataka, kikinkunamandallami iuiarispas kanga-
pa kankuna. ⁵ Taita Dioswa kagsinami kawaringapa
kankuna. Nigpika, kikinkunapa ruraikunawaka mana
chasa kagta kawachinkunachu.

Chasakunataka sakingi, anchuringi, ianga kawangi,
paikunawa mana kangi. ⁶ Paipuramanda sugkuna,
wasikunama llullachispa iaikuspa, mana iuiuiug pan-
darii iukaska warmikunatami maskankuna; chi warmi-
kunaka, sug rigcha sug rigcha jiru munaiwa aliui
tukuskasina kaspera, ⁷ iachaikui iachaikui apakugpipas,
sutipa Alli Willaita mana imaurapas iachagsamungapa
kankunachu. ⁸ Imasami Janes i Jambres, jiru iachakuna
kaspera, mana munarkakuna Moiesta uiangapa: chasa-
llatami chi llullachig runakuna, sutipa Alli Willaita
mana uiangapa munanakú. Iapa jiru iuiiakunami
iukankuna. Taita Dioswa kagsina kawarispapas, ianga
sug rigchami iuiarinakú. ⁹ Chasa pandachigkuna,
mana iapa unaiangapa kankunachu. Imasami chi Moi-
sesta iskai mana munagkuna, upasina kawachirirka-

kuna: chasallatami chi pandachigkuna, tukuikunapa ñawipi upasina kawachiringapa kankuna.

Timoteota ima rurangapa, San Pablo mingaskamanda

¹⁰ Kamka, allillami iachangi, nuka imasa iachachikuskata, imasa kaugsakuskata, imasa iuiakuskata, imasa Cristowa suma iuiaripa kaskata, imasa sugkunawa mana piñanakuspalla kaskata, imasa sugkunata kuiaspa kaskata, imasa allillata charirig kaskata, ¹¹ imasa jiru iuiaiwa kalpachii tukuskata; imasa iapa llakiikuna iukaskatapasmi allilla iachangi. Kammi iachangi, imasami Antiokia, Ikonio i Listra puiblukunapi nuka iapa llakiikuna iukaspa, kalpachii tukurkani. Tukui chikunamanda, Iaia Jesusmi kispichiwarka. ¹² Jesucristomandalla sumaglla kaugsangapa munagkunata, tukui kunatami jiru rurangapa munangapa kankuna. ¹³ Chi jiru pandachispa ruragkunaka, mas jiru mas jirumi ruraspalla kangapa kankuna. Sugkunatami pandachingapa kankuna. Paikunatapas, sugkunami pandachingapa kankuna.

¹⁴ Kamka, ima Cristomanda iachaikuspa iuiakuskata mana sakispalla kaugsangi. Allillami iachangi: pikunami kamta iachachirkakuna. ¹⁵ Wawa kauramandatami Diuspa tukuipi iapa alli Rimaita iachaikuska kangi. Paipa Rimaiwa pudirinmi, allilla iachaikuspa, Jesucristowa suma iuiaripa, kispiringa. ¹⁶ Tukui chi rimai-kuna, Taita Dius kikin iuiachiskawa ruraskami ka. Paipa Rimaiwa allillami ka iachachingapa i mana alli ruragkunata iuiachingapa; chasaka, mana allilla ruraikunata sakichukuna. Chasallatami alli ka iachachingapa, Taita Dius ima munaskata ruraspa kaugsanakungapa. ¹⁷ Chasaka Taita Diuspa runakuna, suma iuiachiska i allilla iachachiskami kangakuna, tukuipi allilla ruraspa kaugsangapa.

4 Taita Diuspa ñawipi i Iaia Jesucristopa ñawipimi kasa niiki. Pai Jesucristomi samungapa ka, kaugsakunata i wañuskakunatapas ima ruraskakunamanda iuiachispa kawachingapa. ² Diuspa Rimaita allilla iuiachispa, munanakuskata i mana munanakuskatapas willangi. Imaurapas iachachingi, mana piñaspalla. Mana allilla ruraskakunata sumaglla iuiachingi. Mana sambaiaspalla, tukuikunata rimangi, allilla kaugsachukuna. ³ Allilla iachachiikunata mana uiangapa punchakuna, ñallami chaiamungapa ka. Chi mana uiagkunaka, kikinkuna imasa munaskasina achka iachachigkunatami maskangakuna, pai kikinkuna ima munaskallata iachaikungapa. ⁴ Sutipa Alli Willaita mana uiaspa, munangapami kankuna, ianga parlukunallata uiangapa. ⁵ Ikuti kamka, mana iapa urdimal kangi. Ima llakii chaiagpika, upalla kangi. Alli Willaita willaspalla kangi. Kam tukui rurangapa chaiaskata allilla ruraspa kangi.

⁶ Nukata wañuchiwangapa puncha ñami chaiamuku, chiura Taita Diusta karagsina tukuspa, paita alli iuiachingapa. ⁷ Alli Willaita willaspa, alli suldadusinami kunankama kani. Kalpakuskasinapi chaiangapa kaska-

ma ñami chaiakuni. Jesuswa suma iuiariskata mana sakispallami kunankama kaugsakuni. ⁸ Chasa allilla kaugsakuskamanda, ñami llaughtu allichiska suiawaku. Chi llaughtutaka, Iaia Jesusmi, pai samug puncha iukachiwagsamungapa ka. Paimi ka imasa chaiaskasina justisiai rurag. Chi llaughtutaka mana nukallata karawagsamungapa kanchu. Maikan pai samungapa puncha chaiangapa suianakuskatapasmi chasallata karagsamungapa ka.

Timoteo ima rurai iukaskamanda

⁹ Imasa ruraspapas, utkalla samui, nukata kawawangapa. ¹⁰ Waugki Demaska, sitawaspami rirka Tesalónika puibluma. Kai alpapi tiaskakunallatami pai mas munarirka. Waugki Kreskenteka, Galasia alpamami rirka. Waugki Titoka, Dalmasia alpamami rirka. ¹¹ Waugki Lucasllami nukawa ka. Kam samuura, waugki Marcosta pusamuwangi. Paipas allillami tukuwanga, nukawa Alli Willaita willangapa. ¹² Waugki Tikikotaka Efeso puiblumami kacharkani. ¹³ Kam samuura, Troas puiblupi waugki Karpopa wasipi nuka sakiska churaridiruta i librukunata apamuwangi. Chimandaka, iskribiraiaska karakunata mana kungarispalla apamuwangi.

¹⁴ Alejandro iruta imapas ruragka, nukata jirumi rurawarka. Pai ima ruraskamanda, Iaia Jesusmi llakiripuanga. ¹⁵ Paimi nukanchi rimaskata: "Chasaka mana kanchu" sinchi nikurka. Chimanda kampas, paita mana rimangi.

¹⁶ Nukata justisiapagma musuglla apawauraka, ñi pipas mana tiarkachu, nukamanda rimapuungapa. Tukuikunami, nukata sakiwaspa, rirkakuna. Nuka nini-mi: paikunataka, Taita Dius mana imapas piñapuachu. ¹⁷ Iaia Jesusmi, nukawa sugllapi kaspera, tukuipi animu karawarka. Chasawami Alli Willaita nuka allilla willarkani, tukui mana judíu kagkunapas uiangapa. Chi puncha, wañuchiwangapa ninakuskamandami Iaia Jesús nukata kispichiwarka. ¹⁸ Tukui mana alli runakunamandapasmi kispichiwangapa ka. Michawangapami ka, sug luarpi pai suma mandakuskapi nuka chaiagrinkama. Pai Jesusta imaurapas nisunchi: "Kam, iapa suma atunmi kangi, maituku waranga waranga watakuna ialigpipas". Chasa kachu.

Kaiakama, niskamanda

¹⁹ Pani Priskata, paipa kusa Akilata i waugki Onesiforopa wasipi tukui kaugsanakuskata: "Puangi" nipuai. ²⁰ Waugki Erastoka, Korinto puiblupimi chisiaku. Waugki Trofimotaka Mileto puiblupi ungugmi sakirkani. ²¹ Kamka, utkalla samui, manara tamia punchakuna chaiamugpi. Eubulo, Pudente, Lino, Klaudia, tukui sug waugkindikuna i panikunapasmi kamta: "Puangi" nakú.

²² Iaia Jesús, kamwa kachu. Taita Dius, kamwa kagkunata sumaglla kawapuachu.

TITOTA

1 Nuka Pablo, Taita Diospa lutrinsina, Jesucristo kachamuskami kani, Alli Willaita willaspa puringapa; chasaka, Taita Dios agllaskakuna paiwa suma iuiaringapa; chiwanka, chi sutipa Alli Willaita iachagsamuspa, paita iuiarispas kaugsangapa. ² Chasa kaugsaspaka, mana puchukariduru suma kaugsaita iukan-gapami suianakunchi. Kai alpa manara tiagpitami Taita Dios, mana llullag kaspas, nukanchita chasa karangapa nirka. ³ Kunaura, Taita Dios niska punchami chaiarka, paipa Rimaita willangapa. Chasa willangapaka, Taita Dios nukanchita kispichigmi mingawaspa kachamuwarka. ⁴ Kam Titotami kai karta kachaiki. Kamka, nukasinallatata Jesucristowa suma iuiarispas, nuka kikinpa wambrasinami kapuangi. Taita Dios i Jesucristo nukanchita kispichig, kamta kuiaspa, suma iuiaiwa kawapuchu.

Kreta alpapi, Tito ima rurai iukaskamanda

⁵ Kasamandami kamta Kreta alpapi sakirkaiki: chipi kaugsanakuskata alli ruraikunata mas suma iuiachispas iachachingapa. Tukui puiblukunapi Cristowa tukuskapura iachachig taitakunata agllangapapasmi sakirkai-ki; imasami nuka mingarkaiki: chasa.

⁶ Iachachig taitakunaka iukankunami kanga ñi imapi-pas mana piñai tukungasina. Sug warmillawa kaugsachukuna. Paipa wambrakunaka, Cristowa suma iuiarigkuna kachukuna. Mana pipas paikunamanda nichukuna: “Mana alli runakunami kankuna; taitata mana uiagkunami kankuna”. ⁷ Maikanpas iachachig taita kaskataka, Taita Dios tukui Cristowa tukuskakunatami mingaska ka. Chimandami paita chaiá, ñi imapi-pas mana piñai tukungasina kangapa. Mana kachu paipa iuiailawa rurag, maituku sugkuna: “Mana rurakuchu” nigpipas. Mana kachu rabiari-g, machangichu, piliari-g, imasapi-pas kulki mirachingapa iuiaila kag. ⁸ Chasapaka iukanmi, wasima pipas chaiagriskata: “Iaikui” nidur kanga, imapi-pas allilla ruraita iuiaspalla ruranga, tukui-kunawa allilla iuiaiwa i tukui-pi alli kanga, Taita Diosmandalla kaugsanga, ima jiru iuiarispas munai apigpipas, chita mana ruraspalla. ⁹ Diospa sutipa Rimaita iachachiskataka mana kungaris-pallami iuká kaugsanga; chiwanka, sugkunata suma iuiachispas, allillata iachachingapa; chasallata, maikanpas: “Diospa Rimai mana allilla kanchu” ninakuskata allillapi iuiachin-gapa.

¹⁰ Alli Willaita mana uiagkunaka, achkakunami tian-kuna. Judiukunapa marka churachingapa iachachig-kuna, maspasmi mana uiangapa munankuna. Chasa-

kunaka, ianga rimaspami sugkunata pandachinkuna. ¹¹ Chasakunata chaianmi upallachingapa. Paikuna mana allillata iachachinakunchu. Paikuna iachachispami wasipi tukui kaugsagkunata pandachinakú. Chasaka, kikinkunamandallami kulki mirachinakú.

¹² Kretamanda sug willag runa, chi alpapi kaugsanakuskamanda kasami nirka: “Kai Kretapi kaugsagkuna, imaurapas llullaspa, jiru ruraspas, killa wangu mikungapaglla iuiaspami kankuna”. ¹³ Chasa nispa, sutipa kaskatami willá. Chasamanda, paikunata sinchi piñaspas iuiachingi; chasaka paikuna, Cristowa mas suma iuiarigkuna kangapa. ¹⁴ Chiwanka, judiukuna kikinpa iuiai-wa rimanakuskata mana uianakuchu. Ñi sutipa Alli Willaita sakiska kagkunatapas ima niskata runanakuskata mana uianakuchu.

¹⁵ Alli iuiaiwa kagkunaka, tukui-pi alli iuiaiwami kawankuna. Ikuti mana Cristowa iuiarispas jiru iuiaiwa kagkunaka, tukui-pi mana alli iuiailawami kawankuna. Paikunapa iuiapi ima iuiariskapipas, jiru iuiailami tukugsamú. ¹⁶ “Taita Diusta rigsini-mi” nigpipas, mana paita rigsiginami jiru ruraspas kaugsankuna. Chasa kaugsagkunaka, millangasinami tukunkuna. Iapa subirbi kaspami mana pudinkuna, ñi imapas allilla rurangapa.

Allilla iachachiskallata rimangi, niskamanda

2 Kamka, allilla iachachiskallata rimangi.

² Achala runakunata iachachingi, mana iapa urdimal kachukuna; tukuiwa allilla iuiaiwa kaugsanakuchu, ñi imapi-pas mana piñai tukungasina. Cristowa suma iuiarispas, tukui-kunata allilla kuiaspa, tukui-kunawa mana piñanakuspalla kaugsanakuchu.

³ Achala warmikunata chasallata iachachingi, paikuna Taita Diospalla kagkunasina kaugsachukuna, mana pimandapas wasa rimaspalla, mana machaspalla. Chasa sumaglla kaugsaspami pudinkuna, ⁴ mas sipas warmikunata suma iuiachispas iachachinga, paipa kusata i wambrakunata kuiangapa, ⁵ tukui-kunawa allilla iuiaiwa kangapa, tukuiwa alli kangapa, wasipi ima tiaskata ima ministiska ruraspas kangapa i kikinpa kusata suma uiaspas kaugsangapa. Chasa kaugsagpi-kunaka, ñi pipas mana pudingakunachu, Diospa Rimaimanda ningapa: “Mana allilla kanchu”.

⁶ Musukunataka chasallata iuiachingi, tukui-kunawa allilla iuiaiwa kangapakuna. ⁷ Kamka, tukui-pi allilla rurangi. Chasaka sugkuna, kamta kawaspaka, chasallatami rurangakuna. Alli Willaita suma iachachingi, mana urdimal nis-palla. ⁸ Chasallata, imapi-pas allilla ri-

mangi. Chasaka, mana pipas kammanda: “Mana allilla kanchu” ningakunachu. Chasa ruragpika, maikan kamta piñagkunapas, mancharispa, mana pudingakunachu, ñi ima jirupas nukanchimanda rimangapa.

⁹ Lutrinkunata iachachingi, patrunta tukuipi sumaglla uiachukuna. Mana ainirispalla, patrun ima niskata sumaglla rurachukuna. ¹⁰ Sisai kagpikunaka, mana iku-ti sisachukuna. Chasa sumaglla kaugsagpikunaka, Taita Dius nukanchita kispichigmanda iachachiska iapa suma kaskatami sugkunata kawachingakuna.

¹¹ Taita Dius, kikinpa wambrata kachamuspa, paipa suma kuiaitami kawachirka; chasaka, tukui runakuna kispiringapa. ¹² Chi kuiaiwa iachachimukumi, mana allilla iuiakunata i jiru ruraikunata nukanchi sakingapa; chiwanka, tukuikunawa allilla iuiaiwa kaspera, allilla ruraspa, Taita Diusmandalla iuiarispa, kai alpapi kaugsanungapa. ¹³ Kasapasmi iachachimuku: kuntintulla suiungapa, Taita Dius ima niska tukugsamunkama.

Chika niraiami, nukanchipa atun Dius i kispichig Jesucristo sumaglla ikuti samungapa puncha chaiankama. ¹⁴ Pai kikinmi sakirirka, nukanchimanda wañuchii tukungapa; chasaka, nukanchi tukui pandariskakunata kispichingapa. Chiwanka nukanchi, armaskasina limpiulla tukuspa, paipalla runakuna niraiungapa. Chasaka munanakusunchimi, tukuipi allilla ruraspa kaugsanakungapa.

¹⁵ Chasami iukangi, tukui iachaiwa sinchi rimanga i iuiachinga. Mana allilla runanakuskataka iukangimi piñanga. Kamta, ñi pipas mana wabutichu.

Cristowa tukuskakuna, imasa kaugsai iukaskakunamanda

3 Tukuikunata iuiachingi, maikan mandag ima niskata suma uiaspa, ruraspa kaugsanakuchu. Imaurapas iuiapi kachukuna, allilla rurangapa. ² Mana pi- mandapas wasa rimachukuna. Piliaringataka, tukuikunawa mana piñanakuspalla i mana atuniachirinakuspalla iuiapi kachukuna.

³ Nukanchipas, ñugpata upasinami karkan- chi. Taita Diusta mana uiaspallami chingaskasina karkan- chi. Tukui jiru munaiwa, nukanchi alli iuiachiringapa iui- iwa wataskasinami karkan- chi. Parijuma piñanakuspa, jiru iuiaiwa kawanakuspa, tukui jiru ruraspami kaugsan- kurkan- chi. ⁴ Chasa kaugsanakugpipas, Taita Dius nukanchita kispichig, runakunamanda llakirispa, paipa suma kuiaitami kikinpa wambrawa kawachimuspa, ⁵ nukanchita kispichirka. Nukanchi allilla iuiarispa

ruraskakunamandaka, mana; nukanchimanda llakis- pami pai kikin kispichirka. Nukanchipa pandariska- kunata maillaskasinami ikuti tiagsamugsina nirai- anchi. Santu Ispirituwami chi musu kaugsaita iukan- chi.

⁶ Jesucristo nukanchita kispichigmandami Santu Ispi- rita nukanchita achka karamurka; ⁷ chasaka nukanchi, paipa suma kuiaiwa mana pandarig niraiagsamung- apa. Chiwanka suianakunchimi, mana puchukaridiru suma kaugsaita chaskingapa.

⁸ Chi willaika, tukui sutipami ka. Munanimi, kampas sugkunata sinchi rimaspa iuiachingapa. Chasaka Taita Diuswa suma iuiarigkuna, allilla ruraspami kaugsanga- kuna. Chi tukui suma iachachiikunaka, tukuikuna- manda allipami kankuna.

⁹ Sugkuna ianga rimanakuskata mana uiakungi. Chasallata, ñugpamanda taitakuna imasa kagkuna- manda parlukunata mana uiakungi. Moisés rurangapa niska ima niraiaskata paipura ainichirinakuskatapas mana uiakungi. Chi parlukunaka, iangallami rimanakú; ñi pimandapas mana allilla tukunchu.

¹⁰ Maikanpas Cristowa tukuskakunata sugkunawa sugkunawa piñachirinakuskataka sug biaji sug biaji piñaspa, allillapa iuiachingi. Iskaima rimaskata mana uiagpika, kamkunapurapagmanda llugsichingi. ¹¹ Kasa iuiaringi: chasakuna, kikinkunami pandarinakú. Chasa pandariskakunawaka kikinkunami maskarinakú, dil- tudupa ninama sitai tukungapa.

Tito ima rurai iukaskamanda

¹² Waugki Artemasta u Tikikota nuka kambagma kachaura, mana unaiilla Nikópolis puibluma samungi kawawangapa. Chipimi nuka iuiakuni, tamia puncha- kuna ialichingapa. ¹³ Waugki Zenas, justisiakunata nukanchimanda rimagmi ka. Paita, waugki Apolosta- pas, kam masa pudiska aidapuangi. Chasaka, paikuna purinakuura, mana imapas pisingakunatachu.

¹⁴ Nukanchi kikinpura Cristowa tukuskakunapas iachai- kuchukuna, suma ruraspa, ministiskakunata aidanga- pa. Chasa aidagkunaka, allillapami kaugsanakunga.

Kaiakama, niskamanda

¹⁵ Nukawa sugllapi kagkuna, tukuikunami kamta: “Puangi” ninkuna. Cristowa iuiarispa nukanchita kuiag- kunata: “Puangi” nipuai. Taita Dius, tukui kamwa kag- kunata sumaglla kawapuachu.

FILEMONTA

¹ Nuka, Jesucristomanda willaskamandami kai karsilpi wichkaraiani. Waugki Timoteowa kaspera, kam kuiaska nukanchisinallatata willag Filemontami kai karta kachaiki. ² Chasallata pani Apiata, nukanchisina alli suldadusina waugki Arkipota i kamba wasipi tandarisa Cristowa tukuskakunatami kaita kachaikichita. ³ Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

Filemón, Cristowa suma iuiarisa, paita iapa kuiag kaskamanda

⁴ Kam Iaia Jesuswa suma iuiarisa, paita iapa kuiag kaskatami iachani. Chasallata, Taita Diosmandalla tukui kaugsagkunata kam allilla kuiaspa aidaskamandapasmi iachani. Chimanda nuka, imaurapas kammanda nukapa Taita Diusta mañaspa, Pai Siñurmi nini. ⁶ Kasami Taita Diusta mañapuiki: kam nukanchisina Taita Dioswa iuiarigmanda, Cristollatata nukanchita tukui allilla karamuskata kam iachagsamungapa. ⁷ Kam waugki: Pai Siñurmi niiki, Taita Diosmandalla kaugsagkunata kuiaspa, allilla aidapuaskamanda. Chasa iachaspaka, nukapas, kuntintarisa, iapa alli iuiachiwami kani.

Onésimo suti Filemón randiska lutrinmanda mañaskamanda

⁸ Kasapasmi niiki: nuka, Cristo kikin agllawaska kagmanda, kamta ningapami puidiiki, imasa rurangapa chaiagta. ⁹ Chasa pudispapas, kuianakuspami kasa mañaiki. Nuka Pablo, ña rukumi kani. Jesucristomanda willaspa purikugmandami kunaura kai karsilpi wichkaraiani. ¹⁰ Nuka kaipi kankama, waugki Onesimoka, Jesucristowa suma iuiarigsamuspa, nukapa wambra sinami tukugsamurka. Paimandami kamta kasa mañakuiki.

¹¹ Onésimo, ñugpata kamba lutrin kaspera, kamta ñi imapa mana bali karkachu. Ikuti kunaureka, kammanda i nukamandapas iapa suma ruragmi tukugsamurka. ¹² Paita kutichikuikimi. Imasami nukata suma chaskiwantrangi: chasallata paitapas suma chaski-puangi. ¹³ Paita munakurkani, nukawa kidarichu;

chasaka, nuka Alli Willaimanda wichkaraiaspami kankama, kamba kuintapi pai aidawangapa. ¹⁴ Chasa iuiakuspapas, kam manara "Ari" niwankama, mana munanichu chasa rurangapa. Chasaka, kam mana aidawangichu nuka niskamanda. Kam kikin iuiarisa munagpimi chasa aidawangangi.

¹⁵ Onésimo, kamba ladumanda manachar iapa unai-ka anchurirka. Kunauramandaka, imaurapasmi kamllawa kangapa ka. ¹⁶ Kunauramanda, kamba lutrintasina mana charingi. Lutrinmandapas mas allillami kapungapa kangangi. Kuiaska waugki kunauramanda niraingapa ka. Pai, ñami nukapa kuiaska kapuá. Kam, masmi iukangi paita munanga; pai runa kagmandalla, mana; Iaia Jesuswa nukanchiwa pariju iuiarisa kagmanda.

¹⁷ Imasami nukata kamba alli waugkitasina iuiari-wangi: chasallata nukata chaskiwagsina paitapas chaskipuai. ¹⁸ Pai imapipas pandariska kagpi u ima apaska kutichingapa chaiagpika, nukami kutichisaki. ¹⁹ Nuka Pablo, nuka kikinpa makiwami iskribiiki, nispa: nukami kutichisaki. Chasa nispapas, nuka nintraikichar, kamta nukapas dibichiska kagta, Alli Willaita iachachiskamanda. ²⁰ Ari, waugki, kam Iaia Jesuswa iuiarisa, nuka niskata allilla rurapuai. Chasa ruraspaka, Cristopa kaspera, nukata allillami kuntintachiwankangi.

²¹ Nuka niskata kam rurangapa kaskata iuiaspami kai kartata kachaiki. Kam, mana nuka mañaskallata rurangapa kangichu. Mas allilla rurangapa kaskatami iachani.

²² Kasapasmi mañaiki: wasi maskapuai, nuka chaiagriura, chisiagringapa. Kamkuna Taita Diusta mañapuanakuskamandami suiakuni, pai uiaspa, kamkuna-pagma kachawachu.

Kaiakama, niskamanda

²³ Jesucristomanda willaskamanda, nukawa wichkaraiang waugki Epafrasmi kamta: "Puangi" niku. ²⁴ Nukawa Alli Willaita willag waugki Marcos, Aristarko, Demas i Lucaspasmi, "Puangi" ninakú.

²⁵ Iaia Jesucristo, kamkunata sumaglla kawapuachu. [Chasa kachu.]

HEBREOKUNATA

Taita Dios, paipa wambrawa nukanchita willaskamanda

1 Ñugpataka Taita Dios, nukanchipa ñugpamanda taitakunata ikuti ikuti, sug rigcha sug rigcha, Santu Ispirituwa rimagkunawami willadur karka. ² Kai tukurii punchakunaka, pai kikinpa wambrawami nukanchita rimagsamurka. Pai kikinpa wambrawami tukui alpakunata rurarka. Pai kikinpa wambratami tukui kararka. ³ Pai wambami ka Taita Diospa iapa suma luarpi paipa punchawa punchaiachig. Taita Diossina rigchallatatami kawari ka. Pai, tukui pudispa, pai kikinpa rimailawantami tukuita suma charí. Paillatatami, nukanchipa pandariikunata anchuchii ruraspa, suma luarpi iapa atun Taita Diospa alli ladu tiarigrirka.

Taita Diospa wambra, anjilkunamanda mas atun kaskamanda

⁴ Chasaka, anjilkunamanda mas atuniachiskami tururka. Paipa sutipas, paikunapa sutikunamanda mas atunmi ka. ⁵ Ñi maikan anjiltapas, Taita Dios mana kasa nirkachu:

Kam, nukapa wambami kangi.
Nukami kuna pucha kaugsai karaiki.
Kasapasmi ñugpamanda librupi nirka:
Nukami paipa Taita kangapa kani.
Pai, nukapa wambami kangapa ka.

⁶ Paipa suglla wambrata kai alpama kachamuspa, kasami nirka:

Nukapa tukui anjilkuna,
paita kungurispá, nipuangichi:
“Tapa allimi kangí”.

⁷ Anjilkunamandaka kasami ni:

Paipa anjilkunatami kachá,
wairasina pai ima niskata ruragkuna kangapa.
Pai ima niskata sug nina sindi rilampasina mana un-
ailla ruragmi kankuna.

⁸ Ikuti kikin Taita Diospa wambrataka kasami ni:

Kam, Diosllatata kaspá,
diltudupami mandangapa kangí,
maituku waranga waranga watakuna ialigpipas.
Tukui imapipas allilla mandagmi kangí.

⁹ Allikunatami kuiarkangi.

Ikuti mana allikunataka
mana munarkangichu.
Chimandami kamba Taita Dios
kam Diosllatata kaskata agllarka.
Chiwanka, kamta karamurkami,

kamwa kagkunamandapas
mas alli iuiachiiwa kangapa.

¹⁰ Kasapasmi paita nirka:

Kam Taitikumi kallariskapi
kai alpata rurarkangi.
Kamllatatami sug luartapas rurarkangi.

¹¹ Chikunaka, tukuimi puchukaringapa kankuna.
Ikuti kamka, imaurapas kaugsallami kangapa kangí.

Tukui chi wiñaskakunaka,
katanga rukuiaskasinami tukungapa kankuna.

¹² Katangata patarigsinami
rurungapa kangí sitangapa.

Maugka katangata sitaspa,
musu katanga churachigsinami rurungapa kangí.
Chasa rurasapas, kam kikinllatatami kangapa kangí.
Ñi imaurapas mana wañungapa kangichu.

¹³ Ñi maikan anjiltapas, Taita Dios mana imaurapas
kasa nirkachu:

Nukapa alli ladu tiarii,
nuka tukui kamta mana munagkunata apagrispa,
kamba chaki sarudiru ukuma churankama.

¹⁴ Tukui anjilkunaka, ispiritukunallami kankuna, Taita
Dios ima munaskata ruragkuna. Paikuna kachamuska-
mi kankuna, suma luarpi diltudupa kispirigringapa
kagkunata aidag kangapa.

Kispiringapa kaskamanda Alli Willaita mana kungarisunchi

2 Chimandami nukanchita chaiaku, chi Alli Willaita
uiaskata mas suma iuiaringapa; chasaka, sug
ñambipisina rinakuskamanda mana chingagringapa.
² Taita Dios anjilkunawa Moiesta willaskataka, ñugpa-
mandakuna iukarkakunami uiaspa, chi Willaita imasa
niraiaskasina ruragakuna. Maikankunapas chi willas-
kata uiaspa, mana chasa ruragkunaka, imasa chias-
kasinami justisiai tukurkakuna. ³ Nigpika nukanchi
kikinkuna, chi kispiringapa kaskamanda iapa suma Alli
Willaita kungarigpika, ¿imasatak iuiasunchi, Taita Dios
llakiriskamanda kispiringapa kagtakuna? Iaia Jesús
kikinmi ñugpa willarka, nukanchi imasa ruraspa kisp-
iringapa kagtakuna. Chiuramandaka, paita uiagkunami
nukanchita chasa kaskata willagsamurkakuna. ⁴ Taita
Diospas, ujnangasina mana pipas rurangasinakuna-
wami kawachimurka, Jesús sutipa allilla willakugta.
Chimanda, pai imasa munaskasina, Santu Ispirituwami
nukanchita sug rigcha sug rigcha karamú. Chikunawa-
pasmi kawachimú, Jesús sutipa allilla willag kagta.

Jesucristo, nukanchisina runa tukugsamuskamanda

⁵ Taita Dios mana anjilkunata churarkachu, nukanchi rimanakuska musu alpata mandagkuna kangapa.

⁶ Mana kagpika, sug ñugpamanda librupi, maikanchar Taita Diusta kasa nispa willamú:

¿Imapatak runakunamandalla iuiaringi?

¿Imapatak paikunamanda llakingi?

⁷ Manancha unaillapimi paikunata churarkangi, anjilkunamandapas mas uchulla niraiangapakuna. Chasa churaspapas, paikunata iapa suma llaugtuchispami atuniachir-kangi.

⁸ Tukuitami paikunapa chaki ukuma kagsina churarkangi, paikunamandalla kangapa.

Taita Dios, chasa tukuita churaspaka, mana sakirkachu, ñi imapas runakunamanda mana kangapa. Tukui mi sakirka, runakunamandalla kangapa. Chasa kagpipas, kunankama manara kawanchichu, tukui imasa niskasina tukugsamugta. ⁹ Jesustami iuiaipi kawanchi. Paitami Taita Dios manancha unaillapimi churarka, runa tukuspa, anjilkunamandapas mas uchulla kangapa. Taita Dios kikinmi nukanchita iapa kuiaspa munarka, pai Jesús tukuikunamanda wañuchu. Jesús, chasa wañuspaka, kuna iapa suma llaugtuchispa atuniachiskami ka.

¹⁰ Tukui tiaska, Taita Dioswami ka. Tukui, paimandallami tia. Taita Diosllatami muná, achka wambra-kunata paipa suma puncha luarma chaiachigringapa. Chimandami nukanchipa kispichig Jesús kikinta chaiarka, achka llakii nanaikuna iukaspas, wañungapa. Chasawami kawachirka, paipa Taita Dios imasa munakuska-sina tukui allilla ruraspas runa kagta. ¹¹ Pai Jesús, nukanchita tukui pandariikunata anchuchig, i nukanchi kikinkunapas, tukuikuna suglla Taitapami kanchi. Chimandami Jesús mana manchaspalla nukanchita ni: “Waugkikuna” i “Panikuna”. ¹² Chasallatami ñugpamanda librupi willaraiá, kasa Taita Diusta nispa:

Kammanda nukapa waugki i panikunatami willangapa kani.

Kamta suma iuiarigkuna sugllapi kaskakunapa chaugpimandami

suma birsiukuna kantangapa kaiki.

¹³ Kasapasmi niraiá:

Taita Diosllatami suma iuiarispas suiangapa kani.

Ikuti kasapasmi niraiá:

Kaipimi kani,

Taita Dios karawaska wambrakunawa.

¹⁴ Imasami suglla taitapa i mamapa wambrakuna, tukuikuna chi iawarmandallatata kankuna: chasallatami Jesuspas, nukanchisina aichaiug runa tukugsamurka; chasaka, pai wañuskawa, wañuima apakugta bisingapa. Chi wañuima apakugta, iaia kukumi ka. ¹⁵ Wataraiagsina wañuima manchaspas kaugsanakugmanda, tukui paikuna kispirigsina kangapami Jesús wañurka. ¹⁶ Paika mana kai alpama samurkachu

anjilkunamanda. Abrahampa wambra niraiaskakunamandami samurka. ¹⁷ Chimandami iukarka, runa tukuspa, tukui nukanchisinallatata tukugsamunga, waugkindisina kangapa; chasaka pai, tukui ima niskata allilla rurag kaspas, iaia sasirduti nukanchimanda llakig, Taita Diospas ñugpa ladu tukugringapa; chasallata, pai wañuskawa tukuikunapa pandariikunata anchuchingapa. ¹⁸ Paika, iapa llakiimi iukarka, jiru rurangapa iuiaikuna chaiaura. Nigpika, chi iuiaikunata: “Mana” nispami binsirka. Chimandami pudí, maikantapas jiru rurangapa iuiaikuna chaiaskata chi iuiaikunamanda michanga.

Jesús, Moisesmanda mas atun kaskamanda

3 Chimanda, Taita Diospalla kag taitakuna i mamakuna, paiwa suma luarpi kagringapa agllaskakuna, Jesusta suma iuiariichi. Paika, Taita Dios kachamuska iaia sasirdutimi tukugsamurka. Paiwami suma iuiarispas kanchi. ² Imasami Moisés, tukui Israelmanda runakuna Diospas wasisina niraiaskakunamanda tukui imasa Taita Dios munaskata rurarka: chasallatami Jesús, iaia sasirduti kangapa churai tukuspa, Taita Dios tukui ima munaskata allilla rurarka. ³ Imasami chaiá, allilla wasichigta: “Kam ruraska wasimanda mas allimi kangi” ningapa: chasallatami Jesusta chaiá, Moisesmanda mas suma atuniachingapa. ⁴ Maikan wasipas iukanmi, pipas wasichig tianga. Chasallatami nini: tukui ima kawariskaka, Taita Diosmi rurarka. ⁵ Moiseska, Taita Dios ima munaskata ruraglla kaspas, Diospas wasisina tukui niraiaskakunamanda allillami rurarka; chasaka, Taita Dios ima nikuskata willagridur kangapa. ⁶ Ikuti Cristoka, Taita Diospas wambra kaspas, Diospas wasisina niraiaska, pai kikinpa wasipisinami allilla rurarka. Nukanchi tukuikunami Diospas wasisina niraianchi. Paita alli iuiachiwa suma iuiarispas suianakuskata mana sakispami paipa wasisina niraianchi.

Taita Dios agllaskakuna, paiwa samagringapa kaskamanda

⁷ Chiwanka, kasami Santu Ispíritu ñugpamanda librupi willarka:

Kuna puncha,

Taita Dios ima rimaskata

kamkuna uiaspaka,

mana tukungichi mana uiagsina.

⁸ Moiseswa chusa sitaska alpami purigkuna,

Taita Diusta piñarispami nirkakuna:

“¿Ar pudingichu?”;

paikunasina mana tukunakungichi.

⁹ Kamkunapa ñugpamanda achala taitakuna,

chusku chungas watakuna

nuka suma allilla ruraskata kawaspapas,

charami chipi niwarkakuna:

“¿Ar pudingichu?”.

¹⁰ Chimandami chi punchakuna kaugsanakuskawa rabiariwarka.

Paikunamandami nirkani:

“Imaurapas chingaskakunasina mana allilla iuiaspami purinakú.

Nuka munakuskasinaka
mana imaurapas munankunachu ruraspa kaugsangapa”.

¹¹ Chimandami,
paikunawa rabiari spa,
mana llullaspalla nirkani:

“Paikuna ñi sug mana iaikugringapa kankunachu nuka alpa karangapa niskama,
chipi samarigringapa”.

¹² Chimandami niikichita, taitakuna i mamakuna, ¡ujalallapas maikan, mana allilla iuiaspa, Taita Dios kaugsagwa mana suma iuiarisa, anchuriskasina kantrangichi! ¹³ Chasapaka, chara kai luarpi kaugsankama, tukui punchakuna kam kikipura allillapa iuiachinakuspa kaugsanakuichi; chasawaka ñi pipas, mana pandachii tukuspa, subirbi mana uiag tukungapa.

¹⁴ Imasami Cristowa suma iuiariskawa kallariranchi: chasallatami iukanchi, paita mana kungarispa, wañunkama iuiarispalla kangakuna; chasaka, Cristo chaskiskata nukanchipas chaskigringapa.

¹⁵ Chimandami kasapas niraiá:

Kuna puncha,
Taita Dios ima rimaskata
kamkuna uiaspaka,
mana tukungichi mana uiagkuna.

Moiseswa purigkuna Taita Diusta piñarigkunasina mana tukunakungichi.

¹⁶ ¿Pikunatak, Taita Dios rimaskata uiaspapas, paita piñarig karkakuna? ¿Manachu karkakuna Ejipto alpa-
manda tukui Moisés llugsichiskakuna? ¹⁷ Chasallata,
¿pikunawatak chusku chungu wata Taita Dios rabi-
riska karka? ¿Manachu jiru ruraska kagkunawa rabi-
riska karka? Chi chusa sitaska alpapi purinakugka,
tukuimi wañurkakuna. ¹⁸ Chasallata, ¿pikunamandata
Taita Dios mana llullaspalla nirka: “Mana iaikugringapa
kankunachu nuka alpa karangapa niskama, chipi
samarigringapa”? ¿Manachu pai ima niskata mana
uiagkunamanda chasa nirka? ¹⁹ Kasapasmi iachanchi:
Taita Dioswa mana iuiarisa kagmandami paikuna
mana pudirkakuna, chima iaikugringapa.

4 Taita Dios charami nukanchita kaiaku, pai kaska-
ma iaikugrispa samarigringapa. Chimanda, kam-
kunata kaiakuura, uangichi. ¡Amalai maikan, mana
uiaspaka, mana chima iaikugrintrangichi! ² Nukanchi-
pasmi Alli Willaita uiarkanchi; imasami ñugpamanda-
kuna uiarkakuna: chasallata. Paikuna, chi Alli Willaita
uiaspapas, mana munarkakunachu, suma iuiarisa
kaugsangapakuna. Chimandami paikunamanda ñi
imapi mana allilla tukurka. ³ Nukanchika, chi Alli Willai-
ta uiaspa suma iuiarisa kaugsaspami pai kaskama iai-
kugrispa samarigringapa kanchi. Chasallatami Taita
Dios, nukanchipa ñugpamanda achala taitakuna-
manda willarka, kasa nispa:

Chimandami,
paikunawa rabiari spa,
mana llullaspalla nirkani:

“Mana iaikugringapa kankunachu nuka alpa karanga-
pa niskama,
chipi samarigringapa”.

Kasapas. Taita Dios, kai alpata wiñachispa, pai wiñachii
puchukaspaka, ñami samarirka. ⁴ Chasallatami sug
ñugpamanda librupi kanchisma punchamanda willa-
raiá, kasa nispa:

Taita Dios, ña tukui wiñachispaka,
kanchis punchamami samarka.

⁵ Ikutipasmi kasa nirka:

Mana iaikugringapa kankunachu nuka alpa karanga-
pa niskama,
chipi samarigringapa.

⁶ Chasa niraiagpipas, charami alli ka, Taita Dios kaska-
ma sugkuna iaikugrispa samarigringapa. Chi ñugpa-
manda runakuna Alli Willaita uiaskakunaka, Taita Dios
ima niskata mana allilla ruraskakunamandami mana
pudirkakuna, chima iaikugrispa samarigringapa. ⁷ Chi-
mandami Taita Dioska, suurapa sakirka. Chi suuraka,
kuna punchami niraiá. Chasallatami, atun mandag
David sakiska librupi, achka watakunapi willaraiá, ikuti
kasa nispa:

Kuna puncha,
Taita Dios ima rimaskata
kamkuna uiaspaka,
mana tukungichi mana uiagkuna.

⁸ Josué suti Israelmanda runakunata mandag, Taita
Dios alpa karangapa niskama pusaspa samachigrig-
pika, manimami Taita Dios sug samarigringapa pun-
chamanda ni. ⁹ Chimandami chara alli ka, Taita Dios
agllaska runakuna, pai kaskama iaikugrispa samarigringapa.
¹⁰ Imasami Taita Dios, pai ima rurakuskata
puchukaspa samarirka: chasallatami maikanpas, Taita
Dios kaskama iaikugrispa, paipas ima ruraikunata
puchukaspa samarigringapa. ¹¹ Chimanda fuirsarisunchi,
tukuipi alli ruraspa kaugsangapa; chasaka, Taita Dios
kaskama iaikugrispa samarigringapa. Imasami ñugpa-
manda runakuna, mana uiaspalla, Taita Dios ima nis-
kata mana ruraspa karkakuna: ¡amalailapas kamkuna,
chasallata kantrangichi!

¹² Diospa Rimaika, kaugsami ka. Chiwanka, tukui
pudirimi ka. Iskandima afilaska machitisinamanda
mas kuchugsinami ka. Chasaka, alma u ispirituta
chaugpikamasinami iaikú. Runakuna maituku pakalla
iuianakuskipasmi chaiagrí. Tukui imasa nukanchipa
iuiailapi munanakuskatapasmi rigsí. ¹³ Taita Dios kikin
wiñachiskakuna, ñi pipas mana paimanda pakakui
pudingapa kanchichu. Paipa ñawi, tukuipimi allilla
kawaku. Paitami nukanchi tukui ima ruraskata iukan-
chi willarigringapa.

Nukanchipa iaia sasirduti, Jesús kagmanda

¹⁴ Taita Diospa wambra Jesús, suma luarma iaikug-
rispa, nukanchipa iaia sasirdutimi tukugsamurka. Chi-
mandami iukanchi, paiwa suma iuiarisa kanga, mana
sakispalla. ¹⁵ Nukanchi sambaiaska kaura, pai Jesuska,
nukanchipa iaia sasirduti kaspera, nukanchimanda iapa
llakirisa, munanmi aidangapa. Paipasmi, kai alpapi

nukanchisina kaugsaura, tukui pandariikunapi urma-chingasina tukugsamuska karka. Chasa kagpipas, ñi imapi pai mana pandarirkachu. ¹⁶ Chimanda, kuiaska Taita Diospa laduma mana manchaspalla imapas mañangapa tuparisunchi. Chasa mañagpika, paika, nukanchita suma uiaspa, llakirispami kawanga. Chasallata, nukanchi imaurapas ima ministinakuura, nukanchita suma kuiaspa aidangami.

5 Kasapas. Judíu iaia sasirdutikuna, runakunapura-manda agllaskami kankuna; paikunaka, Taita Diospa ñawi ladu runakunamanda kawarigringapa; chipika, paikunapa pandariikunamanda kamarikukunata i animalkunata wañuchispa rupachispa kangapakuna. ² Iaia sasirdutikunatapas mana allilla iuiainakunami cháiá. Chimandami iukankuna, maikan mana iachaspalla jiru ruragkunamanda llakii iukangakuna. ³ Mana allilla iuiaikuna iaia sasirdutikunatapas chaigamanda, runakunapa pandariikunamanda ufrinda rupachispa, pai kikinunapa pandariikunamandapasmi Taita Diusta ufrinda rupachii iukankuna.

⁴ Ñi pipas mana pudincho, kikin atuniachirispas, iaia sasirduti tukunga. Taita Diosmi iaia sasirdutikunata agllá; imasami Moisespa waugki Aaronta agllarka: chasallata. ⁵ Cristo kikinpas, mana atuniachirispas iaia sasirduti tukurkachu. Taita Diosmi paita suma atuniachingapa agllarka, kasa nispa:

Kam, nukapa wambrami kangi.

Nukami kuna pucha kaugsai karaiki.

⁶ Kasapasmi Taita Dios ñugpamanda librupi Cristomanda nirka:

Kam, imaurapasmi mana puchukaringapa sasirduti kapuangi.

Melkisedekpa sasirdutipurami kangi.

⁷ Cristo, kai alpapi kaugsakuura, sinchi kaparispa i wakaspami Taita Diusta sumaglla mañakurka. Kikin Taita Dios, pudigmi karka, wañuita paita kispichingapa. Pai Cristo suma manchaiwa mañaspa kagmandami Taita Dios paita uiarka. ⁸ Cristo, Taita Diospa wambra kaspapas, iachaikurkami, tukui llakii iukaspa, tukui ima Taita Dios munaskata ruraspa puringapa. ⁹ Pai chasa tukui allilla ruraspaka, pai ima munaskata tukui rurasakunata diltudupa kispichigmi tukugsamurka. ¹⁰ Chimandami Taita Dios paita churarka, Melkisedeksina iaia sasirduti kangapa.

¡Ujala Cristowa suma iuiariita kungarinrangichi!

¹¹ Chi Melkisedekmanda achka iachachingapa tiagpipas, kamkuna iapa allimanda iuiai iukagmandami manara pudinchi, kamkunata chasa tukui allilla iachachingapa. ¹² Achka watakunami ña ialiska ka; iukarkangichimi, kamkunapas ña iachachispa kangakuna. Nigpika, kamkunata chaiakumi, Taita Diosmanda ñugpata iachachiskakunata sugkunaka ikuti ikuti iuiachispa iachachingapa. Llullu wawakuna lichilla upianakugsinami chara kangichi. Iukarkangichimi, ña atun wiñaska kagsina tukui mikui mikuspa kangakuna.

¹³ Lichilla upiagsina kagkunaka, chuchug wawakunasinami kankuna. Chasa kagkunaka manara iachaikun-

kunachu, Diospa Rimaipi imasa willaraiaskasina ima allilla u mana allilla kagta. ¹⁴ Ña atun wiñaskakunami pudinkuna, tukui mikui mikuspa kagsina kangakuna. Paikunaka ñami iachankuna, ima allilla u mana allilla kagta.

6 Chimanda, Cristomanda ñugpata iachaikuska-kunata sakispaka, mas iachaikusunchi, nukanchi mas alli iuiapi tukunkama. Ñami kasa iachaikurkangichi: wañuima pusag jiru ruraikunata sakingapa, Taita Dioswa suma iuiaringapa, baugtisaringapa, Cristowa tukuskakunata umapi maki imasa churangapa chaigagta, wañuskakuna kaugsaringapa kaskamanda i diltudupa justisiai tukungapa kaskamanda. Chi ñugpata iachaikusakunata mana ikuti ikuti chasallata iachaikunakusunchi. ³ Taita Dios chasa munagpika, mas alli iuiapi tukusunchi.

⁴ Maikanpas, paipa iuiaikunata punchaiachii tukuspa, Taita Dios karamuskata iachaspa, Santu Ispirituta chaskispa, ⁵ Taita Dios kachamuska Alli Willaita uiaspa iachaspa, samungapa punchakuna ima suma kangapa kaskatapas iachaspa, ⁶ tukui chikunata sakigtaka mana pudiringapa kanchu, ikuti Taita Diospagma tigrachingapa. Chasa sakigkunaka, Taita Diospa wambra ikuti kruspi kikin klabaspa, tukuikunapa ñawipi unzagsinami rurankuna. ⁷ Tamia iakuta alpa chupaskawa, trabajagkunapa tarpuska suma pukuskata pallangapa tukugpika, Taita Dios sumagllami kawá. ⁸ Ikuti mana suma ugsakuna ispinakunalla tukugpika, ñi imapa mana balincho. Chitaka, Taita Dios mana sumagllami kawá. Chikunataka ninama sitangapagllami cháiá. Chasallatami chi runakuna Taita Diusta sakigkunata rurangapa ka.

Cristota suma iuiaiwa suianakuspa, sinchi iuiariskamanda

⁹ Chasa nukanchi rimaspapas, allillami iuianchi, kam kuiaskakuna, suma kaugsanakuspa, diltudupa kispirringapa rinakugta. ¹⁰ Taita Dios, tukuipi alli kaspaka, kamkuna paimanda allilla ruranakuskata mana kungaringapa kanchu. Paita kuiaspaka, paipalla kaskakunatami aidarkangichi. Chasallata kunaaurapasmi aidaspalla kangichi. ¹¹ Chimandami tukui kamkunamanda munakunachi, chasa animullawa tukurii punchakama allilla ruraspalla kaugsanakungapa; chasaka kamkuna, imasa suianakuskasina allilla tukugsamungapa.

¹² ¡Ujalallapas killa wangu tukunakungichi! Chasapaka, imasami sugkuna, Cristowa suma iuiariskata mana sakispalla, Taita Dios ima karamungapa niskata chaskinakú: chasallata kamkunapas, suiaspalla kaugsanakungichi.

¹³ Taita Dioska, mana pipas paimanda mas atun tiagamanda, Abrahamta ima rurangapa niskata munaspa, pai kikintami chi niskata kawag churarka, ¹⁴ kasa nispa: Ari, kamta iapa kuiaspami kawangapa kaiki.

Chiwanka, kamba wambra wambra kati wambra-kunata sakingapami kani, iapa mirachukuna.

¹⁵ Abraham mana sambaiaspalla suma iuiiwa sua-kugmandami, Taita Dios chasa rurangapa niraiaskata rurarka.

¹⁶ Runakuna, “Mana llullanichu” ningapaka, paikuna-manda mas atuntami kawag churankuna. Chasa kawag churagpika, paikuna ima rurangapa niskaka iukankunami chasa tukunga. ¹⁷ Chasallata Taita Dioska, pai ima karamungapa niskata chaskingapa kagkunata sutipa karamungapa kaskata kawachingapami munarka. Nispami nirka:

Nuka kikinmi chi niskata kawag churaspa niiki: karamungapami kaiki.

¹⁸ Taita Dios mana llulla kanchu. Pai ima karamungapa niskata mana pudinchu, ikuti “Mana” ningapa. Kai iskai niskamanda, pai karamungapa niskamanda i mana llullaspalla kagmandami nukanchi, Taita Diusta mañagkuna, iapa sumaglla iuianakunchi, nukanchita kispichingapa kagta. Pai ima karamungapa niskata chaskingapa iuiiwami suianakunchi. ¹⁹ Chasa iuiaspaka, imasami sug atun barku, saiachidiru llasa iruwa chariraiá: chasasinami nukanchipa suma iuiaita sinchi chariraianchi. Chi suma iuiiwami pudiri, Taita Dios kaskapi atun linsu arkaraiaska ukuma iaikugringapa. ²⁰ Chi ukumami Jesús iaikugrirka. Nukanchimandapasmi iaikungapa ñambi rurarka. Diltudupami iaia sasirduti chi ukupi tukurka. Melkisedekpa sasirdutipurami kidarka.

Melkisedekmanda

7 Chi Melkisedekka, Salem puibluta atun mandag kaspera, tukuikunamanda mas atun Taita Diospa sasirdutimi karka. Abraham sug atun mandagkunawa wañuchinakuskapi mitikuchispa paipa wasima kutikura, chi Melkisedekka, tupagrispa, kasami nirka: “Taita Dios, kamta iapa kuiaspa kawapuachu”. ² Chiura Abrahamka, wañuchinakuskapi tukui imapas tandachiskata, chungamandaka sugmi Melkisedekta kararka.

Melkisedek sutika niraiami: “Tukuipi allilla atun mandag”. Salem niraiami: “Sumaglla kaugsai”. Melkisedek, Salemta atun mandag kaspera, niraiami: “Sumaglla kaugsaita karag atun mandag”. ³ Melkisedekpa taita, mama i paipa ñugpamanda achala taitakunamandapas mana iacharinchu pikuna kagta. Pai tiagsamuskamanda i wañuskamandapas ñi ima mana iacharinchu. Chasa kaskamandaka, paika Taita Diospa wambbrasina diltudupami sasirduti niraiá.

Jesús, Levipa wambrakunamanda mas iaia sasirduti kaskamanda

⁴ Iuiariichi chi Melkisedek, atun iaia sasirduti kagta. Paitami Abraham, nukanchipa ñugpamanda achala taita kaspera, wañuchinakuskapi imapas tandachiskata, chungamandaka sug kararka.

⁵ Kasapas. Leví suti Abrahampa wambrapa wambrapa kati wambrakuna, paikunapas sasirdutikunami kankuna. Paikunatami chaiá, Moisés imasa rurangapa

willaraiaskasina, tukui runakunapa ima tiaskata, chungamandaka sug chaskingapa. Chi Levipa wambrakuna, Abrahampa wambrapa wambrapa wambrakuna kaspera, waugkindikuna niraiagpipas, paikunatapasmichasa chaskingapa chaiá. ⁶ Ikuti Melkisedekka, Levipa wambrakunapa wambra mana kaspapas, Abraham ima tandachiskata, chasallata chungamanda sugmi chaskirka. Taita Dios Abrahamta karamungapa niskatami Melkisedek kasa nirka: “Taita Dios, kamta iapa kuiaspa kawapuachu”.

⁷ Mas atun niraiagmi mas uchullata kasa nispa kará: “Taita Dios, kamta iapa kuiaspa kawapuachu”. Chasa bindisagka, mas atunmi ka. Ñi pipas mana sug rigcha ningakunachu. ⁸ Kai alpapi chungamanda sug chaskig sasirdutikuna, wañugkunami kankuna. Ikuti Melkisedekmandaka, ñugpamanda librupi niraiami, kaugsalla kangapa kagta.

⁹ Kasapasmi pudinchi ninga: Leví, chungamanda sug chaskig, Abrahampa wambrapa wambrapa wambra kaspami kikin Melkisedekta chasallata karagsina rurarka. ¹⁰ Abrahamta Melkisedek tupagriuraka, Leví, paipa achala taita Abrahampa kuirpupi kagsinami karka.

¹¹ Levipa wambrakunapa wambrakunatami Israel-manda runakuna, Moisés ima rurangapa willaskata chaskirkakuna iachachingapa. Chi willaskata tukuipi allilla ruraspakaugsangapa pudigpikunaka, manachar chaingapa karka, sug Melkisedekpa sasirdutipura kawarigsamungapa. Chi sasirdutika, Aarón suti Levipa wambrakunapa kati wambrapapura mana kanchu.

¹² Sug rigcha sasirduti trukarigsamugpika, chaianmi Moisés niraiaskapas trukarigsamungapa.

¹³ Nukanchipa Iaia Jesusmandami ñugpamanda librupi chasa sasirdutimanda willaraiá. Paika, Levipa wambrakunapa wambra mana kanchu. Paipa ñugpamanda achala taitapura, ñi pipas sasirduti mana karkachu. ¹⁴ Allillami iacharí, nukanchipa Iaia Jesuska, Judá suti runapa wambrakunapa wambra kagta. Moisés willakuura, mana nirka, chi runapa wambrakunapa wambrakuna, sasirduti kangapa kagtakuna.

¹⁵ Sug Melkisedeksina sasirduti kawarigsamuskawami allilla iachanchi, sug rigcha mandaraiaskapas trukarigsamuska kagta. ¹⁶ Paika, imasa Moisés niskapi maikanpa wambrakunapa wambrakunamanda kaskapi mana sasirduti tukugsamurkachu. Mana imaurapas puchukariduru kaugsai iukaspami kikin sasirduti tukugsamurka. ¹⁷ Kasami, ñugpamanda librupi, Taita Dios paimanda nirka:

Kam, imaurapas mana puchukaringapa sasirdutimi kapuangi.

Melkisedekpa sasirdutipurami kangi.

¹⁸ Ñugpamanda Levipa wambrakuna sasirduti kangapa niraiaska anchuchii tukurka, paikuna mana kispichigkuna pudingapa kagmanda. ¹⁹ Moisés mandaskawaka ñi imapi mana allilla tukugsamurkachu. Chi mandaita anchuchii tukuskawaka, tukuimanda mas allilla chaskingapa iuiiwami ña suianakunchi. Chi suma iuiaita iukaspami Taita Diospagma kaillaianchi.

²⁰ Taita Dios, juraspami Iaia Jesusta churarka, sasirduti kangapa. Ikuti Levipa wambrakunaka, sasirduti tukuspa, pai mana juraskami karkakuna. ²¹ Iaia Jesuska, Taita Dios juraskawami sasirduti tukugsamurka. Chasallatami ñugpamanda librupi willaraiá, kasa nispa:

Atun Taita Dioska jurarkami.

Sug rigchaka mana iuiaringapa kanchu.

Kasami nirka:

“Kam, imaurapas mana puchukaringapa sasirdutimi kapuangi”.

²² Chimandami Jesús, Taita Dioswa runakunawa ikuti sumaglla tukungapa chaugpipi tukugsamurka; chasaka, ñugpamanda iuiarinakuskamanda mas allilla tukungapa. ²³ Levipa sasirdutikunata wañui tiagmandami achka sasirdutikuna tiagsamurka. ²⁴ Ikuti Jesuska, mana imaurapas wañugmi ka. Chiwami pailla diltudupa iaia sasirduti ka. ²⁵ Chiwanka, maikan paiwa Taita Diospagma kaillaiagkunata, pai kikinmi diltudupa kispichingapa ka. Paika, imaurapas kaugsallami kangapa ka. Chasaka, chi kaillaiagkunamandami Taita Diusta mañaspalla kangapa ka.

²⁶ Chimandami Jesusta ministirkanchi, nukanchipa iaia sasirduti kangapa. Paimi tukuipi ñi ima mana pandarig ka. Ñi ima pandariikunapipas mana urmaspalla, tukuipimi alli ka. Paitami Taita Dios, pandarig runakunamanda anchuchispa, suma luar awapi tiarichigrirka.

²⁷ Kasapas. Jesús mana kanchu sug iaia sasirdutikunasina. Chi sug sasirdutikunata tukuipi punchakunami chaiá, ñugpa kikinkunapa pandariikunamanda ufrinda rupachingapa; nispaka, sugkunamandapas. Ikuti Jesuska, sug biasjillami wañurka, ufrindasina kikin tukuspa. ²⁸ Moisés niraiaskapi, pandarig runakunami agllai tukurkakuna, iaia sasirduti kangapa. Chi mandaraiaskata sakiskauramandami Taita Dioska, juraspa, paipa wambrata agllarka, iaia sasirduti kangapa. Paipa wambrata wiñachirkami, ñi imaurapas mana pandarig kangapa.

Dioswa runakunawa mas allilla kangapa, Jesús chaugpipisina tukugsamuskamanda

8 Nuka kamkunata willakuskamanda, kasami mas ministirí iachaikungapa: chi iaia sasirdutika, nukanchimandami ka. Paimi suma luarpi iapa atun Taita Diospa mandadiru alli ladu tiarigrirka. ² Chipika, sasirduti rurangapa chaiaskata pai ruragmi ka. Taita Dios sutipa kaugsadiru wasi ukupimi chasa rurag ka. Chi wasika, runakuna saiachiska mana kanchu. Atun Taita Dios kikinmi chi wasita saiachiska ka.

³ Tukuipi iaia sasirdutikunaka agllaskami kankuna, kamarikukunata i animalkunata rupachispa, Taita Diusta kawachingapa. Chimandami Jesustapas chaiarka, Taita Diusta imapas karangapa. ⁴ Kai alpapi ñami tia Moisés niskapi willaraiaskasina Taita Diusta kamarikukuna kawachig sasirdutikuna. Chimanda Jesús, suma luarma sikangataka chara kai alpapi kagpika, manachar sasirduti ñi imapas pai kantra. ⁵ Taita Dios-

manda iuiariduru linsu wasita Moisés rurangapa karuraka, Taita Dioska paita kasami nirka:

Iuiarii. Imasami chi lumapi kawachirkaiki: chasallatami tukuipi iukangi ruranga.

Chasawaka, sug luarpi suma ruraikuna tiaskamanda kawachigsinallami chi sasirdutikuna kai alpapi Taita Diosmanda iuiariduru wasi ukupi ruranakú. ⁶ Ikuti nukanchipa iaia sasirdutika chaskirkami, Taita Diosmanda tukuipi mas allilla rurangapa. Taita Dioswa runakunawa ikuti sumaglla tukungapa, paimi chaugpipi tukugsamurka; chasaka, ñugpamanda iuiarinakuskamanda mas allilla tukungapa. Taita Dios mas allilla rurangapa niskamandami chasa tukugsamurka.

⁷ Ñugpa iuiarinakuskawaka Taita Dioswa runakunawa tukuipi allilla tukugpika, manachar tiangapa karka iskaima iuiarinakungapa. ⁸ Ñi imapi mana allilla runakuna kaskamandami ñugpamanda librupi kasa niraiá: Atun Taita Diosmi kasa ni:

“Sug punchakunami chaiamungapa ka, Israelmanda i Judamanda runakunawa sug musu iuiaiwa nukawa iuiarinakungapa.

⁹ Paikunapa ñugpamanda achala taitakunata nukapa makiwa Ejipto alpamanda llugsichiura, paikunawa iuiarirkanchi; chasaka mana kangapa kanchu.

Paikunaka, chi suma iuiarispa kaugsangapa niraiaskata mana rurarkakunachu.

Chimandami paikunata sakirkani”.

¹⁰ Atun Taita Dios kasapasmi ni:

“Chi punchakuna ialiskauramanda, kasami nukawa

Israelmanda runakunawa

iuiarinakungapa kanchi:

nuka ima rurangapa niskakunata

paikunapa iuiaipimi churangapa kani.

Paikunapa sungupimi

imasa rurangapa kaskata

iskribingapa kani.

Chasa ruraspaka,

paikunapa Taita Diosmi kangapa kani.

Paikunaka, nuka agllaska runakunami kapuangapa kankuna.

¹¹ Ñi pipas mana iukangapa kankunachu,

rigsidupura u waugkindipura

iachachinakuspa ningakuna:

‘Atun Taita Diusta rigsisunchi’.

Uchulla i atun kagkuna,

tukuikunami rigsiwangapa kankuna.

¹² Nukami paikunata mana allilla ruraskakunata

pasinsiaspa kungaringapa kani.

Paikuna pandariskakunatapas mana ikuti iuiaringapa kanichu”.

¹³ Taita Dios ikuti runakunawa sug musu iuiarinakui-manda willauraka, ñugpata iuiarinakuskaka mana baligsamurkachu; ña rukumi tukurka.

Kai alpapi i suma luarpi Diusmanda iuiariduru wasi-kunamanda

9 Ñugpamanda runakunawa iuiariskapika willaraiarkami, imasa Taita Diusta kunguringapa. Kai alpapi paimanda iuiariduru wasi imasa rurangapa kagtapasmi willarka. ² Chi linsu wasipika, kasami karka. Iaikugridirulla ukuka niraiarkami: "Taita Diuspa uku". Chi ukupika, bila saiachidirumi tiarka. Sug misapasmi tiarka, kamariku tanda churadiru. ³ Iskaima linsu arkaraiaska ukuka niraiarkami: "Taita Diuspalla tukuikunamanda mas alli uku". ⁴ Chipika, insinsu rupachingapa kurita ruraska altar i Taita Diuswa runakunawa iuiarinakuska suti baulmi tiarka. Chi baulpi tukui laduta kuriwa maituskami karka. Chi baulpi tiarkami sug kuri manga; chipika, "maná" suti mikui wakachiska. Aaronpa tawina tugturiska i Taita Dius runakunawa iuiariska iskribiraiaska pamba rumikunapasmi chipi tiarka. ⁵ Chi baul awalla, iskai runakunasina alasiugkunami karkakuna. Chikunaka, Taita Dius suma punchalla kagta kawachigsinami karkakuna. Chikunaka, pandariikunamanda animalkunapa iawar tallichidirutami alaskunawa kilpagsina sumbraiachig karkakuna. Chikunamandaka, kunaora mana chaiawanchu, mas rimangapa.

⁶ Chikuna ña chasa allichiska kaura, sasirdutikunaka iaikugridirulla ukumami tukui punchakuna iaikunkuna, imasa chaiaskasina Taita Diusta kungurispa mañangapa. ⁷ Ikuti iskaima ukumaka, iaia sasirdutillami wata watapi sug biajilla iaikui iuká. Chima iaikungapaka, animalkunapa iawarta apaspami iaikú. Kikin mana iachaspalla pandariskakunamanda i sug runakuna mana iachaspalla pandariskakunamandapasmi chi iawarta Taita Diusta karagsina kawachigrí.

⁸ Chasakunawaka, Santu Ispíritu kasami nukanchita iachachí: chi ñugpata wasi chara tiagpika, Taita Diuspalla tukui-manda mas alli ukuma manara alli ka iaikungapa. ⁹ Chi tukui tiaskakunaka niraiami, kuna punchakunamanda runakuna kawaspa, "Taita Diuspaggi chasacharka" iuiaringapaglla. Taita Diusta chipi kawachiska kamarikukunawa i animalkuna rupachiskakunawa, paita kungurigkunata mana pudirinchi, chikunallawa pandariikunata anchuchii tukungapa. ¹⁰ Chi niskakunawaka, ima mikungapa, ima upiangapa, suma armaspa kuirputa maillarigsinallami willaraiá. Chikunaka, Taita Dius sug rigcha rurankamallami balirkakuna.

¹¹ Kunaora Cristoka, ñami kawarigsamurka. Pai, iaia sasirduti kaspami tukui allita apamurka. Taita Dius kaugsadiru wasi, suma luar ukupimi pai iaia sasirduti ka; chi wasika, tukuikunamanda mas suma allillami ka. Chi mana kanchu runakuna ruraska wasi. Kai alpamanda mana kanchu. ¹² Taita Diuspalla kaska ukumami Cristo iaikugrirka. Mana chi ukuma iaikugrirkachu, kabritupa ñi wagrapa iawar apaspa. Pai kikinpa iawar kruspi ichachiskawami iaikugrirka. Sug biajillami chi ukuma iaikugrirka; chasaka, nukanchita tukui pandariskakunamanda diltudupa kispichingapa.

¹³ Kari wagrapa i kabritupa iawarta pandarig runakunapa awasinamami shabimachidur kankuna. Chasallata, warmi wagrata altarpai rupachispa, chi uchpata runakunapa awasinamami sitadur kankuna. Chasa ruraspaka niraiami tukui kuirpu armaskasina tukugsamugtakuna; chasaka, Diuspa ñawipi allilla kawaringapa. ¹⁴ Chasa kagpika, Cristopa iawarwaka iapa mas achkami pudirí. Pai kikin, ñi imapipas mana mapasina kaspera, kuirpupi wañurka, Taita Diusta ufrindasina kikin tukuspa. Paipa ispirituka, ñi imaurapas mana wañunchu. Paipa iawarwaka nukanchipa mana suma iuiakunatami sumaiachigsamú, nukanchi mana diltudupa wañungapa; chasaka, kaugsag Taita Dius ima munaskata allilla ruraspaka kaugsangapa.

¹⁵ Cristo chasa ruraskawami Taita Diuswa runakunawa chaugpipi pai tukugsamurka; chasaka, ikuti musu iuiaiwa iuiarinakungapa. Ñugpata Taita Diuswa runakuna imasa kaugsangapa iuiariskata pandarigmandami kispichingapa Cristo wañugsamurka; chasaka, imasa Taita Dius karangapa niskasina, pai agllaskakuna mana puchukariduru suma kaugsaita chaskigringapa. ¹⁶ Kaugsakuspa, ima sakingapa willaraiaska iskritura tiagpika, chi firmag wañuuramandami chi iskritura balí. ¹⁷ Chi firmag chara kaugsakugpika, manara balí. Wañuuramandami chi iskritura balí. ¹⁸ Chimandami Taita Diuswa ñugpamanda runakunawa iuiariskaka, wañuchiska animalkunapa iawarwa allilla tukugsamurka. ¹⁹ Moisés, tukui imasa ruraspaka kaugsangapa niraiaskakunata tukui runakunatami willarka. Nispaka, puka milma aisaspa, hisopo suti birbina sachasinatami watarka. Chiwanka, kari wagrapa i kabritupa iawar iakuwa chapuchispami kuiuchirka. Chiwami chi niskata willaraiaska libru awata tukui chipi kagkunapa awasinama shabimachirka, ²⁰ kasa nispa:

Kai iawarwami
tukui imasa Taita Dius kamkunawa iuiariskaka
allilla tukugsamurka.

²¹ Chasallata, Taita Diusmandalla linsu wasita i tukui Taita Dius ima niskata rurangapa chi ukupi tiaska awatapasma iawarwa shabimachirka. ²² Moisés ima rurangapa willaskapi niraiami: ñalla tukuitami chaiá, iawarwa maillaskasina tukugsamungapa. Iawar mana ichachigpika, pandariikunatapas mana pasinsiai tukunchu.

Cristo wañuspa, pandariikunata anchuchiskamanda

²³ Kai alpapi linsu wasi ukupi ima tiaskakuna niraiami suma luarpi kagsina. Chi ukupi tiaskakuna Taita Diuspalla kagmandami chaiakurka, animalkunapa iawarwa maillagsina rurangapa. Ikuti suma luarpi tiaskakuna maillagsina rurangapaka, mas allilla ufrindapa iawarmi ministirí. ²⁴ Taita Diusmandalla linsu wasi, runakuna kai alpapi ruraska, chi wasika, suma luarpi chasa tiagta kawachingapagllami ka. Chi wasi ukuma, Cristo mana iaikurkachu. Suma luarmami Cristo iaikugrirka; chipika, Taita Diuspa ñawipi kagrispa, tukui nukanchimanda mañakungapa. ²⁵ Judfu iaia sasirdutikuna, wata watapimi tukuikunamanda mas alli ukuma iaikudur kankuna, animalkunapa iawarta apaspa. Ikuti

Cristoka, ufrindasina kikin tukuspa, mana maituku biaji wañurkachu. ²⁶ Chasa kagpika, kai alpa tiaskauremandata iukantrami, achka biaji wañunga. Kai tukurii punchakunaka, sug bijillami Cristo kawarigsamurka. Samuspaka, ufrindasina wañurka, runakunapa pandariikunata anchuchingapa.

²⁷ Imasami tukui runakunata chaiá, sug bijilla wañungapa; nispaka, Diuspa ñawi ladu justisiai tukuringapa: ²⁸ chasallatami Cristo sug bijilla ufrindasina wañugsamurka, achkakunapa pandariikunata anchuchingapa. Iktimi parisma kawarigsamungapa ka. Mana samungapa kanchu, pandariikunata anchuchingapa. Paita iuiarispa suianakugta diltudupa kispichingapami samungapa ka.

10 Moisés ima rurangapa willaraiaskaka, kipa samungapa kaska allikunata amsapisina kawachigsinallami karka. Chi samungapa niraiaskaka mana karkachu. Chimanda, chi niskapi willaraiaskasina Taita Diusmanda animalkunata rupachingapa tukui wata kaillaiagkunaka, chi rupachiskakunawa mana imaurapas pudingapa kankunachu, tukuiipi alli tukungapakuna. ² Chi ufrindakunawa tukuiipi alli tukungapa pudirigpika, mana pandarig ña niraiagta iuiarigpikunaka, ħmanachu sakintrakuna, ufrindakunata rupachingapa? ³ Chasapaka, chi rupachiskakunawami pandarig kagtakuna tukui watakuna iuarinkuna. ⁴ Kari wagrapa i kabritupa iawarllawa mana pudirinchu, pandariikunata anchuchingapa.

⁵ Chiwanka Cristo, kai alpama tiagsamuspa, Taita Diusta kasami nirka:

Kamariku i rupachiska animalkunata ña mana munangichu.

Nukata sug kuirpumi karawarkangi, nuka aichaiug runa tukungapa.

⁶ Runakunapa pandariikunamanda ufrindakuna i animalta rupachiskakuna, kamba ñawipi ña mana suma kawarinchu.

⁷ Chimandami kasa niiki:

“Nukami samuni, kam kikin Taita Dius ima munakuskata rurangapa”. Chasallatami nukamanda ñugpamanda librupi willaraiá.

⁸ Cristo, kasami ñugpa nirka: “Kamariku i rupachiska animalkunata ña mana munangichu. Chasallata ufrindakuna, kamba ñawipi ña mana suma kawarinchu”; chikunawaka, pandariikunata anchuchingapa. Moisés ima rurangapa willaraiagpipas, chasami nirka.

⁹ Nispaka, kasapasmi nirka: “Nukami samuni, kam kikin Taita Dius ima munakuskata rurangapa”. Chasa niskaka niraiami, ñugpamanda ufrindakunata Cristo anchuchispa, pai kikin ufrinda tukungapa. ¹⁰ Sug bijillami Jesucristo, kikinpa kuirputa ufrindasina churaspawañurka, Taita Dius imasa munaskasina. Chasami wañurka, nukanchi, pandariikunata anchuchii tukuspa, Taita Diuspalla kangapakuna.

¹¹ Judíu sasirdutikunatami chaiá, kada puncha maituku animalkunata wañuchispa rupachingapa. Chasa kada puncha rupachinakugpipas, mana imaurapas

pudiringapa kanchu, runakunapa pandariikunata anchuchingapa. ¹² Ikuti Jesucristoka, runakunapa pandariikunamanda sug bijillami wañurka, ufrindasina kikin tukuspa. Chasa tukuiipi allilla ruraspaka, Taita Diuspa alli ladumi tiarigrirka. ¹³ Chipimi suiaku, “paita mana munagkunata apagrispa, paipa chaki sarudiru ukuma tukuikunata churankama”.

¹⁴ Sug bijillami Cristo ufrindasina wañurka; chasaka, Taita Diuspalla kaskakuna imaurapas tukuiipi alli kangapa. ¹⁵ Chasallatami Santu Ispiritu willá, kasa nukanchita nispaka:

¹⁶ Atun Taita Dius kasami ni:

“Chi punchakuna ialiskauramanda, kasami nukawa paikunawa iuiarinakungapa kanchi: nuka ima rurangapa niskakunata paikunapa iuiapimi churangapa kani. Paikunapa sungupimi imasa rurangapa kaskata iskribingapa kani”.

¹⁷ Nispaka, kasapasmi ni:

Paikuna pandariska i mana allilla ruraskakunatapas mana ikuti iuiaringapa kanichu.

¹⁸ Chasamanda, nukanchi pandariikunata ña pasinsiai tukuskamandaka, mana ikuti ministirinchu, sug ufrindakuna pandariikunamanda rupachingapa.

Taita Diuspagma kaillaiai iukaskamanda

¹⁹ Chimanda, taitakuna i mamakuna, Jesuspa iawarmandami pudinchi, Taita Diuspalla tukuikunamanda mas alli ukuma mana manchaspalla iaikungakuna.

²⁰ Musu ñambisinami pai rurarka, nukanchi suma kaugsaita iukangapa. Atun linsu arkaraiaskata llikigsinami rurarka, pai kikinpa kuirpu wañuspa. ²¹ Nukanchi Diuspa wasi niraiaskakunamanda, pai iaia sasirdutitami iukanchi. ²² Chasamanda, pai Jesuswa tukuiipi suma iuiarispa, Taita Diuspagma mana manchaspalla kaillaiasunchi. Paimi tukui nukanchipa mana alli iuiakunata anchuchirka. Nukanchipa kuirputapas mana mapa iakuwami armachigsina rurarka. ²³ Taita Dius ima rurangapa niskata pai runanmi, mana kungarispa-lla. Chimandami iukanchi, paita mana sambaiaspalla suianakunga. ²⁴ Iuiachinakusunchi, tukui nukanchipura kuianakuspa, allilla ruraspakaugsangapa.

²⁵ Nukanchi Cristota iuiaringapa sugllapi tandariura, sugkunaka mana nukanchiwa sugllapi kankuna; mana paikunasina rurasunchi. Chasapaka, Jesucristo samungapa puncha ñalla chaimukuskata iachaspami iukanchi, sugllapi tandarispaka, nukanchi kikinpura iuiachinakunga, suma kaugsangapa.

²⁶ Sutipa Alli Willaita ña allilla iachaspaka, nukanchi kikinpa munaiwa pandarigpika, ñi ima ufrinda, chi pandariikunata anchuchingapa mana tiangapa kanchu.

²⁷ Chasa pandarigkunaka, manchaiwami suianakungapa kankuna, Taita Dius, rabiarispa, paikunata diltudupa ninama sitangapa kagmanda. Chi nina rupakuskamami Taita Diusta mana munagkunata sitangapa ka.

²⁸ Maikanpas Moisés ima rurangapa willaskata mana

uiaspalla jiru rurachu: iskai u kimsakuna, chasa kawaspapa, willagpikunaka, paita chaianmi, mana llakispalla wañuchingapa. ²⁹ Chimanda, maikanpas Taita Diospa wambrata sarugsina ruraspa, paipa iawarta: “Ianga, mana balimi ka” nispa, kuiag Santu Ispirituta unzaspa kaugsanakugtaka, ¿manachu iuiangichi: chasa ruragkunata chaianga, Taita Dios askurinti rabiarispa, paikunata justisiangapa kagta? Chi iawarwami Taita Dios runakunawa musu iuiariskaka allilla tukugsamurka. Chi iawarllawantami chi runakunapas Taita Diospalla tukugsamurkakuna. ³⁰ Kasami iachanchi: atun Taita Diosmi nirka:

Nukatami chaiawaku,
jiru ruraikunata randichingapa.
Kasapasmi niraiá:

Atun Taita Diosmi
paipa runakuna ima ruraskakunata kawachingapa ka.
³¹ ¡Ai, Taita Dios mana wañugpa makipi urmagingapa,
askurintimi manchawaku, paillatata justisiai rurag kag-
manda!

³² Kamkunaka iuiariichi chi ñugpa punchakuna Taita Dios kamkunapa iuiaikunata punchaiachiskata. Chi punchakunaka, iapa llakii iukaspapa, maikankunawa makanakugsinami karkangichi, Cristowa iuiariskata mana sakingapa. ³³ Maikankunaka, tukuikunapa ñawipi pai kamiimi tukurkangichi. Ikuti sugkunaka, chasa llakii iukaskakunawa sugllapisinami tukurkangichi. Chasaka, kamkunapasmi llakii iukarkangichi. ³⁴ Karsilpi wichkaraiaskakunamanda iapa llakii iukaspami kawagrirkangichi. Sugkunaka, ima iukaskakunata kichui tukuspapas, iapa allii iuiachiiwa iangami sakinakurkangichi, kasa iuiarispapa: sug luarpika, mana imaurapas tukuringapa mas suma iukaikunatami iukangapa kanchi. ³⁵ Chimandami niikichita: chi suma iuiaita mana kungarispalla kaichi. Chi iuiaita mana sakispalla kagpikunaka, iapa suma karaitami sug luarpi chaskigrinkangichi. ³⁶ Kamkuna iukangichimi mana sambaiaspalla kangakuna, ima llakiikuna chaiagpipas. Chasaka, Taita Dios ima munaskata kamkuna ruraspa kagpika, pai ima karangapa niskatami chaskigrinkangichi. ³⁷ Kasami ñugpamanda librupi Cristomanda niraiá:

Mana unaillami chi samungapa kag chaiamungapa ka.

Mana unaiangapa kanchu.

³⁸ Nukapa ñawipi allii kawarig runaka, nukawa suma iuiarispallami kaugsanga.

Ikuti llakiikunata kawaspapa mancharispa sakiwagpika, paitaka mana munangapa kanichu.

³⁹ Nukanchika, Taita Diusta chasa sakigpura mana kanchichu. Chi sakigkunaka, diltudupa ninamami sitai tukungapa kankuna. Ikuti nukanchika, Taita Dioswa suma iuiarispapa kagmandami kispuringapa kanchi.

Taita Dioswa suma iuiariimanda

11 Taita Dioswa suma iuiarii niraiami, pai ima rurangapa niskata suianakuska sutipa tukugsamungapa kaskata iachai. Chasa suma iuiarispapa, iachanchimi, mana kawaspapas, sutipa kagta.

² Nukanchika ñugpamanda taitakunapas chasallata iuiarigmandami Taita Dios paikunata nirka: “Allimi kangichi”.

³ Taita Dioswa suma iuiarispallami iachanchi, tukui luarkuna paipa iachaillawa wiñachiska kagta. Chimanda, kunauro kawariskakuna, mana kawaridirukunawami rurarka.

⁴ Abel suti runaka, Taita Dioswa suma iuiarispami, sug ubijakuna wañuchispa, Diospa ñawipi rupachirka. Ikuti paipa waugki Kaín kamariku karakuskaka, Diospa ñawipi mana sumami kawarirka. Chimandami Taita Dios, Abelta nirka: “Mana pandarigmi tukungi”. Chasa kagmandami, paita suma kawaspapa, chaskigsina rurarka. Abel wañuska kaspapas, pai suma iuiariskawaka kawachinmi, nukanchi imasa kaugsangapa.

⁵ Enok suti runaka, Taita Dioswa suma iuiarispalla kaugsakugmandami sug luarma apai tukurka, mana wañuspalla. Paita kai alpapi maskanakuspapas, mana tarirkakunachu. Taita Diosmi paita aparka. Ñugpamanda librupi kasami niraiá: pai manara apai tukugpita, Taita Diospa ñawipi allii kagtami paita kawarirka.

⁶ Taita Diusta suma iuiariskallowami pudirí, paipa ñawipi sumaglla kawaringapa. Taita Diospagma kaillaian-gapa, iukanchimi iuiailapi iuiaringa pai tiagta, i paillatata maikan paita maskanakugta allii karag kagta.

⁷ Noé suti runaka, Taita Diosllawa suma iuiarispami sug atun barku rurarka. Ima tukungapa kagta Taita Dios willaura, manara chasa tukugta kawaspapas, Taita Dios ima niskata uiaspallami chi barkuta rurarka; chasaka, tukui paiwa kaugsanakuskata kispichingapa. Taita Dios ima niskata uiaspa, suma iuiarispami kai alpapi kaugsanakuskata kawachirka, paikuna puchukarii tukungapa kagtakuna. Chasa suma iuiarigmandami paipas mana pandarig niraiagsamurka.

⁸ Abraham suti runaka, Taita Dios kaiaura, paiwa suma iuiarispami uiaspalla rirka, Taita Dios alpa karangapa kaskama chaiagringapa. Maima chaiagringapa kagta mana iachaspallami rirka. ⁹ Taita Dioswa suma iuiarispami, chi alpa Taita Dios paita karangapa niraiaskapi ialigsinalla kaugsagrirka. Karpa wasikunallapimi kaugsakurka. Chasallatami ñugpamanda taita Isaak i Jakobpas kaugsarkakuna. Paikunatapasmii Taita Dios chi alpallatata karangapa niraiarka. ¹⁰ Abraham suiakurkami, mana imaurapas wagllichingasina pui-blupi suma luarpi kaugsagringapa. Chi puibluta, Taita Diosmi ka allii iuiarispapa saiachig.

¹¹ Sara suti Abrahampa warmipas, chasallata Taita Dioswa suma iuiarispami, ña awila kaspapas, Taita Diospa iapa iachaiwa karamuska wambra iukagsamurka. Saraka, ima Taita Dios niskata iuiarispallami karka, chasa sutipa rurangapa kagta. ¹² Abrahampas, diruku ña wañungasina kaurami chi wambra tiapugsamurka. Chasapasmi paipa wambrapa wambrapa kati wambrakuna, iapa achka tukugsamurkakuna. Imasami awapi iapa achka istrillakuna tia; imasami lamar iaku patapi kaskajukunata mana kuintangapa pudirí: chasallatami Abrahampa wambrapa wambrapa kati wambrakuna, achka tukugsamurkakuna.

¹³ Tuku chi ñugpamanda taitakuna i mamakuna, Taita Dius karangapa niraiaskata mana chaskispallami wañurkakuna. Chi runakuna kaugsanakuurami, Taita Diuswa suma iuiarispami, kipama imasa kangapa kaskata karumandalla kawanakugsina iuiaspa, alli iuiachiwiwa karkakuna. Chasallatami kawachirirkakuna, kai alpapi ialigkunasinalla kagtakuna. ¹⁴ Chasa kawachirigkuna niraiankunami, chara kikinkunapa chaiagridiru alpata maskaspa purinakugta. ¹⁵ Paikuna maimanda llugsiska alpama kutingapa munanakugpika, chasami pudintrakuna. ¹⁶ Chasa pudigpipas, iapa alli alpamami chaiagringapa suianakurka. Chika niraiami sug luarmanda suma luar. Chimandami Taita Dius sakirí, paikunapa Taitiku niraiangapa. Paikunamandami sug suma puiblu allichiska suiaku.

¹⁷ Abraham Taita Diuswa suma iuiariskamandami, Taita Dius mañaura, paipa wambra Isaakta apirka, ufrindasina wañuchispa rupachingapa; chasaka, uia kagta kawachiringapa. Paipa suglla wambratami wañuchingapa karka, Taita Dius chasa mañagmanda. ¹⁸ Chi wambramandami Taita Dius niska karka: "Isaakmandami achka wambrakuna mirapugsamungapa kangí". ¹⁹ Abrahampa iuiaipika iacharkami, Taita Diuska wañuskakunatapas kaugsachingapa pudigta. Chiwami paipa wambrata wañungapa niraiagta kaugsachigsina ikuti kaugsaila sakirka.

²⁰ Isaakka, Taita Diuswa suma iuiarispami nirka, paipa wambrakuna Jakobta i Esauta, Taita Dius iapa kuiaspa kawangapa kagta.

²¹ Jakobka, Taita Diuswa suma iuiarispami, ña wañukuspa nirka, Josepa iskai wambrakunata, Taita Dius iapa kuiaspa kawangapa kagta. Chasa nispaka, tawinawa saiarispa, Taita Diustami nirka: "Kam, iapa allimi kangí".

²² Josepas, Taita Diuswa suma iuiarispami, ña wañukuspa willarka, Israelmanda runakuna chi Ejipto alpamanda llugsingapa kagtakuna. Chasa iachaspami nirka: "Kamkuna, llugsinakuura, nukapa tullukunata apapuaspa ringichi, kamkuna chaiagringapa kaskapi pambagringapa".

²³ Moisespa taitakunaka, Taita Diuswa suma iuiarispami, Moisés tiagsamuskata kimsa killa pakaspa charinakurka. Paikuna, Moisés iapa suma wawa kagta kawaspami, chi alpata iaia mandag "Tuku kari wambrakunata wañuchingichi" nigpipas, mana manchaspalla pakaspa charinakurka.

²⁴ Moisespas, Taita Diuswa suma iuiarispami, ña wiñaura, mana munarka, chi iaia mandagpa warmi wambrapa wambra niraiangapa. ²⁵ Pandariikunawa mana unaila kusikuspa kaugsangataka, munarkami, Taita Dius agllaska runakunawa sugllapi llakii iukaskakunawa kaugsangapa. ²⁶ Ejiptopi iapa iukag kangapa munaringataka, masmi iuiarispami karka: "Nukaka, sug kispichig samungapa kagta iuiarispami piñai kamiipas tukusa". Taita Dius ima karangapa kaskata kawagsina, chasa iuiawami iuiarispalla karka.

²⁷ Taita Diuswa suma iuiarispami, Moisés, Ejiptota iaia mandag rabiarikuskata mana manchaspalla, chi

alpamanda llugsispa rirka. Taita Dius mana kawarigta kawakugsina iuiarispallami rirka. ²⁸ Taita Diuswa suma iuiarispami Moisés nirka: "Wañuchiska ubijapa iawarwa punguta charikuska kaspikunata awingichi. Chasaka anjil wañuchig, Israelmanda runakunapa ñugpa kari wambrakunata mana wañuchingachu". Ñugpata chasa ruraskaka, judiukunapa paskuami niraiá.

²⁹ Ejiptomanda llugsispa, Israelmanda runakuna, rinakuspa, Taita Diuswa suma iuiarispami, Puka Kucha suti atun iakuta, ñambisina paskaspa, chakichiska alpapi chimbarkakuna. Ikuti Ejiptomandakuna kalpachinakugka chasallata chimbanakuura, chi iaku wichkarrirka. Chiwanka, tukuikunami puchukarirkakuna.

³⁰ Taita Diuswa suma iuiariwami, Israelmanda runakuna Jerikó suti puibluta muiuchiraiaska atun pata kincha muiundi kanchis puncha muiuska kauraka, chi kincha pailla urmarka.

³¹ Rahab suti karisapa warmika, Taita Diuswa suma iuiarispami chi alpata pakalla kawangapa kachaska runakunata sumaglla chaskispa pakarka. Chimandami, Taita Diusta mana uiagkuna wañuchii tukuura, paika kispirirka.

³² ¿Ikuti sugkunamandachu willasakichita? Mana pagtariwanchu, Jedeonmanda, Barakmanda, Sansonmanda, Jeftemanda, Davidmanda, Samuelmanda i Santu Ispirituwa rimagkunamanda willangapa. ³³ Paikuna, Taita Diuswa suma iuiarispami, alpapunapi atun mandagkunawa wañuchinakuspa mitikuchispa, imasa chaiaskasina suma ruraspa mandarkakuna. Sugkunaka, Taita Diuswa suma iuiariskamandami pai ima karangapa niskata chaskirkakuna. Sugkunaka, Taita Diuswa suma iuiarispami liunkunapa simikunatapas wichkarkakuna. ³⁴ Chasallata sugkunaka, manchangasina ninakunatami wañuchirkakuna. Sugkunaka, atun machitiwa wañuchingapami kispirirkakuna. Sugkunaka, sambaiaska mana pudigsina kaspapas, pudigmi tukurkakuna. Iapa pudig tukuspa, sugnigmanda suldadukuna wañuchinakungapa samugkunatami mitikuchirkakuna. ³⁵ Chasallata sug warmikunaka, wañuska wambra kaskata kaugsami chaskirkakuna.

Ikuti sugkunaka, paikunapa suma iuiariita sakispaka, wañuchingapa kispiriskami kantrakuna. Mana sakigmandaka, iapa nanaiwami wañuchii tukurkakuna. "Taita Dius nukanchita kaugsachiura, mas suma kaugsaitami iukangapa kanchi" iuiarispami chasa wañuchii tukurkakuna. ³⁶ Sugkunaka, kamii, unžai, asutiimi tukurkakuna. Sugkunaka, wataspa karsilpi wichkaimi tukurkakuna. ³⁷ Sugkunaka, rumiwa piyai tukuspami wañurkakuna. Sugkunaka, siruchiiwa chaugpi chaugpi kuchui tukuspami wañurkakuna. Sugkunaka, atun machitiwami wañuchii tukurkakuna. Sugkunaka, Taita Diuswa suma iuiariita mana sakigmandami, llugsichii tukuspa, mana katanga iukaspa, iukarkakuna ubijapa i kabritupa karata churarisipalla purinakunga. Iapa ministidukunami kaugsanakurka. Paikunata mana munarkakuna; nispami kamispa unžaspa kalpachirkakuna. ³⁸ Chi alli runakunataka mana chaiakurka, kai alpamandalla iuiawami kaugsanakuska chaugpipi kaug-

sangapa. Paikuna llugsichii tukuskamanda, mana wasi iukaspa, sachuku, chusa sitaska alpakunapimi purin-gapa chaiarkakunata. Pata alpa ukumami iukarkakuna kaugsanakunga.

³⁹ Tuku paikuna Taita Dioswa suma iuiariskakuna-mandami paikunata nirka: "Allimi kangichi". Chasa nig-pipas, pai karangapa niraiaskata manara chaskispalla-mi wañurkakuna. ⁴⁰ Taita Dios, nukanchimanda iuiar-ispas, ñugpata karaskakunamanda mas sumami karangapa nirka; chasaka, paikunawa nukanchipas sugllapi tukuspa, tukuikuna allillapi tukugringapa.

Jesullata kawakugsina iuiarispas kaugsasunchi

12 Chasaka, achkakunami nukanchita kawachirir-kakuna, imasa Taita Dioswa suma iuiarispas kaugsagtakuna. Chimanda, nukanchita ima llasakug-sina tukui pandariikunapi urmachingapa kaskata saki-sunchi. Chasaka, mana sambaiaspalla kalpakugsina rurasunchi, suma luarma chaiagringapa. ² Jesullata kawakugsina iuiarispas kaugsasunchi. Paimi nukanchita suma iuiachigsamurka. Paillatata iuiachii apaku, nukanchi tukuipi paiwa suma iuiaringapa. Pai kikin iacharkami, wañuskauramanda, iapa suma kuntintulla kangapa kagta. Chimandami sakirirka kruspi klabai tukungapa, pingaita mana manchaspalla. Chasamandami Taita Diospa mandadiru alli ladu tiarigrirka.

³ Iapa pandarigkuna paita kamispa, unzaspa kagpi-kunapas, pai Jesuska upallami karka. Pai chasa pasas-kata iuiaringichi. Chasa iuiariskawa kamkuna pasana-kuspapas, mana saikuskasina iuiaringichi. Mana sambaiaspalla kangichi. ⁴ Kamkuna, pandariikunawa makanakugsina kaspapas, manara iukangichichu Jesusmanda wañuchii tukungapa iuianakunga.

⁵ Kasapas. Taita Dios kamkunata iuiachiskaka, ñapash kungarinakungichi. Paipa wambrakunatasinami ñugpamanda librupi kasa kamkunata nirka:

Nukapa wambra,
atun Taita Dios kamba allillapa iuiachispas llakichig-pika,
mana ningi: "Mana uiasachu".

Pai piñagpika,
mana sambaiangi.

⁶ Atun Taita Dios kuiaskakunatami iuiachispas llakichí.

Paipa tukui kuiaska wambra niraiaskakunatami chasallata asutigsina rurá.

⁷ Chasa iuiarispas, Taita Dios kamkunata llakichig-pipas, upalla kangichi. Kamkuna paipa wambrakuna niraiaskamandami chasa llakichii tukungichi. Maikan taitapas, pai kikinpa wambratami asutí. ⁸ Chasallata Taita Dios, tukui paipa wambra niraiaskakunatami asutigsina rurá. Chimanda, kamkunata mana chasa llakichigpika, pai kikinpa wambra manacher kantrangichi.

⁹ Kasapas. Nukanchi uchulla wambrakuna kaura, nukanchipa kai alpamanda taitakuna nukanchita asutigmandaka, paikunata suma uiaspas kuiaspami kaugsarkanchi. Chimandaka, ¿manachu nukanchita chaí,

Taita Dios kaugsai karagta suma allilla uiangapa; chasaka, alli kaugsaita charingapa? ¹⁰ Nukanchipa kai alpamanda taitakuna, paikunaka imasa chaiaskasina-mi sug watakunalla nukanchita iuiachispas asutirkakuna. Nukanchi allilla kangapami Taita Dios nukanchita suuraka asutigsina rurá; chiwanka nukanchi, paiwa tukuipi alli runakuna tukugsamungapa. ¹¹ Asutiuraka, pitapas mana alli iuiachinchu. Chasapaka, iapami naná. Chasa pasaspas, iachaikugkunaka, allilla ruraspa, sumagllami kaugsanakunga.

¹² Chasamanda, kamkunapa saikuska makikunata, kamkunapa sambaiaska kungurkunata musuiachigsina ruraichi kamkunapa iuiapi. ¹³ Chasallata, alli ñambi kaskata katinakugsina kaugsaiichi; chasaka mana allilla ñambipi purinakuspa chaki kiwiskaka, chiuramanda ambirispas, alli ñambita mana wistuiachispalla katigsina suma iuiarispas kaugsanakungapa.

¡Ujalallapas Taita Dios rimaskata wabutingichi!

¹⁴ Tukuikunawa sumaglla kaugsanakungapa iuiaiwa kangichi. Chasallata, Taita Diosmandalla kaugsangapa iuiallata apanakungichi. Mana chasa kaugsaspas, ñi pipas manima pudingapa kankunachu, Iaias Jesusta kawangapa. ¹⁵ ¡Ujalallapas Taita Diospa suma kuiaita sakispas kungaringichi! ¡Amalai maikan, mana alli ugasakunapa angusina iukaspa, kamkunapa iuiaita wagglichigsamuntrakuna; chasawaka achkakuna, puchukarigsina tukugsamungapakuna! ¹⁶ ¡Ujala pipas, kari warmiwa pandarichukuna! ¡Ujala Esausina Taita Dios ima karangapa kaskata wabutichukuna! Chi runaka, ñugpa wambra kaspapas, ima taitata chaskingapa kaskata suglla mikuiwami trukarka. ¹⁷ Kamkuna, Esau-manda kasami iachangichi: manancha unaipika, paipa taitata mañakurka: "Taita Dios, kamta iapa kuiaspas kawapuachu" ningapa; chiura, paimanda mana chasa chaiarka, mikuiwa katuska kagmanda. Maituku wakugpipas, mana alli karka ima ruranga.

¹⁸ Kasapas. Kamkunata mana chaiarkachu, kai alpamanda lumapi chaiagringapa. Israelmanda runakunami chi Sinaí suti lumama chaiagrirkakuna. Chipika, nina sindimi rupakurka. Iapa iana tuta tukuska, sinchi wairawami tamiakurka. ¹⁹ Sinchi bututusinami uiarirka. Iapa sinchi rimaipasmi uiarirka. Chi rimaita uiaspas, mañarkakunami, mana mas rimakuchu. ²⁰ Taita Dios ima nikuskata uiaspas, wañungasina iuiachigmandami chasa mañarkakuna. Kasami Taita Dios nirka:

Runa u ima animalpas
kai lumama tuparigrigpika,
rumiwa piaspas [u flichaspas]
wañuchichukuna.

²¹ Chi lumapi iapa manchangasina kawarigmandami Moisespas nirka: "Nukapas, askurintimi manchaiwa chugchukuni".

²² Ikuti kamkunaka, Taita Dios imaurapas kaugsagpas puiblumami chaiaska niraiangichi. Chimi suti ka suma luarpi Sión luma u Jerusalén puiblu. Chipimi iapa achka waranga waranga anjilkuna kankuna. Sugllapimi kusikunakú. ²³ Chillapitami ñugpamanda Taita Dios-

pa wambrakunapas sugllapi kankuna. Paikuna, suma luarpi kaugsangapa willaraiaska librupimi iskririra-iaaska iukankuna. Taita Dios tukuikunata justisiai rurag-pagmami chaiaska niraiangichi. Chipimi alli runa-kunapa almakuna kankuna. Chi runakuna, tukui pandariikuna allillapi tukuskami kankuna. ²⁴ Jesuspagma-mi chaiaska niraiangichi. Paimi, Taita Dioswa runa-kunawa chaugpipi tukugsamurka; chasaka, ikuti musu iuiaiwa iuiarigsamungapa. Kruspi klabaska wañuska iawarwami chasa rurarka. Paipa iawar, mana Abelpa-sina niraianchu, Taita Dios randichingapa. Nukanchita pasinsiangapami niraiá.

²⁵ Kamkuna, ¡ujalallapas Taita Dios rimaskata wabutingichi! Ñugpata kai alpapi Taita Dios iuiachispa rimaskata wabutigkuna, paipa rabiamaanda mana kispirirkakunachu. Suma luarmanda iuiachispa rimamus-kata nukanchi wabutisunchi; chika manima kispiringa-pa kanchichu. ²⁶ Taita Dios kikin ñugpata Moisesa rimaura, kai alpapasmi iapa chugchurirka. Kunauraka, pai nirkami:

Ikutimi nuka chugchuchingapa kani alpallata, mani-ma.

Sug luartapasmi chugchuchingapa kani.

²⁷ Chasa niskaka niraiami, Taita Dios kikin ruraskata kuiuchispa anchuchingapa kagta. Ikuti mana kuiuchi-diru kaskakunaka, chasallami tiangapa kankuna. ²⁸ Tai-ta Dios suma mandakuskatami mana pipas kuiuchin-gapa pudí. Chipi nukanchi iaikugringapa kagmanda, Taita Diusta: "Pai Siñur" nisunchi. Paita suma man-chaspa, tukui iuiaiwa, pai imasa munakuskasina, "Kam, iapa allimi kangí" nisunchi. ²⁹ Imasami nina, tukui rupachí: chasami nukanchipa Taita Dios ka.

Taita Diusta imasa kuntintachingapa rurai iukaska-manda

13 Kam kikinpura kuianakuskata mana sakiriichi. ² Mana kungaringichi, kamkunapa wasima maikan chaiagrigrigunata sumaglla chaskingapa. Maikan-kuna, wasipi sumaglla chaskispaka, anjilkunatami pi kagta mana iachaspalla ñugpata chaskirkakuna.

³ Karsilpi wichkaraiaskakunata kawagringichi; imasa-mi kamkunapas paikunawa sugllapi wichkaraiant-rangichi: chasa. Maikan piai tukuska nanaikunawa kas-kata iuiaringichi, kam kikinkunapa kuirpupi kagsina.

⁴ Tukui kasaraska kagkunaka, mana pandarispalla kam kikinpura sumaglla kuianakuspa kaugsaiichi. Maikanpas sugpa warmiwa kariwa siririskataka, Taita Diosmi justisiai rurangapa ka.

⁵ Kulkita iapa kuiaspa munarigkuna mana kangichi. Chasapaka, kamkuna ima iukaskallawa allilla kangichi, kasa iuiaripa: Taita Dioska nirkami:

Mana sakisakichu.

Ñi imaurapas mana kungarisakichu.

⁶ Chimandami nukanchi, mana manchaspalla ninchi:

Atun Taita Diosmi ka nukata aidawag.

Chimandami mana manchani

maikan runapas jiru rurawangapa iuiaspa kaskata.

⁷ Ñugpata Diospa Rimai kamkunata iachachig taita-kunamanda iuiariichi. Paikuna imasami sumaglla kaugsarkakuna wañunkama: chasallata kamkunapas, Jesucristowa suma iuiaripa kaugsaiichi.

⁸ Jesucristoka, ñugpamandata, kunaura, imaurapas paillatatami ka.

⁹ Mana sakiringichi, ima sug rigcha sug rigcha iacha-chiskawa pandachii tukungapa. Chi iachachigkuna nin-kunami: "Kaita mikungapa, allimi ka. Ikuti chita mikun-gapaka, michanmi". Chasa ninakuskata uiangataka, mas allillami ka, Taita Diospa suma kuiaiwa iuiaripa, kamkunapa iuiaita tukui allilla charingapa. Chasa ni-nakuskata uiagkunataka ñi imapipas mana allilla tuku-purkachu.

¹⁰ Jesús ufrindasina wañuskamanda, kunaura sug musu altarmi iukanchi. Judíu sasirdutikuna Dios-mandalla wasipi paimanda ruragkuna, mana pudin-kunachu chi musu altarmandata mikunga. ¹¹ Taita Diospalla tukuikunamanda mas alli ukumami iaia sasirduti, animalkunapa iawarta pandariskakuna-manda apá. Ikuti chi animalkunapa kuirputaka, runa-kuna kaugsanakuskamanda llugsichispami rupachig-rinkuna. ¹² Chasallata Jesuspas, puiblumanda llugsichii tukuspami wañuchii tukurka; chasaka, pai kikinpa iawarwa runakuna Taita Diospalla tukugsamungapa-kuna. ¹³ Chimandami nukanchitapas chaiaku, Jesuswa tukungapa munaspa, ñugpata mandaskakunata sakin-gapa, maskipas paisina unzái tukungatapas.

¹⁴ Imaurapas mana puchukadiru puibluka kai alpapi mana iukanchichu. Mas nispa samungapa sug puiblu-tami suianakunchi. ¹⁵ Chimandami iukanchi, imaura-pas Jesuswa Taita Diusta ninga: "Kam, iapa suma atun-mi kangí". Chasa niskawaka paimanda kamarikusina-mi niraiá. Taita Diusta iuiaripa, iapa suma atun kagta nisunchi. ¹⁶ Chasallata, mana kungaringichi, allilla ruraspa, mana iukaskakunata maillallapas karangapa. Chasa ruraskawapas kamarikusinami niraiá. Chasa ruraskami, Taita Diospa ñawipi sumaglla paita kawarí.

¹⁷ Kamkunata iachachig taitakuna ima niskata sumaglla uiaspa rurangichi. Paikunatami chaiá, kam-kunapa almata kawaspa, Diospa ñawipi ainigringapa. Paikunata sumaglla uiaichi; chasaka paikunapas, suma kuntintulla kangapakuna. Kamkuna mana uiagmanda, paikuna llakiiwa kamkunata iachachingapa chaiag-pika, kamkunata ñi imapipas mana allilla tukungapa kanchu.

¹⁸ Nukanchimanda Taita Diusta mañapuaichi. Iachan-chimi nukanchipa iuiai allilla kagta. Tukui allilla ruraspa kaugsangapami munanchi. ¹⁹ Suma iuiaripa-mi mañanakuikichita: Taita Diusta mañapuaichi, nuka-ta utkalla kamkunapagma ikuti kachawachu.

Taita Diusta iapa suma atun kagta nispa, puchuka-riskamanda

²⁰ Taita Dios sumaglla kaugsaita karamugmi nukan-shipa Iaia Jesús wañuskata kaugsachirka. Paipa iawar-wami Taita Dioswa nukanchiwa iuiarinakungapa dil-tudupa allilla ruragsamurka. Paimi ka tukui runakuna

paipa ubija niraiaskakunapa iaia kawag. ²¹ Taita Dius-llatata kamkunata iuiachichu, tukuipi alli kangapa; chasaka, pai imasa munaskasina allilla rurangapakuna. Chasallata, Jesucristowa tukui nukanchita pai kikin imasa munakuskasina rurachu. Cristota imaupas nisunchi: “Kam, iapa suma atunmi kangi”. Chasa kachu.

²² Kam taita i mamakunata mañaikichitami: nuka kamkunata iuiachiskamanda pasinsia iukawaichi. Mana achka rimaikunallawami kachanakuikichita.

²³ Kasa iachaichi: nukanchipa waugki Timoteo, wickaraiaskamanda kachariisi tukurka. Pai nukapagma utkalla chaiamugpika, iskandikunami kamkunata kawagrisunchi.

²⁴ Kamkunata tukui iachachig taitakunata: “Puangi” nipuangichi. Tukui Diuspalla kagkunatapas: “Puangi” nipuangichi. Italia alpamanda kagkunami kamkunata: “Puangi” ninakú.

²⁵ Taita Dios, tukui kamkunata sumaglla kawapua-chu.

SANTIAGO

1 Nuka, Taita Diospa i Iaia Jesucristopa lutrinsina kaspá, Santiagomi suti kani. Ñugpamanda taita Israelpa chungá iskai wambrakunapa wambrakuna maipi kaugsanakuskata: Puangimi niikichita.

Llakii chaiaura, mana sambaiaspalla kangapa niska-manda

²Taitakuna i mamakuna, kamkunata achka llakiikuna chaiauraka, mana llakiiwa kagsina suma alli iuiachirii-wa kangichi, ³kasa iuiarispá: kamkuna Iaia Jesuswa iuiarinakugta sug rigcha iuiakuna chaikugpika, chaianmi, mana sambaiaspalla paillawa iuiarikungapa, ima kagpipas. ⁴Iaia Jesuswa chasa iuiarispalla mana sambaiaspalla kagpika, iukangichimi tukui allilla iuiaipi kanga, ñi ima mana kungarispalla.

⁵Maikanpas, allilla iachaita mana iachaspaka, Taita Diusta mañaichi. Chasaka chaskinkangichimi. Taita Dioska, tukuikunatami ima mañaska mana tupuspalla kará, mana piñarispalla. ⁶Taita Diusta mañakuuraka, paita suma iuiarispá mañaichi, mana kasa iuiarispalla: “¿Karawangachu u manachu karawanga?”. Mana allilla iuiaiwa mañagka, wairawa iaku kuchata kaima chima kuiuchispa apakugsinami rurá. ⁷Maikan chasa mañagka mana iuiakuchu: “Atun Taita Dios, imapas karawangami”. ⁸Chi runaka, sug rigcha sug rigcha iuiaspa, ima rurái kallariskatapas mana puchukadurmi tukú.

⁹Maikanpas kumpuramanda mana iukag kaspaka, alli iuiachiiwa kachu. Paikunataka, Taita Dios kikin kawag sumami atuniachingapa ka. ¹⁰Chasallata, maikan iapa iukag kaskataka, Taita Dios kikinmi paitaka uchullaiachingapa ka. Chasa kagpipas, alli iuiachiillawa iuiakuchu. Iapa iukagka, ugsa tugtusinami mana unaila wañuringapa ka. ¹¹Indi llugsispa rupariuraka, ugsakunata chakichinmi. Tugtukunatapas urmachinmi. Chiwanka, tukui suma kawari puchukarinmi. Chasallata iapa iukag runa, ima tiaska i iukaska sakispa, chi tugtusinami chingarí.

¹²Jiru rurangapa iuiakuna chaiauraka, mana chasa ruragkunaka Taita Diospa iapa kuiaskami kankangichi. Chi mana jiru ruragkunaka, alli suma kaugsai primiu-tami chaskigrinkangichi. Chi kaugsaitaka, Taita Dios nirkami, paita kuiagkunata karangapa.

¹³Maikantapas jiru rurangapa iuiakuna chaiauraka, mana iuiarikuchu: “Taita Diosmi chi jiru iuiaita iuiachiwaku”. Ñi pipas mana Taita Diusta iuiachinkunachu, jiru rurangapa. Chasallata Taita Dioska, ñi pitapas mana iuiachinchu, jiru rurangapa. ¹⁴Chi jiru rurangapa iuiakunataka, tukuikuna iukanchimi nukanchi kikinpa

iuiailapi. Chasaka nukanchita iuiachispa, jiru ruraitami munachí. ¹⁵Chimandami nukanchi jiru ruraikunata ruranchi. Chasa jiru ruraskakunamandaka, Diospa ñawipi wañuimi tarinchi.

¹⁶Nukapa iapa kuiaska taitakuna i mamakuna, mana pandaringichi. ¹⁷Tukui suma iuiakuna i ima ministiskakunata, Taita Diosmi suma luarmanda karamú. Paimi ka tukui punchaiachigkunata rurag. Paika, imaurapas paillami ka; punchallami ka. ¹⁸Pai kikin munaspalla, paipa rimaiwa nukanchita mana puchukaridiru suma kaugsaitami karamurka. (Chi rimai, tukuipi sutipami ka.) Chasaka, tukui pai ima wiñachiskakunamanda, nukanchi paimanda ñugpa kispichiska kangapa.

Sutipa rimaskakunata uiaspa, allilla rurangapa niska-manda

¹⁹Nukapa iapa kuiaska taitakuna i mamakuna, kasa uiawaichi: tukui kamkuna, Diospa Rimaita allilla uiangichi. Allimanda iuiarispá rimangichi. Chasallata, rabia chaiaura, mana utkalla rabiaringichi. ²⁰Rabiariska runaka, Taita Dios munaskata mana ruranchu. ²¹Chimanda, tukui millai ruraikunata i mana allilla kaugsai-kunata sakiichi. Diospa Rimai uiaskata upalla chaskiichi, mana atuniachirispalla. Chi Diospa Rimaiwaka, kamkuna suma iuiarigkunatami kispichingapa ka.

²²Diospa Rimaipi imasa willaraiaskasina rurangichi. Mana ianga uiaspalla kangichi. Ianga uiaspalla kagkunaka, kinkunami iuianakú: “Allillapimi kani”. Nigpika, mana chasa kanchu. ²³Maikan Diospa Rimaita uiaspapas, mana chasa ruragkunaka, paipa ñawi imasa kaskata ispijupi kawarigsinami kankuna.

²⁴Chasa kawaspaka, kikinpa ñawi imasa kaskata mana unailami kungarinkuna. ²⁵Ikuti maikanpas, Taita Dios ima niskata uiaspa, mana kungarispalla umapi wachispa ruragpika, chi runaka, Taita Diospa iapa kuiaskami kanga, chasa ruragmanda. Taita Dios ima niskaka, tukuipi allillami ka. Chasa niskata uiaspa ruragkunaka, wataraiaska kaskamanda kachariskasinami tukunkuna.

²⁶Maikanpas paipa simita † mana upallachigpika, pai kikinlla, pandarispá, iangami iuiaku: “Nuka, Taita Dioswami kani”. ²⁷Taita Diospa ñawipi, maikan imapipas paiwa suma iuiarigkuna, kasa ruraspami kaugsakuna: wagchukunata i llakiiwa kag sapalla kidaska warmikunata tukuipi aidaspa; chasallata, kai alpapi ima jiru ruraikunata mana imapas ruraspalla.

† griego rimaiwa: kalluwa.

Suglla iuiai runapura tiachu

2 Kam taitakuna i mamakuna, nukanchipa suma Iai Jesucristowa iuiarigkuna kaspas, sugkunata sug rigcha sug rigcha iuiaiwa mana kawangichi. ² Kasa iuiarisunchi. Kamkuna sugllapi tandariska kaskapi iai-kugsamuchu sug runa, kuri surtijawa i suma musu katangawa. Chasallata sug mana iukag runapas iai-kugsamuchu, ruku katanga churariska. ³ Chiura kamkunaka, chi suma churariska iaikugta suma rimaiwa ailastimaspas ninkangichimi: “Samui. Ñugpa ladu tiarig-samui”. Ikuti mana iukagtaka ninkangichimi: “Chillapi saiakui” u “Alpapi tiarii”. ⁴ Chasa ruraspami kam kikin-pura sug rigcha sug rigcha iuiaiwa kawanakungichi. Mana sugllasina iuiarispami sugkunataka mas sumag-lla kaianakungichi.

⁵ Nukapa kuiaska taitakuna i mamakuna, kasa iuiarii-chi. Kai alpapi mana iukag kagkunatami Taita Dios agllarka, paikuna, Jesucristota suma iuiariiwa iapa iukagsina tukungapakuna; chiwanka paikunapas, Taita Dios suma mandakuskapi iaikugringapa. Chasami Taita Dios nirka, paita kuiagkunata karangapa. ⁶ Ikuti kamkunaka, mana iukagkunataka mana balitasinami kawangichi. ¿Manachu chi iapa iukagkunaka, kamkunata imapipas mana allilla charinkuna? ¿Manachu paikuna, kamkunata justisiakunapagma aliuspa apachinkuna? ⁷ ¿Manachu paikuna, Iai Jesucristopa suma sutimandapas jiru rimankuna? Ikuti kamkunaka, Iai Jesusmandallami sutichiska kangichi.

⁸ Taita Dios imasa kaugsangapa niskapi, kasami willaraiá: “Kam kikintasinami iukangi, tukui runakunatapas kuianga”. Kamkuna chasa ruragpi, allillami ruranakungichi. ⁹ Ikuti runapura sug rigcha sug rigcha iuiaiwa kawagpika, atun pandariimi ruranakungichi. Chasa ruragpika, Moisés sakiska willaraiaskapi niraiami, kamkuna mana allilla ruraii urmagtakuna.

¹⁰ Tukui imasa Moisés sakiska willaraiaskasina rurakuspapas, sugllapas chi willaraiaskata pandarigpika, tukui chi willaraiaskakunatami mana allilla ruragsina tukungapa ka. ¹¹ Kikin Taita Diosmi ni: “Mana sugpa warmiwa kariwa siriringi”. Kasapasmi nirka: “Mana wañuchingi”. Kamkunaka, mana sugpa warmiwa kariwa siririspapas, maikanta wañuchigpika, tukui chi willaraiaskakunata mana allilla ruragsinami tukug-samungichi. ¹² Suglla willaraiaskapika tianmi, kamkuna kispiringapa. Chi willaraiaskawami kamkuna justisiai tukungapa kangichi. Chasa iachaspaka, iukangichimi tukuipi allilla rimaspa i ruraspa kaugsanakunga.

¹³ Maikan sugkunamanda mana llakigpika, Taita Diospas mana llakispallami paikunata justisiangapa ka. Ikuti maikanpas sugkunamanda llakispa suma ruragkunaka, justisiai puncha paita chaiauraka, tukuipimi allilla llugsingapa ka.

Taita Dioswa iuiariillawa mana chaianchu; allilla ruraimi chaiá

¹⁴ Taitakuna i mamakuna, maikanpas iuiarichu: “Taita Dioswa suma iuiarigmi kani”: chasa iuiariillawa kaspaka, ñi ima allilla mana ruragpika, ¿imawatak kawachinga, suma iuiarig kagta? Pai chasa iuiariillawa sug luarpi mana kispirigringapa kanchu. ¹⁵ Kasa iuiarisunchi: maikanpas kam kikin-pura mana katanga iukachu, ñi mikui mana tiapuchu. ¹⁶ Chasa mana iukaskataka, maikan kampura nintra: “Apaijim. Alli katanga churingi. Wigsas jundagta mikungi. Kunaura riilla”; chasa nispaka, ñi ima mana karaspalla kachagpika, ¿imatak allilla ruragta niraiá? ¹⁷ Chasallata, maikanpas iuiarichu: “Taita Dioswa suma iuiarigmi kani”: chasa iuiailawa kaspaka, ñi ima allilla mana ruragpika, chi iuiarii, wañuskasinami niraiá.

¹⁸ Maikan ningami: “Kam, Taita Dioswa sumasi iuiaringi. Ikuti nukaka, tukui allillami rurani. Kam, ñi ima allilla mana ruraspapas, kawachiwai paiwa suma iuiarigkugta. Ikuti nukaka, allilla ruraskawami kawachisaki, nuka paiwa suma iuiarig kagta”.

¹⁹ Suglla Taita Dios tiagta kam iuiagpika, allillami ka. Kuku wairakunapasmi chasallata iuiankuna. Chasa iuiarispaka, dimanchaimi chugchurinkuna. ²⁰ Mana upasina kai. ¿Manachu kasa iuiaringi? Kam ñi ima mana allilla ruraspalla kaugsakugpika, kam iuiantrangi: “Taita Diosllawami kani”; chi iuiaka, ñi imapa mana balinchu; wañuskasinami niraiá.

²¹ Nukanchipa ñugpamanda taita Abrahamka, ¿manachu paipa wambra Isaakta altarpis rupachingapa churaskamanda, Diospa ñawipi alli runa kagta kawarka? ²² ¿Manachu iachangichi: Abrahamka, chasa ruraspas, pai Taita Dioswa suma iuiarig kagta kawachirirka? Chasa ruraspami pai imapipas suma iuiarig tukurka. ²³ Chiwanka, ñugpamanda librupi imasa willaraiaskasina tukugsamurka. Kasami niraiá:

Abrahamka, Taita Dios imasa niskata iuiarispami marka: “Chasami tukunga”.

Chimandami pai mana pandarig niraiarka.

Paitaka, Taita Dios kikin nirka:

“Kuiaskami kapuangi”.

²⁴ Chimandami niikichita: maikan runa Taita Dioswa iuiarispallaka, paipa ñawipi mana allilla niraiianchu. Paiwa suma iuiarispas, allilla ruraskakunawami mana pandarig tukugsamú.

²⁵ ¿Manachu chasallata sug karisapa warmi, Rahab suti rurarka? Chi warmika, iska Israelmanda runakuna chi puiblupi pakalla chapaspa purinakuskata paipa wasi ukuma pakakuchirkakunata. Nispaka, sug ñambita llugsichirkakunata. Chasa allilla ruraskawami chi warmi mana pandarig tukugsamurka.

²⁶ Imasami, alma llugsiura, kuirpu wañuska ka: chasallata maikanpas, Taita Dioswa iuiariillawa kaspaka, ñi ima allilla mana ruragpika, chi iuiarii, wañuskasinami niraiá.

Simiwa rimaskamanda

3 Nukapa kuiaska taitakuna, kampurakuna mana munangichi, achkakuna Diospa Rimaita iachachigkuna tiangapa. Kasa iuiarisunchi: nukanchi iachachigkunaka, sug luarpika sugkunamandapas masmi tapuchii tukungapa kanchi. ² Tukuikunami achka imapipas pandarinchi. Maikan mana pandarispalla rimagka, chi runakar tukui imapipas allillami ka. Paika, paipa kuirputapasmi mana sakinga, ñi ima jirukunata ruran-gapa.

³ Kaballupa simita prinumi wataspa churan-chi. Chiwanka nukanchi, maima munaskamami pusanchi. Chasa churaspami kaballupa kuirputa maima munaskama ñugpachinchi. ⁴ Kanuamandapas iuiariichi, maituku atun kagpipas. Maikanpas kanuata iakupi apakug, maituku sinchi wairakugpipas, uchulla walmullawami pai maima munaskama chi kanuata apachí. ⁵ Chasallata nukanchipa simi, † kuirpupi uchulla iukaspapas, nukanchipa rimaiwa pudirinmi, maituku atunpas tukugsamunga.

Chasallata iuiariichi: asllita nina, sindirispaka, atun ruku sachakunatapas pudinmi puchukanga. ⁶ Simipas, ninasina wagglichigmi ka. Chi simiwaka pudirinmi, tukui kai alpapi kaugsanakuskata paipa jiru rimaiwa wagglichinga. Chi simika, nukanchipa kuirpupimi tia. Chi simiwa rimaspaka, runakunapa iuiaitapasmi wagglichigsamú. Chiwami simika infirnumanda ninawa sindichiskasina ka. Chi simillawantami sugkunatapas kaugsankama wagglichingapa pudí. ⁷ Sachukupi kaugsagkunata i piskukunata, alpapi aliurispas purigkunata i iakupi kaugsagkunatapas, tukuikunatami runakuna mansuiachii pudinmi i mansuiachinkunallami. ⁸ Ikuti simitaka, ñi maikan runapas mana mansuiachii pudin-chu. Chi simiwa rimaita mana pudirinchi, imawapas arkangapa. Simika, wañuchiduru wambii jundachiskasina ka. ⁹ Chi simiwami nukanchipa atun Taita Diusta iapa suma kagta ninchi. Chillawantami runakunatapas mana allilla rimanchi, Taita Dios kikin rigchasina ruraska kagpikunapas. ¹⁰ Chi simillawantami allillata i mana allillatapas rimanchi.

Nukapa kuiaska taitakuna i mamakuna, chasa rimai-ka mana allilla kanchu. ¹¹ Suglla iaku ñawillapika, miski iaku i winja iakuka mana llugsinchu. ¹² Chasallata, nukapa kuiaskakuna, igus sachapi asiti surkuduru muiukunaka mana tiarinchi. Ñi ubas sachapi igus muiukunaka mana tiarinchi. Chasallata, suglla iaku ñawipika, kachi iaku i miski iakuka mana llugsinchu.

Taita Dios karaska iachaimanda

¹³ ¿Kamkunapura tianchu tukuipi iachag? Maikan chasa tiagpika, paipa alli suma kaugsaiwa uchullasina tukuspa, kawachichu pai sutipa iacha kagta. ¹⁴ Ikuti maikan sugkunata jiru iuiaiwa kawaspa, kikinpura “Nukaka, masmi kani” iuiarikugka, mana suma atuniachiriskasina iuiakuchu, maituku iacha kaspapas. Chasa

jiru ruraskawaka kawachikumi, tukuipi llulla kagta.

¹⁵ Chi iachaitaka, Taita Dios mana karanchu. Kai alpamandalla runakunapa iuiaila i iaia kukupa iuiachiskallami ka.

¹⁶ Maikan sugkunata jiru iuiaiwa kawaspa, kikinpura “Nukaka, masmi kani” iuiarispas kaskakunapagpika, piñarispalla i tukui mana allilla ruraspallami kaugsankuna. ¹⁷ Ikuti Taita Dios karaska iachaita iukagkunaka, ñi imapi mana pandaris-pallami kaugsankuna. Chi-manda, tukuikunawa sumaglla mana piñachirinakus-pallami kaugsankuna. Paikunapa suma iuiaiwa tukuikunamandami alli iuiankuna. Ima niskatami uiankuna. Sugkunamanda llakispas, tukui imapipas allillami rurankuna. Ñi pitapas mana sug rigcha sug rigcha iuiaiwa kawas-palla, ñi imapipas mana llullaspallami kaugsankuna. ¹⁸ Maikan sumaglla pasinsiachispas, tukuikunawa sumaglla kaugsanakug, paikunakar, Diospa ñawipi alli runakunami niraiankuna.

Kai alpapi ima tiaskakunallawa mana iacharingapa niskamanda

4 Kam kikinpura, ¿imamandatak makanakui i piñachirinakui tiagsamú? Kam kikinkuna mana suma iuiai iukaspami chasa ruranakungichi. ² Ima munaskata mana tarispaka, kam kikinpurami wañuchirinakungichi. Sugpata iukangapa munarispas, mana kichui pudispaka, chimandami makanakuspa i piñachirinakuspa kaugsanakungichi. Taita Diusta mana mañaspami kamkuna mana iukangichi. ³ Paita mañaspaka, kam kikinkunamandalla allilla kangapa iuiarispas mañanakugmandami mañanakuskaka mana chaskingichi.

⁴ Kamkuna, Diospa ñawipi sug rigsi iukagsinami kangichi. ¿Manachu iachangichi: kai alpapi tiaskakunallawa iacharigka, Taita Diusta wasa churagsinami niraiá? Maikanpas kai alpapi tiaskakunallawa iacharigka, Taita Diospa kuntrami ka. ⁵ Chimandachar ñugpamanda librupi kasa willaraiá:

Imasami kusa, warmindita muná, paillawa kangapa; chasallatami Santu Ispíritu nukanchipi kaugsagka, nukanchita muná, paiwa suglla kagsina kangapa. ⁶ Chiwanka Taita Dioska, alli iuiaikunatami kará; chasaka, nukanchi sumaglla kaugsangapa. Chimandami ñugpamanda librupi kasapas willaraiá: Iapa atuniachiriska iuiaiwa kagkunataka, Taita Diosmi paikunata piñarí. Ikuti mana atuniaspalla iuiaiwa kagkunataka, alli iuiaikunatami kará; chasaka, paikuna sumaglla kaugsangapa.

⁷ Chimandaka, Taita Diospa tukuichi, paimandalla kangapa. Iaia kukuta mana sakirispalla michariichi. Chasa ruragpika, chi iaia kukuka kamkunapagmanda mitikungami. ⁸ Taita Diospagma mana manchaspalla kaillaiaichi. Chasa ruragpika, paipas kamkunapagma kaillaiangami.

Mana allilla ruragkuna kaspaka, chi mana allillata maillarigsina ruraichi. Kai alpawa i Taita Dioswa sugllapi iuiagkuna, tukui sungupi jiru iuiaita sakiichi, Taita Diospalla kangapa. ⁹ Chimandami niikichita: irkiaichi;

† griego rimaiwa: kalluwa.

wakaichi; llakiriichi. Asinakungataka, niikichitami: wakaichi. Suma iuiaiwa kuntintulla kangataka, niikichitami: irkiaspa llakiriichi. ¹⁰ Atun Taita Diospa ñawipi mana iapa atuniachirispalla iuiai iukaichi. Chasa ruragpika, Taita Diosmi kamkunata atuniachinga.

¹¹ Taitakuna i mamakuna, kamkunapura ñi imapipas mana juchachinakuichi. Maikanpas sugkunamanda juchachispa, mana allilla rimakugpika, Taita Dios ima rurangapa willaskamanda mana allilla rimagmi niraiá. Chasa ruraspaka, Taita Dios imasa willaskasina rurag kangataka, kikin justisia kagsinami tukú. ¹² Suglla Taita Diosmi tia, runakuna imasa rurangapa nidur. Paillatami justisia kangapa ka. Paimi pudí kispichingapa u puchukangapa. Nigpi kamka, ¿pitak kangi, justisia tukuspa, kamba waugkindikunamanda mana allilla rimakungapa?

Kaia ima pasaringapa kaskata mana iachaskamanda

¹³ Kunaura uiawaichi, kamkuna kasa nigkuna: “Kuna puncha u kaia, chi puiblumami risunchi. Randispa katuspa, sug watami chipi chisiasunchi, kulki mirachinkama”. ¹⁴ Kamkunaka mana iachangichichu, ñi kaia ima pasaringapa kagta. Nukanchipa kaugsai, puiusinami ka; imasami puiuka, kawarispas, sug mana unaillapika ikuti mana kawarí: chasa. ¹⁵ Mas allimi kantra, kamkuna kasa ningapa: “Atun Taita Dios munagpika, nukanchi, kaugsaspa, kasa u chasami rurasunchi”. ¹⁶ Chasa ningataka, kamkuna atun tukuspami rimakungichi. Chasa atun tukuspa iuiagkunaka, mana allilla rurankunachu. ¹⁷ Maikanpas, allilla rurangapa iachaspapas, mana ruragpika, pandarigmi ka.

Iapa iukagkunata iuiachiskamanda

5 Kamkuna iapa iukagkuna, kaparispas wakaichi. Kamkunata iapa llakiiimi chaiangapa ka. ² Kamkuna tukui iukaskaka, Diospa ñawipi ismuskasinami kawarí. Kamkunapa suma katangakunapas, pulilla mukuskasinami ka. ³ Kamkunapa kuri i kulkipas, lim wakariskasinami niraiá. Chi wakariskaka kawachikumi, kamkuna tukui pandariska kagtakuna. Chi wakariskaka, kamkunapa aichata nina tukuspa rupachigmi tukungapa ka. Chi iukaikuna wakachiriskakunaka, kai alpa tukurii punchakuna Taita Diospa rabia wakachirigsinami niraiá.

⁴ Kamkunapa piunkunata mana allilla pagaskamanda, chi kulkikunallatami kamkunamanda mana allilla rurankuskata willaku. Chi piunkuna llakiiwa kaparinakuskata, tukui manduiug atun Taita Diosmi uiaku. ⁵ Kamkuna, kai alpapi suma mikuspa i upiaspa, imasa munaskasina kaugsaspaka, wagra wiraiaskasinami tukungichi. Chasaka, ñami wira wagrata wañuchii puncha chaiakugsina kamkunata chaiamuku.

⁶ Kamkuna, mana allilla justisiaspallami alli runakunata wañuchingichi. Paikunaka, mana micharirkakunachu.

Iaia Jesús samunkama, upalla mana sambiaspalla suianakungamanda

⁷ Taitakuna i mamakuna, Iaia Jesús samunkama, upalla mana sambiaspalla suianakungichi. Chagra rurag runata iachaikuichi. Paika, tarpuskata manara pallankama, iukanmi mana sambiaspalla suianga, ñugpa tamia i kati tamia ialinkama. ⁸ Chasallata kamkunapas, Taita Dioswa iuiariilla kaspas suiingichi, mana sambiaspalla. Iaia Jesuska, ñami chaiagsamungapa ka.

⁹ Taitakuna i mamakuna, kam kikinpura mana piñachirinakuspalla kaugsai. Chasaka, mana justisiai tukunkangichichu. Taita Dios justisiag, ñami punguma chaiamukugsina ka.

¹⁰ Taitakuna i mamakuna, Santu Ispirituwa ñugpata rimagkunata iachaikuichi. Paikuna, atun Taita Diospa Rimaita willaspami karkakuna. Llakii iukaspapas, mana sambiaspallami kaugsarkakuna. Kamkunapas chasallata kaugsai. ¹¹ Maikanpas, llakiiwa kaspapas, mana sambiaspalla kaugsagkunamandaka ninchimi: “Taita Diospa iapa kuiaskami ka”. Job suti runa, iapa llakiiwa kaspapas, mana sambiaspalla kagmanda ñami iachangichi. Paita, katima, atun Taita Dios tukui kutichirka. Atun Taita Dioska, nukanchita iapa kuiaspa, llakiiwami kawaku.

¹² Taitakuna i mamakuna, imasa kaskata mana kawag churangichi sug luarta, ñi kai alpata ñi ima suti-kunataspa. “Ari” ningapa chaiagpika, “Ari” ningichilla. “Mana” ningapa chaiagpika, ningichilla: “Mana”. Chasa nispaka, mana justisiai tukunkangichichu.

Taita Diusta mañaimanda

¹³ Maikanpas llakii iukaspaka, Taita Diusta mañangichi. Maikan kuntintulla kaspaka, Taita Diusta birsiuwa kantangichi, “Kam, iapa allimi kangi” nispas. ¹⁴ Maikan ungug kaspaka, Jesuswa tukuskapura iacha taitakunata kaiangichi; Taita Diusta mañapuspa, Iaia Jesus- manda iuiarispas, asitiwa paita kakuchukuna. ¹⁵ Iaia Jesuswa suma iuiarispas mañapugpikunaka, paimi, chi ungugta aliachispa, atarichingapa ka. Chi ungug ima pandariskakunatapasmi pasinsiai tukungapa ka. ¹⁶ Chi-mandami niikichita: kam kikinpura ima pandariskakunata willarinakungichi. Kam kikinpuramanda mañapunakungichi, Taita Dios kamkunata aliachichu.

Allilla rurag runa, tukui suma iuiaiwa mañaskawaka tukui iapami pudirí. ¹⁷ Elías suti Santu Ispirituwa ñugpamanda rimag, paimi, nukanchisinallatata kaspas, Taita Diusta: “Mana tamiachu” suma iuiaiwa mañarka. Chiuraka, sutipami kimsa wata sugta killa kai alpapi mana tamia urmaka. ¹⁸ Ikuti tamiangapa mañauraka, chasallatami tamiagsamurka. Chiura, alpapika ikuti tukui mikuimi tiarigsamurka.

¹⁹ Nukapa taitakuna i mamakuna, kasa iuiariichi: kamkunapuramanda maikanpas mana allillapi urmagpika, chi runataka sug runawa iuiachingichi, Taita Dioswa ikuti tigrangapa. ²⁰ Kasa iachaichi: chi pandariskuskata kispichig, chi runapa almatami kispichingapa

ka, mana diltudupa wañungapa. Chasallata, chi tukui
pandariikunatapasmı pasinsiachingapa ka.

1 SAN PEDRO

¹ Jesucristo kachamuskami nuka kani, Alli Willaita willaspa puringapa. Kamkuna kikinpa alpamanda rispa, kasama chasama purispa, Ponto, Galasia, Kapadosia, Asia i Bitinia suti alpapunapi kaugsanakuskatami kai karta kachaikichita. ² Kamkunataka, Taita Dius ñugpamandata pai imasa munakuskasinami agllarka. Paipa Ispirituwa paipallami tukugsamurkangichi; chasaka, paita suma uiaspa, Jesucristopa iawarwa mailaska niraiangapa. Taita Dius, kamkunata kuiaspa, askurinti suma iuiaiwa kawapuachu.

Suma luarpi kaugsagringapa iuiailawa kaugsasunchi

³ Nukanchipa Iaia Jesucristopa Taita Diusta nisunchi: “Kam, iapa suma atunmi kangi”. Paika, Jesucristo wañuskata kaugsachiskawa, nukanchimanda iapa suma llakirispas, musu kaugsaitami karamurka. Chiwanka, suianakunchimi, suma luarpi kaugsagringapa. ⁴ Chipika, Taita Dius kamkunata karangapa kaskatami wakachiraiá. Chi wakachiraiaskaka mana tukuringapa kanchu sug tugtu chakirigsina u ima ismugsina.

⁵ Kamkuna Cristowa suma iuiarigkunamanda, Taita Diuspa iapa iachaiwami kamkunata chariku. Chasaka, tukurii punchakuna chaiaura, pai imasa niskasinami kamkunata diltudupa kispichingapa ka. ⁶ Chimandami iukangichi kuntintulla kangakuna, kamkunata achka llakii-kuna pasangapa chaiagpipas. Chika, mana unailami ialinga. ⁷ Imasami kuri, ninapi rupachiskawa alli kagta iachankuna: chasallatami kamkuna, iapa llakii-kuna chaiaskawa Cristowa suma iuiarigkuna kagta kawachirinkangichi. Kuri puchukarinmi. Ikuti Cristowa suma iuiarigkunaka, llakii chaiagpipas, kurimandapas mas balimi niraiangichi. Jesucristo kawarigsamuuraka, paiwa suma iuiarigkunata suma atuniachispa, ningapami ka: “Kamkuna, sumami nukawa iuiarirkangichi”.

⁸ Kamkuna, Jesucristota mana kawaspapas, paita kuiangichimi. Manara kawaspapas, paiwa suma iuiarispami kaugsanakungichi. Chasa iuiarispami ñi imawa mana rimai pudiringasina iapa suma alli iuiachiwa kangichi, kasa iachaspa: ⁹ paiwa suma iuiarispami kamkunapa almata kispichiska niraiangichi.

¹⁰ Santu Ispirituwa ñugpamanda rimagkunaka, Taita Dius kamkunata suma kuiaspa kispichingapa kagta willaspapas, tapunakuspa tapunakuspami munarkakuna, chi kispichiita ima niraiaskata iachangapa.

¹¹ Cristopa Ispiritumi paikunata ñugpamandata iuiachirka, Cristo kikin iapa llakii nanai pasangapa kagta; nispaka, sug luarpi atun sumaiachigrii tukungapa kagta. Chasa iuiachiuraka, paikuna tapunakurkami Cristo

pi kangapa kagta i imaura chasa pasaringapa kagta. ¹² Chasa tapunakugtaka, Cristopa Ispiritumi iuiachirka, paikuna kaugsanakuskamandaka mana willanakugta. Kamkuna kunaora kaugsanakuskamandami Jesucristomanda chasa willanakurka. Kunaoraka, chi ñugpamanda willaskakunallatatami suma luarmanda kachamuska Santu Ispirituwa willagkuna, kamkunata ña willanakú. Chi willaitaka, anjilkunapasmi munantrakuna iachangapa.

Tukuipi alli kangapa, Taita Dius nukanchita agllaskamanda

¹³ Chasamanda, allichirispas, tukuipi alli iuiaiwa kaugsapuanakuichi. Suianakuichi, Jesucristo kawarigsamunkama. Chiurami Taita Dius, suma kuiaspa, kamkunata ima karangapa kaskata chaskinkangichi.

¹⁴ Suma uiag wambrakunasina, Taita Dius ima niskata uiaspa ruraichi. Paita manara rigsispa, jiru iuiai munai-kunawami karkangichi; chasa ruraspas mana kaugsanakuiichi. ¹⁵ Chasapaka, imasami Taita Dius kamkunata agllag, mana pandarig tukuipi alli ka: kamkunapas chasallata tukuipi allillapi kaugsapuaichi, mana pandarispalla. ¹⁶ Chasallatami Taita Dius ñugpamanda librupi willarka, kasa nispa:

Nuka, mana pandarig tukuipi allimi kani.

Chimandami kamkunapas iukangichi tukuipi alli kanga, mana pandarispalla.

¹⁷ Kamkuna, Taita Diusta ningichimi: “Taitami kapuangi”. Paimi, tukuikunata imasa allilla u mana allilla ruraskata kawaspas, imasa chaiaskasina justisiai rurá. Chimanda kamkuna, kai alpapi ialigkunasinalla iuiarispas kaugsankama, paita suma kuiaspa manchaiwa kapuaichi. ¹⁸ Kamkunapa ñugpamanda taitakuna, mana Taita Diuswa iuiarispallami kaugsarkakuna. Paikunasina mana kaugsangapami kamkunata Taita Dius kispichigsamurka. Tukuridiru kulkiwa u kuriwa mana kispichigsamurkachu. Chita allillami iachangichi. ¹⁹ Cristo wañuchii tukuspa, paipa iapa suma iawarwami kamkunata kispichigsamurka. Imasami iura ubija ñi imapipas mana mapasina kawariskata runakunamanda wañuchii tukú: chasallatami Cristo ñi imapipas mana mapasina kaskata kamkunamanda wañuchii tukurka. ²⁰ Kai alpa manara tiagpitami Cristota agllaska karka, chasa wañuchii tukungapa. Kai alpa tukuringapa kaillaiakuurami kamkunamanda kawarigsamurka. ²¹ Pai Cristo samuskamandami kamkuna Taita Diuswa suma iuiarigsamurkangichi. Taita Dius kikin-

mi, Cristo wañuskata kaugsachispa, sumaglla atunia-chirka. Chasamandami kamkuna Taita Dioswa suma iuiarispa suianakungichi, paipagma chaigringapa.

²² Sutipa Alli Willaita suma uiaspa, kamkunapa alma-ka maillaskasinami niraiagsamungichi; chasaka, kam kikinpura sutipa kuianakuspa kaugsangapakuna. Chi-mandami iukangichi, tukui suma iuiaiwa parijuma iapa kuianakunga. ²³ Kamkuna mana niraiangichichu wañu-dur taitakunamanda tiagsamugta. Imaurapas kaugsai iukag mana puchukarig Diospa Rimaimandami musu kaugsaita chaskiska niraiangichi, suma luarma ringa-pa. ²⁴ Chasallatami ñugpamanda librupi willaraiá, kasa nispa:

Tukui runakuna,
ugsasinallami kankuna.
Maituku suma kaugsaskakunapas,
ugsapa tugtusinallami kankuna.
Ugsa chakiriura,
tugtukunapas urmankunami.

²⁵ Ikuti Atun Taita Diospa rimai-ka ñi imaurapas mana puchukaringapa kanchu. Chi rimai-ka, kamkunata Alli Willai willaskatami niraiá.

2 Chimandami niikichita: tukui mana allilla rurai-kunata sakiichi. Mana imapipas llullachinakuichi. Mana kawariichi alli runa kagta, mana kaspapas. Ñi pi-tapas mana jiru iuiaiwa kawaichi. Mana pimandapas wasa rimaiichi. ² Imasami uchulla wawakuna, tiag-samuuramanda lichillata upiangapa munankuna: chasallatami kamkunapas iukangichi, Diospa Rimai-la iachangapa munangakuna. Chasawaka, suma wiñagsina tukuspami diltudupa kispirinkangichi. ³ Iaia Jesús sutipa alli kagta iachagsamuspa paipa Rimaita chasa munangapa kangichi.

Cristo, iapa bali rumi kagsina kaskamanda

⁴ Iaia Jesuspagma alli iuiaiwa kaillaiichi. Paimi ka mana tukuriduru suma kaugsaita karag. Imasami wasi-chinakuskapi mana suma rumita wabutinkuna: chasa-llatami chiuramanda runakuna, Jesusta wabutirka-kuna. Paitaka, Taita Dios kikinmi agllarka, Taita Diospa ñawipi iapa bali rumi kagsina kangapa.

⁵ Kamkunapas, musu kaugsaita iukaspas, suma rumi-kunasinami kangichi. Imasami achka rumikunawa suglla wasi saiachinkuna: chasallata sakichiringichi, Santu Ispíritu kamkunata Cristowa suglla wasisina rurangapa; chiwanka, Taita Diosmandalla kaugsag sasirdutikuna tukungapa; chasaka kam kikinkuna, ima karai ruragsina paita iukachiringapa. Chasa iukachirig-kunataka, Jesucristowami Taita Dios chaskinga.

⁶ Chasallatami Taita Dios, ñugpamanda librupi willar-ka, kasa Iaia Jesusmanda nispa:

Imasami, wasichii kallaringapa
mas atun rumita churangapa chaiá:
chasallata Sión lumapi
sug runatami churani.
Paillami kapuá nuka agllaska iapa bali rumisina.
Paiwa suma iuiarigkunata
mana chaiangachu,

ianga suiangapa.

⁷ Kamkuna paiwa suma iuiarigkunapa ñawipi, paika ia-pa bali rumisinami niraiá. Ikuti paiwa mana iuiarig-kunaka, paita wabutigsinami rurankuna. Ñugpamanda librupi, kasami paimanda niraiá:

Wasichigkuna wabutiska rumi
wasita charigmi tukurka.

⁸ Paikunamandaka kasapasmi niraiá:

Chi rumipi takarispami urmangakuna.

Iaia Jesusmanda rimaita iapa mana suma uiagkunami chi rumipi takarigsina niraiá. Paikunamandami Taita Dios chasa tukungapa nirka.

⁹ Ikuti kamkunaka, Taita Dios kikin agllaska runa-kunami kangichi. Iaia mandagpa sasirdutikunami ni-raiangichi. Taita Diosmandalla kaugsag runakunami kangichi, paipalla kangapakuna; chasaka, Taita Dios ia-pa suma alli ruraskakunamanda, kamkuna willaspa kangapakuna. Paimi kamkunata kaiarka, iana tutapi-sina kaugsanakuskata sakispa, paipa iapa suma pun-chaichiska iuiaiwa kaugsangapakuna. ¹⁰ Ñugpataka, kamkuna mana Taita Diospa runakuna karkangichi-chu. Ikuti kunaureka, Taita Diospa runakunami ni-raiangichi. Ñugpataka, kamkunamanda ñi pipas mana llakii iukarkakunachu. Ikuti kunaureka, Taita Diosmi kamkunamanda llakii iuká.

Taita Dios ima niskata allilla ruraspalla kaugsasunchi

¹¹ Nukapa kuiaskakuna kai alpapi ialigkunasinalla kaugsanakuskatami mañaikichita: kam kikinkunapa jiru iuiai munaikunata mana ruraspalla kaugsai-ki. Kamkunapa jiru iuiaikunawa i alli iuiaikunawa makana-kugsinami kankuna. ¹² Taita Diusta manara rigsig-kunapa ñawipipas allilla ruraspalla kaugsai-ki. Chasa kaugsagpikunaka, paikuna, kamkunamanda “Jiru ruragkunami kankuna” nigpipas, kamkuna allilla ruras-kakunatami kawangakuna. Nispaka, justisiai pucha chaiaura, Taita Diusta ningakunami: “Kam, iapa suma atunmi kangí”.

¹³ Kai alpapi tukui mandagkuna imasa niskasina rurangichi, Iaia Jesusta kuntintachingapa. Iaia mandag imasa niskasina rurangichi, tukui-kanamanda mas atun niraiagmanda. ¹⁴ Chasallata, iaia mandag chu-raska mandagkuna imasa niskasinapas rurangichi. Maikankuna jiru ruraskakunata justisiangapami chu-raska kankuna. Ikuti allilla ruragkunataka: “Sumaglla ruraspami kangichi” ningapami churaska kankuna.

¹⁵ Kamkuna allilla ruraspalla kangapami Taita Dios muná. Chasa ruraskakunawami Taita Dios muná, upakuna i mana allilla iuiagkunaka kamkunamanda mana ima-pas juchachinakungapa.

¹⁶ Taita Diospa ñawipi, ñi pipa lutrinsina mana ni-raiangichichu. “Kachariskasinami kani, nuka imasa munaskasina ruraspalla kaugsangapa” iuiaris-papas, mana iukangichichu, jiru ruraikunata ruranakunga. Chasapaka, Taita Diospa lutrinsinakuna iuiarispa, tukui-ki allilla ruraspalla kaugsangichi. ¹⁷ Tukuikunawa sumaglla allilla kangichi. Cristowa iuiarig waugkindi-sina kuianakuspa kaugsangichi. Taita Diusta suma

kuiaspa manchangichi. Iaia mandagta suma uiangichi.

Cristo, nukanchimanda iapa llakii pasaspa, chasallata kaugsangapa iuiachiskamanda

¹⁸ Lutrinkuna, kamkunapa patrunkunata tukuipi suma manchaiwa uiangichi. Alli patrunkunallata, mana; mana alli patrunkunatapasmi iukangichi suma uianga. ¹⁹ Maikanpas, ianga asutii tukuspaka, Taita Diosmanda iuiaripa mana piñarispalla pasagpikunaka, paitaka, Taita Diosmi iapa kuianga. ²⁰ Kamkuna jiru ruraskamanda asutiura, mana piñarispalla kagpikunaka, ñi ima primiu mana tiangapa kanchu. Ikuti kamkuna tukuipi allilla ruranakugmanda ianga asutigpika, mana piñarispalla kagpikunaka, Taita Diospa ñawipika allimi ka.

²¹ Taita Dios, kamkunata agllarkami, chasa llakiikuna pasangapa, mana piñarispalla. Cristo, kamkuna-mandami iapa llakii pasarka. Chasa pasaspaka, kamkunata kawachirkami, paisina chasallata kaugsangapakuna. ²² Pai Cristo, ñi ima pandariipas mana ruraska karkachu. Ñi pitapas mana llullachiska karkachu. ²³ Paita kaminakuura, chasallata mana ainidur karkachu. Paita nanachinakuura, mana randichingapa rima-rikurkachu. Chasapaka, kasa iuiailawami karka: "Tukuipi allilla justisiai rurag Taita Diospa makipimi kani". ²⁴ Pai kikinpa kuirpupi nukanchipa pandariikunata aparigsinami kruspi klabai tukurka; chasawaka nukanchi, jiru iuiaikunata sakispa, wañuskasina tukuspa, mana imapipas pandaringapa i allilla ruraspa kaugsangapakuna. Paita kruspi klabaspa nanachiskawami kamkuna ambiriska tukugsamurkangichi. ²⁵ Ñugpataka kamkuna, sug ubija chingaska purinakugsinami kaugsanakurkangichi. Ikuti kunauraka, Cristowami tukugsamurkangichi. Paimi ka ubijakunata suma kawagsina. Kamkunata suma kawagmi ka.

Kusandi warmindi imasa kaugsanakui iukaskamanda

3 Chasallata, warmikuna, kam kikinkunapa kusata suma uiaspa kaugsangichi. Chasaka, Diospa Rimaita manara uiangapa munag kusapas, paipa warmita allilla ruragta kawaspaka, pudingami chi Rimaita uiagsamungapa, kam mana willagpipas. ² Kamkuna tukuipi sumaglla uiaspa ruraspa kagmandami pai pudinga Cristowa tukugsamungapa. ³ Kam warmikuna, "Sumaiasami" iuiaripa, iapa bali katangakuna i kurita ruraskakuna churaripa mana kaugsangichi. Umamanda agchatapas mana iapa sumaiachingichi; chasaka, suma kawaringapa iuiaspalla. ⁴ Chasapaka, kamkunapa tukui iuiaikunata sumaiachiichi. Chi iuiaita sumaiachigka, tukuiwa sumaglla kaugsaimi iukangapa ka. Chi sumaiachiskaka, ñi imaurapas mana puchukaringapa kanchu. Chasa kagkuna, Diospa ñawipi iapa allimi kankuna. ⁵ Taita Diosmandalla kaugsag ñugpamanda warmikunapas, chasallata alli iuiaitami sumaiachirkakuna. Paikunaka, "Taita Dioswami kani" iuiaripa, kikinkunapa kusata sumami uiadur karkakuna. ⁶ Sara suti Abrahampa warmimi chasa karka. Paipa

kusa ima niskata ruraspa, iacharkami paita ninga: "Nukapa iaiami kapuangi". Kamkunapas, allilla ruraspa, mana iukangichichu ñi ima manchaiipas iukangakuna. Chasaka, Sarasinallatatami tukugsamunkangichi.

⁷ Kusakunapas, chasallata, kamkunapa warmiwa iukangichimi, tukuipi sumaglla kaugsangakuna. Iuiarii-chi, warmikunaka karisina mana wapu kagtakuna. Taita Dios, kamkunata i paikunata suma kuiaspa, iskandikunatami nirka, diltudupa kaugsaita karangapa. Chasamanda, kamkunapa warmita niichi: "Suma kuiaska, allimi kangi". Chasaka, kamkuna Taita Diusta mañakuura, chi mañaikuna mana imapipas arkai tukungachu.

Alli ruragkuna, llakii pasangapa kaskamanda

⁸ Niggpika chaiakumi, tukuikuna, suglla kagsina iuiaripa, alli iuiaikunawa sumaglla kaugsanakungapa. Kuianakuspa, parijuma llakinakuspa, mana atuniachiripa iuiaiwa kangichi. ⁹ Kamkunata ima jiru ruragpipas, mana chasallata randichingichi. Kamkunata kamigpipas, mana chasallata kutichingichi. Chasapaka, maikan jiru ruraspa rimagta: "Taita Dios, kamta iapa kuiaspa kawapuachu" ningichi. Taita Dios, kamkunata iapa kuiaspa kawangapami agllarka. ¹⁰ Chasallatami ñugpamanda librupi willaraiá, kasa nispa: Maikanpas unai suma kuntintulla kaugsangapa mu-

nag iukanmi kikinpa kalluwa mana jiru rimanga; chasallata, kikinpa simiwa mana llullanga; ¹¹ tukui mana allilla ruraikunata sakispa, tukui allillataka ruranga; tukuikunawa sumaglla kaugsangapa iuiarispalla kanga.

¹² Atun Taita Dios, allilla ruraspa kaugsanakuskata sumami kawá. Paikuna mañaskatapas uianmi. Ikuti jiru ruragkunataka, atun Taita Dios mana munanchu.

¹³ Kamkuna imaurapas allilla ruraspalla kagpikunaka, ¿pitak kamkunata mana allilla rurangapa pudingakuna? Ñi pipas manima. ¹⁴ Chasa kagpipas, kamkuna allilla ruraspa, llakii pasaspa kagmanda, Taita Diospa iapa kuiaskami kankangichi. Kamkunata piñagkuna ima rimagpipas, mana paikunata mancharingichi.

¹⁵ Chasapaka, Cristo kamkunapa iaia kagmanda, paita kamkunapa iuiaiwa ningichi, tukuipi mas alli kagta. Maikanpas kamkunata tapuchukuna, kasa nispa: "¿Piwatak iuiaringichi, chituku kuntintulla suianakungapa?": chasa tapuuraka, kamkuna suma iuiaripa kangichi, imasa allilla ainingapa. ¹⁶ Tukuipi suma ainingichi, mana atuniachirispalla. Tukuipi allilla ruraspa kaugsangichi. Chasaka, mana kamkunapa iuiaipei ñi ima jiru ruraska kawaringachu. Chasa kawaspaka, kamkuna Cristowa allilla ruraspa purigkunamanda mana suma rimagkuna, kikinkunami pingaipa pasangakuna.

¹⁷ Kamkuna jiru rurangataka, allilla ruraskamanda lla-

kichigpikunaka, Taita Dios chasa munagmanda, paipa ñawipi mas allimi niraiankangichi.

¹⁸ Jesucristo kikinmi tukuikunapa pandariikunamanda sug białilla wañurka. Pai tukuipi allilla rurag, nukanchi mana allilla ruragkunamandami wañurka; chasaka, nukanchita Taita Diospagma pusangapa. Paipa kuirpumi wañurka. Ikuti paipa Ispirituka, kaug-sallami ka. ¹⁹ Paipa Ispiritullatami wichkaraiaska almakunata willagrirka. ²⁰ Chi almakuna, ñugpamanda taita Noé kai alpapi willakuura, mana paita uiaska karkakuna. Paikuna mana uiagpikunapas, Taita Dios mana piñaspallami suiakurka, Noé atun barkuta puchukankama. Pusag runakunallami chi barkupi iakupi wañungapa kispirirkakuna.

²¹ Chi iaku, baugtisadiru iakuta kawachigsinami karka. Chasamandami kunaora baugtisariskapi nukanchi kispirinchi. Baugtisiarura, mana kanchu kuirputa mapa anchuchingapa. Baugtisariskapi, Taita Diustami mañanchi, nukanchipa iuiapi tukuipi alli tukugsamungapa. Jesucristo kaugsariskamandami Taita Dios nukanchita kispichí. ²² Pai Jesucristo, suma luarma sikaspa, Taita Diospa alli ladumi tiaku. Anjilkuna, tukui sug luarpi mandagkuna i iapa pudigkunapas, pai ima niskatami iukankuna ruranga.

4 Chimanda, imasami Cristo, paipa kuirpupi nanai-kuna i llakiikuna iukarka: chasallatami kamkunapas iukangichi, nanai i llakii iukanga; chasaka, Cristollawa iuiapi kangapakuna. Maikanpas Cristomanda kikinpa kuirpupi nanai i llakii pasagka, mana allilla ruraikunatami sakinga; ² chasaka, kaugsankama, runakunapa jiru iuiaitami sakinga; Taita Dios imasa munakusasinami ruraspa kaugsanga.

³ Unaimi kamkuna, Taita Diusta manara rigsispapa, jiru munaiwa ruraspa kaugsanakurkangichi. Ñugpataka, imasa munaskasinami tukuipi jiru ruraspa kaugsanakurkangichi. Iapa machaspa, ialigta mikuspa i upiaspami karkangichi. Millangasina ianga diuskunatami kungurispapa muchanakurkangichi. ⁴ Ikuti kunaauraka, Taita Diusta rigsigkunawa kamkuna tukugsamuspa, chi jiru ruragkunawaka mana kagmandaka, paikuna, ujnarispa, kamkunamanda kamispami rimanakú. ⁵ Chasa rimanakugpipas, kaugsakunata i wañuskakunata justisiangapa puncha ñami chaiamuku. Taita Diustami chiura paikuna willaringapa kankuna. ⁶ Kasamandami wañuskakunatapas Alli Willaita willai tukurkakuna: paikuna, kai alpapi kuirpupi justisiai tukuspapas, paikunapa ispirituka, Alli Willaita uiaspa, Taita Diospa ñawipi kaugsangapakuna.

Tukurii punchakuna imasa kaugsangapa chaiagta

⁷ Tukui ima tiaskakuna tukuringapa punchaka, ñami chaiamuku. Chimanda, tukuikunawa alli iuiawi kaspapa, Taita Diusta mañanakungichi, mana kungarispalla.

⁸ Tukuimanda ñugpaka, kam kikinpura allillata kuianakunapa kaugsaiichi. Chasa kuiagka, achka mana allilla ruragkunata pasinsiagmi ka. ⁹ Maikan kam kikinpura

† Sugkunaka iuiankunami chi wichkaraiaska almakunaka, limbo sutipi Iai Jesusta suianakuska kagta.

wasima chaiagriskatapas kaiangichi, mana ñi imapas rimarispalla. ¹⁰ Imasami Taita Dios, sug sugta min-garka, kikinpura suma alli ruranakungapa: chasallatami iukangichi parijuma allilla ruranakunga. ¹¹ Imaura maikantapas rimangapa chaiagpika, Taita Dios iuiachiska rimaikunallata rimangichi. Maikanpas sugkunamanda allita rurangapa chaiagpika, Taita Dios karaska animuwa rurangichi. Tukui ima rurakuskapi, Jesucristomandalla iuiarispa rurangichi; chasaka, Taita Diusta: “Kam, iapa suma atunmi kangi” ningapakuna. Paita nisunchi: “Kam, imaurapas iapa suma atun tukui pudigmi kangi, maituku waranga waranga watakuna ialigpipas. Chasa kachu”.

Cristowa suma iuiarispa llakii pasaskamanda

¹² Nukapa kuiaskakuna, kamkuna Cristowa suma iuiarigkuna kaskata kawangapami llakiikuna nanai-kuna chaiamú; mas ima kagpipas, mana ujnaringichi. Chasa pasarigpipas, iuiariichi ñi ima mana pasarigsina.

¹³ Chasapaka, kamkunapa llakii iukaspa, kuntintulla kangichi, Cristopa llakiiwa sugllapi kamkunapas kagmandapa. Chasa iukaspaka, pai askurinti sumaglla kawarigsamuura, chiurami iapa kuntintarinkangichi. ¹⁴ Kamkunata Cristomanda kamigpikunaka, Taita Diospa iapa kuiaskami kangichi. Chika niraiami Taita Diospa iapa suma Ispiritu, kamkunawa sugllapi kagta. ¹⁵ Kamkunapa llakii mana kachu maikanta wañuchigmanda, ñi sisaimanda, ñi jiru ruraimanda ñi sugkuna imasa kaugsanakuskata kawaspa purigmanda. ¹⁶ Cristowa kagmandapa piñaspa kamispa llakichigpikunaka, mana iuiachi: “Pingaisinami ka”. Chasapaka, chi llakiikunamanda “Pai Siñur” Taita Diusta ningichi.

¹⁷ Taita Dios justisiangapa punchaka ñami chaiarka. Taita Dioswa tukuskakuna maipipas kaskakunatami justisiai kallariku. Nukanchita chasa justisiai kallarigpika, Taita Diosmanda Alli Willaita mana uiagkunaka, ¿imachar pasangakuna?

¹⁸ Allilla ruragkuna, maillamandallami kispirigakuna.

Taita Diusta mana manchaspa pandarigkunaka, ¿imasik pasangakuna?

¹⁹ Chasamanda, Taita Dios imasa lisinsiaskasina paikunata piñaspa kamispa llakichii tukugkunaka iukan-kunami, alli ruraita mana sakispalla apanakunga i Taita Dios nukanchita wiñachigpa makipi almatapas mingangakuna. Pai ima niska mana llullanchu.

Cristowa tukuskakunata iuiachiskamanda

5 Kunaauraka, kamkunapura iacha taitakunata iuiachingapami munani. Nukapas, kamkunasinapa iacha taitami kani. Cristo imasa nanaiwa llakiiwa kagta kawaskata willagmi kani. Paipa suma atun puncha kawarigsamuura, nukapas kamkunawa sugllapimi kawarigringapa kanchi. ² Kasami niikichita: Taita Dios kamkunata mingaska ubiakunasinata suma kawapuaichi. Taita Dios imasa munakuskasina alli iuiawami

iukangichi paikunata suma kawanga. Mana kawapuachi, maikan "Kasa rurai" nigmandalla ñi "Kulkimi kawanganga" iuiarispalla. Mana killaspalla tukuipi kawapuachi. ³ Kamkunata mingaskakunata mana iukangichichu, imasa munaskasina paikunata ruranga. Iukangichimi, paikuna imasa suma kaugsaita kwaspa iachai-kungasina suma kaugsangakuna. ⁴ Chasa kaugsagkunaka, ubijakunasinata iaia kawag Cristo kawarig-samuura, mana imaurapas waggllirig llaugtusinata chaskispa, sumaiachiimi tukungapa kangichi.

⁵ Chasallata, musukuna, iacha taitakunata suma uiachi. Tukuikuna iukangichimi, kam kikipura mana atuniachirispalla, ima iachachinakuskata suma uiangakuna. Chasallatami ñugpamanda librupi willaraiá, kasa nispá:

Maikan atuniachiriska iuiaiwa kagkunata,
Taita Diosmi paikunata wabufí.

Ikuti mana atuniachirispalla iuiaiwa kagkunataka
alli iuiaikunatami kará;

chasaka, paikuna sumaglla kaugsangapa.

⁶ Chasa kagmandaka, tukui pudig Taita Diospa ñawipi,
"Uchullasinami kani" iuiariichi; chasaka, pai niska pun-
cha chaimuuraka, suma atuniachiska kangapa. ⁷ Taita
Diuska, kamkunata suma kawagmi ka. Chimanda,
tukui llakiikunata iuiaikunata paipa makipi churaichi.

⁸ Imasami liun, pitapas mikungapa maskaspa, sinchi
wakaspa purí: chasallatami kamkunata piñag iaia
kukuka, pitapas puchukangapa maskaspa puriku. Chi-

manda, alli iuiaiwa rigcharaiagsina kapuaichi. ⁹ Jesu-
cristowa suma iuiarispá, chi iaia kukumanda micharii-
chi. Iachangichimi, tukui alpakunapi kamkunapa
waugki i panikunapas chasallata llakinakugta. ¹⁰ Kam-
kuna chi llakiikunata sug ratulla pasaskauramandaka,
iapa suma kuiag Taita Dios kikinmi, kamkunata tukui
allipi ruraspa, tukuipi allilla charingapa ka, mana pai-
pagmánda llugsichii tukungapa. Paimi nukanchita
agllarka, Jesucristowa paipa suma puncha luarpi dil-
tudupa kaugsagringapa. ¹¹ Paita nisunchi: "Kam, ima-
urapas tukui pudigmi kangí, maituku waranga
waranga watakuna ialigpipas. Chasa kachu".

Kaiakama, niskamanda

¹² Waugki Silvanowami kai uchulla kartata iskribirkai-
kichita. Paika, Cristowa suma iuiarig waugkimi kapuá.
Kamkunata suma iuiachingapami nirkaikichita, Taita
Dios sutipa kamkunata suma kuiagta willangapa. Chi
kuiaimanda mana kungaringichi.

¹³ Cristowa tukuskakuna Babilonia niraiaskapi kaska-
kuna, kamkunasina Taita Dios agllaska kagkunami,
"Puangi" ninakú. Nukapa wambrasina Marcospasmi,
"Puangi" kamkunata niku. ¹⁴ Kam kikipura Taita Dios-
pa kuiaiwa iuiarispá muchanakuspa, "Puangi" ninakui-
chi. Cristowa tukui tukuskakuna, sumaglla kaugsa-
puaichi.

2 SAN PEDRO

1 Nukapa kuiaskakuna, nuka Simón Pedro, Jesucristopa lutrinsina, pai kachamuskami kani, Alli Willaita willaspa puringapa. Nukanchipa Dios i kispichig Jesucristo tukuipi alli kagmandami, kamkunapas nukanchisina paiwa suma iuiarigkuna tukugsamurkangichi. **2** Taita Diosmanda i nukanchipa Iaia Jesusmanda kamkuna rigsiskamanda, Taita Dios, kamkunata askurinti kuiaspa, suma iuiaiwa kawapuachu.

Cristowa tukuskakuna, imasa kaugsai iukaskakunamanda

3 Taita Dios kikin, tukuipi atun suma alli kaspami nukanchita agllarka. Nukanchi paita rigsiskakunamandami, pai Taita Dioska paipa iapa iachaiwa ima ministiskakunata karamurka; chasaka nukanchi, paita iuiaripa, paimandalla kaugsangapakuna. **4** Chiwa, nukanchita willarkami, paiwa sugllapi iapa sumasina atun kagringapa. Chita suiaspaka, kamkuna, tukui millangasina ruraikunamanda anchuripa, Taita Dios imasa kaskapi sugllapimi tukunkangichi. Jiru munai-kunamandami chi millangasina ruraikuna kai alpama chaiamurka.

5 Chimandami kamkuna iukangichi, paiwa suma iuiaripa, tukuipi allilla kaugsangakuna. Ña tukuipi allilla kaugsanakuspaka, iukangichimi tukuipi Alli Willaita iachaikungakuna. **6** Alli Willaita tukuipi iachaikuspaka, iukangichimi, ima mana allilla iuiaripa munai apigpi, chita mana rurangakuna. Tukui jiru munai-kunata sakispaka, iukangichimi mana piñanakuspalla kaugsangakuna. Mana piñanakuspalla kaugsaspaka, iukangichimi Taita Diusta allilla iuiarig kangakuna. **7** Taita Diusta allilla iuiarigkuna kaspaka, iukangichimi kam kikipura sumaglla parijuma llakinakuspa kawankunga. Chasa kawanakuspaka, iukangichimi tukui-kunata kuianakunga.

8 Kamkuna chasa suma iuiaiwa miranakupika, mana ianga kaugsanakunkangichichu. Chasallata, nukanchipa Iaia Jesucristota mana ianga rigsig kangangichichu. **9** Ikuti maikanpas mana chasa iuiai apagka, jiru ruraskakunata maillaska kagta kungarigmi niraiá. Ñawiwa mana karu kawangapa pudigsinami niraiá.

10 Chasamanda, taitakuna i mamakuna, Taita Dios kamkunata agllaspa kaiaskata mana kungarispalla, chi iuiaikunata sinchi chariripuaichi. Chasa sinchi charispaka, ñi imaurapas mana pandariipi urmankangichichu. **11** Chasaka, nukanchipa kispichig Iaia Jesucristo-

mi, kamkunata: “Samui” nispa, pai diltudupa suma mandakuskama sumaglla pusanga.

12 Chimandami ikuti ikuti chasallata iuiachispa kaikichita, kamkuna sutipa Alli Willaita ña iachagsamuspa chariraiagpikunapas. **13** Nuka kaugsankama, iukanimi kamkunata chi iuiaikunata iuiachikunga. **14** Nukanchipa Iaia Jesucristo willawarkami, ña wañui chaiawangapa kagta. **15** Chimandami munakuni, imasapipas, nuka wañuskauramandapas, kamkuna chi iachachiskakunata iuiailapi kangapakuna.

Cristo iapa suma punchalla kagta kawaskakunamanda

16 Iaia Jesucristo samuskamanda, pai tukuipi pudig kagta nukanchi kamkunata iachachiskaka, runakuna iuiariska ianga parlukuna mana kanchu. Pai iaia mandag kaskatami nukanchi kikinkunapa ñawiwa kawarkanchi. **17** Taita Dios paita atuniachispa sumaiachiskatami kawarkanchi. Askurinti suma puncha luarmandami kasa rimai uiarigsamurka: “Kaimi nukapa kuiaska wambra kapuá. Paita iapa alli sumami iuiachiiwa kawani”. **18** Nukanchi kikinkunami chi suma luarmanda rimaskata uiarkanchi. Chasa uiariura, Taita Diospalla tukugsamuska lumapi Iaia Jesuswami karkanchi.

19 Chi nukanchi kawaspa uiaskakunawami mas suma iuiarinchu, Santu Ispirituwa ñugpamanda rimagkuna willaska sutipa kagta. Chi ñugpamanda willaikunaka kanmi imawapas amsapi punchaiachigsina. Kamkunaka iukangichimi, chi willaikunata suma uiaspa, mana kungarispalla kangakuna. Chikunawaka, kamkunapa iuiaiipi punchaiachigsinami iukankangichi, Cristo kawarigsamunkama. Pakarikuura lusiru istrilla llugsí; chasallatami Cristo kawarigsamungapa ka.

20 Tukuimanda ñugpa, kasa iachaichi. Diospa Rimaipi Santu Ispirituwa ima ñugpamanda willaskakunataka mana pudiringapa kanchu, sug sug kikipa iuiailawa ima niraiaskata iachangapa. **21** Ñugpamanda willag runakunaka, kikipa iuiailawa mana willanakurkachu. Santu Ispiritu iuiachiskawami chasa Taita Diosmanda willanakurka.

Lullaspa iachachigkunamanda

2 Imasami, ñugpamanda Israelmanda runapura, llullaspa willagkuna tiarka: chasallatami, kam kikipura, llullaspa iachachigkuna tiangapa kankuna. Paikunaka, wagllichingapa iuiaiwami sug rigcha iuiaikunawa llullachispa iachachingapa kankuna. Chasaka, kispichig Iaia Jestustami wasa churaspa piñaringapa kankuna. Chasa ruragkunaka, mana unailami diltudu-

pa ninama sitai tukungapa kankuna. ² Achkakunami, chi iachachigkunata iachaikuspa, jiru ruraspa katingapa kankuna. Paikuna chasa jiru ruraskata kawaspaka, Alli Willai sutipa kaskatami kamiringapa kankuna.

³ Paikunaka, kulkilla munaspa, kikinkunapa llulla rimailawami kamkunata tuntiachingapa kankuna. Paikunamandami ñugpamandata niraiá, diltudupa puchukaringapa kagtakuna. Paikuna chasa puchukaringapa niskataka mana tianchu imasa kispichinga.

⁴ Pandarig anjilkunataka, Taita Dios mana pasinsiar-kunatachu. Paikunata alpa ukuma amsapi kadinawa wataspami churarkakunata, justisiag atun puncha chiankama. ⁵ Ñugpa punchakuna pandarig kaugsaskakunatapas, Taita Dios mana pasinsiar-kachu. Chi runakuna imasa munaska jiru ruraspa kaugsanakug-manda, tukuipi iaku jundachiskawami puchukarkakunata. Allilla kaugsangapa willag Noé suti runallatami sug kanchiskunallawa kispichirka. ⁶ Sodoma i Gomorra suti puiblukunapi kaugsanakuskatapas ninami kachamurka. Rupaspa, uchpalla tukugtami rupachirka. Kati punchakuna Taita Diusta mana manchaspalla kaugsagkunata mana chasa kaugsangapa iuiachingapami chasa rurarka. ⁷ Chasa kagpipas, sug alli rurag Lot suti runatami chipi rupangapa kaskata kispichirka. Lotka, chi jiru iuii munaillawa ruraspa kaugsanakuskata iapa llakiiwami kawadur karka.

⁸ Chi alli rurag Lotka, paikunawa sugllapi tukui punchakuna kaugsakuspa, jiru ruraskakunata kawaspami uiaspami paipa alli iuiailapi iapa llakiiwa karka. ⁹ Atun Taita Dios, paita iuiaripa kaugsagkunata llakii-manda kispichigmi ka. Ikuti jiru ruraspa kaugsanakugtaka, paimi charí, justisiag atun puncha chiankama. Chiurami diltudupa ninama sitai tukungapa kankuna.

¹⁰ Pai niskakunata piñaripa, kikinpa jiru iuiailawa imasa munaskasina ruraspa kaugsanakuskata masmi chi ninama sitaiwa justisiangapa ka. Chasakunaka, maituku nikugpipas mana uiaspalla, imasa munaskasina ruraspami kaugsanakú. Sug luarpi suma atun kagkunatapas mana manchaspalla kamigkunami kankuna. ¹¹ Ikuti anjilkunaka, paikunamanda mas iachai-wa pudig kaspapas, mana ima kamiipas paikunata rimankunachu; chasaka, atun Taita Diospa ñawipi mana justisiai tukungapakuna.

¹² Chi llullaspa iachachigkunaka, ñi ima mana juisiuspalla animalkunasinami kaugsanakú. Apispa, wañuchii tukungapagllami tiagsamuska kankuna. Paikuna mana iachaskakunatapas kamispallami rimankuna. Chasa rimagkunaka, animalkunasinami puchukarii tukungapa kankuna. ¹³ Sugkunata iapa llakichiskamanda, paikunapas chasallatami randichii tukungapa kankuna. Mana unaiilla ialingapa kusikuska pandariikunawami munankuna kaugsangapa. Kamkuna atun punchakuna ialichingapa sugllapi tandariskapi, chi iachachigkunapas, chipi kaspas, paikunapa mana unail-ialig kusikuiwaka iapa pingaiachispami kankuna. Chasa kawaspaka, kamkunapas pudingichimi pandaringa.

¹⁴ Paikunaka, maikan warmita kawaspaka, paita iapa munaripa iuiailawami kankuna. Mana saikun-kunatachu, jiru rurangapa. Cristowa manara suma iuiarigkunata mana allillapimi urmachinkuna. Tukui imapas iukangapa paikunamandallami munankuna. Chikunaka, maldiskami kankuna. ¹⁵ Cristowa sutipa suma iuiariita sakispa, sug rigcha iuiaikunatami apig-samunkuna. Ñugpamanda rimag Balaam suti Beorpa wambra imasa kaugsaskasinami kaugsankuna. Chi Balaamka munakurkami, pai jiru ruraskamanda kulkilla chaskingapa. ¹⁶ Pai chasa rurangapa iuiaspa rikuraka, kikin apakuska upa burumi, paita runasina rimaspa, piñaspa arkarka. Chasaka, pai upasina iuiakuskatami sakirka.

¹⁷ Chi llullaspa iachachigkunaka, iaku ñawi chakiris-kasinami kankuna. Waira pukuspa kasama chasama apaska puiusinami kankuna. Paikunamandami niraiá diltudupa iana tutapi kagringapakuna. ¹⁸ Paikunapa suma ianga rimaiwa rimaspa, jiru iuii munaikunata iuiachispa, chi jiru ruraikunamanda mailla anchuchirinauskata ikutimi iuiachinkuna, paikunasinallatata kangapa. ¹⁹ Ninkunami: “Wataskasinamanda kachariskami kankangichi”. Chasa nispapas, pai kikinkuna jiru munaikunawa ruraspa wataskasinami kaugsanakú. Maikan runapas sug jiru ruraita chariraiagpika, chi jiru ruraiwa wataskasinami ka. ²⁰ Maikanpas nukanchita kispichig Iaia Jesucristota rigsigka, kai alpapi jiru munaikunamanda anchuchiriskami niraiá. Chasa anchuchiriska niraiaspapas, ikuti chi jirukunama tigragpika, chi jirukunawa wataskasinami ikuti tukug-samú. Chasaka, ñugpamandapas mas jiru ruragmi tukugsamunga. ²¹ Maikanpas Taita Dios tukuipi alli mandaskata iachaspa anchurigka, mas allichar kantra, chi Alli Willaita mana iachagsamuspa kangapa. ²² Paikunamanda chasa niraiaskaka, kai nidirupimi kasa nig-samurka:

Alkuka, kikin kimnaskatami ikuti mikú.
Armachiska kuchipas,
ikuti turupimi builtiarí.

Iaia Jesús, ikuti samungapa kaskamanda

3 Nukapa kuiaska taitakuna i mamakuna, ña iskaima kartatami kachaikichita. Chi iskandiwaka suma iuiachingapami munaikichita. ² Taita Diuspalla kag Santu Ispirituwa ñugpamanda rimagkuna willaskata allilla iuiaripuaichi. Chasallata, kispichig Iaia Jesús ima niskata allilla iuiaripuaichi. Pai kikin kachamuska runakunami kamkunata chita iachachirkakuna.

³ Tukuikunamanda mas allilla, kasa iuiariichi: tukurii punchakunaka, Diospa Rimaita unzagkunami kawarig-samungapa kankuna. Pai kikinkunapa jiru iuiaita imasa munaskasina ruraspami kaugsangapa kankuna. ⁴ Unzaspa, kasami ningapa kankuna: “Cristo ikuti samungapa niskaka, ¿imawantak mana samú? Nukan-chipa taitakuna wañugpipas, ñi ima manima sug rigcha tukú. Imasami Taita Dios tukui ima wiñachiskaura-mandata kaska ka: chasallami ka”. ⁵ Chi unzagkunaka mana munankunachu iachangapa, sug luar ñugpa-

mandata tiagta. Kai alpatapas Diospa rimaiwami iaku-
 manda i iakuwa ruraspa wiñachirka. ⁶ Chasallata, atun
 tamiaska iakuwami kai alpapi ñugpamanda kaugsana-
 kuskata puchukarka. Chitapas mana iachangapa
 munankunachu. ⁷ Kunaura tiaska kai alpa i sug luarka,
 Diospa rimaillawantami charii tukunkuna, Taita Dios
 justisiai puncha chaiankama. Chiurami ninawa rupa-
 chii tukungapa kankuna. Chi punchami paita mana
 manchaspalla unzagkuna puchukai tukungapa kan-
 kuna.

⁸ Nukapa kuiaska taitakuna i mamakuna, mana kasa
 kungariichi. Atun Taita Diospa ñawipi, sug punchaka
 niraiami waranga watasina. Waranga wataka, suglla
 punchasinami niraiapú. ⁹ Ikuti sugkunaka ninkunami:
 “Atun Taita Dios iapami unaiaku, pai ima niskata rurag-
 samungapa”. Chasa mana kanchu. Atun Taita Dioska,
 pasinsialla suiaspa, mana munakunchu, pipas puchu-
 karingapa. Kamkunamanda iapa suma llakispami
 munaku, tukuikuna, pandariikunata sakispa, paiwa
 tigrangapakuna.

¹⁰ Chasa kagpipas, imasami sisai mana willaspalla
 samú: chasallatami, mana iuianakuura, Iaia Jesús
 samungapa ka. Chi punchaka, sug luar iapa
 manchangasina uiarispami puchukaringapa ka. Tukui
 ima chipi tiaskami ruraspa tukuringapa ka. Kai alpa i
 tukui ima tiaskakunapasmi chasallata ruraspa puchu-
 karingapa ka.

¹¹ Chasa tukui puchukaringapa kagta iachaspaka,
 kamkunata chaiakumi, Taita Diusta sumaglla iuiarisa,
 paimandalla kaugsangapakuna. ¹² Chasa suma kaug-
 saspas, suianakungichi, Dios samug puncha chaian-
 kama. Tukuipi allilla ruraspa kaugsanakungichi; chasa-

ka, chi puncha mana unaiilla chaiamungapa. Chi pun-
 cha, sug luar rupaspami puchukaringapa ka. Tukui
 ima tiaskapasmi ruraspa iakuiaspa puchukaringapa
 ka. ¹³ Ikuti nukanchika, Taita Dios niskata, musu sug lu-
 ar i musu alpatami suianakunchi. Chikunapika, tukui
 allikunallami kagringapa kanchi.

¹⁴ Chasamanda, nukapa kuiaska taitakuna i mama-
 kuna, musu sug luar i alpata suianakunkama, animu
 rurangichi, tukuipi alli ruraspa sumaglla kaugsanakun-
 gapa, mana pandarispalla. Kamkuna chasa sumaglla
 kaugsanakuskata, Taita Dios tarigsamuchu.

¹⁵ Kasapas iuiaripuaichi: nukanchipa Iaia Jesús mana-
 ra samunchu, sugkunatapas kispichigsamungapa
 pasinsialla suiaspa. Chasallatami nukanchipa kuiaska
 waugki Pablopas, Taita Diospa iachaita karaskawa
 kamkunata karta kacharka. ¹⁶ Tukui paipa kartakunapi-
 mi Pablo chasallata iachachispa rimarka. Chi karta-
 kunapika, sug nigtakunaka mana iachangasinami
 iskribiraiá. Chi niraiaskakunata sugkunaka, mana allilla
 iachagkuna i manara suma uiagkuna, pandami iacha-
 chinkuna. Diospa Rimaipi tukui sug kaskakunatapasmi
 chasallata panda iachachinkuna. Chasa iachachispaka,
 pai kikinkunami puchukaringapa kankuna.

¹⁷ Chiwanka, nukapa kuiaska taitakuna i mamakuna,
 manara chasa pasarigpimi kamkunata ña willarkaiki-
 chita. Chimanda, jamalaillapas kamkuna, jiru iacha-
 chigkunawa pandachii tukuspa, Cristowa suma iuiaris-
 kata sakinrangichi! ¹⁸ Nukanchipa kispichig Iaia Jesu-
 cristota mas suma rigsipuaichi. Paipa suma kuiawa
 mas kuianakuichi. Kunaura i imaurapas paita nisunchi:
 “Kam, iapa suma atunmi kangi, maituku waranga
 waranga wata ialigpipas”. [Chasa kachu.]

1 SAN JUAN

Diuspa Rimai, Jesús suti Runa Tukuskamanda

1 Jesucristomanda nispami kamkunata kai karta kachanchi. Pai Jesucristoka, manara ñi ima tiaska-uramandatami kaugsakurka. Paitami uiarkanchi. Nukanchipa ñawiwami paita kawarkanchi. Paita kawaspa, nukanchi kikinpa makiwami llamkarkanchi. Paimi ka Diuspa Rimai, nukanchita kaugsai karamug. ² Pai kaugsai karamug, kai alpapimi kawachirig-samurka. Paita kawaspami nukanchi paimanda willadurkuna kanchi. Mana puchukariduru suma kaugsaita karagmandami kamkunata willanchi. Pai, Taita Diuswa sugllapi kaspaka, nukanchitami kawachirigsamurka. ³ Nukanchi ima uiaska kawaskatami kamkunatapas willanchi; chasaka kamkunapas, nukanchiwa suglla iuiwai tukugsamungapa. Taita Diuswa i paipa wambra Jesucristowapasmí suglla iuiwaiwa tukuska kanchi. ⁴ Kai tukui imakunata kamkunata willanakunchi; chasaka kamkunapas, imapipas suma alli iuiachiiwa kangapa.

Taita Dius, mana pandarii tiagmanda, punchallami ka

⁵ Jesucristo kikin ima nukanchita iachachiskatami uiarkanchi. Chasallatami kamkunatapas kasa willanchi: pai Taita Dius, punchallami ka, mana pandarii tiagmanda. Paipa ñawipi, tutaiai mana tianchu. ^{†6} Paiwa suglla iuiwaiwa tukuska kagta nukanchi iuianakuspa, manima sutipa allilla ruraspa kaugsanakugpika, llullami niraianchi. Chasaka, iana tutapi purinakugsinami kanchi. ⁷ Taita Dius, punchallapi kaugsagmi ka, mana pandarii tiaskapi. Nukanchipas, paipa punchaiachii suma iuiwaiwa kaugsanakugpika, suglla iuiaiwami nukanchipura kaugsasunchi. Chasa kaugsanakugpika, paipa wambra Jesuspa iawarwa, tukui nukanchipa pandariikunatami anchuchí.

⁸ Nukanchi kikinkuna nisunchi: “Mana pandarigkunami kanchi”; nigpika, nukanchi kikinmi llullachirinakunchi. Chiwanka, paipa sutipa Alli Willaita nukanchi manachar charintranchi. ⁹ Ikuti nukanchi pandariskakunata willarigpika, Taita Diuska, tukui iapa alli kaspa, pai ima niskata mana llullá; chiwanka, nukanchi pandariskakunata pasinsiaspa, tukui mana alli iuiai-kunata anchuchispa kispichingapa. ¹⁰ Nukanchi nisunchi: “Mana pandariska kanchichu”; nigpika, Taita Diusmandapas nintranchemi: “Lullami ka”. Chiwanka, paipa suma rimaita manachar charintranchi.

Jesucristo, Taita Diusta nukanchimanda mañadur kaskamanda

2 Nukapa kuiaska wambrakuna, chi rimaikunata willarkaikichitami, kamkuna mana pandaringapa. Maikan pandarigpika, Taita Diusta nukanchimanda mañadurmi iukanchi. Jesucristo imapipas alli kagmi nukanchimanda mañaku. ² Paimi nukanchipa pandariikunata anchuchingapa wañurka. Nukanchipa pandariikunamandalla, mana; kai alpapi tukui kaugsagkunapa pandariikunamandapasmi wañurka.

³ Taita Dius ima niskata ruraspami iachanchi, paita sutipa rigsigta. ⁴ Maikanpas nichu: “Nukami Taita Dius-ta rigsini”: chasa nispapas, Taita Dius ima niskata mana ruragpika, chika tukui i llullami ka. ⁵ Ikuti Taita Dius ima rimaskata ruragkunaka, sutipami tukui iuiai-wa paita kuiankuna. Chasa ruraspami iachanchi, nukanchi paiwa tukuska kagtakuna. ⁶ Maikanpas paiwa tukuska kagta iuiagka, imasami Jesucristo kaugsarka: chasallatami pai iuká kaugsanga.

Musu mandaimanda

⁷ Nukapa kuiaskakuna, mana willanakuikichitachu sug rigcha rimaskata rurangapa. Chi kamkuna Jesucristowa iuiarii kallariskauramandata rimai iukaskallata ikutimi iuiachinakuikichita. Chi ñugpamanda rimaita ñami uiarkangichi. ⁸ Chasa kagpipas, musuglla rimai kagsinami willanakuikichita. Chika, Jesucristowa i kamkunawapas sutipami tukugsamurka. Diuspa sutipa alli rimaita apigkunaka, iana tutapisina pandariikunata ñami sakinakú. Chasaka, paikunapa iuiaipika punchasinallami tukugsamunkunata.

⁹ Maikanpas nichu: “Nukaka, punchasinallapimi kani”: chasa nispapas, waugkindikunata mana kuia-chu: chara iana tutapisinami chi runa ka. ¹⁰ Maikanpas waugkindikunata kuiagpika, paipa iuiai-punchasinallapimi ka. Chasa kaugsagkuna, sugkunata pandariikunapi mana urmachinkunachu. ¹¹ Ikuti waugkindikunata mana kuiagkunaka, iana tutapi kaugsanakugsinami ka. Paipa mana suma iuiaikunawa ñawi tutaia-chiskasina tukugsamuspa, mana iachanchu maima rikugta.

¹² Kuiaska wambrakuna, kamkunapa pandariikunata Jesucristomandami pasinsiai turkangichi; chimandami rimaikichita. ¹³ Taitakunaka, Jesucristo kallarii-mandata kaugsagta kamkunami rigsingichi; chimandami rimaikichita. Musukunaka, iaia kukuta kamkunami mitikuchirkangichi; chimandami rimaikichita.

† Pandariikunami tutasina ka.

Kuiaska wambrakunaka, Taita Diusta ña rigsingichi; chimandami rimaikichita. ¹⁴ Taitakunaka, Jesucristo kallariimandata kaugsagta kamkunami rigsingichi; chimandami rimaikichita. Musukunaka, kamkuna, wapusina kaspá, Diuspa Rimaita charirispá, iaia kukutami mitikuchirkangichi; chimandami rimaikichita.

¹⁵ Kai alpata mana munangichi, ñi kai alpapi tiaskata. Maikanpas kai alpata munagkunaka, Taita Diustaka mana kuiankunachu. ¹⁶ Kai alpata munagkuna niraianni imasa kikinpa mana allilla iuiaiwa munaspa kaugsangapa, ñawiwa mana allikunata kawaspa munaringapa i ima iukaskakunawa atun tukuska iuiangapa. Chikunaka mana niraianchu Taita Diuspa munaikuna. Kai alpapi tiaskakunallawa iuiagkunapa munaikunami niraiá. ¹⁷ Kai alpa tukurikumi. Tukui kai alpapi mana alli munaikunapasmi tukuriku. Ikuti maikanpas Taita Dius ima munaskata ruragkunaka, diltudupami kaugsangapa kankuna.

Llulla i mana llulla kagmanda

¹⁸ Wambrakuna, ñami tukurii punchakuna chaia-murka. Kamkuna ñami uiarkangichi, Cristota mana munag chaia-mungapa kagta. Sutipami iapa achka paita mana munagkuna ña tukugsamurkakuna. Chasamandami iachanchi, tukurii punchakuna ña chaia-muska kagta.

¹⁹ Chi Cristota mana munagkuna, nukanchiwa kaskamandami llugsirkakuna. Chi llugsigkuna, nukanchipa iuiaiwa mana karkakunachu. Nukanchipa iuiaiwa kagpikunaka, nukanchillawami kankuna. Paikuna llugsigmandaka, allillami kawarkanchi, nukanchipura mana tukui-kuna nukanchipa iuiaiwa kagtakuna.

²⁰ Ikuti kamkunaka, Cristo karamuska Santu Ispiritutami chaskirkangichi. Chiwanka, tukui-kunami suma iachaita iukangichi. ²¹ Nuka mana willaikichitachu, sutipa Alli Willaita mana rigsigtakunasina. Kamkuna allilla rigsigtamandami willaikichita. Ñami iachangichi: Diuspa sutipa alli Rimaipi, mana ima llullaipas tianchu.

²² ¿Pitak llulla ka? Maikan Jesusmanda nidurkuna, mana Taita Dius agllaska Cristo kagta. Chasa nidurkunami Cristota mana munag kankuna. Chasakuna, Taita Diusta i paipa wambratami piñarínakú. ²³ Maikanpas Taita Diuspa wambrata piñarigkuna, Taita Dius kikintapasmi piñarinkuna. Ikuti maikanpas Jesús Taita Diuspa wambra kagta rigsigtakunaka, Taita Diustami iukankuna.

²⁴ Kamkuna ima kallariskauramandata uiaskata chaririangichi. Kamkuna kallariskauramandata uiaskata chariraiagpikunaka, Taita Diuspa wambrawa i kikin Taita Diuswami suglla iuiai iukankangichi. ²⁵ Chimandami nirka, mana puchukaridiru suma kaugsaita nukanchita karamungapa.

²⁶ Kamkunata pandachingapa munanakugmandami chasa willaikichita. ²⁷ Chasa willagpipas, kamkunaka ñi pi iachachigtapas mana ministingichichu. Jesucristo Santu Ispirituta karamuskami kamkunawa ka. Santu Ispiritu kikinmi tukui-manda kamkunata iachachí. Tukui pai ima iachachiskaka, sutipami ka, mana llullaspalla.

Chasamanda, imasami Santu Ispiritu, kamkunata iachachirka: chasallata Cristowa suglla iuiaiwa kangichi.

²⁸ Kunaura, kuiaska wambrakuna, Cristowa suglla iuiaiwa kaichi; chasaka, pai ikuti kawarigsamuura, nukanchi paiwa suglla kagsina iuiangapa; chiwanka, pai samuura, mana manchaspalla paipa ñawipi kawarigringapa. ²⁹ Ñami iachangichi, Jesucristo tukuipi iapa alli kagta. Kasapas iachaichi: maikanpas allilla ruraspa kaugsagkuna, Taita Diuspa wambrakunami niraiangichi.

Taita Diuspa wambra tukuskakunamanda

3 Iuiariichi imasa Taita Dius, nukanchita iapa kuiagta. Chiwami nukanchita nirka: “Nukapa wambrakunami kangichi”. Chasami kanchi. Kai alpapi tiaskakunallawa iuiagkunaka, Taita Diusta mana rigsispami mana nukanchita rigsinkuna, Taita Diuspa wambrakuna kagta.

² Nukapa kuiaskakuna, nukanchikar ñami Taita Diuspa wambrakuna kanchi. Manarami kawachimú, nukanchi imasa kipama kangapa kagtakuna. Kasami iachanchi: Jesucristo ikuti kawarigsamuura, paita imasa kagta kawaspami paisinallatata tukugsamungapa kanchi.

³ Maikan chasa paita suma iuiaspa suiagkuna, pandariikunamanda anchuchirispami limpiulla tukugsamungapa kanchi; imasami Jesucristo mana pandarig ka: chasa.

⁴ Maikanpas ima pandariikunata ruragkuna, kikin-kunami Taita Dius ima rurangapa niskata wabutin-kuna. Ima pandariikunawa niraianni Taita Dius ima niskata wabutig. ⁵ Ñami iachangichi: Jesucristoka, pandariikunata anchuchingapami samurka. Pai kikin niraianni mana pandarig kagta. ⁶ Chimandaka, maikanpas Jesucristowa suglla iuiaiwa kagkuna mana pandarinkunachu. Ikuti maikanpas pandarispa kaugsagkunaka, paita mana kawaspa rigsigtasinami kankuna.

⁷ Kuiaska wambrakuna, ¡ujalallapas kamkunata pipas pandachichukuna! Imasami Jesucristo alli ka: chasallatami maikan alli ruraspa kaugsanakugpas alli kankuna. ⁸ Ikuti maikanpas pandarispa kaugsagkunaka, iaia kukuwami kankuna. Chi iaia kukuka, kallariimandatami pandariilla ka. Taita Diuspa wambra Jesucristoka, chi iaia kuku mana alli ruraskakunata puchukangapami samurka.

⁹ Taita Diuspa wambra niraiaskakuna, Taita Diuspa kaugsaita chariraiaspami mana pandarispa kaugsankuna. Taita Diuspa wambra niraiaspami mana pudinkuna pandariipi urmangapa. ¹⁰ Taita Diuspa wambra niraiaskakuna i iaia kukupa kagkuna, kasapimi rigsirí. Maikanpas jiru ruragkuna, mana Taita Diuswa kagta niraianchu. Chasallata, maikanpas waugkindikunata mana kuiagkuna, Taita Diuswa kagta mana niraianchu.

Nukanchi kikinpura kuianakusunchi

¹¹ Kasami kallariskauramandata uiarkangichi: nukanchi kikinpura kuianakuspa kaugsangapa. ¹² Mana rurasunchi Kaín suti karisina. Chi karika, iaia kukuwa kas-pami paipa waugkindita wañuchirka. ¿Imapatak wañuchirka? Kaín kikin mana allilla rurag kaspá, paipa waugki allilla rurag kagmandami wañuchirka.

¹³ Taitakuna i mamakuna, kai alpapi tiaskakunallawa iuiagkuna kamkunata piñagpikunaka, mana ujnaringichi. ¹⁴ Nukanchi, wañuskasina kaugsaita sakispa, sutipa kaugsaitami iukanchi. Nukanchipa waugkindikunata kuiaspami chasa iachanchi. Ikuti maikanpas mana waugkindikunata kuiagkunaka, chara wañuskasina kaugsaitami iukankuna. ¹⁵ Maikanpas waugkindikunata mana munaspa kaugsanakugka, wañuchidursinami kankuna. Ñami iachangichi: ñi maikan wañuchidur, diltudupa suma kaugsaita mana iukanchu.

¹⁶ Kasami rigsínchi, sugkunata kuiai imasa kagta. Jesucristo, nukanchimandami dikuiwai sakirirka wañuchii tukungapa. Chasallatami nukanchipas iukanchi, waugkindikunamanda llakii iukanga, wañungapa chaiagpipas. ¹⁷ Maikanpas, kai alpapi iukag kaspá, sug waugkindi ñi ima mana iukaskata kawaspapas, mana aidagpika, ¿imasasik Taita Diospa kuiaita paipa sungupi charikugta nintra? ¹⁸ Nukapa kuiaska wambrakunata niikichitami: mana rimailawa nisunchi: “Nukaka kuiaikichitami”. Iukanchimi, alli ruraikunawa chi kuiaita kawachinga.

Diuspa ñawipi, imasa mana manchaspalla kaskamanda

¹⁹ Chasaka iachasunchimi, nukanchi mana llullag Taita Diospa kagtakuna, paipa ñawipi mana imamandapas manchaspalla. ²⁰ Nukanchi kikin pandariskakunata iuiarigpipas, Taita Dioska, nukanchita pasinsiaspa, nukanchipa iuiaiwantami allilla kawá. Paimi tukui iachá.

²¹ Nukapa kuiaskakuna, nukanchipa iuiaipei ñi imapas mana juchachirigpika, Taita Diospa ñawipi mana manchaspallami kasunchi. ²² Pai ima niska i munas-kata nukanchi ruragpikunaka, tukui ima mañaskatami nukanchita karanga. ²³ Nukanchita kasami ni: paipa wambra Jesucristowa suma iuiaripa kangapa; chasallata, tukuikuna parijuma kuianakuspa kaugsangapa. Chasami Jesucristo nirka. ²⁴ Pai ima niskata allilla ruragkunaka, parijuma paillawanta suglla kaugsai iukagmi niraianchi. Paipa Santu Ispirítutami nukanchita karamurka. Santu Ispirítuwami iachanchi, pai nukanchipi kaugsagta.

Taita Diospa Ispirítumanda i llullag kuku wairamanda

4 Nukapa kuiaskakuna, achka llullachigkunami kai alpapi purinakú, “Santu Ispirítuwa rimagmi kani” nispa. Mana tukui chasa nigkunawa suma iuiaringichi. Chasapaka, paikunata tapuchingichi: ¿sutipachu Diospa Ispirítuwa rimagkuna ka? ² Kasamandami iachan-

kangichi, pikuna Diospa Ispirítuwa rimanakugta. Maikanpas ninakuchu: “Jesucristo, sutipa Runa Tukuskami samurka”: chikunami Diospa Ispirítuwa rimanakú.

³ Ikuti maikanpas Jesucristomanda mana chasa ninakugka, mana Diospa Ispirítuwa rimanakunchu. Cristota mana munaspa kuku wairapa iuiaitami iukankuna. Ñami uiarkangichi, chi Cristota mana munag ña chaia-mungapa kagta. Niikichitami: timpumi kai alpapi kagsamú.

⁴ Kam nukapa kuiaska wambrakunaka, Taita Diospami kangichi. Pai kamkunawa sugllapi kag, pai, iaia kuku kai alpapi tiaskakunallawa iuiachigmandapas mas iapa iachami ka. Chimandaka kamkuna, chi llullachigkunata ña binsiskami kangichi. ⁵ Chi llullachigkunaka, kai alpapi tiaskakunallowami iuiankuna. Chimandaka, kai alpapi tiaskakunamandallami rimanakuna. Chasa rimagkunatami kai alpapi tiaskakunallowa iuiagkuna uiankuna. ⁶ Nukanchika, Taita Diospami kangichi. Maikanpas Taita Diusta rigsígkuna, nukanchitami uiankuna. Ikuti maikanpas mana Taita Diospa kagkunaka, mana nukanchita uiankunachu. Chasapimi rigsírí, maikankuna sutipa alli Santu Ispirítuwa rimagkuna i maikankuna llullag kuku wairawa rimagkuna.

Taita Dios, sutipa iapa kuiagmi ka

⁷ Nukapa kuiaskakuna, nukanchi kikinpura kuianakusunchi. Taita Diosmi nukanchita iuiachimú, kuianakuspa kaugsangapa. Tukui kuianakuspa kaugsagkuna, Taita Diospa wambrakunami niraianchi. Nispaka, paitami rigsínchi. ⁸ Ikuti mana kuianakuspa kaugsagkunaka, mana Taita Diusta rigsinkunachu. Taita Dios, sutipa iapa kuiagmi ka.

⁹ Kasami Taita Dios kawachigsamurka, nukanchita sutipa kuiag kagta: pai kikinpa suglla wambratami kai alpama kachamurka; chasaka nukanchipas, mana puchukariduru suma kaugsaita paiwa iukangapa.

¹⁰ Nukanchi mana karkanchichu Taita Diusta ñugpa kuiag. Paimi nukanchita ñugpa kuiarka. Nispaka, di-kuiaimi kikinpa wambrata kachamurka, kikin wañugsamuspa, nukanchi pandariskata anchuchingapa. Chasawami kawachigsamurka, sutipa kuiagta.

¹¹ Nukapa kuiaskakuna, chitukumi Taita Dios nukanchita iapa kuiarka. Chasamandami nukanchi kikinpura iukanchi kuianakungá. ¹² Ñi imaurapas Taita Diusta ñi pi mana kawaska kanchu. Chasa kagpipas, nukanchi kikinpura kuianakugpika, pai kikin, nukanchiwa sugllapimi ka. Chasa kuianakuspami nukanchi tukuipi allilla kawachinchi Taita Dios kuiag kagta. ¹³ Taita Dios, pai kikinpa Ispirítutami nukanchita karamurka. Chasamandami iachanchi, parijuma nukanchiwa Taita Dioswa suglla kaugsai iukag niraiagta.

¹⁴ Kasapas. Nukanchi, kawaspa, sutipami willanchi: Taita Dios, kikinpa wambratami kachamurka, kai alpamanda runakunata kispichigsamungapa. ¹⁵ Maikanpas willachukuna: “Jesús, Taita Diospa wambrami ka”: chasa willagkunami parijuma Taita Dioswa suglla kaugsai iukag niraiankuna.

¹⁶ Chasapimi iuiaspa iachanchi, Taita Dios nukanchita kuiag kagta. Taita Diosmi ka sutipa suma kuiag. Kuianakuspa kaugsagkunami parijuma Taita Dioswa suglla kaugsai iukag niraiankuna.

¹⁷ Nukanchi, Taita Dios munaskasina tukuipi kuianakuspa kagpika, Jesucristosinami kai alpapi kaugsaspa kasunchi. Chasamandaka, justisiai puncha chaiamura, mana manchaspallami kagrisunchi. ¹⁸ Taita Diospa kuiaiwaka kaugsanakuskapika, mana manchai tianchu. Tukuipi kuianakuspa kaugsaipika, manchaika anchurinmi. Manchaiwaka kagkuna, justisiai tukungapami suianakú. Chasamanda maikanpas manchaiwaka kaugsagkuna, manara tukuipi Taita Dios munaskasina kuianakuspa kaugsanakunchu.

¹⁹ Taita Dios nukanchita ñugpa kuiaskamandami nukanchitapas chaiá, kuianakuspa kaugsangapa. ²⁰ Maikanpas kikin nirichu: “Nuka, Taita Diusta uiainimi”; nigpika, waugkindita mana kuiachu: chika, sug llullami ka. Waugkindita allilla kawanakuspapas, mana kuiagpika, ¿imasasik mana kawaska Taita Diustaka kuianga? ²¹ Kikin Jesucristomi nukanchita kasa nirka: maikanpas Taita Diusta kuiagka iukanmi, chasallata waugkindikunata kuiaspa kaugsakunga.

Kai alpapi jiru munai i ruraikunata sakispa binsiskakunamanda

5 ¿Iuiaringichichu, Jesús, Taita Dios agllaska Cristo kagta? Tukui chasa iuiarigkunami Taita Diospa wambra tukugsamuska kanchi. Taitata kuiagka iukanmi, paipa wambrotapas kuianga. ² Taita Diusta kuiaspa, pai ima niskata ruragkuna niraianni, Taita Diospa wambrotapas kuiag kagtakuna. ³ Taita Diusta kuiangapa chaiakumi, pai ima niskata ruraspa kangapa. Chasa ruraspa kangapaka, pudiringasinallami ka.

⁴ Taita Diospa wambra tukugsamuskakuna, tukui-kuna kai alpapi mana alli munai i ruraikunatami sakispa binsinchi. Jesuswa suma iuiariskawami chi mana alli munai i ruraikunata sakispa binsinchi. ⁵ Jesús Taita Diospa wambra kagta suma iuiarigkunallami chi mana alli munai i ruraikunata sakispa binsinchi.

Taita Diospa wambra kagta willagkunamanda

⁶ Jesucristo samuspa, iakuwami baugtisarirka. Nispaka, kruspi wañukuspa, paipa iawarwami kawachirka. Pai sutipa samuskata mana iakullawa kawachirkachu. Iakuwa i iawarwapasmi kawachirka pai kikin samuska kagta, nukanchi iachangapa. Chita willag, kikin Santu Ispiritumi ka. Santu Ispíritu mana llullanchu. [⁷ Suma luarpika, kimsa willagkunami tiankuna: Taita Dios, Diospa Rimai i Santu Ispíritu. Chi kimsandi, sugllami ka. ⁸ Kai alpapi chasallata] kimsa siñalkunami kawachirigsamurka: Santu Ispíritu, iaku i iawar. Tukui chi kimsandi, Jesucristo samuskamandami chasallata willankuna.

⁹ Runakuna ima kawaspa willaskatami chaskinchi. Nigpika, ¿imawantak Taita Dios paipa wambrotamanda willaskata mana chaskisunchi? ¹⁰ Maikanpas Taita Diospa wambrotama suma iuiarigkuna, kikinpa iuiapimi chi willaita charinakú. Ikuti maikanpas mana Taita Dioswa iuiarigkunaka, Taita Diosmanda nigsinami kankuna: “Pai, llullami ka”. Taita Dios paipa wambrotamanda willaskata ña mana munankunachu uiangapa.

¹¹ Kasami Taita Dios willá: mana puchukariduru suma kaugsaitami nukanchita karamuska ka. Chi kaugsaita paipa wambrotami karamuska ka. ¹² Chiwa, maikanpas Taita Diospa wambrotama suglla iuiiai chariraiag, chi kaugsaitapasmi iuká. Ikuti maikanpas mana Taita Diospa wambrotama suglla iuiiai chariraiagpika, manima chi kaugsaita iukanchu.

Tukuchiskamanda

¹³ Nuka willaskata kachanakuikichitami, kamkuna kasa iachangapa: kamkuna Taita Diospa wambrotama suma iuiarigkuna, mana puchukariduru suma kaugsaitami iukangichi.

¹⁴ Taita Diosmandami kasa allilla iachanchi: pai imasa munaskasina nukanchi imapas mañagpika, pai mana piñarispallami nukanchita uiá. ¹⁵ Kasapasmi iachanchi: pai tukui nukanchi mañanakuskata allilla uiagta; chimandami iachanchi, tukui nukanchi ima mañanakuskata karamungapa kagta.

¹⁶ Maikan waugki sug pandariska mana wañuima apai tukungapa pandarikuskata kawaspa, Taita Diusta mañapuichi pasinsiyachu. Chasapika Taita Dios kikin, pasinsiyaspa, ikuti suma kaugsaitami paita karamunga. Mana wañuima apai tukungapa pandariikunamandami rimaikichita. Diltudupa wañuima apai tukungapa pandariipasmi tia. Chasa pandarigkunamanda, mana niikichitachu, Taita Diusta mañapungapa.

¹⁷ Tukui mana alli ruraikuna, pandariimi kankuna. Chasa kagpipas, mana wañuima apag pandariikunami tia.

¹⁸ Kasami iachanchi: maikanpas Taita Diospa wambrotama tukugsamuska kagkuna mana pandariska kaugsanakunchu. Paikunata, Taita Diospa wambrotama kikinmi chariku. Chimandami iaia kuku mana pudí, paikunata imapas ruranga.

¹⁹ Iachanchimi, nukanchi, Taita Diospakuna kagta. Ikuti tukui kai alpaka, iaia kukupa makipimi ka.

²⁰ Iachanchimi, Taita Diospa wambrotama samuska kagta i pai nukanchita suma alli iuiaita karamuska kagta; chiwanka, sutipa alli Taita Diusta rigsingapa. Nukanchi, sutipa alli Taita Dioswa i paipa wambrotama Jesucristowami suglla kaugsaita iukanchi. Paimi sutipa alli Diosllatata ka. Paimi ka mana puchukariduru suma kaugsaita karag.

²¹ Kuiaska wambrotama, mana sakiringichi, sug rigcha dius niraiaskakunawa iuiangapa.

2 SAN JUAN

1 Nuka, Jesuswa tukuskapura iacha taita kaspá, Taita Dios agllaska mama panita i kamba wambra-kunatami kai karta kachaikichita. Sutipami kamkunata suma kuiaikichita. Mana nukalla kuiaikichitachu. Sutipa Alli Willaita tukui rigsigkunapasmi kamkunata kuiankuna. ² Nukanchi sutipa Alli Willaita iuiaipi charispami kamkunata kuiaikichita. Chi sutipa Alli Willaika, diltudupami nukanchiwa kangapa ka. ³ Taita Dios i Jesucristo, Taita Diospa wambra kaspá, kamkuna-manda llakirispá, kamkunata kuiaspá, suma iuiaiwa kawapuachu; chasaka, sutipa Alli Willaita charispá, kuianakuspa kaugsangapa.

Sumaglla kikinpura kuianakuspa kaugsangapa iachachiskamanda

⁴ Kamba maikan wambrakuna, Taita Dios imasa niskasina sutipa Alli Willaita charispá, allilla kaugsanakugta kawaspá, askurintimi alli iuiachiwarka. ⁵ Kuna-uraka, mama pani, mañaikimi, nukanchipura kuianakuspa kaugsangapa. Chasa niskawaka, musu mandai-ka mana niraianchu. Chi mandaitaka kallariskaura-mandatami iukarkanchi. ⁶ Kuianakuika niraiami Taita Dios imasa niskasina ruraspa kaugsanakungapa. Kamkuna imasa ñugpamandata uiaskasina niraiaskata iukangichimi kuianakuspa kaugsanakunga.

Llullaspa iachachigkunamanda

⁷ Ikuti Llullaspa iachachigkunaka, achkakunami kai alpapi purinakú. Paikunaka, Llullaspa ninkunami: “Jesucristoka, aichaiug runa tukuspa mana kai alpama samurkachu”. Chasa nigkunaka, Cristomanda Llullaspa, paita mana munagmi kankuna. ⁸ Kamkuna suma iuiaripuangichi, kamkuna alli ruraikunamanda apamunakuskata mana kichui tukungapa. Chasaka, Taita Dios ima karangapa kaskata, tukuimi chaskinkangichi.

⁹ Maikanpas Cristo ima iachachiskata sug rigchata ialigta iachachigkunaka, Taita Dioswa mana kankunachu. Ikuti Cristo ima iachachiskallata katigkunaka, Taita Dioswa i paipa wambrawapasmi sugllasina kanchi. ¹⁰ Maikanpas kamkunapagma chaiagrispa, Cristo ima iachachiskallata mana iachachigpika, mana chaskingichi. Mana paita: “Puangi” ningichi. ¹¹ Maikanpas chi Llullaspa iachachigkunata: “Puangi” nigpika, chi Llullagkunawami tukugsamú.

Kaiakama, niskamanda

¹² Kamkunata achka ningapa iuiakuspapas, mana munaikichitachu iskribingapa. Chasapaka, iuiakunimi kamkunapagma chaiagrispa, ñawi ñawi rimanakungapa; chasaka, nukanchi tukuipi suma alli iuiachiiwa kangapa.

¹³ Taita Dios agllaska kamba ñaña wambrakunapas, kamtami: “Puangi” ninakú.

3 SAN JUAN

1 Nuka, Jesuswa tukuskapura iacha taita kaspá, kuiaska waugki Gaiotami kai karta kachaiki. Kamta sutipami kuaiaiki.

Gaiota: "Allimi kangí" niskamanda

² Nukapa kuiaska, kasami Taita Diusta mañapuiki: imasami kamba almapi allilla ka: chasallata tukui imapipas allilla kachu; kamba kuirpupas, saludulla kachu. ³ Maikankuna Cristowa tukuskakuna, nukapagma chaiamuspaka, kammandami willawarkakuna: kam, sutipa Alli Willaita mana sakispallasí kaugsakungi. Chasa uiaspaka, iapa allimi iuiachiwarka. ⁴ Nukapa wambrakunasina sutipa Alli Willaita mana sakispalla kaugsanakugta uiaspami tukuikunamanda mas alli iuiachiwá.

⁵ Nukapa kuiaska, iachanimi: kamka, sutipasi waugkindikunata allilla ruraspa kangí. Chasallata, mana rigsiskakunatapassi allilla ruraspa kaugsakungi. ⁶ Paikunaka, kambagmanda samuspami, kam ima paikunata suma kuiaskamanda, Cristowa tukuskakuna kaipi kaskakunata willagsamurkakuna. Taita Diusta kuntintachingapaka, kamka paikunata ima ministiska karapuangi. Chasaka, Diuspa Rimaita willaspami puringakuna. ⁷ Paikunaka, Jesucristomandalla purigkuna kallarispa, Taita Diusta manara rigsiskunataka mana ñi ima chaskirkakunachu. ⁸ Chimandami nukanchi iukanchi, paikunata imapas karanga; chasaka paikuna, sutipa Alli Willaita willaspa puringapakuna.

Diótrfes suti runa, mana allilla kaugsakuskamanda

⁹ Ñami kamba puiblupi Cristowa tukuskakunata karta kacharkani. Chasa kachagpipas, Diotrefeska, pai-

kunata mandag tukuspaka, nukanchi ima kachaskata manima uiangapa munarkachu. ¹⁰ Chimandami nuka, rispa, paita nigringapa kani: "¿Imapatak, wasa churaspa, nukanchimanda llullaspa, jiru rimaspa kangí?". Paika, unžaspalla manasi kuntintarí. Maikan kainigmanda waugkikuna chima chaiagriskataka manasi allilla chaskí. Sug waugkikuna paikunata chaskinakuskataka manasi lisinsí chaskingapa. Nispaka, Cristowa tukuskakunawa kaskamandasi llugsichí.

¹¹ Nukapa kuiaska, jiru ruraspa kaugsakunata mana iachaikungi. Tukuipi sumaglla ruraspa kaugsakunatami iukangi iachaikunga. Maikan alli rurag, Taita Diuswami ka. Ikuti jiru ruragkunaka, mana Taita Diusta rigsinkunachu.

Demetrio suti runa, allilla ruraspa kaugsakuskamanda

¹² Waugki Demetriomandaka, tukuikunami allilla rimankuna. Pai, sutipa Alli Willaita uiaspa, katiriaspami alli kagta kawachirí. Nukanchipas, pai alli kagtami willanchi. Kammi iachangi, nukanchi sutipa kaskata willagkuna kagta.

Kaiakama, niskamanda

¹³ Kamta achka ningapa iuiakuspapas, mana munai-kichu iskribingapa. ¹⁴ Iuiakunimi, mana unaiillapi kamta kawagringapa. Chiurami ñawi ñawi rimanakusunchi.

¹⁵ Kam, sumaglla kapuangi. Tukui kamta rigsiskakunami, "Puangi" ninakú. Tukui nukanchi rigsiskakunataka, kam sug sugta: "Puangi" nipuangi.

SAN JUDAS

¹ Nuka, Jesucristopa lutrinsinami kani. Santiagopa waugkimi kani. Taita Dios kuiaspa agllaskakunatami kai karta kachaikichita. Kamkunaka, Jesucristowa wakachiskami kangichi. ² Taita Dios, kamkunamanda llakirispas, kamkunata kuiaspa, suma iuiawiwa kawapua-chu.

Llullaspa iachachigkunamanda

³ Nukapa kuiaska taitakuna i mamakuna, iapami munakurkani, kamkunapa i nukanchipa kispiriimanda kamkunata willangapa. Chasa munakugpipas, kuna-ura chaiawakumi, kasa nispa mañangapa: Taita Dios, paipalla kagkunata sug biyajilla paiwa iuiaringapa karaskata, chi iuiaitaka mana sakiriichi kichui tukungapa. ⁴ Ñami maikankunaka, llullachispa, nukanchipurapagpi iaikurirkakuna. Chi llullachigkunamandaka ñugpamanda willaraiaska librupi kasami niraiá: “Kikin-kunami diltudupa ninama rinakú”. Chikunaka, nukanchipa Taita Diusta mana manhaspa, ninkunami: “Taita Dios, tukuikunata sumami kuiá”. Chasa nispaka, paikuna imasa munaska jirukunata ruraspami kaugsankuna. Chasallata ninkunami, nukanchipa suglla mandag Iaia Jesucristo mana tiagta.

⁵ Kamkuna ña iachagpipas, ikuti kasami iuiachingapa munanakuikichita. Atun Taita Dioska, Ejipto alpa-manda judiukunata llugsichispa, chiuramandaka mana paita uiagkunatami puchukarka. ⁶ Chasallata maikan anjilkuna paikuna mandangapa churaskamanda anchurigkunataka diltudupa mana llugsii amsa ukupi wataspami wichkarkakunata, ninama sitai atun puncha chaiankama. ⁷ Sodoma i Gomorra suti i chi ladu suiu puiblukunapi kaugsanakugpasmi chi anjilkunasinallatata jiru rurarkakuna. Kari warmiwa maikanpas siririnakurka. Karipuralla i warmipuralla mana ruradirukunatapasmirunakurka. Chikunaka, mana imaurapas wañudiru ninamami rirkakuna; chasa pasariskata iachaspaka, sugkunaka mana chasa ruraspakaugsanakuchu.

⁸ Chasa iachaspapas, chi llullaspa iachachigkunaka muskuipimi kawaska ninkuna. Nispaka, pai kikin-kunapa kuirpupimi jiru millai ruraskawa jiru iuiachi kankuna. Iaia Jesustami wabutinkuna. Sug luarpi suma atun kagkunatapasmikaminkuna. ⁹ Ikuti atun anjil Miguelka, Moisés wañuska kuirputa iaia kukuwa parijuma kichunakuura, mana chi iaia kukuta kamirkachu. Chasapaka, nirkallami: “Kamtaka, atun Taita Dios iuiachispa justisiachu”. ¹⁰ Ikuti chi runakunaka, mana rigsiskakunatami kaminakú. Mana juisiuspalla animal-

kunasina kaspas, paikunapa iuiailawa imapas iachaskakunawami jiru ruranakú; chasaka, pai kikinkuna puchukaringapa.

¹¹ ¡Ai, chasa ruragkuna, imachar pasangakuna! Paikunaka, Kaín suti runa mana allilla ruraskata katichigsinami ruranakú. Balaam suti runasina kulkita munaspallami pandarispaiuianakú. Imasami Koré suti runa, Moiesta kuntrakugmanda wañuchii tukurka: chasallatami paikunapas kuntranakú. ¹² Kamkuna kuianakuspa mikungapa sugllapi tandariskapi paikuna kagpika, iapa pingaipami ka. Chipika paikuna, mana manhaspalla, wigsa jundachiringapagllami rinkuna. Paikunaka, ubijakunata suma kawagsina kangataka, kikinkunamandallami kuidarispakankuna. Mana iakuiug puiukuna awapi wairawa kasama chasama apai tukugsinami kankuna. Mikui muiupallangapa puncha chaiaura, chusa pangalla sachakunasinami kankuna. Iskai biaji angukunawanta surkuspa, wañuska sachakunasinami niraiankuna. ¹³ Imasami lamar iaku, rabiarpas, ulaskunawa ispuma tukuska kuchuma sitá: chasallatami paikunapa pingaiachingasina kawari ruranakú. Imasami istrillakuna, kikin ridiru ñambi chingá: chasami kankuna. Chasawaka, diltudupa iana tutapi kagringapami rinakú.

¹⁴ Taita Adanmanda kanchismanda kati Enok suti taita, Santu Ispirituwa chi runakunamanda kasami nirka: Atun Taita Dios, waranga waranga anjilkuna paipalla kagkunawa samukugtami kawarkani.

¹⁵ Tukui runakunata justisiangapami samuku. Tukui pandarig paita mana manchagkunata, mana manhaspalla tukui jiru ruraskakunamanda i paimanda kamiriskakunamandapas, diltudupa ninama sitangapami samuku.

¹⁶ Chi runakunaka kankunami tukuimandapas jiru wasa rimadurkuna. Pai kikinkuna tukui ima munaskallata ruraspami kaugsankuna. Atun tukuspa, nuka alli kagtami nirkuna. Pitapas: “Iapa allimi kangí” nispami kaugsanakú, kikinmandalla iuiarispas.

Cristowa kagkuna, imasa Diosmandalla kaugsai iukaskakunamanda

¹⁷ Ikuti kam kuiaska taitakuna i mamakunaka, nukanchipa Iaia Jesucristo kikin agllaska runakuna ima pasarangapa willaskata iuiariichi. ¹⁸ Kasami willanakurka:

Tukurii punchakuna chaiamukuura,
Taita Diospa kaskakunata unzag runakunami tiangapa kankuna.

Mana paita iuiarispalla,
kikinkuna tukui ima munaskallata ruraspami kaug-
sangapa kankuna.

¹⁹ Chasakunami Cristowa tukuskakunata iskaima piña-
chirispá rurankuna. Kai alpapi tiaskakunallowami iuia-
rinkuna. Santu Ispiritutaka mana iukankunachu.

²⁰ Ikuti kam kuiaska taitakuna i mamakunaka, tukuipi
iapa alli Cristowa suma iuiarispá, kam kikipura alli
suma iuiái iuiachinakuichi. Santu Ispirituwa Taita Dius-
ta mañaichi. ²¹ Taita Dios kamkunata kuiakuskataka
mana kungariichi. Nukanchipa Iaia Jesucristo, kam-
kunamanda llakirispá, mana puchukariduru suma
kaugsaita karankama suianakuichi.

²² Maikankunaka, Diospa Rimaita: “¿Sutipa u mana
sutipachar ka?” iuiagkunamanda llakirispá, allilla kas-
kama tigrachiichi. ²³ Sugkuna mana wañuduru ninapi
urmagringapa rinakuskataka aisaspá llugsichigsina
ruraichi. Sugkuna jiru ruragkunamandaka llakirispá-

pas, paikunata manchaichi. Paikunapa jiru ruraiwa pai-
kunapa churariduru katangapas iapa mapaiachiska-
sinami kankuna.

**Taita Diusta iapa suma atun kagta nispa, puchuka-
riskamanda**

²⁴ Taita Diosmi pudí, kamkunata wakachingapa;
chasaka kamkuna, mana pandariipi urmaspa, ñi ima-
pipas mana mapasina kaspá, iapa alli iuiachirispá,
paipa askurinti suma ñawipi kawarigringapa. ²⁵ Nukan-
chipa Iaia Jesucristowa, nukanchita kispichig suglla Tai-
ta Diusta nisunchi:

—Kam, imaurapas tukuikunamanda mas suma atun-
mi kangi. Kammi kangi imaurapas tukuipi mandag i
tukui pudig. Chasami karkangi. Chasami kangi. Chasa-
llatami kangapa kangi, maituku waranga waranga
watakuna ialigpipas. Chasa kachu.

APOCALIPSIS

¹ Kasami Taita Dios, Jesucristota willarka; paika, imasa mana unailapi pasaringapa kagta paipa lutrinsinakunata kawachingapa. Paika, sug anjilta Juan suti paipa lutrinsinapagma kachamurka, Taita Dios willaskata kawachingapa. ² Nuka Juanka, tukui ima kawaskatami willani. Taita Diospa rimaita i kikin Jesucristo ima willaskata, tukuimi willani. ³ Maikanpas kai Santu Ispirituwa rimaikunata kawaspaspa i uiaspa ruragkunaka, Taita Diospa iapa kuiaskami kangapa kankuna. Chi punchakunaka, ñami chaimungapa ka.

Jesuswa tukuskakuna kanchis puiblukunapi kaugsanakuskata willaskamanda

⁴ Nuka Juan, Jesuswa tukuskakuna Asia alpapi kanchis puiblukunapi kaugsanakuskata kai librutami kachaikichita. Taita Dios kamkunata kuiaspaspa, suma iuiwaiwa charipuachu. Paimi kunaure ka i ñugpata karka. Paillatatami samungapa ka. Tukui kanchis ispiritupaipa mandadiru ñugpa ladu kagkuna i Jesucristopas, chasallata kamkunata kuiaspaspa, suma iuiwaiwa charipuachu.

⁵ Jesucristo, sutipa tukuiipi willagmi ka. Pai, wañuska kaspaspa, tukuikunamanda ñugpami kaugsarirka, mana mas wañungapa. Kai alpapi mandagkunata iaia mandagmi ka. Cristo, nukanchita iapa kuiaspami paipa iawarwa nukanchi pandariskakunata anchuchirka.

⁶ Paimi nukanchita agllarka, atun mandagkuna i sasir-dutikuna kangapas; chiwanka, paipa Taita Dios ima nis-kata rurangapa. Cristota imaurapas nisunchi: "Tukui-kunapa iaia mandag i suma atunmi kangi. Chasami kankangi, maituku waranga waranga watakuna ialigpi-pas. Chasa kachu".

⁷ Cristo, puiupimi samungapa ka. Tukuikunami paita kawasunchi. Paita kruspi klabaspa wañuchigkunapas-mi kawangapa kankuna. Paita kawaspaspa, kai alpapi tukui runakunami, llakirispaspa, wakangapa kankuna. Ari, chasami kangapas ka.

⁸ "Nukami kani kallari i puchukag"; chasami tukui pudig atun Taita Dios ni. Paimi kunaure ka i ñugpata karka. Paillatatami samungapas ka.

Jesucristo, askurinti punchalla kawariskamanda

⁹ Nuka Juan, kamkunawa waugkindimi kani. Kam-kunasina iapa llakiiwami kani. Kamkunawa, Taita Dios suma mandakuskapimi nukapas kagringapas kani. Jesusmi nukanchita karamú, tukuiipi paita mana sam-baiaspaspa katiraiangapas. Diospa Rimaita i Jesús ima willaskata nuka iachachikugmandami Patmos suti isla-

pimi nuka wichkaraiarkani. ¹⁰ Dumingo, Iaia Jesusta iuiariduru punchaspa, Santu Ispiritumi nukawa tukug-samurkaspa. Chasawakaspa, muskui ukupisinami tukug-samurkani. Chiurakaspa, nukapaspa wasanigmanda bututusi sinchi rimaimi uiariwarkaspa. ¹¹ Kasami niwarkaspa:

—Kam tukui ima kawaskataspa suma katichispaspa, librupi iskribingi. Nispaspa, chi libruta kachangi Jesuswa tukuskakuna Asia alpapi kanchis puiblukunapi kaugsanakuskaspa: Efesomaspa, Esmirnamaspa, Pergamomaspa, Tiatiramaspa, Sardismaspa, Filadelfiamaspa i Laodiseamaspa.

¹² Chasa niwauraspa, nuka tigrarirarkani kawangapaspa: ¿pitak chasa rimawaku? Tigrariurakaspa, kanchis kurita rurakaspa bila saiachidirukunami kawariwarkaspa. ¹³ Chi bilakuna saianakuskaspa chaugpipikaspa, kawariwarkami sug runa saiakugsinaspa. Paikaspa, alpakamaspa kusmasina churariskaspa i kuri chumbisina pichupi chumbilliskami saiakurkaspa. ¹⁴ Paipa uma i paipa agchakunakaspa, iura mil-masina i sirinu puiusina askurinti iapa iurami karkaspa. Paipa ñawi murukunakaspa, nina sindisinami karkakunaspa. ¹⁵ Paipa chakikunakaspa, sug iru brunsi llambuiachiskaspa puka ninapi rupachiskasinaspa iukarkaspa. Paipa rimaiakaspa, achka iakukuna awamanda tallirispaspa rinakugsinaspa uiariwarkaspa. ¹⁶ Paipa alli makipikaspa, kanchis istrillami charikurkaspa. Paipa simimandakaspa, puntiaskaspa iskandimaspa afilaskaspa machitisinaspa llugsiraiarkaspa. Paipa ñawikaspa, indisina punchami karkaspa.

¹⁷ Paita kawaspaspa, nuka, paipa chakikunapi wañuskasinaspa urmarkani. Paikaspa, alli maki churawaspaspa, kasa niwarkaspa:

—Manaspa mancharikui. Nukami kani kallari i puchukag. ¹⁸ Diltudupami nuka kaugsanispaspa. Nuka, wañuspapaspa, ikutimi kaugsarirarkani. Imaurapasmi kaugsaspa kangapas kani, maituku waranga waranga watakuna ialigpipaspa. Nukami wañuipa llabi iukani, i wañuskakuna maipi kaskakunamandapaspa.

¹⁹ —Kasa librupi iskribingi: ñugpata kawarkangi: chita; kunaure kawakungi: chita; kunaure amanda kawangapaspa kangi: chitapas. ²⁰ Kam, kai kanchis istrillakuna nukapaspa alli makipi charikuskataspa i kai kanchis kurita rurakaspa bila saiachidirukunataspa kawakuspapaspa, manaspa iachangichu ima niraiagtaspa. Willasakispa. Kai kanchis istrillakunakaspa niraiankunami kanchis iglisiemandaspa anjilkunaspa. Kai kanchis bila saiachidirukunakaspa niraiankunamispa chasallataspa chi kanchis iglisiakunaspa.

Jesús tukuskakuna Efesopi kaugsanakuskata willangapa kachaskamanda

2 Jesús tukuskakuna Efeso puiblupi kaugsanakuskamanda anjilta kasa ningapa kachai.

Kanchis istrillakuna alli makipi charispa, kanchis kurita ruraska bila saiachidiru chaugpipi purispa kag, kasami ningapa kachaiki: ² kam tukui ima sinchi rurakuskata mana sambaiaspalla kagtami rigsiki. Jiru ruragkunataka mana awantangapa pudingichu. Paikuna, kikinkunamanda nirinkunami: “Jesús kachamuska runakunami kanchi”. Ikuti kamka, paikunata tapuchispa, rigsirkangimi llullakuna kagta. ³ Nukamanda kamba suma iuiaita mana sakispalla, iapa llakiikunami apakungi, mana sambaiaspalla.

⁴ Chasa kagpipas, imajchu iukaiki ninga. Kam, ñugpamanda nukawa kuiaitami sakikungi. ⁵ Iuiarii, imasami ñugpata karkangi. ¿Imapatak, allilla kas-paka, pandarikungi? Chi mana allilla ruraikunata sakii. Nugpata imasami allilla rurakurkangi: chasallata kuna ramanda ikuti kallaringi rurangapa. Mana uiawagpika, nukaka, kambagma rispa, kamba bila saiachidiruta nuka maipi saiachiskamanda kichugsinami rurangapa kaiki; chika, kam pandaris-kakunata mana sakigpika.

⁶ Chasa kagpipas, kam chara kasa alli kagtami kawakuiki. Nikolaitas suti runakuna ima jiru rurana-kuskatami mana munangi. Nukapasmi chasallata mana munanikunata.

⁷ Chasami Santu Ispiritu, Jesús tukuskakunata willaku. Paitaka, rinri iukagkuna uiangichi. Mana alli ruraikunata binsigtaka kaugsai karadiru sachamanda mikuitami karangapa kani. Chika, Taita Diuspa paraíso suti suma alpapimi tia.

Jesús tukuskakuna Esmirnapi kaugsanakuskata willangapa kachaskamanda

8 Jesús tukuskakuna Esmirna puiblupi kaugsanakuskamanda anjilta kasa ningapa kachai.

Nukami kani kallarispa puchukag. Wañuspapas kaugsarirkanimi. Kasami ningapa kachaiki: ⁹ nuka iachanimi, kam iapa llakiikunawa kagta i ñi ima mana iukagta. Chasa kagpipas, niikimi: nukapa ñawipi iapa iukagsinami niraiapuangi. Nuka iachanimi, judíu sutichirigkunaka imasa kamta juchachinakugta. Chasa sutichirispapas, mana sutipa judíu kankunachu. Iaia kukuwa iuiarispas tandariduru wasisinami niraiankuna.

¹⁰ Mana mancharingi, kamta ima llakii chaiagpipas. Iaia kukuka, maikankunata karsilpimi churachingapa ka. Chipimi rigsiringa, maikan nukawa u mana nukawa kagta. Chunga punchami chasa llakii iukangapa kangichi. Wañunkama nukallawa iuiakungi. Chasa nukallawa wañunkama iuiakugpika, llaugtusina kaugsaitami karasaki.

¹¹ Chasami Santu Ispiritu, Jesús tukuskakunata willaku. Paitaka, rinri iukagkuna uiangichi. Mana alli

ruraikunata binsigka, parisma wañuitaka † mana iukangapa kangichichu.

Jesús tukuskakuna Pergamopi kaugsanakuskata willangapa kachaskamanda

12 Jesús tukuskakuna Pérgamo puiblupi kaugsanakuskamanda anjilta kasa ningapa kachai.

Nuka, puntiaska iskandima afilaska machitisina iukag, kasami ningapa kachaiki: ¹³ kam maipi kaugsakuskatami iachani. Iaia kuku mandadiru kaskasinapimi kaugsakungi. Chasa kaugsakuspapas, nukamanda allilla iuiailapimi kaugsakungi. Antipas suti runa nukamanda mana sakispalla willagta kamkuna kaskapi wañuchii tukuura, chi punchakunapas kamkuna mana kungariwarkangichichu, chi iaia kukupa alpapisina kaugsanakuspapas.

¹⁴ Chasa kagpipas, imajchu iukaiki ninga. ¿Imapatak, Balaam suti ñugpamanda runa iachachiskata ruranakugpipas, chara awantakungi? Chi Balaammi Balak suti mandagta iachachirka, Israelmanda runakunata kasa pandachingapa: ianga diuskunata kamariku karaska aichata mikuchingapa i kari warmiwa pandachingapa. ¹⁵ Chasallata, nikolaitas suti runakuna imasa iachachiskasina kaugsanakugtapasmi awantakungi. Nuka, chasakunata mana munanichu. ¹⁶ Chasamandami niiki: allilla iuiarigsamui. Mana kagpika, nuka kikinmi kambagma utkalla risa, nukapa simimanda machitisina iukaska-wa paikunata puchukangapa.

¹⁷ Chasami Santu Ispiritu, Jesús tukuskakunata willaku. Paitaka, rinri iukagkuna uiangichi. Mana alli ruraikunata binsigtaka kai alpapi mana kawariduru mikuitami †† karangapa kani. Sug iura rumipasmi paita kuangapa kani. Chi iura rumipi, mana pipas rigsiska musu sutimi churangapa kani. Chi sutitaka, maikan chaskigllami iachangapa ka.

Jesús tukuskakuna Tiatirapi kaugsanakuskata willangapa kachaskamanda

18 Jesús tukuskakuna Tiatira puiblupi kaugsanakuskamanda anjilta kasa ningapa kachai.

Nuka, Taita Diuspa wambra, nina sindisina ñawiuug, llambu brunsisina chakiug kaspas, kasami ningapa kachaiki: ¹⁹ kam tukui ima rurakuskatami iachani. Kam kuiawaspa, suma iuiawaspa, sugkunata allilla ruraspa mana sambaiaspallami kaugsakungi. Ñugpata rurai kallarismandapas masmi kuna rura kungi. Chitapasmi iachani.

²⁰ Chasa kagpipas, imajchu iukaiki ninga. Jezabel suti warmitami sakingi iachachingapa. Chi warmika nirinmi: “Nuka, Santu Ispirituwami rimag kani”. Chasaka, nukapa lutrinsinakunatami pandachipuaku, kari warmiwa pandaringapa i ianga diuskunata kamariku karaska aichata mikungapa. ²¹ Chi warmitaka achka punchakunami suiakurkani, chi pandarii-

† *Parisma wañuika niraiami diltudupa rupakuska nina ukuma sitai tukungapa; chimandaka, mana mas llugsingapa.* †† *Chi mikui suti karka “maná”.*

kunata sakispa, Taita Dioswa tigramuntra. Chasa suiakugpipas, mana munanchu, chi karikunawa pandariikunata sakingapa. ²² Chimandami sinchi unguiwa kawitupi urmachingapa kani. Chi paiwa pandarigkuna mana chi pandariikunata sakigpikunaka, paikunatapasma chasallata mas sinchi unguiu urmachingapa kani. ²³ Paipa wambra niraiasakunatapasma jiru unguiwa puchukangapa kani. Chasawaka, tukui Jesuswa tukuskakunaka iachangapami kankuna: nukaka, runakunapa maituku pakalla ukupi iuanakugtapas pasagtami kawakuni. Chasallata, allilla ruraskata i mana allilla ruraskatapasma imasa chaiaskasinami karangapa kaikichita.

²⁴ Kunauraka uiawaichi, Tiatira puiblupi mana chasa jiru ruraikunata katichigkuna. Chi sugkunaka ninkuna: "Iaia kukupa pipas mana iachaskata willaikunatami iachanchi"; chi llulla iachachigkunataka, kamkuna mana iachaikurkangichichu. Chimandami sug llasa ruraikunasina mana mingaichita. ²⁵ Imasami allilla ruraspa kaugsanakungichi: chasalla kangichi, nuka samunkama. ²⁶ Mana alli ruraikunata binsig, wañunkama nuka ima munaskata ruraspa kaugsagpika, karasami, sug alpakanamanda runakunata pai mandag kangapa. ²⁷ Imasami alpa mangata iru barawa pakichigsina rurá: chasami nukapa mandaiwaka chi runakunata rurangapa ka.

²⁸ Imasami nukapa Taita mandai karamuwaskawa iukani: chasallatami paipas mandangapa ka. Lusiru istrillatapasma paita karangapa kani. ²⁹ Chasami Santu Ispíritu, Jesuswa tukuskakunata willaku. Paitaka, rinri iukagkuna uiangichi.

Jesuswa tukuskakuna Sardispi kaugsanakuskata willangapa kachaskamanda

3 Jesuswa tukuskakuna Sardis puiblupi kaugsanakuskamanda anjilta kasa ningapa kachai.

Nuka, Taita Diospa kanchis ispiritukunata i kanchis istrillakunata iukag, kasami ningapa kachaiki: kam tukui ima rurakuskatami iachani. Kasapasmi niiki: kammanda ninkuna: "Kaug sami kangichi". Chasa nigpipas, wañuskasinami kangichi. ² Rigcharigsina tukugsamui. Wañungasina kaugsaita mas kaugsachii. Kam ima ruraskakunaka, nukapa Taita Diospa ñawipi manara allilla ruraska kagtami kawaiki. ³ Chimanda, kam ima uiaspa iachaikuskata allilla iuiarii. Chi iuiaikunata suma charirii. Tukui pandariikunata sakii. Kam puñukugsina kagpika, nukaka sisaisinami mana willaspalla chaiagringapa kani. Kam mana iachangapa kangichu, imaura nuka kamta shachigsumungapa kagta.

⁴ Chasa kagpipas, Sardispi kamkunapura maillakunaka, mana katanga mapa churariskasinami kaugsanakungichi. Kamkunaka, iapa iura katanga churariskakunami nukawa puringapa kangichi, nukapa allikuna kagmanda. ⁵ Mana alli ruraikunata binsigkunaka, iapa iura katanga churariskami kangapa kangichi. Kamkunapa sutikunaka, kaugsangapa agllaskakunata willaraiaska librupimi ña tiapun-

gichi. Chi sutikunataka mana imaurapas anchuchingapa kanichu. Kamkunamandaka nukapa Taitapa i anjilkunapa ñawipi willangapami kani: "Paikunata rigsini". ⁶ Chasami Santu Ispíritu, Jesuswa tukuskakunata willaku. Paitaka, rinri iukagkuna uiangichi.

Jesuswa tukuskakuna Filadelfiapi kaugsanakuskata willangapa kachaskamanda

⁷ Jesuswa tukuskakuna Filadelfia puiblupi kaugsanakuskamanda anjilta kasa ningapa kachai.

Nuka, tukui sutipa alli, mana llullaspalla kag, ñugpamanda taita Davidpa llabita charikugmi kani. Chi llabiwa nuka ima paskaskataka, ñi pipas mana pudingapa kankunachu wickhangapa. Chasallata nuka ima wickaskataka, mana ñi pipas pudingapa kankunachu paskangapa. Kasami ningapa kachaiki: ⁸ kam tukui ima rurakuskatami iachani. Uiamui. Kamba ñugpa ladu sug pungusinami paskapurkaiki. Chitaka, ñi pipas mana wickai pudingapa kankunachu. Kam, mana iapa iachai iukaspapas, nuka ima niskata mana piñarispallami charirirkangi.

⁹ Uiamui. Iaia kukuwa iuiarispas tandaridiru wasipi iaikugkuna, llullachispami ninakú: "Judiukunami kanchi", mana sutipa judiukuna kaspapas. Paikunataka kaiachingapami kani, kamba chaki ladu kunguringapa. Chipimi rigsingapa kankuna, nuka kamta kuiagta. ¹⁰ Kam nukapa rimaita mana sakispalla charirigmandami nuka sumaglla kispichingapa kaiki, kai alpapi tukui kaugsanakuskata iapa llakiikuna tukugsamuura. ¹¹ Nuka, mana unailami samungapa kani. Kamba suma kaugsai i ruraita suma chariringi, mana kacharispalla. Chasaka, kamba llaugtusina chaskingapa kaskata mana kichui tukunkangichu.

¹² Mana alli ruraikunata binsigtaka nukapa Taita Diospa atun wasipi pilartasinami saiachingapa kani. Chimandaka, ñi imaurapas mana llugsichii tukungapa kanchu. Chipika, nukapa Taita Diospa sutita i nukapa Taita Diospa atun puiblupa sutitami churangapa kani. Chi puiblu niraiami suma luarmanda musu Jerusalén. Nukapa Taita Diospa ñawimandami uraikumungapa ka. Nuka kikinpa musu sutitapasmi chipi churangapa kani. ¹³ Chasami Santu Ispíritu, Jesuswa tukuskakunata willaku. Paitaka, rinri iukagkuna uiangichi.

Jesuswa tukuskakuna Laodiseapi kaugsanakuskata willangapa kachaskamanda

¹⁴ Jesuswa tukuskakuna Laodisea puiblupi kaugsanakuskamanda anjilta kasa ningapa kachai.

Nuka, tukui imanda mana llullaspalla sutipa kaskata willagmi kani. Nukawami Taita Dios tukui wiñachirka. Kasami ningapa kachaiki: ¹⁵ kam tukui ima rurakuskatami iachani. Kam mana kangichu nukawa ñi sugkunawa. Chasapika, rupasina ñi chirisina mana kangichu. ¡Amalai kantrangi suglla: rupasina u chirisina! ¹⁶ Kam rupasina u chirisina kangataka,

kunusinallami kangi. Chasa nukapa simipi charikug-sina kaskata kimnagsinami sitangapa kaiki.

¹⁷ Kam iuiakungimi: “Iapa iukagmi kani. Tukuimi iukani. Mana imapas pisiwanchu”. Chasa iuiakugpipas, ¿manachu iuiaringi imasa kam kikin kagta? Kam, achka llakiiwa, katanga i ñi imapas mana iukagsinami kangi. Mana ñawi iukagsinapasma kangi. ¹⁸ Chimandami nuka nintraiki: nukapa kuri ninapi suma rupachiskasinata randiwai. Chasaka, sutipa iukagmi niraiankangi. Iura katangasinata randiwai; chita katarispaka, pingai llatansina niraiaska mana kawaringapa. Ñawikunamanda ambisinatapas randiwai. Chi tallirispami allilla kawag niraiankangi.

¹⁹ Nukapa kuiaskakunatami iuiachispa, piñaspa, asutigsina ruraspa kuiani. Chasamanda, pandarii-kunata sakispa, rupasina nukawa tukui.

²⁰ Uiamui. Nukaka, pungu ladu saiarispami kaia-kuiki. Maikanpas nukapa rimaita uiawaspa, punguta paskapuagpika, wasipisina paipa sungupi iaikupusami. Paiwa i nukawa sugllapi mikuginsinami rurasunchi. ²¹ Imasami nuka kikin, mana allita binsispa, nuka kikinpa Taitapa mandadirupi paiwa sugllapi sumaglla tiarigrirani: chasallatami maikan mana allii ruraikunata binsigta ningapa kani: “Nukapa mandadirupi nukawa sugllapi tiarigsamui”.

²² Chasami Santu Ispíritu, Jesuswa tukuskakunata willaku. Paitaka, rinri iukagkuna uiangichi.

Suma luarpi, Taita Diusta iapa kuiaspa kungurina-kuskamanda

4 Chiuramandaka, sug pungu suma luarpi paskaraiaskatami kawarkani. Chi ñugpata bututusina uiariwagka niwarka:

—Kasama sikamui. Kawachingapami kaiki, kunaure-manda ima pasaringapa kagta.

² Chasa niwagllapika, Santu Ispiritumi nukawa tukug-samurka. Chasawaka, muskui ukupisinami tukug-samurkani. Suma luarpi kawarkani, sug mandag tiaridiru tiagta. Chi mandadirupika, sugmi tiakurka. ³ Chi tiakugka, jaspe i kornalina suti rumikunasina iapa suma punchaiachigsinami kawariwarka. Chi tiaridiru muiundika, esmeralda punchaiachikugsina kuichimi saiakurka.

⁴ Chi mandag tiaridiru muiugtaka, iskai chungu chusku tiaridirumi tiagta kawarkani. Chi tiaridirukunapika, iskai chungu chusku iacha taitakunami tianakurka. Chi taitakunaka, suma iura katangakuna i umapika kuri llaugtukunasina churarispami tianakurka.

⁵ Chi mandag tiaridirupagmandaka, iapa manchangasina rilampa, triwinusina sinchi rimaiasmi uiarikug-samurka. Kanchis sindi michunkunami mandag tiaridiru ñugpa ladu rupanakurka. Chikuna, Diuspa kanchis ispiritukunami niraiarkakuna. ⁶ Atun kucha u bidriusina rigchapasma chi tiaridiru ñugpa ladu kawariwarka.

Chi tiaridiru ukupi, chusku kuchukunapi tiarkami chusku animalsina rigcha kaugsagkuna. Chikuna, tukui ñawilla jundami kawariwarkakuna. ⁷ Chi sug

animalsina rigchakunamandaka, liunmi rigcha kawariwarka; iskaimaka, kari wagrasi rigcha; kimsamaka, runasina ñawiiug; chuskumaka, sug atun agila ña wairapi ataringasinami kawariwarka. ⁸ Chi tukui chusku animalsina rigchakunaka, sugta sugta alaskunami iukarkakuna. Tukui alaskunapika, iskandima ñawi murullami junda karkakuna. Tuta i puncha mana sakinkunachu, ikuti ikuti ninakungapa:

—Iapa alli, iapa alli, iapa alli, tukui pudig atun Iaia Taita Dius.

Paimi ñugpata karka i kunaurepas ka.

Paillatataki samungapa ka.

⁹ Chi chusku animalsina rigchakuna, diltudupa imaurapas kaugsaiwa mandag tiaridirupi tiakugta iapa suma allilla atuniachispa, “Pai Siñur” nispa kauraka, ¹⁰ chi iskai chungu chusku iacha taitakunaka, paipa chaki ladu kumurisipami kungurinkuna. Nispaka, paikunapa llaugtukunata tiaridiru ñugpa ladumi churan-kuna, kasa nispa:

¹¹ —Nukanchipa atun Taita Dius,

kammi iapa alli kangi,

iapa suma alli atuniachii tukuspa,

tukui pudig kangapa,

maituku waranga waranga watakuna ialigpipas.

Kammi tukui ima tiaska wiñachirkangi.

Kam munaskamandami

tukui ima wiñachiskapas tia.

Maituskapi iskribiraiaskamanda i ubijasina rigchamanda

5 Chiuramandaka, chi tiaridirupi tiakugpa alli makipi sug maituskapi iskribiraiaskata charikugta-mi kawarkani. Ñugpa ladu i wasa ladu iskribiskami karka. Kanchis sillu prinsaskami karka. ² Sug anjil iapa pudigtapasmi kawarkani. Chi anjilka, sinchi rimaiwa kaparirka, kasa tapuspa:

—¿Pitak iapa alli kangichi, chi sillukunata pitichispa, iskribiraiaskata paskangapa?

³ Chiura sug luarpi, alpapi ñi alpa ukupi, ñi pipas mana alli tiarka, chi iskribiraiaskata paskaspa, ima niraiaskata kwaspa iachangapa. ⁴ Ñi pipas mana tiag-manda, nukata iapa wakaimi chaiawarka. ⁵ Chasa wakakuuraka, sug iacha taitaka niwarka:

—Mana wakakui. Kawai. Judá suti runapa iawar-manda liun kagsina, atun mandag Davidpa wambra-kunapa wambami binsigsamurka. Paimi, chi kanchis sillukunata pitichispa, iskribiraiaskata paskangapa ka.

⁶ Chiuraka, kasapasmi kawarkani: mandag tiaridiru chaugpipi, chi chusku animalsina rigchakunapa chaugpipi, chi iacha taitakuna kaskapi, chipika, sug Ubijasina saiarigsamurka. Chi Ubijaka, wañuchingapa tugsiska kagsinami kawariwarka. Kanchis kachuiug, kanchis ñawi muruiugmi karka. Chikuna niraiami Taita Diuspa kanchis ispiritukunata kai tukui alpama pai kachamuska.

⁷ Chi Ubijaka, mandag tiaridirupi tiakugpagma kailla-iaspaka, paipa alli maki ladu charikuska iskribiraiaska-

tami chaskirka. ⁸ Chita chaskiuraka, chi chusku animalsina rigchakuna i iskai chunga chusku iacha taitakunaka, Ubijapa ñugpa ladu kumurispami kungurirkakuna. Chi tukuikunaka, sug sug arpa i suma asna kupal jundachiska kurita ruraska kupakunami charinkurka. Chi suma asna kupalkuna niraianmi Taita Diospalla kagkuna ima mañanakuska. ⁹ Kungurispaka, musu kantumi birsiarkakuna, kasa nispa:

—Kammi wañuchii tukurkangi.

Kamba iawarwaka,
tukui puiblukananigmanda,
tukui alpakananigmanda,
tukuinigmanda sug rigcha
sug rigcha rimaspa runakunatami
Taita Diosmanda randirkangi.
Chimandami kam kikin alli kang,
chi iskribiraiaskata chaskispa,
prinsaska sillukunata pitichingapa.

¹⁰ Paikunatami nukanchipa Taita Diosmanda agllarkangi,

mandagkuna i sasirdutikuna kangapa.

Paikunami tukui alpapi mandangapa kankuna.

¹¹ Chiuramandaka, ikuti kasapasmi kawarkani: mandag tiaridiru muiugta, chi chusku animalsina rigchakuna i chi iacha taitakunapa muiugtapas, iapa achka anjilkunatami uiarkani. Chi anjilkuna, iapa achka waranga warangami karkakuna. ¹² Paikunaka, sinchi rimaiwa ninakurka:

—Kam Taita Diospa Ubija suti wañuchiimi tukurkangi.

Kamta chaiakumi
tukui pudiita,
tukui iukaita,
tukui iachaita
i tukui mandaita
kam iukangapa.

Kam, iapa sumami kang;
iapa allimi kang;
iapa atunmi kang.

¹³ Sug luarpi, kai alpapi, alpa ukuma i lamar iakupi, tukuipipas tukui ima tiaskakuna i tukui kaugsagkunapas ima ninakuskatami uiarkani. Taita Dios tiaridirupi tiakugta i paipa Ubija sutitapas kungurinakurka, kasa nispa:

—Ari, kam, imaurapas iapa suma alli atunmi kang.

Kammi imaurapas kang tukui pudig.
Chasami kamta ninakungapa kanchi,
maituku waranga waranga watakuna ialigpipas.

¹⁴ Chiura, chi chusku animalsina rigchakunaka nirakuna:

—Chasa kachu.

Iacha taitakunapas, alpama kumurispas, paita kungurirkakuna.

Chi kanchis prinsaska sillukunata pitichiskamanda

6 Taita Diospa Ubija suti kanchis prinsaska sillukunamanda sug silluta pitichiskatami kawarkani. Chiuraka chi chusku animalsina rigchakunapura sugka, tri-

winu uiarigsina rimaiwa kaparirka, kasa nispa:

“Samui”. ² Chasa kaparigllapika, sug iura kaballumi kawarigsamurka. Chipi tiakugka, flichadiru arkusmi charinkurka. Paitaka sug llaugtumi churachirkakuna. Chasaka, binsidursinami llugsirka, ikuti ikuti binsiilla apakungapa.

³ Iskaima chi prinsaska silluta pitichiuraka, ikuti sug animalsina rigchata uiarkani, “Samui” kaparigta.

⁴ Chasa kaparigllapika, ikuti sug puka kaballumi llugsirigsamurka. Chipi tiakugtaka kacharkakunami, tukui kai alpapi runakunapura wañuchinakui tukungapa. Chasa rurangapaka, sug largu machitimi paita kuarkakuna.

⁵ Kimsama chi prinsaska silluta pitichiuraka, kimsama animalsina rigchata uiarkani, “Samui” kaparigta. Chasa kaparigllapika, iana kaballumi kawarigsamurka. Chipi tiakugka, libradirumi makipi charinkurka. ⁶ Chiura, chi chusku animalsina rigchakunapa chaugpimanda kasa rimaimi uiariwarka:

—Iapa iarkai puncha chaimugmanda, suglla kilu trigu, chisiagta puncha ganaska kulkimi balingapa ka. Kimsa kilu sibadapas, chasallatami balingapa ka. Ikuti asiti u binutaka mana waggllichingi.

⁷ Chuskuma chi prinsaska silluta pitichiuraka, chuskuma sug animalsina rigchata uiarkani, “Samui” kaparigta. ⁸ Chasa kaparigllapika, killu kaballumi llugsirigsamurka. Chipi tiakugka suti niraiarkami: “Wañui”. Paipa katika, ikuti sugka kati ladu tiakurka. Chi, sutimi niraiarka: “Wañuskakuna kadiru”. Paitaka lisinsia kuarka, kai alpapi tukui kaugsanakuska runakuna chuskuma partiriska kaskakunataka sug partita wañuchingapa. Wañuchinakuiwa, iarkaiwa, unguikunawa i sachukumanda jiru animalkunawami wañuchii tukungapa lisinsia kuarka.

⁹ Pichkama chi prinsaska silluta pitichiuraka, sug almakunatami altar ukuma kawarkani. Chi almakunaka, Diospa Rimaita suma allilla willagkunamanda wañuchii tukuskami karkakuna. ¹⁰ Chikunaka, sinchimi kaparinakurka, kasa tapuspa:

—Tukui manduiug Taitiku, tukuipi mas alli kag, suma mandaiwa kag i sutipa ima niskata rurag, ¿imaurakamatak suiankangi, justisiai rurangapa? ¿Imauratak nukanchita wañuchiska iawar surkuskakunata alpapi kaugsagkunata randichipuankangi?

¹¹ Chiuraka, chi tukuikunata sug sug iapa iura katangami iukachirkakunata, kasa nispa:

—Chara sug ratu suiariichi. Kamkunapa waugki i panikunami chara pisinakú. Paikunapas kamkunasinallatata Cristomanda wañuchii tukuspa samunkama suiariichi.

¹² Sugtama chi prinsaska silluta pitichiuraka, nuka kawarkaniami, tukui alpa timburigsamugta. Indi punchaiaka, iana tutami tukugsamurka. Killa punchaiaka, iawarllami kawarig tukugsamurka. ¹³ Istrillakunaka, awanigmanda kai alpama urmamurkakuna; imasami igus sacha iapa sinchi wairawa chabsirispas llullu mikui-kuna susurinkuna: chasa. ¹⁴ Awa ladupas, sug papil maituriskasinami tukugsamurka. Tukui atun filukuna i

islakuna pariju, sugsinamami ialichii tukurkakuna.

¹⁵ Chasa kawaspaka, kai alpapi atun mandagkuna i kati mandagkuna, suldaduta atun mandagkuna, iapa iukagkuna i iapa pudigkuna, patrunkuna i lutrinkunapas, tukui runakunaka maipi pusukuna kawariska i piñakunanigtami mitikuspa pakakugrirkakuna, ¹⁶ kasa nispa:

—Filukuna i awa rumikuna, nukanchipa awa urmagsamuichi. Pakawaichi, chi mandag tiaridirupi tiakug mana nukanchita kawangapa, chi Ubija sutika nukanchiwa rabiarispa llakii iukagmanda. ¹⁷ Paikuna askurinti rabiarispa llakii punchami chaiamurka. Chasataka, ¿pisik pudinga kispiringapa?

Israelpa iawar iukaskakunata agllaskakunamanda

7 Chiuramandaka, ikutimi kawarkani: chusku anjilkuna, kai alpapi saianakuspa, chusku ladunigmanda waira chaianakuskatami arkanakurka, alpapi, lamar iakupi ñi ima sachapi mana waira chaiamungapa. ² Sug anjiltapasmi kawarkani. Chi anjilka, indi llugsidirunigmanda samuspa, kaugsag Taita Diospa prinsadiru sillutami charikurka. Ikuti sug chusku anjilkunapasmi karkakuna; paikuna, alpata i lamar iakuta waggllichingapa kachamui tukuskakuna. ³ Prinsadiru silluta charikug anjilka, paikunata sinchi kaparigsamurka, kasa nispa:

—Alpata, lamar iakuta ñi sachakunata manara waggllichingichi, nukanchipa Taita Diospa lutrinsinakunata printipi sillu churankama.

⁴ Chiuramandaka uiarkani maitukukuna silluwa prinsai tukugtakuna: patsa chusku chungu chusku waranga. Chi tukui runakunapa ñugpamanda kallari gachala taita, Israelmi suti karka.

⁵ Judá suti runapa wambrakunapa wambrakunataka, chungu iska warangasi silluwa prinsai tukurkakuna.

Rubén suti runapa wambrakunapa wambrakunataka, chungu iska waranga chasallata.

Gad suti runapa wambrakunapa wambrakunataka, chungu iska waranga chasallata.

⁶ Aser suti runapa wambrakunapa wambrakunataka, chungu iska waranga chasallata.

Neftalí suti runapa wambrakunapa wambrakunataka, chungu iska waranga chasallata.

Manasés suti runapa wambrakunapa wambrakunataka, chungu iska waranga chasallata.

⁷ Simeón suti runapa wambrakunapa wambrakunataka, chungu iska waranga chasallata.

Leví suti runapa wambrakunapa wambrakunataka, chungu iska waranga chasallata.

Isakar suti runapa wambrakunapa wambrakunataka, chungu iska waranga chasallata.

⁸ Zabulón suti runapa wambrakunapa wambrakunataka, chungu iska waranga chasallata.

José suti runapa wambrakunapa wambrakunataka, chungu iska waranga chasallata.

Benjamín suti runapa wambrakunapa wambrakunataka, chungu iska waranga chasallata silluwa prinsai tukurkakuna.

Iapa achkakuna, iura katanga churariska kawariskamanda

⁹ Chiuramandaka, mana pipas kuintai pudingasina iapa achka runakunatami kawarkani. Chi runakuna karkakunami tukui alpanigmanda i tukui puiblukunanigmanda. Tukuinigmanda sug rigcha sug rigcharimaspami karkakuna. Taita Dios kikin mandag tiaridiru ñugpa ladu i paipa Ubijapa ñugpa ladumi saianakurka, iura katangakuna churariska i ramuskuna charispa. ¹⁰ Chi runakunaka, sinchi kaparispa, ninakurka:

—Nukanchipa Taita Dios, mandag tiaridirupi tiakug i paipa Ubija sutimi nukanchita kispichig kangi.

¹¹ Iacha taitakuna i chi chusku animalsina rigchakuna, mandag tiaridiru ladupimi karkakuna. Tukui anjilkuna, paikuna kaskapi i tiaridiru muiugtami saianakurka. Nispaka, chi tiaridiru ñugpa ladu alpama kumurispa, nukanchipa Taita Diusta kungurirkakuna, ¹² kasa nispa:

—Kasa kachu.

Kam, imaurapas iapa suma alli atunmi kangi.

Imaurapas kamta:

Pai Siñurmi ninchi.

Kammi imaurapas kangi

tukui iachag,

tukui pudig

i tukui mandag.

Chasami kamta ninakungapa kanchi,

maituku waranga waranga watakuna ialigpipas.

Chasa kachu.

¹³ Chipi kag sug iacha taitaka tapuwarka, kasa nispa:

—Chi iura katanga churariskakuna, ¿pikunatak kankuna? ¿Maimandatak samurkakuna?

¹⁴ Nukaka ainirkani:

—Kam kikin taitami iachapuangi.

Chasa ainiura, paika niwarka:

—Paikuna, iapa achka llakii pasaskami kankuna.

Paikunapa katangakuna,

Taita Diospa Ubijapa iawarpimi tagsaspa,

iuraiachirkakuna.

¹⁵ Chasamandami Taita Dios mandag tiaridiru ñugpa ladu kagsamunkuna.

Tuta i puncha, paipa atun wasipi pai ima niskata

ruragmi kankuna.

Taita Dios mandadirupi tiakug kikinmi suma kawangapa kankunata.

¹⁶ Mana iarkai ñi iakunaiai

paikuna iukangapa kankunachu.

Indi rupai ñi sug rigcha rupaikunapas,

paikuna mana tantiangapa kankunachu.

¹⁷ Taita Diospa Ubija suti mandag tiaridirupa ñugpa ladu saiakugpasmi suma kawangapa kankunata.

Iaku ñawikunamami

paikunata pusangapa ka,

chipi upiaspa, sumaglla kaugsai iukangapa.

Taita Diospas,

paikunapa tukui wikitami

ñawimanda tustachingapa kankunata.

Kurita ruraska kusnichingapa churadirumanda

8 Taita Diospa Ubija suti kanchisma chi prinsaska silluta pitichiuraka, chaugpi urasinami sug luarpi upallagsamurka. ² Chiuramandaka kanchis anjilkuna, Taita Diospa ñugpa ladu saianakugtami kawarkani. Tukui kanchiskunataka sug sug bututusunami kuarkakunata.

³ Chiuramanda sug anjilka, altar ñugpa ladumi saiarigsamurka, kurita ruraska kusnichingapa churadiruta chaririska. Paitaka achka suma asna kupalmi kuarkakuna; chiwanka, Taita Diosmandalla kaugsagkuna ima mañanakuskawa kurita ruraska altarpí chapuchispa kusnichingapa. Chi altar, mandag tiaridiru ñugpa ladumi saiachiska ka. ⁴ Chasapika, suma asna kusnikunaka, anjilpa makimanda atarispá, chi suma mañanakuskawa sugllapi chapurispá, Taita Diospa ñawipi chaigrirka. ⁵ Chiuramanda chi anjilka, altarpí rupakuska ninata apispa, kusnichingapa churadirupi jundachispaka, kai alpama sitamurka. Chi nina kilimsakuna alpama sitamuuraka, iapa sinchi rimai i triwinu uiarispá, rilampa kawarispá, alpami timbugsamurka.

Kanchis bututusinata pukuskakunamanda

⁶ Chi kanchis anjilkunaka allichirirkakunami, bututusinata pukungapa. ⁷ Sug anjilka pukurka. Pukugllapi, granisu i nina iawarwa chapurispami kai alpama urmagsamurka. Chasawaka, kai alpa kimsama partiriska kaskata sug parti sachakuna i birdi ugsawantami rupagsamurka.

⁸ Iskaima anjilka pukurka. Pukugllapi, atun luma filu ninalla sindisinaka lamar iakuma sitai tukurka. Chasawaka, lamar iaku kimsama partiriska kaskata sug parti pai iawarllami tukugsamurka. ⁹ Chasapika, chi kuchapi kaugsag animalkuna kimsama partiriska kaskata sug partimi wañurkakuna. Chipi kaska barkukunapas, chasallatami puchukarirkakuna.

¹⁰ Kimsama anjilka pukurka. Pukugllapi, sug atun istrilla nina sindisinami awamanda urmagsamurka. Iakukuna i iaku ñawikuna kimsama partiriska kaskata sug partipimi urmagsamurka. ¹¹ Chi istrilla suti kanmi "Winja". Chi istrilla urmagsamuskawaka, chi sug parti tukui iakumi winjaiagsamurka. Iapa achka runakunami, chi winjaiaska iaku upiaspa, wañurkakuna.

¹² Chuskuma anjilka pukurka. Pukugllapi, indi, killa i istrillakuna kimsama partiriska kaskata sug partimi waggllhii tukugsamurkakuna. Chasawaka, chitukullatata paikunapa punchaiaka tutaiagsamurka. Puncha i tutapas chasallata sug parti iapa tutaiarka.

¹³ Chiuramandaka, sug agila iapa awapi bulakuskatami kawaspa uiarkani. Chi agilaka, sinchi rimaspami kaparigsamurka, kasa nispa:

—¡Ai ai ai, apai alpapi kaugsagkuna, imachar pasangakuna, kai sug kimsa anjilkuna bututusinata pukura!

9 Pichkama anjilka pukurka. Pukugllapi, sug istrillasina kawari awamanda kai alpama urmaskatami

kawarkani. Chi istrillasinataka kai alpa ukunigmanda pusupa pungumanda llabitami kuarkakuna. ² Chi pusuta paskagsamuuraka, sug askurinti atun kusnimi llugsigsamurka. Chi kusniwaka indi i wairata iapami amsaiachirka.

³ Chi kusnimandaka, langosta suti atun chapulinkunasinami kai alpapi tukuima chapurigsamurka. Paikunata kuarka, kai alpamanda alakrankunasina tugsispa waggllhichingapa. ⁴ Paikunata nirka:

—Kai alpapi tiaska ugsakunata, waskakunata i sachakunata mana waggllhichigichi. Maikan runa Taita Diospa prinsaska sillu printipi mana iukaskakunallata tugsispa nanachingichi.

⁵ Chi langostakunataka mana chi runakunata wañuchingapa lisinsia kuarkakunatachu. Pichka killapa mana awantangasina nanachingapagllami niraiarkakunata; imasami alakran, tugsispa, runakunata mana awantangasina nanachí: chasa. ⁶ Chi punchakunaka, runakuna wañungapa maskanakugpipas, mana pudingapa kankunachu wañui taringapa. Ari, wañungapa munanakugpipas, wañui mana chaimungapa kankunatachu.

⁷ Chi langostakunaka rigchawarkakunami kaballukuna wañuchinakuima ña ringapa kagsina. Paikunapa umapika, kuri llaugtu churaraiaaskasinami rigchawarkakuna. Paikunapa ñawika, runakunapasinami rigchawarkakuna. ⁸ Paikunapa agchaka, warmikunapa agchasinami rigchawarka. Kirukunaka, liunpasinami rigchawarka. ⁹ Paikunapa pichupika, iruta ruraska katangasinami kataraiarkakuna. Alaskuna kuiuchiuraka, achka kaballu aliudiru augtukuna wañuchinakuima kalpanakugsinami uariwagsamurka. ¹⁰ Chupakunaka, alakran tugsidiruiug kagsinami rigchawarkakuna; chikunawaka, pichka killa runakunata mana awantangasina nanachiikuna rurangapa. ¹¹ Paikunata mandagka, alpa ukumanda iaia anjilmi ka. Paipa sutika, hebreo rimaiwami ka "Abadón". Griego rimaiwaka, Apolionmi suti ka. (Chi sutikuna, llakichispa puchukagmi niraiá.)

¹² Ñugpa llakii, ñami ialirka. Charami iskaí llakii pisi-ku.

¹³ Chiuramanda, kasami kawarkani. Sugtama anjilka, bututusinata pukurka. Pukugllapi, Taita Diospa ñugpa ladu kurita ruraska altar saiakuska chusku ladunigmandaka † sug rimaitami uiarkani. ¹⁴ Chi rimaika, sugtama anjilta nirka:

—Chusku anjilkuna Eufrates suti atun iaku patapi wataraiaskakunata kacharigrii.

¹⁵ Chiuraka, chi chusku anjilkunata kacharigrirka. Paikunami allichiriska suianakurka, ima ura, ima puncha, ima killa, ima wata chaimunkama, runakuna kimsama partiriska kaskakunataka sug partita puchungapa. ¹⁶ Chi anjilkunapa kaballupi tiarig suldadukunaka, iskaí patsa waranga warangasi karkakuna. Chasami uiarkani.

¹⁷ Nukapa muskui ukupisinaka, kasami kaballukuna i chikunapi tianakuskata kawarkani. Tianakuskapa

† u "ladu kachumanda".

pichupika, nina sindisina puka, asul i asufrisina killu rigcha iruta ruraska katangasinami kataraiarkakuna. Kaballukunapa umaka, liunpa umasinami rigchawarakuna. Paikunapa simimandaka, asufri nina kusnimi llugsikurka. ¹⁸ Runakuna kimsama partiriska kaskata sug parti, chi kimsa llakiikunawami wañurkakuna. Chi kaballukunapa simimanda asufri nina kusni sitanakuskawami wañurkakuna. ¹⁹ Chi kaballukunaka, simiwa i chupawapasmi wañuchii pudirkakuna. Chupakunaka, kulibrasina umaiugmi karkakuna; chiwanka, runakunata tugsingapa.

²⁰ Chi llakichiikunawa wañuskakunata kawaspapas, kaugsa kidagkunaka, paikunapa jiru ruraikunata mana sakirkakunachu. Kuku wairakunata, ñi kurita, kulkita, brunsita, rumita i kaspita ruraska diuskunatapasa mana sakirkakunachu muchangapa; chi ianga diuskuna, kawangapa, uiangapa ñi puringapa mana pudinkunachu. ²¹ Chasallata wañuchii, jiru iacha pukui, kari warmiwa pandarii ñi sisaipas mana sakirkakunachu. Chiwanka, Taita Dioswa mana tigrarkakuna.

Uchulla maituskapi iskribiraiaskata, San Juan mikuskamanda

10 Chiuramandaka, kasami kawarkani. Sug iapa iacha anjil puiyuwa maituriskami sug luarmanda uraikumukurka. Paipa umapika, kuichisinami muiuchiraiarka. Paipa ñawika, indisinami pucha karka. Paipa chakikunaka, puka nina pilarkunasinami karka. ² Paipa makipika, uchulla maituskapi iskribiraiaska paskaskatami charikurka. Chi anjilka, alli chakita lamar iakupimi churarka. Lluki chakitaka alpamami sarurka. ³ Nispaka, liun sinchi kaparigsinami kaparigsamurka. Chasa kaparigllapika, kanchis triwinukunapasmi sugllapi aini-chirkakuna. ⁴ Nuka chi kanchis triwinukuna ima aini-chiskata iskribingapa ña kauraka, suma luarnigmamanda rimai kasami niwarka:

—Kanchis triwinukuna ima ainichiskata mana iskribii. Chasaka, ñi pipas mana iachangachu.

⁵ Chi nuka kawakuska lamar iakupi i alpapi saiakug anjilka, alli maki awasinama atarichirka, ⁶ kasa nispa:

—Diltudupa imaurapas kaugsag, sug luar, alpa luar, lamar iaku i tukui ima chikunapi tiaskakunata wiñachigmi kawaku. Kasami paipa ñawipi nini: mana mas suiai tiangapa kanchu.

⁷ Kanchisma anjil bututusinata pukungapa kaura, Taita Dios ima iuiaskata timpumi ruraska karka, imasa pai kikinpa Ispirituwa rimaspa lutrinsinakunata willaskasina. Chitaka pakaskasinami karka, ñi pipas mana ñugpa iachangapa.

⁸ Chi suma luarnigmamanda rimawagka ikuti kasami niwarka:

—Chi anjil lamar iakupi i alpapi saiakugpagma kaillaigarii. Chi uchulla maituskapi iskribiraiaska makipi paskaska charikuskata chaskigrii.

⁹ Chiuraka, chi anjilpagma rispa, nigrirkani:

—Chi uchulla maituskapi iskribiraiaskata kuawai. Chiura, kuawaspa niwarka:

—Kam mikui. Kamba simipi dusionsina miski mikurigpipas, kamba wigsa ukumaka winjallami iuiachingapaka.

¹⁰ Chi iskribiraiaskata anjilpa makimanda chaskispaka, mikurkani. Nukapa simipi, dusionsina miskimi mikuriwarka. Mikui puchukaskauramandaka, wigsa ukuma iapa winjallami iuiachiwagsamurka. ¹¹ Chiuramandaka niwarkakuna:

—Ikutimi kamta chaiaku, achka puiblukunapi kaugsanakuskamanda, achka alpakunamanda, sug rigcha sug rigcha rimai iukaskakunamanda i achka mandagkunamandapas Santu Ispiritupa iuiaiwa willagringapa.

Diusmanda iskai willagkunamanda

11 Chiuramandaka, tupudiru pukungasinami kuawarkakuna, kasa niwaspa:

—Atarii. Diospa atun wasi altarwanta tupugrii. Maituku chi ukupi kunguriska tiagkunatapasa kuintangi.

² Ikuti chi atun kanchataka sakingi, mana tupuspalla. Chi kanchaka, mana Taita Diusta uiagkunamandami sakiska ka. Paikunaka, chusku chungu iskai killami Taita Diospalla kaska puibluta apuntadu sarunakungapaka. ³ Nukamanda iskai willagkunatami chima kachangapa kani. Paikunaka, wañuskasinamanda iana katanga churarispa, nukapa Ispirituwami chipi rimapuanga-pa kankuna, chi waranga iskai patsa sugta chungu punchakuna.

⁴ —Chi iskai nuka kachaskakunaka, kai alpata mandag atun Taita Diospa ñawipika iskai olivos suti sacha i iskai bila saiachidiru, paikunallatatami niraiankuna. ⁵ Maikanpas paikunata mana alli rurangapa munanakuskata, nina sindimi paikunapa simimanda pukungapa kankunata, chi mana munagkunata diltudupa puchukangapa. Chasami maikanpas paikunata jiru rurangapa munanakug puchukaringapa kankuna. ⁶ Chi iskandi Santu Ispirituwa rimagkunaka pudingapami kankuna, tamiatapasa arkachingapa; chasaka, mana chi punchakuna tamiangapa. Chasallatami pudingapa kankuna, iakukunatapasa: “Iawar tukugsamui” ningapa i, masa biajikunapas paikuna imasa munaskasina, kai alpamanda runakunata sug rigcha sug rigcha llakichingapapas.

⁷ —Paikuna chasa willaita puchukaskauramandaka, sug iapa manchangasina atun kukuka, alpa ukunigmamanda llugsirispa, paikunata makaipi binsispami wañuchingapa ka. ⁸ Wañuchii tukuskakunapa kuirpukunataka atun kaska puiblupimi sitaspa sakingapa kankuna. Chi puiblupi mana allilla ruraspa kaugsanakuskamanda, Iaia Jesuswa suma iuiarigkuna sutichinchimi: “Sodoma” u “Ejipto”. Chi puiblullapitami Iaia Jesús kruspi klabai tukurka. ⁹ Chasa pasariuraka, tukui sug puiblukunanigmamanda i alpakananigmamanda, tukuinigmamanda sug rigcha sug rigcha rimagkunapasmi chi sitaska kuirpukunata kawangapa kankuna. Kimsa pucha i chaugpimi mana pambaspalla kanchapi sakingapa kankuna. ¹⁰ Paikuna wañugsamugmandaka, kai alpapi kaugsanakugka, sumaglla kuntintarispa, paipura paipura sugma sugma iukachiriikunami ruranakunga-

pa kankuna, kasa nispa: “¡Achalai! Chi iskandi Santu Ispirituwa rimagkuna ñami wañurkakuna. Paikunami nukanchita iapa imapipas piñaspa iacharkakuna kanga”.

¹¹ Chi kimsa puncha i chaugpi ialiskauramandaka, kasami kawarkani: chi iskandikunapa kuirpupika, Taita Diospa samaiwami kaugsachirkakunata. Chiwanka, ikutimi saiarispa purii kallarikakuna. Chipi tukui kawanakugtaka askurintimi manchachirkakuna. ¹² Chi iskandikunaka, suma luarnigmanda sinchi rimaitami uiarkakuna: “Kasama sikamui” nigta. Chiuraka, suma luarmami puiupi sikarkakuna, paikunata mana munagkuna kawanakugllapi.

¹³ Paikuna sikagllapika, alpami timbugsamurka. Chiwanka, chi atun puibluta chungama pitichigsina niipa, sug piti chi atun puiblu kaskaka puchukarigtami urmaka. Chipika, kanchis waranga runakunami wañurkakuna. Ikuti sugkunaka kaugsa kidagkunaka, askurinti mancharispa, Taita Dios suma luarpi tiagtami dimanchai kungurispa, nirkakuna: “Kam, iapa suma atunmi kangi”.

¹⁴ Iskaima llakii ñami ialirka. Ñallami kimsama samungapa ka.

Kanchisma bututusinata pukuskamanda

¹⁵ Kanchisma anjilka, bututusinata pukurka. Pukugllapi, sinchi rimaikunami suma luarmanda uiarirka, kasa nispa:

—Tukui alpapi mandai tiagkuna, nukanchipa atun Taita Diospa i pai agllaska Cristopami tukugsamurka. Ari, mana tukurii punchakunapimi mandangapa ka, maituku waranga waranga watakuna ialigpipas.

¹⁶ Chiwanka chi iscai chungacha chusku iacha taitakuna Taita Diospa ñawi ladu mandadirupi tianakugka, suma kumurispa, paita kungurirkakuna, ¹⁷ kasa nispa:

—Kam tukui pudig atun Taita Diusta:

Pai Siñurmi ninchi.

Kammi kunaura kangi

i ñugpamandata karkangi.

Kam kikinpa iapa iachaiwami tukuita suma mandaiwa kallarikangi.

¹⁸ Tukui alpapi kaugsanakugka, kamwami rabiariska kankuna.

Chi rabiariskakunamanda, ñami kamba puncha chaiamurka, paikunatapas rabiallowanta randichingapa; chasallata, wañuskakunatapas justisiai rurangapa. Ikuti kamba lutrinsinakunata,

kamba Ispirituwa rimagkunata, kammandalla kaugsagkunata i atun u uchulla kaskakunatapas, tukui kamta sumaglla kuiaspa manchaiwa kaskakunataka

sumagllami karangapa kangi.

Alpapi tukui wagllichigkunatapas chasallatami paikunata randichingapa kangi.

¹⁹ Chiura Diospa atun wasi suma luarpi tiaskaka, pungu paskaskasinami kawariwarka. Taita Dioswa

runakunawa iuiarinakuska suti baultami chi ukupi kawariwarka. Chasa kawariwauraka, rilampa kawarispa, iapa sinchi rimai i triwinusina uiarispa, alpa timburispa, iapa granisumi urmagsamurka.

Warmi indisina puncha katanga churariska i amarun kukumanda

¹² Chiuramandaka, sug ajai iapa atun siñalmi awapi kawariwagsamurka. Chipika, sug warmi indisina puncha katanga churariska, killa awallami saiakurka. Paipa umapika, chungacha iskai istrillaiug llaugtusunami muiuchiraiarka. ² Chi warmika, wambrituwa unguringapami karka. Ajaimi kaparikurka, nanai apikugmanda.

³ Sug siñalpasmi awapi kawarigsamurka: sug nina pukasina ajai atun amarun kuku, kanchis umaiug i chungacha kachuiug. Tukui kanchis umapi, sug sug llaugtusunami churaraiarka. ⁴ Chi amarun kukuka, awapi tiaska istrillakuna kimsama partiriska kaskakunataka sug partita paipa chupawa aliuspami kai alpama bulachimurka. Chi amarun kukuka, chi ungug warmipa ñugpa ladumi saiarigsamurka, wawa tiagsamugllapi, mikungapa.

⁵ Chi warmika, kari wambrami iukagsamurka. Chi wambra niraiarkami tukui alpamanda runakunata iru barawa iapa mandag kangapa. Chi wawataka tiakug Taita Diospa mandag tiaridirumami aparkakuna. ⁶ Chi warmika, Taita Dios agllaska chusa sitaska alpa luarmani mitukurka; chipika, waranga iskai patsa sugta chungacha puncha paitaka mikui karakungapa.

⁷ Chiuramandaka, sug luarpi makanakuimi tiarka. Atun anjil, Miguel suti, paipa anjilkunawa, amarun kuku i amarunpa anjilkunawapasmi makanakurka. Chi amarunka, paipa anjilkunawanta ⁸ mana pudirkakunachu binsingapa. Chasaka, mana mas pudirkakunachu, sug luarpi kaugsangapa. ⁹ Chasapika, chi iapa atun amarun kuku, kai alpamami sitamui tukurka. Chi amarunka niraiami unai ñugpamanda kuku kulibra, tukui kai alpamanda runakunata llullachig, Diablu u Satanás suti iaia kuku. Paita i tukui paipa anjilkunawantami kai alpama sitamui tukurkakuna.

¹⁰ Chiuraka, suma luarpi, kasami sinchi kaparii uiariwarka:

—Ñami nukanchita kispichii puncha chaiamurka.

Taita Diospa iapa iachaiwami chaiamurka.

Nukanchipa Taita Diospa suma mandai puncha ñami chaiamurka.

Pai agllaska Cristopa mandaipasmi kawarimurka.

Nukanchipa waugkindikunata juchachig iaia kuku ñami sitai tukurka.

Tuta i punchami

nukanchipa Taita Diospa ñawipi paikunata juchachidur karka.

¹¹ Nukanchipa waugkindikunaka, paipa Ubija suti wañuchii tukuskapa iawarwami chi iaia kukuta mitikuchirkakuna.

Diospa Rimaita willaskakunawapasmi paita mitikuchirkakuna.

Ari, wañuita mana mancharispallami willai aparkakuna.

¹² Chasamanda, suma luarmanda kagkuna i tukui chipi kaugsagkunapas, ajai sumaglla alli iuiachiriilla kaichi. Ikuti, ¡jai, kamkunamanda iapa llakii alpapi i lamar iakupi tukui kaugsagkunamanda!

Chi iaia kukuka iachá, mana achka punchakuna paimanda iukangapa kagta. Chimandami askurinti achka rabiawa kamkunapagma uraikumurka.

¹³ Chi amarun kukuka, alpama sitamui tukuska kagta kawarispaka, chi kari wambra iukaska warmita kalpachingapami kallariirka. ¹⁴ Chi warmitaka atun agilapa iskandi alaskunatami churachirkakuna; chiwanka bu-laspa, amarun kukuta sakispa, mitikungapa; paimanda agllaska chusa sitaska alpa luarpika kimsa wata sugta killa mikui chaskispa kaugsakungapa. ¹⁵ Amarun kukuka, paipa simimanda atun iakumi kimnarka; chiwanka, chi warmi apai tukungapa. ¹⁶ Alpaka, warmita kispichingapaka, simi paskarigsina tukugsamuspa, chi amarunpa simimanda kimnaska iakuta amullispa upiarka. ¹⁷ Chasamanda amarunka, chi warmimanda askurinti rabiariispa, rirka, warmipa sug wambra-kunata makangapa. Chi wambrakunaka niraiankunami Taita Dios ima niskakunata ruraspa i Jesús ima willaskata suma charirispa kaugsagkuna.

¹⁸ Amarun, lamar iaku patapi rispaka, saiarigrirka.

Iskai iapa manchangasina atun kukukunamanda

13 Lamar iakumandaka sug iapa manchangasina atun kuku llugsirigsamugtami kawarkani. Chi kukuka, chungu kachuiug, kanchis umaiugmi karka. Tukui chungu kachupimi sug sug llaugtu churaraiarka. Umakunapika, Taita Diosmanda kamispa rimaikunami willaraiarka. ² Chi kukuka, tigrisina rigchami kawariwarka. Chakikunaka, usupasinami karka; simika, liunpasina. Amarun kukuka, kikinpa iachaitami chi kukuta kararka, kikinpa mandag tiaridirupi tiarigringapa; chipika, iapa achkakunata mandangapa. ³ Chi manchangasina kukupa sug umaka, wañungapasina kuchui tukuskami karka. Chi wañungapasina kuchuskaka ambirigsamurkami. Chasa kawaspaka, tukui kai alpapi kaugsanakugka, iapa ujnarispa, pai imasa rimaskata uiaspa rurai kallariirkakuna.

⁴ Amarun chi kukuta paipa mandaita karaska-mandaka, paitami kungurirkakuna. Kikin animaltapasmi chasallata kungurirkakuna, kasa nispa:

—¿Pisik tia kai kukusina? ¿Pisik pudinga, paiwa makanakungapa?

⁵ Chi manchangasina kukutaka lisinsia kuarka, atun-iachirispa Taita Diusta rimaspa kamingapa. Chusku chungu iskai killami chasa rurangapa lisinsia kuarka. ⁶ Chiwanka, Taita Diosmanda, paipa wasimanda i suma luarpi kaugsagkunatami kamidur karka.

⁷ Chi kukutaka lisinsia kuarka, Taita Diosmandalla kaugsanakuskata makaspa, bisingapa. Tukui puiblukunanigmamanda i alpakanigmamanda, tukuinigmamanda sug rigcha sug rigcha rimagkunata mandangapapasmi lisinsia kuarka. ⁸ Maikanpas kai alpapi kaugsanakug kikinpa sutikuna, paipa wañuchii tukuska Ubija chariska librupi mana tiaskakuna, tukui paikunaka chi kukuta kungurirkakuna. Ikuti sug luarpi kaugsagringapa agllaskakunapa sutikunallowami kai alpa wiñachiskauramandata chi librupi willaraiá; paikunaka, mana chi kukuta kunguringapa.

⁹ Maikan rinri iukagkunaka, kasa uiawaichi.

¹⁰ Maikan karsilpi churagtaka, chasallatami paitapas churangapa kankuna. Maikan largu machitiwa wañuchigtaka chasallatami wañuchingapa kankuna. Chiwanka, Taita Diosmandalla kaugsagkunaka iukangichimi, sutipa allita mana sakispalla, paiwa suma iuiai apanakungapa.

¹¹ Chiuramandaka, ikuti sug manchangasina iskai kachuiug atun kuku alpa ukunigmamanda llugsirigsamugtami kawarkani. Chi kachukunaka, ubijapa kachukunasinami rigchawarka. Ikuti rimaika, amarun kuku-sinami rimakurka. ¹² Chi kati kukuka, ñugpamanda manchangasina kukupa tukui mandaiwami kikinpa ñawipi rurarka. Chiwanka, tukui kai alpapi kaugsanakuskata nirka, chi ñugpamanda kuku wañungasina kuchuska ambiriskata kunguringapa. ¹³ Askurinti ujnachingasina mana imaurapas kawaskatami ruradur karka. Nina sindi awanigmamanda kai alpama urmachiimi runakunapa ñawipi ruradur karka.

¹⁴ Chasa ñugpamanda manchangasina kukupa ñawipi rurangapa chaskiskakunawaka, kai alpapi kaugsanakuskatami pandachirka, kasa nispa:

—Chi kuku largu machitiwa wañuchii tukuspa aliaskata kawaspa, chasallata kawari imajin ruraichi.

¹⁵ Chi kati atun kukutaka lisinsia kuarka, ñugpamanda kukupa imajinta kaugsachingapa. Chi imajinka, rimagsamuspa, nirka:

—Nukata mana muchawagsamugkunata wañuchii-chi.

¹⁶ Chimanda, atunkunata i uchullakunata, iukagkunata i mana iukagkunata, patrunkunata i lutrin-kunata nirka:

—Tukuikunata alli makipi i printipi chi kukupa silluta prinsaspa churaichi—. ¹⁷ Maikanpas mana chi silluta iukagpika, mana pudirkachu randingapa u katungapa. Chi prinsaska sillupika willaraiarka, ñugpamanda manchangasina kuku imasa suti kaska u paipa sutika numirukunawa.

¹⁸ Kaitaka, alli iuiaiugkunallami iachangapa kankuna. Maikanpas iuiaita apigkunaka, iachangakunami, chi atun kukupa sutika ima numirukunawa niraiangapa kagta. Chi numiruka, sug runapa sutimi willaraiangapa ka. Sugta patsa sugta chungu sugtami chi suti kangapa ka.

Patsa chusku chungu warangakuna, musu kantu kantaskakunamanda

14 Chiuramandaka, Sión suti lumapi Taita Diospa Ubija saiakuskatami kawarkani. Patsa chusku chungu chusku warangakunami paiwa sugllapi karkakuna. Chikunaka, chi Ubijapa i paipa Taitapa suti printipi sillu piaskami iukarkakuna. ² Chiuraka, atun iaku tallirispa rikugsina i sinchi triwinakugsinami suma luarnigmanda uiarigsamurka. Chi uiariipika, achka arpakuna uiachinakuskasinami uiarigsamurka. ³ Musuglla sug rigcha kantumi uiachigsamurkakuna. Taita Diospa mandag tiariduru ñugpa ladu, chusku animalsina rigchakunapa i iacha taitakunapa ñugpa ladumi chi kantu uiachigsamurkakuna. Ñi pipas mana pudirkakunachu, chi kantuta iachaikungapa. Chi patsa chusku chungu chusku waranga kai alpamanda kispichii tukuskakunallami pudirkakuna, chita kantangapa. ⁴ Paikuna, ñi imaurapas ñi maikan warmiwa mana sugllapi kaugsarkakunachu. Chasallata, paikunapa kuirpuwapas ñi imapi mana pandariska karkakuna. Paikunaka, Taita Diospa Ubijata maima rikuskamami sugllapi katiraiankuna. Paikunaka, ñugpa agllaskakunami karkakuna, runapuramanda kispiringapa; chasaka, Taita Diospa i paipa Ubijapalla niraiangapa. ⁵ Paikuna ñi imaurapas mana llullarkakunachu. Paikunataka, ¿pitakninga: “Imapipas pandariskami kangichi”?

Kimsa anjilkuna willaskakunamanda

⁶ Chiuramandaka, sug anjil awapi bulakuskatami kawarkani. Chi anjilka, kai alpapi tukui kaugsanakuskata mana puchukariduru Alli Willaita willangapa samukuskatami kawarkani. Tukui alpamandakunata, tukui puiblumandakunata i tukuinigmanda sug rigcha sug rigcha rimagkunatapas chi Willaita willangapami samukurka. ⁷ Sinchi rimaiwami nikurka:

—Taita Dios justisiai rurangapa puncha, ñami chaia-murka. Chimanda, paita suma manchaiwa iuiarispami niichi: “Kam, iapa suma atunmi kangi”. Sug luarta, alpata, lamar iakuta i iaku ñawikunata wiñachig kag-manda, paita kunguriichi.

⁸ Iskaima kawarig anjilka, kasa kaparispa nig-samurka:

—Babilonia suti atun puibluka ñami urmaspa puchukarirka. Imasami sug karisapa warmi, iapa machachii-wa upa iuiapi urmachi: chasallatami tukui alpamanda runakunata paipa mana alli iuiaiwa tuntachigsamuska karka.

⁹ Kimsama kawarig anjilka, sugkunasinallatata sinchi rimaiwa kaparispa nigsamurka:

—Maikanpas chi manchangasina kukuta i paipa imajinta muchagkunata i paipa prinsaska silluta printipi u makipi churachirigkunata, ¹⁰ paikunataka, Taita Dios kikin rabiariispa llakiiwa kupapisina mana iaku chapuskalla binuta upiachigsinami rurangapa ka. Paikunaka, Taita Diospa tukuipi alli anjilkunapa ñawipi i paipa Ubijapa ñawipika nina asufri tiaskapimi rupachii

tukungapa kankuna. ¹¹ Chi rupachii tukunakuskapa kusnika, imaurapas mana puchukarispalla kusnikun-gapagllami ka. Chi kukuta i paipa imajinta muchag-kuna paipa suti willaraiaska silluta churachiriska kag-kunaka, mana sakispallami rupachii tukungapa kankuna, maituku waranga waranga watakuna ialigpipas. ¹² Chasamanda Taita Diosmandalla kaugsagkuna, pai ima niskakunata ruraspa Jesuswa suma iuiarigkunaka, chasallata tukui animuwa apanakuichi, mana sambaiaspalla.

¹³ Chiuramandaka, suma luarnigmanda uiarkaniami kasa nikuskata:

—Iskribii. Maikanpas kunaauramanda Iaia Jesuswa suma iuiarispami wañugkunaka, Taita Diospa iapa kuias-kami kangakuna.

—Ari—, Santu Ispirituka ninmi—. Paikuna tukuipi allilla ruraskakunamandami sumaglla samaringapa kankuna.

Alpapi tarpuskata pallangasina justisiai tukuskamanda

¹⁴ Chiuramandaka, sug iura puiumi kawariwarka. Chi puiupika, sug runa tukuska rigchami tiakurka. Paipa umapika, kurita ruraska llaugtumi churaraiarka. Paipa makipika, afilaska machitisinami charikurka. ¹⁵ Chiura sug anjilka, Diospa atun wasinigmanda llugsimurka. Llugsimuspa, chi puiupi tiakuskata sinchi rimaiwa kaparirka, kasa nispa:

—Ñami justisiai puncha chaiaurka. Alpapi tarpuska ñami pallangasina ka. Chimandaka, machitiwa kuchugsina rurai, kamba justisiai tukungapa.

¹⁶ Chiuraka chi puiupi tiakugka, machitiwa alpapi kuchuspa kuchuspa tandachirka.

¹⁷ Ikuti sug anjilka, Diospa atun wasi suma luarpi tiaskamanda llugsimurka. Paipas, afilaska machitisinami charikurka. ¹⁸ Ikuti sug anjilka, altarnigmandami llugsimurka. Chi anjil, altarpini nina tiaskata kawagmi karka. Chi anjilka, afilaska machiti charikugtaka sinchi rimaiwa kaparirka, kasa nispa:

—Alpapi pukuska ubaskunaka ñami tandachingasina ka. Chimandaka, afilaska machitiwa kuchuspaka, ubas waiungakunata tandachii. †

¹⁹ Chiuraka chi anjilka, kai alpapi tiaska ubaskunata machitiwa kuchuspa kuchuspa tandachirka. Chi ubaskunataka kapidirupimi churarka, kapingapa. Chi kapidiruka niraiami Taita Diospa tukui rabiawa churaska. ²⁰ Chi ubaskuna, puiblu kanchapimi kapii tukurka. Chi kapidirumandaka, iawarmi llugsirka. Chi iawarka, kaballukunapa simipi churaska prinu awakamami jundarka. Kimsa patsa kilumitrukamami chi iawar iakusina kalpakurka.

Kanchis anjilkuna, iapa sinchi llakii charinakuskamanda

15 Chiuramandaka, sug iapa ujnaila manchangasina siñaltami sug luarmanda kawarkani. Kanchis anjilkunaka, sug sug iapa sinchi llakiimi charina-

† Chi ubaskunaka, mana alli rurag runakunami niraiankuna.

kurka. Chi llakiikuna anjilkuna runakunapagma kachamuskawaka, Taita Dios pasinsiarinapami ka. ² Ninawa kristalwa chapuska atun kuchasina rigchatapasmi kawarkani. Chi kucha ladullapika, manchangasina kukuta mitikuchigkunami Taita Dios arpa iukachiskakunata charispa saianakurka. Taita Dios karaska iuiawa mana sakirirkakuna, kukupa imajinta muchangapa i paipa suti numiru willaraiaska siñalta chaskingapa. ³ Paikunaka, Moisés suti Taita Diospa lutrinsinapa kantu i Taita Diospa Ubijapa kantumi kantanakurka, kasa nispa:

—Tukuipi pudig atun Taita Diosmi kangi.
Kam tukuipi ima ruraskakunaka
iapa suma achalai ujnangasinami kankuna.
Tukuipi alpapi mandagkunamanda mas atun mandagmi kangi.

Kam tukuipi sutipa kaskata
allilla ruraskami kapungi.
⁴ Kam tukuipi mas alli atun Taita Diosllami kangi.
Chimandaka tukuipi runakunami,
kamta suma manchaiwa iuiarispa,
mas suma atuniachinakunga.
Kam imasa chaiaskasina justisiai ruragsamugmandami

tukuipi alpanigmanda runakuna,
chasa kawaspaka, samuspa,
kamta kunguringapa kankuna.

⁵ Chiuramandaka, suma luarpi Diospa atun wasimanda pungu paskaraiaskatami kawarkani. Chi ukupika, sug linsu wasisinami kawariwarka. Chipi, Taita Dios kikin kaugsadirumi niraiá. ⁶ Chi ukumandaka, chi kanchis anjilkuna, sug sug iapa sinchi llakii charinakuskami llugsimurkakuna. Chi anjilkunaka, linsu katanga suma punchallami churariska karkakuna. Paikunapa pichupika, kuri siñidurmi chumbilliska karkakuna. ⁷ Chi chusku animalsina rigchakuna sugka, chi kanchis anjilkunata sug sug kuri kupatami kuarka. Chi kupakunapika, Taita Dios diltudupa imaurapas kaugsagpa rabiariispa llakiikunatami jundachiska tukugsamurka. ⁸ Chiuraka, tukuipi kikin suma ruraska atun Taita Diospagmanda samukug kusnimi Diospa atun wasi ukupi jundagsamurka. Chasawaka, ñi pipas mana pudirkakunachu chi ukuma iaikungapa, manara tukuipi chi kanchis anjilkuna iapa sinchi llakiikuna charinakuskata puchukankama.

Taita Dios iapa rabiariiska kanchis kupapi llakiikuna tiaskamanda

16 Chiuraka, Diospa atun wasi ukunigmanda sinchi kaparispera rimaitami uiarkani. Chi kanchis anjilkunata kasami nirka:

—Riichi. Taita Dios iapa rabiariiska kanchis kupapi llakiikuna tiaskata alpama talligriichi.

² Chasa uiaspaka, sug anjilka, llugsimuspaka, paipa kupapi tiaskata alpamami talligsamurka. Chasawaka, maikan runakuna manchangasina kukupa silluta churaraiaskakunata i paipa imajinta muchaskakuna-

taka millangasina iapa nana chupukunami llugsirirkakunata.

³ Iskaima anjilka, paipa kupapi tiaskata lamar iakumami talligsamurka. Chiuraka, wañuskapa iawarsinami tukugsamurka. Chiwanka, tukuipi lamar iakupi tiaskakunami wañurkakuna.

⁴ Kimsama anjilka, paipa kupapi tiaskata iakukunama i iaku ñawikunapimi talligsamurka. Chikunapas iawarllatatami tukugsamurkakuna. ⁵ Chiuraka, iakuta kawag anjiltami uiarkani, kasa nigta:

—Tukuipi mas alli Taitiku,
ñugpamandata karkangi
i kunaura imaurapasmi chasalla kangi.
Kam tukuipi chasa justisiai ruragmandami
tukuipi allilla kangi.

⁶ Chi justisiai tukugkunami,
kammandalla kaugsagkunata
i Santu Ispirituwa rimagkunata wañuchispa,
paikunapa iawarta icharkakuna.
Chasa ruragkunamandami
iawar upiachirkangi.
Chimandami paikunata chasa chaiarka chaskingapakuna.

⁷ Altarnigmandaka, kasa rimaipas uiariwarka:
—Ari, tukuipi pudig atun Taita Dios, kam chasa ruraspaka, sutipami tukuipi alli justisiai rurarkangi.

⁸ Chuskuma anjilka, paipa kupapi tiaskata indimami talligrirka. Chiuraka, indi kallarirka, tukuipi runakunata rupachingapa. ⁹ Chi indi rupachiskawaka, runakunapa aichakunaka rupaspami iapa llakingasina kusarinakurka. Chasa rupachikugpipas, mana pandariikunata sakirkakunachu. Mana Taita Dioswa tukuspa, paita suma atuniachirkakunachu. Chasapaka, pai Taita Dios chi llakiikunata kachamui pudigmandaka, paitami kaminakurka.

¹⁰ Pichkama anjilka, paipa kupapi tiaskata chi manchangasina kukupa mandaspa tiaridirupimi talligsamurka. Talligllapika, chi kuku mandakuska alpapika iana tutami tukugsamurka. Chasa tukugsamuura, tukuipi runakunaka dinanai kallutami kanirinakurka.

¹¹ Chasa tukugsamugpipas, pandariikunata mana sakirkakunachu. Paikunapa nanai i chupukunawa kasapas, Taita Dios suma luarpi kagtami kaminakurka.

¹² Sugtama anjilka, paipa kupapi tiaskata Eufrates suti atun iakupimi talligsamurka. Chiuraka, chi iaku tustagsamurka. Chasaka, indi llugsidirunigmanda atun mandagkunata sakirka ialingapa.

¹³ Kasapasmi kawarkani. Amarun kukupa simimanda, manchangasina kukupa simimanda i kuku wairawa llullaspa rimagpa simimandapas, tukuipi chi kimsakunapa simimandaka sug sug sapsina rigcha kuku wairakunami llugsirirkakuna. ¹⁴ Chi kuku wairakunaka, mana pipas rurangapa pudiskasiniami kawachinakurka. Kai tukuipi alpapi mandagkunata tandachingapami llugsirirkakuna; chasaka, tukuipi pudig Taita Diospa atun pucha chaimuuraka, paiwa wañuchinakungapa iuiaiwa.

¹⁵ Iaia Jesús, kasami ni:

—Uiamuichi. Nukaka, sug sisaisina mana iuiaku-urami samungapa kani. Maikanpas suma katanga churarisika rigcharaiagsina suiawanakugka, Taita Diuspa iapa kuiaskami kapuankangichi. Chasaka, chi puncha mana llatansina pingaipa kankangichichu.

¹⁶ Chi kuku wairakunaka, hebreo rimaiwa Armajedón suti pambapimi mandagkunata tandachirkakunata.

¹⁷ Kanchisma anjilka, paipa kupapi tiaskata wairapimi talligsamurka. Chiuraka, Diuspa atun wasi ukupi mandag tiaridirunigmandami sinchi rimaiwa uiarigsamurka, kasa nispa:

—Tukui imasa niraiaskasinami tukugsamurka—.

¹⁸ Chasa niuraka, rilampa kawarispá, iapa sinchi rimai i triwinu uiariura, tukui alpa kuiurispá timburig-samurka. Kai alpapi runakuna tiaskauramandata, mana imaurapas chasa kuiurispá timburii tiarkachu.

¹⁹ Chiwanka chi atun puiblu, kimsamami partirig-samurka. Chasallata, kai alpapi tiaska tukui puiblu-kunapasmi dirumbagsamurkakuna. Chasami Taita Dius, Babilonia suti atun puiblu iapa pandariikuna iukagmanda, chasa iuiarispá, kikin iapa rabiarpá llakiiwa kupapi binuta upiachigsina rurarka.

²⁰ Chasa tukuuraka, tukui islakuna i atun filukunapasmi chingarirkakuna. ²¹ Iapa atun granisukuna, awanig-manda tukui runakunapi urmagsamurkakuna. Chi granisukunaka, kimsa arubasinami llasarkakuna. Chasa llakii askurinti manchangasina tukugpipas, runakunaka Taita Diusta kamiillami apanakurka.

Karisapa warmisina atun puibluta justisiai tukuska-manda

17 Chiuramandaka, chi kanchis anjilkuna kupa charinakugpura sug rimawagsamurka, kasa ni-waspa:

—Samui. Kawachisakimi, chi karisapa atun warmisina atun iakukuna patapi tiakuskasinata imasa justisiai tukungapa kagta. ² Alpapi atun mandagkunaka, paiwa pandariikunami rurarkakuna. Alpapi kaugsagkunapas, paipa binuta machagtami upiagsina ruraspa, paiwa tukui mana allillata rurarkakuna.

³ Chasa niwaspaka, muskui ukupisina chusa sitaska alpamami apawarka. Chipika sug warmi manchangasina puka kukupi tiakugtami kawarkani. Chi kukupika, Taita Diusta kamispá rimaikunallami willaraiarka. Chi kuku karkami kanchis umaiug i chungá kachuiug. ⁴ Chi warmika, pichi i puka katangakunami churaraiarka. Kuri, pirlakuna i sug rigcha sug rigcha iapa bali uchullita rumikunawami allichiriska karka. Paipa makipika, sug kurita ruraska kupami charikurka. Chi kupapika, karikunawa pandariska i paipa iapa millai jiru iuiakunata jundachiskasinami kapurka. ⁵ Paipa printipika, sug mana pipas iachangasina sutimi willaraiarka.

Kasami suti niraiá: “Nuka, Babilonia suti iapa atun puiblumi kani. Tukui karisapa warmikunapa mamami niraiani. Tukui sug rigcha mana allilla ruraikuna alpapi tiaskakunapa mamapasmi kani”.

⁶ Chiuramandaka, chi warmita kawaspa, iuiariwagsamurkami, Taita Diuspalla kagkunata i Jesusmanda

willagkunata wañuchispa, paikunapa iawarta upiaspa machaskasina kagta. Paita kawaspa, iapa mancharirkani. ⁷ Chi anjilka niwarka:

—¿Imapatak mancharingi? Chi warmi kanchis umaiug chungá kachuiug atun kukupi tiakuska i kikin kuku ima niraiaskakunatami willangapa kaiki. ⁸ Chi kukuta muskui ukupi kam kawaskaka, ñugpatami kaugsarka; kunaúra mana tianchu. Mana tiagpipas, ikutimi alpa ukunigmanda llugsimungapa ka, diltudupa manara wañuchii tukugpi. Chi kuku ñugpata kaugsaska, kunaúra mana tiaska ikuti samugta kawaspa, kai alpapi kaugsagkuna, achkakuna iapa mancharispami kawan-gapa kankuna. Chasa mancharigkunapaka, kikinpa sutikuna kai alpa wiñachiskauramandata suma luarpi kaugsagringapa willaraiaska librupi manima willaraiangapa ka.

⁹ —Alli iuiái iukagkunami kaita iachangapa kangichi. Chi kanchis umakunaka, kanchis lumakunami niraiá. Chi lumakunapimi chi warmi niraiaska tiaku. ¹⁰ Chi umakunaka, kanchis atun mandagkunapasmi niraiankuna. Chi kanchis mandagkunamandaka, pichkakuna ñami wañurkakuna. Sugka, kunaúrami mandaku. Ikuti sugka manara samunchu. Pai mandai kallariuraka, pai mandakuska mana iapa unaiangapa kanchu. ¹¹ Chi ñugpata kaugsaska atun kukuka, kunaúra manima ña tia; chika, chi kanchis mandagpuramanda kaspá, ikutimi kawarigsamungapa ka pusagma. Paimi diltudupa wañuchii tukungapa ka.

¹² —Chi chungá kachuta kawarkangi; chikunaka, chungá atun mandagkunami niraiankuna. Chi mandagkunaka, manara mandangapa kallarikunachu. Paikunaka, sug ratullami chi manchangasina kukuwa sugllapi mandangapa kankuna. ¹³ Chi chungá mandagkunaka, suglla iuiaiwami tukungapa kankuna. Paikunapa mandaitaka chi manchangasina kukutami kuangapa kankuna, pai mandai iukangapa. ¹⁴ Paikunaka, Taita Diuspa Ubija sutiwami makanakungapa kankuna. Chi Ubija sutika, iaiakunapa iaia i mandagkunatapas tukuita mandag kaspá, chiwami tukui kukuwa kaskakunata mitikuchingapa ka. Taita Dius agllaspa kaiaska paita mana sakispalla kagkunami chi Ubija sutiwa sugllapi mitikuchingapa kankuna.

¹⁵ Kasapasmi anjil niwarka:

—Iakukuna patapi karisapa warmisina tiakugta kawarkangi; chi iakukunaka niraiami tukui puiblukuna, tukui alpamanda runakuna i tukuinigmanda sug rigcha sug rigcha rimagkuna.

¹⁶ —Chi chungá kachu atun kukupi tiaskata kawarkangi; chikunaka niraiami karisapa warmisinawa rabiaringapa kagkuna. Rabiarpaspa, chi warmisinata ima iukaskata kichuspa, katanga pariju lluspichigsina ruraspami sitangapa kankuna. Paipa aichatapasmi mikugsina rurangapa kankuna. Nispaka, tukuimi rupachingapa kankuna. ¹⁷ Taita Diusmi paikunata chasa iuiaikuna kachamurka, pai kikin imasa munaskasina paikuna rurangapa. Paimi chi mandagkunata iuiachirka, suglla iuiaiwa tukuspa, chi kukuta mandai

kuangapa; chasaka, Taita Dius kikin imasa pai rimaskasina tukugsamungapa.

¹⁸ —Chi warmita kam kawarkangi; chika niraiami atun puiblu tukui alpapi atun mandagkunata mandag.

Babilonia atun puiblu justisiai tukuskamanda

18 Chiuramandaka sug iapa iacha anjil, suma luar-manda uraikumukugtami kawarkani. Paipa suma punchaiachiiwaka kai alpa mas punchami kawarigsamurka. ² Chi anjilka, sinchi rimaiwa kaparirka, kasa nispa:

—Babilonia suti atun puibluka ñami urmaka; ñami urmaka.

Tukui sug rigcha sug rigcha millangasina kuku waira kaugsadirumi

chi atun puiblu tukugsamurka.

Chillapita, tukui millangasina kuku piskukuna kaugsadirupasmai tukugsamurka.

³ Chi puiblupimi tukui alpamanda kaugsagkunaka, paiwa binuta machagta upiagsina ruraspa, tukui jiru pandariikunata ruraspa kaugsarkakuna.

Kai alpapi atun mandagkunapas, paiwami iapa pandarii rurarkakuna.

Chi puiblu iapa iukag kaskamanda, kai alpapi randispa katuspa purigkunapas, pai iapa ima munaska katui tiaskakunawami iapa iukag tukuska karkakuna.

⁴ Chiuramandaka, sug rimai suma luarnigmanda uia-riwarka, kasa nispa:

—Nuka agllaska runakuna, chi puiblumanda llugsiichi.

Chasaka kamkuna,

chi puiblumanda pandariikunapi mana urmankangichichu.

Llugsigpikunaka,

chi puiblupi iapa sinchi llakiikuna chaiangapa kaspas

mana kamkunata chaiangachu.

⁵ Chi puiblumanda pandariikunaka, iapa achkami mirarka.

Chiwanka Taita Diuska,

chi pandariikunata mana kungaringapa kanchu.

⁶ Imasami sugkunata mana allilla rurarka:

kamkunapas chasallata

chaugpi iapawa paita kutichiichi.

Pai imasa mana allilla ruraskata iskaima randichiichi.

Imasami sugkunata llakiikuna upiachigsina rurarka: chasallata paita iskaima mas timburiskata karaichi.

⁷ Imasami iapa iukag tukuspa, sugkunata unžarka:

chasallata paitapas unžaspa

llakichispa nanachiichi.

Paipa iuiailapimi kasa iuiá:

“Nukami kani tukuikunata mandaspa tiakug.

Mana kusaiug warmisinaka

mana kaugsakunichu.

Ima llakiikunapas manima iukangapa kanichu”.

⁸ Chasa iuiakugpipas,

suglla punchapimi

kasa paita samungapa ka:

sinchi llakii,

iarkai i wañuipas.

Ninawapasmi

rupachii tukungapa ka.

Tukui pudig atun Taita Dius kikinmi

chi puibluta justisiagsamurka.

⁹ Kai alpapi atun mandagkuna, chi puibluwa iapa pandarispa imasa munaskasina iapa iukag tukuskakuna, chi mandagkunaka, chi puiblu rupakuskata, nina sindi kusni puiiakuskata kawaspaka, iapa atun llakiiwami wakaspa kangapa kankuna. ¹⁰ Iapa manchaiwami chi llakiikunata karumandalla kawanakungapa kankuna, kasa nispa:

—¡Ai, ai, tukui pudig atun puiblu Babiloniami karkangi!

Suglla urallapimi

diltudupa llakingasina

justisiai tukurkangi.

¹¹ Kai alpapi randispa katuspa purigkunapasmi chi puiblumanda iapa llakirispas wakangapa kankuna. Kunauramandaka, ñi pipas mana tiangapa kankunachu, paikuna ima katungapa apamunakuskata randingapa. ¹² Kasami apadur karkakuna: kuri, kulki, pirla i sug rigcha iapa bali uchullita rumikuna, sida, pichi, puka i sug rigcha iapa suma linukuna, tukui sug rigcha sug rigcha suma asna kaspikuna, marfilita ruraskakuna, iapa bali kaspikuna, brunsi, iru, marmul suti iura rumi, ¹³ kanila, miski suma asnai asnarikuna, mira suti i sug rigcha asna kupalkuna, suma asnaiachiridiru tugtu iakukuna, binu, asiti, arina, trigu, aparichidiru animalkuna, ubijakuna, kaballukuna, kaballukuna aliudiru augtukuna i randispa i katuduru runakuna.

¹⁴ Chi puibluta ningapami kankuna:

—Sachakunamanda iapa miski muiukuna chituku munadur karkangi;

chikunaka ñami tukuripurkangi.

Kam sumaglla allichirispas churaridurukuna,

suma mikui mikuspa kuntintulla kadiru,

tukui chikunami puchukaripurkangi.

Tukui ima iukaska, mana mas kawangapa kangichu.

¹⁵ Imasami randispa katuspa purirkakuna; chasawaka, iapa iukag tukurkakuna; chasa puibluta kawaspas, iapa manchaiwami llakispas, karumandalla kawanakungapa kankuna. Iapa atun llakiwi wakaspa kaparingapami kankuna, kasa nispa:

¹⁶ —¡Ai, ai, chituku atun puiblumi karkangi!

Pichi, puka i sug rigcha sug rigcha

iapa suma linsu katanga

churariska warmisinami rigchakurkangi.

Kuri, pirla i sug rigcha sug rigcha

iapa bali uchullita rumikunawa

allichiriskami karkangi.

¹⁷ Chituku iapa iukaikunapas, mana unailami tukuripurkangi.

Chasallata tukui barkukunata mandagkuna, iaku pata pata rigsispa purichigkuna, barkukunapi trabajag-

kuna i tukui lamar iakupi chalwaspa purigkuna, chi tukui kunami karumandalla kawanakurka. ¹⁸ Chi puiblu rupakuskata, kusni nina sindi puiuiakuskata kawas-paka, kaparirkakuna:

—¿Maikan puiblusk tia; kam atun puiblu puchukarikingi: chasa?

¹⁹ Chasa kaparispaka, dillakii alpa ñutuchispa, umapi tallirirkakuna. Iapa atun llakiiwa wakaspa, kasapasmi kaparirkakuna:

—¡Ai, ai! Kai atun puiblupi iapa iukaiwaka, tukui barku iukagkunapasmi iapa iukag tukugsamurkanchi.

Tukui ima iukai tiaska, mana unallami puchukarigsamurka.

²⁰ Ikuti kamkuna Taita Diosmandalla suma kaugsagkuna,

pai kikin agllaska runakuna i Santu Ispirituwa rimagkunaka, sumaglla alli iuiachiriilla sug luarpi kaichi, chi puiblu puchukariskamanda.

Taita Dioska, ñami kamkunamanda allilla justisiai ruragsamurka.

²¹ Chiuramandaka sug iapa iacha anjilka, atun kutan-gasina rumita atarichispa, lamar iakuma sitamurka, kasa nispa:

—Kasami Babilonia atun puiblupas diulpilla sitai tukungapa ka. Chiuramandaka, mana mas kawaringapa kanchu.

²² Mana mas, kamba ñambikunapika, arpa, flaugta i bututu uiringapa kankunachu.

Ñi maikan ima ruraikuna ruradurkunapas, kamba puiblupi mana mas kawaringapa kankunachu. Ñi maikan rumipi kutagkunapas mana mas uiringapa kankunachu.

²³ Ñi ima punchaiachidirupas mana mas punchaiachingapa tiangapa kanchu. Mana mas kasaraipi kusikuchinakui atun punchasina tiangapa kanchu.

Kambagpi randispa katuspa purigkunaka, kai alpapi iapa pudigkunami karkakuna. Kai alpapi kaugsanakuskata, tukui kunatami kamba jiru iachaiwa llullachigsamurkangi.

²⁴ Santu Ispirituwa rimagkuna, Taita Diosmandalla suma kaugsagkuna i sugkuna kai alpapi wañuchii tukuskakunapas, tukui chi runakunapa iawarpas chi puiblupimi kawarirka.

19 Chiuramandaka, iapa achka runakuna sinchi rimaiwa suma luarpi kaparinakuskatami uiar-kani. Kasami ninakurka:

—Nukanchipa atun Taita Diusta iapa suma atuniachisunchi. Paimi suma atun tukui pudig kispichig ka.

² Paimi tukuipi allilla justisiai sutipa rurá. Chi karisapa atun warmisina kag,

tukui kai alpamanda runakunata atun pandariikunapi urmachispa wagllichirka. Chimandami paita justisiai ruragsamurka.

Chi warmisina kag, Taita Diospa lutrinsinakunata wañuchiskamandami paita chasa justisiai rurarka.

³ Iskaima ikuti kaparigsamurkakuna, kasa nispa: —Atun Taita Diusta iapa suma atuniachisunchi. Chi puiblu rupakuska nina sindi kusnika, mana sakispallami puiuiakungapa ka, maituku waranga waranga watakuna ialigpipas.

⁴ Chiura chi iskai chungu chusku iacha taitakuna i chusku animalsina rigchakunaka, mandag tiaridirupi tiakug Taita Diospa chaki ladu kumurispa, kungurirka-kuna, kasa nispa:

—Chasa kachu. Atun Taita Diusta iapa suma atunia-chisunchi.

⁵ Chiuraka, chi tiaridirunigmandaka sug rimai uiari-warka, kasa nispa:

—Nukanchipa Taita Diospa lutrinsinakuna, paita suma kuiaspa manchaiwa kagkuna, uchullakuna i atunkunapas, tukui kuna suma paita atuniachiichi.

Taita Diospa Ubija suti kasarai punchamanda

⁶ Iapa achka runakuna rimanakugsinami uiarkani. Atun iaku tallirispa rikugsina i sinchi triwinusinapasmi uiariwarka. Kasami ninakurka:

—Nukanchipa tukui pudig atun Taita Dios, paipa suma mandaiwami ña kallarirka. Chimandaka, paita iapa suma atuniachisunchi.

⁷ Sumaglla alli iuiachiriwa kuntintarisunchi. Paita iapa suma atuniachisunchi.

Taita Diospa Ubija suti kasarai punchaka ñami chaiamurka.

Paipa warmi tukungapa kagpas ñami allichiriska ka.

⁸ Ñami paipa warmi tukungapa kagta lisinsia kuarka, ñi imapi mana mapa suma pucha katangata churaringapa—.

Chi suma katangakunaka, Taita Diosmandalla suma kaugsagkuna imapipas allilla ruraskakunami niraiá.

⁹ Chiuraka, anjilka niwarka:

—Kasa iskribii. Maikanpas Taita Diospa Ubija suti kasaraska budama kunbidai tukuskakunaka, Taita Diospa iapa kuiaskami kankuna.

Kasapasmi niwarka:

—Chikunaka, kikin Taita Dios rimaska, tukui sutipami ka.

¹⁰ Chasa niwauraka, anjilpa chakipi kungurirkani, paita ningapa: “Iapa allimi kangii”. Chiuraka, paika niwarka:

—Mana chasa rurakui. Nukaka, kamsina i kamba waugkikunasina, Jesuspa alli willaikunata suma charirigkunasina, Taita Diospa lutrinsinallatatami kani. Taita Diosllatami kungurii iukangi—. Jesuspa willaikunawami Santu Ispirituwa rimagkunata suma iuiachii tukunakuna.

Iura kaballupi tiakuskamanda

¹¹ Chiuramandaka, suma luar paskaskasinami kawariwarka. Chipika, sug iura kaballumi kawariwarka. Kaballupi tiakugka suti kanmi: “Sutipa tukui ima niskata allilla rurag”. Tukuipimi imasa chaiaskasina justisiá. Wañuchinakungapa chaiaura, allillapami rurá. ¹² Paipa ñawi murukunaka, nina sindisinami punchaiakurka. Paipa umapika, achka llaugtukunasinami churairiarka. Chi llaugtukunapika, sug sutimi willaraiarka. Chi sutitaka, paillami iachá ima niraiagta. ¹³ Iawarwa tiñiriska katangami churairiarka. Paipa sutika kanmi: “Diuspa Rimai”.

¹⁴ Suma luarpi kaugsag suldadukunaka, iura kaballupi tiarisipami paita katirairakakuna. Chi suldadukunaka, mana mapa, suma iura linsu katangakunami churairiarkakuna.

¹⁵ Chi mandagpa simimandaka afilaska largu machitimi llugsiraiarka; chiwanka, kai alpapi kaugsanakuskata kuchungapakunata. Iru barawami iapa mandagapa kankunata. Ubaskunata chakiwa sinchi saruspa kapigsinami justisiai rurangapa kankunata. Tukui pudig Taita Dios iapa rabiariapa llakiiwa kupapi jundachigsina ruraspá upiachingapami kankunata. ¹⁶ Paipa katangapi i paipa kungur awa ladu, kasami niraiarka: “Atun mandagkunapa mandag i iaia mandagkunapa iaia”.

¹⁷ Chiuramandaka, sug anjil indipi saiakuskatami kawarkani. Chi anjilka, tukui gallinasukuna awapi bulanuskata sinchi rimaiwa kaparispa, kasa nirka:

—Samuichi. Taita Dios achka mikui tiaskama tandarigsamuichi. ¹⁸ Chipika, atun mandagkuna, suldadukunata mandagkuna, iapa mana manchagkuna, kaballukuna i kaballupi tianakugkuna, patrunkuna i lutrinkunapas, uchullakuna i atunkunapas, chi tukui-kunapa aichatami mikungapa kangichi.

¹⁹ Chiuraka, chi manchangasina kukuta i kai alpapi atun mandagkunata paikunapa suldadukunawantami kawarkani. Chikunaka tandariskami karkakuna, chi iura kaballupi tiakugwa paipa suldadukunawanta wañuchinakungapa. ²⁰ Manchangasina kukuta i kuku wairawa llullaspa rimagtami sugllapi apii tukurkakuna. Chi llullaspa rimagmi manchangasina kukupa ñawipi mana imaurapas kawaskasinakunata ruradur karka. Chasakunawaka, chi kukupa sillu prinsaska churachiriskakunata i paipa imajinta muchagkunata llullachidur karka. Chi iskandikuna, asufri rupakuska atun nina ukuma kaugsa sitai tukurkakuna. ²¹ Tukui iskandita katiraiagkunaka, chi kaballupi tiakugpa simimanda largu machitiwami wañuchii tukurkakuna. Chi wañuchii tukuskakunapa aichata, tukui gallinasukuna sagsagtami mikurkakuna.

Iaia kuku, diltudupa nina ukuma sitai tukuskamanda

20 Chiuramandaka, sug anjil suma luarmanda uraikumukugtami kawarkani. Chi anjil, alpa ukunigmanda pusupa pungumanda llabi i atun kadinapas

chariskami uraikumukurka. ² Chi anjilka, chi iapa atun amarun kukutami apigsamurka. Chi amarunka niraianmi unai ñugpamanda kuku kulibra, Satanás suti iaia kuku. Chi amarunta apispaka, waranga watapa kadinawami watarka. ³ Nispaka, jundu pusumami sitarka. Pusu punguta wichkaspa, sillaspa sakirka; chasaka, chi waranga wata ialinkama, kai alpapi kaugsagkunata mana llullachigsamungapa. Waranga wata ialiraka, ikutimi sug ratullaka kacharii tukungapa ka.

⁴ Achka mandag tiaridirukunatapasmai kawarkani. Chipi tianakugtaka, Taita Dios kuarkami, justisiai rurangapakuna. Sug runakunapa almakunatapasmai kawarkani. Chi runakunaka, Diuspa Rimaita mana sakispalla, Jesusmanda willagkuna kagmandami kunga anchuchispa wañuchii tukurkakuna. Paikunaka, chi manchangasina kukuta i paipa imajinta mana muchangapa munarkakunachu. Chasallata, paipa prinsaska silluta printipi ñi makipi mana churachiringapa munarkakunachu. Chiwanka paikuna, kaugsaripa, waranga watami Cristowa mandag kangapa kankuna. ⁵ Paikunaka, ñugpa kaugsarigkunami kankuna. Chi waranga wata manara ialinkama, sug wañuskakunaka manara kaugsaringapa kankunachu. ⁶ Ñugpa kaugsarigkunaka, Taita Diospa iapa kuiaskami kankuna; paipallami niraiankuna. Paikunataka, parisma wañuika mana chaiangapa kankunatachu. Paikunaka, Taita Dios i Cristomanda sasirdutikunami kangapa kankuna. Waranga watami Cristowa mandagkuna kangapa kankuna.

⁷ Chi waranga wata ialiskauramandaka, iaia kukuka wichkaraiaskamanda kacharii tukungapa ka. ⁸ Llug-sichii tukuspaka, kai tukui alpapi kaugsanakuskatami llullachigsamungapa ka. Gog i Magog suti alpakunapi mandagkunatami llullachigsamungapa ka. Nispaka, paikunapa suldadukunatami tandachingapa ka, Cristowa puchukanakungasina makanakungapa. Chi suldadukunaka, askurinti iapa achkami karkakuna, lamar iaku plaiakunapi arinasina; chiwanka, mana kuintangapa pudiringasina achka.

⁹ Chi kukuwa kag suldadukunaka, tukuinigmanda samuspaka, Taita Diosmandalla suma kaugsagkuna kaskata i pai kuiaska puiblutami muiuchigsamurkakuna. Chasa kauraka, awanigmada ninami, uramuspa, tukuikunata rupachispa puchukagsamurka. ¹⁰ Chi iaia kuku tukuikunata llullachigtaka asufri rupakuska atun nina ukumami sitai tukurka. Chipika, manchangasina kuku i kuku wairawa llullaspa rimagpas timpumi sitai tukuska karkakuna. Chi ukupi kaskakunaka, tuta i puncha tukui llakii i nanaikunami iukan-gapa kankuna, maituku waranga waranga watakuna ialigpipas.

Taita Diospa atun mandag tiariduru ñugpa ladu justisiai tukuskakunamanda

¹¹ Chiuramandaka, mandag tiaridirutami kawarkani; chika, iapa iura i atunmi karka. Chipika, Taita Diosmi tiakurka. Paipa ñawinigmada, kai alpa i sug luaraka anchurisipami tukurirka, ñi maipipas mana mas kawar-

ringapa. ¹² Atun i uchulla wañuskakuna, chi mandag tiaridirupa ñugpa ladu saianakugtami kawarkani. Chi uraka, sug librukunata paskarkakuna. Maikan suma luarpi kaugsaringapa willaraiaska librutapasmi paskarkakuna. Chi librukunapi imasa willaraiaskata kawaspami, allilla u mana allilla kaskata chi wañuskakunata justisiai rurai tukurkakuna. ¹³ Lamar iakupi wañuskakunata kutichimurkami, chasallata kai alpapi pambaraiaskakunatapas. Tukuikunatami justisiai chaiarkakunata. Chasaka tukuikuna, imasa allilla ruraskakunawa u mana allilla ruraskakunawami justisiai tukurkakuna. ¹⁴ Justisiai ruraskauramandaka, kikin wañuitami rupakuska atun nina ukuma sitai tukurka. Chi nina rupakuskaka niraiami diltudupa parisma wañui luar. ¹⁵ Maikanpa suti kaugsangapa willaraiaska librupi mana taririgpika, paikunatapasmi chi ukuma sitai tukungapa kankuna.

Sug luar i kai alpa luar, musu kaskamanda

21 Chiuramandaka, musu sug luar, chasallata musu alpami kawarkani. Ñugpa sug luar i ñugpa alpapas puchukariskami karka. Lamar iakupas ña mana mas kawariwarkachu. ² Sug atun suma puiblu, Taita Diuspalla kag musu Jerusalén niraiaskatami kawarkani. Chi puibluka, suma luarmanda, Taita Diuspagmandami uraikumukurka. Imasami warmi tukungapa kag, sumaglla allichiriska ka, kusawa sugllapi tukungapa: chasallatami allichiriska karka.

³ Mandag tiaridirunigmanda sinchi rimai uiariwarka, kasa niwaspa:

—Kawai. Kaika, Taita Dios runakunawa kaugsadirumi chaimurka. Paikunawami kaugsangapa ka. Chi runakunaka, paipallami kangapa kankuna. Taita Dios kikinmi paikunawa kangapa ka. ⁴ Paikunapa tukui wikimi ñawimanda tustachingapa ka. Mana mas tiangapa kanchu wañui, ñi wakai, ñi llakiiwa kaparii ñi nanai. Tukui ima ñugpata tiaskakuna ñami puchukarirka.

⁵ Chiuraka, mandag tiaridirupi tiakugka nirka:

—Kawai. Nuka, tukuimi musuiachikuni—. Kasapasmi niwarka— Iskribii: chi rimaikunaka sutipa kaskatami nini. Tukui nuka niskami tukugsamungapa ka.

⁶ Kasapasmi niwarka:

—Tukui imasa niraiaskasinami tukugsamurka. Litrapa A kallarisina i Z puchukagsina, chasallata nukami kani kallari i puchukag. Maikan iakunaiai iukaskataka karangapami kani, suma kaugsai karadiru iaku ñawimanda mana randispalla upiangapa. ⁷ Mana alli rurai-kunata binsigtami chasa karangapa kani. Nukaka, paipa Taita Diosmi kangapa kani. Paika, nukapa wambami niraiangapa ka. ⁸ Ikuti maikanpas nukata kungariwaspa mana uiawagkuna, mana nukawa iuiariwagkuna, jiru millaita ruragkuna, wañuchigkuna, kari warmiwa pandarigkuna, jiru iacha pukugkuna, ianga diuskunata kungurigkuna i tukui llullachigkuna, chikunataka chaianmi, asufri rupakuska atun nina ukuma sitai tukungapa. Chika, diltudupa parisma wañui luarmi niraiá.

Musu Jerusalén niraiaskamanda

⁹ Chiuramandaka, chi kanchis anjilkuna puchukangapa llakiikuna kupapi junda tiaskata chariska kagpura sugka, samuspaka, niwarka:

—Samui. Taita Diospa Ubijapa warmi tukungapa kaskata kawachisaki.

¹⁰ Chasa niwaspaka, muskui ukupisina awa atun lumamami apawarka. Chimandaka, atun suma puiblu, Taita Diuspalla kag musu Jerusalén niraiaskatami kawachiwarka. Chi puibluka, suma luarmanda, Taita Diuspagmandami uraikumukurka.

¹¹ Chi puibluka, Taita Diospa suma punchaiachiiwami punchalla karka; iapa bali rumisina, bidriusina, jaspe suti rumisina, chasa. ¹² Chi puiblu awa atun kincha muiuraiaskapika, chungu iska i pungumi iukarka. Tukui pungupimi sug sug anjil saianakurka. Chi pungukunapika, ñugpamanda achala taita Israelpa chungu iska i wambrakuna imasa suti kaskami sug sug pungupi willaraiarka. ¹³ Kasami tiarkakuna: kimsa pungu, indi llugsidiru ladu; sug kimsaka, alli maki ladu; sug kimsaka, indi chingaridiru ladu; sug kimsaka, lluki maki ladu. ¹⁴ Chi awa kincha muiuchiraiaskaka, chungu iska i atun rumikunapimi saiachiska karka. Chi rumikunapika, Taita Diospa Ubijapa chungu iska i agllaska runakuna imasa suti kaskami sug sug rumipi willaraiarka.

¹⁵ Nukawa rimakug anjilka, kurita ruraska tupumi charikurka; chiwanka, chi atun puibluta, pungukunata i awa kincha muiuchiraiaskata tupungapa. ¹⁶ Chi puibluka, chuskundima larguma i anchuma chasallata iwalllami tupu iukarka. Anjil tupuuraka, iska i waranga iska i patsa kilumitrumi iukarka. Larguma, awama, anchuma, chasallatami tukuima tupuraiarka. ¹⁷ Awa kincha muiuchiraiaskatapasmi anjil tupurka. Runakuna tupudiruwaka iska i chungu iska i brasasinami awama iukarka.

¹⁸ Chi awa kinchaka, jaspe suti iapa suma rumiwami ruraska karka. Chi atun puibluka, maillaska bidriusina pucha kurillawa ruraskami karka. ¹⁹ Awa kincha kallariipi churaska, chi atun rumikunaka karkakunami sug rigcha sug rigcha iapa bali rumikunawa sumaiachiska.

Sug rumika, jaspe sutiwami sumaiachiska karka; iskaimaka, zafiro sutiwa; kimsamaka, ágata sutiwa; chuskumaka, esmeralda sutiwa; ²⁰ pichkamaka, ónise sutiwa; sugtamaka, kornalina sutiwa; kanchismaka, krisólito sutiwa; pusagmaka, berilo sutiwa; iskunmaka, topasio sutiwa; chungamaka, krisoprasa sutiwa; chungu sugmaka, jasinto sutiwa; chungu iskaimaka, amatista sutiwa.

²¹ Tukui chungu iska i pungukunaka, askurinti atun pirlallami karkakuna. Tukui pungukunaka, sug suglla pirlawami ruraska karka. Puiblu atun ñambika, bidriusina pucha kurillawami ruraska karka.

²² Chi puiblupi, Taita Diusta iuiariduru wasi apartika mana kawariwarka. Chimandami chi puiblupi pudiri, tukui pudig atun Taita Diusta i paipa Ubijata maipipas kunguringapa. ²³ Indi ñi killa mana ministinchu, chi puibluta puchaichingapa. Taita Dios suma kawakus-kawami pucha ka. Paipa Ubijami tukui chipi puchaichig niraiá. ²⁴ Chi puiblupi puchaikuskawami kai alpamanda kaugsagkunapas punchalla puringapa kankuna. Kai alpapi atun mandagkunaka, ima suma iukaskatami chi puibluma apangapa kankuna. ²⁵ PUNCHAKUNA, chi puiblupika pungukuna paskaskallami kangapa kankuna. Chipika, mana tuta tiangapa kanchu. ²⁶ Tukui kai alpapi kaugsagkunaka, paikunapa ima suma iukaikunata i iachaikunata chi puiblumami apangapa kankuna. ²⁷ Maillallapas mapa niraiaskaka mana chipi iaikungapa kanchu. Jiru millaita ruragkuna, llullachispa kaugsagkuna, chikunapas mana iaikungapa pudingapa kankunachu. Runakuna kikinkunapa suti kaugsangapa willaraiaska librupi tiaskakunallami chima iaikungapa kankuna. Chi librutaka, Taita Diospa Ubijami chariku.

22 Chiuramandaka chi anjilka, suma kaugsai karadiru atun iakutami kawachiwarka. Chi iakuka, sug bidriusina punchami karka. Taita Dios i paipa Ubijata mandadirunigmandami chi iaku llugsimurka. ² Chi puiblu atun ñambi chaugpipi i iaku pata patapas, chasallata kaugsai karadiru sachakunami wiñanakurka. Chi sachakunaka, killa killapimi mikui aparí. Chasaka, watapika chungu iskaia biajimi aparí. Chi sacha pangakunaka, kai alpapi kaugsagkunamanda ambimi ka. ³ Ñi ima maldisiskaka mana chipi tiangapa kanchu. Taita Dios i paipa Ubijata mandadiruka, chi puiblupimi kangapa ka. Paipa lutrinsinakunaka ningapami kankuna: "Iapa allimi kangí". ⁴ Paita ñawi ñawimi kawangapa kankuna. Paipa sutika, printipimi churairiangapa kankuna. ⁵ Tutaka, chipi mana tiangapa kanchu. Chipi kaugsagkunaka, indi ñi sug rigcha puchaichiduru mana ministingapa kankunachu. Atun Taita Diosmi paikunata puchaichig kangapa ka. Paikuna mandangapami kankuna, maituku waranga waranga watakuna ialigpipas.

Jesucristo ña samungapa kaskamanda

⁶ Chiuramandaka, anjilka niwarka:

—Chi rimaikunaka sutipa kaskatami nini. Tukui nuka niskaka, chasami tukugsamungapa ka. Kikin atun Taita Dios, Santu Ispirituwa rimagkunata iuiachigmi paipa anjilta kachamurka, paipa lutrinsinakunata ima mana unailapi pasaringapa kaskata iuiachispa kawachingapa.

⁷ Iaia Jesusmi niku:

—Ñami samungapa kani. Santu Ispirituwa kai librupi willaraiaskata uiaspa, chasallata kaugsagkunaka, Taita Diospa iapa kuiaskami kapuankangichi.

⁸ Nuka Juanmi chasa uiarkani i kawarkani. Chasa uiaspa i kawaspaka, chi anjil kawachiwaska kagpa chakipi kungurirkani, paita ningapa: "Iapa allimi kangí". ⁹ Chiura, paika niwarka:

—Mana chasa rurakui. Nukaka, kamsina, kamba waugkikunasina, Santu Ispirituwa rimagkunasinna i kai librupi willaraiaskata suma charirigkunasina, Taita Diospa lutrinsinallatatami kani. Taita Diosllatami kungurii iukangi.

¹⁰ Kasapasmi niwarka:

—Kai librupi ima Santu Ispirituwa willaraiaskata mana upalla kangí. Kam ima iachaskata willangi. Ñami chaimuku, tukui ima niraiaskasina tukugsamungapa. ¹¹ Ianga kawangi mana allilla ruragkunata i jiru millai ruragkunatapas; paikuna iachachukuna. Ikuti allilla ruragkunaka, chasallata sumaglla apanakungichi. Taita Diosmandalla suma kaugsagkunapas, paillawa iuianakungichi.

¹² Iaia Jesusmi niku:

—Ari, ñami samukuni. Tukuikuna allilla u mana allilla ruraskakunatami imasa chaiaskasina karagsamungapa kani. ¹³ Litrapa A kallarisina i Z puchukagsina, chasallata nukami kani kallari i puchukag.

¹⁴ —Maikanpas katangakunata Taita Diospa Ubijata iawarpi tagsagsina ruragkunaka, suma kaugsai karadiru sachamandata mikui pudingapami kangichi. Taita Diospa iapa kuiaskami kangichi. Chasamanda kamkunaka, chi alli puiblu pungukunapi iaikungapapasmi pudingapa kangichi. ¹⁵ Ikuti maikanpas alkusina mana alli iuiaiwa kaugsagkuna, jiru iachaiwa pukugkuna, kari warmiwa pandarigkuna, wañuchigkuna, ianga diuskunata kungurispas muchagkuna i llullaita munaspas llullachigkuna, chikunaka kanchapimi sakii tukungapa kankuna.

¹⁶ —Nuka Jesús, nukapa anjilta kacharkaikichitami, tukui nukawa tukuskakunata chasa willangapa. Nukami atun mandag Davidpa iawar kani. Lusiru istrillasinami kani.

¹⁷ Santu Ispiritu i Taita Diospa Ubijata warmika ninakumi:

—Samui.

Maikan uiagka niichi:

—Samui.

Maikan iakunaiai iukagkunaka, munaspaka samuichi, diltudupa kaugsai karadiru iakuta mana randispalla upiagsamungapa.

¹⁸ Santu Ispirituwa kai librupi willaraiaskata tukui uiagkunataka kasami nuka iuiachiikichita: maikan kai willaraiaskapi mas iapagpika, Taita Dioska kai librupi willaraiaska llakiikunatami paita kachamungapa ka.

¹⁹ Maikanpas kai librupi Santu Ispirituwa willaraiaskata anchuchigpika, Taita Dioska mana sakingapa kanchu, diltudupa kaugsai karadiru sachamandata pai mikungapa. Chasaka, Taita Diospalla kag puiblupi mana kaugsagringapa pudingapa kanchu. Chasamandami kai librupi willaraiá.

²⁰ Iaia Jesús, chasa willaspaka, nikumi:

—Ari. Nukaka ñami samukuni.

Chasa kachu. Samuilla, Iaia Jesús.

²¹ Iaia Jesuspa suma kuiaipi tukui paipalla kagkunata charipuachu.